

Namo tassa bhagavato arahato sammāsambuddhassa

# Majjhimanikāye

## Mūlapaṇṇāsa-ṭīkā

(Paṭhamo bhāgo)

### Ganthārambhakathāvaṇṇanā

1. Saṃvaṇṇanārambhe ratanattayavandanā saṃvaṇṇetabbassa dhammassa pabhavanissayavisuddhipaṭivedanattamaṃ, taṃ pana dhammasaṃvaṇṇanāsu viññūnaṃ bahumānuppādanattamaṃ, taṃ sammadeva tesamaṃ uggahadhāraṇādikkamaladdhabbāya sammāpaṭipattiyā sabbahitasukhanipphādanattamaṃ. Atha vā maṅgalabhāvato, sabbakiriyāsu pubbakiccabhāvato, paṇḍitehi samācaritabhāvato, āyatimaṃ paresamaṃ diṭṭhānugatiāpajjanato ca saṃvaṇṇanāyaṃ ratanattayapaṇāmakiriyā. Atha vā ratanattayapaṇāmakaraṇaṃ pūjanīyapūjāpuññavisesanibbattanattamaṃ. Taṃ attano yathāladhasampattinimittakassa kammassa balānuppādānattamaṃ. Antarā ca tassa asaṅkocanattamaṃ. Tadubhayaṃ anantarāyena aṭṭhakathāya parisamāpanattamaṃ. Idameva ca payojanaṃ ācariyena idhāhippetamaṃ. Tathā hi vakkhati “iti me pasannamatino...pe... tassānubhāvenā”ti. Vatthuttayapūjāhi nirisayasapuññakkhettsambuddhiyā aparimeyyapabhāvo puññātisayoti bahuvidhantarāyepi lokasannivāse antarāyanibandhanasakalasaṃkilesaviddhamaṃsanāya pahoti. Bhayādiupaddavañca nivāreti. Yathāha –

“Pūjārahe pūjayato. Buddhe yadi va sāvake”tiādi (dha. pa. 195; apa. 1.10.1), tathā –

“Ye, bhikkhave, buddhe pasannā, agge te pasannā, agge kho pana pasannānaṃ aggo vipāko hoti”tiādi (itivu. 90, 91),

“Buddhoti kittayantassa, kāye bhavati yā pīti;  
Vameva hi sā pīti, kasiṇenapi jambudīpassa.

Dhammoti kittayantassa...pe... kasiṇenapi jambudīpassa;  
Saṅghoti kittayantassa...pe... kasiṇenapi jambudīpassā”ti. (itivu. aṭṭha. 90),

Tathā –

“Yasmiṃ mahānāma samaye ariyasāvako tathāgataṃ anussarati, nevassa tasmīṃ samaye rāgapariyuṭṭhitaṃ cittaṃ hoti, na dosa...pe... na mohapariyuṭṭhitaṃ cittaṃ hoti”tiādi (a. ni. 6.10; 11.11),

“Araññe rukkhamūle vā...pe...  
Bhayaṃ vā chambhitattaṃ vā,  
Lomahaṃso na hessatī”ti ca. (saṃ. ni. 2.249);

Tattha yassa vatthuttayassa vandanaṃ kattukāmo, tassa guṇātisayayogasandassanattamaṃ “**karuṇāsītalahaḍaya**”ntiādinā gāthāttayamāha. Guṇātisayayogena hi vandanaṃrahabhāvo, vandanaṃrahe ca katā vandanaṃ yathāhippetamaṃ payojanaṃ sādhetīti. Tattha yassā desanāya saṃvaṇṇanaṃ kattukāmo. Sā na vinayadesanā viya karuṇāppadhānā, nāpi abhidhammadesanā viya paññāppadhānā, atha kho karuṇāpaññāppadhānāti tadubhayappadhānameva tāva sammāsambuddhassa thomaṇaṃ kātuṃ

tammūlakattā sesaratanānaṃ ‘karuṇāsītalalahadaya’ntiādi vuttaṃ. Tattha kiratīti karuṇā, paradukkhaṃ vikkhipati apānetīti attho. Atha vā kiṇṭīti karuṇā, paradukkhe sati kāruṇikaṃ hiṃsati vibādhatīti attho. Paradukkhe sati sādḥūnaṃ kampanaṃ hadayakhedaṃ karotīti vā karuṇā. Atha vā kamiti sukhaṃ, taṃ rundhatīti karuṇā. Esā hi paradukkhāpanayanakāmatālakkaṇā attasukhanirapekkhatāya kāruṇikānaṃ sukhaṃ rundhati vibandhatīti attho. Karuṇāya sītaṃ karuṇāsītaṃ, karuṇāsītaṃ hadayaṃ assāti karuṇāsītalalahadayo, taṃ **karuṇāsītalalahadayaṃ**.

Tattha kiñcāpi paresaṃ hitopasaṃhārasukhādiaparihānicchanasabhāvatāya, byāpādārātināṃ ujuvipaccanīkatāya ca parasattasāntānagatasāntāpavicchedanākārappavattiyā mettāmudītānampi cittaśītalabhāvākāraṇatā upalabbhati, tathāpi paradukkhāpanayanākārappavattiyā parūpatāpāsahanarasā avihimsābhūtā karuṇāya viśesena bhagavato cittassa cittapassaddhi viya sītībhāvanimittanti vuttaṃ **‘karuṇāsītalalahadaya’**nti. Karuṇāmukhena vā mettāmudītānampi hadayaśītalabhāvākāraṇatā vuttāti daṭṭhabbaṃ. Atha vā asādḥāraṇāñānaviśesanibandhanabhūtā sātīsayāṃ niravasesaṇca sabbaññutaññānaṃ viya savīsayabyāpitāya mahākāruṇābhāvaṃ upagatā karuṇāya bhagavato atīsayena hadayaśītalabhāvahetūtī āha **‘karuṇāsītalalahadaya’**nti. Atha vā satīpi mettāmudītānaṃ sātīsaye hadayaśītibhāvanibandhanatte sakalabuddhaguṇaviśesakāraṇatāya tāsampi kāraṇanti karuṇāya bhagavato ‘hadayaśītalabhāvākāraṇa’nti vuttā. Karuṇānidānā hi sabbepi buddhaguṇā. Karuṇānubhāvanībāpiyamānaśāradukkhasāntāpassa hi bhagavato paradukkhāpanayanakāmatāya anekānīpi asaṅkhyeyyāni kappānaṃ akīlantarūpasseva niravasesabuddhakaradhammasambharaṇanīratassa samadhīgatadhammādhīpateyyassa ca sannīhitesupī sattasaṅkharasamupānītahadayūpatāpanimittesu na īsakampi cittaśītibhāvassa aññāthattamaḥosīti. Etasmiṇca atthavīkappe tīsupī avatthāsu bhagavato karuṇā saṅgahītīti daṭṭhabbaṃ.

Pajānātīti paññā, yathāsabhāvaṃ pakārehi paṭīvijjhatīti attho. Paññāya ñeyyāvaraṇappahānato pakārehi dhammasabhāvajotanaṭṭhena pajjototi paññāpajjoto. Savāsanappahānato viśesena hataṃ samugghātitaṃ vihataṃ, paññāpajjotena vihataṃ paññāpajjotavihataṃ. Mūyanti tena, sayāṃ vā mūyati, mohanamattameva vā tanti moho, avījjā, sveva viśayasabhāvapaṭīcchādanato andhakārasarīkkhatāya tamo vīyātī tamo, paññāpajjotavihato mohatamo etassāti paññāpajjotavihatomohatamo, taṃ **paññāpajjotavihatamohatamaṃ**. Sabbesampi hi khīṇāsavānaṃ satīpi paññāpajjotena avījjandhakārassa vihatabhāve saddhāvīmuttehi viya dīṭṭhippattānaṃ sāvakehi paccekasambuddhehi ca savāsanappahānena sammāsambuddhānaṃ kīlesappahānassa viśeso vījjatīti sātīsayena avījjāpahānena bhagavantaṃ thomento āha **‘paññāpajjotavihatamohatama’**nti.

Atha vā antarena paropadesaṃ attano santāne accantaṃ avījjandhakāravīgamassa nibbattitattā, tathā sabbaññūtāya balesu ca vasībhāvassa samadhīgatattā, parasantatīyaṇca dhammadesanātīsayānubhāvena sammadeva tassa pavattitattā bhagavāya viśesato mohatamavīgamena thometabbotī āha **‘paññāpajjotavihatamohatama’**nti. Imasmiṇca atthavīkappe ‘paññāpajjoto’nti padena bhagavato paṭīvedhapaññā viya desanāpaññāpi sāmāññanīddesena, ekasesanayena vā saṅgahītīti daṭṭhabbaṃ.

Atha vā bhagavato ñāṇassa ñeyyapariyantīkattā sakalāñeyyadhammasabhāvāvabodhanasamatthena anāvaraṇāñānasaṅkhātēna paññāpajjotena sabbañeyyadhammasabhāvachādakassa mohandhakārassa vidhamītattā anaññāsādḥāraṇo bhagavato mohatamavīnāsoti katvā vuttaṃ **‘paññāpajjotavihatamohatama’**nti. Ettha ca mohatamavīdhamanante adhīgatattā anāvaraṇāñānaṃ kāraṇūpacāreṇa sasantāne mohatamavīdhamananti daṭṭhabbaṃ. Abhīnīhārasampattīyā savāsanappahānameva hi kīlesānaṃ ñeyyāvaraṇappahānanti, parasantāne pana mohatamavīdhamanassa kāraṇabhāvato anāvaraṇāñānaṃ ‘mohatamavīdhamana’nti vuccatīti.

Kīṃ pana kāraṇaṃ avījjāsamugghātōyēveko pahānasampattīvasena bhagavato thomanānīmittaṃ gayhati, na pana sātīsayāṃ niravasesakīlesappahānanti? Tappahānavacanēneva tadekatṭhatāya sakalasaṃkīlesagaṇasamugghātassa jotītabhāvato. Na hi so tādīso kīleso atthī, yo

niravasesaavijjāppahānena na pahīyatīti.

Atha vā vijjā viya sakalakusaladhammasamuppattiyā niravasesākusaladhammanibbattiyā saṃsārappavattiyā ca avijjā padhānakāraṇanti tabbighātavacanena sakalasaṃkilesagaṇasamugghāto vuttoyeva hotīti vuttaṃ **“paññāpajjotavihatamohatama”**nti.

Narā ca amarā ca narāmarā, saha narāmarehīti sanarāmaro, sanarāmaro ca so loko cāti sanarāmaraloko. Tassa garūti sanarāmaralokagaru, taṃ **sanarāmaralokagaruṃ**. Etena devamanussānaṃ viya tadavasitṭhasattānampi yathārahaṃ guṇavisesāvahatāya bhagavato upakāritaṃ dasseti. Na cettha padhānāppadhānabhāvo codetabbo. Añño hi saddakkamo, añño atthakkamo. Edisesu hi samāsapadesu padhānampi appadhānaṃ viya niddisīyati yathā “sarājikāya parisāyā”ti (cūlava. 336). Kāmañcettha sattasaṅkhārokāsavasena tividho loko, garubhāvassa pana adhippetattā garukaraṇasamatthasseva yujjanato sattalokassa vasena attho gahetabbo. So hi lokīyanti ettha puññapāpāni tabbipāko cāti “loko”ti vuccati. Amaraggahaṇena cettha upapattidevā adhippetā.

Atha vā samūhattho lokasaddo samudāyavasena lokīyati paññāpīyatīti. Saha narehīti sanarā, sanarā ca te amarā cāti sanarāmarā, tesam lokoti sanarāmaralokoti purimanayeneva yojetabbaṃ. Amarasaddena cettha visuddhidevāpi saṅgayhanti. Te hi maraṇābhāvato paramatthato amarā. Narāmarānaṃyeva ca gahaṇaṃ ukkaṭṭhaniddesavasena yathā “sattā devamanussāna”nti (dī. ni. 1.157). Tathā hi sabbānatthaparīhārapubbaṅgamāya niravasesahitasukhavidhānatapparāya niratisayāya payogasampattiyā sadevamanussāya pajāya accantūpakāritāya aparimitanirupamappabhāvaguṇavisesasamaṅgitāya ca sabbasattuttamo bhagavā aparimāṇasu lokadhātūsu aparimāṇānaṃ sattānaṃ uttamagāraṇavattānaṃ. Tena vuttaṃ **“sanarāmaralokagaru”**nti.

Sobhanaṃ gataṃ gamaṇaṃ etassāti sugato. Bhagavato hi veneyyanupasaṅkamaṇaṃ ekantena tesam hitasukhanipphādanato sobhanaṃ, tathā lakkhaṇānubyañjanapaṭimaṇḍitarūpakāyatāya dutavilambita-khalītānukaḍḍhana-nippīlanukkuṭika-kuṭīlākulatādi-dosarahita-mavahasita-rājahaṃsavabhavāraṇa-migarājagamaṇaṃ kāyagamaṇaṃ ñāṇagamaṇaṃ vipulanimmalakarūṇā-sativīriyādi-guṇavisesasahitamabhinīhārato yāva mahābodhiṃ anavajjatāya sobhanamevāti. Atha vā sayambhuñānena sakalamapi lokaṃ pariññābhisamayavasena parijānanto ñāṇena sammā gato avagatoti sugato. Tathā lokasamudayaṃ pahānābhisamayavasena pajahanto anuppattidhammataṃ āpādentō sammā gato atītōti sugato, lokanirodhaṃ nibbānaṃ sacchikiriyābhisamayavasena sammā gato adhigatoti sugato, lokanirodhagāminiṃ paṭipadaṃ bhāvanābhisamayavasena sammā gato paṭipannoti sugato. “Sotāpattimaggena ye kilesā pahīnā, te kilese na puneti na pacceci na paccāgacchatīti sugato”tiādīnā (mahāni. 38; cūlani. 27) nayena ayamattho vibhāvetabbo. Atha vā sundaraṃ ṭhānaṃ sammāsambodhiṃ, nibbānameva vā gato adhigatoti sugato. Yasmā vā bhūtaṃ tacchaṃ atthasaṃhitāṃ veneyyānaṃ yathārahaṃ kālayuttameva ca dhammaṃ bhāsati, tasmā sammā gadati vadatīti sugato da-kārassa ta-kāraṃ katvā. Iti sobhanagamaṇatādīhi sugato, taṃ **sugataṃ**.

Puññapāpakammehi upapajjanavasena gantabbato gatiyo, upapattibhavavisesā. Tā pana nirayādivasena pañcavidhā. Tāhi sakalassapi bhavagāmikammassa ariyamaggādhigamena avipākārahabhāvakarāṇena nivattitattā bhagavā pañcahipi gatīhi suṭṭhu mutto viṣaṃyuttoti āha **“gativimutta”**nti. Etena bhagavato katthacipi gatiyā avariyaṇannataṃ dasseti, yato bhagavā “devātidevo”ti vuccati. Tenevāha –

“Yena devūpapatyassa, gandhabbo vā vihaṅgamo;  
Yakkhattaṃ yena gaccheyyaṃ, manussattaṅca abbaṃ;  
Te mayhaṃ āsavā khīṇā, viddhastā vinalīkatā”ti. (a. ni. 4.36);

Taṃtaṃgatisaṃvattanākānaṃhi kammakilesānaṃ aggamaggena bodhimūleyeva suppahīnattā natthi bhagavato gatipariyaṇannatāti accantameva bhagavā sabbabhavayonigati-viññāṇaṭṭhiti-sattāvāsa-

sattanikāyehi parimutto, taṃ **gativimuttaṃ**. Vandeti namāmi, thomemīti vā attho.

Atha vā **gativimuttanti** anupādisesanibbānadhātuppattiyā bhagavantaṃ thometi. Ettha hi dvīhi ākārehi bhagavato thomanā veditabbā attahitasampattito parahitapaṭipattito ca. Tesu attahitasampatti anāvaraṇañānādhigamato savāsānānaṃ sabbesaṃ kilesānaṃ accantappahānato anupādisesanibbānappattito ca veditabbā, parahitapaṭipatti lābhasakkārādinirapekkhacittassa sabbadukkhanīyānikadhammadesanato viruddhesupi niccaṃ hitajjhāsayato nāṇaparipākakālāgamanato ca. Sā panettha āsayato payogato ca duvidhā parahitapaṭipatti, tividhā ca attahitasampatti pakāsītā hoti. Kathaṃ? “Karūṇāsītalahaḍaya”nti etena āsayato parahitapaṭipatti, sammāgadanatthena sugatasaddena payogato parahitapaṭipatti, “paññāpajjotavihatamohatamaṃ gativimutta”nti etehi catusappaṭivedhatthena ca sugatasaddena tividhāpi attahitasampatti, avasiṭṭhaṭṭhena tena “paññāpajjotavihatamohatama”nti etena cāpi sabbāpi attahitasampattiparahitapaṭipatti pakāsītā hotīti.

Atha vā tīhi ākārehi bhagavato thomanā veditabbā – hetuto phalato upakārato ca. Tattha **hetu** mahākarūṇā, sā paṭhamapadena dassitā. **Phalaṃ** catubbidham ṇāṇasampadā pahānasampadā ānubhāvasampadā rūpakāyasampadā cāti. Tāsu ṇāṇapahānasampadā dutiyapadena saccappaṭivedhatthena ca sugatasaddena pakāsītā honti, ānubhāvasampadā pana tatiyapadena, rūpakāyasampadā yathāvuttakāyagamanasobhanatthena sugatasaddena lakkhaṇānubyañjanapāripūriyā vinā tadabhāvato. **Upakāro** anantaraṃ abāhiraṃ karitvā tividhayānamukhena vimuttidhammadesanā. So sammāgadanatthena sugatasaddena pakāsito hotīti veditabbam.

Tattha “karūṇāsītalahaḍaya”nti etena sammāsambodhiyā mūlaṃ dasseti. Mahākarūṇāsañcoditamānaso hi bhagavā saṃsārapaṅkato sattānaṃ samuddharaṇatthaṃ katābhinihāro anupubbena pāramiyo pūretvā anuttaraṃ sammāsambodhiṃ adhiḡatoti karūṇā sammāsambodhiyā mūlaṃ. “Paññāpajjotavihatamohatama”nti etena sammāsambodhiṃ dasseti. Anāvaraṇañānapadaṭṭhānañhi maggañāṇaṃ, maggañāṇapadaṭṭhānañca anāvaraṇañāṇaṃ “sammāsambodhī”ti vuccatīti. Sammāgamanatthena sugatasaddena sammāsambodhiyā paṭipattiṃ dasseti līnuddhaccappaṭiṭṭhānāyūhanakāmasukhallikattakilamathānuyogasassatucchedābhinivesādi antadvayarahitāya karūṇāpaññāpariḡgahitāya majjhimāya paṭipattiyā pakāsānato sugatasaddassa. Itarehi sammāsambodhiyā padhānāppadhānabhedam payojanaṃ dasseti. Saṃsāramahogho sattanāraṇaṇhettha padhānaṃ payojanaṃ, tadaññamappadhānaṃ. Tesu padhānena parahitapaṭipattiṃ dasseti, itarena attahitasampattiṃ, tadubhayena attahitāya paṭipannādīsū catūsū puggalesu bhagavato catutthapuggalabhāvaṃ dasseti. Tena ca anuttaradakkhiṇeyyabhāvaṃ uttamavandanīyabhāvaṃ attano ca vandanakiriyaṃ khettaṅgatabhāvaṃ dasseti.

Ettha ca karūṇāgahaṇena lokiyesu mahaggaṭabhāvappattāsādhāraṇaḡadīpanato bhagavato sabbalokiyagūṇasampatti dassitā hoti, paññāgahaṇena sabbāññutaññānapadaṭṭhānamaggañāṇadīpanato sabbalokuttaragūṇasampatti. Tadubhayaggahaṇasiddho hi attho “sanarāmaralokagaru”ntiādīnā vipaṇcīyatīti. Karūṇāgahaṇena ca upagamaṇaṃ nirupakkilesaṃ dasseti, paññāgahaṇena apagamaṇaṃ. Tathā karūṇāgahaṇena lokasamaññānurūpaṃ bhagavato pavattiṃ dasseti lokavohāraṇisayattā karūṇāya, paññāgahaṇena samaññāya anatidhāvanaṃ sabhāvānavabodhena hi dhammānaṃ samaññaṃ atidhāvītvā sattādīparāmasanaṃ hotīti. Tathā karūṇāgahaṇena mahākarūṇāsamāpattivihāraṃ dasseti, paññāgahaṇena tīsū kālesu appaṭihataññaṃ catusaccaññaṃ catupaṭisambhidāññaṃ catuvesārajaññaṃ.

Karūṇāgahaṇena mahākarūṇāsamāpattiñāṇassa gahitattā sesāsādhāraṇañāṇāni, cha abhiññā, aṭṭhasu parisāsu akampanañāṇāni, dasa balāni, cuddasa buddhañāṇāni, soḷasa ṇāṇacariyā, aṭṭhārasa buddhadhammā, catucattālīsā ṇāṇavatthūni, sattaṣattatiñāṇavatthūnīti evamādīnaṃ anekesaṃ paññāpabhedānaṃ vasena ṇāṇacāraṃ dasseti. Tathā karūṇāgahaṇena caraṇasampattiṃ, paññāgahaṇena vijjāsampattiṃ. Karūṇāgahaṇena attādhīpatitā, paññāgahaṇena dhammādhīpatitā. Karūṇāgahaṇena lokanāthabhāvo, paññāgahaṇena attanāthabhāvo. Tathā karūṇāgahaṇena pubbakāribhāvo, paññāgahaṇena kataññūtā. Tathā karūṇāgahaṇena aparantapatā, paññāgahaṇena anattantapatā.

Karuṇāgahaṇena vā buddhakaradhammasiddhi, paññāgahaṇena buddhabhāvasiddhi. Tathā karuṇāgahaṇena paresaṃ tāraṇaṃ, paññāgahaṇena sayamaṃ taraṇaṃ. Tathā karuṇāgahaṇena sabbasattesu anuggahacittatā, paññāgahaṇena sabbadhammesu virattacittatā dassitā hoti.

Sabbesaṅca buddhaguṇānaṃ karuṇā ādi tannidānabhāvato, paññā pariyosānaṃ tato uttari karaṇīyābhāvato. Iti ādipariyosānadassanena sabbe buddhaguṇā dassitā honti. Tathā karuṇāgahaṇena silakkhandhapubbaṅgamo samādhikkhandho dassito hoti. Karuṇānidānañhi sīlaṃ tato pāṇātipātādiviratippavattito, sā ca jhānattayasampayoginīti. Paññāvacanena paññākkhandho. Sīlaṅca sabbabuddhaguṇānaṃ ādi, samādhī majjhe, paññā pariyosānanti evampi ādimajjhapariyosānakalyāṇadassanena sabbe buddhaguṇā dassitā honti nayato dassitattā. Eso eva hi niravasesato buddhaguṇānaṃ dassanupāyo, yadidaṃ nayaggāhaṇaṃ. Aññathā ko nāma samattho bhagavato guṇe anupadaṃ niravasesato dassetuṃ. Tenevāha –

“Buddhopi buddhassa bhāṇeyya vaṇṇaṃ;  
Kappampi ce aññaṃabhāsamaṇo.

Khīyetha kappo ciradīghamantare;

Vaṇṇo na khīyetha tathāgatassā”ti. (dī. ni. aṭṭha. 1.305; 3.141; ma. ni. aṭṭha. 2.425; udā. aṭṭha. 53; apa. aṭṭha. 2.7.20; bu. vaṃ. aṭṭha. 4.4; cariyā. aṭṭha. 3.122 pakiṇṇakakathā);

Teneva ca āyasmatā sārīputtattherenapi buddhaguṇaparicchedanaṃ pati anuyuttana “no hetamaṃ, bhante”ti paṭikkhipitvā “apica me, bhante, dhammanvayo vidito”ti (dī. ni. 2.146) vuttaṃ.

2. Evaṃ saṅkhepena sakalasabbaññaṅguṇehi bhagavantaṃ abhithhavitvā idāni saddhammaṃ thometuṃ “**buddhopi**”tiādimāha. Tattha **buddhoti** kattuniddeso. **Buddhabhāvanti** kammaniddeso. **Bhāvetvā sacchikatvāti** ca pubbakālakiriyāniddeso. **Yanti** aniyamato kammaniddeso. **Upagatoti** aparakālakiriyāniddeso. **Vandeti** kiriyāniddeso. **Tanti** niyamaṇaṃ. **Dhammanti** vandanakiriyāya kammaniddeso. **Gatamalaṃ anuttaranti** ca tabbisesanaṃ.

Tattha buddhasaddassa tāva “bujjhitaṃ saccānīti buddho, bodhetā pajāyāti buddho”tiādinā **niddesanayena** (mahāni. 192; cūḷani. 97) attho veditabbo. Atha vā savāsānāya aññaṅganiddhāya accantavigamato, buddhiyā vā vikasitabhāvato buddhavāti **buddho** jāgaraṇavikasanatthavasena. Atha vā kassaciṇi ñeyyadhammassa anavabuddhassa abhāvena ñeyyavisesassa kammabhāvena aggahaṇato kammavacanicchāya abhāvena avagamanatthavaseneva kattuniddeso labbhatīti buddhavāti **buddho** yathā “dikkhito na dadāti”ti. Atthato pana pāramitāparibhāvito sayambhuññaṇena saha vāsānāya vihatavidhastaniravasesakilesa mahākaruṇāsabbaññaṅgādiaparimeyyaguṇagaṇādhāro khandhasantāno buddho. Yathāha –

“Buddhoti yo so bhagavā sayambhū. Anācariyako pubbe ananussutesu dhammesu sāmaṃ saccāni abhisambujjhi, tattha ca sabbaññaṅgānaṃ patto balesu ca vasībhāva”nti (mahāni. 192; cūḷani. 97; paṭi. ma. 3.161).

**Api**-saddo sambhāvane. Tena “evaṃ guṇavisesayutto sopi nāma bhagavā”ti vakkhamānaguṇe dhamme sambhāvanaṃ dīpeti. **Buddhabhāvanti** sammāsambodhiṃ. **Bhāvetvāti** uppādetvā vaḍḍhetvā ca. **Sacchikatvāti** paccakkhaṃ katvā. **Upagatoti** patto, adhigatoti attho. Etassa “buddhabhāva”nti etena sambandho. **Gatamalaṃ** vīgatamalaṃ, niddosanti attho. **Vandeti** paṇamaṃ, thomemi vā. **Anuttaranti** uttararahaṇaṃ, lokuttaranti attho. **Dhammanti** yathānusiṭṭhaṃ paṭipajjamāne apāyato ca saṃsārato ca apatamāne katvā dhāretīti dhammo. Ayañhettha saṅkhepattho – evaṃ vividhaguṇagaṇasamannāgato buddhopi bhagavā yaṃ ariyamaggasaṅkhātaṃ dhammaṃ bhāvetvā, phalanibbānasāṅkhātaṃ pana sacchikatvā anuttaraṃ sammāsambodhiṃ adhigato, tametaṃ buddhānampi buddhabhāvahetubhūtaṃ sabbadosamalarahaṇaṃ attano uttaritābhāvena anuttaraṃ paṭivedhasaddhammaṃ namāmi. Pariyattisaddhammassāpi tappakāsanattā idha saṅgaho daṭṭhabbo.

Atha vā “abhidhammanayasamuddaṃ adhigacchi, tīṇi piṭakāni sammāsī”ti ca aṭṭhakathāyaṃ vuttattā pariyattidhammassapi sacchikiriyāsammasanapariyāyo labbhatīti sopi idha vutto evāti daṭṭhabbaṃ. Tathā “yaṃ dhammaṃ bhāvetvā saccikatvā”ti ca vuttattā buddhakaradhammabhūṭāhi pāramitāhi saha pubbabhāge adhisīlasikkhādayopi idha dhammasaddena saṅgahitāti veditabbaṃ. Tāpi hi malapaṭipakkhatāya gatamalā anaññasādhāraṇatāya anuttarā cāti. Tathā hi sattānaṃ sakalavaṭṭadukkhaniissaraṇatthāya katamahābhinihāro mahākaruṇādhivāsapesalajjhāsayo paññāvisesaparidhotanimmalānaṃ dānadamasāmyamādīnaṃ uttamadhammānaṃ satasahassādhikāni kappānaṃ cattāri asaṅkhyeyyāni sakkaccaṃ niraṇṭaraṃ niravasesānaṃ bhāvanāpaccakkhakarāṇehi kammādīsu adhigatavasābhāvo acchariyācinteyyamahānubhāvo adhisīlādhicittānaṃ paramukkaṃsapāramippatto bhagavā paccayākāre catuvīsatiakoṭīsasahasasamukhena mahāvajiraññaṃ pesetvā anuttaraṃ sammāsambodhiṃ abhisambuddhoti.

Ettha ca “bhāvetvā”ti etena vijjāsampadāya dhammaṃ thometi, “sacchikatvā”ti etena vimuttisampadāya. Tathā paṭhamena jhānasampadāya, dutiyena vimokkhasampadāya. Paṭhamena vā samādhisampadāya, dutiyena samāpattisampadāya. Atha vā paṭhamena khayeññābhāvena, dutiyena anuppādeññābhāvena. Purimena vā vijjūpamatāya, dutiyena vajirūpamatāya. Purimena vā virāgasampattiyā, dutiyena nirodhasampattiyā. Tathā paṭhamena niyyānabhāvena, dutiyena niissaraṇabhāvena. Paṭhamena vā hetubhāvena, dutiyena asaṅkhatabhāvena. Paṭhamena vā dassanabhāvena, dutiyena vivekabhāvena. Paṭhamena vā adhipatibhāvena, dutiyena amatabhāvena dhammaṃ thometi. Atha vā “yaṃ dhammaṃ bhāvetvā buddhabhāvaṃ upagato”ti etena svākkhātāya dhammaṃ thometi. “Sacchikatvā”ti etena sandīṭṭhikatāya. Tathā purimena akālikatāya, pacchimena ehipassikatāya. Purimena vā opaneyyikatāya, pacchimena paccattaṃ veditabbatāya dhammaṃ thometi. “Gatamala”nti iminā saṃkilesābhāvādīpanena dhammassa parisuddhataṃ dasseti, “anuttara”nti etena aññassa viṣiṭṭhassa abhāvādīpanena vipulaparipuṇṇataṃ. Paṭhamena vā pahānasampadaṃ dhammassa dasseti, dutiyena sabhāvasampadaṃ. Bhāvetabbatāya vā dhammassa gatamalabhāvo yojetabbo. Bhāvanāguṇena hi so dosānaṃ samugghātako hotīti. Sacchikatābbabhāvena anuttarabhāvo yojetabbo. Sacchikiriyānibhattito hi taduttarikaṇṭhābhāvato anaññasādhāraṇatāya anuttaroti. Tathā “bhāvetvā”ti etena saha pubbabhāgasīlādīhi sekkhā sīlasamādhipaññākkhandhā dassitā honti, “sacchikatvā”ti etena saha asaṅkhatāya dhātuyā asekkhā sīlasamādhipaññākkhandhā dassitā hontīti.

3. Evaṃ saṅkhepeveva sabbadhammaguṇehi saddhammaṃ abhitthavitvā idāni ariyaṅghaṃ thometuṃ “**sugatassā**”tiādīmāha. Tattha **sugatassā**ti sambandhaniddeso, tassa “puttāna”nti etena sambandho. **Orasānanti** puttavisesanaṃ. **Mārasenamathanānanti** orasaputtabhāve kāraṇaniddeso. Tena kilesappahānameva bhagavato orasaputtabhāve kāraṇaṃ anujānātīti dasseti. **Aṭṭhannanti** gaṇanaparicchedaniddeso. Tena satipi tesam sattavisesabhāvena anekasahasasaṅkhābhāve imaṃ gaṇanaparicchedaṃ nātivattantīti dasseti maggaṭṭhaphalaṭṭhabhāvānātivattanato. **Samūhanti** samudāyaniddeso. **Ariyaṅghanti** guṇaviṣiṭṭhasaṅghāṭṭhabhāvaniddeso. Tena asabhipi ariyapuggalānaṃ kāyasāmaggiyaṃ ariyaṅghabhāvaṃ dasseti diṭṭhisīlasāmaññena saṃhatabhāvato.

Tattha urasi bhavā jātā saṃvaddhā ca orasā. Yathā hi sattānaṃ orasaputtā attajātāya pitu santakassa dāyajassa visesena bhāgino honti, evameva tepi ariyapuggalā sammāsambuddhassa dhammassavanante ariyāya jātiyā jātātāya bhagavato santakassa vimuttisukhassa ariyadhammaratanassa ca ekantabhāginoti orasā viya **orasā**. Atha vā bhagavato dhammadesanānubhāvena ariyabhūmiṃ okkamamānā okkantā ca ariyasāvaka bhagavato urena vāyāmājanitābhijātīyā nippariyāyena “orasaputtā”ti vattabbataṃ arahanti. Sāvakehi pavattiyamānāpi hi dhammadesanā “bhagavato dhammadesanā”iceva vuccati taṃmūlikattā lakkhaṇādivisesābhāvato ca.

Yadipi ariyasāvakaṇaṃ ariyamaggādhigamasamaye bhagavato viya tadantarāya karaṇattham devaputtamāro, māravāhinī vā na ekantena apasādeti, tehi pana apasādetabbatāya kāraṇe vimathite tepi vimathitā eva nāma hontīti āha – “**mārasenamathanāna**”nti. Imasmiṃ panatthe “māramārasenamathanāna”nti vattabbe “mārasenamathanāna”nti ekadesasarūpekaseso katoti

datṭhabbam. Atha vā khandhābhisāṅkhāramārānaṃ viya devaputtamārassapi guṇamāraṇe saḥāyabhāvūpagamanato kilesabalakāyo “senā”ti vuccati. Yathāha “kāmā te paṭhamā senā”tiādi (su. ni. 438; mahāni. 28, 68, 149). Sā ca tehi diyadḍhasahassabhedā anantabhedā vā kilesavāhinī satidhammavicayavīriyasamathādiguṇapaharaṇehi odhiso vimathitā vihatā viddhastā cāti **mārasenamathanā**, ariyasāvaka. Etena tesam bhagavato anujātaputtataṃ dasseti.

Ārakatā kilesehi, anaye na iriyanato, aye ca iriyanato ariyā niruttinayena. Atha vā sadevakena lokena “saraṇa”nti araṇiyato upagantabbato upagatānaṅca tadatthasiddhito ariyā, ariyānaṃ saṅghoti ariyasaṅgho, ariyo ca so saṅgho cāti vā ariyasaṅgho, taṃ **ariyasaṅgham**. Bhagavato aparabhāge buddhadhammaratanānampi samadhigamo saṅgharatanādhīnoti ariyasaṅghassa bahūpakāratam dassetuṃ idheva “**sirasā vande**”ti vuttanti datṭhabbam.

Ettha ca “sugatassa orasānaṃ puttāna”nti etena ariyasaṅghassa pabhavasampadam dasseti, “mārasenamathanāna”nti etena pahānasampadam sakalasaṃkilesappahānadīpanato. “Aṭṭhannampi samūha”nti etena nāṇasampadam maggaṭṭhaphalaṭṭhabhāvādīpanato. “Ariyasaṅgha”nti etena pabhāvasampadam dasseti sabbasaṅghānaṃ aggabhāvādīpanato. Atha vā “sugatassa orasānaṃ puttāna”nti ariyasaṅghassa visuddhanissayabhāvādīpanam, “mārasenamathanāna”nti sammāujuṇāyasāmīcippaṭipannabhāvādīpanam, “aṭṭhannampi samūha”nti āhuneyyādibhāvādīpanam, “ariyasaṅgha”nti anuttarapuññakkhettabhāvādīpanam. Tathā “sugatassa orasānaṃ puttāna”nti etena ariyasaṅghassa lokuttarasaraṇagamanasabbhāvaṃ dīpeti. Lokuttarasaraṇagamanena hi te bhagavato orasaputtā jātā. “Mārasenamathanāna”nti etena abhinīhārasampadāsiddham pubbhāge sammāpaṭipattiṃ dasseti. Katābhinihārā hi sammāpaṭipannā mārānaṃ māraparisaṃ vā abhivijjanti. “Aṭṭhannampi samūha”nti etena paṭividdhastavipakkhe sekkhāsekkhadhamme dasseti puggalādhiṭṭhānena maggaphaladhammānaṃ pakāsītā. “Ariyasaṅgha”nti aggadakkhiṇeyyabhāvaṃ dasseti. Saraṇagamanaṅca sāvakanāṃ sabbaguṇānaṃ ādi, sapubbabhāgapaṭipadā sekkhā sīlakkhandhādayo majjhe, asekkhā sīlakkhandhādayo pariyosānanti ādimajjhapariyosānakalyāṇā saṅkhepato sabbe ariyasaṅghaguṇā pakāsītā honti.

4. Evaṃ gāthāttayena saṅkhepato sakalaguṇasaṃkittanamukhena ratanattayassa paṇāmaṃ katvā idāni taṃnipaccakāraṃ yathādhīpete payojane pariṇāmento “**iti me**”tiādimāha. Tattha ratijananatṭhena **ratanam**, buddhadhammasaṅghā. Tesaṅhi “itipi so bhagavā”tiādinā yathābhūtaguṇe āvajjentaṃ amatādhigamahetubhūtaṃ anappakaṃ pītipāmojjaṃ uppajjati. Yathāha –

“Yasmiṃ mahānāma, samaye ariyasāvako tathāgataṃ anussarati, nevassa tasmīṃ samaye rāgapariyuṭṭhitam cittam hoti, na dosa...pe... na mohapariyuṭṭhitam cittam hoti...pe... ujugatacitto kho mahānāma, ariyasāvako labhati atthavedaṃ, labhati dhammavedaṃ, labhati dhammūpasamhitam pāmojjaṃ, pamuditassa pīti jāyatī”tiādi (a. ni. 6.10; 11.11).

Cittikatādibhāvo vā ratanaṭṭho. Vuttaṅghetaṃ –

“Cittikataṃ mahagghaṅca, atulaṃ dullabhadassanaṃ;  
Anomasattaparibhogam, ratanam tena vuccatī”ti. (dī. ni. aṭṭha. 2.33; saṃ. ni. aṭṭha. 3.5.223;  
khu. pā. aṭṭha. 6.3; su. ni. aṭṭha. 1.226; mahāni. aṭṭha. 50);

Cittikatabhāvādayo ca anaṅgasādhāraṇā buddhādīsu eva labbhantīti.

Vandanāva **vandanāmayaṃ** yathā “dānamayaṃ sīlamaya”nti (dī. ni. 3.305; itivu. 60). Vandanā cettha kāyavācācittēhi tiṇṇam ratanānaṃ guṇaninnatā, thomanā vā. Pujjabhavaphalanibbattanato **puññaṃ**, attano santānaṃ punātīti vā. **Suvihatantarāyoti** suṭṭhu vihatantarāyo. Etena attano pasādasampattiyā ratanattayassa ca khettabhāvasampattiyā taṃ puññaṃ atthappakāsanassa upaghātakaupaddavānaṃ vihanane samatthanti dasseti. **Hutvāti** pubbakālakiriyā. Tassa “attham

pakāsayissāmī”ti etena sambandho. **Tassāti** yaṃ ratanattayavandanāmayam puññaṃ, tassa. **Ānubhāvenāti** balena.

5. Evaṃ ratanattayassa nipaccakāre payojanam dassetvā idāni yassā dhammadesanāya attham saṃvaṇṇetukāmo, tassā tāva guṇābhittavanavasena upaññāpanattham “**majjhimapamāṇasuttaṅkitassā**”tiādi vuttam. Tattha **majjhimapamāṇasuttaṅkitassāti** nātidīghanātikhuddakapamāṇehi suttantehi lakkhitassa. Yathā hi dīghāgame dīghapamāṇāni suttāni, yathā ca saṃyuttaṅguttarāgamesu dvīsu khuddakapamāṇāni, na evaṃ idha. Idha pana pamāṇato majjhimāni suttāni. Tena vuttam “**majjhimapamāṇasuttaṅkitassāti** nātidīghanātikhuddakapamāṇehi suttantehi lakkhitassati attho”ti. Etena “majjhimo”ti ayaṃ imassa atthānugatasamaññāti dasseti. Nanu ca suttāni eva āgamo, kassa pana suttehi añkananti? Saccametam paramatthato, suttāni pana upādāya paññatto āgamo. Yatheva hi atthabyañjanasamudāye “sutta”nti vohāro, evaṃ suttasamudāye ayaṃ “āgamo”ti vohāro. **Idhāti** imasmiṃ sāsane. Āgamissanti ettha, etena etasmā vā attatthaparattādayoti āgamo, ādikalyāṇādiguṇasampattiyā uttamaṭṭhena taṃtaṃabhipatthitasamiddhihetutāya paṇḍitehi varitabbato varo, āgamo ca so varo cāti āgamavaro. Āgamasammatehi vā varoti āgamavaro, majjhimo ca so āgamavaro cāti **majjhimāgamavaro**, tassa.

Buddhānam anubuddhānam **buddhānubuddhā**, buddhānam saccapaṭivedham anugamma paṭividdhasaccā aggasāvakādayo ariyā. Tehi atthasaṃvaṇṇanāguṇasaṃvaṇṇanānam vasena **saṃvaṇṇitassa**. Atha vā buddhā ca anubuddhā ca buddhānubuddhāti yojetabbam. Sammāsambuddheneva hi vinayasuttābhiddhammānam pakiṇṇakadesanādivasena yo paṭhamam attho vibhatto, so eva pacchā tassa tassa saṃvaṇṇanāvasena saṅgītikārehi saṅgaham āropitoti. **Paravādamathanassāti** aññatitthiyānam vādanimmathanassa, tesam diṭṭhigatabhañjanassāti attho. Ayañhi āgamo mūlapariyāyasuttasabbāsavasuttādīsu diṭṭhigatikānam diṭṭhigatadosavibhāvanato **saccakasuttam** (ma. ni. 1.353) **upālisuttādīsu** (ma. ni. 2.56) saccakādīnam micchāvādanimmathanadīpanato visesato “paravādamathano”ti thomitoti. Saṃvaṇṇanāsu cāyam ācariyassa pakati, yā taṃtaṃsaṃvaṇṇanāsu ādito tassa tassa saṃvaṇṇetabbassa dhammassa visesaguṇakittanena thomanā. Tathā hi **sumaṅgalavilāsinīsārattapakāsinīmanorathapūraṇīsu aṭṭhasālīnīādīsu** ca yathākkamam “saddhāvahaguṇassa, ñāṇappabhedajanassa, dhammakathikapuṅgavānam vicittapaṭibhānanassa, tassa gambhīrañāṇehi ogāḷhassa abhiṇhaso nānāyavicittassa abhidhammassā”tiādīnā thomanā katā.

6. Attho kathīyati etāyāti atthakathā, sā eva **aṭṭhakathā** ttha-kārassa ttha-kāram katvā yathā “dukkhassa pīḷanaṭṭho”ti (paṭi. ma. 1.17; 2.8) **āditoti**ādīmi paṭhamasaṅgītiyam. Chaḷabhiññātāya paramena cittissariyabhāvena samannāgatattā jhānādīsu pañcavidhavasitāsabbhāvato ca **vasino**, therā mahākassapādayo. Tesam **satehi pañcahi**. **Yāti** yā aṭṭhakathā. **Saṅgītāti** attham pakāsetum yuttaṭṭhāne “ayaṃ etassa attho, ayaṃ etassa attho”ti saṅgahetvā vuttā. **Anusaṅgītā ca** yasattherādīhi pacchāpi dutiyatatiyasaṅgītīsu. Iminā attano saṃvaṇṇanāya āgamanasuddhiṃ dasseti.

7. Sīhassa lānato gahaṇato **sīhaḷo**, sīhakumāro. Taṃvaṃsajātātāya tambapaṇṇidīpe khattiyānam, tesam nivāsātāya tambapaṇṇidīpassa ca sīhaḷabhāvo veditabbo. **Ābhatāti** jambudīpato ānītā. **Athāti** pacchā. Aparabhāge hi nikāyantaratthāhi asankarattham sīhaḷabhāsāya aṭṭhakathā ṭhapitāti. Tena mūlaṭṭhakathā sabbasādhāraṇā na hotīti idaṃ atthappakāsanam ekantena karaṇīyanti dasseti. Tenevāha “**dīpavāsīnamatthāyā**”ti. Tattha **dīpavāsīnanti** jambudīpavāsīnam, sīhaḷadīpavāsīnam vā atthāya sīhaḷabhāsāya ṭhapitāti yojanā.

8. **Apanetvānāti** kaṅcukasadisam sīhaḷabhāsam apānetvā. **Tatoti** aṭṭhakathāto. **Ahanti** attānam niddisati, **manoramam bhāsanti** māgadhabhāsam. Sā hi sabhāvaniruttibhūtā paṇḍitānam manam ramayātīti. Tenevāha “**tantinayānucchavika**”nti, pālīgatiyā anulomikam pālībhāsāyānuvidhāyīninti attho. **Vigatadosanti** asabhāvaniruttibhāsantararhitam.



**9. Samayaṃ avilomentoti** siddhantaṃ avirodhento. Etena atthadosābhāvamāha. Aviruddhattā eva hi theravādāpi idha pakāsīyissanti. **Theravaṃsadīpānanti** thirehi silakkhandhādīhi samannāgatattā therā, mahākassapādāyo. Tehi āgatā ācariyaparamparā theravaṃso, tappariyāpannā hutvā āgamādhigamasampannattā paññāpajjotena tassa samujjalanato **theravaṃsadīpā**, mahāvihāravāsino, tesam. Vividhehi ākārehi nicchīyatīti vinicchayo, gaṇṭhiṭṭhānesu khīlamaddanākārena pavattā vimaticchedanī kathā. Suṭṭhu nipuṇo saṅho vinicchayo etesanti **sunipuṇavinicchayā**. Atha vā vinicchīnotīti vinicchayo, yathāvuttatthavisayaṃ ñāṇaṃ. Suṭṭhu nipuṇo cheko vinicchayo etesanti yojetabbaṃ. Etena mahākassapāditheraparamparābhato, tato eva ca aviparīto saṅho sukhumo mahāvihāravāsīnaṃ vinicchayoti tassa pamāṇabhūtatam dasseti.

**10. Sujanassa cāti ca-saddo** sampiṇḍanattho. Tena “na kevalaṃ jambudīpavāsīnameva atthāya, atha kho sādhujanatosanattañcā”ti dasseti. Tena ca “tambapaṇṇidīpavāsīnampi atthāyā”ti ayamattho siddho hoti ugghaṇṇādisukaratāya tesampi bahukārattā. **Ciraṭṭhitatthanti** ciraṭṭhitattham, cirakālaṭṭhitīyāti attho. Idañhi atthappakāsaṇaṃ aviparītapadabyañjanasunikkehpassa atthasunayassa ca upāyabhāvato saddhammassa ciraṭṭhitīyā saṃvattati. Vuttañhetam bhagavatā “dveme, bhikkhave, dhammā saddhammassa ṭhītiyā asammosāya anantaradhānāya saṃvattanti. Katame dve? Sunnikkhitañca padabyañjanaṃ attho ca sunīto”ti (a. ni. 2.20).

**11. Yaṃ atthavaṇṇanaṃ** kattukāmo, tassā mahattaṃ pariharitum “**sīlakathā**”tiādi vuttam. Tenevāha “na tam idha vicārayissāmi”ti. Atha vā yaṃ aṭṭhakathaṃ kattukāmo, tadekadesabhāvena visuddhimaggo gahetabboti kathikānaṃ upadesaṃ karonto tattha vicāritadhamme uddesavasena dasseti “**sīlakathā**”tiādinā. Tattha **sīlakathā**ti cārittavāritādivasena sīlassa vitthārakathā. **Dhutadhammā**ti piṇḍapātikaṅgādayo terasa kilesadhunanakadhammā. **Kammaṭṭhānāni sabbānī**ti pāliyaṃ āgatāni aṭṭhatimāsa, aṭṭhakathāyaṃ dveti niravasesāni yogakammassa bhāvanāya pavattiṭṭhānāni. **Cariyāvidhānasahitoti** rāgacaritādīnaṃ sabhāvādividhānena sahito. **Jhānāni** cattāri rūpāvacarajjhānāni, **samāpattiyo** catasso arūpasamāpattiyo. Aṭṭhapi vā paṭiladdhamattāni **jhānāni**, samāpajjanavasībhāvappattiyā **samāpattiyo**. **Jhānāni** vā rūpārūpāvacarajjhānāni, **samāpattiyo** phalasaṃpattinirodhasamāpattiyo.

**12. Lokiyalokuttarabhedā** cha abhiññāyo **sabbā abhiññāyo**. **Ñāṇavibhaṅgā**dīsu (vibha. 751) āgatanayena ekavidhādīnā paññāya saṃkaletvā sampiṇḍetvā nicchayo **paññāsāṅkalananicchayo**.

**13. Paccayadhammānaṃ** hetādīnaṃ paccayuppannadhammānaṃ hetupaccayādibhāvo paccayākāro, tassa desanā **paccayākāradesanā**, paṭiccasamuppādakathāti attho. Sā pana nikāyantaraladdhisāṅkararahitatāya suṭṭhu parisuddhā, ghanavinibbhogassa sudukkaratāya nipuṇā saṅhasukhumā, ekattanayādisahitā ca tattha vicāritāti āha “**suparisuddhanipuṇanayā**”ti. Paṭisambhidādisu āgatanayaṃ avissajjetvā vā vicāritattā **avimuttatantimaggā**.

**14. Iti pana sabbanti iti-saddo** parisamāpane, **pana-saddo** vacanālaṅkāre, etaṃ sabbanti attho. **Idhāti** imissā aṭṭhakathāya. **Na tam vicārayissāmi** punaruttibhāvatoti adhippāyo.

**15. Idāni** tasseva avicāraṇassa ekantakāraṇaṃ niddhārento “**majjhe visuddhimaggo**”tiādimāha. Tattha “majjhe ṭhatvā”ti etena majjhaṭṭhabhāvadīpanena viśesato catunnaṃ āgamānaṃ sādharmaṇaṭṭhakathā visuddhimaggo, na **sumaṅgalavilāsīnī**dayo viya asādharmaṇaṭṭhakathāti dasseti. “Viśesato”ti ca idaṃ vinayābhīdhammānampi visuddhimaggo yathārahaṃ atthavaṇṇanā hoti evāti katvā vuttam.

**16. Icevāti** iti eva. **Tampīti** visuddhimaggampi. **Etāyāti** papañcasūdaniyā. Ettha ca “sīhaḷadīpaṃ ābhata”tiādinā aṭṭhakathākaraṇassa nimittaṃ dasseti, “dīpavāsīnamatthāya, sujanassa ca tuṭṭhattham, ciraṭṭhitatthañca dhammassā”ti etena payojanaṃ, “majjhimāgamavarassa attham pakāsīyissāmi”ti etena piṇḍattham, “apanetvāna tatohaṃ sīhaḷabhāsa”ntiādinā, “sīlakathā”tiādinā ca karaṇappakāraṃ.

Sīlakathādīnaṃ avicāraṇampi hi idha karaṇappakāro evāti.

Ganthārambhakathāvaṇṇanā niṭṭhitā.

### Nidānakathāvaṇṇanā

1. Vibhāgavantānaṃ sabhāvavibhāvanaṃ vibhāgadassanamukheneva hotīti paṭhamam tāva paṇṇāsavaggasuttādivasena majjhimāgamassa vibhāgaṃ dassetuṃ “**tattha majjhimsaṅgīti nāmā**”tiādīmāha. Tattha **tatthāti** yaṃ vuttam “majjhimāgamavarassa attham pakāsayissāmī”ti, tasmim vacane. Yā majjhimāgamapariyāyena majjhimsaṅgīti vuttā, sā paṇṇāsādito edisāti dasseti “majjhimsaṅgīti nāmā”tiādīnā. **Tatthāti** vā “etāya aṭṭhakathāya vijānātha majjhimsaṅgītiyā attha”nti ettha yassā majjhimsaṅgītiyā attham vijānāthāti vuttam, sā majjhimsaṅgīti nāma paṇṇāsādito edisāti dasseti. Pañca dasakā paṇṇāsā, mūle ādimhi paṇṇāsā, mūlabhūtā vā paṇṇāsā **mūlapaṇṇāsā**. Majjhe bhavā majjhimā, majjhimā ca sā paṇṇāsā cāti **majjhimapañṇāsā**. Upari uddham paṇṇāsā **uparipaṇṇāsā**. **Paṇṇāsattayasaṅgahāti** paṇṇāsattayaparigaṇanā.

Ayaṃ saṅgaho nāma jātisañjātikiriyāgaṇanavasena catubbidho. Tattha “yā cāvuso visākha, sammāvācā, yo ca sammākammanto, yo ca sammāājīvo, ime dhammā sīlakhandhe saṅgahitā”ti (ma. ni. 1.462) ayaṃ jātisaṅgaho. “Yo cāvuso visākha, sammāvāyāmo. Yā ca sammāsati, yo ca sammāsamādhi, ime dhammā samādhiikkhandhe saṅgahitā”ti ayaṃ sañjātisaṅgaho. “Yā cāvuso visākha, sammādiṭṭhi, yo ca sammāsaṅkappo, ime dhammā paññākkhandhe saṅgahitā”ti ayaṃ kiriyāsaṅgaho. “Hañci cakkhāyatanam rūpakkhandhagaṇanam gacchati, tena vata re vattabbe cakkhāyatanam rūpakkhandhena saṅgahita”nti (kathā. 471) ayaṃ gaṇanasaṅgaho. Ayameva ca idhādhippeto. Tena vuttam “paṇṇāsattayasaṅgahāti paṇṇāsattayaparigaṇanā”ti.

**Vaggatoti** samūhato, so panettha dasakavasena veditabbo. Yebhuyyena hi sāsane dasake vaggavohāro. Tenevāha “**ekekāya paṇṇāsāya pañca pañca vagge katvā**”ti. **Pannarasavaggasamāyogāti** pannarasavaggasamāyogāti attho. Keci pana samāyogasaddam samudāyattham vadanti. **Padatoti** ettha aṭṭhakkharo gāthāpādo “pada”nti adhippeto, tasmā “akkharato cha akkharasatasahassāni caturāsītuttarasatādhikāni catucattālīsa sahasāni ca akkharāni”ti pāṭhena bhavitabbanti vadanti. Yasmā pana navakkharo yāva dvādasakkharo ca gāthāpādo saṃvijjati, tasmā tādisānampi gāthānam vasena aḍḍhateyyagāthāsataṃ bhāṇavāro hotīti katvā “**akkharato satta akkharasatasahassāni cattālīsañca sahasāni tepaññāsañca akkharāni**”ti vuttam. Evañhi padabhāṇavāragaṇanāhi akkharagaṇanā saṃsandati, netarathā. **Bhāṇavāro**ti ca dvattiṃsakkharānam gāthānam vasena aḍḍhateyyagāthāsataṃ, ayañca akkharagaṇanā bhāṇavāragaṇanā ca padagaṇanānusārena laddhāti veditabbā. Imameva hi attham ñāpetuṃ suttagaṇanānantaram bhāṇavāre agaṇetvā padāni gaṇitāni. Tatridam vuccati –

“Bhāṇavārā yathāpi hi, majjhimassa pakāsītā;  
Upaḍḍhabhāṇavāro ca, tevīsati padādhiko.

Satta satasahassāni, akkharānam vibhāvaye;  
Cattālīsa sahasāni, tepaññāsañca akkhara”nti.

**Anusandhitoti** desanānusandhito. Ekasmim eva hi sutte purimapacchimānam desanābhāgānam sambandho anusandhānato anusandhi. Ettha ca attajjhāsāyānusandhi parajjhāsāyānusandhīti duvidho ajjhāsāyānusandhi. So pana katthaci desanāya vippakatāya dhammam suṇantānam pucchāvasena, katthaci desentassa satthu sāvakassa dhammapaṭiggāhakānañca ajjhāsāyavasena, katthaci desetabbassa dhammassa vasena hotīti samāsato tippakāro. Tena vuttam “**pucchānusandhi ajjhāsāyānusandhiyathānusandhivasena saṅkhepato tividho anusandhī**”ti. Saṅkhepeneva ca catubbidho anusandhi veditabbo. Tattha “evaṃ vutte aññataro bhikkhu bhagavantam

etadavoca ‘kiṃ nu kho, bhante, orimaṃ tīraṃ, kiṃ pārimaṃ tīraṃ, ko majjhe saṃsīdo, ko thale ussādo, ko manussaggāho, ko amanussaggāho, ko āvattaggāho, ko antopūtibhāvo’ti’ (saṃ. ni. 4.241)? Evaṃ pucchānānaṃ vijjantena bhagavatā pavattitadesanāvasena **pucchānusandhi** veditabbo. “Atha kho aññatarassa bhikkhuno evaṃ cetaso parivattakko udapādi ‘iti kira bho rūpaṃ anattā... vedanā... saññā... saṅkhārā... viññāṇaṃ anattā, anattakatāni kammāni kamattānaṃ phusissantī’ti. Atha kho bhagavā tassa bhikkhuno cetasā cetoparivattakamaññāya bhikkhū āmantesi tīraṃ kho panetaṃ, bhikkhave, vijjati, yaṃ idhekacco moghapuriso avidvā avijjāgato taṇhādhipateyyena cetasā satthusāsaṇaṃ atidhāvitabbaṃ maññeyya ‘iti kira bho rūpaṃ anattā...pe... phusissantī’ti. Taṃ kiṃ maññatha, bhikkhave, rūpaṃ niccaṃ vā aniccaṃ vā’ti (ma. ni. 3.90) evaṃ paresaṃ ajjhāsayaṃ viditvā bhagavatā pavattitadesanāvasena **parajjhāsayaṇusandhi** veditabbo.

“Tassa mayhaṃ brāhmaṇa etadahosi ‘yaṃnūnāhaṃ yā tā rattiyo abhiññātā abhilakkhitā cātuddasī pañcadasī aṭṭhamī ca pakkhassa, tathārūpāsu rattīsu yāni tāni ārāmacetiyaṇi vanacetiyaṇi rukkhacetiyaṇi bhimsanakāni salomaḥṣāni, tathārūpesu senāsanesu vihareyyaṃ appeva nāmāhaṃ bhayabheravaṃ passeyya’nti’ (ma. ni. 1.49) evaṃ bhagavatā, “tatrāvuso lobho ca pāpako doso ca pāpako lobhassa ca pahānāya dosassa ca pahānāya atthi majjhimā paṭipadā, cakkhukaraṇī ñāṇakaraṇī upasamāya abhiññāya sambodhāya nibbānāya saṃvattatī’ti (ma. ni. 1.33) evaṃ dhammasenāpatinā ca attano ajjhāsayeneva pavattitadesanāvasena **attajjhāsayaṇusandhi** veditabbo. Yena pana dhammena ādimhi desanā uṭṭhitā, tassa anurūpadhammavasena vā paṭipakkhadhammavasena vā yesu suttesu uparī desanā āgacchati, tesam vasena **yathānusandhi** veditabbo. Seyyathidaṃ **ākaṅkheyyasutte** (ma. ni. 1.65) heṭṭhā sīlena desanā uṭṭhitā, uparī abhiññā āgatā. **Vatthusutte** (ma. ni. 1.70) heṭṭhā kilesena desanā uṭṭhitā, uparī brahmavihārā āgatā. **Kosambakasutte** (ma. ni. 1.491) heṭṭhā bhaṇḍanena desanā uṭṭhitā, uparī sārāṇiyadhammā āgatā. **Kakacūpame** (ma. ni. 1.222) heṭṭhā akkhantiyā vasena desanā uṭṭhitā, uparī kakacūpamā āgatāti.

**Vitthārato panethāti** evaṃ saṅkhepato tividho catubbidho ca anusandhi ettha etasmiṃ majjhimānikāye tasmim tasmim sutte yathārahaṃ vitthārato vibhajitvā viññāyamānā navasatādhikāni tīṇi anusandhisahassāni honti. Yathā cetam paṇṇāsādivibhāgavacanaṃ majjhimasaṅgītiyā sarūpadassanattam hoti, evaṃ pakkhepadosapariharanattam hoti. Evañhi paṇṇāsādisu vavattitesu tabbinimuttam kiñci suttam yāva ekam padampi ānetvā imaṃ majjhimasaṅgītiyāti kassaci vattum okāso na siyāti.

Evaṃ paṇṇāsavaggasuttabhāṇavārānusandhibyañjanato majjhimasaṅgītiṃ vavattapetvā idāni naṃ ādito paṭṭhāya saṃvaṇṇetukāmo attano saṃvaṇṇanāya tassā paṭhamamahāsaṅgītiyaṃ nikkhittānukkameneva pavattabhāvaṃ dassetuṃ “**tattha paṇṇāsāsu mūlapaṇṇāsā ādī**”tiādīmāha. Tattha yathāpaccayaṃ tattha tattha desitattā paññattattā ca vipakkhaṇānaṃ dhammavinayānaṃ saṅgahetvā gāyaṇaṃ kathaṇaṃ saṅgīti, mahāvisayattā pūjanīyattā ca mahatī saṅgīti mahāsaṅgīti, paṭhamā mahāsaṅgīti paṭhamamahāsaṅgīti, tassā pavattitakālo paṭhamamahāsaṅgītikālo, tasmim **paṭhamamahāsaṅgītikāle**. Nidadāti desanaṃ desakālādivasena aviditaṃ viditaṃ katvā nidassetīti **nidānaṃ**, yo lokiyehi “upogghāto’ti vuccati, svāyamettha “evaṃ me suta’ntiādiko gantho veditabbo, na pana “sanidānāhaṃ, bhikkhave, dhammaṃ desemi’tiādīsu (a. ni. 3.126) viya ajjhāsayaḍidesanuppattihetu. Tenevāha “**evaṃ me sutantiādikaṃ āyasmatā ānandena paṭhamamahāsaṅgītikāle vuttaṃ nidānamādī**”ti. Kāmañcetha yassaṃ paṭhamamahāsaṅgītiyaṃ nikkhittānukkamena saṃvaṇṇanaṃ kattukāmo, sā vitthārato vattabbā. **Sumaṅgalavilāsiniyaṃ** (dī. ni. tī. 1.nidānakathāvaṇṇanā) pana attanā vitthāritattā tattheva gahetabbāti imissā saṃvaṇṇanāya mahantataṃ pariharanto “**sā panesā**”tiādīmāha.

Nidānakathāvaṇṇanā niṭṭhitā.

## 1. Mūlapariyāyavaggo

## 1. Mūlapariyāyasuttavaṇṇanā

### Abbhantaraniḍānavāṇṇanā

1. Evaṃ bāhiraṇidāne vattabbaṃ atidisiṭvā idāni abhantaraniḍānaṃ ādito paṭṭhāya saṃvaṇṇetum “**yaṃ paneta**”ntiādi vuttaṃ. Tattha yasmā saṃvaṇṇanaṃ karontena saṃvaṇṇetabbe dhamme padavibhāgaṃ padatthañca dassetvā tato paraṃ piṇḍattādidassanavasena saṃvaṇṇanā kātabbā, tasmā padāni tāva dassento “**evanti nipātapada**”ntiādimāha. Tattha **padavibhāgoti** padānaṃ viseso, na padaviggaho. Atha vā padāni ca padavibhāgo ca padavibhāgo, padaviggaho ca padavibhāgo ca **padavibhāgoti** vā ekasesavasena padapadaviggahā padavibhāgasaddena vuttāti veditabbaṃ. Tattha padaviggaho “subhagañca taṃ vanañcāti **subhagavanam**, sālānaṃ rājā, sālo ca so rājā ca itipi sālārājā”tiādivasena samāsapadesu daṭṭhabbo.

**Atthatotī** padatthato. Taṃ pana padatthaṃ atthuddhārakkamena paṭṭhamam evaṃsaddassa dassento “**evaṃ-saddo tāvā**”tiādimāha. **Avadhāraṇādīti** ettha **ādi**-saddena idamatthapucchāparimāṇādiatthānaṃ saṅgaho daṭṭhabbo. Tathā hi “evaṃgatāni puthusippāyatanāni (dī. ni. 1.163), evavidho evamākāro”ti ca ādīsu idaṃ-saddassa atthe evaṃ-saddo. Gata-saddo hi pakārapariyāyo, tathā vidhākāra-saddā ca. Tathā hi vidhayuttagata-sadde lokiyā pakāratthe vadanti. “Evaṃ su te sunhātā suvilittā kappitakesamassū āmukkamaṇikuṇḍalābharaṇā odāvatthavasanā pañcahi kāmagaṇehi samappitā samaṅgībhūtā paricārenti, seyyathāpi tvaṃ etarahi saccariyakoti. No hidam, bho gotamā”tiādisu (dī. ni. 1.286) pucchāyaṃ. “Evaṃlahuparivattaṃ (a. ni. 1.48) evamāyupariyanto”ti (pārā. 12) ca ādīsu parimāṇe.

Nanu ca “evaṃ su te sunhātā suvilittā, evamāyupariyanto”ti ettha evaṃ-saddena pucchanākāraparimāṇākāraṇaṃ vuttattā ākārattho eva evaṃ-saddoti? Na, visesasabbhāvato. Ākāramattavācako hi evaṃ-saddo ākāratthoti adhippeto yathā “evaṃ byā kho”tiādisu (ma. ni. 1.234, 396), na pana ākāravisesavācako. Evañca katvā “evaṃ jātena maccenā”tiādinī upamādiudāharaṇāni upapannāni honti. Tathā hi “yathāpi...pe... bahu”nti (dha. pa. 53) ettha puppharāsīṭṭhāniyato manussūpapatti-sappurisūpanissaya-saddhammassavana-yonisomanasikāra- bhogasampatti-ādidānādi-puññakiriyahetusamudāyato sobhā-sugandhatādiguṇayogato mālāguṇasadiyo pahūtā puññakiriyā maritabbasabhāvatāya maccena sattena kattabbāti jotitattā puppharāsīmālāguṇāva upamā, tesam upamākāro yathā-saddena aniyamato vuttoti “evaṃ-saddo upamākāraṇigamanattho”ti vuttaṃ yuttaṃ. So pana upamākāro niyamamāno atthato upamāva hotīti āha “**upamāyaṃ āgato**”ti. Tathā “evaṃ iminā ākārena abhikkamitabba”ntiādinā upadisiyamānāya samaṇasārūppāya ākappasampattiyā yo tattha upadisanākāro, so atthato upadeso evāti vuttaṃ “**evaṃ te...pe... upadese**”ti. Tathā “**evametaṃ bhagavā, evametaṃ sugatā**”ti ettha ca bhagavatā yathāvuttamatthaṃ aviparītato jānantehi kataṃ tattha saṃvijjamaṇagaṇānaṃ pakārehi haṃsanaṃ udaggaṭākaraṇaṃ sampahaṃsanaṃ. Yo tattha sampahaṃsanākāroti yojetabbaṃ.

**Evamevaṃ panāyanti** ettha garaṇānākāroti yojetabbaṃ, so ca garaṇānākāro “vasalī”tiādikhuṃsanasaddasannidhānato idha evaṃ-saddena pakāsītōti viññāyati. Yathā cettha, evaṃ upamākārādayopi upamādivasena vuttānaṃ puppharāsīdisaddānaṃ sannidhānato daṭṭhabbaṃ. **Evaṃ, bhanteti** pana dhammassa sādhuṃ savanamanasikāre sanniyojitehi bhikkhūhi attano tattha ṭhitabhāvassa paṭijānavasena vuttattā ettha evaṃ-saddo vacanasampañchanattho vutto. Tena **evaṃ, bhante** sādhu, bhante, suṭṭhu, bhanteti vuttaṃ hoti. **Evañca vadehīti** “yathāhaṃ vadāmi, evaṃ samaṇaṃ ānandaṃ vadehī”ti yo evaṃ vadanākāro idāni vattabbo. So evaṃsaddena nidassīyatīti “**nidassane**”ti vuttoti. **Evaṃ notī** etthāpi tesam yathāvuttadhammānaṃ ahitadukkhāvahabhāve sannīṭṭhānajananaṃ anumatigahaṇavasena “saṃvattanti vā no vā, kathaṃ vo ettha hotī”ti pucchāya katāya “evaṃ no ettha hotī”ti vuttattā tadākārasannīṭṭhānaṃ evaṃ-saddena vibhāvitanti viññāyati. So pana tesam dhammānaṃ ahitāya dukkhāya saṃvattanākāro niyamamāno avadhāraṇattho hotīti āha “**evaṃ no ettha hotītiādisu avadhāraṇe**”ti.

**Nānāyanipuṇanti** ekattanānattaabyāpāraevaṃdhammatāsaṅkhātā, nandiyāvattatipukkhalasīhavikkīlītaṅkusadisālocanasāṅkhātā vā ādhārādibhedavasena nānāvidhā nayā nānāyā, nayā vā pālīgatiyo, tā ca paññattianupaññattīdivasena saṅkilesabhāgiyādilokiyāditadubhayavomissakādivasena kusalādivasena khandhādivasena saṅghādivasena samayavimuttādivasena ṭhapanādivasena kusalamūlādivasena tikappaṭṭhānādivasena ca nānappakārāti nānāyā. Tehi nipuṇaṃ saṅhaṃ sukhumanti **nānāyanipuṇaṃ**. Āsayova **ajjhāsayo**, te ca sassatādibhedena, tattha ca apparajakkhatādibhedena aneke, attajjhāsayaḍayo eva vā samuṭṭhānaṃ uppattihetu etassāti **anekajjhāsayasamuṭṭhānaṃ**. **Atthabyañjanasampannanti** atthabyañjanapariṇaṃ upanetabbābhāvato, saṅkāsanapakāsana-vivaraṇa-vibhajana-uttānīkaraṇa-paññattivāsena chahi atthapadehi, akkhara-padabyañjanākāraniruttiniddesavasena chahi byañjanapadehi ca samannāgatanti vā attho daṭṭhabbo.

**Vividhapāṭihāriyanti** ettha pāṭihāriyapadassa vacanatthaṃ (udā. aṭṭha. 1; itivu. aṭṭha. nidānavāṇanā; saṃ. ni. tī. 1.1.1 devatāsaṃyutta) “paṭipakkhaharaṇato, rāgādikilesāpanayanato ca **pāṭihāriya**”nti vadanti, bhagavato pana paṭipakkhā rāgādayo na santi, ye haritabbā. Puthujjanānampi vigatūpakkilese aṭṭhaguṇasamannāgate citte hatapaṭipakkhe iddhividhaṃ pavattati, tasmā tattha pavattavohārena ca na sakkā idha “**pāṭihāriya**”nti vattaṃ. Sace pana mahākāruṇikassa bhagavato veneyyagatā ca kilesā paṭipakkhā, tesam haraṇato “**pāṭihāriya**”nti vuttaṃ, evaṃ sati yuttametam. Atha vā bhagavato ca sāsanaṃ ca paṭipakkhā titthiyā, tesam haraṇato **pāṭihāriyam**. Te hi diṭṭhiharaṇavasena diṭṭhipakāsane asamatthabhāvena ca iddhiādesanānusāsanihi haritā apanītā hontīti. “Paṭi”ti vā ayam saddo “pacchā”ti etassa atthaṃ bodheti “tasmim paṭipavittamhi, añño āgañchi brāhmaṇo”tiādīsu (su. ni. 985; cūlani. 4) viya, tasmā samāhite citte vigatūpakkilese ca katakiccena pacchā haritabbam pavattetabbanti pāṭihāriyam, attano vā upakkilesesu catutthajjhānamaggehi haritesu pacchā haraṇam pāṭihāriyam, iddhiādesanānusāsaniyo ca vigatūpakkilese katakiccena ca sattahitatthaṃ puna pavattetabbā, haritesu ca attano upakkilesesu parasattānaṃ upakilesaharaṇāni hontīti pāṭihāriyāni bhavanti. Pāṭihāriyameva **pāṭihāriyam**, pāṭihāriye vā iddhiādesanānusāsanisamudāye bhavaṃ ekamekaṃ **pāṭihāriyanti** vuccati. Pāṭihāriyam vā catutthajjhānaṃ maggo ca paṭipakkhaharaṇato, tattha jātaṃ, tasmim vā nimittabhūte, tato vā āgatanti **pāṭihāriyam**. Tassa pana iddhiādibhedena visayabhedena ca bahuviddhassa bhagavato desanāyaṃ labbhamānattā āha “**vividhapāṭihāriya**”nti.

**Na aññathāti** bhagavato sammukhā sutākārato na aññathāti attho, na pana bhagavato desitākārato. Acinteyyānubhāvā hi bhagavato desanā. Evañca katvā “sabbappakārena ko samattho viññātu”nti idaṃ vacanaṃ samatthitaṃ bhavati, dhāraṇabaladassanañca na virujjhati sutākārāvirañjanassa adhippetattā. Na hettha atthantaratāparihāro dvinnampi atthānaṃ ekavisayattā. Itarathā thero bhagavato desanāya sabbathā paṭiggahaṇe samattho asamattho cāti āpajjeyyāti.

“Yo paro na hoti, so attā”ti evaṃ vuttāya niyakajjhattasaṅkhātāya sasantatiyā vattanato tividhopi me-saddo kiñcāpi ekasmimyeva atthe dissati, karaṇasampadānasāminiddesavasena pana vijjamānaṃ bhedaṃ sandhāyāha “**me-saddo tīsu atthesu dissati**”ti.

Kiñcāpi upasaggo kiriyaṃ viseseti, jotakabhāvato pana satipi tasmim sutasaddo eva taṃ tamatthaṃ vadatīti anupasaggassa sutasaddassa atthuddhāre saupasaggassa gahaṇam na virujjhatīti dassento “**saupasaggo ca anupasaggo cā**”tiādīmāha. Assāti sutasaddassa. Kammabhāvasādhanāni idha sutasadde sambhavanti vuttaṃ “**upadhāritanti vā upadhāraṇanti vā attho**”ti. **Mayāti atthe satīti** yadā me-saddassa kattivasena karaṇaniddeso, tadāti attho. **Mamāti atthe satīti** yadā sambandhavasena sāminiddeso, tadā.

Suta-saddasannidhāne payuttana evaṃ-saddena savanakiriyājotakena bhavitabbanti vuttaṃ “**evanti sotaviññādiviññāṅkiccanidassana**”nti. Ādi-saddena sampañcchanādīnaṃ pañcadvārikaviññāṅanaṃ tadabhinīhaṇānaṃ manodvārikaviññāṅanaṃ gahaṇam veditabbam. Sabbesampi vākyānaṃ eva-kāratthasahitattā “**suta**”nti etassa sutamevāti ayamattho labbhatīti āha

“**assavanabhāvapaṭikkhepato**”ti. Etena avadhāraṇena nirāsaṅkatam dasseti. Yathā ca sutam sutamevāti niyametabbam, tam sammā sutam hotīti āha  
 “**anūnādhikāvīparītaggahaṇanidassana**”nti. Atha vā saddantarathāpohanavasena saddo attham vadatīti **sutanti** asutam na hotīti ayametassa atthoti vuttam “**assavanabhāvapaṭikkhepato**”ti. Iminā diṭṭhādivinivattanam karoti. Idam vuttam hoti “na idam mayā diṭṭham, na sayambhuñāṇena sacchikatam, atha kho sutam, tañca kho sammadevā”ti. Tenevāha –  
 “**anūnādhikāvīparītaggahaṇanidassana**”nti. Avadhāraṇatthe vā **evaṃ**-sadde ayamatthayojanā karīyatīti tadapekkhassa suta-saddassa ayamattho vutto “**assavanabhāvapaṭikkhepato**”ti. Tenevāha  
 “**anūnādhikāvīparītaggahaṇanidassana**”nti. Savanasaddo cettha kammattho vedītabbo “suyyatī”ti.

Evaṃ savanahetusūnantapuggalasavanavisesavasena padattayassa ekena pakārena atthayojanam dassetvā idāni pakārantarehipi tam dassetum “**tathā eva**”ntiādi vuttam. Tattha **tassāti** yā sā bhagavato sammukhā dhammassavanākārena pavattā manodvāraviññāṇavīthi, tassā. Sā hi nānappakārena ārammaṇe pavattitum samatthā. Tathā ca vuttam “**sotadvārānusārenā**”ti. **Nānappakārenāti** vakkhamānānam anekavihitānam byañjanatthaggaṇānam nānākārena. Etena imissā yojanāya ākāratho evaṃ-saddo gahitoti dīpeti. **Pavattibhāvappakāsananti** pavattiyā atthibhāvappakāsanam. **Sutanti dhammappakāsananti** yasmim ārammaṇe vuttappakārā viññāṇavīthi nānappakārena pavattā, tassa dhammatā vuttam, na sutasaddassa dhammatthattā. Vuttassevatthassa pākāṭikaraṇam “**ayañhetthā**”tiādi. Tattha **viññāṇavīthiyāti** karaṇatthe karaṇavacanam. **Mayāti** kattuutthe.

**Evanti niddisitabbappakāsananti** nidassanatham evaṃ-saddam gahetvā vuttam nidassetabbassa niddisitabbattābhāvābhāvato. Tena evaṃ-saddena sakalampi sutam paccāmatthanti dasseti. Suta-saddassa kiriyāsaddattā savanakiriyāya ca sādharmaṇaviññāṇapabandhapaṭibaddhattā tattha ca puggalavohāroti vuttam “**sutanti puggalakiccappakāsa**”nti. Na hi puggalavohārarahite dhammapabandhe savanakiriyā labbhātīti.

**Yassa cittasantānassāti**ādipi ākārathameva evaṃ-saddam gahetvā purimayojanāya aññathā atthayojanam dassetum vuttam. Tattha **ākārapaññattīti** upādāpaññatti eva dhammānam pavattiākārūpādānavasena tathā vuttā. **Sutanti visayaniddesoti** sotabbabhūto dhammo savanakiriyākattupuggalassa savanakiriyāvasena pavattiṭṭhānanti katvā vuttam. Cittasantānavinimuttassa paramatthato kassaci kattu abhāvepi saddavohārena buddhiparikappitabhedavacanicchāya cittasantānato aññam viya taṃsamaṅgiṃ katvā vuttam “**cittasantānena taṃsamaṅgino**”ti. Savanakiriyāvisayopi sotabbadhammo savanakiriyāvasena pavattacittasantānassa idha paramatthato kattubhāvato, savanasena cirtappavattiyā eva vā savanakiriyābhāvato taṃkiriyākattu ca visayo hotīti vuttam “**taṃsamaṅgino kattuvise**”ti. Sutākārassa ca therassa sammānicchitabhāvato āha “**gahaṇasanniṭṭhāna**”nti. Etena vā avadhāraṇattham evaṃ-saddam gahetvā ayamatthayojanā katāti daṭṭhabbam.

Pubbe sutānam nānavihitānam suttasaṅkhātānam atthabyañjanānam upadhāritarūpassa ākārassa nidassanassa, avadhāraṇassa vā pakāsanasabhāvo evaṃ-saddoti tadākārādiupadhāraṇassa puggalapaññattiyā upādānabhūta-dhammapabandhabyāpārātāya vuttam – “**evanti puggalakiccaniddeso**”ti. Savanakiriyā pana puggalavādinopi viññāṇanirapekkhā natthīti visesato viññāṇabyāpāroti āha “**sutanti viññāṇakiccaniddeso**”ti. “Me”ti saddappavattiyā ekanteneva sattavisayattā viññāṇakiccassa ca tattheva samodahitabbato “**meti ubhayakiccayuttapuggalaniddeso**”ti vuttam. Avijjamānapaññattivijjamānapaññattisabhāvā yathākkamam evaṃ-sadda – suta-saddānam atthāti te tathārūpa-paññatti-upādānabhūta-dhammapabandhabyāpārābhāvena dassento āha – “**evanti puggalakiccaniddeso, sutanti viññāṇakiccaniddeso**”ti. Ettha ca karaṇakiriyākattukammavisesappakāsanavasena puggalabyāpāravisayapuggalabyāpāranidassanavasena gahaṇākāragāhakatabbisayavisesaniddesavasena kattukaraṇabyāpārakattuniddesavasena ca dutiyādayo catasso atthayojanā dassitāti daṭṭhabbam.

Sabbassapi saddādhigamanīyassa atthassa paññattimukheneva paṭipajjitabbattā sabbapaññattīnañca vijjamānādivasena chasu paññattibhedeṣu antogadhattā tesu “eva”ntiādīnaṃ paññattīnaṃ sarūpaṃ niddhārento āha – **“evanti ca meti cā”**tiādi. Tattha “eva”nti ca “me”ti ca vuccamānassatthassa ākāradīno dhammānaṃ asallakkhaṇabhāvato avijjamānapaññattibhāvoti āha – **“saccikaṭṭhaparamatthavasena avijjamānapaññatti”**ti. Tattha **saccikaṭṭhaparamatthavasenā** bhūtatthauttamatthavasena. Idaṃ vuttaṃ hoti – yo māyāmarīciādayo viya abhūtattho, anussavādīhi gahetabbo viya anuttamattho ca na hoti, so rūpasaddādisabhāvo, ruppanānubhavanādisabhāvo vā attho saccikaṭṭho paramattho cāti vuccati, na tathā “evaṃ me”ti padānaṃ atthoti. Etamevatthaṃ pākaṭataraṃ kātuṃ **“kiñhettha ta”**ntiādi vuttaṃ. **Sutanti** pana saddāyatanaṃ sandhāyāha **“vijjamānapaññatti”**ti. Teneva hi **“yañhi taṃ ettha sotena upaladdha”**nti vuttaṃ, “sotadvārānusārena upaladdha”nti pana vutte atthabyañjanādisabbaṃ labbhati.

**Taṃ taṃ upādāya vattabbato**ti sotapathamāgate dhamme upādāya tesam upadhāritākārādīno paccāmasanavasena “eva”nti, sasantatipariyāpanne khandhe upādāya “me”ti vattabbattāti attho. **Diṭṭhādisabhāvarahite** saddāyatane pavattamānopi sutavohāro “dutiyaṃ tatiya”ntiādiko viya paṭhamādīni diṭṭhamutaviññāte apekkhitvāva pavattoti āha **“diṭṭhādīni upanidhāya vattabbato”**ti asutaṃ na hotīti hi sutanti pakāsitoyamatthoti. Attanā paṭividdhā suttassa pakāravisesā “eva”nti therena paccāmatṭhāti āha **“asammohaṃ dīpeti”**ti. **Nānappakārapaṭivedhasamattho** hotīti etena vakkhamānassa suttassa nānappakāratam duppaṭivijjhatañca dasseti. **Sutassa asammosaṃ dīpeti**ti sutākārassa yāthāvato dassiyamānattā vuttaṃ. **Asammohenā**ti sammohābhāvena, paññāya eva vā savanakālasambhūtāya taduttarakālapaññāsiddhi. Evaṃ **asammosenā**ti etthāpi vattabbaṃ. **Byañjanānaṃ** paṭivijjhitabbo ākāro nātigambhīro, yathāsutadhāraṇameva tattha karaṇīyanti satiyā byāpāro adhiko, paññā tattha guṇībhūtāti vuttaṃ **“paññāpubbaṅgamāyā”**tiādi “paññāya pubbaṅgamā”ti katvā. Pubbaṅgamatā cettha padhānatā “manopubbaṅgamā”tiādīsu (dha. pa. 1, 2) viya. Pubbaṅgamatāya vā cakkhuvīññānādīsu āvajjanādīnaṃ viya appadhānatte paññā pubbaṅgamā etissāti ayampi attho yujjati. Evaṃ **satipubbaṅgamāyāti** etthāpi vuttanayānusārena yathāsambhavamatto veditabbo. **Atthabyañjanasampannassāti** atthabyañjanaparipuṇṇassa, saṅkāsanapakāsanavivaraṇavibhajanauttānīkaraṇapaññattivāsena chahi atthapadehi, akkharapadabyañjanākāraniruttiniddesavasena chahi byañjanapadehi ca samannāgatassāti vā attho daṭṭhabbo.

**Yonisomanasikāraṃ dīpeti** evaṃ-saddena vuccamānānaṃ ākāranidassanāvadhāraṇatthānaṃ aviparītasaddhammavisayattāti adhippāyo. **Avikkhepaṃ dīpeti**ti “mūlapariyāyaṃ kattha bhāsita”ntiādipucchāvasena pakaraṇappattassa vakkhamānassa suttassa savanaṃ samādhānamantarena na sambhavatīti katvā vuttaṃ. **Vikkhittacittassāti**tiādi tassevatthassa samatthanavasena vuttaṃ. **Sabbasampattiyāti** atthabyañjanadesakapayojanādisampattiyā. Aviparītasaddhammavisayehi viya ākāranidassanāvadhāraṇatthehi yonisomanasikārassa, saddhammassavanena viya ca avikkhepassa yathā yonisomanasikārena phalabhūtena attasammāpanidhipubbekatapuññānaṃ siddhi vuttā tadavinābhāvato, evaṃ avikkhepena phalabhūtena kāraṇabhūtānaṃ saddhammassavanassappurisūpanissayānaṃ siddhi dassetabbā siyā assutavato sappurisūpanissayarahitassa ca tadabhāvato. **Na hi vikkhittacittoti**ādīnā samatthanavacanena pana avikkhepena kāraṇabhūtena sappurisūpanissayena ca phalabhūtassa saddhammassavanassa siddhi dassitā. Ayaṃ panettha adhippāyo yutto siyā – saddhammassavanassappurisūpanissayā na ekantena avikkhepassa kāraṇaṃ bāhiraṅgattā, avikkhepo pana sappurisūpanissayo viya saddhammassavanassa ekantakāraṇanti. Evampi avikkhepena sappurisūpanissayasiddhijotanā na samatthitāva, no na samatthitā vikkhittacittānaṃ sappurisapayirupāsānābhāvassa atthasiddhattā. Ettha ca purimaṃ phalena kāraṇassa siddhidassanaṃ nadīpūrena viya upari vuṭṭhisabbhāvassa, dutiyaṃ kāraṇena phalassa siddhidassanaṃ daṭṭhabbaṃ ekantavassinā viya meghavuṭṭhānena vuṭṭhippavattiyā.

Bhagavato vacanassa atthabyañjanapabhedaparicchedavasena sakalasāsanasampattioḡāhanākāro niravasesaparahitaparīpūrikāraṇanti vuttaṃ **“evaṃ bhaddako ākāro”**ti. Yasmā na hotīti sambandho.

**Pacchimakakkadvayasampattinti** attasammāpaṇidhipubbekatapuññatāsaṅkhātāṃ guṇadvayaṃ. Aparāparavuttīyā cettha cakkabhāvo, caranti etehi sattā sampattibhavesūti vā. Ye sandhāya vuttam “cattārimāni, bhikkhave, cakkāni, yehi samannāgatānaṃ devamanussānaṃ catucakkaṃ vattatī”tiādi (a. ni. 4.31). Purimacchimbhāvo cettha desanākkamavasena daṭṭhabbo.

**Pacchimakakkadvayasiddhiyāti** pacchimakakkadvayassa atthitāya. Sammāpaṇihitatto pubbe ca katapuñño suddhāsāyo hoti tadasuddhihetūnaṃ kilesānaṃ dūrībhāvatoti āha – “**āsayasuddhi siddhā hoti**”ti. Tathā hi vuttam “sammāpaṇihitaṃ cittaṃ, seyyaso naṃ tato kare”ti (dha. pa. 43), “katapuññosi tvaṃ ānanda, padhānāmanuyuñja, khippaṃ hohisi anāsavo”ti (dī. ni. 2.207) ca. Tenevāha “**āsayasuddhiyā adhigamabyattisiddhī**”ti. **Payogasuddhiyāti** yonisomanasikārapubbaṅgassa dhammassavanapayogassa visadabhāvena. Tathā cāha “**āgamabyattisiddhī**”ti. Sabbassa vā kāyavacīpayogassa niddosabhāvena. Parisuddhakāyavacīpayogo hi vipphaṇṇasārābhāvato avikkhittacitto pariyattiyam visārado hotīti.

**Nānappakārapaṭivedhadīpakenāti**tiādinā atthabyañjanesu therassa evaṃsaddasuta-saddānaṃ asammohāsamosadīpanato catuṭṭhisambhidāvasena atthayojanaṃ dasseti. Tattha **sotabbhadapaṭivedhadīpakenāti** etena ayaṃ suta-saddo evaṃ-saddasannidhānato, vakkhamānāpekkhāya vā sāmāññeneva sotabbhadhammavisesaṃ āmasatīti dasseti. Manodīṭṭhikaraṇā pariyattidhammānaṃ anupekkhanasuppaṭivedhā visesato manasikārapaṭibaddhāti te vuttanayena yonisomanasikāradīpakena evaṃsaddena yojetvā, savanadhāraṇavacīparicayā pariyattidhammānaṃ visesena sotāvadhānapaṭibaddhāti te avikkhepadīpakena suta-saddena yojetvā dassento sāsanasampattiyā dhammassavane ussāhaṃ janeti. Tattha **dhammāti** pariyattidhammā. **Manasānupekkhitāti** “idha sīlaṃ kathitaṃ, idha samādhi, idha paññā, ettakā ettha anusandhiyo”tiādinā nayena manasā anu anu pekkhitā. **Diṭṭhiyā suppaṭividdhāti** nijjhānakkhantibhūtāya, ñātapariññāsaṅkhātāya vā diṭṭhiyā tattha tattha vuttarūpārūpadhamme “iti rūpaṃ, ettakaṃ rūpa”ntiādinā suṭṭhu vavattapetvā paṭividdhā.

**Sakalena vacanenāti** pubbe tīhi padehi visuṃ visuṃ yojitattā vuttam. **Attano adahantoti** “mamedā”nti attani atṭhapento. **Asappurisabhūminti** akataññutaṃ “idhekacco pāpabhikkhu tathāgatappaveditaṃ dhammavinayaṃ pariyāpuṇitvā attano dahatī”ti (pārā. 195) evaṃ vuttam anariyavohārāvattam, sā eva anariyavohārāvattā asaddhammo. Nanu ca ānandattherassa “mamedam vacana”nti adhimānassa, mahākassapattherādīnañca tadāsaṅkāya abhāvato asappurisabhūmisamatikkamādivacanaṃ niratthakanti? Nayidamevaṃ “evaṃ me suta”nti vadantena ayampi attho vibhāvitoti dassanato. Keci pana “devatānaṃ parivittakāpekkham tathāvacananti edisī codanā anavakāsāvā”ti vadanti. Tasmim kira khaṇe ekaccānaṃ devatānaṃ evaṃ cetaso parivittakko udapādi “bhagavā ca parinibbuto, ayañca āyasmā desanākusalo, idāni dhammaṃ deseti sakyakulappasuto tathāgatassa bhātā cūḷapituputto, kiṃ nu kho sayam sacchikataṃ dhammaṃ deseti, udāhu bhagavatoyeva vacanaṃ yathāsuta”nti. Evaṃ tadāsaṅkitappakārato asappurisabhūmisamokkamādito atikkamādi vibhāvitanti. **Appetīti** nidasseti. Diṭṭhadhammikasamparāyikaparamatthesu yathārahaṃ satte netīti netti, dhammoyeva netti **dhammanetti**.

Daḷhataraniviṭṭhā vicikicchā **kaṅkhā**. Nātiśamsappanā matibhedamattā **vimati**. **Assaddhiyaṃ vināseti** bhagavatā desitattā, sammukhāvassa paṭiggahitattā, khalitaduruttādīgahaṇadosābhāvato ca. Ettha ca paṭhamādayo tisso atthayojanā ākāradīatthesu aggahitavisesameva evaṃ-saddam gahetvā dassitā, tato parā catasso ākāratthameva evaṃ-saddam gahetvā vibhāvitā, pacchimā pana tisso yathākkamaṃ ākārattham nidassanattam avadhāraṇatthañca evaṃ-saddam gahetvā yojitāti daṭṭhabbam.

Eka-saddo aññasetṭhāsahāyasaṅkhyādīsū dissati. Tathā hesa “sassato attā ca loko ca, idameva saccam moghamaññanti ittheke abhivadanti”tiādīsū (ma. ni. 3.27) aññatthe dissati, “cetaso ekodibhāva”ntiādīsū (dī. ni. 1.228) seṭṭhatthe, “eko vūpakatṭho”tiādīsū (dī. ni. 1.405) asahāye, “ekova kho, bhikkhave, khaṇo ca samayo ca brahmacariyavāsāyā”tiādīsū saṅkhyāyaṃ. Idhāpi saṅkhyāyanti dassento āha “**ekanti gaṇanaparicchedaniddeso**”ti. **Kālañca samayañcāti** yuttakālañca



paccayasāmaggiṇca **khaṇoti** okāso. Tathāgatuppādādiko hi maggabrahmacariyassa okāso tappaccayaapaṭilābhahetuttā. Khaṇo eva ca samayo. Yo “khaṇo”ti ca “samayo”ti ca vuccati, so ekovāti hi attho **mahāsamayoti** mahāsamūho. **Samayopi khoti** sikkhāpadapūraṇassa hetupi. **Samayappavādaketi** diṭṭhippavādake. Tattha hi nisinnā titthiyā attano attano samayaṃ pavadantīti. **Atthābhisamayāti** hitapaṭilābhā. Abhisametabboti abhisamayo, abhisamayo attho **abhisamayaṭṭhoti** pīlanādīni abhisametabbabhāvena ekībhāvaṃ upanetvā vuttāni. Abhisamayassa vā paṭivedhassa visayabhūto attho **abhisamayaṭṭhoti**. Tāneva tathā ekattena vuttāni. Tattha **pīlanam** dukkhasaccassa taṃsamaṅgino hiṃsanaṃ avipphārikatākaraṇaṃ. **Santāpo** dukkhadukkhatādivasena santāpanaṃ paridhanaṃ.

Tattha sahakārikāraṇaṃ sannijjhaṃ sameti samavetīti **samayo**, samavāyo. Sameti samāgacchati maggabrahmacariyaṃ ettha tadādhārapuggalehīti **samayo**, khaṇo. Sameti ettha, etena vā saṃgacchati satto, sabhāvadhammo vā sahaṃjātādīhi uppādādīhi vāti **samayo**, kālo. Dhammappavattimattatāya atthato abhūtopi hi kālo dhammappavattiyā adhikaraṇaṃ karaṇaṃ viya ca kappanāmattasiddhena rūpena voharīyatīti. Samaṃ, saha vā avayavānaṃ ayaṇaṃ pavatti avatṭhānanti **samayo**, samūho yathā “samudāyo”ti. Avayavasahāvāṭṭhānameva hi samūhoti. Avasesapaccayānaṃ samāgame eti phalaṃ etasmā uppajjati pavattati cāti **samayo**, hetu yathā “samudayo”ti. Sameti saṃyojanabhāvato sambandho eti attano visaye pavattati, daḥhaggahaṇabhāvato vā saṃyuttā ayanti pavattanti sattā yathābhinivesaṃ etenāti **samayo**, diṭṭhi; diṭṭhisaññojanena hi sattā ativiya bajjhantīti. Samiti saṅgati samodhānanti **samayo**, paṭilābho. Samayaṇaṃ, sammā vā ayaṇaṃ apagamoti **samayo**, pahānaṃ. Abhimukhaṃ ṇāṇena sammā etabbo abhisametabboti **abhisamayo**, dhammānaṃ aviparīto sabhāvo. Abhimukhabhāvena sammā eti gacchati bujjhatīti **abhisamayo**, dhammānaṃ aviparītasabhāvāvabodho. Evaṃ tasmīṃ tasmīṃ atthe **samaya**-saddassa pavatti veditabbā. Samayasaddassa atthuddhāre abhisamayasaddassa udāharaṇaṃ vuttanayeneva veditabbaṃ. **Assāti** samayasaddassa. **Kālo attho** samavāyādīnaṃ atthānaṃ idha asambhavato, desadesakaparisānaṃ viya suttassa nidānabhāvena kālassa apadisitabbato ca.

Kasmā panettha aniyamitavaseneva kālo niddiṭṭho, na utusaṃvaccharādivasena niyametvāti? Āha – “**tattha kiñcāpi**”tiādi. Utusaṃvaccharādivasena niyamaṃ akatvā samayasaddassa vacanena ayampi guṇo laddho hotīti dassento “**ye vā ime**”tiādimāha. Sāmaññajotanā hi visese avatiṭṭhatīti. Tattha **diṭṭhadhammasukhavihārasamayo** devasikaṃ jhānaphalasaṃpattīhi vītināmanakālo, visesato sattasattāhāni. **Suppakāsāti** dasasahasilokadhātusaṃkampaṇaobhāsapātubhāvādīhi pākāṭā. Yathāvuttabhedesu eva samayesu ekadesaṃ pakāraṇarehi saṅgahetvā dassetuṃ “**yo cāya**”ntiādimāha. Tathā hi ṇāṇakiccasamayo atthahitapaṭipattisamayo ca **abhisambodhisamayo**, ariyatunhībhāvasamayo **diṭṭhadhammasukhavihārasamayo**, karuṇākiccaparahitapaṭipattidhammikathāsamayo **desanāsamayo** eva.

Karaṇavacanena niddeso katoti sambandho. **Tatthāti** abhidhammatadaññasuttapadavinayesu. **Tatthāti** bhummakaraṇehi. **Adhikaraṇattho** ādhārattho. Bhāvo nāma kiriyā, tāya kiriyantaralakkhaṇaṃ **bhāvenabhāvalakkhaṇaṃ**. Tattha yathā kālo sabhāvadhammaparicchinno sayāṃ paramatthato avijjamānopi ādhārabhāvena paññāto taṅkhaṇappavattānaṃ tato pubbe parato ca abhāvato “pubbaṅhe jāto, sāyanhe gacchati”ti ca ādisu, samūho ca avayavavinimutto avijjamānopi kappanāmattasiddho avayavānaṃ ādhārabhāvena paññāpiyati “rukkhe sākha, yavarāsiyaṃ sambhūto”tiādisu, evaṃ idhāpīti dassento āha “**adhikaraṇaṇhi...pe... dhammāna**”nti. Yasmiṃ kāle dhammapuñje vā kāmāvacaraṃ kusalaṃ cittaṃ uppannaṃ hoti, tasmīṃ eva kāle dhammapuñje ca phassādayopi hontīti ayañhi tattha attho. Yathā ca “gāvīsu duyhamānāsu gato, duddhāsu āgato”ti dohanakiriyāya gamanakiriyā lakkhīyati, evaṃ idhāpi “yasmiṃ samaye, tasmīṃ samaye”ti ca vutte “sati”ti ayamattho viññāyamāno eva hoti padatthassa sattāviraḥābhāvatoti samayassa sattākiriyāya cittassa uppādakiriyā phassādīnaṃ bhavanakiriyā ca lakkhīyati. **Yasmiṃ samayeti** yasmiṃ navame khaṇe, yasmiṃ yonisomanasikārādihetumhi, paccayasamavāye vā sati kāmāvacaraṃ kusalaṃ cittaṃ uppannaṃ hoti, tasmīṃyeva khaṇe, hetumhi, paccayasamavāye vā phassādayopi hontīti ubhayattha samayasadde bhummaniddeso kato lakkhaṇabhūtabhāvayuttoti dassento āha “**khaṇa...pe... lakkhīyati**”ti.

**Hetuatto karanatto ca sambhavati** “annena vasati, ajjhenena vasati, pharasunā chindati, kudālena khaṇaṭi” tiādīsu viya. Vītikkamañhi sutvā bhikkhusaṅghaṃ sannipāṭepetvā otiṇṇavatthukaṃ puggalaṃ paṭipucchitvā vigarahitvā ca taṃ taṃ vatthūṃ otiṇṇakālaṃ anatikkamitvā teneva kālena sikkhāpadāni paññapento bhagavā viharati sikkhāpadapaññattihetuñca apekkhamāno tatiyapārājikādīsu viya.

**Accantameva** ārambhato paṭṭhāya yāva desanāniṭṭhānaṃ parahitapaṭipattisaṅkhātena **karuṇāvihārena. Tadatthajotanatthanti** accantasam̐yogattajotanatthaṃ. **Upayogavacananiddeso kato** yathā “māsaṃ ajjhetī” ti.

**Porāṇāti** aṭṭhakathācariyā. **Abhilāpamattabhedoti** vacanamattena viseso. Tena suttavinayesu vibhattibyattayo katoti dasseti.

**Seṭṭhanti** seṭṭhavācakaṃ vacanaṃ “seṭṭha” nti vuttaṃ seṭṭhaguṇasahacaraṇato. Tathā **uttamanti** etthāpi. **Gāravayuttoti** garubhāvayutto garuṇayogato, garukaraṇārahatāya vā **gāravayutto. Vuttoyeva**, na pana idha vattabbo **visuddhimaggassa** imissā **aṭṭhakathāya** ekadesabhāvatoti adhippāyo.

Aparo nayo (saṃ. ni. ṭi. 1.1.1; sāratta. ṭi. 1.vinayānisaṃsakathāvaṇṇanā; visuddhi. mahāṭi. 1.144; itivu. aṭṭha. ganthārambhakathā) – bhāgavāti bhagavā, bhataṅgavāti bhagavā, bhāge vanīti bhagavā, bhage vanīti bhagavā, bhataṅgavāti bhagavā, bhage vanīti bhagavā, bhāge vanīti bhagavā.

Bhagavā bhataṅgavā bhāge, bhage ca vani bhataṅgavā;  
Bhage vami tathā bhāge, vanīti bhagavā jino.

Tattha kathaṃ **bhāgavāti bhagavā**? Ye te sīlādayo dhammakhandhā guṇabhāgā guṇakoṭṭhāsā, te anaññasādhāraṇā nirisayā tathāgatassa atthi upalabbhanti. Tathā hissa sīlaṃ, samādhi, paññā, vimutti, vimuttiñāḍadassanaṃ, hirī, ottappaṃ, saddhā, vīriyaṃ, sati sampajaññaṃ, sīlavisuddhi, diṭṭhivisuddhi, samatho, vipassanā, tīṇi kusalamūlāni, tīṇi sucaritāni, tayo sammāvitakkā, tisso anavajjasaññā, tisso dhātuyo, cattāro satipaṭṭhānā, cattāro sammappadhānā, cattāro iddhipādā, cattāro ariyamaggā, cattāri ariyaphalāni, catasso paṭisambhidā, catuyonipaṭicchedakaññaṃ, cattāro ariyavamsā, cattāri vesārajjaññāni, pañca padhāniyaṅgāni, pañcaṅgiko sammāsamādhi, pañcaññāniko sammāsamādhi, pañcandriyāni, pañca balāni, pañca nissāraṇīyā dhātuyo, pañca vimuttāyatanaññāni, pañca vimuttiṭṭhānīyā saññā, cha anussatiṭṭhānāni, cha gāravā, cha nissāraṇīyā dhātuyo, cha satatavihārā, cha anuttariyāni, cha nibbedhabhāgiyā saññā, cha abhiññā, cha asādhāraṇāññāni, satta aparihāniyā dhammā, satta ariyadhammā, satta ariyadhanāni, satta bojjhaṅgā, satta sappurisadhammā, satta nijjaravatthūni, satta saññā, satta dakkhiṇeyyapuggaladesanā, satta khīṇāsavabaladesanā, aṭṭha paññāpaṭilābhahetudesanā, aṭṭha sammattāni, aṭṭha lokadhammātikamā, aṭṭha ārambhavatthūni, aṭṭha akkhaṇadesanā, aṭṭha mahāpurisavitakkā, aṭṭha abhibhāyatanadesanā, aṭṭha vimokkhā, nava yonisomanasikāramūlakā dhammā, nava pārisuddhipadhāniyaṅgāni, nava sattāvāsadesanā, nava āghāṭapaṭivīniyā, nava saññā, nava nānattā, nava anupubbavīhārā, dasa nāthakaraṇā dhammā, dasa kasiṇāyatanaṇi, dasa kusalakammāpathā, dasa sammattāni, dasa ariyavāsā, dasa asekkhadhammā, dasa tathāgatabalāni, ekādasa mettānisaṃsā, dvādasa dhammacakkākarā, terasa dhutaṅgā, cūddasa buddhaññāni, pañcadasa vimuttiṭṭhānīyā dhammā, soḷasavidhā ānāpānassatī, soḷasa aparantapanīyā dhammā, aṭṭhārasa buddhadhammā, ekūnavīsati paccavekkhaṇāññāni, catucattālīsa ñāṇavatthūni, paññāsa udayabbayaññāni, paropaṇṇāsa kusaladhammā, sattasattati ñāṇavatthūni, catuvīsati koṭṭisatasahassasaṅkhāsamāpattisañcārimahāvajiraññaṃ, anantanayasamantapaṭṭhānapavicayapaccavekkhaṇadesanāññāni tathā anantāsu lokadhātūsu anantānaṃ sattānaṃ āsayādivibhāvaññāni cāti evamādayo anantāparimāṇabhedā anaññasādhāraṇā nirisayā guṇabhāgā guṇakoṭṭhāsā saṃvijjanti upalabbhanti, tasmā yathāvuttavibhāgā guṇabhāgā assa atthīti “bhāgavā” ti vattabbe ā-kārassa rassattaṃ katvā “**bhagavā**” ti vutto. Evaṃ tāva bhāgavāti **bhagavā**.

Yasmā sīlādayo sabbe, guṇabhāgā asesato;  
Vijjanti sugate tasmā, **bhagavā**ti pavuccatīti.

Kathaṃ **bhatavāti bhagavā**? Ye te sabbalokahitāya ussukkamāpannehi manussattādike aṭṭha dhamme samodhānetvā sammāsambodhiyā katamahābhinihārehi mahābodhisattehi paripūritabbā dānapāramī, sīla, nekkhamma, paññā, vīriya, khanti, sacca, adhiṭṭhāna, mettā, upekkhāpāramīti dasa pāramiyo dasa upapāramiyo dasa paramatthapāramiyoti samatiṃsa pāramiyo, dānādīni cattāri saṅgahavattḥūni, saccādīni cattāri adhiṭṭhānāni, aṅgapariccāgo nayanadhanarajjaputtadārapariccāgoti pañca mahāparicāgā, pubbayogo, pubbacariyā, dhammakkhānaṃ, ñātathacariyā, lokatthacariyā, buddhicariyāti evamādayo, saṅkhepato vā sabbe puññañānasambhārā buddhakaradhammā, te mahābhinihārato paṭṭhāya kappānaṃ satasahassādhikāni cattāri asaṅkheyyāni yathā hānabhāgiyā saṃkilesabhāgiyā ṭhitibhāgiyā vā na honti, atha kho uttaruttari visesabhāgiyāva honti, evaṃ sakkaccaṃ nirantaraṃ anavasesato bhatā sambhatā assa atthīti “bhatavā”ti vattabbe “**bhagavā**”ti vutto niruttinayena ta-kārassa ga-kāraṃ katvā. Atha vā **bhatavā**ti teyeva yathāvutte buddhakaradhamme vuttanayeneva bhari sambhari, paripūresīti attho. Evampi bhatavāti bhagavā.

Sammāsambodhiyā sabbe, dānapāramiādike;  
Sambhāre bhatavā nātho, tenāpi **bhagavā** matoti.

Kathaṃ **bhāge vanīti bhagavā**? Ye te catuvīsati koṭṭisatasahassasāṅkhā devasikaṃ vaḷaṅjanakasamāpattibhāgā, te anavasesato lokahitattaṃ attano ca diṭṭhadhammasukhavihāratthaṃ niccakappaṃ vani bhaji sevi bahulamakāsīti bhāge vanīti **bhagavā**. Atha vā abhiññeyyadhammesu kusalādīsu khandhādīsu ca ye te pariññeyyādivasena saṅkhepato vā catubbidhā abhisamayabhāgā, vitthārato pana “cakkhu pariññeyyaṃ sotaṃ...pe... jarāmaṇaṃ pariññeyya”ntiādīnā (paṭi. ma. 1.21) aneke pariññeyyabhāgā, “cakkhussa samudayo pahātabbo...pe... jarāmaṇassa samudayo pahātabbo”tiādīnā pahātabbabhāgā, “cakkhussa nirodho...pe... jarāmaṇassa nirodho sacchikātabbo”tiādīnā sacchikātabbabhāgā, “cakkhussa nirodhagāminī paṭipadā”tiādīnā, “cattāro satipaṭṭhānā”tiādīnā ca anekabhedā bhāvetabbabhāgā ca dhammā, te sabbe vani bhaji yathārahaṃ gocarabhāvanāsevanānaṃ vasena sevi. Evampi bhāge vanīti **bhagavā**. Atha vā “ye ime sīlādayo dhammakkhāndhā sāvakehi sādharmaṇa guṇabhāgā guṇakoṭṭhāsā, kinti nu kho te vineyyasantānesu patiṭṭhapeyya”nti mahākaruṇāya vani abhipatthayi, sā cassa abhipatthanaṃ yathādhippetaphalāvahā aho. Evampi **bhāge vanīti bhagavā**.

Yasmā ñeyyasamāpattiguṇabhāge asesato;  
Bhaji patthayi sattānaṃ, hitāya **bhagavā** tatoti.

Kathaṃ **bhāge vanīti bhagavā**? Samāsato tāva katapuññehi payogasampannehi yathāvibhavaṃ bhajiyantīti bhagā, lokiya lokuttarā sampattiyo. Tattha lokiye tāva tathāgato sambodhito pubbe bodhisattabhūto paramukkamsagata vani bhaji sevi, yattha patiṭṭhāya niravasesato buddhakaradhamme samannānento buddhadhamme paripācesi, buddhabhūto pana te niravajjasukhūpasamhite anaññasādhāraṇe lokuttarepi vani bhaji sevi, vitthārato pana padesarajjaissariyacakkavattisampatti-devarajjasampattiādivasena- jhānavimokkhasamādhisamāpattiñānadassana-maggabhāvanāphalāsacchikiriyādi-uttarimanussadhammasavasena ca anekavīhite anaññasādhāraṇe bhage vani bhaji sevi. Evampi **bhāge vanīti bhagavā**.

Yā tā sampattiyo loke, yā ca lokuttarā puthu;  
Sabbā tā bhaji sambuddho, tasmāpi **bhagavā** matoti.

Kathaṃ **bhattavāti bhagavā**? Bhattā daḷhabhattikā assa bahū atthīti bhattavā. Tathāgato hi mahākaruṇāsabbaññutaññādiaparimitanirupamapabhāvaguṇavisesasamaṅgibhāvato sabbasattuttamo, sabbānatthaparihārapubbaṅgamāya niravasesahitasukhavidhānatapparāya niratisayāya payogasampattiya

sadevamanussāya pajāya accantūpakāritāya dvattiṃsamahāpurisalakkhaṇa-asītianubyañjana-byāmapabhādiānañāsādhāraṇa- visesapaṭimaṇḍita-rūpakāyatāya yathābhucca-guṇādhigatena “itipi so bhagavā” tiādinayappavattena lokattayabyāpinā suvipulena suvisuddhena ca thutighosena samannāgatattā ukkaṃsapāramippattāsu appicchatāsantuṭṭhiādīsu suppatiṭṭhitabhāvato dasabalacatuvesārājādiniratisayaguṇavisesa-samaṅgibhāvato ca rūpappamāṇo rūpappasanno, ghosappamāṇo ghosappasanno, lūkhappamāṇo lūkhappasanno, dhammappamāṇo dhammappasannoti evaṃ catuppamāṇike lokasannivāse sabbathāpi pasādāvahabhāvena samantapāsādikattā aparimāṇānaṃ sattānaṃ sadevamanussānaṃ ādarabahumānagāravāyatanaṭāya paramapemasambhattiṭṭhānaṃ. Ye tassa ovāde patiṭṭhitā aveccappasādena samannāgatā hontī, kenaci asaṃhāriyā tesam pasādabhatti samaṇena vā brāhmaṇena vā devena vā mārena vā brahmunā vā. Tathā hi te attano jīvitapariccāgepi tattha pasādaṃ na pariccajanti, tassa vā āṇaṃ daḷhabhattibhāvato. Tenevāha –

“Yo ve **kataññū** katavedi dhīro;  
Kalyāṇamitto daḷhabhatti ca hotī” ti. (jā. 2.17.78);

“Seyyathāpi, bhikkhave, mahāsamuddo ṭhitadhammo velaṃ nātivattati, evameva kho, bhikkhave, yaṃ mayā sāvakaṇaṃ sikkhāpadaṃ paññattaṃ, taṃ mama sāvakā jīvitahetupi nātikkamantī” ti (a. ni. 8.20; udā. 45; cūḷava. 385) ca.

Evaṃ bhattavāti **bhagavā** niruttinayena ekassa ta-kārassa lopaṃ katvā itarassa ga-kāraṃ katvā.

Guṇātisayayuttassa, yasmā lokahitesino;  
Sambhattā bahavo satthu, bhagavā tena vuccatīti.

Kathaṃ **bhage vamīti bhagavā**? Yasmā tathāgato bodhisattabhūtopi purimāsu jāṭīsu pāramiyo pūrento bhagasaṅkhātaṃ sirim issariyaṃ yasaṅca vami, uggiri, khelaṇiṇḍaṃ viya anapekkho chaḍḍayi; pacchimattabhāvepi hatthāgataṃ cakkavattisirim devalokādhīpaccaḍḍisaṃ catudīpissariyaṃ cakkavattisampattisannissayaṃ sattaratanasamujjalaṃ yasaṅca tiṇāyapi amaññaṃāno nirapekkho pahāya abhinikkhamitvā sammāsambodhiṃ abhisambuddho, tasmā ime siriādiḍike bhage vamīti **bhagavā**. Atha vā bhāni nāma nakkhattāni, tehi samaṃ gacchanti pavattantīti bhagā, sineruyugandharauttarakuruhimavantādiḍibhājanalokavisesasannissayā sobhā kappatṭhiyabhāvato, tepi bhage vami tannivāsīsattāvāsasamatikkamanato, tappaṭibaddhachandarāgapahānena pajahīti. Evampi bhage vamīti bhagavā.

Cakkavattisirim yasmā, yasaṃ issariyaṃ sukhaṃ;  
Pahāsi lokacittaṅca, sugato bhagavā tatoti.

Kathaṃ **bhāge vamīti bhagavā**? Bhāgā nāma sabhāgadhammakotṭhāsā, te khandhāyatanadhātādivasena, tatthāpi rūpavedanādivasena, pathaviyādiatītādivasena ca anekavidhā. Te bhagavā sabbaṃ papaṅcaṃ sabbaṃ yogaṃ **sabbaṃ** ganthaṃ sabbaṃ saṃyojanaṃ samucchinditvā amataṃ dhātuṃ samadhigacchanto vami uggiri, anapekkho chaḍḍayi na paccāgami. Tathā hesa “sabbatthameva pathaviṃ āpaṃ tejaṃ vāyaṃ, cakkhuṃ sotaṃ ghānaṃ jīvaṃ kāyaṃ manāṃ, rūpe sadde gandhe rase phoṭṭhabbe dhamme, cakkhuvīññāṇaṃ...pe... manovīññāṇaṃ, cakkhusamphassaṃ... pe... manosamphassaṃ, cakkhusamphassajaṃ vedanaṃ...pe... manosamphassajaṃ vedanaṃ, cakkhusamphassajaṃ saññaṃ...pe... manosamphassajaṃ saññaṃ, cakkhusamphassajaṃ cetanaṃ... pe... manosamphassajaṃ cetanaṃ, rūpataṇhaṃ...pe... dhammataṇhaṃ, rūpavitakkaṃ...pe... dhammavitakkaṃ, rūpavicāraṃ...pe... dhammavicāra” ntiādinā anupadadhammavibhāgavasenaṇi sabbeva dhammakotṭhāse anavasesato vami uggiri, anapekkhapariccāgena chaḍḍayi. Vuttaṃ hetam “yaṃ taṃ, ānanda, cattaṃ vantaṃ muttaṃ pahīnaṃ paṭinissaṭṭhaṃ, taṃ tathāgato puna paccāgamissatīti netam ṭhānaṃ vijjatī” ti (dī. ni. 2.183). Evampi bhāge vamīti **bhagavā**. Atha vā **bhāge vamīti** sabbeṇi kusalākusale sāvajjānavajje hīnapanāṇite kaṇhasukkasappaṭibhāge dhamme ariyamaggañānamukhena

vami uggiri anapekkho pariccaji pajahi, paresañca tathattāya dhammaṃ desesi. Vuttampi cetam “dhammāpi vo, bhikkhave, pahātabbā, pageva adhammā (ma. ni. 1.240), kullūpamaṃ vo, bhikkhave, dhammaṃ desessāmi nittharaṇatthāya, no gahaṇatthāyā” tiādi (ma. ni. 1.240). Evampi bhāge vamīti bhagavā.

Khandhāyatanadhātādi-dhammabhāgāmahesinā;  
Kaṇhasukkā yato vantā, tatopi bhagavā matoti.

Tena vuttaṃ –

“Bhāgavā bhataṃ bhāge, bhage ca vani bhataṃ;  
Bhage vami tathā bhāge, vamīti bhagavā jino” ti.

**Dhammasarīraṃ paccakkhaṃ karotīti** “yo vo, ānanda, mayā dhammo ca vinayo ca desito paññatto, so vo mamaccayena satthā” ti (dī. ni. 2.216) vacanato dhammassa satthubhāvapariyāyo vijjatīti katvā vuttaṃ. **Vajirasāṅghātasamānakāyo** parehi abhejjasarīrattā. Na hi bhagavato rūpakāye kenaci sakkā antarāyo kātuntī.

**Desanāsampattiṃ niddisati** vakkhamānassa sakalassa suttassa “eva” nti nidassanato. **Sāvakasampattiṃ niddisati** paṭisambhidāppattena pañcasu ṭhānesu bhagavatā etadagge ṭhapitena mayā mahāsāvakena suttaṃ, tañca kho mayāva suttaṃ, na anussutikaṃ, na paramparābhatanti imassa atthassa dīpanato. **Kālasampattiṃ niddisati** bhagavā-saddasannidhāne payuttassa samaya-saddassa kālassa buddhuppādapāṭimaṇḍitabhāvādīpanato. Buddhuppādaparamā hi kālasampadā. Tenetaṃ vuccati –

“Kappakasāye kaliyuge, buddhuppādo aho mahacchariyaṃ;  
Hutāvahamajjhe jātaṃ, samuditamakaraṇamavinda” nti. (dī. ni. ṭī. 1.1; saṃ. ni. ṭī. 1.1.1; a. ni. ṭī. 1.1.1 rūpādivaggavaṇṇanā);

**Bhagavāti desakasampattiṃ niddisati** guṇavisiṭṭhasattuttamagarugāravādhivacanabhāvato.

**Maṅgaladivaso sukhaṇo sunakkhattanti** ajja maṅgaladivaso, tasmā sunakkhattaṃ, tatthāpi ayaṃ sukhaṇo. **Mā atikkamīti** mā rattivibhāyanaṃ anudikkhantānaṃ ratti atikkamīti evaṃ sambandho veditabbo. Ukkāsu ṭhitāsu ṭhitāti **ukkaṭṭhā** (dī. ni. ṭī. 1.255; a. ni. ṭī. 2.4.36). Ukkāsu vijjotalantīsu ṭhitā patiṭṭhitāti mūlavibhūjādīpakkepena (pāṇini 3.2.5) saddasiddhi veditabbā. Niruttinayena vā ukkāsu ṭhitāsu ṭhitā āsīti **ukkaṭṭhā**. Apare pana bhaṇanti “bhūmibhāgasampattiyā manussasampattiyā upakaraṇasampattiyā ca sā nagarī ukkaṭṭhagūṇayogato ‘ukkaṭṭhā’ ti nāmaṃ labhī” ti.

**Avisesenāti** na visesena, viharabhāvasāmaññenāti attho. **Iriyāpatha...pe... vihāresūti** iriyāpathavihāro dibbavihāro brahmavihāro ariyavihāro etesu catūsu vihāresu. **Samaṅgiparidīpananti** samaṅgībhāvaparidīpanaṃ. **Etanti** “viharati” ti etaṃ padaṃ. Tathā hi taṃ “idhekacco gihīhi saṃsatṭho viharati sahanandī sahasokī” tiādīsu (saṃ. ni. 4.241) iriyāpathavihāre āgataṃ; “yasmim samaye, bhikkhave, bhikkhu vivicceva kāmehi...pe... paṭhamaṃ jhānaṃ upasampajja viharati” tiādīsu (dha. sa. 160; vibha. 624) dibbavihāre; “so mettāsahagatena cetasā ekaṃ disaṃ pharivā viharati” tiādīsu (dī. ni. 1.556; 3.308; ma. ni. 1.77; 2.309; 3.230) brahmavihāre; “so kho ahaṃ aggivessana tassāyeva kathāya pariyoṣāne tasmim eva purimasim samādhinimutte ajjhattameva cittaṃ saṅghapemi sannisādemī ekodim karomi samādahāmi, yena sudaṃ niccappaṃ viharāmi” tiādīsu (ma. ni. 1.387) ariyavihāre.

Tattha iriyanaṃ vattanaṃ iriyā, kāyappayogo. Tassā pavattanupāyabhāvato ṭhānādi iriyāpatho. Ṭhānasamaṅgī vā hi kāyena kiñci kareyya gamanādīsu aññatarasamaṅgī vā. Atha vā iriyati pavattati etena attabhāvo, kāyakiccaṃ vāti iriyā, tassā pavattiyā upāyabhāvato pathoti iriyāpatho, ṭhānādi eva. So ca atthato gatinivattīdiākārena pavatto catusantirūpapabandho eva. Viharaṇaṃ, viharati etenāti vā

vihāro, iriyāpatho eva vihāro **iriyāpathavihāro**. Divi bhavoti dibbo. Tattha bahulappavattiyā brahmapārisajjādevaloke bhavoti attho. Tattha yo dibbānubhāvo, tadatthāya saṃvattatīti vā dibbo, abhiññābhinihāravasena mahāgatikkatā vā dibbo, dibbo ca so vihāro cāti **dibbavihāro**, catasso rūpāvacarasamāpattiyō. Āruppasamāpattiyopi ettheva saṅgahaṃ gacchanti. Brahmūnaṃ, brahmāno vā vihārā **brahmavihārā**, catasso appamaññāyo. Ariyānaṃ, ariyā vā vihārā **ariyavihārā**, cattāri sāmāññaphalāni. **So hi bhagavā ekam iriyāpathabādhananti**ti yadipi bhagavā ekenapi iriyāpathena cirataraṃ kālaṃ attabhāvaṃ pavattetuṃ sakkoti, tathāpi “upādinnaṃsarīrassa nāma ayaṃ sabhāvo”ti dassetuṃ vuttaṃ. Yasmā vā bhagavā yattha katthaci vasanto veneyyānaṃ dhammaṃ desento, nānāsamāpattīhi ca kālaṃ vītināmento vasatīti veneyyasattānaṃ attano ca vividhaṃ hitasukhaṃ harati uppaneti uppādeti, tasmā vividhaṃ haratīti evamettha attho veditabbo.

**Subhagattā**ti sirīkāmānavasena sobhanattā. Tenevāha “**sundarasirikattā sundarakāmattā cā**”ti. **Chaṇasamajjaussaveti** ettha **chaṇaṃ** nāma phaggunamāsādīsu uttaraphaggunādi-abhilakkhitadivasesu saparijanānaṃ manussānaṃ maṅgalakaraṇaṃ. **Samajjaṃ** nāma naṭasamajjādi. **Ussavo** nakkhattaṃ. Yattha gāmanigamavāsino tayo satta vā divase nakkhattaghosanaṃ katvā yathāvibhavaṃ alaṅkatapaṭiyattā bhoge paribhuñjantā nakkhattakīḷanaṃ kīḷanti. **Tesaṃ taṃ tatheva hotīti** tesaṃ manussānaṃ taṃ patthanaṃ tannivāsīdevatānubhāvena yebhuyyena tatheva hoti, patthanā samijjhatīti attho. **Bahujanakantāyāti** iminā “sundarakāmattā”ti etasseva padassa pakārantarena atthaṃ vibhāveti. Tatrāyaṃ vacanatto – kamañiyatthēna suṭṭhu bhajīyatīti **subhagaṃ**, subhā agā rukkhā etthāti vā **subhagaṃ**, sundarakittiyogato vā “**subhaga**”nti evampettha atthaṃ vaṇṇenti. Keci pana “subhāgavane”ti paṭhanti, “sundarabhūmibhāge vane”ti cassa atthaṃ vadanti. Subhagassa nāma yakkhassa vanaṃ tena pariggahitattāti “subhagavana”nti aññe. Vananaṃ bhattītiatthe taṃ vananaṃ kāretīti etasmim atthe vanayatīti padasiddhi veditabbā. Tenevāha “**attani sinehaṃ uppādeti**”ti. Yācanatthe **vanute iti vananti** upacārakappaṇāvasena vana-saddo veditabbo.

**Ujuvaṃsāti** ujubhūtavīṭapā. **Mahāsālāti** mahārukkhā. **Aññatarasmim sālāmūleti** aññatarassa rukkhassa mūle. **Vanappatiṭṭhakarukkhoti** vanappatibhūto jeṭṭhakarukkho. **Tameva jeṭṭhakabhāvanti** vanappatibhāvenāgataṃ seṭṭhabhāvaṃ padhānabhāvaṃ. Tena hi so “sālārājā”ti vutto. Upagatānaṃ rañjanaṭṭhena rājā, aññasmimpi tādise rukke rājavohāraṃ dassetuṃ “**supatiṭṭhitassā**”tiādi vuttaṃ. Tattha **brāhmaṇa dhammikā**ti ālapanā. Nippariyāyena sākādimato saṅghātassa suppatiṭṭhitabhāvasādhane avayavaviseṣe pavattamāno mūla-saddo. Yasmā taṃsadisesu tannissaye padese ca ruḷhīvasena pariyāyato pavattati, tasmā “mūlāni uddhareyyā”ti ettha nippariyāyamūlaṃ adhippetanti ekena mūla-saddena visesetvā āha “**mūlamūle dissatī**”ti yathā “dukkhadukkhaṃ (saṃ. ni. 4.327), rūparūpa”nti (visuddhi. 2.449) ca. **Asādhāraṇahetumhīti** asādhāraṇakāraṇe. Lobhasahagatacittuppādānaṃ eva āveṇike nesam suppatiṭṭhitabhāvasādhanato mūlaṭṭhena upakāraṇe paccayadhamme dissatīti attho.

**Tatthāti** “ekam samayaṃ bhagavā ukkaṭṭhāyaṃ viharati subhagavane sālārājamūle”ti yaṃ vuttaṃ vākyam, tatta. **Siyāti** kassaci evaṃ parivittakko siyā, vakkhamānākārena kadāci codeyya vāti attho. **Atha tattha viharatīti** yadi subhagavane sālārājamūle viharati. **Na vattabbanti** nānāṭhānabhūtattā ukkaṭṭhāsubhagavanānaṃ, ekam samayaṃ ca vuttatīti adhippāyo. Idāni codako tameva attano adhippāyaṃ “**na hi sakkā**”tiādinā vivarati. Itaro sabbametaṃ aviparītaṃ atthaṃ ajānantena vuttanti dassento “**na kho panetaṃ evaṃ daṭṭhabba**”nti āha. Tattha **etanti** “ukkaṭṭhāyaṃ viharati subhagavane sālārājamūle”ti etaṃ vacanaṃ. Evanti “yadi tāva bhagavā”tiādinā yaṃ taṃ bhavatā coditaṃ, taṃ atthato evaṃ na kho pana daṭṭhabbaṃ, na ubhayattha apubbaacarimaṃ viharadassanattanti attho.

Idāni attano yathādhippetam aviparītaṃ atthaṃ, tassa ca paṭikacceva vuttabhāvaṃ, tena ca appaṭividdhattaṃ pakāsento “**nanu avocumha...pe... sālārājamūle**”ti āha. Evampi “subhagavane sālārājamūle viharatī”cēva vattabbaṃ, na “ukkaṭṭhāya”nti codanaṃ manasi katvā vuttaṃ “**gocaragāmanidassanatta**”ntiādi.

Avassaṃ cettha gocaragāmakittanaṃ kātappaṃ. Tathā hi taṃ yathā subhagavanādikittanaṃ pabbajitānuggahakaraṇādiṇekappayojanaṃ, evaṃ gahaṭṭhānuggahakaraṇādivividhappayojananti dassento “**ukkaṭṭhākittanena**” tiādimāha. Tattha paccayaggahaṇena upasaṅkamanapayirupāsanaṃ okāsādānena dhammadesanāya saraṇesu silesu ca paṭiṭṭhāpanena yathūpanissayaṃ uparivisesādhigamāvahanena ca **gahaṭṭhānaggahakaraṇaṃ**, uggahaparipucchānaṃ kammaṭṭhānānuyogassa ca anurūpavasanaṭṭhānapariggahenettha **pabbajitānuggahakaraṇaṃ** veditappaṃ. **Karuṇāya upagamaṇaṃ**, na lābhādinimittaṃ, **paññāya apagamaṇaṃ**, na virodhādinimittanti upagamaṇāpagamaṇānaṃ nirupakkilesataṃ vibhāveti. **Dhammikasukhaṃ** nāma anavajjasukhaṃ. **Devānaṃ upakārahulata** janavivittatāya. Pacurajanavivittaṃ hi ṭhānaṃ devā upasaṅkamitappaṃ maññanti. **Tadattapariniṭṭhādananti** lokatthanipphādanānaṃ, buddhakkiccasampādananti attho. **Evamādināti ādi**-saddena ukkaṭṭhākittanato rūpakāyassa anuggaṇhanaṃ dasseti, subhagavanādikittanato dhammakāyassa. Tathā purimena parādhīnakiriyākaraṇaṃ, dutiyena attādhīnakiriyākaraṇaṃ. Purimena vā karuṇākkiccaṃ, itarena paññākkiccaṃ. Purimena cassa paramāya anukampāya samannāgamaṃ, pacchimena paramāya upekkhāya samannāgamaṃ dīpeti. Bhagavā hi sabbasatte paramāya anukampāya anukampati, na ca tattha sinehadosānupatito paramupekkhakabhāvato, upekkhako ca na ca parahitasukhakarāṇe apposukko mahākāruṇikabhāvato.

Tassa mahākāruṇikatāya lokanāthatā, upekkhakatāya attanāthatā. Tathā hesa bodhisattabhūto mahākāruṇāya saṅcoditamānaso sakalalokahitāya ussukkamāpanno mahābhinihārato paṭṭhāya tadattanipphādanatthaṃ puññañāṇasambhāre sampādentō aparimitaṃ kālaṃ anappakaṃ dukkhamanubhosi, upekkhakatāya sammā patitehi dukkhehi na vikampi. Tathā mahākāruṇikatāya saṃsārābhimukhatā, upekkhakatāya tato nibbindanā. Tathā upekkhakatāya nibbānābhimukhatā, mahākāruṇikatāya tadadhigamo. Tathā mahākāruṇikatāya paresaṃ abhiṃsāpanaṃ, upekkhakatāya sayāṃ parehi abhāyanaṃ. Mahākāruṇikatāya paraṃ rakkhato attano rakkhaṇaṃ, upekkhakatāya attānaṃ rakkhato paresaṃ rakkhaṇaṃ. Tenassa attahitāya paṭipannādisu catutthapuggalabhāvo siddho hoti. Tathā mahākāruṇikatāya saccādhitṭhānassa cāgādhitṭhānassa ca pāripūri, upekkhakatāya upasamādhitṭhānassa paññādhitṭhānassa ca pāripūri. Evaṃ parisuddhāsayaṃ payogassa mahākāruṇikatāya lokahitatthameva rajjasampadādibhavasampattiyā upagamaṇaṃ, upekkhakatāya tiṇāyapī amaññamānassa tato apagamaṇaṃ. Iti suvisuddhaupagamaṇāpagamaṇassa mahākāruṇikatāya lokahitatthameva dānavasena sampattīnaṃ pariccajanā, upekkhakatāya cassa phalassa attano apaccāsīsanā. Evaṃ samudāgamaṇato paṭṭhāya acchariyabbhutaṃ samannāgatassa mahākāruṇikatāya paresaṃ hitasukhatthaṃ atidukkarakāritā, upekkhakatāya kāyampi analaṃkāritā.

Tathā mahākāruṇikatāya carimattabhāve jīṇāturamatadassanena sañjātasamvego, upekkhakatāya ulāresu devabhogasadisesu bhogesu nirapekkho mahābhiniṅkhamanaṃ nikkhami. Tathā mahākāruṇikatāya “kiccaṃ vatāyaṃ loko āpanno” tiādinā (dī. ni. 2.57; sam. ni. 2.4, 10) karuṇāmukheneva vipassanārambho, upekkhakatāya buddhabhūtaṃ satta sattāhāni vivekasukheneva vītināmanaṃ. Mahākāruṇikatāya dhammagambhīrataṃ paccavekkhitvā dhammadesanāya apposukkataṃ āpajjitvāpi mahābrahmuno ajjhesanāpadesena okāsakaraṇaṃ, upekkhakatāya pañcavaggiyādi veneyyānaṃ ananurūpasamudācārepi anaññathābhāvo. Mahākāruṇikatāya katthaci paṭighātābhāvenassa sabbattha amittasaññāya abhāvo, upekkhakatāya katthacipi anurodhābhāvena sabbattha sinehasanthavābhāvo. Mahākāruṇikatāya gāmadīnaṃ āsannaṭṭhāne vasantassapi upekkhakatāya araññaṭṭhāne eva viharānaṃ. Tena vuttaṃ “purimena cassa paramāya annukampāya samannāgamaṃ, pacchimena paramāya upekkhāya samannāgamaṃ dīpeti” ti.

Tanti “tatrā” ti padaṃ. **Desakālaparidīpananti** ye desakālā idha viharānakiriyāvisesanabhāvena vuttā, tesāṃ paridīpananti dassento “**yaṃ samayaṃ...pe... dīpeti**” ti āha. Taṃ-saddo hi vuttassa atthassa paṭiniddeso, tasmā idha kālassa, desassa vā paṭiniddeso bhavituṃ arahati, na aññassa. Ayaṃ tāva tatra-saddassa paṭiniddesabhāve atthavibhāvanā. Yasmā pana īdisesu ṭhānesu tatra-saddo dhammadesanāvīsītṭhaṃ desaṃ kālañca vibhāveti, tasmā vuttaṃ “**bhāsitaḥ bayutte vā desakāle**

**dīpetī**”ti. Tena **tatrāti** yattha bhagavā dhammadesanattam bhikkhū ālapi abhāsi, tādise dese, kāle vāti attho. **Na hīti**adinā tamevattham samattheti. Nanu ca yattha ðhito bhagavā “akālo kho tāvā”tiadinā bāhiyassa dhammadesanam paṭikkhipi, tattheva antaravīthiyam ðhito tassa dhammam deseti? Saccametam, adesetabbakāle adesanāya idam udāharaṇam. Tenevāha “**akālo kho tāvā**”ti. Yam pana tattha vuttam “antaragharam pavīṭṭhamhā”ti (udā. 10), tampi tassa akālabhāvasseva pariyāyena dassanattam vuttam. Tassa hi tadā addhānaparissamena rūpakāye akammaññatā ahoṣi, balavapīvegena nāmakāye, tadubhayassa vūpasamam āgamento papañcaparihārattham bhagavā “akālo kho”ti pariyāyena paṭikkhipi. Adesetabbadese adesanāya pana udāharaṇam “atha kho bhagavā maggā okkamma aññatarasmim rukkhamūle nisīdi (sam. ni. 2.154), viharato nikkhamitvā viharapacchāyāyam paññatte āsane nisīdi”ti (dī. ni. 1.363) ca evamādikaṃ idha **ādi**-saddena saṅghitam.

“Atha kho so, bhikkhave, bālo idha pubbe rasādo idha pāpāni kammāni karitvā”tiādīsu (ma. ni. 3.251) **padapūraṇamatte kho-saddo**, “dukkham kho agāravo viharati appatisso”tiādīsu (a. ni. 4.21) **avadhāraṇe**, “kittāvata nu kho, āvuso, satthu pavivittassa viharato sāvakā vivekam nānusikkhanti”tiādīsu (ma. ni. 1.31) **ādikālatthe**. Vākyārambheti attho. Tattha padapūraṇena vacanālanākaramattam katam hoti, ādikālatthena vākyassa upaññāsamattam, avadhāratthena pana niyamadassanam, tasmā āmantesi evāti āmantane niyamo dassito hotīti.

“Bhagavāti lokagarudīpana”nti kasmā vuttam, nanu pubbepi bhagavā-saddassa attho vuttoti? Yadipi pubbe vutto, tam panassa yathāvutte ðhāne viharānakiriyāya kattuvisesadassanattam katam, na āmantanakiriyāya, idha pana āmantanakiriyāya, tasmā tadattham puna “bhagavā”ti pāliyam vuttanti tassattham dassetuṃ “**bhagavāti lokagarudīpana**”nti āha. **Kathāsavanayuttapuggalavacananti** vakkhamānāya mūlapariyāyadesanāya savanayogyapuggalavacanam. Catūsupi parisāsu bhikkhū eva edisānam desanānam visesena bhājanabhūtā, iti sātisayasāsanasampañiggāhakabhāvadassanattam idha bhikkhugahaṇanti dassetvā idāni saddattham dassetuṃ “**apicā**”tiādīmāha.

Tattha **bhikkhakoti bhikkhūti** bhikkhanadhammatāya bhikkhūti attho. **Bhikkhācariyam ajjhupagatoti** buddhādīhipi ajjhupagatam bhikkhācariyam uñchācariyam ajjhupagatatā anuṭṭhitattā **bhikkhū**. Yo hi koci appam vā mahantam vā bhogakkhandham pahāya agārasmā anagāriyam pabbajito, so kasigorakkhādīhi jīvikakappanam hitvā liṅgasampañicchaneneva bhikkhācariyam ajjhupagatatā **bhikkhu**, parapaṭibaddhajīvikattā vā viharāmajjhe kājabhattam bhuñjamānopi bhikkhācariyam ajjhupagatoti **bhikkhu**, piṇḍiyālopabhojanam nissāya pabbajjāya ussāhajātattā vā bhikkhācariyam ajjhupagatoti **bhikkhūti** evampettha attho datṭhabbo. **Ādinā nāyenāti** “bhinnapaṭadharoti bhikkhu, bhindati pāpake akusale dhammeti bhikkhu, bhinnattā pāpakānam akusalānam dhammānam bhikkhū”tiadinā **vibhaṅge** (vibha. 510) āgatanayena. **Nāpaneti** avabodhane, paṭivedaneti attho.

**Bhikkhanasīlatāti**ādīsu **bhikkhanasīlatā** bhikkhanena ājīvanasīlatā, na kasivaññādīhi ājīvanasīlatā. **Bhikkhanadhammatā** “uddissa ariyā tiṭṭhanti”ti (paṭi. ma. 153; mi. pa. 4.5.9) evam vuttabhikkhanasabhāvatā, na sambhāvanākohaññasabhāvatā. **Bhikkhane sādhuḥkārītā** “uttiṭṭhe nappamajjeyyā”ti (dha. pa. 168) vacanam anussaritvā tattha appamajjanā. Atha vā **sīlam** nāma pakatisabhāvo, idha pana tadadhiṭṭhānam. **Dhammoti** vataṃ. Apare pana “**sīlam** nāma vatasamādānam, **dhammo** nāma pavenīgataṃ cārittam, **sādhuḥkārītāti** sakkaccakārītā ādarakiriyā”ti vaṇṇenti. **Hīnādhikajanasevanti** ye bhikkhubhāve ðhitāpi jātimadādivasena uddhatā unnaḷā. Ye ca gihibhāve paresu atthikabhāvampi anupagatatāya bhikkhācariyam paramakāpaññatam maññanti, tesam ubhayesampi yathākkamaṃ “bhikkhavo”ti vacanena hīnajanehi daliddehi paramakāpaññatam pattehi parakulesu bhikkhācariyāya jīvikam kappentehi sevitam vuttim pakāsento uddhatabhāvaniggaham karoti, adhikajanehi uḷārabhogakhattiyakulādito pabbajitehi buddhādīhi ājīvavisodhanattam sevitam vuttim pakāsento dīnabhāvaniggaham karotīti yojetabbaṃ. Yasmā “bhikkhavo”ti vacanam āmantanabhāvato abhimukhīkaraṇam, pakaraṇato sāmattiyato ca sussūsājananam sakkaccasavanamanasikāranijojanañca hoti. Tasmā tamattham dassento “**bhikkhavoti iminā**”tiādīmāha.



Tattha **sādhukasavanamanasikāreti** sādhlukasavane sādhlukamanasikāre ca. Kathaṃ pana pavattitā savanādayo sādhukaṃ pavattitā hontīti? “Addhā imāya sammāpaṭipattiyā sakalasāsanasampatti hatthagatā bhavissatī”ti ādaragāravayogena, kathādīsu aparibhavanādinā ca. Vuttaṃ hi “pañcahi, bhikkhave, dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattaṃ. Katamehi pañcahi? Na kathaṃ paribhoti, na kathikaṃ paribhoti, na attānaṃ paribhoti, avikkhittacitto dhammaṃ suṇāti ekaggacitto, yoniso ca manasi karoti. Imehi kho, bhikkhave, pañcahi dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammatta”nti (a. ni. 5.151). Tenevāha “**sādhukasavanamanasikārāyattā hi sāsanasampattī**”ti. **Sāsanasampatti** nāma sīlādinipphatti.

**Paṭhamaṃ uppannattā** adhigamavasena. **Satthucariyānuvidhāyakattā** sīlādiguṇānutṭhānena. Tiṇṇaṃ yānānaṃ vasena anudhammapaṭipattisabbhāvato **sakalasāsanapaṭiggāhakattā**. **Santikattā**ti samīpabhāvato. **Santikāvacarattā**ti sabbakālaṃ sampayuttabhāvato. **Yathānusiṭṭhanti** anusāsanianurūpaṃ, anusāsaniṃ anavasesato paṭiggahetvāti attho. **Ekacce bhikkhūyeva sandhāyāti** ye suttapariyosāne “te bhikkhū bhagavato bhāsitaṃ abhinandu”nti vuttā pañcasatā brāhmaṇapabbajitā, te sandhāya.

Pubbe sabbaparisasādhāraṇatṭepi bhagavato dhammadesanāya “jeṭṭhaseṭṭhā”tiādinā bhikkhūnaṃ eva āmantane kāraṇaṃ dassetvā idāni bhikkhū āmantetvāva dhammadesanāya payojanaṃ dassetuṃ “**kimatthaṃ pana bhagavā**”ti codanaṃ samuṭṭhāpesi. Tattha **aññaṃ cintentā**ti aññavihitā. **Vikkhittacittā**ti asamāhitacittā. **Dhammaṃ paccavekkhantā**ti tadā hiyyo tato paradvasesu vā sutadhammaṃ paṭi paṭi manasā avekkhantā. Bhikkhū āmantetvā dhamme desiyamāne ādito paṭṭhāya desanaṃ sallakkhetuṃ sakkontīti imamevatthaṃ byatirekamukhena dassetuṃ “**te anāmantetvā**”tiādi vuttaṃ.

**Bhikkhavotī**ti ca sandhivasena i-kāralopo daṭṭhabbo “bhikkhavo itī”ti. Ayaṃ hi itī-saddo hetu-parisamāpanādīpadatthavipariyāya-pakāravadhāraṇanidassanādiānekatthappabhedo. Tathā hesa “ruppatīti kho, bhikkhave, tasmā ‘rūpa’nti vuccatī”tiādīsu (saṃ. ni. 3.79) hetuatthe dissati; “tasmā tiha me, bhikkhave, dhammadāyādā bhavatha, mā āmisadāyādā, atthi me tumhesu anukampā ‘kinti me sāvakā dhammadāyādā bhavēyyuṃ, no āmisadāyādā’ti”ādīsu parisamāpane; “iti vā, iti evarūpā naccagītavāditavisūkadassanā paṭivirato”tiādīsu (dī. ni. 1.13) ādiatthe; “māgaṇṭhiyoti tassa brāhmaṇassa saṅkhā samañña paññatti vohāro nāmaṃ nāmakammaṃ nāmadheyyaṃ nirutti byañjanamabhilāpo”tiādīsu (mahāni. 73) padatthavipariyāye; “iti kho, bhikkhave, sappaṭibhayo bālo, appaṭibhayo paṇḍito, saupaddavo bālo, anupaddavo paṇḍito, saupasaggo bālo, anupasaggo paṇḍito”tiādīsu (ma. ni. 3.124) pakāre; “atthi idappaccayā jarāmarāṇanti iti puṭṭhena satā, ānanda, atthītissa vacanīyaṃ, kiṃ paccayā jarāmarāṇanti iti ce vadeyya, jātipaccayā jarāmarāṇanti iccassa vacanīya”ntiādīsu (dī. ni. 2.96) avadhāraṇe; “sabbamatthīti kho, kaccāna, ayameko anto, sabbaṃ natthīti kho, kaccāna, ayaṃ dutiyo anto”tiādīsu (saṃ. ni. 2.15) nidassane. Idhāpi nidassaneva daṭṭhabbo. Bhikkhavoti hi āmantitākāro, tamesa itī-saddo nidasseti “bhikkhavoti āmantesī”ti. Iminā nayena “**bhaddante**”tiādīsupi yathārahaṃ itī-saddassa attho veditabbo. Pubbe “bhagavā āmantesī”ti vuttattā “bhagavato paccassosu”nti idha “bhagavato”ti sāmivacanaṃ āmantanameva sambandhāntaraṃ apekkhatīti iminā adhippāyena “**bhagavato āmantanaṃ paṭiassosu**”nti vuttaṃ. “Bhagavato”ti pana idaṃ paṭissavasambandhanena sampadānavacanaṃ yathā “devadattassa paṭissuṇotī”ti.

Yaṃ nidānaṃ bhāsitanti sambandho. Etthāha – kimatthaṃ pana dhammavinayasaṅgahe kariyamāne nidānavacanaṃ, nanu bhagavatā bhāsitavacanasseva saṅgaho kātabboti? Vuccate – desanāya ṭhitiasammosasaddheyyabhāvasampādanatthaṃ. Kāledesadesakanimittapariśāpadesehi upanibandhitvā ṭhapitā hi desanā ciraṭṭhitikā hoti asammosadhammā saddheyyā ca, desakālakattusotunimittehi upanibaddho viya vohāravinicchayo. Teneva ca āyasmatā mahākassapena “mūlapariyāyasuttaṃ āvuso, ānanda, kattha bhāsita”ntiādinā desādīpucchāsu katāsu tāsāṃ vissajjanaṃ karontena dhammabhaṇḍāgārikena “evaṃ me suta”ntiādinā imassa suttassa nidānaṃ bhāsitaṃ. Apica

satthusampattipakāsanatthaṃ nidānavacanaṃ. Tathāgatassa hi bhagavato pubbaracanānumānāgamatakkābhāvato sammāsambuddhabhāvasiddhi. Na hi sammāsambuddhassa pubbaracanādīhi attho atthi sabbattha appaṭihatañānacāratāya ekappamaṇattā ca ñeyyadhammesu. Tathā ācariyamuṭṭhidhammacchariyasāsanasāvakānurodhābhāvato khīṇāsavabhāvasiddhi. Na hi sabbaso khīṇāsavassa te sambhavantīti suvisuddhassa parānuggahappavatti. Evaṃ desakasamkilesabhūtānaṃ diṭṭhisīlasampadādūsakānaṃ avijjātaṇhānaṃ accantābhāvasamsūcakehi ñānasampadāpahānasampadābhibyañjakehi ca sambuddhavisuddhabhāvehi purimavesārajjadvayasiddhi, tato eva ca antarāyikaniyyānikadhammesu sammohābhāvasiddhito pacchimavesārajjadvayasiddhīti bhagavato catuvesārajjasamannāgamo attahitaparahitapaṭipatti ca nidānavacanaena pakāsītā hoti tattha tattha sampattapariyāya ajjhāsayanurūpaṃ ṭhānuppattikapaṭibhānena dhammadesanādīpanato, idha pana pathaviādīsu vatthūsu puthujjanānaṃ paṭipattivibhāgavavattāpakadesanādīpanatoti yojetabbaṃ. Tena vuttaṃ ‘‘satthusampattipakāsanatthaṃ nidānavacana’’nti.

Tathā sāsanasampattipakāsanatthaṃ nidānavacanaṃ. Nāṇakarūṇāpariggahitasabbakiriyassa hi bhagavato natthi niratthikā paṭipatti, attahitatthā vā. Tasmā paresaṃ eva atthāya pavattasabbakiriyassa sammāsambuddhassa sakalampi kāyavacīmanokammaṃ yathāpavattaṃ vuccamānaṃ diṭṭhadhammikasamparāyikaparamatthehi yathārahaṃ sattānaṃ anusāsanatṭhena sāsanānaṃ, na kabyaracana, tayidaṃ satthucaritaṃ kāladesadesakaparīsāpadesehi saddhiṃ tattha tattha nidānavacanehi yathārahaṃ pakāsīyati, idha pana ‘‘pathaviyādīsu vatthūsū’’ti sabbāṃ purimasadisameva. Tena vuttaṃ ‘‘sāsanasampattipakāsanatthaṃ nidānavacana’’nti. Apica satthuno pamāṇabhāvappakāsanena sāsanassa pamāṇabhāvadassanatthaṃ nidānavacanaṃ, tañca desakappamāṇabhāvadassanaṃ heṭṭhā vuttanayānusārena ‘‘bhagavā’’ti ca iminā padena vibhāvitanti vedītabbaṃ. ‘‘Bhagavā’’ti iminā tathāgatassa rāgadosamohādīsabbakilesamaladuccarītādidosappahānadīpanena vacanaena anaññasādhāraṇasuparisuddhañāṇakarūṇādiguṇavisesayogaparidīpanena tato eva sabbasattuttamabhāvādīpanena ayamattho sabbathā pakāsīto hotīti idamettha nidānavacanappayojanassa mukhamattadassanaṃ.

Abbhantaranidānavañṇanā niṭṭhitā.

### Suttanikkhepavañṇanā

**Nikkhittassā**ti desitassa. Desanāpi hi desetabbassa sīlādiatthassa vineyyasantānesu nikkhipanato ‘‘nikkhepo’’ti vuccati. **Suttanikkhepaṃ vicāretvā vuccamānā pākaṭā hotīti** sāmāññato bhagavato desanāsamuṭṭhānassa vibhāgaṃ dassetvā ‘‘etthāyaṃ desanā evaṃsamūṭṭhānā’’ti desanāya samūṭṭhāne dassite suttassa sammadeva nidānaparijānanaena vañṇanāya suviññeyyattā vuttaṃ. Evañhi ‘‘assutavā bhikkhave puthujjano’’tiādīnā, ‘‘yopi so, bhikkhave, bhikkhu arahaṃ khīṇāsavo’’tiādīnā (ma. ni. 1.8), ‘‘tathāgatopi kho, bhikkhave, arahaṃ sammāsambuddho’’tiādīnā (ma. ni. 1.12) ca pavattadesanā anusandhidassanasukhatāya suviññeyyā hoti. Tattha yathā anekasataanekasahassabhedānīpi suttantāni samkilesabhāgiyādīpadhānanayavasena soḷasavidhataṃ nātivattanti, evaṃ attajjhāsayaḍisuttanikkhepavasena catubbidhabhāvanti āha ‘‘**cattāro hi suttanikkhepā**’’ti.

Ettha ca yathā attajjhāsayaṃ aṭṭhuppattiyā ca parajjhāsayaṃ pucchāhi saddhiṃ saṃsaggabhedo sambhavati ‘‘attajjhāsayaṃ ca parajjhāsayaṃ ca, attajjhāsayaṃ ca pucchāvasiko ca, aṭṭhuppattiko ca parajjhāsayaṃ ca, aṭṭhuppattiko ca pucchāvasiko ca’’ti ajjhāsayaṃ pucchānusandhisabbhāvato, evaṃ yadīpi aṭṭhuppattiyā attajjhāsayaṃ nāpi saṃsaggabhedo sambhavati, attajjhāsayaḍīhi pana purato ṭhitehi aṭṭhuppattiyā saṃsaggo natthīti nayidha niravaseso vitthāranayo sambhavatīti ‘‘cattāro suttanikkhepā’’ti vuttaṃ, tadantogadhattā vā sambhavantānaṃ sesanikkhepānaṃ mūlanikkhepavasena cattārova dassitā. Tathā dassanañcettaṃ ayaṃ saṃsaggabhedo gahetabboti.

Tatrāyaṃ vacanatto – nikkhipīyati nikkhepo, suttāṃ eva nikkhepo **suttanikkhepo**. Atha vā nikkhipanaṃ nikkhepo, suttassa nikkhepo **suttanikkhepo**, suttadesanāti attho. Attano ajjhāsayaṃ

attajjhāsayo, so assa atthi kāraṇabhūtoti **attajjhāsayo**. Attano ajjhāsayo etassāti vā **attajjhāsayo**. **Parajjhāsayepi** eseva nayo. Pucchāya vaso pucchāvaso, so etassa atthīti **pucchāvasiko**. Suttadesanāvattathubhūtaṣṣa atthassa uppatti atthuppatti, atthuppattiyeva aṭṭhuppatti ttha-kārassa ṭṭha-kāraṃ katvā. Sā etassa atthīti **aṭṭhuppattiko**. Atha vā nikkhipiyati suttam etenāti **suttanikkhepo**, attajjhāsayādi eva. Etasmiṃ pana attavikappe attano ajjhāsayo **attajjhāsayo**. Paresam ajjhāsayo **parajjhāsayo**. Pucchīyatīti pucchā, pucchitabbo attho. Pucchanasena pavattam dhammapaṭiggāhakānaṃ vacanaṃ pucchāvasikaṃ, tadeva nikkhepa-saddāpekkhāya pullingavasena “**pucchāvasiko**”ti vuttaṃ. Tathā aṭṭhuppatti eva **aṭṭhuppattiko**ti evampettha attho veditabbo.

Apicettha paresam indriyaparipākādikāraṇanirapekkhattā attajjhāsayassa visum suttanikkhepabhāvo yutto kevalam attano ajjhāsayeneva dhammatantiṭṭhapanattham pavattitadesanattā. Parajjhāsayapucchāvasikānaṃ pana paresam ajjhāsayapucchānaṃ desanāpavattitethubhūtaṃ uppattiyam pavattitānaṃ kathamaṭṭhuppattiyam anavarodho, pucchāvasikaṃ aṭṭhuppattikānaṃ vā parajjhāsayanurodhena pavattikānaṃ katham parajjhāsaye anavarodhoti? Na codetabbametam. Paresaṇhi abhinīhāraparipucchādivinimuttasseva suttadesanākāraṇuppādassa aṭṭhuppattibhāvena gahitattā parajjhāsayapucchāvasikānaṃ visum gahaṇam. Tathā hi **brahmajāla** (dī. ni. 1.1) **dhammadāyādasuttādīnaṃ** (ma. ni. 1.29) vaṇṇavaṇṇaāmisuppādādidesanānimittam “aṭṭhuppatti”ti vuccati. Paresam puccham vinā ajjhāsayaṃ eva nimittam katvā desito parajjhāsayo, pucchāvasena desito pucchāvasikoṭi pākaṭoyamatthoti.

**Attano ajjhāsayeneva kathesi** dhammatantiṭṭhapanatthanti daṭṭhabbam. **Sammappadhānasuttantahārako**ti anupubbena nikkhittānaṃ saṃyuttake sammappadhānapaṭisaṃyuttānaṃ suttānaṃ āvaḷi. Tathā **iddhipādahārako**dayo.

**Vimuttiparipācanīyā dhammā** saddhindriyādayo. **Ajjhāsayanti** adhimuttim. **Khantinti** diṭṭhinijjhānakkhantim. **Mananti** cittaṃ. **Abhinīhāranti** paṇidhānaṃ. **Bujjhanabhāvanti** bujjanasabhāvaṃ, paṭivijjhanākāraṃ vā.

Uppanne māne nikkhittanti sambandho. Itthilingādīni **tīpi līngāni**. Nāmādīni **cattāri padāni**. Paṭhamādayo **satta vibhattiyo**. **Muñcivā na kiñci katheti** sabhāvaniruttīyā tatheva pavattanato. Gaṇṭhibhūtaṃ padaṃ. Yathā hi rukkhassa gaṇṭhiṭṭhānaṃ dubbinibbedham duttacchitaṅca hoti, evamevaṃ yaṃ padaṃ atthato vivarituṃ na sakkā, taṃ “gaṇṭhipada”nti vuccati. **Anupahaccāti** anuddharitvā.

**Yena yena sambandham gacchati, tassa tassa anavasesataṃ dīpetīti** iminā imassa sabba-saddassa sappadesataṃ dasseti. Sabba-saddo hi sabbasabbaṃ padesasabbaṃ āyatanasabbaṃ sakkāyasabbanti catūsu visayesu diṭṭhappayogo. Tathā hesa “sabbe dhammā sabbākārena buddhassa bhagavato ñāṇamukhe āpāthamāgacchanti”tiādīsu (mahāni. 156; cūḷani. 85; paṭi. ma. 3.6) sabbasabbasmim āgato. “Sabbesam vo, sārīputta, subhāsitaṃ pariyāyena”tiādīsu (ma. ni. 1.345) padesasabbasmim. “Sabbam vo, bhikkhave, desessāmi...pe... cakkhuñceva rūpā ca...pe... mano ceva dhammā cā”ti (saṃ. ni. 4.23) ettha āyatanasabbasmim. “Sabbam sabbato sañjānātī”tiādīsu (ma. ni. 1.5) sakkāyasabbasmim. Tattha sabbasabbasmim āgato nippadeso, itaresu tīsupi āgato sappadeso, idha pana sakkāyasabbasmim veditabbo. Tathā hi vakkhati “sakkāyapariyāpanā pana tebhūmakadhammāva anavasesato veditabbā”ti (ma. ni. aṭṭha. 1.1 suttanikkhepavaṇṇanā).

**Saccesūti** ariyasaccesu. **Ete caturo dhammā**ti idāni vuccamāne saccādike cattāro dhamme sandhāya vadati. Tattha **saccanti** vacīsaccam. **Ṭhītīti** vīriyam, “dhitī”ti vā pāṭho, so evattho. **Cāgoti** alobho. **Diṭṭham so ativattatīti** yasmim ete saccādayo dhammā upalabbhanti, so diṭṭham attano amittam atikkamati, na tassa hatthataṃ gacchati, atha kho naṃ abhibhavati evāti attho. **Sabhāve vattati** asabhāvadhammassa kāraṇāsambhavato. Na hi nissabhāvā dhammā kenaci nibbattiyanti. **Attano lakkhaṇam dhārentīti** yadipi lakkhaṇavinimuttā dhammā nāma natthi, tathāpi yathā

diṭṭhitaṅhāparikkappitākāramattā attasubhasukhasassatādayo, pakatīyādayo, dabbādayo, jīvādayo, kāyādayo lokavohāramattasiddhā gagaṇakusumādayova saccikaṭṭhaparamatthato na upalabbhanti, na evamete, ete pana saccikaṭṭhaparamatthabhūtā upalabbhanti, tato eva sattādivisesavirahato dhammamattā sabhāvavantoti dassanattamaṃ “attano lakkhaṇaṃ dhārentī”ti vuttaṃ. Bhavati hi bhedaḥbhāvepi sukhāvabodhanattamaṃ upacāramattasiddhena bhedenā niddeso yathā “silāputtakassa sarīra”nti. Dhārīyanti vā yathāsabhāvato avadhārīyanti ñāyantīti **dhammā**, kakkhaḷaphusanādayo.

**Asādhāraṇahetumhīti** asādhāraṇakāraṇe, sakkāyadhammesu tassa tassa āveṇīkapaccayeti attho. Kiṃ pana tanti? Taṅhāmānadiṭṭhiyo, avijjādayopi vā. Yatheva hi pathaviādīsu maññānāvattthūsu uppajjamānā taṅhādayo maññānā tesamaṃ pavattiyā mūlakāraṇaṃ, evamaṃ avijjādayopi. Tathā hi “assutavā puthujjano”tiādīnā “apariññātaṃ tassāti vadāmī”ti (ma. ni. 1.2) “nandī dukkhassa mūla”nti (ma. ni. 1.13) ca anvayato, “khayā rāgassa...pe... vītamohattā”ti byatirekato ca tesamaṃ mūlakāraṇabhāvo vibhāvito.

Pariyāyati desetabbamatthamaṃ avagameti bodhayatīti **pariyāyo**, desanā. Pariyāyati attano phalaṃ pariggahetvā vattati tassa vā kāraṇabhāvaṃ gacchatīti **pariyāyo**, kāraṇaṃ. Pariyāyati aparāparaṃ parivattatīti **pariyāyo**, vāro. Evamaṃ pariyāyasaddassa desanākāraṇavāresu pavattī veditabbā. Yathārutavasena aggahetvā niddhāretvā gahetabbatthamaṃ **neyyatthamaṃ. Tebhūmakā dhammāva anavasesato veditabbā** maññānāvattthubhūtānaṃ sabbesaṃ pathaviādīdhammānaṃ adhippetattā.

**Kāraṇadesananti** kāraṇañāpanamaṃ desanaṃ. **Tamaṃ atthanti** tamaṃ sabbadhammānaṃ mūlakāraṇasaṅkhātamaṃ, kāraṇadesanāsaṅkhātamaṃ vā atthamaṃ. Tenevāha “**tamaṃ kāraṇamaṃ tamaṃ desana**”nti. **Ekattametanti** etaṃ padadvayaṃ ekattamaṃ. Sādhū-saddo eva hi ka-kārena vaḍḍhetvā “sādhuka”nti vutto. Teneva hi sādhusaddassa atthamaṃ vadantena atthuddhāravasena sādhusakasaddo udāhaṭo. **Dhammarucīti** puññakāmo. **Paññānavāti** paññāvā. **Addubbhoti** adūsako, anupaghātakoti attho. **Idhāpīti** imasmim mūlapariyāyasuttepi. **Ayanti** sādhusakasaddo. **Ettheva daḷhikammeti** sakkaccakiriyāyamaṃ. **Āṇattiyanti** āṇāpane. “Suṇātha sādhusakamaṃ manasi karoṭhā”ti hi vutte sādhusakasaddena savanamānasikārānaṃ sakkaccakiriyā viya tadāṇāpanampi vuttaṃ hoti. Āyācanatthattā viya cassa āṇāpanatthattā veditabbā.

Idānettha evamaṃ yojanā veditabbāti sambandho. **Sotindriyavikkhepavāraṇamaṃ** savane niyojanavasena kiriyantarapaṭisedhanabhāvato, sotaṃ odahathāti attho.

**Manindriyavikkhepanivāraṇamaṃ** aññacintāpaṭisedhanato. **Purimanti** “suṇāthā”ti padaṃ. **Etthāti** suṇātha, manasi karoṭhā”ti padadvaye, etasmim vā adhikāre. **Byañjanavipallāsaggāhavāraṇamaṃ** sotadvāre vikkhepapaṭibāhakattā. Na hi yāthāvato suṇantassa saddato vipallāsaggāho hoti. **Atthavipallāsaggāhavāraṇamaṃ** manindriyavikkhepapaṭibāhakattā. Na hi sakkaccaṃ dhammaṃ upadhārentassa atthato vipallāsaggāho hoti. **Dhammassavane niyojeti** suṇāthāti vidahanato. **Dhāraṇūpaparikkhāsūti** upaparikkhaggahaṇena tulanaṭīraṇādike diṭṭhiyā ca suppaṭivedhaṃ saṅgaṇhāti.

**Sabyañjanoti** ettha yathādhippematthamaṃ byañjayatīti byañjanaṃ, sabhāvanirutti. Saha byañjanenāti sabyañjano, byañjanasampannoti attho. Araṇīyato upagandhabbato anuṭṭhātabbato attho, catupārisuddhisīlādiko. Saha atthenāti **sāttho**, atthasampannoti attho. **Dhammagambhīroti**ādīsu **dhammo** nāma tanti. **Desanā** nāma tassā manasā vavattthāpitāya tantiyā desanā. **Attho** nāma tantiyā attho. **Paṭivedho** nāma tantiyā tantiatthassa ca yathābhūtāvabodho. Yasmā cete dhammadesanāatthapaṭivedhā sasādīhi viya mahāsamuddo mandabuddhīhi dukkhogāḷhā alabbhaneyyapaṭiṭṭhā ca, tasmā gambhīrā. Tena vuttaṃ “**yasmā ayaṃ dhammo...pe... sādhusakamaṃ manasi karoṭhā**”ti. Ettha ca paṭivedhassa dukkarabhāvato dhammatthānaṃ desanāñāṇassa dukkarabhāvato desanāya dukkhogāhatā, paṭivedhassa pana uppādetuṃ asakkuṇeyyattā tabbisayañāṇupattiyā ca dukkarabhāvato dukkhogāhatā veditabbā.

**Desanaṃ** nāma uddisanaṃ. Tassa niddisanaṃ bhāsananti idhādhippetanti āha “**vitthāratopi naṃ bhāsissāmīti vuttaṃ hotī**”ti. Paribyaṭṭaṃ kathanaṃ vā bhāsanamaṃ. **Sālikāyiva nigghosoti** sālikāya ālāpo viya madhuro kaṇṇasukho pemaṇīyo. **Paṭibhānanti** saddo. **Udīrayīti** uccāriyati, vuccati vā.

**Evamaṃ vutte ussāhajātāti** evamaṃ “suṇātha sādhukaṃ manasi karoṭha bhāsissāmī”ti vutte na kira satthā sankhepeveva desessati, vitthārenapi bhāsissatīti sañjātussāhā haṭṭhatuṭṭhā hutvā. **Idhāti** iminā vuccamānaadhikaraṇaṃ tassa puggalassa uppattiṭṭhānabhūtaṃ adhippetanti āha “**desāpadese nipāto**”ti. **Lokanti** okāsalokaṃ. **Idha tathāgato loketi** hi jātikhettaṃ, tatthāpi ayaṃ cakkavālo adhippeto. **Samaṇoti** sotāpanno. **Dutiyo samaṇoti** sakadāgāmī. Vuttañhettaṃ “katamo ca, bhikkhave, samaṇo? Idha, bhikkhave, bhikkhu tiṇṇaṃ saṃyojanānaṃ parikkhayā sotāpanno hotī”ti (a. ni. 4.241) “katamo ca, bhikkhave, dutiyo samaṇo? Idha, bhikkhave, bhikkhu tiṇṇaṃ saṃyojanānaṃ parikkhayā rāgadosamohānaṃ tanuttā sakadāgāmī hotī”ti ca (a. ni. 4.241). **Idheva tiṭṭhamānassāti** imissā eva indasālaguhāyaṃ tiṭṭhamānassa.

**2. Assutavāti** ettha (a. ni. ṭī. 1.1.51) **sutanti** sotadvārānusārena upadhāritaṃ, upadhāraṇaṃ vā, sutamaṃ assatthīti sutavā. Vā-saddassa hi attho atthitāmatādivasena anekavidho. Tathā hi “antavā ayaṃ loko parivaṭṭumo”tiādīsu (dī. ni. 1.54; paṭi. ma. 1.140) atthitāmatāṃ attho. “Dhanavā bhogavā, lābhī annassā”ti ca ādīsu bahubhāvo. “Rogavā hoti rogābhībhūto”tiādīsu kāyābādho. “Kuṭṭhī kuṭṭhacīvarena”tiādīsu nindā, “issukī maccharī saṭho māyāvino keṭubhino”tiādīsu abhiṇṇayogo. “Daṇḍī chatti alambari”tiādīsu (visuddhi. 1.142) saṃsaggo. “Paṇḍito vāpi tena so”tiādīsu (dha. pa. 63) upamānaṃ, sadisabhāvoti attho. “Taṃ vāpi dhīrā munim vedayanti”tiādīsu (su. ni. 213) samuccayo. “Ke vā ime kassa vā”tiādīsu (pārā. 296) saṃsayo. “Ayaṃ vā imesaṃ samaṇabrāhmaṇānaṃ sabbabālo sabbamūlho”tiādīsu (dī. ni. 1.181) vibhāvano. “Na vāyaṃ kumāro mattamaññāsī”tiādīsu (saṃ. ni. 2.154) padapūraṇaṃ. “Ye hi keci, bhikkhave, samaṇā vā brāhmaṇā vā”tiādīsu (ma. ni. 1.170) vikappo. “Sakyaputtassa sirīmato (dī. ni. 3.277), silavato silasampattiyā kalyāṇo kittisaddo abhuggacchati”ti (dī. ni. 2.150; 3.316; a. ni. 5.213; mahāva. 285) ca ādīsu pasamsā. “Paññavā hoti udayatthagāminiyā paññāya samannāgato ariyāya nibbedhikāya sammā dukkhakkhayagāminiyā”tiādīsu (dī. ni. 3.317, 355) atisayo. Idhāpi atisayo, pasamsā vā attho, tasmā yassa pasamsitaṃ, atisayena vā sutamaṃ atthi, so sutavāti saṃkilesaviddhamsanasamatthaṃ pariyattidhammassavanaṃ, taṃ sutvā tathattāya paṭipatti ca “sutavā”ti iminā saddena pakāsītā. Atha vā sotabbayuttaṃ sutvā kattabbanipphattivasena suṇīti sutavā, tappaṭikkhepena na sutavāti assutavā.

Ayañhi a-kāro “ahetukā dhammā (dha. sa. 2.dukamātikā), abhikkhuko āvāso”tiādīsu (pāci. 1046, 1047) taṃsahayoganivattiyamaṃ icchito. “Apaccayā dhammā”ti (dha. sa. 7.dukamātikā) taṃsambandhībhāvanivattiyamaṃ. Paccayuppannañhi paccayasambandhīti appaccayuppannattā ataṃsambandhitā ettha jotitā. “Anidassanā dhammā”ti (dha. sa. 9.dukamātikā) taṃsabhāvanivattiyamaṃ. Nidassanañhi daṭṭhabbatā. Atha vā passatīti nidassanaṃ, cakkhuvīññānaṃ, taggahetabbabhāvanivattiyamaṃ yathā “anāsavā dhammā”ti (dha. sa. 15.dukamātikā), “appaṭighā dhammā (dha. sa. 10.dukamātikā), anārammaṇā dhammā”ti (dha. sa. 55.dukamātikā) taṃkiccanivattiyamaṃ, “arūpino dhammā (dha. sa. 11.dukamātikā) acetasikā dhammā”ti (dha. sa. 57.dukamātikā) tabbhāvanivattiyamaṃ. Tadaññathā hi ettha pakāsītā. “Amanusso”ti tabbhāvamattanivattiyamaṃ. Manussamattaṃ natthi, aññaṃ samānanti. Sadisatā hi ettha sūcitā. “Assamaṇo samaṇapaṭiñño, anariyo”ti (a. ni. 3.13) ca taṃsambhāvanīyaguṇanivattiyamaṃ. Garahā hi idha ñāyati. “Kacci bhoto anāmayamaṃ, anudārā kaññā”ti (jā. 2.20.129) tadanappabhāvanivattiyamaṃ, “anuppannā dhammā”ti (dha. sa. 17.tikamātikā) taṃsadisabhāvanivattiyamaṃ. Atītānañhi uppannapubbattā uppādidhammānañca paccayekadesanipphattiyā āraddhuppādidbhāvato kālavimuttassa ca vijjamaṇattā uppannānukūlatā pageva paccuppannānanti tabbidūratāva ettha viññāyati “asekkhā dhammā”ti (dha. sa. 11.tikamātikā) tadapariyosānanivattiyamaṃ. Tanniṭṭhānañhi ettha pakāsītanti. Evamanekesaṃ atthānaṃ jotako. Idha pana “arūpino dhammā acetasikā dhammā”tiādīsu viya tabbhāvanivattiyamaṃ daṭṭhabbo, aññattheti attho. Etenassa sutādiññāviraṭaṃ dasseti. Tena vuttaṃ “**āgamādhigamābhāvā ñeyyo assutavā itī**”ti.

Idāni tassa atthaṃ vivaranto yasmā khandhadhātṷādikosallenapi maññanāpaṭisedhanasamatthaṃ bāhusaccaṃ hoti. Yathāha “kittāvatā nu kho, bhante, bahussuto hoti? Yato kho bhikkhu khandhakusalo hoti dhātu, āyatana, paṭiccasamuppādakusalo hoti, ettāvatā kho bhikkhu bahussuto hoti”ti, tasmā “**yassa hi khandhadhātuāyatanasaccapaccayākārasatipaṭṭhānādīsūtiādi vuttaṃ. Tattha vācuggatakaraṇaṃ uggaho. Atthaparipucchanaṃ paripucchā. Kusalehi saha codanāpariharaṇavasena vinicchayakaraṇaṃ vinicchayo. Maggaphalanibbānāni adhigamo.**

Bahūnaṃ (dha. sa. mūlaṭī. 1007) nānappakārānaṃ kilesasakkāyaditṭhīnaṃ avihatattā tā janenti, tāhi vā janitāti puthujjanā. Avighāteva vā jana-saddo vadati. **Puthu satthārānaṃ mukhamullokikāti** ettha puthu janā satthupaṭiññā etesanti **puthujjanāti** vacanatto. **Puthu sabbagatīhi avuṭṭhitāti** ettha janetabbā, jāyanti vā ettha sattāti janā, nānāgatiyo, tā puthū etesanti **puthujjanā**. Ito pare jāyanti etehī janā, abhisāṅkhārādayo, te etesaṃ puthū vijjantīti **puthujjanā**. Abhisāṅkharaṇādiattho eva vā jana-saddo daṭṭhabbo. **Oghā** kāmoghādayo. Rāgaggiādayo **santāpā**. Te eva, sabbepi vā kilesā **pariḷāhā**. **Puthu pañcasu kāmaguṇesu rattāti** ettha jāyatīti jano, rāgo gedhoti evamādikō, puthu jano etesanti **puthujjanā**. Puthūsu vā janā jātā rattāti evaṃ rāgādiattho eva vā janasaddo daṭṭhabbo. **Rattāti** vatthaṃ viya raṅgajātena cittassa vipariṇāmakarena chandarāgena rattā sārattā. **Giddhāti** abhikaṅkhanasabhāvena abhijjhānena giddhā gedhaṃ āpannā. **Gadhitāti** ganthitā viya dummocaniyabhāvena tattha paṭibaddhā. **Mucchitāti** kilesavasena visaññābhūtā viya anaññakiccā mucchaṃ mohamāpannā. **Ajjhosannāti** anaññasādhāraṇe viya katvā gilivā pariniṭṭhapetvā ṭhitā. **Laggāti** vaṅkandaṅḍake viya āsattā mahāpalipe vā yāva nāsikaggā palipannapuriso viya uddharitū asakkuṇeyyabhāvena nimuggā, **lagitāti** makkaṭālepe ālaggabhāvena paccuḍḍito viya makkaṭo pañcannaṃ indriyānaṃ vasena ālaggitā. **Palibuddhāti** baddhā, upaddutā vā. **Āvuṭṭati** āvunitā, **nivutāti** nivāritā. **Ovutāti** paliguṇṭhitā, pariyonaddhā vā. **Pihitāti** pidahitā, **paṭicchannāti** paṭicchaditā. **Paṭikujjitāti** heṭṭhāmukhajātā. **Puthūnaṃ vā gaṇanapathamatiṭṭhānantiādinā** puthu jano puthujjanoti dasseti.

“Assutavā”ti etena avijjandhatā vuttāti āha “**andhaputhujjano vutto hoti**”ti. **Ārakattā** (saṃ. ni. 1. 2.3.1) **kilesehi** maggena samucchinnattā. **Anayeti** avaḍḍhiyaṃ, anattheti attho. **Anaye** vā anupāye. **Nairiyanato** avattanato. **Ayeti** vaḍḍhiyaṃ, atthe, upāye vā. **Araṇīyatoti** payirupāsitabbato. Niruttinayena padasiddhi veditabbā purimesu atthavikappesu. Pacchime pana saddasatthavasenapi. Yadipi ariya-saddo “ye hi vo ariyā parisuddhakāyakammantā”tiādīsū (ma. ni. 1.35) visuddhāsāyapayogesu puthujjanesu vattati. Idha pana ariyamaggādhigamena sabbalokuttarabhāvena ca ariyabhāvo adhippetoti dassento āha “**buddhā**”tiādi. Tattha “**paccekabuddhā tathāgatasāvaka ca sappurisā**”ti idaṃ ariyā sappurisāti idha vuttapadānaṃ atthaṃ asaṅkarato dassetuṃ vuttaṃ. Yasmā pana nippariyāyato ariyasappurisabhāvā abhinnaśabhāvā. Tasmā “**sabbeva vā**”tiādi vuttaṃ.

**Ettāvatā hi buddhasāvako vutto.** Tassa hi ekantena kalyāṇamitto icchitabbo paratoghosaṃmāntarena paṭhamamaggassa anuppajjanato. Viseso cassa bhagavāva **kalyāṇamitto** adhippeto. Vuttañhettaṃ “mamañhi, ānanda, kalyāṇamittaṃ āgama jātidhammā sattā jātiyā parimuccanti”tiādi (saṃ. ni. 5.2). So eva ca aveccapasādādhigamena **dalhabhatti** nāma. Vuttampi cettaṃ “yaṃ mayā sāvakaṇaṃ sikkhāpadaṃ paññattaṃ, taṃ mama sāvaka jīvitahetupi nātikkaṃanti”ti (udā. 45). **Kataññutādihi paccekabuddhā buddhāti** ettha kataṃ jānātīti **kataññū**. Kataṃ viditaṃ pākātaṃ karotīti **katavedī**. Anekesupi hi kappasatasahassesu kataṃ upakāraṃ jānanti paccekabuddhā pākātaṅca karonti satijanaāmisapaṭiggahaṇādinā, tathā saṃsāradukkhadukkhitaṃ sakkaccaṃ karonti kiccaṃ, yaṃ attanā kātuṃ sakkā. Sammāsambuddho pana kappānaṃ asaṅkhyeyyasahassesupi kataṃ upakāraṃ maggaphalānaṃ upanissayaṅca jānāti, pākātaṅca karoti, sīho viya ca evaṃ sabbattha sakkaccameva dhammadesanaṃ karonto buddhakiccaṃ karoti. Yāya paṭipattiyā diṭṭhā nāma honti, tassā appaṭipajjanabhāvo, tattha ca ādarābhāvo ariyānaṃ adassanasīlatā ca, na ca dassane sādhuḅkārītā ca veditabbā. **Cakkhunā adassāvīti** etta **cakkhu** nāma na maṃsacakkhu eva, atha kho dībacakkhupīti āha “**dībacakkhunā vā**”ti. **Ariyabhāvoti** yehi yogato “ariyā”ti vuccanti. Te maggaphaladhammā daṭṭhabbā.

**Tatrāti** ñāṇadassanasseva dassanabhāve. **Vatthūti** adhippetatthañāpanakāraṇaṃ. **Evam vuttepi** evaṃ aññāpadesena attūpanāyikaṃ katvā vuttepi. **Dhammanti** lokuttaradhammaṃ, catusaccadhammaṃ vā. **Ariyakaradhammā** aniccānupassanādayo vipassiyamānā aniccādayo, cattāri vā ariyasaccāni.

**Avinītoti** na vinīto, adhisīlasikkhādivasena na sikkhito. Yesaṃ saṃvaravinayādīnaṃ abhāvena ayaṃ avinītoti vuccati, te tāva dassetuṃ “**duvidho vinayo nāmā**”tiādīmāha. Tattha **sīlasaṃvaroti** pātimokkhasaṃvaro vedītabbo, so ca atthato kāyikavācasiko avītikkamo. **Satisaṃvaroti** indriyarakkhā, sā ca tathāpavattā sati eva. **Ñāṇasaṃvaroti** “sotānaṃ saṃvaram brūmī”ti (su. ni. 1040) vatvā “paññāyete pidhīyare”ti vacanato sotasankhātānaṃ tañhādīṭṭhiduccaritaavijjāvasiṭṭhakilesānaṃ saṃvaro pidhanaṃ samucchedañāṇanti vedītabbaṃ. **Khantisaṃvaroti** adhvāsana, sā ca tathāpavattā khandhā, adoso vā. Paññāti eke, taṃ aṭṭhakathāya virujjhati. **Vīriyasaṃvaro** kāmavittakkādīnaṃ vinodanavasena pavattaṃ vīriyameva. Tena tena guṇaṅgena tassa tassa aguṇaṅgassa pahānaṃ **tadaṅgapahānaṃ**. Vikkhambhanaṃ pahānaṃ **vikkhambhanapahānaṃ**. Sesapatthayepi eseva nayo.

**Iminā pātimokkhasaṃvarenā**tiādi sīlasaṃvarādīnaṃ vivaraṇaṃ. Tattha **samupetoti** ettha **iti**-saddo ādisattho. Tena “sahagato samupagato”tiādīnā **vibhaṅge** (vibha. 511) āgataṃ saṃvaravibhaṅgaṃ dasseti. Esa nayo sesesupi. Yaṃ panettha vattabbaṃ, taṃ anantarasutte āvi bhavissati.

**Kāyaduccarītādīnanti** dussīlyasaṅkhātānaṃ kāyavacīduccarītādīnaṃ muṭṭhassaccasaṅkhātassa pamādassa abhijjhādīnaṃ vā akkhantiaññākosajjānaṅca. **Saṃvaraṇatoti** pidhanaṃ thakanato. **Vinayanatoti** kāyavācācittānaṃ virūpappavattiyā vinayanato apanayanato, kāyaduccarītādīnaṃ vā **vinayanato**, kāyādīnaṃ vā jīmhapavattiṃ vicchinditvā ujukaṃ nayanatoti attho. Paccayasamavāye uppajjanārāhānaṃ kāyaduccarītādīnaṃ tathā tathā anuppādanameva **saṃvaraṇaṃ vinayanaṅca** vedītabbaṃ.

Yaṃ pahānanti sambandho. “**Nāmarūpaparicchedādīsū vipassanāññāpēsū**”ti kasmā vuttaṃ, nanu nāmarūpaparicchedapaccayapariggahakaṅkhāvitaraṇāni na vipassanāññāpēsū sammasanākārena appavattanato? Saccametam. Vipassanāññāpēsū pana adhiṭṭhānabhāvato evaṃ vuttaṃ. “Nāmarūpamattamidaṃ, natthi ettha attā vā attaniyaṃ vā”ti evaṃ pavattañāṇaṃ **nāmarūpavavattānaṃ**. Sati vijjamāne khandhapaṅcakasaṅkhāte kāye, sayamaṃ vā satī tasmim kāye diṭṭhīti **sakkāyadīṭṭhi**. “Rūpaṃ attato samanupassati”ti (saṃ. ni. 3.81; 4.345) evaṃ pavattā micchādīṭṭhi. Tasseva rūpārūpassa kammāvijjādīpaccayapariggaṇhanañāṇaṃ **paccayapariggaho**. “Natthi hetu natthi paccayo sattānaṃ saṃkilesāyā”ti (dī. ni. 1.168) ādinayappavattā **ahetukadīṭṭhi**. “Issarapurisapajāpatipakatianukālādīhi loko pavattati nivattati cā”ti pavattā **visamahetudīṭṭhi**. **Tassevāti** paccayapariggahasseva. **Kaṅkhāvitaraṇenāti** yathā etarahi nāmarūpassa kammādīpaccayato uppatti, evaṃ atītānāgatesupīti tīsupi kālesu vicikicchāpanayanañāṇena. **Kathaṃkathībhāvassāti** “ahosiṃ nu kho ahamatītāmadhāna”nti (ma. ni. 1.18; saṃ. ni. 2.20) ādinayappavattāya saṃsayappavattiyā. **Kalāpasammasanenāti** “yaṃ kiñci rūpaṃ atītānāgatapaccuppanna”ntiādīnā (ma. ni. 1.361; 2.113; 3.86, 89) khandhapaṅcakaṃ ekādasasu okāsesu pakkhipitvā sammasanavasena pavattena nayavipassanāñāṇena. **Ahaṃ mamāti gāhassāti** attattaniyagahaṇassa. **Maggāmaggaṃvavattānenāti** maggāmaggañāṇavisuddhiyā. **Amagge maggasaññāyāti** obhāsādike amagge “maggo”ti uppannasaññāya.

Yasmā sammadeva saṅkhārānaṃ udayaṃ passanto “evameva saṅkhārā anurūpakāraṇato uppajjanti, na pana ucchijjanti”ti gaṇhāti, tasmā vuttaṃ “**udayadassanena ucchedadīṭṭhiyā**”ti. Yasmā pana saṅkhārānaṃ vayaṃ passanto “yadīpime saṅkhārā avicchinā vattanti, uppannuppannā pana appaṭṭisandhikā nirujjhante vā”ti passati, tassevaṃ passato kuto sassataggāho, tasmā vuttaṃ “**vayadassanena sassatadīṭṭhiyā**”ti. **Bhayadassanenti** bhayatupaṭṭhānañāṇena. **Sabhayeti** sabbabhayānaṃ ākarabhāvato sakaladukkhavūpasamasāṅkhātassa paramassāsassa paṭipakkhabhāvato ca sabhaye khandhapaṅcake. **Abhayasaññāyāti** “abhayaṃ khema”nti uppannasaññāya. **Assādasaññā** nāma pañcupādānakkhandhesu assādasavasena pavattasaññā, yā “ālayābhiniveso”tipi vuccati.

**Abhiratisaññā** tattheva abhirativasena pavattasaññā, yā “nandī”tipi vuccati. **Amuccitukamyatā** ādānaṃ. **Anupekkhā** saṅkhārehi anibbindanaṃ, sālayatāti attho. **Dhammaṭṭhitiyaṃ** paṭiccasamuppāde **paṭilomabhāvo** sassatucchedaggāho, paccayākārapaṭicchādakamoho vā, **nibbāne paṭilomabhāvo** saṅkhāresu rati, nibbānapaṭicchādakamoho vā. **Saṅkhāranimittaggāho**ti yādisassa kilesassa appahīnattā vipassanā saṅkhāranimittaṃ na muñcati, so kilesa, yo “saṃyogābhiniveso”tipi vuccati. Saṅkhāranimittaggahaṇassa atikkamanameva vā **pahānaṃ**.

Pavatti **eva pavattibhāvo**, pariyaṭṭhānanti attho. **Nīvaraṇādidhammānanti** ettha **ādi**-saddena nīvaraṇapakkiyā kilesā vitakkavicārādayo ca gayhanti.

Catunnaṃ ariyamaggānaṃ bhāvitattā accantaṃ appavattibhāvena yaṃ pahānanti sambandho. Kena pahānanti? Ariyamaggehevāti viññāyamānoyamatto tesam bhāvitattā appavattivacanato. **Samudayapakkkhikassāti** ettha cattāropi maggā catusaccābhisaṃmayāti katvā tehi pahātabbena tena tena samudayena saha pahātabbattā samudayasabhāgattā, saccavibhaṅge ca sabbakilesānaṃ samudayabhāvassa vuttattā “samudayapakkkhikā”ti diṭṭhiādayo vuccanti. **Paṭippassaddhattaṃ** vupasantaṭā. **Saṅkhatanissaṭṭatā** saṅkhārasabhāvābhāvo. **Pahīnasabbasaṅkhatanti** virahitasabbasaṅkhatam, visaṅkhāranti attho. Pahānañca taṃ vinayo cāti **pahānavinayo** purimena atthena, dutiyena pana pahīyatīti pahānaṃ, tassa vinayoti yojetabbaṃ.

Bhinnasaṃvarattāti naṭṭhasaṃvarattā, saṃvarābhāvatoṭi attho. Tena asamādinnaṃsaṃvaropi saṅgahito hoti. Samādānena hi sampādetabbo saṃvaro tadabhāve na hotīti. Evañhi loke vattāro honti “mahā vata no bhogo, so naṭṭho tathā akatattā”ti. **Ariyeti** ariyo. Paccattavacanañhetam. **Esseti** eso so eva, atthato anaññoti attho. **Tajjātetī** atthato taṃsabhāvo, sappuriso ariyasabhāvo, ariyo ca sappurisasabhāvoti attho.

**Taṃ atthanti** “sabbadhammamūlapariyāya”nti evaṃ vuttamattham. Kasmā panettha puggalādhiṭṭhānā desanā katāti? Yadettha vattabbaṃ, taṃ “yasmā puthujjano apariññātavatthuko”tiādinā (ma. ni. aṭṭha. 1.2) sayameva vakkhati. Dhammo adhiṭṭhānaṃ etissāti **dhammādhiṭṭhānā**, sabhāvadhamme nissāya pavattitadesanā. Dhammasaseneva pavattā paṭhamā, puggalavasena uṭṭhahitvā puggalavaseneva gatā tatiyā, itarā dhammapuggalānaṃ vomissakavasena. Kasmā pana bhagavā evaṃ vibhāgena dhammaṃ desetīti? Veneyyajjhāsayena desanāvilāsena ca. Ye hi veneyyā dhammādhiṭṭhānāya dhammadesanāya sukkena attham paṭivijjhanti, tesam tathā dhammaṃ desetī. Esa nayo sabbattha. Yassā ca dhammadhātuyā suppaṭividdhattā desanāvilāsappatto hoti, sāyaṃ suppaṭividdhā, tasmā desanāvilāsappatto dhammissaro dhammarājā yathā yathā icchati, tathā tathā dhammaṃ desetīti evaṃ iminā veneyyajjhāsayena desanāvilāsena ca evaṃ vibhāgena dhammaṃ desetīti vedītabbo.

**Chadhāturoti** pathavidhātu āpo-tejo-vāyo-ākāsadhātu viññāṇadhātūti imesaṃ channaṃ dhātūnaṃ vasena chadhāturo. “Cakkhunā rūpaṃ disvā somanassaṭṭhāniyaṃ rūpaṃ upavicarati”tiādinā (dī. ni. 3.324) vuttānaṃ channaṃ somanassūpavicārānaṃ, channaṃ domanassaupekkhūpavicārānañca vasena **aṭṭhārasamanopavicāro**. Saccādhiṭṭhānādivasena **caturādhiṭṭhāno**. Paññācakkhunā diṭṭhadhammikassa samparāyikassa ca atthassa adassanato **andho**, diṭṭhadhammikasseva dassanato **ekacakkhu**, dvinnampi dassanato **dvicakkhu**, vedītabbo.

Svāyaṃ niddisīti sambandho. **Svāyanti** ca so ayaṃ, yathāvuttadesanāvibhāgakusalo bhagavāti attho. **Apariññātavatthukoti** tīhi pariññāhi apariññātakhandho. Khandhā hi pariññātavatthu. **Apariññāmūlikāti** pariṇānañbhāvanimittā tasmim sati bhāvato. Pariññānañhi avijjādayo kilesā paṭipakkhā tammūlikā ca sabbamaññānāti. **Ariyānaṃ adassāvīti** ettha iti-saddo ādiattho. Tena “ariyadhammassa akovido”tiādikam puthujanassa visesanabhāvena pavattam pāḷisesam gaṇhāti puthujjananiddesabhāvato. Tenāha “**evaṃ puthujjanaṃ niddisī**”ti.



Suttanikkhepavaṇṇanā niṭṭhitā.

### Pathavīvāraṇṇanā

**Tassāti** puthujjanassa. Vasati ettha ārammaṇakaraṇavasenāti ārammaṇampi **vatthūti** vuccati pavattiṭṭhānabhāvatoti āha “**pathaviādīsu vatthūsū**”ti. Sakkāyadhammānampi ārammaṇādinā satipi maññanāhetubhāve maññanāhetukatteneva tesam nibbattitoti vuttaṃ “**sabbasakkāyadhammajanitam maññana**”nti. Ettha ca pathavīdhātu sesadhātūnaṃ sasambhārasambhārabhāvā satipi pamāṇato samabhāve sāmattiyyato adhikānadhikabhāvena veditabbā. Sambhārantīti **sambhārā**, parivārā. Tamtamkalāpehi lakkhaṇapathaviyā sesadhammā yathārahaṃ paccayabhāvena parivārabhāvena ca pavattanti. Tenāha “**sā hi vaṇṇādīhi sambhārehi saddhiṃ pathavīti sasambhārapathavī**”ti. **Pathavitoti** ettha puthulaṭṭhena puthuvī, puthuvī eva pathavī. Sā hi satipi paricchinnavuttiyaṃ sabbesaṃ sakalāpabhāvānaṃ ādhārabhāvena pavattamānā puthulā patthaṭā vitthiṇṇāti vattabbataṃ arahati, na pana taṃ anupavisitvā pavattamānā āpādayo. Sasambhārapathaviyā pana puthulabhāve vattabbameva natthi. Ārammaṇapathaviyaṃ vaḍḍhanapharaṇaṭṭhehi puthulaṭṭho, itarasmim ruḷhiyāva daṭṭhabbo. **Ārammaṇapathavīti** jhānassa ārammaṇabhūtaṃ pathavīsāṅkhātaṃ paṭibhāganimittaṃ. Tenāha “**niṃmittapathavītipi vuccati**”ti. **Āgamanavasenāti** pathavīkaṣiṇabhāvanāgamanavasena. Tathā hi vuttaṃ “āpo ca devā pathavī, tejo vāyo tadāgamu”nti (dī. ni. 2.340).

**Sabbāpīti** catubbidhā pathavīpi. Anussavādimattaladdhā maññanā vatthu hotiyeva. Tathā hi “kakkhaḷaṃ kharigata”ntiādinā (vibha. 173) lakkhaṇapathavīpi uddharīyati. Yaṃ paneke vadanti “lakkhaṇe diṭṭhe maññanā natthi, sañjānātīti vuttasaññā ca diṭṭhiggāhassa mūlabhūtā piṇḍaggāhitā, sā lakkhaṇe nakkhamati, tasmā lakkhaṇapathavī na gahetabbā”ti, tadayuttaṃ lakkhaṇapaṭivedhassa idha anadhippetattā. Tenāha “**lokavohāraṃ gahetvā**”ti. Na ca sabbasaññā piṇḍaggāhikā, nāpi diṭṭhiggāhasseva mūlabhūtā, tasmā lakkhaṇapathaviyāpi kāyadvārānusārena aññathā ca upaṭṭhitāya maññanā pavattateva. Teneva ca “anussavādimattaladdhā”ti vuttaṃ. **Pathavitoti** paccate nissakkavacananti dassento “**pathavīti sañjānātī**”ti āha. Yasmā catubbidhampi pathaviṃ “pathavī”ti sañjānanto tena tena nayena pathavīkoṭṭhāseneva sañjānātīti vuccati, na āpādikotṭhāsena, tasmā vuttaṃ “**pathavibhāgena sañjānātī**”ti. **Lokavohāraṃ gahetvāti** lokasamaññaṃ avijahitvā. Etena lakkhaṇapathaviyampi vohāramukhenevassā pavattīti dasseti.

Yadi lokavohārena tattha pavatti, ko ettha doso, nanu ariyāpi “ayañhi bhante mahāpathavī”tiādinā lokavohārena pavattantīti? Na ettha vohāramatte avaṭṭhānaṃ adhippetam, atha kho vohāramukhena micchābhinivesoti dassento “**saññāvīpallāsena sañjānātī**”ti āha. Tassattho – ayonisomanasikārasambhūtāya “subha”ntiādinayappavattāya viparītasāññāya sañjānātīti. Etena dubbalā taṇhāmānadiṭṭhimaññanā dassitāti daṭṭhabbam. Yadi evaṃ kasmā saññā gahitāti? Pākaṭabhāvato. Yathā nāma aggimhi mathiyamāne yadā dhūmo upalabbhati, kiñcāpi tadā vijjateva pāvako avinābhāvato, pākaṭabhāvato pana dhūmo jātoti vuccati, na aggi jātoti, evaṃsāmpadamidaṃ daṭṭhabbam. Yadi tatha maññanākiccaṃ atthi, na pana vibhūtaṃ apākaṭabhāvato saññākiccameva vibhūtaṃ, taṃ pana maññanānukūlaṃ maññanāsahitaṃ cāti āha “**saññāvīpallāsena sañjānātī**”ti. Evaṃ pathavībhāgaṃ amuñcantoyeva vā sañjānātīti sambandho. Yo hi vuttappabhedāya pathaviyā pathavibhāgaṃ amuñcantoyeva avijahantoyeva sīsapiṇḍe suvaṇṇasaññī viya anattādisabhāvaṃyeva taṃ attādivasena sañjānātī, tassa vasena vuttaṃ “pathavī”tiādi. **Na vattabbam** puthujjanaggāhassa yuttimaggananivāraṇatoti dassento āha “**ummattako viya...pe... gaṇhātī**”ti. **Ariyānaṃ adassāvītādibhedanti** ariyānaṃ adassāvītādivisesaṃ vadantena bhagavatāva ettha yathāvuttasañjānane kāraṇaṃ vuttanti yojanā.

**Evanti** “pathavibhāgena sañjānātī”tiādinā vuttappakārena. **Sañjānitvāti** pubbakālakiriyāniddesoti āha “**aparabhāge...pe... gaṇhātī**”ti. **Papañcasāṅkhāti** papañcakoṭṭhāsā. Papañcanti sattā saṃsāre cirāyanti etehīti **papañcā**, maññanti “etaṃ mamā”tiādinā parikappenti etāhīti **maññanāti** dvīhipi pariāyehi taṇhādayova vuttāti āha “**taṇhāmānadiṭṭhipapañcehi idha maññanānāmena vuttehī**”ti.

Ajaññassa jaññato, aseyyādikassa seyyādito gahaṇato diṭṭhimaññanā viya taṇhāmānamaññanāpi aññathā gāho evāti āha “**aññathā gaṇhātī**”ti. Ārammaṇābhiniropanādinā bhinnasabhāvānampi vitakkādīnaṃ sādharmaṇo upanijjhāyanaśabhāvo viya anugijjhanuṇṇatiparāmasanaśabhāvānampi taṇhādīnaṃ sādharmaṇena ārammaṇaparikkappaṇākārena pavatti **maññanāti** daṭṭhabbaṃ. Tenāha “**tīhi maññanāhi maññatī**”tiādi. Assāti puthujjanaśsa, udayabbayānupassanādīsū viya sukhumanāyena pi maññanāpavatti atthīti vibhāvanasukhatāya thūlaṃyeva taṃ dassetukāmo “**oḷārikanāyena**”tiāha. Oḷārike hi vibhāge dassite sukhumavibhāvanā sukarāti dassetuṃ ayamattahayojanā vuccatīti sambandho. **Ajjhattikāti** indriyabaddhā sattasantānapariyāpannā niyakajjhata **vuttā** vibhaṅge paṭisambhidāmagge ca.

**Vibhaṅgeti** dhātu vibhaṅge (vibha. 173). **Bāhirāti** anindriyabaddhā saṅkhārasantānapariyāpannā. **Kakkhaḷanti** thaddhaṃ. **Kharigatanti** pharusāṃ. Kakkhaḷabhāvo **kakkhaḷattaṃ**. **Kakkhaḷabhāvoti** kakkhaḷasabhāvo. **Bahiddhāti** indriyabaddhato bahiddhābhūtaṃ. **Anupādinanti** na upādinnaṃ. **Ayoti** kālaloḥaṃ. **Lohanti** jātiloḥaṃ vijātiloḥaṃ kittimaloḥaṃ pisācaloḥanti catubbidhaṃ. Tattha ayo sajjhu suvaṇṇaṃ tipu sīsaṃ tambaloḥaṃ vekantakaloḥanti imāni satta **jātilohāni** nāma. Nāganāsikāloḥaṃ **vijātiloḥaṃ** nāma. Kaṃsaloḥaṃ vaṭṭaloḥaṃ āraḷanti tīpi **kittimalohāni** nāma. Moraḷakkaḷaṃ puthukaṃ malinaḷaṃ capalaḷaṃ salakaṃ āḷalaṃ bhattakaṃ duśiloḥanti aṭṭha **pisācalohāni** nāma. Tesu **vekantakaloḥaṃ** nāma sabbaloḷacchedanaśamattā ekā loḷajāti. Tathā hi taṃ vikantati chindaṭīti vikantakanti vuccatī. Vikantakameva vekantaḷaṃ. **Nāganāsikāloḥaṃ** loḷasadiśaṃ loḷavijāti haliddādivijāti viya. Tathā hi taṃ loḷākāraṃ loḷamaḷaṃ viya ghaṇasaḷhataṃ hutvā tiṭṭhati, tāpetvā tāḷitaṃ pana bhinnaṃ bhinnaṃ hutvā viśarati mudu maṭṭhaṃ kammaniyaṃ vā na hoti. Tiputaṃbe missetvā kataṃ **kaṃsalohaṃ**. Sīśataṃbe missetvā kataṃ **vaṭṭaloḥaṃ**. Jaśataṃbe missetvā kataṃ **āraḷaḷaṃ**. Teneva taṃ karaṇena nibbattattā **kittimalohanti** vuccatī. Yaṃ pana kevaḷaṃ rasakadhātu viniggataṃ, taṃ “pittala”ntipi vadanti. Taṃ idha nādhippetaṃ, yaṭhāvuttaṃ miśśakameva katvā yojitaṃ **kittimanti** vuttaṃ. **Moraḷakkaḷādīni** evaṃnāmaṇevetaṇi. Tesu yaśmā pañca jātilohāni pāḷiyaṃ viśuṃ vuttāneva, taśmā vekantakaloḷena saddhiṃ vuttāvaseśaṃ sabbāṃ idha loḷanti veditaḷbaṃ.

**Tipūti** setatipu. **Sīśanti** kāḷatipu. **Sajjhanti** rajataṃ. **Muttāti** hatthikumbhaḷjādika aṭṭhavidhāpi muttā. Tathā hi hatthikumbhaṃ varāhadāṭhā bhūjaṅgaśīsaṃ valāḷakūṭaṃ veḷū macchaśīro saṅkho sippīti aṭṭha muttāyoniyo. Tattha **hatthikumbhaḷjā** pītaṃvaṇṇā pabhāhīnā. **Varāhadāṭhā** varāhadāṭhavaṇṇāva. **Bhūjaṅgaśīśajā** nīlādivaṇṇā suviśuddhā vaṭṭalā ca. **Valāḷakajā** bhāśurā dubbibhāgarūpā rattibhāge andhaḷkāraṃ viśhamantiyo tiṭṭhanti, devūpabhoga eva ca honti. **Veḷujā** karakupaśaśamānaṃvaṇṇā na bhāśurā, te ca veḷū amaṇṇaśogocare eva paḷeśe jāyanti. **Macchaśīraḷjā** pāṭhīnaḷpiṭṭhiśamānaṃvaṇṇā vaṭṭalā laḷhavo ca honti pabhāvihīnā, te ca macchā śamuddamaḷjje eva jāyanti. **Saṅkhajā** saṅkhodaraḷcchavivaṇṇā koḷappaṃaṇāpi honti pabhāvihīnāva. **Sippijā** pabhāviśeśayuttā honti nānaśaṇṭhānā. Evaṃ jāṭito aṭṭhavidhāśupi muttāśu yā macchaśaṅkhaśippijā, tā śamuddikā honti, bhūjaṅgaḷjāpi kāśi śamuddikā honti, itarā aśamuddikā. Yaśmā bahulaṃ śamuddikāva muttā loke diśśanti, taṭṭhāpi sippijāva, itarā kāḷāśikā. Taśmā **śammohaḷvinaḷdaniyaṃ** (vibha. aṭṭha. 173) “muttāti śamuddikā muttā”ti vuttaṃ.

**Maṇīti** ṭhaḷpetvā pāḷiagate veḷuriyādike śeśo joṭiraśādibhedo śabbopi maṇi. **Veḷuriyanti** vaṃśavaṇṇamaṇi. **Saṅkhoti** śamuddikaśaṅkho. **Silāti** kāḷaśilā paṇḷuśilā śeśaśilāḷidibhedā aṭṭhapi śilā. **Rajataṃti** kaḷhāpaṇādikaṃ vuttāvaseśaṃ rajataśammaṭaṃ. **Jātarūpanti** suvaṇṇaṃ. **Lohitaṅgoti** rattamaṇi. **Maśāragallaṃti** kabaraṃmaṇi **tiṇā**dīsū bahibhāra tāḷanaḷḷikerādayopi **tiṇaṃ** nāma. Antośāraṃ khaḷdirādi antaśaśo dāruḷkaṇḷaḷampi **kaṭṭhaṃ** nāma. Muggamaṭṭato yāva mutṭhippaṃaṇā maṃruṃbā **śakkaḷarā** nāma. Muggamaṭṭato paṭṭhāya heṭṭhā vālikā nāma. **Kaṭṭhaḷanti** kaḷāḷakhaṇḷaṃ. **Bhūmīti** śaśambhāraḷpaṭhaḷvī. **Pāśāṇoti** antomuṭṭhiyaṃ aśaṇṭhahaṇato paṭṭhāya yāva hatthippaṃaṇaṃ pāśāṇaṃ, hatthippaṃaṇato pana paṭṭhāya upari **pabbatoti**. Ayaṃ ayoāḷdīsū vibhāganiddeso. **Nimittaḷpaṭhaḷvīti** paṭibhāganimittaḷbhūtaṃ paṭhaḷviśaṇṇaṃ. Taṃpi hi “rūpāvacaraṭikacaṭukkaḷjhaṇaṃ kuśalaṭo ca vipākaṭo ca kiriyato ca caṭutthaśa jhānaśa vipāko ime dhammā bahiddhāraṃmaṇā”ti vacanaṭo “bāhirā paṭhaḷvī”ti vuccatī. Tena vuttaṃ “yā ca **ajjhataṭāraṃmaṇaṭṭike nimittaḷpaṭhaḷvī, taṃ gaḷetvā**”ti.

Uggahanimittañcetta taṃgatikameva daṭṭhabbaṃ, nimittuppattito pana pubbe bhūmiggaṇeṇeva gahitanti.

**Tīhi maññanāhīti** vuttaṃ maññanāttayaṃ sapaśantānesu saṅkhepato yojetvā dassetuṃ “**ahaṃ pathavī**”tiādi vuttaṃ. Tattha **ahaṃ pathavī**tiādinā ajjhattavisayaṃ diṭṭhimaññanaṃ mānamaññanañca dasseti attābhinivesāhaṃkāradīpanato. **Mama pathavī**ti iminā taṇhāmaññanaṃ mānamaññanampi vā pariggahabhūtāyapi pathaviyā seyyādito mānajappanato. Sesapadadvayepi imināyena maññanāvibhāgo veditabbo. Tattha pathavikasiṇajjhānalābhī jhānacakkhunā gahitajhānārammaṇaṃ “attā”ti abhinivisanto tañca seyyādito dahanto atthato “**ahaṃ pathavī**”ti **maññati** nāma, tameva “ayaṃ mayhaṃ attā”ti gahaṇe pana “**mama pathavī**”ti **maññati** nāma. Tathā taṃ “parapuriso”ti vā “devo”ti vā vādavasena “ayameva paresaṃ attā”ti vā abhinivisanto “**paro pathavī, parassa pathavī**”ti **maññati** nāma. Iminā nayena sesapathavīsipi yathārahaṃ catukkaṃ niddhāretabbaṃ.

Evamaṃ “pathaviṃ maññati”ti ettha catukkavasena maññanaṃ dassetvā idāni maññanāvattthūṃ maññanāyo ca vibhajitvā anekavihitāṃ tassa maññanākāraṃ dassetuṃ “**atha vā**”tiādimāha. Tattha **ayanti** yathāvutto puthujjano. **Chandarāgati** bahalarāgaṃ. **Assādetīti** nikāmeti, “ime kesā mudusiniddhakuñcitanīlobhāsā”tiādinā tattha rasaṃ vindati. **Abhinandatīti** sappitīkāya taṇhāya abhimukho nandati pamodati. **Abhivadati**ti uppannaṃ taṇhābhinandanāvegaṃ hadayena sandhāretuṃ asakkonto “aho me kesā”ti vācaṃ nicchāreti. **Ajjhosāya tiṭṭhatīti** balavataṇhābhinivesena gilitvā pariniṭṭhāpetvā tiṭṭhati. **Aññataraṃ vā pana rajjanīyavattthuntīti** kesādito aññataraṃ vā karacaraṇādippabhedāṃ niyakajjhattapariyāpannaṃ rāgupattihetubhūtaṃ vatthūṃ. **Itīti** iminā siniddhādippakārenāti patthayitabbākāraṃ parāmasati. Tattha **nandiṃ samannānetīti** tesu bhāvīsu kesādīsu siddhaṃ viya katvā nandiṃ taṇhaṃ samannāharati samupacāreti. **Paṇidhatīti** patthanaṃ ṭhapeti.

Sampattiṃ nissāya “seyyohamasmī”ti, vipattiṃ nissāya “hīnohamasmī”ti mānaṃ janetīti yojanā. Pathavīkoṭṭhāsabhūtānaṃ kesādīnaṃ sampattivipattihi mānajappanā pathaviyā maññanā hotīti āha “**evamaṃ ajjhattikaṃ pathaviṃ mānamaññanāya maññati**”ti. Avayavabyatirekena samudāyassa abhāvato samudāyo jīvābhiniveso avayavepi hotīti dassento “**taṃ jīvaṃ taṃ sarīranti āgatanayena pana kesam jīvo**”ti **abhinivisati**”ti āha. “Kesā nāmete issaravihitā pajāpatinissitā aṇusañcayo pakatipariṇāmo”tiādinā nayenapettha **diṭṭhimaññanā** veditabbā.

**Imissā pavattiyāti** nikantimānadiṭṭhīnaṃ pariyaḍānasamugghāṭappavattiyā. “Etaṃ mamā”tiādinā yadipi tissannaṃ maññanānaṃ sambhavo dassito. Taṇhāmānamaññanānaṃ pana heṭṭhā dassitattā diṭṭhimaññanā evettha visesato uddhaṭāti veditabbaṃ. Tenāha “**evampi ajjhattikaṃ pathaviṃ diṭṭhimaññanāya maññati**”ti.

Bāhirampi pathaviṃ tīhi maññanāhi maññati yojanā. Taṃ pana maññanāvidhiṃ dassetuṃ “**katha**”nti āha. Tassattho heṭṭhā vuttanayena veditabbo.

**Ayaṃ jīvoti** ayaṃ kālaloṃ “jīvo attā”ti **abhinivisati** ekacce nigaṇṭhā viya. **Evamaṃ bāhiraṃ pathaviṃ diṭṭhimaññanāya maññati**ti etthāpi “yā ceva kho pana ajjhattikā pathavīdhātu, yā ca bāhirā pathavīdhātū”tiādinā nayena ānetvā vattabbo.

**Pathavīkasiṇaṃ attato samanupassati**tiādisu yaṃ vattabbaṃ, taṃ heṭṭhā vuttameva. Ayampi ca nayo “rūpaṃ attato samanupassati”ti ettheva antogadhoti daṭṭhabbo kasiṇānampi rūpasamaññāsambhāvato. **Pathaviṃ maññati**ti ettha yādiso maññanāvattthumaññanānaṃ vitthāranayo vutto, tādiso ito paraṃ vuttanayovāti āha “**ito paraṃ saṅkhepeneva kathayissāmā**”ti, atādiso pana vitthāratopi kathayissati attho.

**Tasmāti** yasmā “pathaviyā”ti idaṃ bhummavacanaṃ, tasmā, so attaparattadupakaraṇānaṃ

ādhārabhāvena taṃ maññānāvattuṃ kappetīti attho. Tenāha “**ahaṃ pathaviyā**”tiādi. Nanu ca indriyabaddhānindriyabaddhapabhedassa dhammappabandhassa sasambhārapathavī ca ādhāranissayo, itarā ārammaṇanissayo tadārammaṇassāti ettha nibbīrodhoti? Na, maññānāvattuṃ nissayabhāvena parikkappanato. Ayañhi “aha”nti diṭṭhimaññānāya mānāmaññānāya ca vatthubhūtaṃ attano pathavisannissayaṃ katvā “**ahaṃ pathaviyā**”ti maññāti, taṇhāmaññānāya vatthubhūtaṃ upakaraṇassa pathaviṃ sannissayaṃ katvā “**mayhaṃ kiñcanaṃ palibodho pathaviyā**”ti maññāti. **Parotiādīsupi** iminā nayena attho veditabbo.

Yvāyaṃ atthanayoti sambandho. **Vutto** paṭisambhidāmagge. **Eteneva nayenāti** yvāyaṃ “so kho pana me attā imasmiṃ rūpe”ti samudāyassa ādhārabhāvādīpano atthanayo vutto, eteneva nayena. Na hi avayavabyatirekena samudāyo labbhāti, tasmā samudāye vuttavidhi avayavepi labbhātīti adhippāyo. Tenāha **so kho pana me ayaṃ attā imissā pathaviyāti maññantoti. Tasmimyeva panassa attanīti** ettha **assāti** puthujjanassa. **Tasmimyeva attanīti** ajjhātikabāhirapathavīsannissaye attani. “Pathaviyā maññāti”ti padassāyaṃ vaṇṇanā. Evaṃ “pathaviyā maññāti”ti ettha attavasena diṭṭhimānataṇhāmaññānaṃ dassetvā idāni paravasena dassetuṃ “**yadā panā**”tiādi vuttaṃ. Tattha **assāti** parassa. **Tadāti** paravasena maññānāyaṃ. **Diṭṭhimaññānā eva yujjati** tattha niccābhinivesādayo sambhavantīti katvā. Avadhāraṇena mānataṇhāmaññānā nivatteti. Na hi “seyyohamasmi”tiādinā, “mayha”nti ca pavattalakkhaṇā mānataṇhā parasmim parassa santakabhāvena gahite ca pavattantīti adhippāyo. **Itarāyopīti** mānataṇhāmaññānāyopi. **Ichanti** atthakathācariyā. Parassapi hi pathavīsannissayena sampattiissariyādikassa vasena attani seyyādibhāvaṃ dahato paṇidāhato ca cittaṃ tathābhāvāya mānataṇhāmaññānā sambhavantīti ācariyānaṃ adhippāyo. “Paro pathavī parassa pathavī”ti etthāpi ime dve pakārā sādhippāyā niddhāretabbā.

“Pathavito sañjānāti”ti, “ādito”ti ca ādīsu anissakkavacanepi to-saddo diṭṭhoti āha “**pathavitoti nissakkavacana**”nti. **Saupakaraṇassāti** hiraññasuvaṇṇagatassa dāsaporisādinā vittupakaraṇena saupakaraṇassa, attano vā parassa vā tesam upakaraṇassa vāti attho. **Yathāvuttappabhedatoti** lakkhaṇādi ajjhātikādivuttappakāravibhāgato. **Uppattiṃ vā niggamaṇaṃ vāti** “taṃ aṇḍaṃ ahosi hemamaṃ, tasmim sayam brahmā uppanno”ti brahmaṇḍavādavasena vā “dvīhi aṇūhi dviaṇuka”nti evaṃ pavattaṇḍavādavasena vā pathavito uppattiṃ vā “sabboyam loko issarato viniggato”ti issaravādavasena issarakuttato pathavito niggamaṇaṃ vā maññāmanoti yojanā. **Pathavito vā añño** āpādiko attāti adhippāyo. Ettha ca purimasmiṃ atthavikappe kārakalakkhaṇaṃ nissakkavacanaṃ, dutiyasmiṃ upapadalakkhaṇanti daṭṭhabbaṃ. Attano pariggahabhūtapathavito sukhappattiṃ tato eva ca parehi seyyādibhāvaṃ kappentassa vasenapettha **taṇhāmānāmaññānā** veditabbā. **Apāreti** sārāsamāsācariyā. **Tato aññaṃ appamāṇaṃ attānaṃ gahetvāti** pubbe bhāvitaāpādiappamāṇakasiṇavasena vā kāpilakāṇādadiṭṭhivasena vā appamāṇaṃ byāpinaṃ attānaṃ gahetvā. **Pathavitoti** pacchā abhāvitaavaḍḍhitapathavīkasiṇasaṅkhātāpathavito. **Bahiddhāpi me attāti** ito pathavito bahipi me attāti adhippāyo.

**Kevalanti** anavasesaṃ. **Mahāpathaviṃ taṇhāvasena mamāyati**, ayañca nayo catudīpissariye ṭhitassa dīpacakkavattino ca labbheyya, maṇḍalikaṛājamahāmattakuṭumbikānampi vasena labbhateva tesampi yathāpariggahaṃ anavasesetvā maññānāya sambhavato. “Evaṃ mamā”ti gāhassa “esohamasmiṃ, eso me attā”ti gāhavidhūrātāya vuttaṃ “**ekā taṇhāmaññānā eva labbhāti**”ti. **Iminā nayenāti** vuttamatidesaṃ vibhāvetuṃ “**sā cāya**”ntiādi vuttaṃ. Tattha **sā cāyanti** sā ca ayaṃ taṇhāmaññānā yojetabbāti sambandho. Yathā pana diṭṭhimaññānāmaññīte vatthusmiṃ sinehaṃ mānañca uppādayato taṇhāmānāmaññānā sambhavanti, evaṃ taṇhāmaññānāmaññītena vatthunā attānaṃ seyyādito dahato tañca attaniyaṃ niccaṃ tathā taṃsāmibhūtaṃ attānañca parikkappentassa itaramaññānāpi sambhavantīti sakkā viññātuṃ. “Me”ti hi iminā atthaggahaṇamukheneva attaniyasambandho pakāsīyatīti.

**Abhinandatīti** iminā taṇhādiṭṭhābhinivesānaṃ saṅgahitattā te dassento “**assādeti parāmasati cā**”ti āha. Diṭṭhivippayuttacittupādavasena cetassa dvayassa asaṅkarato pavatti veditabbā,

ekacittuppādepi vā adhipatidhammānaṃ viya pubbābhisankhāravasena tassa tassa balavabhāvena pavatti. **Etasmiṃ attheti** taṇhādīṭṭhivasena abhinandanatthe. **Etanti** “pathaviṃ abhinandati”ti etaṃ padaṃ. Yesaṃ vineyyānaṃ yehi pakāravisesehi dhammānaṃ vibhāvane kate visesādhigamo hoti, tesam tehi pakāravisesehi dhammavibhāvanaṃ. Yesaṃ pana yena ekeneva pakārena dhammavibhāvane kate visesādhigamo hoti, tesampi taṃ vatvā dhammissaratāya tadaññaniravasesappakāravibhāvanañca **desanāvīlāso**. Tenāha “**pubbe maññanāvasena kilesuppattiṃ dassetvā idāni abhinandanāvasena dasseto**”ti. **Dhammadhātuyāti** sammāsambodhiyā. Sā hi sabbañeyyadhammaṃ yathāsabhāvato dhāreti upadhāreti, sakalañca vineyyasattasankhātadhammappabandhaṃ apāyadukkhasaṃsāradukkhapatanato dhāreti, sayañca aviparītapavattiākārā dhātūti dhammadhātūti idhādhippetā. Sabbaññūtaññānapadaṭṭhānañhi maggaññānaṃ, maggaññānapadaṭṭhānañca sabbaññūtaññānaṃ sammāsambodhīti. **Suppaṭividdhattāti** suṭṭhu paṭividdhabhāvato, sammā adhigatattāti attho. Abhikañkhanasampaggahaparāmasanānaṃ vasena ārammaṇe parikkappanāpavatti maññanā. Tattha “mamaṃ, aha”nti ca abhinivesanaṃ **parikkappanaṃ**. Yena ajjhosānaṃ hoti, ayaṃ **abhinandanāti** ayametesam viseso. Suttādiaviruddhāyeva attanomati icchitabbā, na itarāti suttana tassā saṅghaṃ dassetuṃ “**vuttañceta**”ntiādi vuttaṃ. Desanāvīlāsavibhāvanaṃ pana sahetukahetusampayuttadukādidesanāya nibaddhatā niddhāretabbā.

**Tassāti** tena. Ñātasaddasambandhena hetam kattari sāmivacanaṃ. **Tasmāti** apariññātattā. “Apariññāta”nti paṭikkhepamukhena yaṃ parijānaṃ vuttaṃ, taṃ atthato tividhā pariññā hotīti taṃ sarūpato pavattiākārato ca vibhāvato “**yo hi**”tiādimāha.

Tattha yāya paññāya vipassanābhūmiṃ parijānāti paricchindati, sā parijānanapaññā **ñātapariññā**. Sā hi tebhūmakadhammajātaṃ “ayaṃ vipassanābhūmi”ti ñātaṃ viditaṃ pākataṃ karontīyeva lakkhaṇarasādīto ajjhattikādivibhāgato ca paricchijja jānāti. Idha pana pathavīdhātuvasena veditabbāti vuttaṃ “**pathavīdhātuṃ parijānāti**”tiādi. **Tīraṇapariññāti** kīraṇavasena parijānanakapaññā. Sā hi parivārehi aniccatādiākārehi aniccatādisabhāvassa upādānakkhandhapañcakassa tīraṇavasena sammasanavasena taṃ paricchijja jānāti. **Aggamaggenāti** arahattamaggena. So hi anavasesato chandarāgaṃ pajahati. **Aggamaggenāti** vā aggabhūtena maggena, lokuttaramaggenāti attho. Ubhayathāpi hi samucchadapahānakārī eva paññā nippariyāyena pahānapariññāti dasseti.

**Nāmarūpavavattānanti** etena paccayapariggahopi saṅghatoti daṭṭhabbo nāmarūpassa hetuvavattānabhāvato. Sopi hi hetupaccayamukhena nāmarūpassa vavattānamevāti. Kalāpasammasanādivasena **tīraṇapariññā** aniccādivasena sammasanabhāvato. **Tasmāti** yasmā tā pariññāyo natthi, tasmā. Atha vā **tasmā apariññātattāti** yasmā apariññātā pathavī, tasmā apariññātattā pathaviyā taṃ pathaviṃ maññati ca abhinandati cāti.

Pathavīvāraṇṇanā niṭṭhitā.

### Āpovārādivaṇṇanā

**Āpaṃ āpatoti** ettha appoti, appāyatīti vā **āpo**, yasmim saṅghāte sayam atthi, taṃ ābandhanavasena byāpetvā tiṭṭhati, paribrūhetīti vā attho. Atthānaṃ adhi **ajjhattaṃ**. Pati pati attānanti **paccattaṃ**. Ubhayenapi sattasantānapariyāpannameva vadati. **Āpo āpogata**ntiādisu ābandhanameva **āpo**, tadeva āposabhāvaṃ gatattā **āpogataṃ**, sabhāveneva āpabhāvaṃ pattanti attho. Sinehanavasena **sineho**, soyeva sinehanasabhāvaṃ gatattā **sinehagataṃ**. **Bandhanattaṃ rūpassāti** avinibbhogarūpassa bandhanabhāvo, avippakiraṇavasena sampiṇḍananti attho. **Uggaṇhantoti** yathāparicchinne āpomaṇḍale yathā uggaṇhantoti upalabbhati, tathā nimittaṃ gaṇhanto. **Vuttoti** “āpasmi”nti ettha vuttaāpo. So hi sasambhāraāpo, na “āpokasiṇa”nti ettha vuttaāpo. **Sesanti** ārammaṇasammutiāpanaṃ sarūpavibhāvanaṃ. “Āpaṃ āpato pajānāti”tiādi pālīyā atthavibhāvanañceva tattha tattha maññanāvibhāgadassanañca **pathaviyaṃ vuttasadisamevāti**. Tattha “pathavīkasiṇameko sañjānāti”tiādinā (dī. ni. 3.360; a. ni. 10.25) vuttaṃ, idha “āpokasiṇameko sañjānāti”tiādinā vattabbaṃ.

Tattha ca “pathavīti sañjānātī”ti vuttam, idha pana “āpoti sañjānātī”tiādīnā vattabbanti evamādi eva viseso. Sesam tādīsameva. Tena vuttam “pathaviyam vuttasadisamevā”ti. Yo panettha viseso, tam dassetum “kevala”ntīādi vuttam. Tattha **mūlarasoti** mūlam paṭicca nibbattaraso. **Khandharasādīsipi** eseve nayo. **Khīrādīni** pākāṭāneva. Yathā pana bhesajjasikkhāpade (pārā. 618-625), na evamidha niyamo atthi. Yam kiñci khīram **khīrameva**. Sesesupi eseve nayo. **Bhummānīti** āvāṭādīsū thītaudakāni. **Antalikkhānīti** pathaviyam appattāni vassodakāni, pattāni pana bhummāneva. **Evam vuttā cāti ca-**saddena himodakakappavināsakaudakapathaviyāantoudakapathaviśandhārakaudakādīyam pubbe avuttampi samuccinoti.

**Tejam tejatoti** ettha tejanaṭṭhena **tejo**, tejanam nāma dahanapacanādisamattham nisānam, yam uṇhattanti vuccati. **Yena cāti** yena tejogatena kupitena. **Santappatīti** ayam kāyo samantato tappati ekāhikajarādībhāvena usumajāto hoti. **Yena ca jīriyatīti** yena ayam kāyo jīriyati, indriyavekallatam balaparikkhayam valitādībhāvañca pāpuṇāti. **Yena ca pariḍayhatīti** yena kupitena ayam kāyo parito ḍayhati, so ca puggalo ḍayhāmīti satadhotasappigosītacandanādīlepañceva tālavaṇṭavātañca paccāsīsati. **Yena ca asitapītakhāyitasāyitam sammā pariṇāmam gacchatīti** yena asitam vā odanādi, pītam vā pānakādi, khāyitam vā piṭhakhajjakādi, sāyitam vā ambapakkamadhuḥphāṇitādi sammadeva paripākam gacchati, rasādībhāvena vivekam gacchati attho. Ettha ca sarīrassa pakatiusumam atikkamivā uṇhabhāvo **santāpo**, sarīradahanavasena pavatto mahādāho **paridāho**, satavāram tāpetvā udake pakkhipitvā uddhatasappi **satadhotasappi**, rasarudhiramamsamedaaṭṭhiatṭhimiñjasukkā **rasādāyo**. Tattha purimā tayo teja catusamuṭṭhānā, pacchimo kammamuṭṭhānova.

Tejobhāvam gatattā **tejogataṃ**. **Usmāti** uṇhākāro. Usmāva usmābhāvam gatattā **usmagataṃ**. **Usumanti** caṇḍausumam. Tadeva **usmagataṃ**, sabhāveneve usmābhāvam pattanti attho. **Kaṭṭhaggīti** kaṭṭhupādāno aggi. **Sakalikaggīti** eseve nayo. **Saṅkāraggīti** kacavaram paṭicca uppannaaggi. **Indaggīti** asaniaggi. **Santāpoti** jālāya vā vītaccitaṅgārānam vā santāpo. **Sūriyasantāpoti** ātāpo. **Kaṭṭhasannicayasantāpoti** kaṭṭharāsim paṭicca uppannasantāpo. Sesesupi eseve nayo. **Evam vuttā cāti**. **Ca-**saddena petaggikappavināsakagginirayaggiādīke avuttepi samuccinoti.

**Vāyam vāyatoti** ettha vāyanatṭhena **vāyo**. Kimidaṃ vāyanam nāma? Vitthambhanam, samudīraṇam vā, vāyanam gamananti eke. **Uddhaṅgamā vātāti** uggārahikkādīpavattakā uddham ārohanavātā. **Adhogamā vātāti** uccārapassāvādīnīharaṇatā adho orohanavātā. **Kucchisayā vātāti** antānam bahivātā. **Koṭṭhāsayā vātāti** antānam antovātā. **Aṅgamaṅgānusārino vātāti** dhamanījālānusārena sakalasarīre aṅgamaṅgāni anusaṭṭa samiñjanapasāraṇādīnībbattakā vātā. **Satthakavātāti** sandhibandhanāni kattariyā chindantā viya pavattavātā. **Khurakavātāti** khurena viya hadayamaṃsachedanaphālanakavātā. **Uppalakavātāti** hadayamaṃsassa samuppāṇanakavātā. **Assāsoti** antopavisanakanāsikāvāto. **Passāsoti** bahinikkhamananāsikāvāto. Ettha ca purimā sabbe catusamuṭṭhānā, assāsapassāsā cittasamuṭṭhānāva.

**Vāyogatanti** vāyova vāyogataṃ, sabhāveneve vāyobhāvam pattanti attho. **Thambhitattam rūpassāti** avinibbhogarūpassa thambhitabhāvo. **Puratthimā vātāti** puratthimadisato āgatā vātā. **Pacchimādīsipi** eseve nayo. **Sarajādīsū** saha rajena **sarajā**, rajavirahitā suddhā **arajā**. Sītautusamuṭṭhānā, sītavalāhakantare vā jātā **sītā**. Uṇhautusamuṭṭhānā, uṇhavalāhakantare vā jātā **uṇhā**. **Parittāti** mandā tanukavātā. **Adhimattāti** balavavātā. **Kālāti** kālavalāhakantare samuṭṭhitā. Yehi abbhāhato chavivaṇṇo kālako hoti, tesam etaṃ adhivacantipi eke. **Verambhavātāti** yojanato upari vāyanavātā. **Pakkhavātāti** antamaso makkhikāyapi pakkhāyūhanavātā. **Supaṇṇavātāti** garuḷavātā. Kāmaṃ cetepi pakkhavātāva, ussadasena pana visum gahitā. **Tālavaṇṭavātāti** tālavaṇṭhehi katena, aññehi vā katena kenaci maṇḍalasaṅṭhānena samuṭṭhāpitavātā. **Vidhūpanavātāti** bījanapattakena samuṭṭhāpitavātā. Imāni ca tālavaṇṭavidhūpanāni anuppannampi vātam uppādentī, uppannampi parivattenti. Idhāpi **ca-**saddo udakasandhārakavātakappavināsakavātājālāpellanakavātādīke avuttepi samuccinoti. Ettha ca “āpam maññatī”tiādīsū yasmā tīhi maññānāhi – “āham āpoti maññati, mama āpoti maññatī”tiādīnā pathavīvāre vuttanayena sakkā maññānāvībhāgo vibhāvetunti vuttam “**sesam**

**vuttanayamevā**”ti. Tasmā tattha vuttanayānusārena imesu tīsu vāresu yathārahaṃ maññānāvibhāgo vibhāvetabbo.

**Ettāvātā**ti ettakena iminā catuvārāparimāṇena desanāvīsesena. **Ca**-saddo byatireko. Tena vakkhamānaṃyeva viśesaṃ joteti. **Yvāyanti** yo ayaṃ lakkhaṇo nāma hāro vuttoti sambandho. So pana lakkhaṇahāro yaṃlakkhaṇo tattha vutto, taṃ dassetuṃ “**vuttamhi**”tiādi vuttam. Tattha **vuttamhi ekadhammeti** kusalādīsu khandhādīsu vā yasmim kasmīñci ekadhamme sutte sarūpato niddhāraṇavasena vā kathite. **Ye dhammā ekalakkhaṇā tenāti** ye keci dhammā kusalādibhāvena, rūpakkhandhādibhāvena vā tena vuttadhammena samānalakkhaṇā. **Vuttā bhavanti sabbeti** sabbepi kusalādīsabhāvā, khandhādīsabhāvā vā dhammā sutte avuttāpi tāya samānalakkhaṇatāya vuttā bhavanti, ānetvā saṃvaṇṇanavasenāti adhippāyo.

**Ettha ca ekalakkhaṇāti** samānalakkhaṇā vuttā. Tena saha-caritā samānakiccatā samānahetutā samānaphalatā samānārammaṇatāti evamādīhipi avuttānaṃ vuttānaṃ viya niddhāraṇaṃ veditabbam. **Itīti** iminā pakārena. Tenāha “**evaṃ nettiyaṃ lakkhaṇo nāma hāro vutto**”ti, **nettipāliyaṃ** (netti. 23) pana “ye dhammā ekalakkhaṇā keci so hāro lakkhaṇo nāmā”ti pāḥo āgato. **Tassa vasenāti** tassa lakkhaṇahārassa vasena. **Rūpalakkhaṇaṃ anātītattāti** ruppanasabhāvena samānasabhāvattā. **Vadantena** bhagavatā. **Etāti** “rūpaṃ attato samanupassatī”ti evaṃ vuttadiṭṭhī. Ettha ca **sakkāyadīṭṭhimaññānādassaneneva** sakalarūpavatthukā taṇhāmānāmaññānāpi dassitā evāti daṭṭhabbam. Tathā hi vuttam “tasmiṃyeva panassa diṭṭhimaññānāya maññite vatthusmiṃ sineham mānañca uppādayato taṇhāmānāmaññānāpi veditabbā”ti. Atha vā pathaviṃ āpaṃ tejaṃ vāyaṃ meti maññati abhinandatīti ca vadantena vuttanayeneva sakalarūpavatthukā taṇhāmaññānā tadanusārena mānāmaññānāpi vuttāva hotīti evampettha itaramaññānāpi niddhāretabbā.

Āpovārādivaṇṇanā niṭṭhitā.

### Bhūtavārādivaṇṇanā

3. “Pathaviṃ maññati, pathaviyā maññati”tiādīhi padehi “rūpaṃ attato samanupassati, rūpasmim attānaṃ samanupassatī”tiādīnaṃ sakkāyadīṭṭhīnaṃ niddhāritattā vuttam “**evaṃ rūpamukhena saṅkhāravatthukam maññanam vatvā**”ti. **Tesu saṅkhāresu sattesupīti** tadupādānesupi sattesu. **Dhātūsūti** pathavīādīsu catūsu dhātūsū. “Jātam bhūtam saṅkhata”ntiādīsu (dī. ni. 2.207; saṃ. ni. 5.379) bhūta-saddo uppāde dissati, saupasaggo pana “pabhūtamariyo pakaroti puñña”ntiādīsu vipule, “yebhuyyena bhikkhūnaṃ paribhūtarūpo”tiādīsu hiṃsane, “sambhūto sāṇavāsī”tiādīsu (cūlava. 450) paññattiyam, “abhibhūto māro vijito saṅgāmo”tiādīsu vimathane, “parābhūtarūpo kho ayaṃ acelo pāthikaputto”tiādīsu (dī. ni. 3.23, 25, 31, 32) parājaye, “anubhūtam sukhadukkha”ntiādīsu vediyane, “vibhūtam vibhāvitaṃ paññāyā”tiādīsu pākāṭikaraṇe dissati. Te sabbe **rukkhādīsūti**. **Ādi**-saddena saṅgahitāti daṭṭhabbā. “Kālo ghasati bhūtānīti (jā. 1.2.190), bhūtā loka samussaya”nti (dī. ni. 2.220; saṃ. ni. 1.186) ca ādīsu avīsesena sattavācakopi bhūtasaddo, upari devādīpadehi sattavīsesānaṃ gahitattā idha tadavasiṭṭhā bhūtasaddena gayhantīti āha “**no ca kho avīsesenā**”ti. Tenevāha – “**cātumahārājikānañhi heṭṭhā sattā idha bhūtāti adhippetā**”ti. Yo hi sattanikāyo paripuṇṇayoniko catūhipi yonīhi nibbattanāraho, tatthāyaṃ bhūtasamaññā aṇḍajādivasena bhavanato.

**Bhūte**ti vuttadesaādesite bhūte. **Bhūtato sañjānātīti** iminā “bhūtā”ti lokavohāraṃ gahetvā yathā tattha taṇhādīmaññānā sambhavanti, evaṃ viparītasaññāyā sañjānaṃ pakāsīyati. Svāyamatto heṭṭhā “pathavito sañjānātī”ti ettha vuttanayānusārena sakkā jānitunti āha “**vuttanayamevā**”ti. Yathā suddhāvāsā sabbadā abhāvato imaṃ desanaṃ nārulhā, evaṃ nerayikāpi sabbamaññānānadhīṭṭhānato. Eteneva ekaccapetānampettha asaṅgaho daṭṭhabbo. Apare pana “diṭṭhimaññānādhīṭṭhānato tesampettha saṅgaho icchitoyevā”ti vadantī. “Samaṅgibhūtam paricārenta”ntiādīnā sutte **vuttanayena**. **Rajjatīti** “subhā sukhitā”ti vipallāsaggāhena tattha rāgaṃ janeti. Evamettha rajjanto ca na kevalam dassanavaseneva, savanādivasenāpi rajjatevāti dassento “**divāpi...pe... utvāpi**”ti āha. Tattha

ghāyanādivasena rajjanam tehi anubhūtagandhamālādivasena ceva visabhāgavattubhūtānam tesam paribhogavasena ca yathānubhavam anussaraṇavasena ca veditabbam. **Evam bhūte taṇhāmaññānāya maññatī** vuttanayena bhūte paṭicca chandarāgam janento tesam paṭipattiṃ assādentō abhinandanto abhivadanto ajjhosāya tiṭṭhanto “īdisī avatthā mama anāgatamaddhānam siyā” tiādīnā vā pana nayena tattha nandiṃ samannāento bhūte taṇhāmaññānāya maññatīti attho. **Appaṭiladdhassa** khattiyamahāsālādibhāvassa, **sampattiṃ vipattinti** jātivāsena ukkaṭṭanihīnatam. **Dahatīti** ṭhapeti. **Yo evarūpo mānoti** yo eso “ayaṃ pubbe mayā sadiso, idāni ayaṃ seṭṭho ayaṃ hīnataro” ti uppanno māno. **Ayaṃ vuccati mānātimānoti** ayaṃ bhārātibhāro viya purimaṃ sadisamānam upādāya mānātimāno nāmāti attho.

**Niccā**tiādīsu upādābhāvato **niccā**, maraṇābhāvato **dhuvā**, sabbadā bhāvato **sassatā**. Aniccaṭṭipakkhato vā **niccā**, thirabhāvato **dhuvā**, sassatisamatāya **sassatā**, jarādivasena vipariṇāmassa abhāvato **vipariṇāmadhammā**ti maññati. **Sabbe sattā**ti oṭṭhagoṇagadrabhādayo anavasesā sañjanatṭhena sattā. **Sabbe paṇā**ti “ekindriyo pāṇo dvindriyo pāṇo” tiādīvasena vuttā anavasesā pāṇanatṭhena **pāṇā**. **Sabbe bhūtā**ti anavasesā aṇḍakosādīsu bhūtā sañjātāti **bhūtā**. **Sabbe jīvā**ti sāliyavagodhūmādayo anavasesā jīvanatṭhena **jīvā**. Tesu hi so virūhabhāvena jīvasaṇṇī. **Avasā abalā avīriyā**ti tesam attano vaso vā balaṃ vā vīriyaṃ vā natthīti dasseti. **Niyatisaṅgatibhāvapariṇatā**ti ettha **niyatī**ti. **Niyatatā**, acchejjasuttāvutaabhejjamaṇi viya avijahitapakatitā. **Saṅgatī**ti channaṃ abhijātīnaṃ tattha saṅgamo. **Bhāvoti** sabhāvoyeva, kaṇḍakānaṃ tikhiṇatā, kapiṭṭhaphalādīnaṃ parimaṇḍalādītā, migapakkhīnaṃ vicittavaṇṇādītāti evamādiko. Evaṃ niyatīyā ca saṅgatiyā ca bhāve ca pariṇatā nānappakāratam pattā. Yena hi yathā bhavitabbam, so tatheva bhavati. Yena na bhavitabbam, so na bhavatīti dasseti. **Chasvevābhijātīsū**ti kaṇhābhijātīādīsu chasu eva abhijātīsu ṭhatvā sukhaṅca dukkhaṅca paṭisaṃvedenti, aññā sukhadukkhabhūmi natthīti dasseti. **Vā**-saddena antādibhede diṭṭhābhīnivese saṅgaṇhāti.

**Upapattinti** iminā tasmim tasmim sattanikāye bhūtānaṃ saḥabyatam ākaṅkhatīti dasseti. **Sukhuppattinti** iminā pana tattha tattha uppanassa sukhuppattiṃ. **Ekacce bhūte niccā**tiādīnā ekaccasassatikadiṭṭhiṃ dasseti. **Ahampi bhūtesu aññatarosmī**ti iminā pana catuttham ekaccasassatikavādam dasseti.

**Yato kutocī**ti issarapurisādibhedato yato kutoci. **Ekā taṇhāmaññānāva labbhatī**ti idhāpi heṭṭhā vuttanayena itaramaññānānampi sambhavo niddhāretabbo. Vuttappakāreyeva bhūte taṇhādiṭṭhīhi abhinandatītiādīnā vattabbattā āha “vuttanayamevā” ti. **Yojanā kātabbā**ti “yo bhūtapaññattiyā upādānabhūte khandhe pariṇānāti, so tīhi pariññāhi pariṇānāti” tiādīnā yojanā kātabbā. Apare panettha bhūtagāmpopi bhūta-saddena saṅgahitoti rukkhādivasenaṃ maññānāvibhāgam yojetvā dassenti, tathā mahābhūtavasenaṃ, tam **aṭṭhakathāyam** natthi.

**Bhūmivisesādinā bhedenā**ti bhūmivisesaupapattivisesādivibhāgena. **Iddhiyā**ti puññavisesanibbattena ānubhāvena. Kiñcāpi deva-saddo “viddhe vigatavalāhake deve” tiādīsu (saṃ. ni. 1.110; 3.102; 5.146-148; ma. ni. 1.486; a. ni. 10.15; itivu. 27) ajaṭākāse āgato, “devo ca thokaṃ thokaṃ phusāyati” tiādīsu meghe, “ayañhi deva kumāro” tiādīsu (dī. ni. 2.34, 35, 36) khattīye āgato, “pañcahi kāmagaṇehi samappito samaṅgibhūto paricāreti devo maññe” tiādīsu (dī. ni. 1.183; ma. ni. 2.211) viya idha upapattidevesu āgato, deva-saddena pana vattabbasatte anavasesato uddharitvā tato idhādhippete dassetuṃ “**te tividhā**” tiādī vuttam. **Sesā cha kāmāvacarā idha devāti adhippetā** itaresam padantarehi nivattitattāti adhippāyo. Bhūtā devāti gahitesu sattesu taṇhādīmaññānānam pavattākārenapi tividhalakkhaṇanti āha “**bhūtavāre vuttanayena veditabbā**” ti.

“Aññatarassa upāsakassa pajāpati abhirūpā hotī” tiādīsu (pārā. 168) **pajāpati**-saddo gharāṇiyam āgato, “pajāpati kāmādayī suvaṇṇavaṇṇā me pajā hotū” tiādīsu diṭṭhigatikaparikkappite, “pajāpatissa devarājassa dhajaggaṃ ullokeyyāthā” tiādīsu (saṃ. ni. 1.249) devajetṭhake, idha pana adhipatīti vadanti, tam upari brahmuno gayhamānattā tesam matimattam. **Devānanti** cātumahārājikādivēvaṇam.



**Mahārājādīnanti ādi**-saddena sakkasuyāmasantussitasunimmitavasavattino gahitā. **Tesanti** mahārājādīnaṃ. **Sattasaṅkhātāyāti** kāmabhūmiyaṃ sattasaṅkhātāya. **Pajāpatinti** pajāpatibhāvaṃ. Pajāpatibhāvena hi mānaṃ jappento pajāpatiṃ mānamaññanāya maññatīti vutto.

**Ekā diṭṭhimaññanāva yujjati** vuttaṃ, pajāpatino pana samipataṃ salokataṃ vā ākaṅkhatō, tathābhāvāya cittaṃ paṇidahato, tathāladdhabbāya sampattiyā attano seyyādibhāvaṃ dahato ca taṇhāmānamaññanāpi sambhavantīti sakkā viññātuṃ. **Ye ca dhammāti** āyuvanṇādi ke vadati. **Pajāpatinti** etthāpi heṭṭhā vuttanayena itaramaññanānampi sambhavo vedītabbo.

**Brūhitoti** parivuddho. **Guṇavisesehīti** jhānādīhi viṣiṭṭhehi guṇehi uttarimanussadhammatāya. Brahma-saddassa satīpi avisesato viṣiṭṭhavācakatte yattha yattha panassa guṇavisesayuttādirūpā pavatti, taṃ dassetuṃ “**apicā**”tiādi vuttaṃ. **Sahassoti** sahasīyā lokadhātuyā adhipatibhūto. **Paṭhamābhiniḅbattoti** paṇītena paṭhamajhānena nibbato, paṭhamajjhānabhūmiyaṃ vā paṭhamamābhiniḅbattoti. **Gahitāti vedītabbā** padhānaggahaṇena appadhānānampi kenaci sambandhena gahitabhāvasiddhito. Ettha ca **brahmāti** mahābrahmā adhippeto. So hi vaṇṇavantatāya ceva dīghāyukatāya ca brahmapārisajjādīhi mahanto brahmāti **mahābrahmā**, tassa pana purohitatṭhāne ṭhitāti **brahmapurohitā**, parisāyaṃ bhavā paricārakāti **brahmapārisajjāti** vedītabbā. Ukkaṭṭhekapuggalabhāvato pajāpatismiṃ viya brahmani maññanā vattatīti vuttaṃ “**pajāpativāre vuttanayeneva vedītabbā**”ti. **Tathā hi bahupuggalabhāvasāmaññato ābhassaravārādīnaṃ bhūtavārasadisatā vuttā.**

Yathāvuttapabhāya ābhāsanāsīlā vā **ābhassarā**. **Ekatalavāsīnoti** idaṃ jhānantarabhūmīnaṃ viya heṭṭhupariḅbhāvābhāvato vuttaṃ, ṭhānāni pana nesam paricchinnāneva. Ābhassarehi parittā ābhā etesanti **parittābhā**. **Appamāṇā ābhā etesanti appamāṇābhā.**

**Subhāti** sobhanā pabhā. Kañcanapiṇḍo viya sassirikā **kañcanapiṇḍasassirikā**. Tattha sobhanāya pabhāya kiṇṇā subhākiṇṇāti vattabbe bhā-saddassa rassattaṃ, antīma-ṇa-kārassa ha-kāraṇca katvā “**subhākiṇṇā**”ti vuttā. **Subhāti** ca ekagghanā niccalā pabhā vuccati, parittā subhā etesanti **parittasubhā**. **Appamāṇā subhā etesanti appamāṇasubhā.**

**Vipulaphalāti** vipulasantasukhāyuvanṇādīphalā.

Satīpi devabrahmādīnaṃ puññaphalena jhānaphalena ca paṭipakkhābhībhavē yesam pana puthujjanaasaññasattesu abhībhūvohāro pākaṭo nīruḷho ca, tesam vasenāyaṃ desanā pavattatīti dassento āha “**asaññābhavassetam adhivacana**”nti. Yathā pajāpativāre “idhekacco pajāpatismiṃyevā”tiādinā maññanāpavatti dassitā, tathā idhāpi taṃ dassetuṃ sakkāti āha “**sesam pajāpativāre vuttanayamevā**”ti.

Bhūtavārādīvaṇṇanā niṭṭhitā.

**Ākāsānañcāyatanavārādīvaṇṇanā**

4. Evaṃ sattavasena bhūmikkamadassane suddhāvāsānaṃ aggahaṇe kāraṇaṃ niddhārento “**evaṃ bhagavā**”tiādimāha. Tattha **anāgāmikhīṇāsavāti** anāgāmīno ca khīṇāsavā ca. Kiñcāpi suddhāvāsā attheva anekakappasahassāyukā, ukkaṃsaparicchato pana soḷasakappasahassāyukāva, na tato paranti āha “**katipayakappasahassāyukā**”ti. Kāmarūpabhavesu pavattamānāpi ākāsānañcāyatanādīdhammā arūpāvacarabhāvato taṃbhūmikavohāraṃ na labhantīti “**tatrūpapannāyevā**”ti avadhāretvā vuttaṃ. **Abhībhūvāre vuttanayena vedītabbā** yathārahanti adhippāyo. Na hettha vaṇṇavantatādi sambhavatīti. **Pajāpativāre vuttanayenāti** ettha “ahamasmi arūpo pahīnarūpapaṭiḅghasañño”tiādinā mānamaññanā vedītabbā.

Ākāsānañcāyatanavārādivaṇṇanā niṭṭhitā.

### Diṭṭhasutavārādivaṇṇanā

5. Rūpamukhena maññānāvattudassanaṃ saṅkhepoti katvā vuttaṃ “**vitthāratopi**”ti. Tampi hi “yatha neva pathavī, na āpo, na tejo, na vāyo, na ākāsānañcāyatana”ntiādiggaṇaṃ viya saṅkhepato pañcavokārabhavadassanaṃ hotīti.

**Diṭṭhanti** yaṃ cakkhudvārena katadassanakiriyāsamāpanaṃ, yañca cakkhu dvayaṃ passaṭṭi passissati sati sambhave passeyya, taṃ sabbakālanti visesavacanicchāya abhāvato diṭṭhanteva vuttaṃ yathā “duddha”nti. Tenāha “**rūpāyanassetam adhivacana**”nti. Ayañca nayo **sutā**dīsipi yojetabbo. **Sattāti** rūpādīsū satta visattāti satta. Sañjanaṭṭhena sāmāññasaddopi cesa satta-saddo “itthirūpe”ti visayavisesitattā idha purisavācako daṭṭhabbo. **Rattāti** vatthaṃ viya raṅgajātena cittassa vipariṇāmakārakena chandarāgena rattā sārattā. **Giddhāti** abhikaṅkhanasabhāvena abhigijjanena giddhā gedhaṃ āpannā. **Gadhītāti** ganthitā viya lobhena dummocanīyabhāvena ārammaṇe paṭibaddhā. **Mucchītāti** kilesavasena visaññībhūtā viya anaññakiccā mucchaṃ mohaṃ āpannā. **Ajjhosannāti** visaye aññasādhāraṇe viya katvā gilivā pariniṭṭhāpetvā viya ṭhitā. **Imināti** suvaṇṇavaṇṇādīākārena. **Maṅgalaṃ amaṅgalanti** īdisaṃ diṭṭhaṃ maṅgalaṃ, īdisaṃ amaṅgalanti. **Rūpasmim attānaṃ samanupassanāyena**nti idaṃ vedanādiarūpadhamme, rūpāyanavinimuttasabbadhamme vā attato gahetvā tato ajjhātikāṃ, bāhiraṃ vā rūpāyanaṃ tassokāsabhāvena parikappetvā “so kho pana me ayaṃ attā imasmim rūpāyane”ti maññanto diṭṭhasmim maññatīti imaṃ nayaṃ sandhāya vuttaṃ. “Pathavito maññatī”tiādīsū yathā “saupakaraṇassa attano vā parassa vā”tiādimaññānāpavatti dassitā, evaṃ “diṭṭhato maññatī”tiādīsū sakkā taṃ dassetunti āha “**tesaṃ pathavīvāre vuttanayeneva veditabba**”nti.

**Āhaccāti** visayaṃ anvāya, patvāti attho. Tenāha “**upagantvā**”ti. **Aññamaññasaṃsileseti** cakkhurūpasotasaddā viya dure ahutvā aññamaññaṃ alliyane.

**Manasā viññātaṃ** kevalanti attho. Itarānipi hi manasā viññāyantīti. Sesehi sattahi āyatanehi paññattiyā asaṅgahitattā tampi saṅgahetvā dassetuṃ “**dhammārammaṇassa vā**”ti vuttaṃ. Dvīsipi vikappesu lokuttarānampi saṅgaho āpannoti āha “**idha pana sakkāyapariyāpannameva labbhatī**”ti. **Vitthāro**ti maññānānaṃ pavattanākāravittāro. **Etthāti** etesu sutavārādīsū.

Diṭṭhasutavārādivaṇṇanā niṭṭhitā.

### Ekattavārādivaṇṇanā

6. **Samāpannakavārenāti** samāpannakappavattiyā, rūpāvacarārūpāvacarajhānappavattiyāti attho. Sā hi ekasmimyeva ārammaṇe ekākārena pavattatīti katvā “ekatta”nti vuccati, evañca katvā vipākajjhānappavattipi idha samāpannakavāraggaṇeṇeva gahītāti daṭṭhabbā. **Asamāpannakavārenāti** kāmāvacaradhammappavattiyā. Upacārajjhānenapi hi cittaṃ na sammā **ekattaṃ** gatanti vuccatīti.

**Yojanāti** maññānāyojanā. **Bhinditvāti** vibhajitvā. **Sāsanaṇayena**nti pāḷinayena. Tattha “ekattaṃ maññatī”tiādīsū “vedanaṃ attato samanupassatī”tiādīnā nayena, “nānattaṃ maññatī”tiādīsū pana “rūpaṃ attato samanupassatī”tiādīnā nayena vuttavidhiṃ anugantvā maññānā veditabbā.

**Pathavīvārādīsū vuttana ca aṭṭhakathānāyena**nti “ahaṃ vedanāti maññati, mama vedanāti maññatī”tiādīnā, “ahaṃ rūpanti maññati, mama rūpanti maññatī”tiādīnā cāti attho. Tenāha “**yathānurūpaṃ vīmaṃsitvā**”ti, ekattanānattabhāvesu yo yojanānayo sambhavati, tadanurūpaṃ vicāretvāti attho. **Kecīti** abhayagirivāsino. **Apāreti** sārasamāsācariyā. Diṭṭhābhinivesaṃ vadantīti

sambandho. Puthujjanassa maññanā nāma sakkāyaṃ bhinditvāva yathāupaṭṭhitavisayavaseneva pavattatīti na tatha ayamekattanayo ayaṃ nānattanayoti vibhāgavaseneva, ekattasaññī attā hotītiādīsu ca attano ekattanānattasaññītā vuttā, na pana ekattaṃ nānattanti evaṃ pavattassa diṭṭhābhinivesassa ekattanānattabhāvoti evamettha tadubhayassa idha anadhippatabhāvo daṭṭhabbo.

Yaṃ yathāvuttaputhujjano anavasesato gaṇhanto gahetuṃ sakkoti, taṃ tassa anavasesato gahetabbataṃ upādāya “**sabba**”nti vuccatīti dassento “**tamevā**”ti āha, sakkāyasabbanti attho. Sabbasmimpi tebhūmakadhamme ādinavadassane asati nibbidābhāvato assādānupassanāya taṇhā vaḍḍhatevāti āha “**sabbaṃ assādentō sabbaṃ taṇhāmaññanāya maññatī**”ti. Vuttañhetuṃ bhagavatā – “saṃyojanīyesu, bhikkhave, dhammesu assādānupassino viharato taṇhā pavaḍḍhatī”ti (saṃ. ni. 2.53, 57). “Sabbamidaṃ mayā nimmita”nti tena nimmitamaññanāya attānaṃ seyyādito dahanto tena mānena nimmitaṃ maññatiyeva nāma nimmitamaññanāya vinā tathāmānupattiyā abhāvato ti āha “**attanā nimmitaṃ maññanto sabbaṃ mānāmaññanāya maññatī**”ti. **Sabbaṃ natthītiādīnā nāyena ti ādi-**saddena niyatīvādādi ke saṅgaṇhāti. **Mahā me attāti** iminā sabbato attano vibhūtipavattivādaṃ dasseti. “Sabbam sabbatthaka”nti diṭṭhivasena – “ahaṃ sabbasmiṃ mayhaṃ kiñcanaṃ palibodho sabbasmiṃ, paro sabbasmiṃ parassa kiñcanaṃ palibodho sabbasmi”ntiādīnā nāyena pettha maññanā sambhavatīti dassento āha “**sesaṃ pathavīvāre vuttanāyena veditabba**”nti. Apica “sabboyaṃ loko purisamayo”ti evaṃ diṭṭhiko purisasañkhātato sabbato, attano uppattiṃ vā niggamaṇaṃ vā maññanto diṭṭhimaññanāya sabbato maññati, tasmīyeva pana diṭṭhimaññanāya maññite vatthusmiṃ sinehaṃ mānañca uppādayato taṇhāmaññanā mānāmaññanā ca veditabbā. Taṃyeva pana sabbaṃ mayhaṃ attā kattā sāmīti vā maññanto “sabbaṃ me”ti maññati, tathāyaṃ diṭṭhitaṇhābhinandanāhi abhinandanto sabbaṃ abhinandatīti evaṃ pettha maññanānaṃ pavatti veditabbā.

**Tanti sakkāyaṃ.** Ukkāmsagatasukhasahitañhi khandhapañcakaṃ diṭṭhadhammanibbānavādī nibbānanti maññati, taṃ panatthato sakkāyoyevāti. **Ekadhāti** pañcavidhampi nibbānabhāvena ekajjhaṃ katvā vuttaṃ. **Yatoti** yasmā. **Pañcahi kāmagaṇehīti** manāpiyarūpādīhi pañcahi kāmakoṭṭhāsehi, bandhanehi vā. **Samappito** suṭṭhu appito allīno hutvā ṭhito. **Samaṅgibhūtoti** samannāgato. **Paricāretīti** tesu kāmagaṇesu kāmakoṭṭhāsesu yathāsukhaṃ indriyāni cāretī sañcāretī ito cito ca upaneti. Atha vā laḷati ramati kīḷati. Ettha dvidhā kāmagaṇā mānusakā ceva dibbā ca. Mānusakā ca mandhātukāmagaṇasadisā, dibbā paranimmitavasavattidevarājassa kāmagaṇasadisā. Evarūpe kāme upagatānañhi te diṭṭhadhammanibbānasampattiṃ paññapenti. Tenāha “**ettāvatā kho...pe... hotī**”ti. **Diṭṭhadhammoti** paccakkhadhammo vuccati, tatha tatha paṭiladdhattabhāvassetuṃ adhivacanaṃ, diṭṭhadhamme nibbānaṃ imasmiṃyeva attabhāve dukkhavūpasamanaṃ diṭṭhadhammanibbānaṃ. Paramaṃ uttamaṃ diṭṭhadhammanibbānanti **paramadiṭṭhadhammanibbānaṃ**, taṃ patto hotīti attho. **Pañcadhā āgatanti** yathāvuttakāmagaṇasukhassa ceva catubbidharūpāvacarajjhānasukhassa ca vasena pāḷiyaṃ pañcappakārena āgataṃ. **Nibbānaṃ assādentoti** paramaṃ sukhaṃ nissaraṇanti maññanāya assādentō.

“Imasmiṃ nibbāne patte na jāyati, na jīrati, na mīyatī”ti evampi **nibbānasmim maññati**. “Ito paraṃ paramassāsabhūtaṃ natthī”ti gaṇhanto **nibbānato maññati**. Tayidaṃ nibbānaṃ mayā adhiyataṃ, tasmā “**nibbānaṃ me**”ti **maññati**. Tatoyeva taṃ nibbānaṃ diṭṭhābhinandanāya abhinandati. Ayaṃ tāvettha **diṭṭhimaññanā**. Tasmīyeva pana diṭṭhimaññanāya maññite vatthusmiṃ sinehaṃ mānañca uppādayato **taṇhāmānāmaññanāpi** niddhāretabbā.

**Yādisoti** yathārūpo, yehi jegucchādisabhāvehi passitabboti attho. **Esāti** ayaṃ. Tenassa attano suṇantānañca paccakkhasiddhatamāha. Asubhādisabhāvena saha vijjānānaṃ rūpādīdhammānaṃ kāyo samūhoti **sakkāyo**, upādānakkhandhā. **Tathāti** tassa bhāvabhūtena paṭikūlatādippakārena. **Sabbamaññanāti** pathavīdi ke sarūpāvadhāraṇādivibhāgabhinne visaye pavattiyā anekavihitā sabbā taṇhāmaññanā.

**Jegucchoti** jigucchanīyo. Tenassa asubhājaññaduggandhapaṭikūlabhāvaṃ dasseti. **Siduroti** khāṇe

khāṇe bhijjanasabhāvo. Tenassa aniccaaddhuvakhayavayapabhaṅgurasabhāvaṃ dasseti. **Ayanti** sakkāyo. **Dukkhoti** na sukho. Tenassa kicchakasiṛābādhadukkhavuttitaṃ dasseti. **Apariṇāyakoti** pariṇāyakarāhito. Tenassa attasuññaasāravuttitaṃ dasseti. **Tanti** sakkāyaṃ. **Paccanikatoti** sabhāvapaṭipakkhato, subhaniccasukhaattāditoti attho. **Gaṇhanti** gaṇhanto, tattha subhādigāhasena abhinivisantoti attho.

Idāni tissopi maññanā upamāhi vibhāvetuṃ “**subhato**”tiādi vuttaṃ. Tattha yathā mahāpariḷāhe vipulānatthāvahe ca aggimhi salabhassa patanaṃ subhasukhasaññāya, evaṃ tādise sakkāye salabhassa taṇhāmaññanāti imamatthaṃ dasseti “**subhato...pe... taṇhāya maññanā**”ti iminā.

Gūthādī kīṭako gūtharāsīm laddhā asampannepi tasmim̐ sampannākāraṃ pavattayamāno attānaṃ ukkaṃseti, evamanekādīnave ekantabhedini sakkāye niccasaññaṃ upaṭṭhapetvā sampattimadena tattha bālo mānaṃ jappetīti imamatthamāha “**niccasaññaṃ...pe... mānena maññanā**”ti.

Yathā bālo muddhadhātuko sammūḷho koci ādāse attano paṭibimbaṃ disvā “ayaṃ maññe ādāsasāmiko, yadi ahamimaṃ gahetvā tiṭṭheyyaṃ, anatthampi me kareyyā”ti chaḍḍetvā palāyanto tattha avijjamānameva kiñci vijjamānaṃ katvā gaṇhi, tathūpamo ayaṃ bālo sakkāye attataniyagāhaṃ gaṇhantoti imamatthaṃ dīpeti “**attā...pe... diṭṭhiyā hoti maññanā**”ti iminā.

**Sukhumaṃ mārabandhanaṃ** vepacittibandhanatopi sukhumatarattā. Tenāha bhagavā “aho sukhumataraṃ kho, bhikkhave, mārabandhana”nti.

**Bahunti** ativiya, anekakkhattuṃ vā. **Vipphandamānopi sakkāyaṃ nātivattati** saṃsāraṃ nātivattanato. Yathāha “ye te, bhikkhave, samaṇā sato sattassa ucchedaṃ vināsaṃ vibhavaṃ paññapenti, te, sakkāyaṃyeva anuparidhāvanti seyyathāpi sā gaddulabandhano”tiādi. Yathā hi sattasupi ucchedavikappesu saṃsāranāyikānaṃ taṇhādiṭṭhīnaṃ pahānaṃ sambhavati, evaṃ sassatavikappesupīti kathañci pana diṭṭhigatikassa bhavavippamokkho. Tena vuttaṃ “sakkāyaṃ nātivattati”ti.

**Sasoti** so eso puthujjano. **Niccanti** sabbakālaṃ.

**Tanti** tasmā sakkāyamalīnassa jātiyādīnamanativattanato. **Asātati** dukkhato.

**Passaṃ evamimanti** asubhāniccadukkhānattasabhāvaṃ taṃ sakkāyaṃ vuttappakārena yathābhūtavipassanāpaññāsahitāya maggapaññāya passanto. **Pahāyāti** samucchadavasena sabbā maññanāyo pajahitvā. **Sabbadukkhā pamuccatīti** sakalasmāpi vaṭṭadukkhato pamuccatīti.

Ekattavārādivaṇṇanā niṭṭhitā.

Paṭhamanayavaṇṇanā niṭṭhitā.

### **Sekkhavāradutiyanayavaṇṇanā**

7. Adhippetassa atthassa aniyamtvā vacanaṃ **uddeso**, niyamtvā vacanaṃ **niddesoti** āha “**yoti uddesavacanaṃ, soti niddesavacana**”nti. **Sampiṇḍanatthoti** samuccayattho. Sampiṇḍanañca sabhāgatāvasena hotīti āha – “**ārammaṇasabhāgenā**”ti, ārammaṇassa sabhāgatāya sadisatāyāti attho. **Sekkhamaṃ dasseti** sāmāññajotanāya visese avaṭṭhānato, sekkhavisayattā ca tassa vacanassa.

**Kenaṭṭhenāti** yasmā ñāṇena araṇīyato attho sabhāvo, tasmā kenaṭṭhena kena sabhāvena kena lakkhaṇena sekkho nāma hotīti attho. Yasmā pana sekkhadhammādhigamena puggale sekkhavohārapavatti, tasmā “**sekkhadhammapaṭilābhato sekkho**”ti vuttaṃ. **Sekkhadhammā** nāma

catūsu maggesu, heṭṭhimesu ca tīsu phalesu sammādiṭṭhiādayo. Tenāha “**sekkhāya sammādiṭṭhiyā...pe... ettāvata kho bhikkhu sekkho hoti**”ti. Evaṃ abhidhammapariyāyena sekkhalakkhaṇaṃ dassetvā idāni suttantikapariyāyēnapi taṃ dassetuṃ “**apicā**”tiādi vuttaṃ. Tattha **sikkhatī**ti iminā sikkhāttayasamaṅgī apariniṭṭhitasikkho sekkhoti dasseti. Tenāha “**sikkhati**”tiādi. Sikkhāhi nīccasamāyogadīpanatthañcetta “**sikkhati sikkhati**”ti āmedītavacanaṃ. Atha vā sikkhanaṃ sikkhā, sā etassa sīlanti **sekkho**. So hi apariyositasikkhattā tadadhimuttattā ca ekantena sikkhanasīlo, na asekkho viya pariniṭṭhitasikkho tattha paṭippassaddhussukko, nāpi vissatṭhasikkho pacurajano viya tattha anadhimutto. Atha vā ariyāya jātiyā tīsu sikkhāsu jāto, tattha vā bhavoti **sekkho**. Atha vā ikkhati etāyāti ikkhā, maggaphalasammādiṭṭhi. Saha ikkhāyāti **sekkho**.

**Anulomapaṭipadāya paripūrakārīti** yā sā sīlādikā vipassanantā dukkhanirodhagāminiyā lokuttarāya paṭipadāya anulomanato anulomapaṭipadā, tassā sampādanena paripūrakārīti. Idāni taṃ paṭipadaṃ puggalādhiṭṭhānena dassetuṃ “**sīlasampanno**”tiādi vuttaṃ. Tattha **sīlasampannoti** pātimokkhasaṃvarasīlena samannāgato, paripuṇṇapātimokkhasīlo vā. Pātimokkhasīlāñhi idha “**sīla**”nti adhippetam padhānabhāvato. Rūpādiārammaṇesu abhijjhādīnaṃ pavattinivāraṇasaṅkhātena manacchatṭhānaṃ indriyānaṃ pidhānena **indriyesu guttadvāro**. Pariyesanādivasena bhojane pamāñājanānena **bhojane mattaññū**. Vigatathinamiddho hutvā rattindivam kammaṭṭhānamanasikāre yuttatāya **jāgarīyānuyogamanuyutto**. Kathaṃ pana jāgarīyānuyogo hotīti taṃ dassetuṃ “**pubbarattā...pe... viharati**”ti vuttaṃ. Yathāha “**kathañca pubbarattāpararattaṃ jāgarīyānuyogamanuyutto hoti? Idha bhikkhu divasaṃ caṅkamaena nisajjāya āvaraṇīyehi cittaṃ parisodheti, rattiyā paṭhamaṃ yāmaṃ caṅkamaena...pe... sodheti, evaṃ kho bhikkhu pubbarattāpararattaṃ jāgarīyānuyogamanuyutto hoti**”ti (vibha. 519). **Imasmim panattheti** “**maññati, na maññati**”ti ca vattabbabhāvasaṅkhāte atthe. **No puthujjano adhippeto** “**appattamānaso, anuttaraṃ yogakkhemaṃ patthayamāno**”ti ca vuttattā.

Sampayuttattā manasi bhavoti rāgo mānaso, mano eva mānasanti katvā cittaṃ **mānasam**, anavasesato mānaṃ sīyati samucchindatīti aggamaggo **mānasam**, tannibbattattā pana arahattassa mānasatā datṭhabbā. **Janesutāti** jane sakalasattaloke vissutā, patthaṭayasāti attho.

Natthi ito uttaranti **anuttaram**. Taṃ pana sabbasetṭham hontaṃ ekantato sadisarahitameva hoti, tasmā vuttaṃ “**anuttaranti setṭham, asadisanti attho**”ti. **Patthayamānassāti** taṇhāyantassa. **Pajappitānīti** māñājanānāni. Yasmiñhi vatthusmim taṇhāyānā patthayamānamaññānā sambhavati, tasmimyeva “**seyyohamasmi**”tiādīni pajappitāni sambhavantīti adhippāyo. **Pavedhītanti** parivāsitaṃ. **Pakappitesūti** taṇhādīṭṭhikappehi parikappitesu ārammaṇesu. **Sotanti** kilesasotaṃ. Tasmimhi chinne itarasotaṃ chinnamevāti. **Viddhastanti** vināsitaṃ. Tañca kho lomahaṃsamattampi asesetvāti dassento āha “**vināḷikata**”nti, vigatāvasesaṃ katanti attho. Adhimuttiyā idhādhippetapatthanā pākātā hotīti “**tanninno**”tiādi vuttaṃ, na pana kusalacchandassa adhimuttibhāvato. **Adhimuccantoti** okappento.

**Sabbākāraviparītāyāti** “**subham sukham nicca**”ntiādīnaṃ sabbesaṃ attanā gahetabbākārānaṃ vasena tabbiparītātāya, anavasesato dhammasabhāvaviparītākāragāhīnyāti attho. **Abhivisiṭṭhena ñāñenāti** asampajānanamicchājānanāni viya na dhammasabhāvaṃ appatvā nāpi atikkamitvā, atha kho avirajjhītvā dhammasabhāvassa abhimukhabhāvappattiyā abhivisiṭṭhena ñāñena, ñātapariññādhiṭṭhānāya tīraṇapariññāya pahānapariññekadesena cāti attho. Tenāha “**pathavīti...pe... vuttaṃ hoti**”ti. **Pathavībhāvanti** pathaviyaṃ abhiññeyyabhāvaṃ. Lakkhaṇapathavī hi idhādhippetā, pariññeyyabhāvo panassā “**aniccātīpi**”tiādīnā gahitoti. **Abhiññatvāti** ñātapīraṇapahānapariññāhi heṭṭhimamaggañāñehi ca abhijānitvā. **Māmaññīti** appahīnānaṃ maññānānaṃ vasena māti maññatīti mā, pahīnānaṃ pana vasena na maññatīti amaññī, mā ca so amaññī ca māmaññīti evamettha padavibhāgato attho vedītabbo. Tattha yena bhāgena amaññī, tena maññīti na vattabbo. Yena pana bhāgena maññī, tena amaññīti na vattabboti. Evaṃ paṭikkhepappadhānaṃ atthaṃ dassetuṃ aṭṭhakathāyaṃ “**maññī ca na maññī ca na vattabbo**”ti vuttaṃ. Paṭikkhepappadhānatā cettha labbhamānānampi maññānānaṃ dubbalabhāvato vedītabbā. Tenevāha – “**itarā pana tanubhāvaṃ gatā**”ti. **Māti** ca nipātapadametaṃ, anekatthā ca

nipātāti adhippāyena “**etasmīñhi atthe imam padam nipātetvā vutta**”nti vuttam. **Nipātetvāti** ca pakatiādivibhāganiddhāraṇe anumānanayaṃ muñcivā yathāvutte atthe paccakkhatova dassetvāti attho. **Puthujjano viyāti** etenassa uparimaggavajjhataṇhāmānavasena maññanā na paṭikkhattāti dīpeti.

Atha vā **mā maññīti** parikappakiriyāpaṭikkhepavacanametam “mā randhayum, mā jīrī”tiādīsu viya, na maññeyyāti vuttañhoti. Yathā hi puthujjano sabbaso appahīnamaññanattā “maññati”cceva vattabbo, yathā ca khīṇāsavo sabbaso pahīnamaññanattā na maññati eva, na evam sekkho. Tassa hi ekaccā maññanā pahīnā, ekaccā appahīnā, tasmā ubhayabhāvato ubhayathāpi na vattabbo. Nanu ca ubhayabhāvato ubhayathāpi vattabboti? Na. Yā hi appahīnā, tāpissa tanubhāvam gatāti tāhipi so na maññeyya vibhūtatarāya maññanāya abhāvato, pageva itarāhi. Tenāha bhagavā “mā maññī”ti. Tena vuttam “mā maññīti parikappakiriyāpaṭikkhepavacanametam ‘mā randhayum, mā jīrī’tiādīsu viya, na maññeyyāti vuttam hoti”ti. Ayañcassa amaññanā vatthuno pariññeyyattā, na asekkhassa viya pariññātattā. Yañhi ekantato pariññatibbam pariññitum sakkā, na tattha tabbidhure viya puthujjanassa maññanā sambhavanti. Tenāha “**pariññeyyam tassāti vadāmī**”ti.

**Okkantaniyāmattāti** anupaviṭṭhasammattaniyāmattā, otiṇṇamaggasotattāti attho. **Sambodhiparāyaṇattāti** uparimaggasambodhipaṭisaraṇattā, tadadhigamāya ninnapoṇapabbhārabhāvato attho. Ubhayenapi tassa avassambhāvinī sesapariññāti dasseti. **Pariññeyyanti** pariññatibbhabhāvena ṭhitam, pariññātum vā sakkuṇeyyam. Tappaṭipakkhato **apariññeyyam**. **Puthujjanassa viyāti** etena idhādhippetaputhujjanassa pariññeyyabhāvāsankā eva natthi anadhikāratoti dasseti. “**Mābhinandī**”ti etthāpi imināva nayena attho veditabbo.

Sekkhavāradutiyanayavaṇṇanā niṭṭhitā.

### Khīṇāsavavāratatiyādinayavaṇṇanā

**8. Sabhāgo** diṭṭhasaccatādisāmaññena. Ārakā kilesehi arahanti padassa niruttinayena attham vatvā tam pāḷiyā samānento “**vuttañceta**”ntiādīmāha. Tattha **pāpakāti** lāmakatṭhena duggatisampāpanatṭhena ca pāpakā. Sāvajjaṭṭhena akosallasambhūtaṭṭhena ca **akusalā**. Saṃkilesam arahanti, tattha vā niyuttāti **saṃkilesikā**. Punabbhavassa karaṇasīlā, punabbhavaphalam arahantīti vā **ponobhavikā**. Saha darathena pariḷāhena pavattantīti **sadarā**. Dukkho kaṭuko, dukkhamo vā vipāko etesanti **dukkhavipākā**. Anāgate jātiyā ceva jarāmarāṇānañca vaḍḍhanena **jātijarāmarāṇiyāti**. Evametesam padānam attho veditabbo. Kāmañcāyam suttantavaṇṇanā, abhidhammanayo pana nipariyāyoti tena dassento “**cattāro āsavā**”tiādīmāha. **Samucchinā paṭippassaddhāti** na kevalam samucchinā eva, atha kho paṭippassaddhāpīti maggakiccena sadisam phalakkiccampi niddhāreti.

Sīlavisoḍhanādinā garūnam paṭipattiyā anukaraṇam **garusaṃvāso**. Ariyamaggapaṭipatti eva **ariyamaggasaṃvāso**. **Dasa ariyāvāsā** nāma pañcaṅgavippahīnatādayo. Ye sandhāya vuttam –

“Dasayime, bhikkhave, ariyāvāsā, ye ariyā āvasiṃsu vā āvasanti vā āvasissanti vā. Katame dasa? Idha, bhikkhave, bhikkhu pañcaṅgavippahīno hoti chaḷaṅgasamannāgato, ekārakkho, caturāpasseno, panuṇṇapaccekasacco, samavayasaṭṭhesano, anāvilasaṅkappo, passaddhakāyasankhāro, suvimuttacitto, suvimuttapañño. Ime kho, bhikkhave, dasa ariyāvāsā”ti (a. ni. 10.19).

Vussatīti vā vusitam, ariyamaggo, ariyaphalañca, tam etassa atthīti atisayavacanicchāvasena arahā “**vusitavā**”ti vutto. **Karaṇiyanti** pariññāpahānabhāvanāsacchikiriyamāha. Tam pana yasmā catūhi maggehi catūsu saccesu kattabbattā soḷasavidhanti veditabbam. Tenāha “**catūhi maggehi karaṇiya**”nti. **Sammāvimuttassāti** aggamaggaphalapaññāhi samucchedapaṭippassaddhīnam vasena suttu vimuttassa. **Santacittassāti** tato eva sabbakilesadarathapariḷāhānam vūpasantacittassa. Bhinnakilesassa khīṇāsavassa **bhikkhuno**. **Katassa** pariññādikiccassa **paṭicayo** puna karaṇam **natthi**,

tato eva **karaṇīyaṃ na vijjati** na upalabbhati.

**Bhārā**ti osīdāpanaṭṭhena bhārā viyāti bhārā. Vuttañhi “bhārā have pañcakkhandhā”tiādi (saṃ. ni. 3.22). Attano yonisomanasikārāyattanti **attupanibandhaṃ**, sasantānapariyāpannattā attānaṃ **avijahanaṃ**. Tayidaṃ yadipi sabbasmiṃ anavajjadhamme sambhavati, akuppasabhāvāparihānadhammesu pana aggabhūte arahatte sātisaṃ, netaresūti dassento āha “**attano paramatthaṭṭhena vā**”ti, uttamaṭṭhabhāvenāti attho.

Suttantanayo nāma pariyaṇanayoti nipariyaṇanayena saṃyojanāni dassento “**bhavarāgaissāmacchariyaṃyojana**”nti āha, na pana “rūparāgo”tiādinā. **Bhavesu saṃyojantīti** kilesakammavipākavattānaṃ paccayo hutvā nissarituṃ appadānavasena bandhanti. Satipi hi aññesaṃ tappaccayabhāve na vinā saṃyojanāni tesāṃ tappaccayabhāvo atthi, orambhāgiyauddhambhāgiyasaṅgahitehi ca tehi taṃtaṃbhavanibbattakakammaniyamo bhavaniyamo ca hoti, na ca upacchinnaṃyojanaṃ katānipi kammāni bhavaṃ nibbattentīti tesāṃyeva saṃyojanaṭṭho daṭṭhabbo.

**Sammā aññāyāti** ājānanabhūtāya aggamaggapaññāya sammā yathābhūtaṃ dukkhādīsu yo yathā jānitabbo, taṃ tathā jānitvā. **Cittavimutti** sabbassa cittasaṃkilesassa vissaggo. **Nibbānādhimutti** nibbāne adhimuccanaṃ tattha ninnapoṇapabbhārātā. **Tanti** pathavīdikaṃ. **Pariññātaṃ**, na puthujjanaṃ viya apariññātaṃ, sekkhassa viya pariññeyyaṃ vā. **Tasmāti** pariññātā.

Catutthapañcamachattavārā tattha tattha kilesanibbānakittanavasena pavattattā **nibbānavārā** nāma. Tattha pathavīdīnaṃ pariññātattā amaññānā, sā pana pariññā rāgādīnaṃ khayena siddhāti imassa atthassa dīpanavasena pālī pavattāti dassento “**pariññātaṃ tassāti sabbapadehi yojetvā puna khayā rāgassa vītarāgattāti yojetabbaṃ. Esa nayo itaresū**”ti āha. Tattha **itaresūti** pañcamachattavāresu. Yadi evaṃ kasmā pālī evaṃ na dissatīti āha “**desanā pana ekattha vuttaṃ sabbattha vuttameva hotīti saṃkhittā**”ti.

**Na khayā rāgassa vītarāgo** sabbaso appahīnarāgattā. Vikkhambhitarāgo hi soti. **Bāhirakaggahaṇa**ñcetta tathābhāvasseva tesu labbhanato, na tesu eva tathābhāvassa labbhanato. Idāni yā sā “pariññātaṃ tassā”ti sabbapadehi yojanā vuttā, taṃ vināpi nibbānavāraatthayojanaṃ dassetuṃ “**yathā cā**”tiādi vuttaṃ. Tattha **maññanaṃ na maññatīti** maññānā nappavattatīti attho. Maññānāya maññitabattepi tassā vatthuantogadhattāti evamettha attho daṭṭhabbo.

Yadipi pariññātapadaṃ aggahetvā nibbānavāradesanā pavattā, evampi “khayā”tiādi padehi pariññāsiddhi eva pakāsiyātīti ko tesāṃ visesoti codanaṃ sandhāyāha “**ettha cā**”tiādi. **Maggabhāvanāparipūridassanattā vutto**, maggakiccantā hi pariññāyoti adhippāyo. **Itare...pe... veditabbā** vītarāgādikittanatotī. **Dvīhi vā karaṇehīti** yathāvuttakāraṇadvayena. **Assāti** khīṇāsavassa. **Ayaṃ visesoti** idāni vuccamāno viseso. Yadipi khīṇāsavo ekantena vītarāgo vītadoso vītamoho eva ca hoti, yāya pana pubbhāgapaṭipadāya vītarāgatādayo savisesāti vattabbaṃ labhanti, taṃ dassento “**tisu hī**”tiādimāha. “Ratto atthaṃ na jānāti”tiādinā (netti. 11) rāge ādīnaṃ passato “rāgo ca nāma sukhābhisaṅgena uppajjati, sukhaṇca vipariṇāmato dukkhaṃ. Pageva itara”nti sahetuke rāge ādīnavadassanaṃ dukkhānupassanāya nimittaṃ, dukkhānupassanā ca paṇidhiyā paṭipakkhabhāvato appaṇihitavimokkhaṃ paripuretīti āha “**rāge...pe... vītarāgo hotī**”ti. Tathā “duṭṭho atthaṃ na jānāti”tiādinā (itivu. 88) dose ādīnaṃ passato “doso ca nāma dukkhaṃ paṭicca uppajjati, taṇca ubhayaṃ anavaṭṭhitaṃ itaraṃ pabhaṅgū”ti sahetuke dose ādīnavadassanaṃ aniccānupassanāya nimittaṃ, aniccānupassanā ca niccanimittādīnaṃ paṭipakkhabhāvato animittavimokkhaṃ paripuretīti āha “**dose...pe... hotī**”ti. Tathā “mūlho atthaṃ na jānāti”tiādinā (itivu. 88) mohe ādīnaṃ passato “moho nāma yathāsabhāvaggahaṇassa paribbhamanto”ti mohassa vikkhambhanaṃ anattānupassanāya nimittaṃ, anattānupassanāya ca attābhinivesassa paṭipakkhabhāvato suññataṃ vimokkhaṃ paripuretīti āha “**mohe...pe... vītamoho hotī**”ti.

**Evam santeti** yadi vītarāgatādayo vimokkhavibhāgena vuttā, evaṃ sante. **Tasmāti yasmā** vimokkhamukhavimokkhānaṃ vasena niyametvā na vuttaṃ, tasmā. Yaṃ kiñci arahato sambhavantaṃ vibhajitvā vuccatīti vārattayadesanā katāti imamatthaṃ dasseti “**yaṃ arahato**”tiādīnā.

Evaṃ vimuttivibhāgena khīṇāsavassa vibhāgaṃ vārattayadesanānibandhanaṃ dassetvā idāni avibhāgenapi tattha pariññāvisayassa anusayavisayassa ca vibhāgaṃ tassa nibandhanaṃ dassento “**avisesenā**”tiādīmāha. Tattha upekkhāvedanā visesato saṅkhāradukkhāṃ sammohādhiṭṭhānanti vuttaṃ “**saṅkhāra...pe... moho**”ti. Sesāṃ vuttanayattā suviññeyyameva.

Khīṇāsavavāratatīyādinayaṇṇanā niṭṭhitā.

### **Tathāgatavārasattamanayaṇṇanā**

**12.** Yehi (dī. ni. abhi. ṭī. 1.7.cūlasīlavaṇṇanā; a. ni. ṭī. 1.1.170) guṇavisesehi nimittabhūtehi bhagavati “tathāgato”ti ayaṃ samaññā pavattā, taṃ dassanattaṃ “**aṭṭhahi kāraṇehi bhagavā tathāgato**”tiādi vuttaṃ. Guṇanemittakāneva hi bhagavato sabbāni nāmāni. Yathāha –

“Asaṅkhyeyyāni nāmāni, saguṇena mahesino;

Guṇena nāmamuddheyyaṃ, apī nāmasahassato”ti. (dha. sa. aṭṭha. 1313; udā. aṭṭha. 53; paṭi. ma. aṭṭha. 1.76; dī. ni. abhi. ṭī. 1.7.cūlasīlavaṇṇanā; a. ni. ṭī. 1.1.170) –

**Tathā āgatoti** ettha ākāranīyamanavasena opammasampañipādanattho **tathā**-saddo. Sāmaññajotanā hi visese avatīṭṭhatīti paṭipādagamanattho **āgata**-saddo, na ñāṇagamanattho “tathalakkhaṇaṃ āgato”tiādīsu (dī. ni. aṭṭha. 1.7; ma. ni. aṭṭha. 1.12; saṃ. ni. aṭṭha. 2.3.78; a. ni. aṭṭha. 1.1.170; udā. aṭṭha. 18; itivu. aṭṭha. 38; theragā. aṭṭha. 1.1.3; bu. vaṃ. aṭṭha. 2.bāhīranidāna; mahāni. aṭṭha. 14) viya, nāpi kāyagamanādiattho “āgato kho mahāsamaṇo, māgadhānaṃ giribbaja”ntiādīsu (mahāva. 63) viya. Tattha yadākāranīyamanavasena opammasampañipādanattho tathā-saddo, taṃ karuṇāppadhānattā mahākaruṇāmukhena purimabuddhānaṃ āgamanapaṭipadaṃ udāharaṇavasena sāmaññato dassento yaṃtaṃsaddānaṃ ekantasambandhabhāvato “**yathā sabbaloka...pe... āgatā**”ti sādharmaṇato vatvā puna taṃ paṭipadaṃ **mahāpadānasuttā**dīsu (dī. ni. 2.4) sambahulaniddesena supākaṭānaṃ āsannānaṃ vipassīdānaṃ channaṃ sammāsambuddhānaṃ vasena dassento “**yathā vipassī bhagavā**”tiādīmāha. Tattha **yena abhinīhārenāti** manussatta-liṅgasampatti-hetu-satthāradassana-pabbajjā-abhiññādiguṇasampatti-adhikāra-chandānaṃ vasena aṭṭhaṅgasamannāgatena kāyapaṇidhānamahāpaṇidhānena. Sabbesañhi sammāsambuddhānaṃ kāyapaṇidhānaṃ imināva nīhārena samijjhatīti.

Evaṃ mahābhinihāravasena “tathāgato”ti padassa atthaṃ vatvā idāni pāramīpūraṇavasena dassetuṃ “**atha vā yathā vipassī bhagavā...pe... yathā kassapo bhagavā dānapāramiṃ pūretvā**”tiādi vuttaṃ. Imasmiṃ pana thāne suttantikānaṃ mahābodhiyānapaṭipadāya kosallajananatthaṃ pāramīkathā vattabbā, sā pana sabbākārasampannā **cariyāpiṭakavaṇṇanāya** (cariyā. pakiṇṇakakathā) vitthārato niddiṭṭhā, tasmā atthikehi tattha vuttanayeneva veditabbā. Yathā pana pubbe vipassīdayo sammāsambuddhā abhinīhārasampattiyāṃ paṭiṭṭhāya suvisuddhāya paṭipadāya anavasesato sammadeva sabbā pāramīyo paripūresuṃ, evaṃ amhākampi bhagavā paripūresīti imamatthaṃ sandhāyāha “**samattim sapāramīyo pūretvā**”ti. Satipi āngapariccāgādīnaṃ dānapāramībhāve pariccāgavisesabhāvadassanattañceva sudukkarabhāvadassanattañca “**pañca mahāpariccāge**”ti visuṃ gahaṇaṃ, tatoyeva ca āngapariccāgato visuṃ nayanapariccāgaggahaṇaṃpi kataṃ, pariggahapariccāgabhāvasāmaññepi dhanarajjapariccāgato puttadārapariccāgaggahaṇaṃpi kataṃ.

Gatapaccāgatikavattapūraṇādīkāya pubbhāgapaṭipadāya saddhiṃ abhiññāsamāpattinipphādanāṃ **pubbayogo**, dānādīsuyeva sātīsayapaṭipattinipphādanāṃ **pubbacariyā**, sā cariyāpiṭakasaṅgahitā. Abhinīhāro **pubbayogo**, dānādīpaṭipatti, kāyavivekavasena ekacariyā vā **pubbacariyā**ti keci.



Dānādīnañceva appicchatādīnañca saṃsāranibbānesu ādīnavānisamāsānañca vibhāvanavasena sattānaṃ bodhittaye paṭiṭṭhāpanaparipācanavasena ca pavattā kathā **dhammakkhānaṃ**, ñātīnaṃ atthacariyā **ñātattacariyā**, sāpi karuṇāya vaseneva. **Ādi**-saddena lokatthacariyādayo saṅgaṇhāti. Kammassakataññāvasena, anavajjakammāyatanasippāyatanavijjāṭṭhānaparicayavasena khandhāyatanādiparicayavasena, lakkhaṇattayatīraṇavasena ca ñānacāro **buddhicariyā**, sā pana atthato paññāpāramīyeva, ñāṇasambhāradassanatthaṃ viṣuṃ gahaṇaṃ. **Koṭṭi** pariyanto, ukkaṃsoti attho.

Cattāro satipaṭṭhāne bhāvetvā brūhetvāti sambandho. Tattha **bhāvetvāti** uppādetvā. **Brūhetvāti** vadḍhetvā. **Satipaṭṭhānā**diggahaṇena āgamanapaṭipadaṃ matthakaṃ pāpetvā dasseti. Vipassanāsahagatā eva vā **satipaṭṭhānā**dayo daṭṭhabbā. Ettha ca “yena abhinīhārenā”tiādīnā āgamanapaṭipadāya ādiṃ dasseti, “dānapāramī”tiādīnā majjhaṃ, “cattāro satipaṭṭhāne”tiādīnā pariyosānanti vedītabbaṃ.

**Sampatijātoti** muhuttajāto manussānaṃ hatthato muttamatto, na mātukucchito nikkhantamatto. Nikkhantamattañhi mahāsattaṃ paṭhamam brahmāno suvaṇṇajālena paṭiggaṇhiṃsu, tesam hatthato cattāro mahārājāno ajinappaveṇiyā, tesam hatthato manussā dukūlacumbaṭakena paṭiggaṇhiṃsu, manussānaṃ hatthato muccivā pathaviyaṃ paṭiṭṭhitoti. **Yathāha** bhagavā mahāpadānadesanāyaṃ. **Setamhi chatteti** dibbasetacchatte. **Anudhāriyamāneti** dhāriyamāne. Ettha ca chattaḡgaḡhaṇeneva khaggādīni pañca kakudhabhaṇṭānīpi vuttānevāti daṭṭhabbaṃ. Khaggatālavanāmorahatthakavālabjānīuṇhīsapaṭṭāpi hi chattena saha tadā upaṭṭhitā ahesuṃ, chattādīniyeva ca tadā paññāyīṃsu, na chattādiggāhakā. **Sabbā ca disāti** dasapi disā. Nayidaṃ sabbadisāviloکانam sattaḡpadavītiḡruttarakālam daṭṭhabbaṃ. Mahāsatto hi manussānaṃ hatthato muccivā puratthimadisam olokesi. Tattha devamanussā gandhamālādīhi pūjayamānā “mahāpurisa idha tumhehi sadisopi natthi, kuto uttaritaro”ti āhaṃsu. Evaṃ catasso disā, catasso anudisā; heṭṭhā, uparīti sabbā disā anuviloketvā sabbattha attanā sadisam adisvā “ayaṃ uttarā disā”ti tattha sattaḡpadavītiḡrena agamāsi. **Āsabhinti** uttamaṃ. **Aggoti** sabbapaṭṭhamo. **Jeṭṭho seṭṭhoti** ca tasseva vevacaṇaṃ. **Ayamantimā jāti, natthi dāni punabbhavoti** imasmīṃ attabhāve pattabbaṃ arahattaṃ byākāsi.

**Anekesam visesādhigamānaṃ pubbanimittabhāvenāti** saṃkhittena vuttamatthaṃ “**yañhi**”tiādīnā vitthārato dasseti. Tattha **etthāti** –

“Anekasākhañca saḡassamaṇḡdalaṃ,  
Chattaṃ marū dhārayumantalikkhe;  
Suvaṇṇadaṇḡdā vītipatanti cāmarā,  
Na dissare cāmarachattaḡgāhakā”ti. (su. ni. 693);

Imissā gāthāya. Sabbaññutaññāṇameva sabbattha appaṭiḡhatacārātāya anāvarenaññāṇanti āha “**sabbaññūtānāvarenaññāpaṭilābhassā**”ti. **Tathā ayaṃ bhagavāpi gato...pe...** **pubbanimittabhāvenāti** etena abhiḡjātiyaṃ dhammatāvaseṇa uppajjanakavisesā sabbabodhisattānaṃ sādḡhāraṇāti dasseti. Pāramitānissandā hi teti.

**Vikkamīti** agamāsi. **Marūti** devā. **Samāti** vilokanasamatāya samā sadisiyo. Mahāpuriso hi yathā ekaṃ disam vilokesi, evaṃ sesadisāpi, na katthaci vilokane vibandho tassa ahoṣīti. **Samāti** vā viloketuṃ yuttā, viṣamarahitāti attho. Na hi tadā bodhisattassa virūpabībhacchavisamarūpāni viloketuṃ ayuttāni disāsu upaṭṭhahantīti.

Evaṃ “tathā gato”ti kāyagamaṇaṭṭhena gata-saddena tathāgata-saddaṃ niddisitvā idāni ñāṇagamaṇaṭṭhena taṃ dassetuṃ “**atha vā**”tiādīmāha. Tattha **nekkhammenāti** alobhappadhānena kusalacittuppādena. Kusalā hi dhammā idha nekkhammaṃ, na pabbajjādayo, “paṭhamajjhāna”nti (dī. ni. abhi. ṭī. 1.7.cūlasīlavanāṇā; a. ni. ṭī. 1.1.170) ca vadanti. **Pahāyāti** pajahitvā. **Gato** adhigato, paṭipanno uttarivisesanti attho. **Pahāyāti** vā pahānahetu, pahānalakkhaṇaṃ vā. Hetulakkhaṇattho hi

ayaṃ pahāya-saddo. Kāmacchandādippahānahetukam “gato”ti hettha vuttaṃ gamanam avabodho, paṭipatti eva vā kāmacchandādippahānena ca lakkhīyatīti. Esa nayo **padāletvāti**ādīsūpi. **Abyāpādenā**ti mettāya. **Ālokasaññāyāti** vibhūtam katvā manasikaraṇena (dī. ni. abhi. ṭī. 1.7.cūlasīlavanṇanā) upaṭṭhitaālokasañcānanena. **Avikkhepenāti** samādhinā. **Dhammavavatthānenāti** kusalādidhammānam yāthāvanicchayena. “Sappaccayanāmarūpavavatthānenā”tipi vadanti.

Evam kāmacchandādinīvaraṇappahānena “abhijjham loke pahāyā”tiādīnā (vibha. 508) vuttāya paṭhamajjhānassa pubbhāgapaṭipadāya bhagavato tathāgatabhāvam dassetvā idāni saha upāyena aṭṭhahi samāpattīhi aṭṭhārasahi ca mahāvīpassanāhi tam dassetuṃ “**ñānenā**”tiādīmāha. Nāmarūpapariggahakaṅkhāvitarāṇānañhi vinibandhabhūtaṃ mohassa dūrikaraṇena ñātapariññāyam ṭhitassa aniccaaññādayo sijjhanti, tathā jhānasamāpattīsu abhiratinimittena pāmojjena. Tattha “anabhiratiyā vinoditāya jhānādīnam samadhigamo”ti samāpattivipassanānam arativinodanaavijjāpadālanādīni upāyo, uppaṭipāṭiniddeso pana nīvaraṇasabhāvāya avijjāya heṭṭhā nīvaraṇesūpi saṅghadassanattanti daṭṭhabbam. Samāpattivihārappavesavibandhanena nīvaraṇāni kavātasadisānīti āha “**nīvaraṇakavātam ugghātetvā**”ti. “Rattim anuvitakketvā anuvicāretvā divā kammante payojētī”ti (ma. ni. 1.251) vuttaṭṭhāne vitakkavicārā dhūmāyanāti adhippetāti āha “**vitakkavicāradhūma**”nti. Kiñcāpi paṭhamajjhānupacāreyeva dukkham, catutthajjhānupacāre ca sukham pahīyati, atisayappahānam pana sandhāyāha “**catutthajjhānena sukhadukkham pahāyā**”ti.

Aniccassa, aniccanti ca anupassanā **aniccānupassanā**, tebhūmakadhammānam aniccatam gahetvā pavattāya vipassanāyetaṃ nāmam. **Niccasaññanti** saṅkhatadhammesu “niccā sassatā”ti evampavattamicchāsaññam. Saññāsīsenā diṭṭhicittānampi gahaṇam daṭṭhabbam. Esa nayo ito paresūpi. **Nibbidānupassanāyāti** saṅkhāresu nibbijjanākārena pavattāya anupassanāya. **Nandinti** sappītikataṇham. **Virāgānupassanāyāti** saṅkhāresu virajjanākārena pavattāya anupassanāya. **Nirodhānupassanāyāti** saṅkhārānam nirodhassa anupassanāya. Yathā vā saṅkhārā nirujjhantiyeva, āyatim punabbhavavasena na uppajjanti, evam anupassanā **nirodhānupassanā**. Tenevāha “nirodhānupassanāya nirodheti, no samudeṭī”ti. Muccitukamyatā hi ayam balappattāti. Paṭinissajjanākārena pavattā anupassanā **paṭinissaggānupassanā**, paṭisaṅkhāsantiṭṭhanā hi ayam. **Ādānanti** niccādivasena gahaṇam. Santatisamūhakkicārammaṇānam vasena ekattaggahaṇam **ghanasaññā**. **Āyūhanam** abhisāṅkharānam. Avatthāvisesāpatti **vipariṇāmo**. **Dhuvasaññanti** thirabhāvaggahaṇam. **Nimittanti** samūhādighanavasena sakiccaparicchedatāya ca saṅkhārānam saviggahaggahaṇam. **Paṇidhinti** rāgādipaṇidhim. Sā panatthato taṇhāvasena saṅkhāresu ninnatā. **Abhinivesanti** attānudiṭṭhim.

Aniccadukkhādivasena sabbadhammatīraṇam **adhipaññādhammavipassanā**. **Sārādānābhinivesanti** asāresu sāraggahaṇavipallāsam. Issarakuttādivasena loko samuppannoti abhiniveso **sammohābhiniveso**. Keci pana “ahosiṃ nu kho aham atītamaddhānantiādīnā (ma. ni. 1.18; sam. ni. 2.20) pavattasaṃsayāpatti **sammohābhiniveso**”ti vadanti. Saṅkhāresu leṇatānabhāvaggahaṇam **ālayābhiniveso**. “Ālayaratā ālayasammuditā”ti (dī. ni. 2.64, 67; ma. ni. 1.281; 2.337; sam. ni. 1.172; mahāva. 7, 8) vacanato ālayo taṇhā, sāyeva cakkhādīsū rūpādīsū ca abhinivisanavasena pavattiyā **ālayābhinivesoti** keci. “Evamvidhā saṅkhārā paṭinissajjīyanti”ti pavattam ṇānam **paṭisaṅkhānupassanā**. Vaṭṭato vigatattā vivaṭṭam, **nibbānam**, tattha ārammaṇakaraṇasaṅkhātena anupassanena pavattiyā **vivaṭṭānupassanā**, gotrabhū. **Samyogābhinivesanti** samyujjanavasena saṅkhāresu nivisanam. **Diṭṭhekaṭṭheti** diṭṭhiyā sahaṇatekaṭṭhe pahānekaṭṭhe ca. **Oḷāriketi** uparimaggavajjhakilese apekkhitvā vuttaṃ, aññathā dassanena pahātabbāpi dutiyamaggavajjhehi oḷārikāti. **Aṇusahagateti** aṇubhūte. Idaṃ heṭṭhimamaggavajjhe apekkhitvā vuttaṃ. **Sabbakileseti** avasiṭṭhasabbakilese. Na hi paṭhamādimaggehi pahīnā kilesā puna pahīyantīti.

**Kakkhaḷattam** kathinabhāvo. **Paggharaṇam** dravabhāvo. Lokiyavāyunā bhastassa viya yena vāyunā taṃtaṃkalāpassa uddhumāyanam, thaddhabhāvo vā, tam **vitthambhanam**. Vijjāmanēpi kalāpantarabhūtānam kalāpantarabhūtehi samphuṭṭhabhāve taṃtaṃbhūtavivittatā rūpapariyanto ākāseti

yesaṃ yo paricchedo, tehi so asamphuṭṭhova, aññathā bhūtānaṃ paricchedasabhāvo na siyā byāpībhāvāpattito, abyāpitāva asamphuṭṭhatāti yasmiṃ kalāpe bhūtānaṃ paricchedo, tehi asamphuṭṭhabhāvo **asamphuṭṭhalakkhaṇaṃ**. Tenāha bhagavā **ākāsadhātuniddese** (dha. sa. 637) “asamphuṭṭhaṃ catūhi mahābhūtehi”ti.

Virodhipaccayasannipāte visadisuppatti **ruppanaṃ**. Cetanāpadhānattā saṅkhārakkhandhadhammānaṃ cetanāvasenetaṃ vuttaṃ “**saṅkhārānaṃ abhisāṅkharaṇalakkhaṇa**”nti. Tathā hi **suttantabhājanīye saṅkhārakkhandhavibhaṅge** (vibha. 92) “cakkhusamphassaṃ cetanā”tiādīnaṃ cetanāva vibhattā. Abhisāṅkharaṇalakkhaṇā ca cetanā. Yathāha “tatha katamo puññābhisāṅkhāro? Kusalā cetanā kāmāvacarā”tiādi. **Pharaṇaṃ** savipphārikatā. **Assaddhiyeti** asaddhiyāhetu. Nimittatthe bhummaṃ. Esa nayo **kosajjetiādīsu**. **Upasamalakkhaṇanti** kāyacittapariḷhūpasamalakkhaṇaṃ. Līnuddhaccarahite adhicitte pavattamāne paggahaniggahasampahaṃsanesu abyāvaṭatāya ajjuhekkhanaṃ **paṭisaṅkhānaṃ** pakkhapātupacchedato.

Musāvādādīnaṃ viṣaṃvādanādīkicatāya lūkhānaṃ apariggāhakānaṃ paṭipakkhabhāvato pariggāhakasabhāvā sammāvācā siniddhabhāvato sampayuttadhamme sammāvācāpaccayasubhāsītānaṃ sotāraṇca puggalaṃ pariggaṇhātīti tassā **pariggāhalakkhaṇaṃ** vuttaṃ. Kāyikakiriyā kiñci kattabbaṃ samuṭṭhāpeti, sayaṇca samuṭṭhānaṃ ghaṭanaṃ hotīti sammākammanta saṅkhātāya viratiyā **samuṭṭhānalakkhaṇaṃ** daṭṭhabbaṃ. Sampayuttadhammānaṃ vā ukkhipanaṃ **samuṭṭhāpanaṃ** kāyikakiriyāya bhārukkhipanaṃ viya. Jīvamānassa sattassa, sampayuttadhammānaṃ vā jīvitindriyappavattiyā, ājīvasseva vā suddhi **vodānaṃ**. Sasampayuttadhammassa cittassa saṃkilesapakkhe patituṃ adatvā sammadeva paggaṇhanaṃ **paggaho**.

“Saṅkhārā”ti idha cetanā adhippetāti vuttaṃ “**saṅkhārānaṃ cetanālakkhaṇa**”nti. **Namaṇaṃ** ārammaṇābhimukhabhāvo. **Āyatanānaṃ** pavattanaṃ. Āyatanānaṃ vasena hi āyasaṅkhātānaṃ cittacetāsikānaṃ pavattīti. **Taṇhāya hetulakkhaṇanti** vaṭṭassa janakahetubhāvo, maggassa pana nibbānasampāpakattanti ayametesam viṣeso.

**Tathalakkhaṇaṃ** aviparītasabhāvo. **Ekaraso** aññamaññānativattanaṃ anūnānadhikabhāvo. **Yuganaddhā** samathavipassanāva. Saddhāpaññā paggaḥāvikkhepātīpi vadanti.

Khīnoti kilese khepatīti **khayo**, maggo. Anuppādapariyosānatāya **anuppādo**, phalaṃ. **Passaddhi** kilesavūpasamo. **Chandassāti** kattukāmatāchandassa. **Mūlalakkhaṇaṃ** paṭiṭṭhābhāvo. Samuṭṭhānabhāvo **samuṭṭhānalakkhaṇaṃ** ārammaṇapaṭipādakatāya sampayuttadhammānaṃ uppattihetutā. **Samodhānaṃ** viṣayādisannipātena gahetabbākāro, yā saṅgatīti vuccati. Samaṃ saha odahanti anena sampayuttadhammāti vā **samodhānaṃ**, phasso. Samosaranti sannipatanti etthāti **samosaraṇaṃ**. Vedanāya vinā appavattamānā sampayuttadhammā vedanānubhavananimittaṃ samosaṭā viya hotīti evaṃ vuttaṃ. Gopānasīnaṃ kūṭaṃ viya sampayuttānaṃ pāmokkhabhāvo **pamukhalakkhaṇaṃ**. Tato, tesam vā sampayuttadhammānaṃ uttari padhānanti **tatuttari**, paññuttarā hi kusalā dhammā. **Vimuttiyāti** phalassa. Tañhi sīlādiguṇasārassa paramukkaṃsabhāvena **sāraṃ**. Ayaṇca lakkhaṇavibhāgo chadhātupañcajhānaṅgādivasena taṃtaṃsuttapadānusārena porāṇaṭṭhakathāyaṃ āgatanayena ca katoti daṭṭhabbaṃ. Tathā hi pubbe vuttopi koci dhammo pariyāyantarapakāsanatthaṃ puna dassito. Tato eva ca “chandamūlakā kusalā dhammā manasikārasamuṭṭhānā phassasamodhānā vedanāsamosaraṇā”ti, “paññuttarā kusalā dhammā”ti, “vimuttisāramidaṃ brahmacariya”nti, “nibbānogadhañhi āvuso brahmacariyaṃ nibbānapariyosāna”nti (ma. ni. 1.466) ca suttapadānaṃ vasena “**chandassa mūlalakkhaṇa**”ntiādi vuttaṃ.

**Tathadhammā nāma cattāri ariyasaccāni** aviparītasabhāvattā. **Tathāni** taṃsabhāvattā. **Avitathāni** amusāsabhāvattā. **Anaññathāni** aññākārarahitattā. **Jātipaccayasambhūtasamudāgataṭṭhoti** jātipaccayā sambhūtaṃ hutvā sahitassa attano

paccayānurūpassa uddham āgatabhāvo, anupavattanaṭṭhoti attho. Atha vā sambhūtaṭṭho ca samudāgataṭṭho ca **sambhūtasamudāgataṭṭho**, na jātito jarāmarañam na hoti, na ca jātim vinā aññato hotīti **jātipaccayasambhūtaṭṭho**. Itthañca jātito samudāgacchatīti **jātipaccayasamudāgataṭṭho**, yā yā jāti yathā yathā paccayo hoti, tadanurūpaṃ pātubhāvoti attho. **Avijjāya sañkhārānaṃ paccayaṭṭhoti** etthāpi na avijjā sañkhārānaṃ paccayo na hoti, na ca avijjā vinā sañkhārā uppajjanti, yā yā avijjā yesaṃ yesaṃ sañkhārānaṃ yathā yathā paccayo hoti, ayaṃ avijjāya sañkhārānaṃ paccayaṭṭho paccayaabhāvoti attho.

Bhagavā taṃ sabbākārato jānāti passatīti sambandho. **Tena**ti bhagavatā. Taṃ vibhajjamānanti yojetabbaṃ. **Tanti** rupāyatanam. **Iṭṭhāniṭṭhādīti ādi**-saddena majjhantaṃ saṅgaṇhāti, tathā atītānāgatapaccuppannaparittaajjhatabhiddhātadubhayādibhedam. **Labbbhamānakapadavasenāti** “rūpāyatanam diṭṭham, saddāyatanam sutam, gandhāyatanam rasāyatanam phoṭṭhabbāyatanam mutam, sabbam rūpaṃ manasā viññāta”nti (dha. sa. 966) vacanato diṭṭhapadañca viññātapadañca rūpārammaṇe labbhati, rūpārammaṇam iṭṭham aniṭṭham majjhantaṃ parittaṃ atītaṃ anāgataṃ paccuppannam ajjhantaṃ bahiddhā diṭṭham viññātam rūpaṃ rūpāyatanam rūpadhātu vaṇṇanibhā sanidassanam sappatigham nīlam pītakanti evamādīhi **anekehi nāmehi**.

**Terasahi vārehīti** rūpakaṇḍe (dha. sa. 616) āgate terasa niddesavāre sandhāyāha. Ekekasmiñca vāre catunnam catunnam vavatthāpananayānam vasena “**dvepaññāsāya nayehī**”ti āha. **Tathameva** aviparītadassitāya appaṭivattiyadesanatāya ca. “**Jānāmi abhiññāsi**”nti vattamānātītakālesu ñāṇappavattidassanena anāgatepi ñāṇappavatti vuttāyevāti daṭṭhabbā. **Vidita**-saddo anāmaṭṭhakālaviseso vedītabbo “diṭṭham sutam muta”ntiādīsu (dha. sa. 966) viya. **Na upaṭṭhāsīti** attattaniyavasena na upagacchi. Yathā rūpārammaṇādayo dhammā yaṃsabhāvā yaṃpakārā ca, tathā ne passati jānāti gacchatīti **tathāgatoti** evaṃ padasambhavo vedītabbo. Keci pana “niruttinayena pisodarādīpakkepena (pāṇini 6.3.109) vā dassi-saddassa lopam, āgata-saddassa cāgamaṃ katvā **tathāgato**”ti vaṇṇenti.

Niddosatāya **anupavajjam**. Pakkhipitabbābhāvena **anūnam**. Apanetabbābhāvena **anadhikam**. Atthabyañjanādisampattiyā **sabbākārāparipuṇṇam**. **No aññathāti** “tathēvā”ti vuttamevattham byatirekena sampādeti. Tena yadattaṃ bhāsitaṃ, ekantena tadatthanipphādanato yathā bhāsitaṃ bhagavatā, tathēvāti aviparītadesantaṃ dasseti. **Gadaatthoti** etena tatham gadaṭṭīti **tathāgatoti** da-kārassa ta-kāro kato niruttinayenāti dasseti.

Tathā gatamassāti **tathāgato**. **Gatanti** ca kāyavācāpavattīti attho. **Tathāti** ca vutte yaṃtaṃsaddānaṃ abyabhicārisambandhitāya yathāti ayamattho upaṭṭhitoyeva hoti, kāyavacīkiriyānañca aññamaññānulomena vacanicchāyaṃ kāyassa vācā, vācāya ca kāyo sambandhībhāvena upaṭṭhatīti imamattham dassento āha “**bhagavato hī**”tiādi. Imasmiṃ pana atthe tathāvādītāya **tathāgatoti** ayampi attho siddho hoti. So pana pubbe pakārantarena dassitoti āha “**evaṃ tathākāritāya tathāgato**”ti.

**Tiriyam aparimāṇasu lokadhātūsūti** etena yadeke “tiriyam viya upari adho ca santi lokadhātuyo”ti vadanti, taṃ paṭisedheti. Desanāvīlāsoyeva **desanāvīlāsamayo** yathā “puññamayam, dānamaya”ntiādīsu.

Nipātānaṃ vācakasaddasannidhāne tadatthajotanabhāvena pavattanato gata-saddoyeva avagatattham atītatthañca vadaṭṭīti āha “**gatoti avagato atīto**”ti.

Atha vā abhinīhārato paṭṭhāya yāva sammāsambodhi, etthantare mahābodhiyānapaṭipattiyā hānaṭṭhānasamkilesanivattīnam abhāvato yathā paṇidhānam, tathā gato abhinīhārānurūpaṃ paṭipannoti **tathāgato**. Atha vā mahiddhikatāya paṭisambhidānaṃ ukkaṃsādhigamena anāvaraṇaññānatāya ca katthacipi paṭighātābhāvato yathā ruci, tathā kāyavacīcittānaṃ gatāni gamanāni pavattiyō etassāti **tathāgato**. Yasmā ca loke vidha-yutta-gata-ppakāra-saddā samānatthā dissanti. Tasmā yathāvidhā vipassīdayo bhagavanto, ayampi bhagavā tathāvidhoti **tathāgato**, yathāyuttā ca te bhagavanto, ayampi

bhagavā tathāyuttoti **tathāgato**. Atha vā yasmā saccam taccham tathanti ñāṇassetam adhivacanam, tasmā tathena ñāṇena āgatoti **tathāgato**. Evampi tathāgata-saddassa attho veditabbo.

Pahāya kāmādimale yathā gatā,  
Samādhiñāṇehi vipassīdayo;  
Mahesino sakyamunī jutindharo,  
Tathā gato tena mato tathāgato.

Tathañca dhātāyatanādilakkhaṇam,  
Sabhāvasāmaññavibhāgabhedato;  
Sayambhuñāṇena jino samāgato,  
Tathāgato vuccati sakyapuṅgavo.

Tathāni saccāni samantacakkhunā,  
Tathā idappaccayatā ca sabbaso;  
Anaññaneyyena yato vibhāvitā,  
Yāthāvato tena jino tathāgato.

Anekabhedāsupi lokadhātusu,  
Jinassa rūpāyatanādigocare;  
Vicitrabhedam tathameva dassanam,  
Tathāgato tena samantalocano.

Yato ca dhammam tathameva bhāsati,  
Karoti vācāyanulomamattano;  
Guṇehi lokam abhibhuyyirīyati,  
Tathāgato tenapi lokanāyako.

Yathābhinihāramato yathāruci,  
Pavattavācā tanucittabhāvato;  
Yathāvidhā yena purā mahesino,  
Tathāvidho tena jino tathāgatoti. (itivu. aṭṭha. 38; dī. ni. ṭī. 1.7 cūlasīlavaṇṇanā);

**Ārakattā**tiādīnaṃ padānaṃ attho **visuddhimagge** (visuddhi. 1.125) buddhānussatisaṃvaṇṇanāya vuttanayeneva veditabbo. **Sammā sāmañca sabbadhammānaṃ buddhattā**ti imināssa paropadesarahitassa sabbākārena sabbadhammāvabodhanasamatthassa ākaṅkhāpaṭibaddhavuttino anāvaraṇañāṇasaṅkhātassa sabbaññutaññāṇassa adhigamo dassito.

Nanu ca (itivu. aṭṭha. 38) sabbaññutaññāṇato aññaṃ anāvaraṇañāṇam, aññathā cha asādhāraṇañāṇāni buddhaññāṇānīti vacanam virujjheyāti? Na virujjhati visayappavattibhedavasena aññehi asādhāraṇañāṇabhāvadassanattam ekasseva ñāṇassa dvidhā vuttattā. Ekameva hi tam ñāṇam anavasesasaṅkhatāsaṅkhatasammuditdhammavisayatāya sabbaññutaññāṇam, tattha ca āvaraṇābhāvato nissāṅgacāramupādāya anāvaraṇañāṇanti vuttam. Yathāha **paṭisambhidāyam** (paṭi. ma. 1.119) “sabbam saṅkhatāsaṅkhatamanavasesam jānāti ti sabbaññutaññāṇam, tathāvaraṇam natthīti anāvaraṇañāṇa”ntiādi, tasmā natthi nesam atthato bhedo, ekantena cetam evamicchitabbam, aññathā sabbaññutānāvaraṇañāṇānaṃ sāvarenaṭā asabbadhammārammaṇatā ca āpajjeyya. Na hi bhagavato ñāṇassa aṇumatampi āvaraṇam atthi, anāvaraṇañāṇassa ca asabbadhammārammaṇabhāve yattha tam nappavattati, tathāvaraṇasabbhāvato anāvaraṇabhāvoyeva na siyā. Atha vā pana hotu aññaṃeva anāvaraṇañāṇam sabbaññutaññāṇato, idha pana sabbattha appaṭihatavuttitāya anāvaraṇañāṇanti sabbaññutaññāṇameva adhippetam, tassa cādhigamena bhagavā sabbaññū sabbavidū sammāsambuddhoti ca vuccati, na sakimeva sabbadhammāvabodhato. Tathā ca vuttam

**paṭisambhidāyaṃ** (paṭi. ma. 1.162) “vimokkhantikametam buddhānam bhagavantānam bodhiyā mūle saha sabbaññutaññāṇassa paṭilābhā sacchikā paññatti yadidaṃ buddho”ti. Sabbadhammāvabodhanasamatthaññāṇasamadhigamena hi bhagavato santāne anavasesadhamme paṭivijjhitaṃ samatthā ahoṣīti.

Etthāha – kiṃ panidaṃ ñāṇaṃ pavattamānaṃ sakimyeva sabbasmiṃ visaye pavattati, udāhu kamenāti. Kiñcetha – yadi tāva sakimyeva sabbasmiṃ visaye pavattati, atītānāgatapaccuppannaajjhatabhiddhādibhedena bhinnānaṃ saṅkhatadhammānaṃ asaṅkhatasammutidhammānaṃca ekajjhaṃ upaṭṭhāne dūrato cittapaṭaṃ avekkhantassa viya paṭivibhāgenāvabodho na siyā, tathā ca sati “sabbe dhammā anattā”ti vipassantānaṃ anattākārena viya sabbe dhammā anirūpitarūpena bhagavato ñāṇassa visayā hontīti āpajjati. Yepi “sabbañeyyadhammānaṃ ṭhitalakkhaṇavisayaṃ vikapparahitaṃ sabbakālaṃ buddhānaṃ ñāṇaṃ pavattati, tena te sabbavidūti vuccanti. Evañca katvā ‘caraṃ samāhito nāgo, tiṭṭhantopi samāhito’ti idampi vacanaṃ suvuttaṃ hoti”ti vadanti, tesampi vuttadosānativatti. Ṭhitalakkhaṇārammaṇatāya hi atītānāgatasammutidhammānaṃ tadabhāvato ekadesavisayameva bhagavato ñāṇaṃ siyā, tasmā sakimyeva ñāṇaṃ pavattatīti na yujjati.

Atha kamena sabbasmiṃ visaye ñāṇaṃ pavattati, evampi na yujjati. Na hi jātibhūmisabhāvādivasena disādesakālādivasena ca anekabhedabhinne neyye kamena gayhamāne tassa anavasesapaṭivedho sambhavati apaniyantabhāvato ñeyyassa. Ye pana “atthassa avisaṃvādanato ñeyyassa ekadesaṃ paccakkhaṃ katvā sesepi evanti adhimuccivā vavatthāpanena sabbaññū bhagavā, tañca ñāṇaṃ ananumānikaṃ saṃsayābhāvato. Saṃsayānubandhañhi loke anumānañña”nti vadanti, tesampi taṃ na yuttaṃ. Sabbassa hi appaccakkhabhāve atthassa avisaṃvādanena ñeyyassa ekadesaṃ paccakkhaṃ katvā sesepi evanti adhimuccivā vavatthāpanassa asambhavato. Yañhi taṃ sesaṃ, taṃ appaccakkhanti. Atha tampi paccakkhaṃ, tassa sesabhāvo eva na siyāti? Sabbametam akāraṇaṃ. Kasmā? Avisayavicāraṇabhāvato. Vuttañhetam bhagavatā “buddhavisayo bhikkhave, acinteyyo na cintetabbo, yo cinteyya, ummādassa vighātassa bhāgī assā”ti (a. ni. 4.77). Idaṃ panettha sannitṭhānaṃ – yaṃ kiñci bhagavatā ñātuṃ icchitaṃ sakalamekadeso vā, tattha appaṭihata vuttitāya paccakkhato ñāṇaṃ pavattati, nicasamādhānañca vikkhepābhāvato, ñātuṃ icchitassa ca sakalassa avisaṃvādanena tassa ākaṅkhapaṭibaddhānaṃ na siyā, ekanteneva ca sā icchitabbā “sabbe dhammā buddhassa bhagavato āvajjanapaṭibaddhā ākaṅkhapaṭibaddhā manasikārapaṭibaddhā cittuppādapaṭibaddhā”ti (mahāni. 69, 156; cūḷani. 85; paṭi. ma. 3.5) vacanato. Atītānāgatavisayampi bhagavato ñāṇaṃ anumānāgamatakkagahaṇavirahitattā paccakkhameva.

Nanu ca etasmimpi pakkhe yadā sakalaṃ ñātuṃ icchitaṃ, tadā sakimyeva sakalavisayatāya anirūpitarūpena bhagavato ñāṇaṃ pavattheyyāti vuttadosānativattiyevāti? Na, tassa visodhitattā. Visodhito hi so buddhavisayo acinteyyoti. Aññāthā pacurajanaññāṇasamānavuttitāya buddhānaṃ bhagavantānaṃ ñāṇassa acinteyyatā na siyā, tasmā sakaladhammārammaṇampi taṃ ekadhammārammaṇaṃ viya suvavatthāpīteyeva te dhamme katvā pavattatīti idamettha acinteyyaṃ, anantañca ñāṇaṃ ñeyyaṃ viya. Vuttañhetam “yāvatakaṃ ñeyyaṃ, tāvatakaṃ ñāṇaṃ. Yāvatakaṃ ñāṇaṃ, tāvatakaṃ ñeyyaṃ. Neyyapariyantikaṃ ñāṇaṃ, ñāṇapariyantikaṃ ñeyya”nti (mahāni. 69, 156; cūḷani. 85; paṭi. ma. 3.5). Evamekajjhaṃ, viṣuṃ sakim, kamena vā icchānurūpaṃ sammā sāmāñca sabbadhammānaṃ buddhattā sammāsambuddho.

**Tanti** yathāvuttaṃ pathavīādibhedam. **Pariññātanti** parito samantato sabbākārato ñātaṃ, taṃ parijānitabbabhāvaṃ kiñci asesetvā ñātanti attho. Ayameva hi attho “pariññātanta”nti imināpi padena pakāsītoti dassento “**pariññātantaṃ nāmā**”tiādīmāha. **Tena tena maggena kilesappahānena viseso natthīti** idaṃ taṃtaṃ maggavajjhakilesānaṃ buddhānaṃ sāvakānañca tena tena maggeneva pahātabbabhāvasāmāññaṃ sandhāya vuttaṃ, na sāvakehi buddhānaṃ kilesappahānavisesābhāvato. Tathā hi sammāsambuddhā eva savāsanakilese jahanti, na sāvakā. **Ekadesamevāti** attano santānagatameva. Sasantatipariyāpannadhammapariññāmattepi hi catusaccakammaṭṭhānabhāvanā

samijjhati. Tenevāha – “imasmiṃyeva byāmamatte kaḷevare sasaññimhi samanake lokañca paññapemi lokasamudayañca paññapemī”tiādi (saṃ. ni. 1.107; a. ni. 4.45). **Aṇuppanaṇampi ...pe... natthi**, yato chattiṃsakotiṣatasahassamukhena buddhānaṃ mahāvajiraññaṃ pavattatīti vadanti.

Tathāgatavārasattamanayavaṇṇanā niṭṭhitā.

### Tathāgatavāraṭṭhamanayavaṇṇanā

**13. Purimataṇhāti** purimataresu bhavesu nibbattā paccuppannattabhāvahetubhūtā taṇhā. Taggahaṇeṇeva ca atītaddhasaṅgahā avijjāsankhārā saddhiṃ upādānena saṅgahitāti daṭṭhabbā. **Etthāti** “bhavā jāti”ti etasmiṃ pade. **Tena upapattibhavenāti** “bhavā jāti”ti jātisīsena vuttaupapattibhavena. **Bhūtassāti** nibbattassa. So pana yasmā satto nāma hoti, tasmā vuttaṃ “**sattassā**”ti. **Evañca jānitvāti** iminā “**bhūtassa jarāmaraṇa**”nti etthāpi “iti viditvā”ti idaṃ padaṃ ānetvā yojetabbanti dasseti.

Yadipi tebhūmakā upādānakkhandhā “yaṃ kiñci rūpa”ntiādinā (vibha. 2; ma. ni. 1.244) ekādasasu okāsesu pakkhipitabbā sammasitabbā ca, te pana yasmā bhagavatā “kimhi nu kho satī jarāmarāṇaṃ hoti, kiṃpaccayā jarāmarāṇa”ntiādinā (dī. ni. 2.57; saṃ. ni. 2.4, 10) paṭiccasamuppādamukhena sammasitā, paṭiccasamuppādo ca pavattipavattihetubhāvato purimasaccadvayameva hoti, tasmā tadabhisamayaṃ “maññanābhāvahetu paccayākārapaṭivedho”ti vibhāvento “**yaṃ bodhirukkhamūle...pe... dassento**”ti āha. Saṃkhippanti ettha avijjādayo viññāṇādayo cāti saṅkhepā, atīte hetuādayo “hetu, phala”nti evaṃ saṃkhippantīti vā saṅkhepā, avijjādayo viññāṇādayo ca. Saṅkhepa-saddo bhāgādhivacananti daṭṭhabbo. Tenāha “**koṭṭhāsāti attho**”ti. Te pana atīte hetusaṅkhepo, etarahi phalasaṅkhepo, etarahi hetusaṅkhepo, āyatim phalasaṅkhepoti cattāro saṅkhepā etassāti catusaṅkhepo, taṃ **catusaṅkhepaṃ**. Hetuphalasandhi, phalahetusandhi, puna hetuphalasandhīti evaṃ tayo sandhī etassāti tisandhi, taṃ **tisandhim**. Atītapaccuppannānāgatabhedā tayo addhā etassāti tiyaddho, taṃ **tiyaddhaṃ**. Sarūpato avuttāpi tasmim tasmim saṅkhepe ākirīyanti avijjāsankhārādiggahaṇehi pakāsīyantīti **ākārā**, atītahetuādīnaṃ vā pakārā ākārā, te ekekasāṅkhepe pañca pañca katvā vīsati ākārā etassāti vīsatakkāro, taṃ **vīsatakkāraṃ**.

**Esa sabboti** esa catusaṅkhepādipabhedo anavaseso paccayo. **Paccayalakkhaṇenāti** paccayabhāvena attano phalassa paṭisandhiviññāṇassa paccayabhāvena, avinābhāvalakkhaṇenāti attho. Yathā hi taṇhaṃ vinā avijjādayo viññāṇassa paccayā na honti, evaṃ taṇhāpi avijjādike vināti. Ettha dukkhaggahaṇeṇa viññāṇāmarūpasalāyatanaphassavedanānaṃ, bhavaggahaṇeṇa ca taṇhāsankhārupādānaṃ gahitāti vuttanāyā evāti na uddhaṭṭhā.

Idāni te vīsati ākāre paṭisambhidāmaggapāliya vibhāvetuṃ “**evamete**”tiādi vuttaṃ. Tattha (paṭi. ma. aṭṭha. 1.47) **purimakammabhavasminti** purime kammabhāve, atītajātiyaṃ kammabhāve kayiramāneti attho. **Moho avijjāti** yo tadā dukkhādīsu moho, yena mūlho kammaṃ karoti, sā avijjā. **Āyūhanā saṅkhārāti** taṃ taṃ kammaṃ karonto dānupakaraṇādi sajjanādivasena yā purimacetanāyo, te saṅkhārā. Paṭiggāhakānaṃ pana hatthe deyyadhammaṃ patiṭṭhāpayato cetanā bhavo. Ekāvajjanajavanesu vā purimā cetanā āyūhanā saṅkhārā, sattamā bhavo. Yā kāci vā pana cetanā bhavo, sampayuttā āyūhanā saṅkhārā. **Nikanti taṇhāti** yaṃ kammaṃ karontassa upapattibhave tassa phalassa nikāmanā patthanā, sā taṇhā nāma. **Upagamaṇaṃ upādānanti** yaṃ kammabhāvassa paccayabhūtaṃ “idaṃ kammaṃ katvā asukasmim nāma thāne kāme sevissāmi ucchijjissāmi”tiādinā nayena pavattaṃ upagamaṇaṃ gahaṇaṃ parāmasanaṃ, idaṃ upādānaṃ nāma. **Cetanā bhavoti** dvīsu atthavikappesu vuttassa āyūhanassa avasāne vuttacetanā, tatiye pana āyūhanasampayuttacetanā bhavo. **Iti ime pañca dhammā purimakammabhavasmim idha paṭisandhiyā paccayāti** ime yathāvuttā mohādayo pañca dhammā atītakammabhavasiddhā etarahi paṭisandhiyā paccayabhūtāti attho.

**Idha paṭisandhiviññāṇanti** yaṃ bhavantarapaṭisandhānavasena uppannattā paṭisandhīti vuccati, taṃ viññāṇaṃ. **Okkanti nāmarūpanti** yā gabbhe rūpārūpadhammānaṃ okkanti āgantvā pavasantī viya,

idaṃ nāmarūpaṃ. **Pasādo āyatananti** idaṃ cakkhādipañcāyatanavasena vuttaṃ. **Phuṭṭho phassoti** yo ārammaṇaṃ phuṭṭho phusanto uppanno, ayaṃ phasso. **Vedayitaṃ vedanāti** yaṃ paṭisandhiviññāṇena vā saḷāyatanapaccayena vā phassena sahuppannaṃ vipākavedayitaṃ, sā vedanā. **Iti ime...pe... paccayāti** ime viññāṇādayo pañca koṭṭhāsikā dhammā purimabhava katassa kamma kammavaṭṭassa paccayā, paccayabhāvato taṃ paṭicca idha etarahi upapattibhavasmiṃ upapattibhavabhāvena vā hotīti attho.

**Idha paripakkattā āyatanānaṃ mohoti** paripakkāyatanassa kammakaraṇakāle asammoḥaṃ dasseti. Daharassa hi cittappavatti bhavaṅgabahulā yebhuyyena bhavantarajanakakammāyūhanasamattā na hotīti. **Kammakaraṇakāleti** ca iminā sabbo kamma paccayabhūto sammoho gahito, na sampayuttova. Sesam vuttanayameva.

**Padayojanāyāti** “tasmā”tiādīnaṃ padānaṃ sambandhena saha. **Atthanigamananti** imasmiṃ aṭṭhamavāre desanathanigamaṇaṃ. **Nandīti evaṃ vuttānaṃ sabbataṇhānanti** “nandī dukkhassa mūla”nti evaṃ nandanatthasāmaññato ekavacanena vuttānaṃ sabbataṇhānaṃ santānārammaṇasampayuttadhammappavattiākārādibhedena anekabhedānaṃ sabbāsaṃ taṇhānaṃ. **Khayavevacanānevāti** samucchadapahānavevacanāneva. “Accantakkhayā”ti hi vuttaṃ. **Catumaggakiccasādhāraṇametanti** catunnaṃ ariyamaggānaṃ pahānakiccassa sādharmaṇaṃ sāmaññato gahaṇaṃ etaṃ khayādivacananti attho. Tesam pana maggānaṃ kamena pavattanaṃ kiccakameneva dassetuṃ “**virāgā**”tiādī vuttanti dassento “**tato...pe... yojetabba**”nti āha. Tathā satipi khayādisaddānaṃ pahānapariyāyabhāve pahātabbāya pana visayabhedabhinnāya taṇhāya anavasesato pahīnabhāvadīpanatthaṃ khayādiyāntaraggahaṇaṃ katanti dassento “**yāhī**”tiādīmāha. Yathāvuttasañjananādihetubhūṭāya taṇhāya pahīnattā tappahānadīpanaṃ katvā vuccamānaṃ khayādivacanānaṃ na kathañci dhammataṃ vilometīti vuttaṃ “**na kiñci virujjhati**”ti.

**Uttaravirahitanti** attānaṃ uttaritūṃ samatthattā uttarena adhikena virahitaṃ. Ayañcassa uttaravirahatā attano seṭṭhabhāvenāti āha “**sabbasetṭha**”nti. Yathā sammā-saṃ-saddā “aviparītaṃ, sāma”nti imesaṃ padānaṃ atthaṃ vadanti, evaṃ pāsamsasobhanatthepīti āha “**sammā sāmāñca bodhiṃ pasatthaṃ sundarañca bodhi**”nti. Bujjhi ettha paṭivijjhi cattāri ariyasaccāni, sabbampi vā neyyanti rukkho **bodhi**, bujjhati etenāti pana maggo **bodhi**, tathā sabbaññutaññānaṃ, nibbānaṃ pana bujjhitabbato **bodhīti** ayamettha sādhanavibhāgo daṭṭhabbo. Paṇṇattiyampi attheva bodhi-saddo “**bodhirājakumāro**”tiādīsu (ma. ni. 2.324; cūḷava. 268). **Apareti** sārasamāsācariyā. Ettha ca saupasaggassa bodhi-saddassa atthuddhāre anupasaggānaṃ udāharaṇe kāraṇaṃ heṭṭhā vuttameva.

Lokuttarabhāvato vā tathāpi heṭṭhimamaggānaṃ viya tatuttarimaggābhāvato ca “siyā nu kho anuttarā bodhī”ti āsaṅkaṃ sandhāya taṃ vidhamitūṃ “**sāvakāna**”ntiādī vuttaṃ. Abhinīhārasampattiyā phalavisesabhūtehi ñāṇavisesehi ekaccehi sakalehi saddhiṃ samijjhamāno maggo ariyānaṃ taṃ taṃ ñāṇavisesādiṃ dento viya hotīti tassa asabbagunaḍāyakattaṃ vuttaṃ. Tena anaññasādhāraṇābhinihārasampadāsiddhassa niraṭṭisaya-guṇānubandhassa vasena arahattamaggo anuttarā bodhī nāma hotīti dasseti. Sāvakaṇāmiññaṇaṃ aññehi sāvakehi asādhāraṇaṃ mahāsāvakaṇāmyeva āveṇikaṃ ñāṇaṃ. **Paccekaṃ saccāni buddhavantoti paccekabuddhā**. Nanu ca sabbepi ariyā paccekameva saccāni paṭivijjhanti dhammassa paccattaṃ vedanīyabhāvato? Saccam, nayidamīdisaṃ paṭivedhaṃ sandhāya vuttaṃ, yathā pana sāvakaṃ aññasannissayena saccāni paṭivijjhanti paratoghosena vinā tesam dassanamaggassa anuppajjanato, yathā ca sammāsambuddho aññesaṃ nissayabhāvena saccāni abhisambujjhanti, na evamete, ete pana aparaneyyā hutvā aparīṇāyakabhāvena saccāni paṭivijjhanti. Tena vuttaṃ “**paccekaṃ saccāni buddhavantoti paccekabuddhā**”ti.

Itīti karīyati uccārīyatīti **itikāro**, iti-saddo. **Kāraṇattho** aniyamarūpenāti adhippāyo, tasmāti vuttaṃ hoti. Tenāha “**yasmā cā**”ti. Pubbe pana iti-saddaṃ pakāratthaṃ katvā “evaṃ jānitvā”ti vuttaṃ, idhāpi taṃ pakāratthameva katvā atho yujjati. Kathaṃ? **Viditvāti** hi padaṃ hetuatthe daṭṭhabbaṃ “paññāya cassa disvā”ti (ma. ni. 1.271), “ghataṃ pivitvā balaṃ hotī”ti ca evamādīsu viya, tasmā pakāratthepe itī-



sadde paṭiccasamuppādassa viditattāti ayam attho labbhateva. **Paṭiccasamuppādam viditvāti** etthāpi hetuatthe viditvā-sadde yathāvuttā atthayojanā yujjateva. Ettha ca paṭhamavikappe paṭiccasamuppādassa viditattam maññanābhāvassa kāraṇam vatvā taṇhāmūlakassa paṭiccasamuppādassa dassitattā ettha taṇhāppahānaṃ sammāsambodhiyā adhigamanakāraṇam uddhatanti dassitam, tasmā **“pathaviṃ na maññati”**tiādi nigamaṇam daṭṭhabbam. Dutiyaavikappe pana paṭiccasamuppādavedanaṃ taṇhāppahānassa kāraṇam vuttam, tam abhisambodhiyā abhisambodhimaññanābhāvassāti ayamattho dassitoti ayametesam dvinnam atthavikappānaṃ viseso, tasmā **“nandī dukkhassa mūla”**nti vuttam.

Tam kuto labbhatīti codanaṃ sandhāyāha **“yatta yatta hī”**tiādi. **Sāsanayutti** ayam sāsanepi evaṃ sambandho dissatīti katvā. Lokepi hi yaṃ-taṃ-saddānaṃ abyabhicārisambandhatā siddhā.

**Evaṃ abhisambuddhoti vadāmīti** abhisambuddhabhāvassa gahitattā, asabbaññunā evaṃ desetum asakkuṇeyyattā ca **“sabbaññutaññāṇam dassento”**tiādimāha.

**Vicitrānāyadesanāvīlāsuyuttanti** puthujjanavārādivibhāgabhinnehi vicittehi tanti nayehi, lakkhaṇakammataṇhāmaññanādivibhāgabhinnehi vicittehi atthanayehi, abhinandanapaccayākārādivisesāpadesasiddhena desanāvīlāsena ca yuttam. **Yathā te na jānanti, tathā desesīti** imināpi bhagavato desanāvīlāsaṃyeva vibhāveti. **Taṃyeva kira pathavīti** ettha pathavīgahaṇam upalakkhaṇamattam āpādivasenapi, tathā **“kīdisā nu kho idha pathavī adhippetā, kasmā ca bhūtarūpāniyeva gahitāni, na sesarūpāni”**tiādināpi tesam samsayuppatti niddhāretabbā. Atha vā **katham nāmidanti** ettha **iti**-saddo pakārattho. Tena imasmiṃ sutte sabbāyapi tesam samsayuppattiyā pariggahitattā daṭṭhabbā. **Antanti** mariyādam, desanāya antam paricchedanti attho, yo anusandhīti vuccati. **Koṭinti** pariyantaṃ, desanāya pariyosānanti attho. Ubhayena sutte ajjhāsayānusandhi yathānusandhīti vadati.

**Antarākathāti** kammaṭṭhānāmanasikārauddesaparipucchādīnaṃ antarā aññā ekā tathā. **Vippakathāti** anīṭṭhitā sikkham appattā. **Kaṅkhaṇānurūpenāti** tasmim khaṇe dhammasabhāyaṃ sannipatitānaṃ bhikkhūnaṃ ajjhāsayānurūpena. **Idanti** idāni vuccamānaṃ mūlapariyāyājātakam.

**Disāpāmokkhoti** paṇḍitabhāvena sabbadisāsu pamukhabhūto. **Brāhmaṇoti** brahmaṃ aṇatīti brāhmaṇo, mante sajjhāyatīti attho. **Tiṇṇam vedānanti** iruveda-yajuveda-sāmaavedānaṃ. **Pāragūti** atthaso byañjanaso ca pāram pariyantaṃ gato. Saha nighaṇḍunā ca keṭubhena cāti **sanighaṇḍukeṭubhā**, tesam. **Nighaṇḍūti** rukkhādīnaṃ vevacanappakāsakaṃ sattham. **Keṭubhanti** kiriyākappavikappo, kavīnaṃ upakārāvahaṃ sattham. Saha akkharappabhedanāti **sākkharappabhedā**, tesam, sikkhāniruttisahitānanti attho. **Itihāsapañcamānanti** āthabbaṇavedaṃ catuttham katvā **“itiha asa, itiha asā”**ti idisavacanapaṭisaṃyutto purāṇakathāsankhāto itihāso pañcamo etesanti itihāsapañcamā, tesam. Padaṃ tadavasesaṃca byākaraṇam kāyati ajjheti vedeti cāti **padako**, veyākaraṇo. **Lokāyatam** vuccati vitaṇḍasattham. Mahāpurisānaṃ buddhādīnaṃ lakkhaṇādīpanagantho **mahāpurisalakkhaṇam**. Tesu anūno paripūrakārīti **anavayo**.

**Manteti** vede. Yadipi vedo **“manto, brahmaṃ, kappo”**ti tividho, manto eva pana mūlavedo, tadatthavivaraṇam brahmaṃ, tattha vuttanayena yaññakiriyāvidhānaṃ **kappo**. Tena vuttam **“manteti vede”**ti. **Paṇḍitāti** paññāvanto. Tathā hi te puthupaññātāya **bahum** sahasadvisahassādiparimāṇam gantham pākātam katvā **gaṇhanti** uggaṇhanti, javanapaññātāya **lahum** sīgham **gaṇhanti**, tikkhapaññātāya **suṭṭhu** avirajjhantā **upadhārenti**, satinepakkasampattiyā **gahitaṅca nesam na vinassati** na sammussatīti. **Sabbampi sippanti** atthārasavijjātṭhānādibhedam sikkhitabbaṭṭhena sippanti saṅkhyam gatam sabbam bāhirakasattham mokkhāvahasammatampi na mokkham āvahaṭīti āha **“diṭṭhadhammasamparāyahita”**nti. **Sampiṇḍitā hutvāti** yathā mittā, tathā piṇḍitavasena sannipatitā hutvā. **“Evaṃ gayhamāne ādinā virujjheyya, evaṃ antenā”**ti cintentā ñātuṃ icchitassa atthassa pubbenāparaṃ aviruddham nicchayaṃ gahetuṃ asakkontā **na ādim**, na antam addasaṃsu.

**Lomasānī**ti lomavantāni, ghanakesamassuvānīti attho. Kesāpi hi lomaggahaṇena gayhanti yathā “lomanakhaṃ phusitvā suddhi kātabbā”ti. Kaṇṇaṃ viyāti **kaṇṇaṃ**, paññā, tāya sutvā kātabbakiccasādhanato vuttaṃ “**kaṇṇavāti paññavā**”ti.

Yasmā sattānaṃ gacchante gacchante kāle āyuvanṇādiparikkhaya hoti, tasmā taṃ kālena kataṃ viya katvā vuttaṃ “**nesaṃ āyu...pe... khādatīti vuccati**”ti.

**Abhiññāyāti** kusalādibhedam khandhādibhedañca desetabbaṃ dhammaṃ, veneyyānañca āsayānusayacariyāvimuttiādibhedam, tassa ca nesaṃ desetabbappakāraṃ yāthāvato abhijānitvā. **Dhammaṃ desemīti** diṭṭhadhammikasamparāyikanibbānahitāvahaṃ saddhammaṃ kathayāmi. **No anabhiññāyāti** yathā bāhirakā asammāsambuddhattā vuttavidhiṃ ajānantāyaṃ kiñci takkapariyāhataṃ vīmaṃsānucaritaṃ sayampañātibhānaṃ kathenti, evaṃ na desemīti attho. **Sanidānanti** sakāraṇaṃ, veneyyānaṃ ajjhāsayaavasena vā pucchāya vā aṭṭhuppattiyā vā sanimittaṃ hetuudāharaṇasahitañcāti attho. **Sappāṭihāriyanti** sanissaraṇaṃ sappāṭiharaṇaṃ, paccaṇīkapaṭiharaṇena sappāṭihāriyameva katvā desemīti attho. Apare pana “yathārahaṃ iddhiādesanānusāsaniṃpāṭihāriyasahita”nti vadanti, anusāsaniṃpāṭihāriyahitā pana desanā natthīti. Hitūpadesanā **ovādo**, sā eva **anusāsani**. Anotiṇṇavatthuvīsayo vā **ovādo**, otiṇṇavatthuvīsayā **anusāsani**. Paṭhamūpadeso vā **ovādo**, itarā **anusāsani**. **Alaṅca panāti** yuttameva. **Niṭṭhamagamāsīti** atthasiddhiṃ gatā.

Tathāgata vāraaṭṭhamanayaṇṇanā niṭṭhitā.

Ayaṃ tāvettha aṭṭhakathāya līnatthavaṇṇanā.

### Nettinayavaṇṇanā

Idāni (dī. ni. ṭī. 1.149; saṃ. ni. ṭī. 1.1.nettinayavaṇṇanā; a. ni. ṭī. nettinayavaṇṇanā) pakaraṇanayena pāḷiyā atthavaṇṇanaṃ karissāma. Sā panāyaṃ atthavaṇṇanā yasmā desanāya samuṭṭhānapayojanabhājanesu piṇḍatthesu ca niddhāritesu sutarā hoti suviññeyyā ca, tasmā suttadesanāya samuṭṭhānādīni paṭhamaṃ niddhārayissāma. Tattha **samuṭṭhānaṃ** tāva pariyattim nissāya mānuppādo, **payojanaṃ** mānamaddanaṃ. Vuttañhi aṭṭhakathāyaṃ “sutapariyattim...pe... ārabhī”ti. Apica veneyyānaṃ pathavīādibhūtādibhedabhinne sakkāye puthujjanassa sekkhādiariyassa ca saddhiṃ hetunā maññānāmaññānavasena pavattivibhāgānavabodho **samuṭṭhānaṃ**, yathāvuttavibhāgāvabodho **payojanaṃ**, veneyyānañhi vuttappakāre visaye yathāvuttānaṃ puggalaṇaṃ saddhiṃ hetunā maññānāmaññānavasena pavattivibhāgāvabodho **payojanaṃ**.

Apica **samuṭṭhānaṃ** nāma desanānidānaṃ. Taṃ sādharmaṇaṃ asādhāraṇanti duvidhaṃ. Tattha sādharmaṇampi ajjhattikabāhirabhedato duvidhaṃ. Tattha **sādhāraṇaṃ ajjhattikasamuṭṭhānaṃ** nāma lokanāthassa mahākaruṇā. Tāya hi samussāhitassa bhagavato veneyyānaṃ dhammadesanāya cittaṃ udapādi. Taṃ sandhāya vuttaṃ “sattesu ca kāruṇīyatam paṭicca buddhacakkhunā lokaṃ volokesī”tiādi (ma. ni. 1.283; saṃ. ni. 1.172; mahāva. 9). Ettha ca hetāvattthāyapi mahākaruṇāya saṅgaho daṭṭhabbo yāvadeva saṃsāramahoghato saddhammadesanāhatthadānehi sattasantāraṇattham taduppattito. Yathā ca mahākaruṇā, evaṃ sabbaññutaññānaṃ dasabalaññādīni ca desanāya abbhantarasamuṭṭhānabhāve vattabbāni. Sabbampi hi ñeyyadhammaṃ, tesam desetabbappakāraṃ, sattānañca āsayānusayādiṃ yāthāvato jānanto bhagavā thānāṭṭhānādīsu kosallena veneyyajjhāsayanurūpaṃ vicittanayadesanaṃ pavattesīti. **Bāhiraṃ** pana **sādhāraṇaṃ samuṭṭhānaṃ** dasasahassabrahmapariyāritassa sahampatimahābrahmuno ajjhesaṇaṃ. Tadajjhesanuttarakālañhi dhammagambhīratāpaccavekkhaṇājanitaṃ apposukkataṃ paṭippassambhetvā dhammassāmī dhammadesanāya ussāhajāto ahosi. Asādhāraṇampi abbhantarabāhirabhedato duvidhameva. Tattha **abbhantaram** yāya mahākaruṇāya yena ca desanāññāna idam suttam pavattitam, tadubhayaṃ veditabbaṃ. **Bāhiraṃ** pana pañcasatānaṃ brāhmaṇajātikānaṃ bhikkhūnaṃ pariyattim nissāya mānuppādanaṃ, vuttameva taṃ **aṭṭhakathāyaṃ**.

**Payoĵanampi** sādĥāraṇaṃ asādĥāraṇanti duvidhaṃ. Tattha **sādĥāraṇaṃ** anukkamena yāva anupādāparinibbānaṃ vimuttirasattā bhagavato desanāya. Tenevāha “etadatthā tathā, etadatthā mantanā”tiādi (pari. 366). Eteneva ca saṃsāracakkani vatti saddhammacakkappavatti sassatādimicchāvādanirākaraṇaṃ sammāvādapurekkhāro akusalamūlasamūhananaṃ kusalamūlasaṃropanaṃ apāyadvārapidahanaṃ saggamokkhadvāravivaraṇaṃ pariyaṭṭhānavūpasamanaṃ anusayasamuggĥātaṃ “mutto mocessāmi”ti (udā. aṭṭha. 18; itivu. aṭṭha. 38) purimapaṭiññāvisaṃvādanaṃ tappaṭipakkhamāraṇaṃ rathavisaṃvādanaṃ titthiyadhammanimmathanaṃ buddhadhammapaṭiṭṭhāpananti evamādīnampi payoĵanānaṃ saṅgaho daṭṭhabbo. **Asādĥāraṇaṃ** pana tesaṃ bhikkhūnaṃ mānamaddanaṃ. Vuttañcetamaṃ **aṭṭhakathāyaṃ** (ma. ni. aṭṭha. 1.1) “desanākusalo bhagavā mānabhañjanatthaṃ ‘sabbadhammamūlapariyāya’nti desanaṃ ārabhī”ti. Ubhayampetaṃ bāhiyameva. Sace pana veneyyasantaṇagatampi desanābalasiddhisankhātamaṃ payoĵanaṃ adhippāyasamijjhanabhāvato yathādhippetatthasiddhiyā yathākāruṇikassa bhagavatopi payoĵanamevāti gaṇheyya, iminā pariyaēyena sabbāntarāṭṭhiyaṃ veditaṭṭhā.

Apica veneyyānaṃ pathavīdibhūtādivibhāgabhinne sakkāye puthujjanassa sekkhādiariyassa ca saddhiṃ hetunā maññānāmaññānavasena pavattivibhāgānavabodho samuṭṭhānaṃ, imassa suttassa yathāvuttavibhāgānavabodho payoĵananti vuttovāyamattho. Veneyyānañhi vuttappakāre visaye yathāvuttānaṃ puggalānaṃ saddhiṃ hetunā maññānāmaññānānaṃ vasena pavattivibhāgānavabodho imaṃ desanaṃ payoĵeti “tannipphādanaparāyaṃ desanā”ti katvā. Yañhi desanāya sādĥetabbaṃ phalaṃ, taṃ ākaṅkhitabbattā desakaṃ desanāya payoĵetiṭi payoĵananti vuccati. Tathā veneyyānaṃ sabbaso ekadesato ca maññānānaṃ appahānaṃ, tattha ca ādināvādassanaṃ, niraṅkusānaṃ maññānānaṃ anekākāravohārassa sakkāye pavattivisesassa ajānaṃ, tattha ca pahīnāmaññānānaṃ paṭipattiyā ajānaṃ, taṇhāmukhena paccayākārassa ca anavabodhoti evamādīni ca payoĵanāni idha veditaṭṭhāni.

Bhūmittayapariyāpannesu asaṅkhātadhammavippakatapariññādikiccasaṅkhātadhammānaṃ sammāsambuddhassa ca paṭipattiṃ ajānantā asaddhammassavanadhāraṇaparicayamanasikāraparā saddhammassavana-dhāraṇaparicayapaṭivedhavimukhā ca veneyyā imissā desanāya **bhājanaṃ**. **Piṇḍatthā** pana “assutavā”tiādinā ayonisomanasikārabahulīkāro akusalamūla-samāyogo olīyanātidhāvanāpariggaho upāyavinibaddhānubrūhanā micchābhinivesasamannāgamo avijjātaṇhā-parisuddhi vaṭṭattayānuparamo āsavoghayogaganthāgatitaṇhuppādupādānaviyogo cetokhila-cetovinibaddhaabhinandana-nīvaraṇasaṅgānatikkamo vivādamūlāpariccāgo anusayānupacchedo micchātānavattanaṃ taṇhāmūladhammasannissayatā akusalakammāpathānuyogo sabbakilesa-pariḷhasāraddhakāyaccittatīti evamādayo dīpitā honti. “Pathaviṃ pathavito sañjānāti”tiādinā taṇhāvicaritaniddeso mānājappanā vipariyēsābhiniveso saṅkilesa sakkāyapariggaho bālalakkaṇāpadeso vaṅkattayavibhāvanānuyogo bahukārapaṭipakkhadīpanā tividhanissayasamāsūcanā āsavakkhayakathananti evamādayo dīpitā honti.

## Soḷasahāraṇaṇā

### 1. Desanāhāraṇaṇā

Tattha ye upādānakkhandhadhamme upādāya pathavīdibhūtādivibhedā paññatti, te paññatti paṭipādanabhāvena jātiarāmaṇavisesanadukkha pariyāyena ca vuttā taṇhāvajjā tebhūmakadhammā **dukkhasaccaṃ**. Maññānābhinandanānandīpariyāyehi vuttā taṇhā **samudayasaccaṃ**. Ayaṃ tāva suttantaṇayo. Abhidhammanaye pana yathāvuttataṇhāya saddhiṃ “assutavā”tiādinā dīpitā avijjādayo, maññānāpariyāyena gahitā mānādiṭṭhiyo, bhavapadena gahito kammabhavo cāti sabbepi kilesābhisaṅkhārā **samudayasaccaṃ**. Ubhinnaṃ appavatti **nirodhasaccaṃ**. Ariyadhammaggaṇena, pariññābhikkhusekkhābhīññāgagaṇehi, rāgādikhayavacanehi, sammāsambodhigagaṇena ca **maggasaccaṃ**. Keci pana taṇhākkhayādivacanehi nirodhasaccaṃ uddharanti, taṃ **aṭṭhakathāya** virujjhati tattha taṇhākkhayādināṃ maggācikkabhāvassa uddhaṭṭatā.

Tattha samudayena **assādo**, dukkhena **ādīnavo**, magganirodhehi **nissaraṇaṃ**, tesam bhikkhūnaṃ mānabhañjanaṃ **phalaṃ**, tathā “yathāvuttavibhāgāvabodho”tiādīnā vuttaṃ **payojanañca**. Tassa nipphattikāraṇattā desanāya vicittatā catunnaṃ puggalānaṃ yāthāvato sabhāvūpadhāraṇaṃ **upāyo**, pathavīādīsu puthujjanādīnaṃ pavattidassanāpadesena pathavīādāyo ekantato pariḷāṇitabbā, maññanā ca pahātabbāti ayamettha bhagavato **āṇattīti**. Ayaṃ **desanāhāro**.

## 2. Vicayahāraṇaṇā

Maññanānaṃ sakkāyassa avisesahetubhāvato, kassacipi tattha asesitabbato ca sabbagahaṇaṃ, sabhāvadhāraṇato nissattaniḷḷivato ca dhammagahaṇaṃ, paṭiṭṭhābhāvato āveṇikahetubhāvato ca mūlaggahaṇaṃ, kāraṇabhāvato desanattasambhāvato ca pariḷāyaggahaṇaṃ, sammukhabhāvato sampadānattasambhāvato ca “vo”ti vacanaṃ, tathārūpaṇayogato abhimukhikāraṇato ca “bhikkhave”ti ālapanāṃ. Desetaṃ samatthabhāvato tesam satuppādanatthañca “desessāmī”ti paṭijānaṃ, desetabbatāya paṭiṇṇātabhāvato, yathāpaṭiṇṇāñca desanato “ta”nti paccāmasanaṃ, sotabbabhāvato, savanattassa ca ekantena nipphādanato “suñāthā”ti vuttaṃ. Sakkātabbato, sakkaccakiriyāya eva ca tadatthasiddhito “sādhuka”nti vuttaṃ. Dhammassa manasikāraṇīyato tadadhīnattā ca sabbasampattīnaṃ “manasi karoṭhā”ti vuttaṃ yathāpariṇṇātāya desanāya pariḷāyattabhāvato vitthāratthasambhāvato ca “bhāsissāmī”ti vuttaṃ. Bhagavato sadevakena lokena sirasā sampaṭicchitabbavacanattā, tassa ca yathādhīppetattasādhānato “eva”nti vuttaṃ. Satthu uttamagāraṇatthānabhāvato, tattha ca gāravassa uḷārapuṇṇābhāvato “bhante”ti vuttaṃ. Bhikkhūnaṃ tathākiriyāya nicchitabhāvato vacanālaṅkāro ca “kho”ti vuttaṃ. Savanassa paṭijānitabbato, tathā tehi paṭipannattā ca “paccassosu”nti vuttaṃ paccakkhabhāvato, sakalassapi ekajjhaṃ kāraṇato “eta”nti vuttaṃ.

Vuccamānassa puggalassa lokapariḷāpannattā lokādhārattā ca lokam upādāya “idhā”ti vuttaṃ. Paṭivedhabāhusaccābhāvato pariḷāyattibāhusaccābhāvato ca “assutavā”ti vuttaṃ. Puthūsu, puthu vā janabhāvato “puthujjano”ti vuttaṃ. Anariyadhammavirahato ariyadhammasamannāgamato ca “ariyāna”nti vuttaṃ. Ariyabhāvakarāya paṭipattiyā abhāvato, tattha kosalladamathābhāvato “ariyānaṃ adassāvī”tiādi vuttaṃ. Asantadhammassavanato santadhammasamannāgamato sabbhi pāsamsiyato ca “sappurisāna”nti vuttaṃ. Sappurisabhāvakarāya paṭipattiyā abhāvato, tattha ca kosalladamathābhāvato “sappurisānaṃ adassāvī”tiādi vuttaṃ. Pathavīvatthukānaṃ maññanānaṃ, upari vuccamānānañcamaññanānaṃ mūlakattā papañcasañkhānaṃ “pathaviṃ pathavito sañjānāti”ti vuttaṃ. Andhaputhujanassa ahaṃkāra-mamaṃkāraṇaṃ katthacipi appahīnattā “pathaviṃ maññāti”tiādi vuttaṃ.

Pubbe aggahitattā, sāmāññato ca gayhamānattā, puggalassa pathavīādīraṃmaṇasabhāgatāya labbhamānattā ca “yopī”ti vuttaṃ. “Yo”ti aniyamena gahitassa niyametabbato paṭiniddisittabbato ca; “so”ti vuttaṃ sātisaṃsaṃsāre bhayassa ikkhanato kilesabhedanasambhāvato ca “bhikkhū”ti vuttaṃ. Sikkhāhi samannāgamato sekkhadhammapaṭilābhato ca “sekkho”ti vuttaṃ. Manasā laddhabbassa arahattassa anadhigatattā adhigamanīyato ca “appattamānaso”ti vuttaṃ. Aparena anuttaraṇīyato, paraṃ anucchavikabhāvena uttaritvā ṭhitattā ca “anuttara”nti vuttaṃ. Yogena bhāvanāya kāmāyogādito ca khemaṃ sivaṃ anupaddavanti “yogakkhema”nti vuttaṃ. Chandappavattiyā ussukkāpattiyā ca “pathayamāno”ti vuttaṃ. Tadattassa sabbaso sabbairiyāpathavīhārassa samathavipassanāvīhārassa dibbavīhārassa ca vasena “viharatī”ti vuttaṃ. Sekkhassa sabbaso abhiññeyyabhāvañceva pariññeyyabhāvañca ñāṇena abhibhavitvā jānānato “abhiññānāti”ti vuttaṃ. Sekkhassa sabbaso appahīnāmaññanatāya abhāvato “mā maññī”ti vuttaṃ. Sesam vuttanāyānūsārena veditabbaṃ. Iminā nayena ito paraṃ sabbapadesu vinicchayo kātabbo. Sakkā hi **aṭṭhakathaṃ** tassā **līnatthavaṇṇanañca** anugantvā ayamattho viññūhi vibhāvetunti ativittārabhayena na vitthārayimha. Iti anupadavicayato **vicayo hāro**.

## 3. Yuttihāraṇaṇā

Sakkāyassa sabbamaññanānaṃ mūlabhāvo yujjati parikkappamattakattā lokavicittassa. Byāhusaccadvayarahitassa andhaputhujjanabhāvo yujjati puthukilesābhisaṅkhārājananādisabhāvattā. Yathāvuttaputhujjanassa vā vuttappakārabāhusaccābhāvo yujjati tasmim̐ sati sabbhāvato. Tattha assutavato puthujjanassa ariyānaṃ sappurisānaṃca adassāvitādi yujjati ariyakaradhammānaṃ ariyabhāvassa ca tena aditthattā appaṭipannattā ca tathā tassa pathaviyā “ahaṃ pathavī, mama pathavī, paro pathavī”ti sañjānaṃ yujjati ahaṃkāramamaṃkāraṇaṃ sabbena sabbam̐ appahīnattā. Tathā sañjānato cassa pathaviṃ kammādikaraṇādivasena gahetvā nānappakārato maññanāpavatti yujjati saññānidānattā papañcasāṅkhānaṃ. Yo maññati, tassa apariññātavattthukatā yujjati pariññāya vinā maññanāpahānābhāvato. “Āpaṃ āpato sañjānātī”tiādīsūpi eseva nayo. Apariyositasikkhassa appattamānasatā yujjati katakiccatābhāvato. Sekkhassa sato yogakkhemapatthanā yujjati tadadhimuttabhāvato. Tathā tassa pathaviyā abhijānaṃ yujjati pariññāpahānesu mattaso kāribhāvato. Tato eva cassa “mā maññī”ti vattabbatā yujjati vatthupariññāya viya maññanāpahānassapi vippakatabhāvato. Sekkhassa pathaviyā pariññeyyatā yujjati pariññātum sakkuṇeyyattā sabbaso apariññātattā ca. “Āpaṃ āpato”tiādīsūpi eseva nayo. Arahattādiyuttassa pathaviyādīnaṃ abhijānaṃ maññanābhāvo ca yujjati saṅkhātadhammattā, sabbaso kilesānaṃ pahīnattā, tato eva cassa vītarāgādībhāvo tato sammadeva ca paṭiccasamuppādassa paṭividdhatī. Ayaṃ **yuttihāro**.

#### 4. Padaṭṭhānahāraṇaṇā

Kissopi maññanā sakkāyassa padaṭṭhānaṃ, maññanānaṃ ayonisomanasikāro padaṭṭhānaṃ, sutadvayaviraḥo andhaputhujjanabhāvassa padaṭṭhānaṃ, so ariyānaṃ adassāvitāya padaṭṭhānaṃ, sā ariyadhammassa akovidatāya padaṭṭhānaṃ, sā ariyadhamme avinītatāya padaṭṭhānaṃ. “Sappurisānaṃ adassāvī”ti etthāpi eseva nayo. Saññāvīpallāso maññanānaṃ padaṭṭhānaṃ. Saññānidānā hi papañcasāṅkhātī. Maññanāso ca taṇhāmaññanā itaramaññanānaṃ padaṭṭhānaṃ “taṇhāgatānaṃ paritassitavipphandita”nti, (dī. ni. 1.105-109) “taṇhāpaccayā upādāna”nti (ma. ni. 3.126; mahāva. 1) ca vacanato, taṇhāgatasseva ca “seyyohamasmi”ntiādīnā mānājappanāsabbhāvātā. Sabbāpi vā maññanā sabbāsaṃ maññanānaṃ padaṭṭhānaṃ. “Upādānapaccayā taṇhā”ti hi vacanato diṭṭhipi taṇhāya padaṭṭhānaṃ. “Ahamasmi brahmā mahābrahmā”ti (dī. ni. 1.42; 3.39) ādivacanato mānopi diṭṭhiyā padaṭṭhānaṃ. Tathā “asmīti sati itthaṃsmīti hoti, evaṃsmīti hoti, aññathāsmīti hoti”tiādīvacanato mānassapi taṇhāya padaṭṭhānatā labbhateva. Sekkhā dhammā sappadesato maññanāpahānassa padaṭṭhānaṃ. Asekkhā nīppadesato maññanāpahānassa padaṭṭhānaṃ. Kammabhavo ca jātiyā padaṭṭhānaṃ. Jāti jarāmaṇassa padaṭṭhānaṃ. Paccayākārassa yathābhūtāvabodho sammāsambodhiyā padaṭṭhānanti. Ayaṃ **padaṭṭhāno hāro**.

#### 5. Lakkhaṇahāraṇaṇā

“Sabbadhammāmūlapariyāya”nti ettha mūlaggaṇaṇena mūlapariyāyaggaṇaṇena vā yathā taṇhāmānadiṭṭhiyo gayhanti, evaṃ dosamohādīnampi sakkāyamūladhammānaṃ saṅgaho daṭṭhabbo sakkāyassa mūlabhāvena ekalakkhaṇattā. “Assutavā”ti iminā yathā tassa puggalassa pariyaṭṭipattivedhasaddhammānaṃ abhāvo gayhati, evaṃ paṭipattisaddhammassapi abhāvo gayhati saddhammabhāvena ekalakkhaṇattā. Ariyānaṃ adassanakāmatādīlakkhaṇā. “Ariyadhammassa akovido”ti iminā ariyadhammādhigamassa vibandhabhūtaṃ aññānaṃ. “Ariyadhamme avinīto”ti iminā ariyavinayābhāvo. So panatthato ariyavinaye appaṭipattī eva vāti tīhipi padehi yathāvuttavisayā micchādiṭṭhi vicikicchā ca gahitāva honti. Taggaṇaṇena ca sabbepi akusalā dhammā saṅgahitāva honti saṃkilesalakkhaṇaṇena ekalakkhaṇattā. “Sappurisānaṃ adassāvī”ti etthāpi eseva nayo.

“Pathaviṃ pathavito sañjānātī”ti idaṃ diṭṭhimaññanādīnaṃ saññāya kāraṇabhāvadassanaṃ. Tattha yathā saññā, evaṃ vitakkaphassāvijjāyonisomanasikārādayopi tāsāṃ kāraṇanti atthato tesampettha saṅgaho vutto hoti maññanānaṃ kāraṇabhāvena ekalakkhaṇattā. “Maññatī”ti iminā maññanākkiccena taṇhāmānadiṭṭhiyo gahitā tāsāṃ kilesasabhāvattā. Taggaṇaṇeneva vicikicchādīnampi saṅgaho daṭṭhabbo kilesalakkhaṇaṇena ekalakkhaṇattā. Tathā taṇhāya hetusabhāvattā taggaṇaṇeneva avasiṭṭhākusalahetūnaṃ

saṅgaho daṭṭhabbo hetulakkhaṇena ekalakkhaṇattā. Tathā taṇhādiṭṭhīnaṃ āsavādisabhāvattā taggahaṇeneva avasiṭṭhāsavoghayogaganthanīvaraṇādīnampi saṅgaho daṭṭhabbo āsavādisabhāvattā ekalakkhaṇattā. Tathā “pathaviṃ maññati” tiādīnā pathavīādīnaṃ rūpasabhāvattā tabbisayānañca maññānānaṃ rūpavisayattā taggahaṇeneva sakalarūpakkhādhavisayāpi maññānā dassitā honti rūpavisayalakkhaṇena āsaṃ ekalakkhaṇattā. Evaṃ cakkhāyatanādivisayāpi maññānā niddhāretabbā. “Apariññāta” nti pariññāpaṭikkhepena tappaṭibaddhakilesānaṃ pahānapaṭikkhepoti daṭṭhabbo maggakiccabhāvena pariññāpahānānaṃ ekalakkhaṇattā. Iminā nayena sesesupi yathārahaṃ ekalakkhaṇā niddhāretabbāti. Ayaṃ **lakkhaṇo hāro**.

## 6. Catubyūhahāraṇā

Pathavīādīsu vatthūsu byañjanacchāyāya atthaṃ gahetvā dhammagambhīrataṃ asallakkhetvā asaddhammassavanādīnā vañcitā hutvā saddhammassavanadhāraṇaparicayamanasikāravimukhā pathavīādīsu vatthūsu puthujjanasekkhāsekkhatathāgatānaṃ paṭipattivisesaṃ ajānantā ca veneyyā imissā desanāya **nidānaṃ**. Te “kathaṃ nu kho yathāvuttadosavinimuttā yathāvuttañca visesaṃ jānantā sammāpaṭipattiyā ubhayahitaparāyaṇā saveyyu” nti ayamettha bhagavato **adhippāyo**. Padanibbacaṇaṃ **niruttaṃ**, taṃ “eva” ntiādīnidānapadānaṃ, “sabbadhammamūlapariyāya” ntiādīpālipadānañca **aṭṭhakathāyaṃ**, tassā **līnatthavaṇṇanāya**ñceva vuttanayena suviññeyyattā ativithārabhayena na vitthārayimha.

Padapatthadesanānikkhepasuttasandhivasena pañcavidhā sandhi. Tattha padassa padantarena sambandho **padasandhi**, tathā padatthassa padatthantarena sambandho **padatthasandhi**, yo “kiriyaṅkarakasambandho” ti vuccati. Nānānusandhikassa suttassa taṃtaṃanusandhīhi sambandho, ekānusandhikassa pana pubbāparasambandho **desanāsandhi**. Yā **aṭṭhakathāyaṃ** “pucchānusandhi ajjhāsayaṇusandhi yathānusandhī” ti tidhā vibhattā. Ajjhāsayo cettaṃ attajjhāsayo parajjhāsayoti dvidhā veditabbo. Yaṃ panettha vattabbaṃ, taṃ heṭṭhā nidānavaṇṇanāyaṃ vuttameva. **Nikkhepasandhi** catunnaṃ suttanikkhepaṇaṃ vasena veditabbo. **Suttasandhi** idha paṭhamanikkhepavaseneva veditabbo. Kasmā panettha mūlapariyāyasuttameva paṭhamaṃ nikkhittanti? Nāyamanuyogo katthaci nappavattati, apica yasmā maññānāmūlakaṃ sakkāyaṃ, sabbamaññānā ca tattha eva anekabhedabhinnā pavattati, na tassā savisaṃyāya lesamattampi sāraṃ atthīti pathavīādīvibhāgabhinnesu maññānāsu ca sātisaṃyāya nibbedhavirāgasañjanāni upari sekkhāsekkhatathāgataguṇavibhāvanāni ca ayaṃ desanā. Suttantadesanā ca visesato diṭṭhiviviveṭhanakathā, tasmā sanissayassa diṭṭhiggāhassa ādito asārabhāvādīpanaṃ upari ca sabbesaṃ ariyānaṃ guṇavisesavibhāvanamidaṃ suttam paṭhamaṃ nikkhittam. Kiñca sakkāye maññānāmaññānāmukhena pavattinivattīsu ādīnavānisamsavibhāvanato sabbesaṃ puggalānaṃ paṭipattivibhāgato ca idameva suttam paṭhamaṃ nikkhittam.

Yaṃ pana ekissā desanāya desanantarena saddhiṃ saṃsandanaṃ, ayampi desanāsandhi, sā evaṃ veditabbā. “Assutavā puthujjano...pe... nibbānaṃ abhinandati” ti ayaṃ desanā. “Idha, bhikkhave, assutavā puthujjano...pe... sappurisadhamme avinīto manasikaraṇīye dhamme nappajānāti, amanasikaraṇīye ca dhamme nappajānāti, so manasikaraṇīye dhamme appajānanto amanasikaraṇīye ca dhamme appajānanto ye dhammā na manasikaraṇīyā, te dhamme manasī karoti...pe... anuppanno vā kāmāsavo uppajjati, uppanno vā kāmāsavo pavaḍḍhati. Anuppanno vā bhavāsavo uppajjati, uppanno vā bhavāsavo pavaḍḍhati, anuppanno vā avijjāsavo uppajjati, uppanno vā avijjāsavo pavaḍḍhati” ti (ma. ni. 1.17) imāya desanāya saṃsandati. Tathā “tassetam pāṭikaṅkham subhanimittam manasi karissati, tassa subhanimittassa manasikārā rāgo cittaṃ anuddhammessati, so sarāgo sadoso samoho sāṅgaṇo saṃkiliṭṭhacitto kālam karissati” ti (ma. ni. 1.59) imāya desanāya saṃsandati. Tathā “cakkhuñcāvuso paṭicca rūpe ca uppajjati cakkhuvīññānaṃ, tiṇṇaṃ saṅgati phasso, phassapaccayā vedanā. Yaṃ vedeti taṃ sañjānāti, yaṃ sañjānāti taṃ vitakketi, yaṃ vitakketi taṃ papañceti, yaṃ papañceti tatonidānaṃ purisaṃ papañcasaññāsankhā samudācaranti” ti (ma. ni. 1.204) imāya desanāya saṃsandati. Tathā “idha, bhikkhave, asutavā puthujjano...pe... sappurisadhamme avinīto rūpaṃ ‘etaṃ mama, eso hamasmi, eso me attā’ ti samanupassati. Vedanaṃ...pe..., saññaṃ...pe..., saṅkhāre...pe...,

viññāṇaṃ ‘etaṃ mama, esohamasmi, eso me attā’ti samanupassati. Yampi taṃ diṭṭhaṃ...pe... yampi taṃ diṭṭhiṭṭhānaṃ, so loko so attā so pecca bhavissāmi nicco dhuvo sassato avipariṇāmadhammo sassatisamaṃ tatheva ṭhassāmīti, tampi ‘etaṃ mama, esohamasmi, eso me attā’ti samanupassati’ (ma. ni. 1.241) imāya desanāya saṃsandati.

“Yopi so, bhikkhave, bhikkhu...pe... nibbānaṃ mābhinandī’ ti ayaṃ desanā. “Idha, devānaminda, bhikkhuno suttaṃ hoti ‘sabbe dhammā nālaṃ abhinivesāyā’ ti, evañcetaṃ, devānaminda, bhikkhuno suttaṃ hoti ‘sabbe dhammā nālaṃ abhinivesāyā’ ti, so sabbaṃ dhammaṃ abhijānāti, sabbaṃ dhammaṃ abhiññāya sabbaṃ dhammaṃ pariṇānāti, sabbaṃ dhammaṃ pariññāya yaṃ kiñci vedanaṃ vedeti sukhaṃ vā dukkhaṃ vā adukkhamasukhaṃ vā, so tāsu vedanāsu aniccānupassī viharati, virāgānupassī viharati, nirodhānupassī viharati, paṭinissaggānupassī viharati’ ti (ma. ni. 1.390) imāya desanāya saṃsandati. “Yopi so, bhikkhave, bhikkhu arahamaṃ...pe... abhisambuddhoti vadāmi’ ti ayaṃ desanā “sutavā ca kho, bhikkhave, ariyasāvako...pe... sappurisadhamme suvinīto rūpaṃ ‘netam mama, nesohamasmi, na meso attā’ ti samanupassati, vedanaṃ...pe..., saññaṃ...pe..., saṅkhāre...pe..., viññāṇaṃ ‘netam mama, nesohamasmi, na meso attā’ ti samanupassati. Yampi taṃ diṭṭhaṃ suttaṃ viññātaṃ pattaṃ pariyesitaṃ anuvicariṭaṃ manasā, tampi ‘netam mama, nesohamasmi, na meso attā’ ti samanupassati. Yampi taṃ diṭṭhiṭṭhānaṃ, so loko so attā so pecca bhavissāmi ‘nicco dhuvo sassato api pariṇāmadhammo sassatisamaṃ tatheva ṭhassāmīti, tampi ‘netam mama, nesohamasmi, na meso attā’ ti samanupassati. So evaṃ samanupassanto na paritassati’ ti (ma. ni. 1.241) evamādidesanāhi saṃsandatīti, ayaṃ **catubyūho hāro**.

## 7. Āvattahāraṇṇā

“Assutavā puthujjano’ ti iminā yonisomanasikārapaṭikkhepamukhena ayonisomanasikārapariggaho dīpito. “Ariyānaṃ adassāvī’ tiādinā sappurisūpanissayādipaṭikkhepamukhena asappurisūpanissayādipariggaho dīpito. Tesu purimanayena āsayavipatti kittitā, dutiyena payogavipatti. Purimena cassa kilesavaṭṭaṃ, tañca yato vipākavaṭṭanti sakalaṃ saṃsāracakkamāvattati. “Pathaviṃ maññati’ tiādinā tattha tisso maññanā vuttā. Tāsu tañhāmaññanā “etaṃ mama’ ti tañhāggāho, mānamaññanā “esohasmī’ ti mānaggāho, diṭṭhimaññanā “eso me attā’ ti diṭṭhiggāho. Tattha tañhāggāhena “taṇhaṃ paṭiccapariyesanā’ tiādikā (dī. ni. 2.103; dī. ni. 3.359; a. ni. 3.23; vibha. 963) nava tañhāmūlakā dhammā āvattanti. Mānaggāhena “seyyohamasmi’ tiādikā nava mānavidhā āvattanti. Diṭṭhiggāhena “rūpaṃ attato samanupassati’ tiādikā (saṃ. ni. 4.345) vīsativatthukā sakkāyadīṭṭhi āvattati. Tīsu ca gāhesu yāya saññāya tañhāggāhassa vikkhambhanā, sā dukkhasaññā dukkhānupassanā. Yāya saññāya mānaggāhassa vikkhambhanā, sā aniccasaññā aniccānupassanā. Yāya pana saññāya diṭṭhiggāhassa vikkhambhanā, sā anattasaññā anattānupassanā. Tattha paṭhamaggāhavisabhāgato appaṇihitavimokkhamukhaṃ āvattati, dutiyaggāhavisabhāgato animittavimokkhamukhaṃ āvattati, tatiyaggāhavisabhāgato suññatavimokkhamukhaṃ āvattati.

Sekkhaggahaṇena ariyāya sammādiṭṭhiyā saṅgaho, tato ca paratoghosa yonisomanasikārā dīpitā honti. Paratoghosena ca sutavā ariyasāvako āvattati, yonisomanasikārena nava yonisomanasikāramūlakā dhammā āvattanti, catubbidhañca sampatticakkaṃ. “Mā maññī’ ti maññanānaṃ vipakatappahānatāgahaṇena ekaccāsavaparikkhaya dīpito hoti, tena ca saddhāvimuttadiṭṭhipattakāyasakkhibhāvā āvattanti. “Arahaṃ khīṇāsavo’ tiādinā asekkhā sīlakkhandhādayo dassitā honti, sīlakkhandhādīpāripūriyā ca dasa nāthakaraṇā dhammā āvattanti. “Na maññati’ ti maññanāpaṭikkhepena pañcasu upādānakkhandhesu “netam mama, nesohamasmi, na meso attā’ ti sammāpaṭipatti dassitā, tāya ca sātisayā nikantipariyādānamānasamugghāṇadiṭṭhiugghāṇāni pakāsītāntī appaṇihitānimitta-suññatavimokkhā āvattanti.

“Tathāgato’ tiādinā sabbaññugunā vibhāvitāti tadavinābhāvato dasabala-catuvesārājaasādharaṇāññaaveṇīkabuddhadhammā āvattanti. “Nandī dukkhassa mūla’ ntiādinā

saddhiṃ hetunā vaṭṭavivaṭṭaṃ kathitanti pavattinivattitadubhayahetuvibhāvanena cattāri ariyasaccāni āvattanti. “Taṇhānaṃ khayā”tiādinā taṇhappahānāpadesena tadekaṭṭhabhāvato diyaḍḍhassa kilesasahassassa pahānaṃ āvattati. “Sabbaso taṇhānaṃ khayā sammāsambodhiṃ abhisambuddho”ti ca vuttatā “nandī dukkhassa mūla”nti, “iti viditvā”tiādinā vuttassa maññānābhāvahetubhūtaṃ paccayākāravedanassa sāvakehi asādhāraṇaṇācārabhāvo dassito, tena catuvīsati koṭṭisatasahassasamāpattisañcāri bhagavato mahāvajjiraññaṃ āvattatīti. Ayaṃ **āvatto hāro**.

## 8. Vibhattihāraṇaṇā

“Sabbadhammamūlapariyāya”nti ettha sabbadhammā nāma tebhūmakā dhammā sakkāyassa adhippetatā. Tesam maññānā padaṭṭhānaṃ papañcasañkhānimittatā lokavicittassa. Tayime kusalā akusalā abyākatāti tividhā. Tesu kusalānaṃ yonisomanasikārādi padaṭṭhānaṃ, akusalānaṃ ayonisomanasikārādi, abyākatānaṃ kammabhavaāvajjanabhūtarūpādi padaṭṭhānaṃ. Tattha kusalā kāmāvacarādivasena bhūmito tividhā, tathā abyākatā cittuppādasabhāvā, acittuppādasabhāvā pana kāmāvacarāva tathā akusalā. Pariyattipaṭṭipattipattivedhasutakiccābhāvena tividho assutavā. Andhakalyāṇavibhāgena duvidho puthujjano. Sammāsambuddhapaccekabuddhasāvaka bhedena tividhā ariyā. Maṃsacakkhū dibbacakkhupaññācakkhūhi dassanābhāvena tividho adassāvī. Maggaphalanibbānābhedena tividho, navavidho vā ariyadhammo. Savanadhāraṇaparicayamanasikārapattivedhasena pañcavidhā ariyadhammassa kovidatā. Tadabhāvato akovido. Saṃvarapahānābhedena duvidho, dasavidho vā ariyadhammavinayo, tadabhāvato ariyadhamme avinīto. Ettha padaṭṭhānavibhāgo heṭṭhā dassitoyeva. “Sappurisānaṃ adassāvī”tiādīsūpi eseva nayo. “Pathaviṃ maññati”tiādīsū maññānāvattthuvibhāgo pāḷiyaṃ āgatova, tathā ajjhattikabāhirādiko ca antaravibhāgo.

Maññānā pana taṇhāmānādiṭṭhivasena sañkhepatō tividhā, vitthārato pana taṇhāmaññānā tāva kāmataṇhādivasena aṭṭhasatavidhā, tathā “asmīti sati itthaṃsmīti hotī”tiādinā. Evaṃ mānāmaññānāpi. “Asmīti sati itthaṃsmīti hotī”tiādinā papañcattayaṃ uddiṭṭhaṃ niddiṭṭhañcāti. Etena diṭṭhimaññānāyapi aṭṭhasatavidhatā vuttāti veditabbā. Apica seyyassa “seyyohamasmi”tiādinā mānāmaññānāya navavidhatā tadantarābhedena anekavidhatā ca veditabbā. Ayañca attho hīnattikatthavaṇṇāyā vibhāvetabbo. Diṭṭhimaññānāya pana **brahmajāle** āgatanayena dvāsaṭṭhividhatā tadantarābhedena anekavidhatā ca veditabbā. “Apariññāta”nti ettha ñātapariññādivasena ceva rūpamukhādiabhinivesabhedādivasena ca pariññānaṃ anekavidhatā veditabbā. Tathā aṭṭhamakādivasena sekkhāvibhāgo paññāvimuttādivasena asekkhāvibhāgo ca. Ayamettha dhammavibhāgo. Padaṭṭhānavibhāgo ca bhūmivibhāgo ca vuttanayānusārena veditabbāti. Ayaṃ **vibhattihāro**.

## 9. Parivattahāraṇaṇā

“Sabbadhammamūlapariyāya”nti ettha “sabbadhammā”ti pañcupādānakkhandhā gahitā, tesam mūlakāraṇanti ca taṇhāmānādiṭṭhiyo. Tathā assutavā puthujjano...pe... sappurisadhamme avinītoti. Yāvākīvañca pañcasu upādānakkhandhesu subhato sukhatō niccato attato samanupassanavasena “etaṃ mama, eso hamasmi, eso me attā”ti taṇhāmānādiṭṭhigāhā na samucchijjanti, tāva nesam pabandhūparamo supinantepi na kenaci laddhapubbo. Yādā pana nesam asubhato dukkhato aniccato anattato samanupassanavasena “netaṃ mama, nesohamasmi, na meso attā”ti pavattamānā appaṇihitānimittasūññānupassanā ussakkivā ariyamaggādhigamāya saṃvattanti, atha nesam pabandhūparamo hoti accantaappaññātikabhāvūpagamanato. Tena vuttam “sabbadhammāti pañcupādānakkhandhā gahitā, tesam mūlakāraṇanti ca taṇhāmānādiṭṭhiyo”ti. Tathā assutavā puthujjano...pe... sappurisadhamme avinīto tīhipi maññānāhi pathaviṃ maññati yāva nibbānaṃ abhinandati, tīhipi pariññāhi tassa taṃ vatthu apariññānti katvā. Yassa pana taṃ vatthu tīhi pariññāhi pariññātaṃ, na so itaro viya taṃ maññati. Tenāha bhagavā “sutavā ca kho, bhikkhave, ariyasāvako... pe... sappurisadhamme suvinīto rūpaṃ ‘netaṃ mama, nesohamasmi, na meso attā’ti samanupassati, vedanaṃ...pe... asati na paritassati”ti (ma. ni. 1.241). Sekkho pathaviṃ mā maññi, yāva nibbānaṃ



mābhinandi, arahā sammāsambuddho ca pathaviṃ na maññati, yāva nibbānaṃ nābhinandati, maññanāmaññitesu vatthūsu mattaso sabbaso ca pariññābhisamayasaṃsiddhiyā pahānābhisamayānibbattito. Yassa pana tesu vatthūsu sabbaso mattaso vā pariññā eva natthi, kuto pahānaṃ, so yathāparikkappaṃ niraṅkusāhi maññanāhi “etaṃ mamā”tiādinā maññateva. Tenāha bhagavā “idha, bhikkhave, assutavā puthujjano...pe... sappurīsadhamme avinīto rūpaṃ ‘etaṃ mama, eso hamasmi, eso me attā’ti samanupassati, vedanaṃ...pe..., sañña...pe...”ntiādi (ma. ni. 1.241). Ayaṃ **parivatto hāro**.

### 10. Vevacanaḥāraṇṇanā

“Sabbadhammā sakaladhammā anavasesadhammā”ti pariṇāyavacanaṃ, “mūlapariṇāyāyaṃ mūlakāraṇaṃ asādhāraṇaḥetu”nti pariṇāyavacanaṃ, “mūlapariṇāyanti vā mūladesanaṃ kāraṇatathana”nti pariṇāyavacanaṃ, “vo tumhākaṃ tumha”nti pariṇāyavacanaṃ, “bhikkhave, samaṇā tapassino”ti pariṇāyavacanaṃ, “desessāmī kathessāmī paññāpessāmī”ti pariṇāyavacanaṃ, “suṇātha sotāya odahatha sotadvārānusārena upadhārethā”ti pariṇāyavacanaṃ, “sādhukaṃ sammā sakkacca”nti pariṇāyavacanaṃ, “manasi karotha citte ṭhapetha samannāharathā”ti pariṇāyavacanaṃ, “bhāsissāmī byattaṃ kathessāmī vibhajissāmī”ti pariṇāyavacanaṃ, “evaṃ, bhante, sādhu suṭṭhu bhante”ti pariṇāyavacanaṃ, “paccassosūṃ sampaṭicchīṃsu sampaṭiggahesu”nti pariṇāyavacanaṃ. Iminā nayena sabbapadesu vevacanaṃ vattabbanti. Ayaṃ **vevacano hāro**.

### 11. Paññattihāraṇṇanā

“Sabbadhammamūlapariṇāyā”nti ettha sabbadhammā nāma sakkāyadhammā, te khandhavasena pañcadhā paññattā, āyatanavasena dvādasadhā, dhātuvāsena aṭṭhārasadhā paññattā. “Mūla”nti vā “mūlapariṇāyā”nti vā maññanā vuttā, tā taṇhāmānadiṭṭhivasena tidhā antarabhedena anekadhā ca paññattā. Atha vā “sabbadhammā”ti tebhūmakadhammānaṃ saṅgahapaññatti, “mūlapariṇāyā”nti tesāṃ pabhavapaññatti, “vo”ti sampadānapaññatti, “desessāmī bhāsissāmī”ti paṭiññāpaññatti, “suṇātha sādhukaṃ manasi karothā”ti ca āṇāpanapaññatti, “assutavā”ti paṭivedhavimukhatāpaññatti ceva pariṇāyavimukhatāpaññatti ca, “puthujjano”ti anariyapaññatti, sā ariyadhammapaṭikkhepaññatti ceva ariyadhammavirahapaññatti ca, “ariyāna”nti asamapaññatti ceva samapaññatti ca. Tattha asamapaññatti tathāgatapaññatti, samapaññatti paccekabuddhānaṃ ubhatobhāgavimuttādīnaṃ vasena aṭṭhavidhā veditabbā. “Ariyānaṃ adassāvī”tiādi dassanabhāvanāpaṭikkhepaññatti, “pathaviṃ maññati”tiādi pañcannaṃ upādānakkhandhānaṃ dvādasannaṃ āyatanānaṃ aṭṭhārasannaṃ dhātūnaṃ sammasanupagānaṃ indriyānaṃ nikkhepaññatti ceva pabhavapaññatti ca, tathā vipallāsānaṃ kiccapaññatti pariṇāyavimuttānaṃ dassanapaññatti kilesānaṃ phalapaññatti abhisāṅkhārānaṃ virūhanapaññatti taṇhāya assādanapaññatti diṭṭhiyā vipphandanapaññatti, “sekkhā”ti saddhānusārīsaddhāvimuttādiṭṭhippattakāyasakkhīnaṃ dassanapaññatti ceva bhāvanāpaññatti ca “appattamānaso”ti sekkhadhammānaṃ ṭhitipaññatti, “anuttaraṃ yogakkhemaṃ patthayamāno”ti paññāya abhinibbidāpaññatti, “abhijānāti”ti abhiññeyyadhammānaṃ abhiññāpaññatti, dukkhassa pariññāpaññatti, samudayassa pahānapaññatti, nirodhassa sacchikiriyāpaññatti, maggassa bhāvanāpaññatti, “mā maññi”ti maññanānaṃ paṭikkhepaññatti, samudayassa pahānapaññatti. Iminā nayena sesapadesu vitthāretabbaṃ. Ayaṃ **paññatti hāro**.

### 12. Otaraṇṇahāraṇṇanā

“Sabbadhammamūlapariṇāyā”nti ettha sabbadhammā nāma lokiyā pañcakkhandhā dvādasāyatanāni aṭṭhārasa dhātuyo dve saccāni ekūnavīsati indriyāni dvādasapadiko paccayākāroti, ayaṃ sabbadhammaggaḥena khandhādīmukhena desanāya otaraṇṇaṃ. “Mūla”nti vā “mūlapariṇāyā”nti vā maññanā vuttā, tā atthato taṇhā māno diṭṭhi cāti tesāṃ saṅkhārakkhandhasaṅgahoti ayaṃ khandhamukhena otaraṇṇaṃ. Tathā “dhammāyatanadhammadhātūhi saṅgaho”ti ayaṃ āyatanamukhena dhātumukhena ca otaraṇṇaṃ. “Assutavā”ti iminā sutassa

vibandhabhūtā avijjādayo gahitā, “puthujjano”ti iminā yesaṃ kilesābhisaṅkhārānaṃ jananādinā puthujjanoti vuccati, te kilesābhisaṅkhārādayo gahitā, “ariyānaṃ adassāvī”tiādinā yesaṃ kilesadhammānaṃ vasena ariyānaṃ adassāvīādībhāvo hoti, te diṭṭhimānāvijjādayo gahitāti sabbehi tehi saṅkhārakkhandhasaṅgahoti pubbe vuttanayeneva otaraṇaṃ veditabbaṃ. “Sañjānāti maññati abhijānāti na maññati”ti etthāpi sañjānanamaññanāabhijānanānupassanānaṃ saṅkhārakkhandhapariyāpannattā vuttanayeneva otaraṇaṃ veditabbaṃ. Tathā sekkhaggahaṇena sekkhā, “araha”ntiādinā asekkhā sīlakkhandhādayo gahitāti evampi khandhamukhena otaraṇaṃ, āyatanadhātādīmukhena ca otaraṇaṃ veditabbaṃ. Tathā “na maññati”ti taṇhāgāhādīpaṭikkhepena dukkhānupassanādayo gahitā, tesāṃ vasena appaṇihitavimokkhamukhādīhi otaraṇaṃ veditabbaṃ. “Pariññāta”nti iminā pariājananakkicca pavattamānā bodhipakkhiyadhammā gayhantīti satipaṭṭhānādīmukhena otaraṇaṃ veditabbaṃ. Nandiggahaṇena bhavaggahaṇena taṇhāgahaṇena ca samudayasaccaṃ, dukkhaggahaṇena jātijarāmaraṇaggahaṇena ca dukkhasaccaṃ, “taṇhānaṃ khayā”tiādinā nirodhasaccaṃ, abhisambodhiyā gahaṇena maggasaccaṃ gahitanti ariyasaccehi otaraṇanti. Ayaṃ **otaraṇo hāro**.

### 13. Sodhanahāraṇaṇā

“Sabbadhammāmūlapariyāyaṃ vo, bhikkhave...pe... idha, bhikkhave, assutavā...pe... pathaviṃ pathavito sañjānāti”ti ārambho. “Pathaviṃ pathaviyā saññatvā pathaviṃ maññati”ti padasuddhi, no ārambhasuddhi. Tathā “pathaviyā maññati pathavito maññati pathaviṃ meti maññati pathaviṃ abhinandati”ti padasuddhi, no ārambhasuddhi. “Taṃ kissa hetu apariññātaṃ tassāti vadāmi”ti padasuddhi ceva ārambhasuddhi ca. Sesavāresupi eseva nayoti. Ayaṃ **sodhana hāro**.

### 14. Adhiṭṭhānahāraṇaṇā

“Sabbadhammāmūlapariyāya”nti ettha sabbadhammaggaṇaṃ sāmāññato adhiṭṭhānaṃ. “Pathaviṃ āpa”ntiādi pana taṃ avikappetvā visesavacanaṃ. Tathā “mūlapariyāya”nti sāmāññato adhiṭṭhānaṃ, taṃ avikappetvā visesavacanaṃ “pathaviṃ maññati...pe... abhinandati”ti. “Pathaviṃ maññati”ti ca sāmāññato adhiṭṭhānaṃ taṇhādiggāhānaṃ sādharmaṇattā maññanāya, taṃ avikappetvā visesavacanaṃ “etaṃ mama, esohamasmi, eso me attā”ti, evaṃ suttantarapadānīpi ānetvā visesavacanaṃ niddhāretabbaṃ. Sesavāresupi eseva nayo. “Sekkho”ti sāmāññato adhiṭṭhānaṃ, taṃ avikappetvā visesavacanaṃ “kāyasakkhī diṭṭhipatto saddhāvimutto saddhānusārī dhammānusārī”ti. Tathā “sekkho”ti sāmāññato adhiṭṭhānaṃ, taṃ avikappetvā visesavacanaṃ “idha, bhikkhave, bhikkhu sekkhāya sammādiṭṭhiyā samannāgato hoti...pe... sekkhena sammāsamādhinā samannāgato hoti”ti (saṃ. ni. 5.13). “Araha”nti sāmāññato adhiṭṭhānaṃ, taṃ avikappetvā visesavacanaṃ “ubhatobhāgavimutto paññāvimutto (pu. pa. 13.2; 15.1 mātikā), tevijjo chaḷabhiñño”ti (pu. pa. 7.26, 27 mātikā) ca. “Khīṇāsavo”ti sāmāññato adhiṭṭhānaṃ, taṃ avikappetvā visesavacanaṃ “kāmasavāpi cittaṃ vimuccittha, bhavāsavāpi cittaṃ vimuccitthā”tiādi (pārā. 14). Sesapadesupi eseva nayo. “Abhijānāti”ti sāmāññato adhiṭṭhānaṃ, taṃ avikappetvā visesavacanaṃ “maññati”ti. Maññanābhāvo hissa pahānapaṭivedhasiddho, pahānapaṭivedho ca pariññāsacchikiriyābhāvanāpaṭivedhehi na vināti sabbehi abhiññāvisesā maññanāpaṭikkhepena atthato gahitāva hontīti. Tathā “araha”nti sāmāññato adhiṭṭhānaṃ, taṃ avikappetvā visesavacanaṃ “vītarāgattā vītadosattā vītamohattā”ti. Iminā nayena sesapadesupi sāmāññāvisesaniddhāraṇā veditabbā. Ayaṃ **adhiṭṭhāno hāro**.

### 14. Parikkhārahāraṇaṇā

“Sabbadhammāmūlapariyāya”nti ettha sabbadhammā nāma pariāpannadhammā, te kusalākusalābyākatabhedena tivīdhā. Tesu kusalānaṃ yonisomanasikāro alobhādayo ca hetū, akusalānaṃ ayonisomanasikāro lobhādayo ca hetū, abyākatesu vipākānaṃ yathāsakaṃ kammaṃ, itaresaṃ bhavaṅgamāvajjanasamannāhārādi ca hetū. Ettha ca sappurisūpanissayādiko paccayo hetumhi eva samavarulho, so tattha ādi-saddena saṅgahitoti daṭṭhabbo. “Mūla”nti vuttānaṃ maññanānaṃ hetubhāvo pāliyaṃ vutto eva. Maññanāsu pana taṇhāmaññanāya assādānupassanā hetu. “Saññojaniyesu

dhammesu assādānupassino taṇhā pavaḍḍhatī’ ti (saṃ. ni. 2.52) hi vuttaṃ. Mānamaññānāya diṭṭhivippayuttalobho hetu kevalaṃ saṃsaggavasena “ahamaṃsī” ti pavattanato. Diṭṭhimaññānāya ekattanayādīnaṃ ayāthāvaggāho hetu, assutabhāvo puthujanabhāvassa hetu, so ariyānaṃ adassanasīlatāya, sā ariyadhammassa akovidatāya, sā ariyadhamme avinītatāya hetu, sabbā cāyaṃ hetuparamparā pathaviādīsu “etaṃ mama, esohamaṃsī, eso me attā” ti tissannaṃ maññānānaṃ hetu, sekkhārahādibhāvā pana mattaso sabbaso ca maññānābhāvassa hetūti. Ayaṃ **parikkhāro hāro**.

## 16. Samāropanahāraṇaṇā

“Sabbadhammamūlapariyāya” ntiādīsu mūlapariyāyaggahaṇena assutavāgahaṇena sañjānanaṃ maññānāpariññāgahaṇehi ca saṃkilesadhammā dassitā, te ca saṅkhepatō tividdhā taṇhāsaṃkilesō diṭṭhisāṃkilesō duccharitasāṃkilesoti. Tattha taṇhāsaṃkilesō taṇhāsaṃkilesassa, diṭṭhisāṃkilesassa, duccharitasāṃkilesassa ca padaṭṭhānaṃ, tathā diṭṭhisāṃkilesō diṭṭhisāṃkilesassa, taṇhāsaṃkilesassa, duccharitasāṃkilesassa ca padaṭṭhānaṃ, duccharitasāṃkilesopi duccharitasāṃkilesassa, taṇhāsaṃkilesassa, diṭṭhisāṃkilesassa ca padaṭṭhānaṃ. Tesu taṇhāsaṃkilesō atthato lobhova, yo “lobho lubbhanā lubbhittattaṃ sārāgo sārājanā sārājjitatta” ntiādīnā (dha. sa. 389) anekehi pariyaēyehi vibhatto. Tathā diṭṭhiyeva diṭṭhisāṃkilesō, yo “diṭṭhigataṃ diṭṭhigahaṇaṃ diṭṭhikantāro diṭṭhivissūkaṃ diṭṭhivipphandita” ntiādīnā (dha. sa. 1105) anekehi pariyaēyehi, “santi, bhikkhave, eke samaṇabrāhmaṇā” tiādīnā (dī. ni. 1.30) dvāsaṭṭhiyā pabhedehi ca vibhatto. Duccharitasāṃkilesō pana atthato dussīlyacetanā ceva cetanāsampayuttadhammā ca, yā “kāyaduccharitaṃ vacīduccaritaṃ kāyavisamaṃ vacīvisama” nti (vibha. 913, 924), “pāṇātipāto adinnādāna” nti (vibha. 913) ca ādinā anekehi pariyaēyehi, anekehi pabhedehi ca vibhattā.

Tesu taṇhāsaṃkilesassa samatho paṭipakkho, diṭṭhisāṃkilesassa vipassanā, duccharitasāṃkilesassa sīlaṃ paṭipakkho. Te pana sīlādayo dhammā idha pariññāgahaṇena sekkhaggahaṇena “araha” ntiādīnā ariyatādiggahaṇena ca gahitā. Tattha sīlena duccharitasāṃkilesappahānaṃ sijjhati, tathā tadanāgappahānaṃ vītikkamappahānaṃ, samathena taṇhāsaṃkilesappahānaṃ sijjhati, tathā vikkhambhanappahānaṃ pariyaṭṭhānappahānaṃ. Vipassanāya diṭṭhisāṃkilesappahānaṃ sijjhati, tathā samucchadappahānaṃ anusayappahānaṃ. Tattha pubbhāge sīle paṭiṭṭhitassa samatho, samathe paṭiṭṭhitassa vipassanā, maggakkhaṇe pana samakālemeva bhavanti. Pubbeyeva hi suparisuddhakāyavacīkammaṃ suparisuddhājīvassa ca samathavipassanā āradhā gabbhaṃ gaṇhantiyo paripākaṃ gacchantiyo vuṭṭhānagāminivipassanaṃ paribrūhenti, vuṭṭhānagāminivipassanā bhāvanāpāripūriṃ gacchantī maggena ghaṭenti maggakkhaṇe samathavipassanā paripūreti. Atha maggakkhaṇe samathavipassanābhāvanāpāripūriyā anavasesasaṃkilesadhammaṃ samucchindantiyo nirodhaṃ nibbānaṃ sacchikarontīti. Ayaṃ **samāropano hāro**.

Soḷasahāraṇaṇā niṭṭhitā.

## Pañcavidhanayavaṇṇanā

### 1. Nandiyāvaṭṭanayavaṇṇanā

“Sabbadhammamūlapariyāya” ntiādīsu sabbadhammamūlaggahaṇena maññānāgahaṇena ca taṇhāmānadiṭṭhiyo gahitā. Maññānānampi hi maññānā kāraṇanti dassitoyamattho. “Assutavā” tiādīnā avijjāmānadiṭṭhiyo gahitā, sabbepi vā saṃkilesadhammā, tathā saññāpariññātaggahaṇena. “Khīṇāsavo parikkhīṇabhavasāññojano” ti ettha pana āsavā saññojanāni ca sarūpato gahitāni, tathā nandiggahaṇena taṇhāgahaṇena ca taṇhā, evampettha sarūpato pariyaēyato ca taṇhā avijjā tappakkhiyadhammā ca gahitā. Tattha taṇhāya visesato rūpadhammā adhiṭṭhānaṃ, avijjāya arūpadhammā, te pana sabbadhammaggahaṇena pathaviādiggahaṇena ca dassitā eva. Tāsaṃ samatho vipassanā ca paṭipakkho, tesamettha gahetabbākāro heṭṭhā dassito eva. Samathassa cetovimutti phalaṃ, vipassanāya paññāvimutti. Tathā hi tā “rāgavirāgā” tiādīnā visesetvā vuccanti, imāsamettha gahaṇaṃ

sammadaññāvimuttavītarāgādivacanehi veditabbaṃ. Tattha taṇhāvijjā samudayasaccaṃ, tappakkhiyadhammā pana taggahaṇeneva gahitāti veditabbā. Tesam adhiṭṭhānabhūtā vuttappabhedā rūpārūpadhammā dukkhasaccaṃ, tesam appavatti nirodhasaccaṃ, nirodhapajānanā paṭipadā maggasaccaṃ. Taṇhāgahaṇena cettha māyā-sāṭheyya-mānātimāna-madappamāda-pāpicchatā-pāpamittatā-ahirikānottappādivasena akusalapakkho netabbo, avijjāgahaṇena viparītamanasikāra-kodhūpanāha-makkha-paḷāsa-issā-macchariya- sārāmbhadovacassatā-bhavadiṭṭhi-vibhavadiṭṭhiādivasena akusalapakkho netabbo, vuttavipariyāyena amāyāasāṭheyyādiviparītamanasikārādivasena, tathā samathapakkhiyānaṃ saddhindriyādīnaṃ vipassanāpakkhiyānaṃ aniccasaññādīnaṃ vasena vodānapakkho netabboti. Ayaṃ **nandiyāvaṭṭassa na yassa bhūmi**.

## 2. Tipukkhalanayavaṇṇanā

Tathā vuttanayena sarūpato pariyāyato ca gahitesu taṇhāvijjātappakkhiyadhammesu taṇhā lobho, avijjā moho, avijjāya sampayutto lohite sati pubbo viya taṇhāya sati sijjhamāno āghāto doso, iti tīhi akusalamūlehi gahitehi, tappaṭipakkhato maññanāpaṭikkhepapariññāgahaṇādīhi ca kusalamūlāni siddhāniyeva honti. Idhāpi “lobho sabbāni vā sāsavakusalākusalamūlāni samudayasaccaṃ, tehi nibbattā, tesam adhiṭṭhānagocarabhūtā ca upādānakkhandhā dukkhasacca” ntiādīnā saccayojanā veditabbā. Phalaṃ panettha tayo vimokkhā, tīhi pana akusalamūlehi tividhaduccarita-saṃkilesamala-visamaakusala-saññā-vitakkādivasena akusalapakkho netabbo. Tathā tīhi kusalamūlehi tividhasucarita-samakusala-saññā-vitakka-saddhamma-samādhi-vimokkhamukha-vimokkhā-divasena kusalapakkho netabboti. Ayaṃ **tipukkhalassa nayassa bhūmi**.

## 3. Sīhavikkīṭitanayavaṇṇanā

Tathā vuttanayena sarūpato pariyāyato ca gahitesu taṇhāvijjātappakkhiyadhammesu visesato taṇhādiṭṭhīnaṃ vasena asubhe “subha” nti, dukkhe “sukha” nti ca vipallāsā, avijjādiṭṭhīnaṃ vasena anicce “nicca” nti, anattani “attā” ti ca vipallāsā veditabbā. Tesam paṭipakkhato maññanāpaṭikkhepapariññāgahaṇādisiddhehi sativīriyasamādhipaññīndriyehi cattāri satipaṭṭhānāni siddhāneva honti. Tattha catūhi indriyehi cattāro puggalā niddisittabbā. Kathaṃ? Duvidho hi taṇhācarito mudindriyo tikkhindriyoti, tathā diṭṭhicarito. Tesam paṭhamo asubhe “subha” nti vipariyāsaggāhī satibalena yathābhūtaṃ kāyasabhāvaṃ sallakkhento taṃ vipallāsaṃ samugghāṭetvā sammattaniyāmaṃ okkamati. Duttiyo asukhe “sukha” nti vipariyāsaggāhī “uppannaṃ kāmavitakkaṃ nādhivāseti” tiādīnā (dī. ni. 3.310; ma. ni. 1.26; a. ni. 4.14, 114; a. ni. 6.58) vuttana vīriyasaṃvarabhūtena vīriyabalena taṃ vipallāsaṃ vidhamento sammattaniyāmaṃ okkamati. Tatiyo anicce “nicca” nti ayāthāvaggāhī samādhibalena samāhitacitto saṅkhārānaṃ khaṇikabhāvasallakkhaṇena taṃ vipallāsaṃ samugghāṭento ariyabhūmiṃ okkamati. Catuttho santatisamūhakkiccārammaṇaḥanavañcitātāya phassādīdhammapuñjamatte anattani “attā” ti micchābhinivesī catukoṭīkasuññātāmanasikārena taṃ micchābhinivesaṃ viddhaṃsento sāmāññaphalaṃ sacchikaroti.

Idhāpi subhasaññāsukhasaññāhi catūhipi vā vipallāsehi samudayasaccaṃ, tesam adhiṭṭhānārammaṇabhūtā pañcupādānakkhandhā dukkhasaccantiādīnā saccayojanā veditabbā. Phalaṃ panettha cattāri sāmāññaphalāni, catūhi cittavipallāsehi caturāsavogha-yoga-kāyagantha-agatī-taṇhuppāda-sallupādāna-viññāṇaṭṭhiti-apariññādivasena akusalapakkho netabbo. Tathā catūhi satipaṭṭhānehi catubbidhājāna-vihārādhiṭṭhāna-sukhabhāgiyadhamma-appamaññā-sammappadhāna-iddhipādā- divasena vodānapakkho netabboti. Ayaṃ **sīhavikkīṭitassa nayassa bhūmi**.

## 4-5. Disālocana-aṅkusanayadvayaṇṇanā

Imesaṃ pana tiṇṇaṃ atthanayānaṃ siddhiyā vohārena nayadvayaṃ siddhameva hoti. Tathā hi atthanayānaṃ disābhūtaḍḍhammānaṃ samālocanaṃ **disālocanaṃ**, tesam samānayaṇaṃ **aṅkusoti** pañcapi nayā niyuttāti veditabbā.

Pañcavidhanayavaṇṇanā niṭṭhitā.

### Sāsanapaṭṭhānavaṇṇanā

Idaṅca suttaṃ soḷasavidhe suttantapaṭṭhāne saṃkilesanibbedhāsekkhabhāgiyaṃ, sabbabhāgiyameva vā “sabbadhammāpariyāya”nti ettha sabbadhammaggaṇaena lokiyakusalānampi saṅgahitattā. Aṭṭhavīsatividhena pana suttantapaṭṭhāne lokiyalokuttarasabbadhammādhīṭṭhānaṃ ṇāṇaṇeyyaṃ dassanabhāvaṇṇaṃ sakavacaṇṇaṃ vissajjanīyaṃ kusalākusalaṃ anuññātaṃ paṭikkhittaṃ cāti vedītabbaṃ.

Nettinayavaṇṇanā niṭṭhitā.

Mūlapariyāyasuttavaṇṇanāya līnatthappakāsanā samattā.

## 2. Sabbāsavasuttavaṇṇanā

**14. Apubbapadavaṇṇanā**ti atthasaṃvaṇṇanāvasena heṭṭhā aggahitatāya apubbassa abhinavassa padassa vaṇṇanā atthavibhajanā. “Hitvā punappunāgatamattha”nti hi vuttaṃ. **Nivāsaṭṭhānabhūtā** bhūtapubbanivāsaṭṭhānabhūtā, nivāsaṭṭhāne vā bhūtā nibbattā **nivāsaṭṭhānabhūtā**, tattha māpitāti attho. **Yathā kākandī mākandī kosambī**ti yathā kākandassa isino nivāsaṭṭhāne māpitā nagarī kākandī, mākandassa nivāsaṭṭhāne māpitā mākandī, kusambassanivāsaṭṭhāne māpitā kosambīti vuccati, evaṃ sāvattḥīti dasseti. Upanetvā samīpe katvā bhuñjitabbato **upabhogo**, saviññāṇakavatthu. Parito sabbadā bhuñjitabbato **paribhogo**, nivāsanapārupanādi aviññāṇakavatthu. **Sabbamettha atthī**ti niruttinayena sāvattḥī-saddasiddhimāha. **Satthasamāyo**geti satthassa nagariyā samāgame, satthe taṃ nagaraṃ upagateti attho. **Pucchite** sathikajanehi.

**Samohitanti** sannicitaṃ. Rammanti anto bahi ca bhūmibhāgasampattiyā ceva ārāmyānasampattiyā ca ramaṇīyaṃ. **Dassaneyyanti** visikhāsannivesasampattiyā ceva pāsādakūṭāgarādisampattiyā ca dassanīyaṃ passitabbayuttaṃ. Upabhogaparibhogavatthusampattiyā ceva nivāsasukhatāya ca nibaddhavāsaṃ vasantānaṃ itaresaṅca sattānaṃ manāṃ rāmetīti **manoramam**. **Dasahi saddehī**ti hatthisaddo, assa-ratha-bheri-saṅkha-mudiṅga-viṇā-gīta sammatālasaddo, asnātha-pivatha-khādathāti-saddoti imehi dasahi saddehi. **Avivittanti** na vivittaṃ, sabbakālaṃ ghoṣitanti attho.

**Vuddhiṃ vepullataṃ pattanti** tannivāsī sattavuddhiyā vuddhiṃ, tāya parivuddhitāyeva vipulabhāvaṃ pattaṃ, bahujaṇaṃ ākiṇṇamanussanti attho. Vittūpakaraṇasamiddhiyā **iddham**. Sabbakālaṃ subhikkhabhāvena **phītaṃ**. Antamaso vighāsāde upādāya sabbesaṃ kapaṇaddhikavanibbakayācakānampi icchi tatthanipphattiyā manuññaṃ jātaṃ, pageva issariye ṭhitānanti dassanattaṃ puna “**manorama**”nti vuttaṃ. **Aḷakamandāvā**ti āṭānāṭādisu dasasu vessavaṇṇamahārājassa nagarīsu aḷakamandā nāma ekā nagarī, yā loke aḷakā eva vuccati. Sā yathā puññakammīnaṃ āvāsabhūtā ārāmarāmaṇeyyakādīnā sobhaggappattā, evaṃ sāvattḥīpīti vuttaṃ “aḷakamandāvā”ti. **Devānanti** vessavaṇṇapakkiyānaṃ cātumahārājikadevānaṃ.

**Jinā**ti iminā sota-saddo viya kattusādhano jeta-saddoti dasseti. **Raṇṇā**ti pasenadikosalarājena. Rājagataṃ jayaṃ āropetvā kumāro jitavāti jetoti vutto. **Maṅgalakabyatāyā**tiādīnā “jeyyo”ti etasmim atthe “jeto”ti vuttanti dasseti. **Sabbakāmasamiddhitāyā**ti sabbehi upabhogaparibhogavatthūhi phītabhāvena vibhavasampannatāyāti attho. Samiddhāpi maccharino kiñci na dentīti āha “**vigatamalamaccheratāyā**”ti, rāgadosādimalānañceva macchariyassa ca abhāvenāti attho. Samiddhā amaccharinopi ca karuṇāsaddhādiguṇavirahitā attano santakaṃ paresaṃ na dadeyyunti āha “**karuṇādiguṇasamaṅgitāyā cā**”ti. **Tenā**ti anāthānaṃ piṇḍadānena. Saddatthato pana dātābhabhāvena sabbakālaṃ upaṭṭhapito anāthānaṃ piṇḍo etassa atthīti **anāthapiṇḍiko**. **Pañcavidhasenānaṅgasampattiyā**ti “nātidūraṃ naccāsannaṃ gamanāgamanasampanna”nti ekaṃ aṅgaṃ, “divā appākiṇṇaṃ rattim appasaddaṃ appanigghosa”nti ekaṃ,

“appaḍaṃsamakasavātātapasarīsapasamphassa”nti ekaṃ, “tasmim̄ kho pana senāsane viharantassa appakasirena uppajjanti cīvara...pe... parikkhārā”ti ekaṃ, “tasmim̄ kho pana senāsane therā bhikkhū viharanti bahussutā”ti ekaṃ, evameteḥi pañcavidhasenāsanaṅgehi sampannatāya. Yadi jetavanaṃ tathaṃ anāthapiṇḍikassa ārāmoti āha “**so hī**”tiādi.

Kītakālato paṭṭhāya anāthapiṇḍikasessa taṃ vanam̄, atha kasmā ubhinnaṃ parikkittananti āha “**jetavane**”tiādi. “Yadipi so bhūmibhāgo koṭisantharena mahāseṭṭhinā kīto, rukkhā pana jetena na vikkīṭāti jetavananti vattabbaṃ labhī”ti vadanti.

**Kasmā idaṃ suttamabhāsī**ti kathetukamyatāya suttanikkhepaṃ pucchati. Sāmaññato hi bhagavato desanākāraṇaṃ pākāṭamevāti. Ko paṇāyaṃ suttanikkhepoti? Attajjhāsayo. Parehi anajjhīṭṭho eva hi bhagavā attano ajjhāsayena imaṃ suttam̄ desēṭṭi ācariyā. Yasmā panesa bhikkhūnaṃ upakkilīṭṭhacittataṃ vidītvā “ime bhikkhū imāya desanāya upakkilesavisodhanaṃ katvā āsavakkhayaṃ paṭipajjissanti”ti ayaṃ desanā āradadhā, tasmā paraajjhāsayoti apare. Ubhayampi pana yuttaṃ. Attajjhāsayaḍīnañhi saṃsaggabhedassa sambhavo heṭṭhā dassitovāti. **Tesaṃ bhikkhūnanti** tadā dhammapaṭiṅgāhatabhikkhūnaṃ. **Upakkilesavisodhananti** samathavipassanupakkilesato cittassa visodhanaṃ. Paṭhamañhi bhagavā anupubbikathādinā paṭipattiyā saṃkilesaṃ nīharitvā pacchā sāmukkaṃsikaṃ desanaṃ deseti khetṭe khāṇukaṇṭakagumbādike avaharitvā kasaṇaṃ viya, tasmā kammaṭṭhānameva avatvā imāya anupubbiyā desanā pavattāti adhippāyo.

**Samvarabhūtaṃ**ti sīlasaṃvarādisaṃvarabhūtaṃ saṃvaraṇasabhāvaṃ kāraṇaṃ, taṃ pana atthato dassanādi evāti vedittabbaṃ. **Samvaritāti** pavattitum̄ appadānavasena sammā, sabbathā vā vāritā. Evaṃbhūta ca yasmā pavattidvārapidhānena pihitā nāma honti, tasmā vuttaṃ “**vidahitā hutvā**”ti. Evaṃ accantikassa saṃvarassa kāraṇabhūtaṃ anaccantikaṃ saṃvaraṃ dassetvā idāni accantikameva saṃvaraṃ dassento yasmim̄ dassanādimhi sati uppajjanārāhā āsavā na uppajjanti, so tesaṃ anuppādo nirodho khayō pahānanti ca vuccamāno atthato appavattimattanti tassa ca dassanādi kāraṇanti āha “**yena kāraṇena anuppādanirodhasaṅkhātāṃ khayāṃ gacchanti pahīyanti nappavattanti, taṃ kāraṇanti attho**”ti.

**Cakkhutopi...pe... manatopī**ti (dha. sa. mūlaṭī. 14-19) cakkhuviññāḍivīthīsu tadanugatanovīññāḍivīthīsu ca kiñcāpi kusalādīnampi pavatti atthi, kāmāsavādayo eva pana vaṇato yūsaṃ viya paggharaṇakaasucibhāvena sandanti, tasmā te eva “**āsavā**”ti vuccanti. Tattha hi paggharaṇaasucimhi niruḷho āsava-saddoti. **Dhammato yāva gotrabhūnti** tato paraṃ maggaphalesu appavattanato vuttaṃ. Ete hi ārammaṇavasena dhamme gacchantā tato paraṃ na gacchanti. Nanu tato paraṃ bhavaṅgādīnipi gacchantīti ce? Na, tesaṃ pubbe ālambitesu lokiyadhammesu sāsavabhāvena antogadhātā tato paratābhāvato. Ettha ca gotrabhuvacanena gotrabhuvodānaphalasamāpattipurecārikaparikammāni vuttānīti vedittabbāni. Paṭhamamaggapurecārikameva vā gotrabhu avadhiniḍassanabhāvena gahitaṃ, tato paraṃ pana maggaphalasamānatāya aññesu maggesu maggavīthiyaṃ samāpattivīthiyaṃ nirodhānantarañca pavattamānesu phalesu nibbāne ca āsavānaṃ pavatti nivāritāti vedittabbaṃ. **Savantīti** gacchanti, ārammaṇakāraṇavasena pavattantīti attho. Avadhiattho ā-kāro, avadhi ca mariyādābhividhibhedato duvidho. Tattha mariyādaṃ kiriyāṃ bahi katvā pavattati yathā “**āpāṭaliputtā vuṭṭho devo**”ti. Abhividhi pana kiriyāṃ byāpetvā pavattati yathā “**ābhavaggā bhagavato yaso pavattatī**”ti. Abhividhiattho cāyaṃ ā-kāro idha gahitoti vuttaṃ “**antokaraṇattho**”ti.

**Madirādayoti ādi**-saddena sindhavakādambarikāpotikādīnaṃ saṅgaho daṭṭhabbo. **Ciraparivāsiyaṭṭho** viraparivutthatā purāṇabhāvo. **Avijjā nāhosītiādīti** ettha **ādi**-saddena “purimā, bhikkhave, koṭi na paññāyati bhavataṇhāyā”ti (a. ni. 10.62) idaṃ suttam̄ saṅgahitaṃ. Avijjāsavabhavāsavānaṃ ciraparivutthatāya dassitāya tabbhāvabhāvino kāmāsavassa ciraparivutthatā dassitāva hoti. Aññesu ca yathāvutte dhamme okāsañca ārammaṇaṃ katvā pavattamānesu mānādīsu vijjamānesu attattaniyādiggāhasena abhibyāpanaṃ madakaraṇavasena āsavasadiṣatā ca etesaṃyeva,

na aññesanti etesveva āsava-saddo niruḥhoti daṭṭhabbo. Na cettha diṭṭhāsavo nāgatoti gahetabbaṃ bhavataṇhāya viya bhavaditṭhiyāpi bhavāsavaggahaṇeneva gahitattā. **Āyataṃ** anādikālikattā. **Pasavantī** phalanti. Na hi taṃ kiñci saṃsāradukkhaṃ atthi, yaṃ āsavehi vinā uppajjeyya. **Purimāni cetthā**ti ettha etesu catūsu atthavitappesu purimāni tiṇi. **Yatthā**ti yesu suttābhidhammapadesesu. **Tattha yujjanti** kilesesuyeva yathāvuttassa atthattayassa sambhavato. **Pacchimam** “āyataṃ vā saṃsāradukkhaṃ savantī”ti vuttanibbacanaṃ. **Kamme**pi yujjati dukkhappasavanassa kilesakammasādhāraṇattā.

Diṭṭhadhammā vuccanti paccakkhabhūtā khandhā, diṭṭhadhamme bhavā **diṭṭhadhammikā**. **Vivādamūlabhūtā**ti vivādassa mūlakāraṇabhūtā kodhūpanāha-makkha-paḷāsa-issā-macchariya-māyā-sāṭheyya-thambha-sārambha-mānātimānā.

**Yena devūpapatyassā**ti yena kammakilesappakārena āsavena devesu upapatti nibbatti assa mayhanti sambandho. **Gandhabbo vā vihaṅgamo** ākāsacārī assanti vibhattiṃ pariṇāmetvā yojetabbaṃ. Ettha ca yakkhagandhabbatāya vinimuttā sabbā devagati devaggahaṇena gahitā. **Avasesā ca akusalā dhammā**ti akusalakammato avasesā akusalā dhammā āsavāti āgatāti sambandho.

**Paṭighātāyā**ti paṭisedhanāya. **Parūpavā...pe... upaddavā**ti idaṃ yadi bhagavā sikkhāpadaṃ na paññapeyya, tato asaddhammapaṭisevanaadinnādānapānātipātādihetu ye uppajjeyyūṃ parūpavādādayo diṭṭhadhammikā nānappakārā anattā, ye ca tannimittā eva nirayādīsu nibbattassa pañcavidhabandhanakammakāraṇādivasena mahādukkhānubhavādippakārā anattā, te sandhāya vuttaṃ. **Te paneteti** ete kāmarāgādikilesa-tebhūmakakammaparūpavādādiupaddavappakārā āsavā. **Yatthā**ti yasmiṃ vinayādipāḷipadesu. **Yathā**ti yena duvidhādippakārena aññesu ca suttantesu āgatāti sambandho.

Nirayaṃ gamentīti **nirayagāminiyā**. **Chakkanipāte** āhuneyyasutte. Tattha hi āsavā chadhā āgatā āsava-saddābhidheyyassa atthassa pabhedopacārena āsava-pade pabhedoti vutto, koṭṭhāsatto vā pada-saddoti **āsavapade**ti āsavappakāre saddakoṭṭhāse atthakoṭṭhāse vāti attho.

**Tathā hī**ti tasmā saṃvaraṇaṃ pidhanaṃ pavattitūṃ appadānaṃ, teneva kāraṇenāti attho. Sīlādisaṃvare adhippete pavattitūṃ appadānavasena thakanabhāvasāmaññato **dvāraṃ saṃvaritvā**ti gehadvārasaṃvaraṇampi udāhaṭaṃ. **Sīlasaṃvaroti**ādi heṭṭhā mūlapariyāyavaṇṇanāya vuttampi imassa suttassa atthavaṇṇanaṃ paripuṇṇaṃ katvā vattukāmo puna vadati. Yuttaṃ tāva sīlasatiññānaṃ saṃvarattho pāḷiyaṃ tathā āgatattā, khantivīriyānaṃ pana kathanti āha “**tesañcā**”tiādi. Tassattho – yadipi “khamo hoti...pe... sītassa uppannaṃ kāmavitakkaṃ nādhivāsetī”tiādiniddese khantivīriyānaṃ saṃvarapariyāyo nāgato, uddese pana sabbāsavasasaṃvarapariyāyanti saṃvarapariyāyena gahitattā attheva tesam saṃvarabhāvoti.

Pubbe sīlasatiññānaṃ pāṭhantarena saṃvarabhāvo dassitoti idāni taṃ imināpi suttana gahitabhāvaṃ dassetuṃ “**apicā**”tiādi vuttaṃ. **Khantivīriyasamvarā vuttāyeva** “khamo hoti sītassā”tiādinā (ma. ni. 1.14) pāḷiyā dassanavasena. “**Tañca anāsanam, tañca agocara**”nti **ayam panettha sīlasamvaroti** tañca “yathārūpe”tiādinā vuttaṃ ayuttaṃ aniyatavattukam raho paṭicchannāsanam, tañca yathāvuttaṃ ayuttaṃ vesiyādigocaram, “paṭisaṅkhāyoniso parivajjetī”ti āgataṃ yaṃ parivajjanaṃ, ayam pana ettha etasmiṃ sutte āgato sīlasamvaroti attho. Anāsanaparivajjanena hi anācāraparivajjanaṃ vuttaṃ, anācāragocaraparivajjanaṃ cārittasīlatāyasīlasamvaro. Tathā hi bhagavatā “pātimokkhasamvarasamvuto viharatī”ti (vibha. 508) sīlasamvaravibhajane ācāragocarasaṃpattim dassentena “atthi anācāro, atthi agocaro”tiādinā (vibha. 513, 514) anācāragocarā vibhajitvā dassitā. Idañca ekadesena samudāyanidassanaṃ daṭṭhabbaṃ samuddapabbatanidassanaṃ viya.

**Sabbattha paṭisaṅkhā ñāṇasaṃvaroti** ettha “yonisomanasikāro, paṭisaṅkhā ñāṇasaṃvaro”ti vattabbaṃ. Na hi dassanapahātabbaniddese paṭisaṅkhāgahaṇaṃ atthi, “yoniso manasi karotī”ti pana

vuttaṃ. Yonisomanasikaraṇampi atthato paṭisaṅkhā ñāṇasaṃvarevāti evaṃ pana atthe gayhamāne yuttametam siyā. Keci pana “yattha yattha ‘idha paṭisaṅkhā yoniso’ ti āgataṃ, tam sabbam sandhāya ‘sabbattha paṭisaṅkhā ñāṇasaṃvaro’ ti vutta” nti vadanti. Tesam matena “idaṃ dukkhanti yoniso manasi karoti” tiādikassa ñāṇasaṃvarena ca asaṅgaho siyā, “dassanaṃ paṭisevanā bhāvanā ca ñāṇasaṃvaro” ti ca vacanaṃ virujjheyya, tasmā vuttanayenevettha attho veditabbo. “Sabbattha paṭisaṅkhā ñāṇasaṃvaro” ti iminā sattasupi ṭhānesu yaṃ ñāṇaṃ, so ñāṇasaṃvaroti parivajjanādivasena vuttā sīlādayo sīlasaṃvarādayoti ayamattho dassito. Evaṃ sati saṃvarānaṃ saṅkaro viya hotīti te asaṅkarato dassetuṃ “**aggahitaggahaṇenā**” ti vuttaṃ parivajjanavisesasaṃvarādhivāsanavinodanānaṃ sīlasaṃvarādhivāvena gahitattā, tathā aggahitānaṃ gahaṇenāti attho. Te pana aggahite sarūpato dassento “**dassanaṃ paṭisevanā bhāvanā**” ti āha.

**Etena** sīlasaṃvarādinā karaṇabhūtena, kāraṇabhūtena vā. **Dhammāti** kusalākusaladhammā. Sīlasaṃvarādinā hi sahaṃjātakotiṃyā, upanissayakotiṃyā vā paccayabhūtena anuppannā kusalā dhammā **uppattim gacchanti** uppajjanti, tathā aniruddhā akusalā dhammā nirodham gacchanti nirujjhantīti attho. Pāḷiyam pana “anuppannā ceva āsavā na uppajjanti, uppannā ca āsavā pahīyanti” ti akusaladhammānaṃ anuppādapahānāni eva vuttāni, na kusaladhammānaṃ uppādādayoti? Nayidamevaṃ daṭṭhabbam, “yoniso ca kho, bhikkhave, manasikaroto” tiādinaṃ kusaladhammānaṃ uppatti pakāsitāva āsavasaṃvaraṇassa padhānabhāvena gahitattā. Tathā hi pariyosānepi “ye āsavā dassanā pahātabbā, te dassanā pahīnā hontī” tiādinaṃ (ma. ni. 1.28) āsavappahānameva padhānaṃ katvā nigamitaṃ.

**15. Jānato passatoti** ettha dassanampi paññācakkhunāva dassanaṃ adhippetam, na maṃsacakkhunā dibbacakkhunā vāti āha “**dvepi padāni ekatthāni**” ti. **Evaṃ santepīti** padadvayassa ekatthathepi. **Ñāṇalakkhaṇanti** ñāṇassa sabhāvaṃ, visayassa yathāsabhāvāvabodhananti attho. Tenāha “**jānanalakkhaṇāhi ñāṇa**” nti. **Ñāṇappabhāvanti** ñāṇānubhāvaṃ, ñāṇakiccaṃ visayobhāsananti attho. Tenevāha “**ñāṇena vivaṇe dhamme**” ti. “**Jānato passato**” ti ca jānanadassanamukhena puggalādhittānā desanā pavattāti āha “**ñāṇalakkhaṇaṃ ñāṇappabhāvaṃ upādāya puggalaṃ niddisati**” ti. **Jānato passatoti** “yoniso ca manasikāraṃ ayoniso ca manasikāra” nti vakkhamānattā yonisomanasikāraṃvisayajānanaṃ, ayonisomanasikāraṃvisayadassanaṃ. Tañca kho pana nesaṃ āsavānaṃ khayūpāyasabhāvassa adhippetattā uppādanānuppādanavasena na ārammaṇamattenāti ayamattho yuttoti āha “**yonisomanasikāraṃ...pe... ayamettha sāro**” ti.

“Jānato” ti vatvā jānanañca anussavākārapaṭivittakamattavasena na idhādhippetam, atha kho rūpādi viya cakkhuviññāṇena yonisomanasikārayonisomanasikāre paccakkhe katvā tesam uppādavasena dassananti imamatham vibhāvetuṃ “passato” ti vuttanti evaṃ vā ettha attho daṭṭhabbo. Aññatthāpi hi “evaṃ jānato evaṃ passato (itivu. 102), jānaṃ jānāti passaṃ passati (ma. ni. 1.203), evaṃ jānantā evaṃ passantā (ma. ni. 1.407), ajānataṃ apassata” nti ca ādisu ñāṇakiccassa sāmāññavisesadīpanavasenetam padadvayaṃ āgatanti. **Kecīti** abhayagirivāsīsārasamāsācariyā. Te hi “samādhinā jānato vipassanāya passato jānaṃ jānāti passaṃ passati, evaṃ jānanā samatho, passanā vipassanā” ti ca ādinā papañcenti. **Teti** papañcā. **Imasmiṃ attheti** “jānato” tiādinayappavatte imasmiṃ suttapadaatthe niddhāriyamāne. **Na yujjanti** jānanadassanaṃ yonisomanasikārayonisomanasikāraṃvisayabhāvassa pāḷiyam vuttattā.

**Āsavappahānaṃ** āsavānaṃ accantappahānaṃ. So pana nesaṃ anuppādo sabbena sabbam khīṇatā abhāvo evāti āha “**āsavānaṃ accantakhayamasamuppādaṃ khīṇākāraṃ natthibhāva**” nti. **Ujumaggānusārinoti** kilesavaṅkassa kāyavaṅkādināñca pahānena ujubhūte savipassane heṭṭhimamagge anussarantassa. Tadeva hissa sikkhanaṃ. **Khayasmim paṭhamaṃ ñāṇaṃ. Tato aññā anantarāti** khayasaṅkhāte aggamagge tappariyāpannameva ñāṇaṃ paṭhamaṃ uppajjati, tadanantaraṃ pana aññam arahattanti. Yadiṃ gāthāyaṃ “khayasmim” icceva vuttaṃ, samucchēdavasena pana āsavehi khīṇotīti maggo khayoti vuccatīti āha “**maggo āsavakkhayoti vutto**” ti. **Samaṇoti** samitapāpo adhippeto. So pana khīṇāsavo hotīti “**āsavānaṃ khayā**” ti imassa phalapariyāyatā vuttā, nippariyāyena pana āsavakkhayo maggo, tena pattabbato phalaṃ. Eteneva nibbānassapi āsavakkhayabhāvo vuttoti veditabbo.



“**Jānato passato**”ti jānato eva passato evāti evamettha niyamo icchito, na aññathā visesābhāvato anīṭṭhasādhanato cāti tassa niyamassa phalaṃ dassetuṃ “**no ajānato no apassato**”ti vuttanti āha “**yo pana na jānāti na passati, tassa neva vadāmīti attho**”ti. Iminā dūrīkatāyonisomanasikāro idhāhippeto, yonisomanasikāro ca āsavakkhayassa ekantikakāraṇanti dasseti. **Etenāti** “no ajānato no apassato”ti vacanena. **Te paṭikkhittāti** ke pana teti? “Bāle ca paṇḍite ca sandhāvītvā saṃsaritvā dukkhassantaṃ karissanti (dī. ni. 1.168; ma. ni. 2.228), ahētū apaccayā sattā visujjhantī”ti (dī. ni. 1.168; ma. ni. 2.227) evamādivādā. Tesu hi keci abhijāṭisaṅkantimattena bhavaṣaṅkantimattena ca saṃsārasuddhiṃ paṭijānanti, aññe issarapajāpatikālādivasena, tayidaṃ sabbaṃ “saṃsārādīhi”ti ettheva saṅgahitanti daṭṭhabbaṃ.

**Purimena vā padadvayenāti** “jānato, passato”ti iminā padadvayena. **Upāyo vutto** “āsavakkhayassā”ti adhikārato viññāyati. **Imināti** “no ajānato, no apassato”ti iminā padadvayena. Anupāyo eva hi āsavānaṃ khayassa yadidaṃ yoniso ca ayoniso ca manasikārassa ajānanaṃ adassanañca, tena tathattāya appaṭipattito micchāpaṭipattito ca. Nanu “passato”ti iminā ayonisomanasikāro yathā na uppajjati, evaṃ dassane adhippete purimeneva anupāyapaṭisedho vutto hotīti? Na hoti, ayonisomanasikārānuppādanassapi upāyabhāvato satibalena saṃvutacakkhundriyādītā viya sampajaññabaleneva niccādivasena abhūtajānanābhāvo hotīti. Tenāha “**saṅkhepena...pe... hotī**”ti. Tattha **saṅkhepenāti** samāseṇa, anvayato byatirekato ca vitthāraṃ akatvāti attho. **Ñāṇaṃ...pe... dassitaṃ hoti** “jānato”tiādinā ñāṇasseva gahitattā. Yadi evaṃ “svāyaṃ saṃvaro”tiādi kathaṃ nīyatīti? Ñāṇassa padhānabhāvadassanattaṃ evamayam desanā katāti nāyaṃ doso, tathā aññatthāpi “ariyaṃ vo bhikkhave sammāsamaḍḍhiṃ desessāmi saupanisaṃ sapaṛikkhāra”nti (ma. ni. 3.136) vitthāro.

**Dabbajātiko**ti dabbarūpo. So hi drabyoti vuccati “drabyaṃ vinassati nādrabya”ntiādisu. **Dabbajātiko** vā sārasabhāvo, sārappasīlācāroti attho. Yathāha “na kho dabbā dabbā evaṃ nibbeḥentī”ti (pārā. 384, 391; cūḷava. 193). **Vattasīse thatvāti** vattaṃ uttamaṅgaṃ, dhuraṃ vā katvā. Yo hi parisuddhājīvo kātuṃ ajānantānaṃ sabrahmacārīnaṃ, attano vā vātāpādīpaṭibāhanattaṃ chattādīni karoti, so vattasīse thatvā karoti nāma. **Padatṭhānaṃ na hotīti na vattabbā** nāthakaraṇadhammabhāvena upanissayaabhāvato. Vuttañhi “yāni tāni sabrahmacārīnaṃ uccāvacaṇi kiccakaraṇīyāni, tattha dakkho hotī”tiādi (ma. ni. 1.497).

**Upāyamanasikāro**ti kusaladhammappavattiyā kāraṇabhūto manasikāro. **Pathamanasikāro**ti tassā eva maggabhūto manasikāro. **Aniccādisu aniccantiādināti** aniccadukkhāsubhaanattasabhāvesu dhammesu “aniccaṃ dukkhaṃ asubhaṃ anattā”tiādinā eva nayena, aviparītasabhāvenāti attho. **Saccānulomikena vāti** saccābhisamayassa anulomavasena. **Cittassa āvaṭṭanāti**tiādinā āvaṭṭanāya paccayabhūtā tato purimuppannā manodvārikā kusalajavanappavatti phalavohārena tathā vuttā. Tassā hi vasena sā kusalupattiyā upanissayo hoti. **Āvajjanā** hi bhavaṅgacittaṃ āvaṭṭayatīti **āvaṭṭanā**. Anu anu āvaṭṭetīti **anvāvaṭṭanā**. Bhavaṅgāramaṇato aññaṃ ābhujatīti **ābhogo**. Samannāharatīti **samannāhāro**. Tadevāramaṇaṃ attānaṃ anubandhitvā uppajjamānaṃ manasi karoti ṭhapetīti **manasikāro**. **Ayaṃ vuccatīti** ayaṃ upāyapathamanasikāralakkhaṇo yonisomanasikāro nāma vuccati, yassa vasena puggalo dukkhādīni saccāni āvajjituṃ sakkoti. Ayonisomanasikāre **saccapaṭikūlenāti** saccābhisamayassa ananulomavasena. Sesam yonisomanasikāre vuttavipariyāyena veditabbaṃ.

**Yuttinti** upapattisādhanayuttim, hetunti attho. Tenevāha “**yasmā**”tiādi. **Etthāti** “ayoniso bhikkhave...pe... pahīyantī”ti etasmim paṭhe. **Tatthāti** vākyopaññāsaṇaṃ. Kasmā panettha ayamuddesandheso parivattoti codanaṃ sandhāyāha “**yoniso**”tiādi. Tattha manasikārapadaṃ dvinnam sādharmaṇanti adhippāyena “**yoniso ayoniso**ti imehi tāva dvīhi padehī”ti vuttaṃ. **Yoniso**ti hi yonisomanasikāro, **ayoniso**ti ca ayonisomanasikāro tattha anuvattanato vakkhamānattā ca. Satipi anathupattisāmaññe bhavādīsu puggalassa bahulisāmaññaṃ dassetvā taṃ parivattitvā visesadassanattaṃ **nāvādi** upamāttayaggahaṇaṃ daṭṭhabbaṃ. **Cakkayantaṃ** āhaṭaghaṭīyantanti vadanti.

**Anuppannāti** anibbattā. Ārammaṇavisesavasena tassa anuppatti veditabbā, na rūpārammaṇādiārammaṇasāmaññena, nāpi āsavavasena. Tenāha “**ananubhūtapubbaṃ ārammaṇaṃ...pe... aññathā hi anamatagge saṃsāre anuppannā nāma āsavā na santī**”ti. **Vatthuntī** saviññāṇakāviññāṇakappabhedam āsavuppattikāraṇaṃ. **Ārammaṇaṃ** ārammaṇapaccayabhūtarūpādīni. Idāni āsavavasenapi anuppannapariyāyo labbhatīti dassetuṃ “**anubhūtapubbepī**”tiādi vuttaṃ. **Pakatisuddhiyāti** pubbacariyato kilesadūribhāvasiddhāya suddhipakatitāya. Pāḷiyā uddisanam **uddeso**, atthakathanam **paripucchā**. Ajjhayanam **pariyatti**, cīvarasibbādi **navakammaṃ**, samathavipassanānuyogo **yonisomanasikāro**. **Tādisenāti** yādisena “manuññavattū”timanasikārādīnā kāmāsavādayo sambhaveyyuṃ, tādisenā. Āsavānam vaḍḍhi nāma pariyaṭṭhānatibbatāya veditabbā, sā ca abhiñhuppattiyā bahulīkārato te laddhāsevanā bahulabhāvam pattā maddantā pharantā chādentā andhākāraṃ karontā aparāparaṃ uppajjamānā ekasantānanayena “**uppannā pavaḍḍhantī**”ti **vuccanti**. Tena vuttaṃ “**punappunam uppajjamānā uppannā pavaḍḍhantīti vuccanti**”ti. **Ito aññathāti** ito aparāparuppannānam ekataggahaṇato aññathā **vaḍḍhi nāma natthi** khaṇīkabhāvato.

**So ca jānātīti** dhammuddhaccaviggahābhāvamāha. **Kārakassevāti** yuttayogasseva. **Yassa panāti**ādīnā anuddesikaṃ katvā vuttamattham purātanassa purisātisayassa paṭipattidassanena pākāṭataram kātuṃ “**maṇḍalārāmavāsīmahātissabhūtattherassa viyā**”tiādi vuttaṃ. Tañhi sabrahmacārīnam āyatim tathāpaṭipattikāraṇam hoti, yato edisaṃ vatthu vuccati. **Tasmim yevāti** maṇḍalārāmeveva. **Ācariyam āpucchitvāti** attano uddesācariyam kammaṭṭhānaggahaṇattham gantuṃ āpucchitvā. **Ācariyam vanditvāti** kammaṭṭhānadāyakaṃ mahārakkhitattheram vanditvā. **Uddesamagganti** yathāāraddham uddesapabandham. Tadā kira mukhapāṭheneva bahū ekajjham uddisāpetvā manosajjhāyavasena dhammam sajjhāyanti. Tatthāyam thero paññavantatāya uddesam gaṇhantānam bhikkhūnam dhorayho, so “idānāham anāgāmī, kim mayham uddesenā”ti saṅkocam anāpajjitvā dutiyadivase uddesakāle ācariyam upasaṅkami. “Uppannā pahīyanti”ti ettha uppannasadisā “uppannā”ti vuttā, na paccuppannā. Na hi paccuppannesu āsavesu maggena pahānam sambhavatīti āha “**ye pana...pe... natthī**”ti. **Vattamānuppannā** khaṇattayasamaṅgino. **Tesam paṭipattiyā pahānam natthi** uppajjanārahānam paccayaghātena anuppādanameva tāya pahānanti.

16. Yadi evam dutiyapadam kimatthiyanti? Padadvayaggahaṇam āsavānam uppannānuppannabhāvasambhavadassanatthañceva pahāyakavibhāgena pahātabbavibhāgadassanatthañca. Tenāha “**idameva padam gahetvā**”ti. **Aññampīti** ñāṇato aññampi satisamvarādīm. **Dassanāti** idaṃ hetumhi nissakkavacananti **dassanenāti** hetumhi karaṇavacanena tadattham vivarati. **Esa nayoti** tamevattham atidisati. **Dassanenāti** sotāpattimaggena. So hi paṭhamam nibbānadassanato “dassana”nti vuccati. Yadi pi taṃ gotrabhu paṭhamataram passati, disvā pana kattabbakiccassa kilesappahānassa akaraṇato na taṃ dassananti vuccati. Āvajjanaṭṭhāniyañhi taṃ ñāṇam maggassa, nibbānārammaṇattasāmaññena cetam vuttaṃ, na nibbānapaṭivijjanena, tasmā dhammacakkhu punappunam nibbattanena bhāvanam appattam dassanam nāma, dhammacakkhuñca pariññādikiccarāṇavasena catusaccadhammadassanam tadabhisamayoti nutthettha gotrabhussa dassanabhāvappatti. Ayañca vicāro parato **aṭṭhakathāyameva** (ma. ni. aṭṭha. 1.22) āgamissati. **Sabbatthāti** “saṃvarā pahātabbā”tiādīsu. **Saṃvarāti** saṃvarena, “saṃvaro”ti cettha satisamvaro veditabbo. Paṭisevati etenāti **paṭisevanam**, paccayesu idamatthikatāññam. Adhivāseti khamati etāyāti **adhivāsana**, sītādīnam khamanākārena pavatto adoso, tappadhānā vā cattāro kusalakkhandhā. Parivajjeti etenāti **parivajjanam**, vālamigādīnam pariharaṇavasena pavattā cetanā, tathāpavattā vā cattāro kusalakkhandhā. Kāmavitakkādike vinodeti vitudati etenāti **vinodanam**, kusalavīriyam. Paṭhamamaggena diṭṭhe catusaccadhamme bhāvanāvasena uppajjanato **bhāvanā**, sesamaggattayam. Na hi taṃ adiṭṭhapubbaṃ kiñci passati, evam dassanādīnam vacanatto veditabbo.

### **Dassanāpahātabbāāsavavaṇṇanā**

17. Kusalākusaladhammehi ālambiyamānāpi ārammaṇadhammā āvajjanamukheneva tabbhāvam

gacchantīti dassento “**manasikaraṇīye**”ti padassa “**āvajjitabbe**”ti atthamāha. Hitasukhāvahabhāvena manasikaraṇaṃ arahantīti manasikaraṇīyā, tappaṭipakkhato amanasikaraṇīyāti āha “**amanasikaraṇīyeti tabbiparīte**”ti. **Sesapadesūti** “manasikaraṇīye dhamme appajānanto”tiādīsu. Yasmā kusalahammesupi subhasukhaniccādivasena manasikāro assādanādihetutāya sāvajjo ahitadukkhāvaho akusaladhammesupi aniccādivasena manasikāro nibbidādihetutāya anavajjo hitasukhāvaho, tasmā “**dhammato niyamo natthī**”ti vatvā “**ākārato pana atthī**”ti āha.

Vā-saddo yebhuyyena “mamaṃ vā hi bhikkhave (dī. ni. 1.5, 6), devo vā bhavissāmi devaṅṅatāro vā”tiādīsu (ma. ni. 1.186; ma. ni. 2.79, 80) vikappattho diṭṭho, na samuccayatthoti tatha samuccayatthe payogaṃ dassetuṃ “**yathā**”tiādī vuttaṃ. Evañca katvā samuccayatthadīpakāṃ panetaṃ suttapadaṃ samudhāṭaṃ.

**Kāmāsavoti** pañcakāmaguṇasaṅkhāte kāme āsavo kāmāsavo. Tenāha “**pañcakāmaguṇiko rāgo**”ti. Bhavāsavaṃ pana ṭhapetvā sabbo lobho kāmāsavoti yuttaṃ siyā. **Rūpārūpabhaveti** kammupapattibhedato duvidhepi rūpārūpabhavā **chandarāgo**. **Jhānanikantīti** jhānassādo. “Sundaramidaṃ ṭhānaṃ niccaṃ dhuva”ntiādīnā assādentassa uppajjamāno sassatucchadadiṭṭhisahagato rāgo bhavā āsavoti **bhavāsavo**. **Evanti** sabbadiṭṭhinaṃ sassatucchadadiṭṭhisāṅgahato bhavāsaveneva diṭṭhāsavo gahito taṃsahagatarāgatāyāti adhippāyo. Apare pana “diṭṭhāsavo avijjāsavena ca saṅgahito”ti vadanti. Ettha ca “bhavāsavo catūsu diṭṭhigatavippayuttalobhasahagatacittuppādesu uppajjati”ti (dha. sa. 1465) vacanato diṭṭhisampayuttarāgassa bhavāsavabhāvo vicāretabbo, atha “kāmāsahagatā saññāmanasikārā”tiādīsu (saṃ. ni. 4.332) viya ārammaṇakaraṇattho saṅgatattho, evaṃ sati bhavāsavo diṭṭhāsavassa samodhānagamaṇaṃ kataṃ na siyā. Na hi tampayogatabbhāvādiṅka asati taṃsaṅgaho yutto, tasmā yathāvuttapāliṃ anusārena diṭṭhigatasampayuttalobhopi kāmāsavoti yuttaṃ siyā. Diṭṭhadhammikasamparāyikadukkhānañhi kāraṇabhūtā kāmāsavādayopi dvidhā vuttā.

**Abhidhamme** (dha. sa. 1103) ca kāmāsavaniddese “kāmesūti kāmārāgadiṭṭhirāgādīnaṃ ārammaṇabhūtesu tebhūmakesu vatthukāmesū”ti attho sambhavati. Tatha hi uppajjamānā sā taṅhā sabbāpi na kāmācchandaṇīnaṃ na labhatīti. Yadi pana lobho kāmāsavabhavāsavavinimuttoṃ siyā, so yadā diṭṭhigatavippayutte cittaṃ uppajjati, tadā tena sampayutto avijjāsavo āsavavippayuttoti domanassavicikicchuddhaccasampayuttassa viya tassapi āsavavippayuttatā vattabbā siyā “catūsu diṭṭhigatavippayuttalobhasahagatacittuppādesu uppanno moho siyā āsavasampayutto, siyā āsavavippayutto”ti. “Kāmāsavo aṭṭhasu lobhasahagatacittuppādesu uppajjati”ti (dha. sa. 1465), “kāmāsavaṃ paṭicca diṭṭhāsavo avijjāsavo”ti (paṭṭhā. 3.3.109) ca vacanato diṭṭhisahagatarāgo kāmāsavo na hotīti na sakkā vuttaṃ. Kiñca abhijjhākāmarāgānaṃ vireso āsavadvayaekāsavabhāvo siyā, na abhijjhāya ca noāsavabhāvoti noāsavalobhassa sabbhāvo vicāretabbo. Na hi atthi **abhidhamme** “āsavo ca noāsavo ca dhammā āsavassa dhammassa āsavassa ca noāsavassa ca dhammassa hetupaccayo”ti (paṭṭhā. 3.3.16-17) sattamo navamo ca pañho. Gaṇanāyañca “hetuyā sattā”ti (paṭṭhā. 3.3.40) vuttaṃ, no “navā”ti. Diṭṭhisampayutte pana lobhe noāsavo vijjamāne sattamanavamāpi pañhā vissajjanaṃ labheyyuṃ, gaṇanāya ca “hetuyā navā”ti vattabbaṃ siyā, na pana vuttaṃ. Diṭṭhivippayutte ca lobhe noāsavo vijjamāne vattabbaṃ vuttameva. Yasmā pana suttantadesanā nāma pariyāyakathā, na abhidhammadesanā viya nipariyāyakathā, tasmā balavakāmarāgasseva kāmāsavaṃ dassetuṃ “**kāmāsavoti pañcakāmaguṇiko rāgo**”ti vuttaṃ, tathā bhavābhinandanti.

Sāmaññena bhavāsavo diṭṭhāsavaṃ antogadhaṃ katvā idha tayo eva āsavā vuttāti tassa tadantogadhatāṃ dassetuṃ “**evaṃ diṭṭhāsavo**”tiādī vuttaṃ. Tathā hi vakkhati bhavāsavassa animittavimokkhaṭṭhapaṭipakkhataṃ. **Catūsu saccesu aññānti** idaṃ suttantaṇaṃ nissāya vuttaṃ. Suttantaṃvaṇṇanā hesāti, tadantogadhataṃ vā pubbantādīnaṃ. Yathā atthato kāmāsavādayo vavattāpitā, tathā nesāṃ uppādavaḍḍhiyo dassento “**kāmaguṇe**”tiādīmāha. **Assādato manasikarototi** “subhasukhā”tiādīnā assādanavasena manasi karontassa. **Catuvipallāsapadaṭṭhānabhāvenāti** subhasaññādīnaṃ vatthubhāvena. **Vuttanayapaccanīkatoti** “kāmā nāmete aniccā dukkhā vipariṇāmadhammā”tiādīnā kāmaguṇesu ādīnavadassanapubbakanekkhamaṭṭhapaṭipattiyā chandarāgaṃ

vikkhambhayato samucchindantassa ca anuppanno ca kāmāsavo na uppajjati, uppanno ca pahīyati. Tathā mahaggaṭṭhammesu ceva sakalatebhūmakadhammesu ca ādīnavadassanapubbakaaniccādimanasikāravasena nissaraṇapaṭipattiyā anuppannā ca bhavāsavaavijjāsavā na uppajjanti, uppannā ca pahīyantīti evaṃ taṇhāpakke vuttassa nayassa paṭipakkhato **sukkapakkhe vitthāro** veditabbo.

**Tayo evāti** abhidhamme viya “cattāro”ti avatvā kasmā tayo eva āsavā idha imissaṃ dassanāpahātabbakathāyaṃ vuttā? Tattha kāmāsavassa taṇhāpaṇidhibhāvato **appaṇihitavimokkhapaṭipakkhatā** veditabbā. Bhavesu niccaggāhānusārato yebhuyyato bhavarāgasampattito bhavāsavassa **animittavimokkhapaṭipakkhatā**, bhavadiṭṭhiyā pana bhavāsavabhāve vattabbameva natthi, anattasaññāya ñāṇānubhāvasiddhito avijjāsavassa **suññatavimokkhapaṭipakkhatā**. **Etthāti** etissaṃ āsavakathāyaṃ. **Vaṇṇitanti** kathitaṃ. **Abhedatoti** sāmāññato.

**18. Kāmāsavādīnanti** manussalokadevalokagamanīyānaṃ kāmāsavādīnaṃ. Nirayādigamanīyā pana kāmāsavādayo “dassanā pahātabbe āsave”ti ettheva samāruḷhā. Atha vā yadaggena so puggalodassanāpahātabbānaṃ āsavānaṃ adhiṭṭhānaṃ, tadaggena **kāmāsavādīnampi adhiṭṭhānaṃ**. Na hi sāmāññābhedenā vatthubhedo atthīti dassetuṃ “**ettāvatā**”tiādi vuttaṃ. Tenevāha “**sāmāññato vuttāna**”nti. Kasmā panettha dassanāpahātabbesu āsavesu dassetabbesu “ahosiṃ nu kho aha”ntiādinā vicikicchā dassitāti āha “**vicikicchāsīsenā cetthā**”tiādi. **Evanti** yathā soḷasavatthukā vicikicchā uppajjati, evaṃ ayonisomanasikāroti.

**Vijjamānataṃ avijjamānatañcāti** (saṃ. ni. ṭī. 2.2.20) sassatāsaṅkaṃ nissāya “ahosiṃ nu kho ahamatītamaddhāna”nti atīte attano vijjamānataṃ, adhiccasamuppattiāsaṅkaṃ nissāya “yato pabhuti ahaṃ, tato pubbe na nu kho ahosi”nti atīte attano avijjamānatañca kaṅkhati. Kasmā? Vicikicchāya ākāradvayāvalambanato. Tassā pana atītavatthutāya gahitattā sassatādhiccasamuppattiākāranissayatā dassitā. Evaṃ āsappanaparisaṅkapaṭipattikaṃ katthacipi appaṭivattihetubhūtaṃ vicikicchānaṃ kasmā uppādetīti na codetabbametanti dassento āha “**kiṃ kāraṇanti na vattabba**”nti. **Sveva** puthujjanabhāvo eva. Yadi evaṃ tassa ayonisomanasikāreva bhavitabbanti āpannanti āha “**nanu ca puthujjanopi yoniso manasi karoti**”ti. **Tatthāti** yonisomanasikāraṇe.

**Jātiliṅgūpapattiyoti** khattiyabrāhmaṇādiṅgūtiṃ gahaṭṭhapabbajitādiṅgam devamanussādiupapattiñca. **Nissāyāti** upādāya.

Tasmiṃ kāle sattānaṃ majjhimappamānaṃ, tena yutto **pamāṇiko**, tadabhāvato, tato atītabhāvato vā **appamāṇiko** veditabbo. **Kecīti** sārāsamāsācariyā. Te hi “kathaṃ nu khoti issarena vā brahmunā vā pubbakatena vā ahetuto vā nibbattoti cintetī”ti āhu. Tena vuttaṃ “**hetuto kaṅkhatīti vadanti**”ti. Ahetuto nibbattikaṅkhatīti hi hetuparāmasanamevāti.

**Paramparanti** pubbāparappavattim. **Addhānanti** kālādhivacanaṃ, tañca bhummatthe upayogavacanaṃ daṭṭhabbaṃ.

**Vijjamānataṃ avijjamānatañcāti** sassatāsaṅkaṃ nissāya “bhavissāmi nu kho ahamanāgatamaddhāna”nti anāgate attano vijjamānataṃ, ucchedāsaṅkaṃ nissāya “yasmiñca attabhāve ahaṃ, tato paraṃ na nu kho bhavissāmi”ti anāgate attano avijjamānatañca kaṅkhatīti hetṭhā vuttanayena yojetabbaṃ.

**Paccuppannamaddhānanti** addhāpaccuppannassa idhādhippetattā “**paṭisandhim ādim katvā**”tiādi vuttaṃ. “Idaṃ kathaṃ idaṃ katha”nti pavattanato kathaṃkathā, vicikicchā, sā assa atthīti **kathaṃkathīti** āha “**vicikiccho hoti**”ti. **Kā ettha cintā**, ummattako viya hi bālaputhujjanoti paṭikacceva vuttanti adhippāyo. Taṃ mahāmātāya **puttaṃ**. Muṇḍesuntī muṇḍena anicchantam

jāgaraṇakāle na sakkāti suttaṃ muṇḍesuṃ kuladhammatāya yathā taṃ ekacce kulatāpasā,  
rājabhayenāti ca vadanti.

**Sītibhūta**nti idaṃ madhurakabhāvappattiyā kāraṇavacaṇaṃ. “Setibhūta”ntipi pāṭho, udae  
ciraṭṭhānena setabhāvaṃ pattanti attho.

**Attano khattiyabhāvaṃ kaṅkhati** kaṇṇo viya sūtaputtasaññī. Jātiyā vibhāviyamānāya “aha”nti  
tassa attano parāmasanaṃ sandhāyāha “evañhi siyā kaṅkhā”ti. **Manussāpi ca rājāno viyāti** manussāpi  
keci ekacce rājāno viyāti adhippāyo.

**Vuttanayameva** “saṅṭhānākāraṃ nissāyā”tiādinā. **Etthāti** “kathaṃ nu khosmī”ti pade.  
**Abbhantare jīvoti** paraparikkappitaṃ antarattānaṃ vadati. **Soḷasaṃsādīnanti ādi**-saddena sarīra-  
parimāṇa-parimaṇḍala-aṅguṭṭhayavaparamāṇu-parimāṇatādike saṅgaṇhāti.

“Sattapaññatti jīvavisayā”ti diṭṭhigatikānaṃ matimattaṃ, paramatthato pana sā  
attabhāvavisayāvāti āha “**attabhāvassa āgatigatiṭṭhāna**”nti, yatāyaṃ āgato, yattha ca gamissati, taṃ  
ṭhānanti attho.

**19. Yathā ayaṃ vicikicchā uppajjati** ayaṃ vuttappabhedā vicikicchā yathā uppajjati, evaṃ  
ayoniso manasikaroto. Etena vicikicchāya attābhinivesasannissayatamāha. Yathā hi vicikicchā  
attābhinivesaṃ nissāya pavattati, yato sā sassatādhiccasamuppattisassatucchedākārāvalambinī vuttā,  
evaṃ attābhinivesopi taṃ nissāya pavattati “ahosiṃ nu kho aha”ntiādinā antogadhāmaṅkāraṃ  
kathaṃkathibhāvassa attaggāhasannissayabhāvato. Tenevāha “**savicikicchassa ayoniso manasikāraṃ  
thāmagatattā**”ti. **Vikappatthoti** aniyamattho. “Aññatarā diṭṭhi uppajjati”ti hi vuttaṃ. **Suṭṭhu  
dalhabhāvenāti** abhinivesassa ativiya thāmagatabhāvena. **Tattha tatthāti** tasmīṃ bhave.  
**Paccuppannamevāti** avadhāraṇena anāgate atthibhāvaṃ nivatteti, na atīte tatthapi sati atthitāya  
ucchedaggāhassa sabbhāvato. **Atīte eva natthi**, na anāgatepīti adhippāyo.

**Saññākkhandhasīsenāti** saññākkhandhapamukhena, saññākkhandhaṃ pamukhaṃ katvāti attho.  
**Khandheti** pañcapi khandhe. **Attāti gahetvāti** “saññānanasabhāvo me attā”ti abhinivissa.  
Pakāsetabbaṃ vatthūṃ viya, attānampi pakāseto padīpo viya, saññānitabbaṃ nīlādīrammaṇaṃ viya  
attānampi saññānātīti evaṃdiṭṭhitopi diṭṭhigatito hotīti vuttaṃ “**attanāva attānaṃ saññānāmī**”ti.  
Svāyamattho saññāṃ tadaññataradhamme ca “attā anattā”ti ca gahaṇavasena hotīti vuttaṃ  
“**saññākkhandhasīsenā**”tiādi. Ettha ca khandhavinimutto attāti gaṇhato sassatadiṭṭhi, khandhaṃ pana  
“attā”ti gaṇhato ucchedadiṭṭhīti āha “**sabbāpi sassatucchedadiṭṭhiyovā**”ti.

**Abhinivesākārāti** vipariyesākārā. **Vadatīti** iminā kāravēdakaṃsattānaṃ  
hitasukhāvabodhanasamatthataṃ attano dīpeti. Tenāha “**vacīkammaṃsā kāraṃ**”ti. Vedetīti vediyo,  
vediyova **vedeyyo**. Īdisānañhi padānaṃ bahulā kattusādhanataṃ saddasatthavidū maññanti. Uppādavato  
ekanteneva vayo icchitabbo, sati ca udayabbayatte neva niccatāti “**nicco**”ti vadantassa adhippāyaṃ  
vivaranto āha “**uppādavayarahito**”ti. **Sārabhūtoti** niccatāya eva sārabhāvo. **Sabbakālikoti**  
sabbasmīṃ kāle vijjāmāno. **Pakatibhāvanti** sabhāvabhūtaṃ pakatiṃ, “vado”tiādinā vā vuttaṃ  
pakatisaṅkhātaṃ sabhāvaṃ. **Sassatisamanti** sassatiyā samaṃ sassatisamaṃ, thāvamaṃ niccakālantī  
attho. **Tatheva ṭhassatīti** yenākārena pubbe aṭṭhāsi, etarahi tiṭṭhati, tatheva tenākārena anāgatepī  
ṭhassatīti attho.

**Paccakkhanidassanaṃ** idaṃ-saddassa āsannaṃpaccakkhabhāvaṃ katvā. **Diṭṭhiyeva diṭṭhigatanti**  
gata-saddassa padavaḍḍhanamattataṃ āha. **Diṭṭhisugatanti** micchādiṭṭhīsu pariyaṇanti attho.  
Tenevāha “**dvāsaṭṭhidīṭṭhiantogadhattā**”ti. **Diṭṭhiyā gamanamattanti** diṭṭhiyā gahaṇamattaṃ. Yathā  
pana pabbatajalaviduggāni dunniggamaṇāni, evaṃ diṭṭhiggāhopīti āha “**dunniggamaṇaṭṭhena  
gahana**”nti. Taṃ nāma udakaṃ, taṃ gahetvā taṃ atikkamitabbato **kantāro**, nirudakavanaṃ, taṃ

pavanantipi vuccati. Añño pana araññapadeso duratikkamanatthena kantāro viyāti, evaṃ diṭṭhipīti āha “**duratikkamanatthenā**”tiādi. **Vinivijjhanam** vitudanam. **Vilomanam** vipariṇāmahāvo. Anavaṭṭhitasabhāvātāya vicalitaṃ **vipphanditanti** āha “**kadācī**”tiādi. Andubandhanādi viya nissarituṃ appadānavasena aseribhāvakarāṇaṃ **bandhanattho**, kilesakammavipākavaṭṭānaṃ paccayabhāvena dūragatampi ākaḍḍhitvā saṃyojanaṃ **saṃyojanattho**, diṭṭhipi tathārūpāti vuttaṃ “**diṭṭhisāmyojana**”nti. **Bandhanattham dassento** kiccāsiddhiyāti adhippāyo. Tenevāha “**diṭṭhisāmyojanena...pe... muccatī**”ti. Tattha **etehīti** iminā jātiādidukkhassa paccayabhāvamāha. Jātiādi ke dukkhadhamme sarūpato dassetvāpi “na parimuccati dukkhasmā”ti vadantena bhagavatā diṭṭhisāmyojanaṃ nāma sabbānatthakaraṃ mahāsāvajjaṃ sabbassapi dukkhassa mūlabhūtaṃti ayamattho vibhāvītoti dassetuṃ “**kiṃ vā bahunā, sakalavaṭṭadukkhato na muccatī**”ti vuttaṃ.

20. Nanu cettha diṭṭhisāmyojanadassanena sīlabbataparāmāsopi dassetabbo, evañhi dassanena pahātābbā āsavā anavasesato dassitā hontīti codanaṃ sandhāyāha “**yasmā**”tiādi. **Sīlabbataparāmāso kāmāsavādiggahaṇeneva gahito hoti** kāmāsavādīhetukattā tassa. Appahīnakāmarāgādiko hi kāmasukhattham vā bhavasuddhattham vā evaṃ bhavavisuddhi hotīti **sīlabbatāni parāmasanti**, “imināhaṃ sīlena vā vatena vā tapena vā brahmacariyena vā devo vā bhavissāmi devaññataro vā”ti (ma. ni. 1.186; ma. ni. 2.79), “tattha nicco dhuvo sassato avipariṇāmadhammo sassatisamaṃ tatheva ṭhassāmī”ti (ma. ni. 1.19), “sīlena suddhi vatena suddhi sīlabbatena suddhī”ti (dha. sa. 1222) ca **sutte**vuttaṃ sīlabbatam parāmasanti. Tattha **bhavasukhabhavavisuddhiatthanti** bhavasukhatthañca bhavavisuddhiatthañca. **Tassa gahitattāti** sīlabbataparāmāsassa diṭṭhiggahaṇena gahitattā yathā “diṭṭhigatānaṃ pahānāyā”tiādisu (dha. sa. 277). **Tesanti** dassanapahātābbānaṃ. **Dassetuṃ** puggalādhiṭṭhānāya desanāya. **Tabbiparītassāti** yonisomanasikaroto kalyāṇaputhujjanassa.

**Tassāti** “sutavā”tiādi pāṭhassa. **Tāvāti** “sutavā”ti ito paṭṭhāya yāva “so idaṃ dukkha”nti padaṃ, tāva imaṃ padaṃ avadhiṃ katvāti attho. **Heṭṭhā vuttanayenāti** ariyasappurisa-ariyadhamma-sappurisdhamma-manasikaraṇīya-amanasikaraṇīyapadānaṃ yathākkamaṃ mūlapariyāye idha gahetvā vuttanayena attho veditabboti sambandho. **Vuttapaccanīkatoti** “sutavā ariyasāvako, ariyānaṃ dassāvī, sappurisanānaṃ dassāvī”ti etesaṃ padānaṃ sabbākārena vuttaviparītato attho veditabbo, kovidavinītapadānaṃ pana na sabbappakārena vuttaviparītato. Arahā hi nippariyāyena ariyadhamme kovido ariyadhamme suvinīto ca nāma. Tenāha “**paccanīkato ca sabbākārena...pe... ariyasāvakoti veditabbo**”ti. Saṅkhārupekkhāñāṇaṃ **sikhāppattavipassanā**. Keci pana “bhaṅgañāṇato paṭṭhāya sikhāppattavipassanā”ti vadanti, tadayuttaṃ. **Tadanurūpena atthenāti** tassa puggalassa anurūpena ariyatthena, na paṭivedhavasenāti adhippāyo. Kalyāṇaputhujjano hi ayam. Yathā cassa “yopi kalyāṇaputhujjano”ti ārabhitvā “sopi vuccati sikkhatīti sekkho”ti pariyaṇena **sekkhasutte** (saṃ. ni. 5.13) sekkhabhāvo vutto, evaṃ idha ariyasāvakabhāvo vutto. Vuṭṭhānagāminīvipassanālakkhaṇehi ye ariyasappurisdhammavinayasaṅkhātā bodhipakkhiyadhammā tisso sikkhā eva vā sambhavanti, tesam vasena imassa ariyasāvakādībhāvo vutto. Tenāha “**tadanurūpena atthenā**”ti. Ariyassa sāvakoti vā ariyasāvakatthena eva vutto yathā “agamā rājagahaṃ buddho”ti (su. ni. 410). Sikhāppattavipassanāggahaṇāñcettha vipassanaṃ ussukkāpetvā anivattipāṭipadāyaṃ ṭhitassa gahaṇatthanti yathāvuttā atthasaṃvaṇṇanā suṭṭhutaṃ yujjateva.

21. Yathā dhātumukhena vipassanaṃ abhiniviṭṭho dhātukammaṭṭhāniko āyatanādīdimukhena abhiniviṭṭho āyatanādīkammaṭṭhāniko, evaṃ saccamukhena abhiniviṭṭhoti vuttaṃ “**catusaccakammaṭṭhāniko**”ti. Caturōghanittharaṇatthikehi kātābbato kammaṃ, bhāvanā. Kammameva visesādhiḡamassa ṭhānaṃ kāraṇanti, kamme vā yathāvuttanaṭṭhena ṭhānaṃ avatṭhānaṃ bhāvanārambhokammaṭṭhānaṃ, tadeva catusaccamukhena pavattaṃ etassa atthīti **catusaccakammaṭṭhāniko**. Ubhayaṃ nappavattati etthāti **appavattī**. **Uggahitacatusaccakammaṭṭhānoti** ca catusaccakammaṭṭhānaṃ pālito atthato ca uggahetvā manasikārayoggaṃ katvā ṭhito. **Vipassanāmaggaṃ samāruḷhoti** sappaccayanāmarūpadassane patiṭṭhāya tadeva nāmarūpaṃ aniccādito sammāsanto. **Samannāharatīti** vipassanāvajjanaṃ sandhāyāha, tasmā yathā “idaṃ dukkha”nti vipassanāñāṇaṃ pavattati, evaṃ samannāharatī āvajjatīti attho. Kathaṃ

panettha “manasi karotī”ti iminā “vipassatī”ti ayamatto vutto hotīti āha “**ettha...pe... vuttā**”ti. **Etthā**ti ca imasmim sutteti attho. **Vipassatī**ti ca yathā upari visesādhigamo hoti, evaṃ ñāṇacakkhunā vipassati, oloketīti attho. Maggopi vattabbo. Purimañhi saccadvayaṃ gambhīrattā duddasaṃ, itaraṃ duddasattā gambhīraṃ.

**Abhinivesoti** vipassanābhiniveso vipassanāpaṭipatti. **Tadārammaṇeti** taṃ rūpakkhandaṃ ārammaṇaṃ katvā pavatte. **Yāthāvasarasalakkhaṇaṃ vavattapetvā**ti aviparītaṃ attano ārammaṇaṃ sabhāvacchedanādikiccañceva aññāñādilakkhaṇaṃ asaṅkarato hadaye ṭhapetvā. Iminā pubbe nāmarūpaparicchede katepi dhammānaṃ salakkhaṇavavattāpanaṃ paccayapariggahena suvavattāpitaṃ nāma hotīti dasseti yathā “dvikkhattuṃ baddhaṃ subaddha”nti. Evañhi ñāṭapariññāya kiccaṃ siddhaṃ nāma hoti. Paccayato paccayuppannato ca vavattāpitattā pākāṭabhāvena siddhenapi siddhabhāvo pākāṭo hotīti vuttaṃ “**ahutvā hontī**”ti. **Aniccalakkhaṇaṃ āropetī**ti asato hi uppādena bhavitabbaṃ, na sato, uppādavanta ca nesaṃ ekantena icchitabbā paccayāyattavuttibhāvato, sati uppāde avassambhāvī nirodhoti nattheva niccatāvakaṣoti. Sūpaṭṭhitāniccatāya ca udayabbayadhammehi abhiṇṇapaṭipīṇanaṃ dukkhamanaṭṭhena dukkhaṃ. Tenāha “**udayabbayapaṭipīṇitattā dukkhāti dukkhalakkhaṇaṃ āropetī**”ti. Katthacipi saṅkhāragate “mā jīri mā byādhiyī”ti alabbhanaṃ natthi vasavattananti āha “**avasavattanato anattāti anattalakkhaṇaṃ āropetī**”ti. **Paṭipāṭiyāti** udayabbayaññāḍiparamparāya.

**Tasmim khaṇeti** sotāpattimaggakkhaṇe. **Ekapaṭivedhenevā**ti ekaññāneva paṭivijjhanena. Paṭivedho paṭighātābhāvena visaye nissaṅgacārasaṅkhātaṃ nibbijjhanaṃ. **Abhisamayo** avirajjhitaṃ visayassa adhigamasāṅkhāto **avabodho**. “Idaṃ dukkhaṃ, ettakaṃ dukkhaṃ, na ito bhiyyo”ti paricchinditvā jānanaṃ vuttanayena paṭivedhoti **pariññāpaṭivedho**. Ayaṃ yathā ñāṇe pavatte pacchā dukkhassa sarūpāḍiparicchede sammoho na hoti, tathā pavattim gahetvā vutto, na pana maggañāṇassa “idaṃ dukkha”ntiādināpi vattanato. Tenāha “**na hissa tasmim samaye**”tiādi. Pahīnassa puna appahātabbatāya pakaṭṭhaṃ hānaṃ cajanāṃ samucchindanaṃ pahānaṃ, pahānameva vuttanayena paṭivedhoti **pahānapaṭivedho**. Ayampi yena kilesena appahīyamānena maggabhāvanāya na bhavitabbaṃ, asati ca maggabhāvanāya yo uppajjeyya, tassa kilesassa padaghātaṃ karontassa anuppattidhammataṃ āpādentassa ñāṇassa tathāpavattiyā paṭighātābhāvena nissaṅgacāraṃ upādāya evaṃ vutto. Sacchikiriyā paccakkhakarāṇaṃ, anussavākāraparivitakkādike muñcivā sarūpato ārammaṇakarāṇaṃ idaṃ tanti yathāsabhāvato gahaṇaṃ, sā eva vuttanayena paṭivedhoti **sacchikiriyāpaṭivedho**. Ayaṃ pana yassa āvaraṇassa asamucchindanaṃ ñāṇaṃ nirodhaṃ ālambitū na sakkoti, tassa samucchindanaṃ taṃ sarūpato vibhāvitameva pavattatīti evaṃ vutto.

Bhāvanā uppādanā vaḍḍhanā ca, tattha paṭhamamagge uppādanaṭṭhena, dutiyādīsu vaḍḍhanaṭṭhena, ubhayatthāpi vā ubhayathāpi veditabbaṃ. Paṭhamamaggopi hi yathārahaṃ vuṭṭhānagāminiyāṃ pavattaṃ pari jānanaḍiṃ vaḍḍhento pavattoti tatthāpi vaḍḍhanaṭṭhena bhāvanā sakkā viññātuṃ. Dutiyādīsopi appahīnakilesappahānato puggalantarasaḍḍhanato uppādanaṭṭhena bhāvanā, sā eva vuttanayena paṭivedhoti **bhāvanā paṭivedho**. Ayampi hi yathā ñāṇe pavatte pacchā maggadhammānaṃ sarūpaparicchede sammoho na hoti, tathā pavattimeva gahetvā vutto, tiṭṭhatu tāva yathādhigatamaggadhammaṃ yathāpavattesu phaladhammesupi ayaṃ yathādhigatasaccadhammesu viya vigatasammohova hoti. Tena vuttaṃ “diṭṭhadhammo pattadhammo viditadhammo pariyoḡāḷhadhammo”ti (dī. ni. 1.299, 356; mahāva. 27, 57). Yato cassa dhammatāsaṅcoditā yathādhigatasaccadhammāvalambiniyo maggavīthito parato maggaphalapaḷhānāvasiṭṭhakilesanibbānānaṃ paccavekkhāṇā pavattanti. Dukkhasaccadhammā hi sakkāyaditṭhiādayo. Ayañca atthavaṇṇanā “pariññābhisamayenā”tiādisupi vibhāvetabbā. **Ekābhisamayena abhisametī**ti vuttamevatthaṃ vibhūtaraṃ katvā dassetuṃ “**no ca kho aññamaññena ñāṇena**”tiādi vuttaṃ.

Vitaṇḍavādī panāha “ariyamaggañāṇaṃ catūsū saccesu nānābhisamayavasena kiccakaraṇaṃ, na ekābhisamayavasena. Tañhi kālena dukkhaṃ pajānāti, kālena samudayaṃ pajahati, kālena nirodhaṃ

sacchikaroti, kālena maggaṃ bhāveti, aññathā ekassa ñāṇassa ekasmiṃ khaṇe catukiccakaraṇaṃ na yujjati. Na hidaṃ katthaci diṭṭhampi suttaṃ atthī’ ti. So vattabbo – yadi ariyamaggañāṇaṃ nānābhisamayavasena saccāni abhisameti, na ekābhisamayavasena, evaṃ sante paccekampi saccesu nānakkhaṇeneva pavatteyya, na ekakkhaṇena, tathā sati dukkhādīnaṃ ekadesekadesameva pariṇānāti pajahatīti āpajjatīti nānābhisamaye paṭhamamaggādīhi pahātābbaṇaṃ saññojanattayādīnaṃ ekadesekadesappahānaṃ siyāti ekadesasotāpattimaggatṭhādītā, tato eva ekadesasotāpannādītā ca āpajjati anantaraphalattā lokuttarakusalānaṃ, na ca taṃ yuttaṃ. Na hi kālabhedena vinā so eva sotāpanno ca asotāpanno cāti sakkā viññātuṃ.

Apicāyaṃ nānābhisamayavādī evaṃ pucchitabbo “maggañāṇaṃ saccāni paṭivijjhantaṃ kiṃ ārammaṇato paṭivijjhati, udāhu kiccato’ ti? Jānamāno “kiccato’ ti vadeyya, “kiccato paṭivijjhantassa kiṃ nānābhisamayenā’ ti vatvā paṭipāṭiyānidassanena saññāpetabbo. Atha “ārammaṇato’ ti vadeyya, evaṃ sante tassa ñāṇassa vipassanāñāṇassa viya dukkhasamudayānaṃ accantapariññāsamucchedaṃ na yuttā anissaṭṭā. Tathā maggadassanaṃ. Na hi maggo sayameva attānaṃ ārabba pavattatīti yuttaṃ, maggantaparikippanāya pana anavaṭṭhānaṃ āpajjati, tasmā tīṇi saccāni kiccato, nirodhaṃ kiccato ca ārammaṇato ca paṭivijjhantīti evaṃ asammohato paṭivijjhantassa maggañāṇassa nattheva nānābhisamayo. Vuttañhettaṃ “yo bhikkhave dukkhaṃ passati, dukkhasamudayampi so passati’ tiādi. Na cetāṃ kālantaradassanaṃ sandhāya vuttaṃ “yo nu kho, āvuso, dukkhaṃ passati, dukkhasamudayampi ...pe... dukkhanirodhagāminipaṭipadampi so passati’ ti (saṃ. ni. 5.1100) ekaccadassanasamaṅgino aññasaccadassanasamaṅgibhāvavicāraṇāyaṃ tadatthasādhanatthaṃ āyasmatā gavampatittherena ābhatattā, paccekaṅca saccattayadassanassa yojitattā, aññathā purimadiṭṭhassa puna adassanato samudayādidassanamayojaniyaṃ siyā. Na hi lokuttaramaggo lokiyamaggo viya katakārībhāvena pavattati samucchadakattā, tathā yojanena ca sabbadassanaṃ dassanantaraparamanti dassanānuparamo siyāti evaṃ āgamato yuttito ca nānābhisamayo na yujjatīti saññāpetabbo. Evaṃ ce saññattim gacchati, iccetaṃ kusalaṃ. No ce gacchati, **abhidhamme** (kathā. 274) odhisokathāya saññāpetabboti.

**Nirodhaṃ ārammaṇatoti** nirodhameva ārammaṇatoti niyamo gahetabbo, na ārammaṇatovāti. Tena nirodhe kiccatoṃ paṭivedho siddho hoti. **Tasmiṃ samayeti** saccānaṃ abhisamaye. **Visativatthukāti**ādi “tīṇi saññojanānī’ ti vuttānaṃ sarūpadassanaṃ. **Catūsu āsavesūti** idaṃ abhidhammanayena vuttaṃ, na suttantanayena. Na hi sutte katthaci cattāro āsavā āgatā atthi. Yadi vicikicchā na āsavo, atha kasmā “sakkāyadiṭṭhi vicikicchā sīlabbataparāmāso, ime vuccanti, bhikkhave, āsavā dassanā pahātābbā’ ti vuttanti āha “**dassanā pahātābbā**’ tiādi. **Ettha pariyaṇattati** etena sammāsaṅkappassa viya paññākkhandhe kiccasaṅgāyā idha vicikicchāya āsavaṅgaho katoti dasseti.

Sabbo attaggāho sakkāyadiṭṭhiviniṃutto natthīti vuttaṃ “**channaṃ diṭṭhīnaṃ...pe... vibhattā**’ ti. Sā hi diṭṭhi ekasmiṃ cittuppāde santāne ca ṭhitaṃ ekaṭṭhaṃ, tattha paṭhamamā saḥajātekaṭṭhaṃ, itaraṃ pahānekaṭṭhaṃ, tadubhayampi niddhāretvā dassetuṃ “**diṭṭhāsavehī**’ tiādi vuttaṃ. **Sabbathāpīti** sabbappakārena, saḥajātekaṭṭhapahānekaṭṭhappakārehīti attho. **Avasesāti** diṭṭhāsavato avasiṭṭhā. **Tayopi āsavāti** kāmāsavabhavāsavaavijjāsavā. Tathā hi pubbe “catūsu āsavesū’ ti vuttaṃ. **Tasmāti** yasmā bahū evettha āsavā pahātābbā, tasmā bahuvacananiddeso kato “ime vuccanti, bhikkhave, āsavā dassanā pahātābbā’ ti. **Porāṇānanti** aṭṭhakathācariyānaṃ, “purātanānaṃ majjhimbhāṅkāna’ nti ca vadanti.

**Dassanā pahātābbā**tiādīsu yaṃ vattabbaṃ, taṃ heṭṭhā vuttameva.

Dassanāpahātābbaāsavavaṇṇanā niṭṭhitā.

**Samvarāpahātābbaāsavavaṇṇanā**

**22. Samvarādīhīti** samvarapaṭisevanaadhivāsanaparivajjanavinodanehi. **Sabbesampīti** catunnampi ariyamaggānaṃ. **Ayanti** samvarāpahātābbādīkathā **pubbabhāgapaṭipadāti veditābbā**. Tathā hi heṭṭhā



“upakkilesavisodhanam ādim katvā āsavakkhayapaṭipattidassanatta”nti suttantadesanāya payojanam vuttam. Na hi sakkā ādito eva ariyamaggaṃ bhāvetum, atha kho samādinnaṃ indriyesu guttadvāro “saṅkhāyekaṃ paṭisevati, saṅkhāyekaṃ adhvāseti, saṅkhāyekaṃ parivajjeti, saṅkhāyekaṃ vinodeti”ti (dī. ni. 3.348; ma. ni. 2.168) evaṃ vuttam caturāpassenapaṭipattim paṭipajjamāno sammānavidhim otarivā anukkamena vipassanam ussukkāpetvā maggapaṭipāṭiyā āsave khetpeti. Tenāha bhagavā “seyyathāpi, bhikkhave, mahāsamuddo anupubbānino anupubbapono anupubbapabbhāro, na āyatakeneva papāto, evaṃ kho, bhikkhave, imasmim dhammavinaye anupubbāsikkhā anupubbakiriyā anupubbapaṭipadā, na āyatakeneva aññāpaṭivedho”ti (a. ni. 8.20; udā. 45; cūḷava. 385).

**Idhāti** ayam **idha**-saddo sabbākārato indriyasamvarasamvutassa puggalassa sannissayabhūtasāsanaparidīpano, aññāsāsanassa tathābhāvapaṭisedhano cāti vuttam “**imasmim sāsane**”ti. **Ādīnavapaṭisaṅkhāti** ādīnavapaccavekkhaṇā. **Sampalimaṭṭhanti** (a. ni. 11.3.6.58) ghaṃsitam. **Anubyañjanasoti** hatthapādahasitakathitavilokitādippakārabhāgaso. Tañhi ayoniso manasikaroto kilesānam anu anu byañjanato “anubyañjana”nti vuccati. **Nimittaggāhoti** itthipurisanimittādikassa vā kilesavatthubhūtassa vā nimittassa gāho. **Ādittapariyāyanayenāti** ādittapariyāye (sam. ni. 4.28; mahāva. 54) āgatanayena veditabbā ādīnavapaṭisaṅkhāti yojanā. Yathā itthiyā indriyanti itthindriyam, na evamidam, idam pana **cakkhumeva indriyanti cakkhundriyanti**. **Titthakāko viyāti** titthe kāko titthakāko, nadiyā samatikkamanatitthe niyataṭṭhitiko. **Āvāṭakacchapoti** ādīsopi eseva nayo.

Evaṃ tappaṭibaddhavuttitāya **cakkhundriye** niyataṭṭhāno **samvaro** cakkhundriyasamvaro. **Muṭṭhassaccam** satipaṭipakkhā akusaladhammā. Yadi pi aññattha asaṅkheyyampi bhavaṅgacittam nirantaram uppajjati, pasādaghaṭṭanāvajjanuppādānam pana antare dve eva bhavaṅgacittāni uppajjantīti ayam cittaniyamoti āha **bhavaṅge** “**dvikkhattum uppajjivā niruddhe**”ti.

**Javanakkhaṇe pana sace dussilyam vāti** ādi (visuddhi. 11.15; dha. sa. mūlaṭī. 1352) puna avacanatham idheva sabbam vuttanti chasu dvāresu yathāsambhavam yojetabbam. Na hi pañcadvāre kāyavacīduccaritasāṅkhāto dussilyasamvaro atthīti so manodvārasena, itaro channampi dvārānam vasena yojetabbo. Muṭṭhassaccādīnāhi satipaṭipakkhādīlakkaṇānam akusaladhammānam siyā pañcadvāre uppatti, na tveva kāyikavācasikavīttikkamabhūtassa dussilyassa tattha uppatti pañcadvārikajavanānam aviññattijanakkattāti.

**Yathā kinti** yena pakārena javane uppajjamāno asamvaro “cakkhudvāre asamvaro”ti vuccati, tam nidassanam kinti attho. **Yathāti** ādinā nagaradvāre asamvare satī taṃsambandhānam gharādīnam asamvutā viya javane asamvare satī taṃsambandhānam dvārādīnam asamvutāti aññāsamvare aññāsamvutatāsāmaññameva nidasseti, na pubbāparasāmaññam, antobahisāmaññam vā. Sambandho ca javanena dvārādīnam ekasantatipariyāpannatāya eva daṭṭhabbo. Paccayabhāvena purimanipphanam javanakāle asantampi bhavaṅgādi phalanipphattiyā cakkhādi viya santamyeva nāma. Na hi dharamānamyeva “santa”nti vuccati, tasmā satī dvārabhavaṅgādike pacchā uppajjamānam javanam bāhiram viya katvā nagaradvārasamānam vuttam. Itarañca antonagaragharādīsamānam. Javanassa hi paramatthato asatipi bāhirabhāve itarassa ca abbhantarabhāve “pabhassaramidam, bhikkhave, cittaṃ, tañca kho āgantukehi upakkilesehi upakkiliṭṭha”nti (a. ni. 1.49) ādivacanato āgantukabhūtassa kadāci kadāci uppajjamānassa javanassa bāhirabhāvo, tabbidhurasabhāvassa itarassa abbhantarabhāvo ca pariyaṭo veditabbo. Javane vā asamvare uppanne tato param dvārabhavaṅgādīnam asamvarahetubhāvāpattito nagaradvārasadisena javanena pavisitvā dussilyādicorānam dvārabhavaṅgādīsū musanam kusalaḥḍavināsanam daṭṭhabbam. Uppanne hi asamvare dvārādīnam tassa hetubhāvo paññāyati, so ca uppajjamānoyeva dvārādīnam samvarūpanissayabhāvam paṭibāhentoyeva pavattatīti ayañhettha asamvarādīnam pavattinayo. Pañcadvāre rūpādīrammaṇe āpāthagate yathāpaccayam akusalajavane uppajjivā bhavaṅgam otiṇṇe manodvārikajavanam tamyeva ārammaṇam katvā bhavaṅgam otarati, puna tasmimyeva dvāre “itthī puriso”ti ādinā visayam

vavatthapetvā javanaṃ bhavaṅgaṃ otarati, puna vāre rajjanādivasena javanaṃ javati, punapi yadi tādisaṃ ārammaṇaṃ āpāthamāgacchati, taṃsadisameva pañcadvāre rūpādīsu javanaṃ uppajjati. Taṃ sandhāya vuttaṃ “**evameva javane dussīlyādīsu uppannesu tasmim̐ asaṃvare sati dvārampi agutta**”ntiādi. Ayaṃ tāva asaṃvarapakke atthavaṇṇanā.

Samvarapakkehi imināva nayena attho veditabbo. Samvarena samannāgato puggalo samvutoti vuttoti āha “**upetoti vuttaṃ hoti**”ti. **Ekajjhaṃ katvāti** “pātimokkhasaṃvarasaṃvuto”ti padañca atthato abhinnaṃ samānaṃ katvā. **Ayameva cettha attho sundarataro** uparipāliyā saṃsandanato. Tenāha “**tathāhi**”tiādi. **Yanti ādesoti** iminā līngavipallāsena saddhiṃ vacanavipallāso katoti dasseti, nipātapadaṃ vā etaṃ paccattaputhuvacanatthaṃ. **Vighātakarāti** cittavighātakaraṇā cittadukkhanibbattakā ca. Yathāvuttakilesahetukā dāhānubandhā vipākā eva **vipākaparilāhā**. Yathā panettha āsavā aññe ca vighātakarā kilesavipākaparilāhā sambhavanti, taṃ dassetuṃ “**cakkhuvārehi**”tiādi vuttaṃ, taṃ suviññeyyameva. Ettha ca saṃvaraṇūpāyo, saṃvaritabbaṃ, saṃvaro, yato so saṃvaro, yattha saṃvaro, yañca saṃvaraphalanti ayaṃ vibhāgo veditabbo. Kathaṃ? Paṭisaṅkhā yonisoti hi **saṃvaraṇūpāyo**. Cakkhundriyaṃ **saṃvaritabbaṃ**. Saṃvaraggahaṇena gahitā sati **saṃvaro**. Asaṃvutassāti **saṃvaraṇāvadhī**. Asaṃvarato hi saṃvaraṇaṃ. Saṃvaritabbagahaṇena siddho idha **saṃvaravisayo**. Cakkhundriyañhi saṃvaraṇānaṃ rūpārammaṇe saṃvariyaṭṭi avuttasiddhoyamattho. Āsavatannimittakilesādiparilāhābhāvo **phalaṃ**. Evaṃ sotadvārādīsupi yojetabbaṃ. **Sabbatthevāti** manodvāre pañcadvāre cāti sabbasmiṃ dvāre.

Samvarāpahātabbaāsavavaṇṇanā niṭṭhitā.

### Paṭisevanāpahātabbaāsavavaṇṇanā

**23. Paṭisaṅkhā yoniso cīvarantiādīsu** “sītassa paṭighātāyā”tiādinā vuttaṃ paccavekkhaṇameva yoniso paṭisaṅkhā. **Īdisanti** evarūpaṃ iṭṭhārammaṇaṃ. **Bhavapatthanāya assādayatoti** bhavapatthanāmukhena bhāvitaṃ ārammaṇaṃ assādentassa. **Cīvaranti** nivāsanādi yaṃ kiñci cīvaraṃ. **Paṭisevatīti** nivāsanādivasena paribhuñjati. **Yāvadevāti** payojanaparimāṇaniyamaṃ. Sītapaṭighātādiyeva hi yogino cīvarapaṭisevane payojanaṃ. **Sītassāti** dhātukkabhato vā utupariṇāmato vā uppannasītassa. **Paṭighātāyāti** paṭibāhanatthaṃ tappaccayassa vikārassa vinodanatthaṃ. **Uṇhassāti** aggisantāpato uppannassa uṇhassa. **Ḍaṃsādayo** pākāyeva. Puna **yāvadevāti** niyatapayojanaparimāṇaniyamaṃ. Niyatāñhi payojanaṃ cīvarapaṭisevanassa hirikopīnapaṭicchādanāṃ, itaraṃ kadāci kadāci. **Hirikopīnanti** sambādhatṭhānaṃ. Yasmiñhi aṅge vivaṭe hirikuppati vinassati, taṃ hiriyā kopanato hirikopīnaṃ, tassa paṭicchādanatthaṃ cīvaraṃ paṭisevati.

**Piṇḍapātanti** yaṃ kiñci āhāraṃ. So hi piṇḍolyena bhikkhānāya patte patanato tattha tattha laddhabhikkhāpiṇḍānaṃ pāto sannipātoti “piṇḍapāto”ti vuccati. **Neva davāyāti** na kīlanāya. **Na madāyāti** na balamadamānamadapurisamadatthaṃ. **Na maṇḍanāyāti** na aṅgapaccaṅgānaṃ pīṇanabhāvattāṃ. **Na vibhūsanāyāti** na tesameva sobhanatthaṃ, chavisampatiatthanti attho. Imāni ca padāni yathākkamaṃ moha-dosa-saṅghāna-vaṇṇa-rāgūpanissaya-pahānatthāni veditabbāni. Purimaṃ vā dvayaṃ attano attano saṃkilesuppattinisedhanatthaṃ, itaraṃ parassapi. Cattāripi kāmasukhallikānuyogassa pahānatthaṃ vuttānīti veditabbāni. **Kāyassāti** rūpakāyassa. **Ṭhitiyā yāpanāyāti** pabandhatṭhitatthañceva pavattiyā avicchedanatthañca cirakālaṭṭhitatthaṃ jīvitindriyassa pavattāpanatthaṃ. **Vihimsūparatīyāti** jighacchādūkkhassa uparamānatthaṃ. **Brahmacariyānuggahāyāti** sāsanaṃaggabrahmacariyānaṃ anuggahatthaṃ. **Itīti** evaṃ iminā upāyena. **Purāṇaṃ vedanaṃ paṭisaṅkhāmi**ti purāṇaṃ abhuttapaccayā uppajjanakavedanaṃ paṭihanissāmi. **Navañca vedanaṃ na uppādessāmi**ti navaṃ bhuttapaccayā uppajjanakavedanaṃ na uppādessāmi. Tassā hi anuppannāya anuppajjanatthameva āhāraṃ paribhuñjati. Ettha ca abhuttapaccayā uppajjanakavedanā nāma yathāpavattā jighacchānimittā vedanā. Sā hi abhuñjantassa bhīyo bhīyo pavaḍḍhanavasena uppajjati, bhuttapaccayā uppajjanakavedanāpi khudānimittāva aṅgadāhasūlādivedanā appavattā. Sā hi bhuttapaccayā anuppannāva na uppajjissatīti. Vihimsānimittatā cetāsaṃ vihimsāya

viseso.

**Yātrā ca me bhavissatīti** yāpanā ca me catunnaṃ iriyāpathānaṃ bhavissati. **Yāpanāyāti** iminā jīvitindriyayāpanā vuttā, idha catunnaṃ iriyāpathānaṃ avicchedasaṅkhātā yāpanāti ayametāsaṃ viseso. **Anavajjatā ca phāsuvihāro cāti** ayuttapariyesanapaṭiggahaṇaparibhogaparivajjanena anavajjatā, parimitaparibhogena phāsuvihāro. Asappāyāparimitabhojanapaccayā aratitandīvijambhitāviññugarahādidosābhāvena vā anavajjatā, sappāyaparimitabhojanapaccayā kāyabalasambhāvena phāsuvihāro. Yāvadatthaudarāvadehakabhojanaparivajjanena seyyasukhapassasukhamiddhasukhādīnaṃ abhāvato anavajjatā, catupañcālopamattaññīnabhojanena catuiriyāpathayogyatāpādanato phāsuvihāro. **Vuttañhetam** –

“Cattāro pañca ālope, abhutvā udakaṃ pive;  
Alaṃ phāsuvihārāya, pahitattassa bhikkhuno”ti. (theragā. 983);

Ettāvatā payojanapariggaho, majjhimā ca paṭipadā dīpitā hoti.

**Senāsananti** sayanañca āsanañca. Yattha hi vihārādike seti nipajjati, āsati nisīdati, taṃ senāsaṇaṃ. **Utuparissayavinodanapaṭisallānārāmatthanti** utuyeva parisahanaṭṭhena parissayo, sarīrābādhacittavikkhepakaro, atha vā yathāvutto utu ca sīhabyagghādīpākaṭaparissayo ca rāgadosādīpaṭicchannaparissayo ca utuparissayo, tassa vinodanattañceva ekībhāvasukhatthañca. Idañca cīvarapaṭisevane hirikoṭīnapaṭicchādanam viya tassa niyatapayojananti puna “**yāvadevā**”ti vuttaṃ.

**Gilānapaccayabhesajjaparikkhāranti** rogassa paccanīkappavattiyā gilānapaccayo, tato eva bhisakkassa anuññātavatthutāya bhesajjam, jīvitassa parivārasambhārahāvehi parikkhāro cāti **gilānapaccayabhesajjaparikkhāro**, taṃ. **Uppannānti** jātānaṃ nibbattānaṃ. **Veyyābādhikānanti** byābādhato dhātukkabhato ca tannibbattarogato ca jātānaṃ. **Vedanānanti** dukkhavedanānaṃ. **Abyābajjhāparamatāyāti** niddukkhaparamabhāvāya paṭisevāmīti yojanā. Evamettha saṅkhepeva pālivaṇṇanā veditabbā. **Navavedanuppādanatopīti** na kevalam āyatim eva vipākaparīlāhā, atha kho atībhojanapaccayā alaṃsāṭakādīnaṃ viya navavedanuppādanatopīti veditabbāti attho.

Paṭisevanāpahātabbāsavavaṇṇanā niṭṭhitā.

### Adhivāsanāpahātabbāsavavaṇṇanā

**24. Khamoti** khamanako. Kammatṭhānikassa calanaṃ nāma kammatṭhānapariccāgoti āha “**calati kampaṭi kammatṭhānaṃ vijahati**”ti. **Adhimattampi uṇham sahati**, sahanto ca na naggasamaṇādayo viya sahati, atha kho kammatṭhānavijahanenāti āha “**sveva thero viyā**”ti. **Bahicaṅkameti** leṇato bahi caṅkame. **Uṇhabhayenevāti** narakaggiuṇhabhayeneva. Tenāha “**avīcimahānirayaṃ paccavekkhitvā**”ti, tampi “mayā anekakkhattum anubhūtam, idaṃ pana tato mudutara”nti evaṃ paccavekkhitvā. **Etthāti** etasmim ṭhāne. **Aggisantāpova veditabbo** sūriyasantāpassa parato vuccamānattā.

**Parisuddhasīlohamasmīti** sabbathāpi “visuddhasīlohamasmī”ti maraṇam aggahetvā avippaṭisāramūlikam pītim uppādesi. **Saha pītuppādāti** pharaṇapītiyā uppādena saheva. **Visam nivattitvāti** pītevegena ajjhotthatam daṭṭhamukheneva bhassitvā. **Tatthevāti** sappena daṭṭhatṭhāneyeva. **Cittekaggatam labhitvāti** “pītimanassa kāyo passambhati”tiādīnā (dī. ni. 1.466; 3.359; sam. ni. 5.376; a. ni. 3.96; 11.12) nayena samādhānaṃ pāpuṇitvā.

Paccayesu santoso bhāvanāya ca āramitabbatṭhānatāya ārāmo assāti paccayasantosabhāvanārāmo, tassa bhāvo **paccaya...pe... rāmatā**, tāya. **Mahātheroti** vuḍḍhataro thero. Vacanameva tadattham ñāpetukāmaṇam pathoti **vacanapatho**.

Asukhaṭṭhena vā **tibbā**. Yañhi na sukhaṃ, taṃ anitṭhaṃ “tibba”nti vuccati. **Evamaṃsabhāvoti** “adhivāsanajātiyo”ti padassa atthamāha. **Muhuttena** khaṇeva vāte hadayaṃ phāletuṃ āraddeheva. **Anāgāmī hutvā parinibbāyīti** arahattaṃ patvā parinibbāyī.

**Evamaṃ sabbatthāti** “uṇhena phuṭṭhassa sītaṃ patthayato”tiādinā sabbattha uṇhādinimittam kāmāsavuppatti veditabbā, sītaṃ vā uṇhaṃ vā anitṭhanti adhippāyo. Attaggāhe sati attaniyaggāhoti āha “**mayhaṃ sītaṃ uṇhanti gāho diṭṭhāsavo**”ti. Sītādiḷe upagāte sahaṅti khamantī te attano upari vāsenti viya hotīti vuttaṃ “**āropetvā vāsetiyevā**”ti. **Na nirassatīti** na vidhunati. Yo hi sītādiḷe na sahati, so te nirassanto vidhunanto viya hotīti.

Adhivāsanāpahātabbaāsavavaṇṇanā niṭṭhitā.

### Parivajjanāpahātabbaāsavavaṇṇanā

**25. Ahaṃ samaṇoti** (a. ni. ṭī. 3.6.58) “ahaṃ samaṇo, kiṃ mama jīvitena vā maraṇena vā”ti evamaṃ acintevāti adhippāyo. **Paccavekkhitvāti** gāmapadesaṃ payoanādiṅca paccavekkhitvā. **Paṭikkamatīti** hatthiādinam samīpagamanato apakkamati. Kaṇṭakā yattha tiṭṭhanti, taṃ **kaṇṭakaṭṭhānaṃ**. **Amanussaduṭṭhānīti** amanussasañcārena dūsītāni, sapaṛissayānīti attho. **Samānanti** samaṃ, avisamanti attho. **Akāsi vā** tādissaṃ anācāraṃ.

**Sīlasaṃvarasaṅkhātenāti** “kathaṃ parivajjanaṃ sīla”nti yadetta vattabbaṃ, taṃ heṭṭhā vuttameva. Apica “caṇḍaṃ hatthiṃ parivajjeti”ti vacanato hatthiādi parivajjanampi bhagavato vacanānuṭṭhānanti katvā ācārasīlamevāti veditabbaṃ.

Parivajjanāpahātabbaāsavavaṇṇanā niṭṭhitā.

### Vinodanāpahātabbaāsavavaṇṇanā

**26. Itipīti** iminā kāraṇena, ayonisomanasikārasamuṭṭhitattāpi lobhādisahagatattāpi kusala paṭipakkhatopītiādiḷi kāraṇehi ayaṃ vitakko akusaloti attho. Iminā nayena **sāvajjoti**ādisupi attho veditabbo. Ettha ca **akusaloti**ādinā diṭṭhadhammikaṃ kāmavitakkassa ādinavaṃ dasseti, **dukkhavipākoti** iminā samparāyikaṃ. **Attabyābādhāya saṃvattatīti**ādisupi imināva nayena ādinavavibhāvanā veditabbā. Uppannassa kāmavitakkassa anadhivāsaṃ nāma puna tādissa anuppādanam, taṃ panassa pahānaṃ vinodanam byantikaraṇam anabhāvagamananti ca vattum vaṭṭatīti pāliyaṃ “uppannaṃ kāmavitakkaṃ nādhivāseti”ti vatvā “pajahati”tiādi vuttanti tamatthaṃ dassento “**anadhivāseto kiṃ karotīti pajahati**”tiādimāha. Pahānañcetta vikkhambhanameva, na samucchodoti dassetuṃ “**vinodeti**”tiādi vuttanti vikkhambhanavaseneva attho dassito.

**Kāmavitakkoti** sampayogato ārammaṇato ca kāmāsahagato vitakko. Tenāha “**kāmapaṭisaṃyutto takko**”tiādi. **Kāmapaṭisaṃyuttoti** hi kāmarāgasāṅkhātena kāmena sampayutto vatthukāmasāṅkhātena paṭibaddho ca. **Uppannuppanneti** tesam pāpavitakkānaṃ uppādāvattahāgahaṇam vā kataṃ siyā anavasesaggahaṇam vā. Tesu paṭhamaṃ sandhāyāha “**uppannamatte**”ti, sampati jāteti attho. Anavasesaggahaṇam byāpanicchāya hotīti dassetuṃ “**satakkhattumpi uppanne**”ti vuttaṃ. **Ñātivitakkoti** “amhākaṃ ñātayo sukhajīvino sampattiyuttā”tiādinā gehassitapemavasena ñātaka ārabha uppannavitakko. **Janapadavitakkoti** “amhākaṃ janapado subhikkho sampannasasso ramaṇīyo”tiādinā gehassitapemavaseneva janapadaṃ ārabha uppannavitakko. Ukkuṭikappadhānādīhi dukkhe nijjiṅṅe samparāye attā sukhī hoti amaroti dukkarakārikāya paṭisaṃyutto amaratthāya vitakko, taṃ vā ārabha amarāvikkhepaditṭhisahagato amaro ca so vitakko cāti **amaravitakko**. **Parānuddayatāpaṭisaṃyuttoti** paresu upaṭṭhākādīsu sahanandikādivasena pavatto anuddayatāpatirūpako gehassitapemena paṭisaṃyutto vitakko. **Lābhasakkārasilokapaṭisaṃyuttoti** cīvarādīlābhena ceva sakkārena ca kittisaddena ca ārammaṇakaraṇavasena paṭisaṃyutto.

**Anavaññattipaṭisaṃyuttoti** “aho vata maṃ pare na avajāneyyumaṃ, na heṭṭhā katvā maññeyyumaṃ, pāsānacchattaṃ viya garuṃ kareyyu”nti uppannavitakko.

Kāmaavitakko kāmasaṅkappanasabhāvattā kāmasaṅkappapavattiyā sātisaṃyattā ca kāmanākāroti āha “**kāmaavitakko panettha kāmasavo**”ti. **Tabbisesoti** kāmasavaviseso, rāgasahavuttīti adhippāyo. Kāmaavitakkādike vinodeti attano santānato nīharati etenāti **vinodanaṃ**, vīriyanti āha “**vīriyasamvarasaṅkhātena vinodanena**”ti.

Vinodanāpahātabbaāsavavaṇṇanā niṭṭhitā.

### **Bhāvanāpahātabbaāsavavaṇṇanā**

27. “Satta bojjhaṅgā bhāvitā bahulīkatā vijjāvimuttiyo paripūrentī”ti (saṃ. ni. 5.187) vacanato vijjāvimuttīnaṃ anadhigamo tato ca sakalavaṭṭadukkhānavattīti **abhāvanāya ādīnava**, vuttavipariyāyena bhagavato orasaputtabhāvādivasena ca **bhāvanāya ānisamso** veditabbo. **Uparimaggattayasamayasaṃbhūtā**ti dutiyādimaggakkhaṇe jātā, bhāvanādhikāroto dutiyamaggādīpariyāpannāti attho. Nanu ca te lokuttarā eva, kasmā visesanaṃ katanti? Nayidaṃ visesanaṃ, visesitabbaṃ panetaṃ, lokuttarabojjhaṅgā eva adhippetā, te ca kho uparimaggattayasamayasaṃbhūtāti. **Bojjhaṅgesu asammohatthanti** vipassanājhānamaggaphalabojjhaṅgesu sammohābhāvattaṃ. Missakanāyena hi bojjhaṅgesu vuccamānesu tadanādivivekadassanavasena vipassanābojjhaṅgādayo vibhajitvā vuccanti, na nibbattitalokuttarabojjhaṅgā evāti bojjhaṅgesu sammoho na hoti bojjhaṅgabhāvanāpaṭipattiyā ca sammadeva pakāsītattā. **Idha panāti** imasmiṃ sutte, imasmiṃ vā adhikāre. **Lokuttaranayo eva gahetabbo** bhāvanāmaggassa adhiakatattā.

**Ādīpadānanti** (a. ni. ṭī. 1.1.418) “satisambojjhaṅga”nti evamādīnaṃ tasmīṃ tasmīṃ vākye ādībhūtānaṃ padānaṃ. **Atthatoti** visesavasena sāmāññavasena ca padatthato. **Lakkhaṇādīhīti** lakkhaṇarasapaccupaṭṭhānato. **Kamatoti** anupubbato. **Anūnādhikatoti** tāvattakato. **Vibhāvināti** viññunā.

**Satisambojjhaṅgeti** satisambojjhaṅgapade. **Saraṇaṭṭhenāti** anussaraṇaṭṭhena. Cirakatādibhedam ārammaṇaṃ upagantvā ṭhānaṃ, anissajjanaṃ vā **upaṭṭhānaṃ**. Udaḥ alābu viya pilavitvā gantuṃ adatvā pāsānassa viya niccalassa ārammaṇassa ṭhānaṃ saraṇaṃ asammūṭṭhatākaraṇaṃ **apilāpanaṃ**. **Vuttampi hetam** milindapañhe. **Bhaṇḍāgārikoti** bhaṇḍagopako. Apilāpe karoti **apilāpeti**. **Therenāti** nāgasenaṭṭherena. Sammosapaccanīkaṃ kiccaṃ **asammoso**, na sammosābhāvamattaṃ. **Gocarābhimukhabhāvapaccupaṭṭhānāti** kāyādiārammaṇābhimukhabhāvapaccupaṭṭhānā.

**Bodhiyā** dhammasāmaggiyā, **aṅgo** avayavo, **bodhissa vā** ariyasāvakaṃ **aṅgo** kāraṇaṃ. **Paṭiṭṭhānāyūhanā** oghataraṇasuttavaṇṇanāyaṃ (saṃ. ni. aṭṭha. 1.1.1) –

“Kilesavasena paṭiṭṭhānaṃ, abhisāṅkhāravasena āyūhanā. Taṇhādīṭṭhīhi paṭiṭṭhānaṃ, avasesakilesābhisaṅkhārehi āyūhanā. Taṇhāvasena paṭiṭṭhānaṃ, diṭṭhivasena āyūhanā. Sassatadiṭṭhiyā paṭiṭṭhānaṃ, ucchedadiṭṭhiyā āyūhanā. Līnavasena paṭiṭṭhānaṃ, uddhaccavasena āyūhanā. Kāmasukhānuyogavasena paṭiṭṭhānaṃ, attakilamathānuyogavasena āyūhanā. Sabbākusalābhisaṅkhāravasena paṭiṭṭhānaṃ, sabbalokiyakusalābhisaṅkhāravasena āyūhanā”ti –

Vuttesu pakāresu idha avuttānaṃ vasena veditabbā. Yā hi ayaṃ bodhīti vuccatīti yojetabbaṃ. “Bujjhatī”ti padassa paṭibujjhatīti atthoti āha “**kilesasantānaniddāya uṭṭhahatī**”ti. Taṃ pana paṭibujjhanaṃ atthato catunnaṃ saccānaṃ paṭivedho, nibbānasseva vā sacchikiriyāti āha “**cattāri**”tiādi. **Jhānaṅgamaggaṅgādayo viyāti** yathā aṅgāni eva jhānamaggā, na aṅgavinimuttā, evamidhāpīti attho. **Senaṅgarathaṅgādayo viyāti** etena puggalapaññattiyā avijjamānapaññattibhāvaṃ dasseti.

**Bodhāya saṃvattantīti bojjaṅgāti** idaṃ kāraṇattho aṅga-saddoti katvā vuttaṃ. Bujjhantīti bodhiyo, bodhiyo eva aṅgāti bojjaṅgāti vuttaṃ “**bujjhantīti bojjaṅgā**”ti. **Anubujjhantīti** vipassanādīnaṃ kāraṇānaṃ bujjhitabbānañca saccānaṃ anurūpaṃ bujjhanti. **Paṭibujjhantīti** kilesaniddāya utṭhahanato paccakkhabhāvena vā paṭimukhaṃ bujjhanti. **Sambujjhantīti** aviparītabhāvena sammā ca bujjhanti. Evaṃ upasaggānaṃ atthavisesadīpanatā daṭṭhabbā. Bodhi-saddo hi sabbavisesayuttaṃ bujjhanaṃ sāmāñña gahetvā ṭhito.

**Vicinātīti** “tayidaṃ dukkha”ntiādinā vīmaṃsati. **Obhāsanam** dhammānaṃ yathābhūtasabhāvapaṭicchādakassa sammohassa vidhamaṃsanaṃ yathā āloko andhakārassa. Yasmiṃ dhamme sati vīro nāma hoti, so dhammo **vīrabhāvo**. **Īrayitabbatoti** pavattetabbato. Kosajjapakkhato patitum appadānavasena sampayuttānaṃ paggaṇhanaṃ **paggaḥo**. **Upatthambhanaṃ** anubalappadānaṃ. Osīdanaṃ layāpatti, tappaṭipakkhato **anosīdanaṃ** daṭṭhabbaṃ. **Piṇayatīti** tappeti vaḍḍheti vā. **Pharaṇam** paṇitarūpehi kāyassa byāpanaṃ. **Tuṭṭhi** nāma pīti. Udaggabhāvo **odagyaṃ**, kāyacittānaṃ ukkhipananti attho. **Kāyacittadarathapassambhanatoti** kāyadarathassa cittadarathassa ca passambhanaṃ vūpasamanaṃ. **Kāyoti** cettha vedanādayo tayo khandhā. **Daratho** sārāmbho, dukkhadomanassapaccayānaṃ uddhaccādikilesānaṃ, tappadhānānaṃ vā catunnaṃ khandhānaṃ adhivacanaṃ. Uddhaccādikilesapaṭipakkhabhāvo daṭṭhabbo, evañcettha passaddhiyā **aparipphandanasītibhāvo** daṭṭhabbo asāraddhabhāvato. Tenāha bhagavā “passaddho kāyo asāraddho”ti (ma. ni. 1.52).

**Samādhānatoti** sammā cittassa ādhānato ṭhapanato. **Avikkhepo** sampayuttānaṃ avikkhittatā, yena sasampayuttā dhammā avikkhittā hontī, so dhammo avikkhepoti. **Avisāro** attano eva avisaraṇasabhāvo. **Sampiṇḍanaṃ** sampayuttānaṃ avippakiṇṇabhāvāpādānaṃ nhānīyacunṇānaṃ udakaṃ viya. **Cittaṭṭhitipaccupaṭṭhānoti** “cittassa ṭhiti”ti (dha. sa. 11) vacanato cittassa pabandhaṭṭhitipaccupaṭṭhāno. **Ajjhupekkhanatoti** udāsīnabhāvato. **Sāti** bojjaṅgaupekkhā. Samappavatte dhamme paṭisaṅcikkhati upapattito ikkhati tadākārā hutvā pavattatīti **paṭisaṅkhānalakkhaṇā**, evañca katvā “paṭisaṅkhā santiṭṭhanā gahaṇe majjhataṭṭā”ti upekkhākiṇṇādhimattatāya saṅkhārupekkhā vuttā. Sampayuttadhammānaṃ yathāsakakiccakaraṇavasena samaṃ pavattanapaccayatā **samavāhitā**. Alīnānuddhatappavattipaccayatā **ūnādhikatānivāraṇam**. Sampayuttānaṃ asamappavattihetukapakkhapātaṃ upacchindantī viya hotīti vuttaṃ “**pakkhapātupacchedarasā**”ti. Ajjupekkhaneva **majjhatabhāvo**.

Sabbasmiṃ līnapakkhe uddhaccapakkhe ca atthikā patthanīyā icchitabbāti sabbatthikā, taṃ **sabbatthikaṃ**. Samānakkhaṇapavattīsu sattasupi sambojjaṅgesu vācāya kamappavattito paṭipāṭiyā vattabbesu yaṃ kiñci paṭhamaṃ avatvā satisambojjaṅgasseva paṭhamaṃ vacanassa kāraṇaṃ sabbesaṃ upakāraṇatantī vuttaṃ “**sabbesa**”ntiādi. **Sabbesanti** ca līnuddhaccapakkhikānaṃ, aññathā sabbepi sabbesaṃ paccayāti.

“**Kasmā satteva bojjaṅgā vuttā**”ti codako saddhālobhādīnampi bojjaṅgabhāvaṃ āsankati, itaro satiādīnaṃyeva bhāvanāya upakāraṇaṃ dassento “**līnuddhaccapaṭipakkhato sabbatthikato cā**”tiādimāha. Tattha **līnassāti** atisithilavīriyatādīhi bhāvanāvīthiṃ anotaritvā saṃkuṭitassa cittassa. Tadā hi passaddhisamādhīupekkhāsambojjaṅgā na bhāvetabbā. Tañhi etehi allatīnādīhi viya paritto aggi dussamuṭṭhāpiyaṃ hotīti. Tenāha bhagavā “seyyathāpi, bhikkhave, puriso parittaṃ aggim ujjāletukāmo assa, so tattha allāni ceva tiṇāni pakkhipeyyā”tiādi (saṃ. ni. 5.234). Dhammavicayavīriyapītisambojjaṅgā pana bhāvetabbā, sukkhatiṇādīhi viya paritto aggi līnaṃ cittaṃ etehi susamuṭṭhāpiyaṃ hotīti. Tena vuttaṃ “**yasmīñca kho**”tiādi. Tattha yathāsakaṃ āhārasena dhammavicayasambojjaṅgādīnaṃ bhāvanā veditabbā. Vuttañhetam “atthi, bhikkhave, kusalākusalā dhammā...pe... pītisambojjaṅgassa bhīyyobhāvāya...pe... saṃvattatī”ti (saṃ. ni. 5.232). Tattha sabhāvasāmāññalakkhaṇapaṭivedhavasena pavattamanasikāro...pe... dhammavicayasambojjaṅgādayo bhāveti nāma.

**Uddhaccassāti** cittassa accāraddhavīriyatādīhi sītibhāvapatiṭṭhitabhāvaṃ anotiṇṇatāya, tadā dhammavicayavīriyapītisambojjhaṅgā na bhāvetabbā. Tañhi etehi sukkhatiṇṇādīhi viya aggikkhandho duvūpasamayaṃ hoti. Tenāha bhagavā “seyyathāpi, bhikkhave, puriso mahantaṃ aggikkhandhaṃ nibbāpetukāmo assa, so tattha sukkhāni ceva tiṇṇāni pakkhipeyyā”tiādi (saṃ. ni. 5.234). Passaddhisamādhiupekkhāsambojjhaṅgā pana bhāvetabbā, allatiṇṇādīhi viya aggikkhandho uddhataṃ cittaṃ etehi suvūpasamayaṃ hoti. Tena vuttaṃ “**yasmiñca kho**”tiādi. Etthāpi yathāsakaṃ āhārasasena passaddhisambojjhaṅgādīnaṃ bhāvanā veditabbā. Vuttañhettaṃ “atthi, bhikkhave, kāyapassaddhi cittaṃ passaddhi...pe... upekkhāsambojjhaṅgassa bhīyyobhāvāya saṃvattatī”ti (saṃ. ni. 5.232). Tattha yathāssa passaddhiādayo uppannapubbā, taṃ ākāraṃ sallakkhetvā tesāṃ uppādanavasena tathā manasikarontova passaddhisambojjhaṅgādayo bhāveti nāma. Satisambojjhaṅgo pana sabbattha bahūpakāro. So hi cittaṃ līnapakkhikānaṃ passaddhiādīnaṃ vasena layāpattito, uddhaccapakkhikānañca dhammavicayādīnaṃ vasena uddhaccapātato rakkhati, tasmā so loṇadhūpanaṃ viya sabbabyañjanesu sabbakammikaamacco viya ca rājakesu sabbattha icchitabbo. Tenāha “**satiñca khvāhaṃ, bhikkhave, sabbathikaṃ vadāmi**”ti (saṃ. ni. 5.234).

Ñatvā ñātābbāti (saṃ. ni. ṭi. 1.1.129) sambandho. **Vaḍḍhi** nāma vepullaṃ bhīyyobhāvo punappunaṃ uppādo evāti āha “**punappunaṃ janeti**”ti. **Abhivuddhiṃ** pāpento **nibbatteti**. **Vivittatāti** vivittabhāvo. Yo hi vivecanīyato viviccati, yaṃ viviccitvā ṭhitāṃ, tadubhayaṃ idha vivittabhāvasāmaññena “vivittatā”ti vuttaṃ. Tesu purimo vivecanīyato viviccamānatāya vivekasāṅkhātāya viviccanakiriyāya samaṅgī dhammasamūho tāya eva viviccanakiriyāya vasena vivekoti gahito. Itaro sabbaso tato tato vivittasabhāvatāya. Tattha yasmiṃ dhammapuñje satisambojjhaṅgo viviccanakiriyāya pavattati, taṃ yathāvuttāya viviccamānatāya vivekasāṅkhātāya nissāyeva pavattati, itaraṃ pana tanninnatādārammaṇatāhīti vuttaṃ “**viveke nissita**”nti. Yathā vā vivekavasena pavattaṃ jhānaṃ “vivekaja”nti vuttaṃ, evaṃ vivekavasena pavatto bojjhaṅgo “vivekanissito”ti daṭṭhabbo. Nissayaṭṭho ca vipassanāmaggānaṃ vasena maggaphalānaṃ veditabbo. Asatipi pubbāparabhāve “paṭiccasamuppāda”ti ettha paccayānaṃ samuppādanaṃ viya abhinnadhammādhārā nissayanabhāvanā sambhavantīti. **Ayamevāti** viveko eva. Viveko hi pahānavinayavirāganīrodhā ca samānatthā.

Tadaṅgasamucchedanissaraṇavivekanissitāya vatvā paṭipassaddhivivekanissitāya avacanaṃ “satisambojjhaṅgaṃ bhāveti”tiādīnā bhāvetabbānaṃ bojjhaṅgānaṃ idha vuttattā. Bhāvitabbojjhaṅgassa hi ye sacchikātabbā phalabojjhaṅgā, tesāṃ kiccaṃ paṭipassaddhiviveko. **Ajjhāsayatoti** “nibbānaṃ sacchikarissāmi”ti mahantaajjhāsayatō. Yāpī vipassanākkhaṇe saṅkhārārammaṇaṃ cittaṃ, saṅkhāresu pana ādīnaṃ suṭṭhu disvā tappaṭipakkhe nibbāne adhimuttatāya ajjhāsayatō nissaraṇavivekanissitā dāhābhībhūtassa puggalassa sītaninnacittatā viya. **Na paṭisiddhā** vipassanāpādakesu kasiṇārammaṇādījhānesu satiādīnaṃ nibbedhabhāgiyattā. Anuddharantā pana vipassanā viya bodhiyā maggassa āsannakāraṇaṃ jhānaṃ na hoti, nāpi tathā ekantikaṃ kāraṇaṃ, na ca vipassanākiccassa viya jhānakiccassa niṭṭhānaṃ maggoti katvā na uddharanti. Ettha ca kasiṇaggahaṇena tadāyattāni āruppānīpi gahitānīti daṭṭhabbāni. Tānīpi hi vipassanāpādakāni nibbedhabhāgiyāni ca hontīti vattum vaṭṭati tanninnabhāvasabbhāvato. Yadaggena hi nibbānaninnatā, tadaggena phalaninnatāpi siyā. “Kudāssu nāmāhaṃ tadāyatanāṃ upasampajja vihareyya”nti (ma. ni. 1.465) ādivacanampetassa atthassa sādhaṃ.

**Vossagga**-saddo pariccāgattho pakkhandanatto cāti vossaggassa duvidhatā vuttā. Vossajjanañhi pahānaṃ, vissaṭṭhabhāvena nirāsāṅkapavati ca, tasmā vipassanākkhaṇe tadaṅgavasena, maggakkhaṇe samucchedavasena paṭipakkhassa pahānaṃ vossaggo, tathā vipassanākkhaṇe tanninnabhāvena, maggakkhaṇe ārammaṇakaraṇena vissaṭṭhasabhāvato vossaggoti veditabbā. **Yathāvuttena pakārenāti** tadaṅgasamucchedapakārena tanninnatādārammaṇakaraṇapakārena ca. Pubbe vossagga-padasseva atthassa vuttattā āha “**sakalena vacanenā**”ti. **Pariṇamantaṃ** vipassanākkhaṇe, **pariṇataṃ** maggakkhaṇe. Pariṇāmo nāma pariṇāpāko āha “**paripaccantaṃ paripakkañcā**”ti. Pariṇāko ca āsevanalābhena āhitasāmatthiyassa kilesassa pariccājitum nibbānañca pakkhanditum

tikkhavisadasabhāvo. Tenāha “**ayañhī**”tiādi. **Esa nayoti** yvāyaṃ “tadaṅgavivekanissita”ntiādinā satisambojjhaṅge vutto, sesesu dhammavicayasambojjhaṅgādīsupi esa nayoti evaṃ tattha netabbanti attho.

Evaṃ ādikammikānaṃ bojjhaṅgesu asammohatthaṃ missakanayaṃ vatvā idāni nibbattitalokuttarabojjhaṅgavasena atthaṃ vibhāvetuṃ “**idha panā**”tiādi vuttaṃ. **Idha panāti** imasmiṃ sabbāsavasuttante. **Maggo eva vossaggavipariṇāmī** bhāvanāmaggassa idha adhippetattā. **Taṅca khoti** satisambojjhaṅgaṃ. **Samucchedatoti** samucchindanato.

Diṭṭhāsavassa paṭhamamaggavajjhata “**tayo āsavā**”ti vuttaṃ. Tepi anapāyagamanīyā eva veditabbā apāyagamanīyānaṃ dassaneneva pahīnattā. Satipi sambojjhaṅgānaṃ yebhuyyena maggabhāve tattha tattha sambojjhaṅgasabhāvānaṃ maggadhammānaṃ vasena vuttamaggattayasampayuttā bojjhaṅgāti paccekabojjhaṅge “bojjhaṅgabhāvanāyā”ti iminā gaṇhanto “**maggattayasampayuttāyā**”ti āha.

Bhāvanāpahātabbāāsavavaṇṇanā niṭṭhitā.

**28. Thomentoti** āsavappahānassa sudukkarattā tāya eva dukkarakiriyāya taṃ abhitthavanto. **Assāti** pahīnāsavabhikkhuno. **Ānisaṃsanti** taṅhācchedādidukkhakkhayapariyosānaṃ udrayaṃ. **Etehi** pahānādisaṃkittanehi. **Ussukkaṃ janentoti** evaṃ dhammassāmināpi abhitthavanīyaṃ mahānisaṃsaṅca āsavappahānanti tattha ādarasahitaṃ ussāhaṃ uppādentō. **Dassaneneva pahīnāti** dassanena pahīnā eva. Tena vuttaṃ “**na appahīnesuyeva pahīnasaññī**”ti.

**Sabba-saddena** āsavānaṃ, āsavaṃvarānaṅca sambandhavasena dutiyapaṭhamavikappānaṃ bhedo daṭṭhabbo. **Dassanābhisamayāti** pariññābhisamayā pariññākiccāsiddhiyā. Tenāha “**kiccavasena**”ti, asammohapaṭivedhenāti attho. **Samussayo** kāyo, attabhāvo vā.

Anavajjapīṭisomanassasahitaṃ cittaṃ “attano”ti vattabataṃ arahati atthāvahattā, na tabbiparītaṃ anathāvahattāti pīṭisampayuttacittataṃ sandhāyāha “**attamanāti sakamanā**”ti. Tenāha “**tuṭṭhamanā**”ti. **Attamanāti** vā pīṭisomanassehi gahitamanā. Yasmā pana tehi gahitā sampayuttatāva, tasmā vuttaṃ “**pīṭisomanassehi vā sampayuttamanā**”ti. Yadettha atthato na vibhattaṃ, taṃ vuttanayattā suviññeyyattā cāti veditabbaṃ.

Sabbāsavasuttavaṇṇanāya līnatthappakāsanā samattā.

### 3. Dhammadāyādasuttavaṇṇanā

**29. Tasmā taṃ dassetvāti** yasmā suttantavaṇṇanā suttanikkhepaṃ dassetvā vuccamānā pākaṭā hoti, yasmā cassa dhammadāyādasuttassa aṭṭhuppattiko nikkhepo, tasmā taṃ nikkhepaṃ dassetvā, kathetvāti attho. **Lābhasakkāreti** (saṃ. ni. ī. 2.2.63) lābhasakkārasaṅkhātāya aṭṭhuppattiyāti keci, lābhasakkāre vā aṭṭhuppattiyāti apare. Yā hi lābhasakkāranimittaṃ tadā bhikkhūsu paccayabāhullikatā jātā, taṃ aṭṭhuppattiṃ katvā bhagavā imaṃ desesīti. **Yamakamahāmeghoti** heṭṭhāolambanapariuggamanavasena satapaṭalo sahasapaṭalo yugaḷamahāmegho. **Tiṭṭhanti ceva** bhagavati katthaci nibaddhavāsaṃ vasante, cārikaṃ pana gacchante **anubandhanti ca**. Bhikkhūnampi yebhuyyena kappasatasahassaṃ tato bhīyyopi pūritadānapāramisaṅcayattā tadā mahālābhasakkāro uppajjīti vuttaṃ “**evaṃ bhikkhusaṅghassapī**”ti.

**Sakkatoti** sakkārappato. **Garukatoti** garukārappatto. **Mānitoti** bahumato manasā piyāyito ca. **Pūjitoti** mālādipūjāya ceva catupaccayābhipūjāya ca pūjito. **Apacitoti** apacāyanappatto. Yassa hi cattāro paccaye sakkatvāpi abhisāṅkhate paṇītapāṇīte upanenti, so sakkato. Yasmīṃ garubhāvaṃ paccupaṭṭhapetvā te denti, so garukato. Yaṃ manasā piyāyanti bahumaññanti ca, so bahumato. Yassa



sabbametaṃ pūjāvasena karonti, so pūjito. Yassa abhivādanapaccuṭṭhānañjalikammādivasena paramanipaccakāraṃ karonti, so apacito. Bhagavati bhikkhusaṅghe ca loko evaṃ paṭipanno. Tena vuttaṃ “tena kho pana...pe... parikkhāraṇa”nti. **Lābhaggayasaggapattanti** lābhassa ca yasassa ca aggaṃ ukkaṃsaṃ pattaṃ.

Paccayā cīvarādayo garukātabbā etesanti **paccayagarukā**, āmisacakkhukāti attho. Paccayesu giddhā gadhitā paccayānaṃ bahulabhāvāya paṭipannāti **paccayabāhulikā**. **Bhagavatopi pākaṭā ahoṣi** pakaticārittavasenaṃ adhippāyo aññathā apākaṭasseva abhāvato. Dhammasabhāvacintāvasena pavattaṃ sahattappañānaṃ **dhammasaṃvego**, idha pana so bhikkhūnaṃ lābhagarutādhammavasena veditabbo. **Samaṇadhammavuttīti** samaṇadhammakaraṇaṃ. **Sāti** dhammadāyādadesanā. Paṭibimbadassanavasena sabbakāyassa dassanayoggo ādāsoti **sabbakāyikaādāso**.

Pitu-dāyaṃ, tena dātappaṃ, tato laddhabbaṃ arahabhāvena ādiyantīti **dāyādā**, puttā. Tañca loke āmisameva, sāsane pana dhammopīti tattha yaṃ sāvajjaṃ aniyyānikañca, taṃ paṭikkhipitvā, yaṃ niyyānikaṃ anavajjañca, tattha bhikkhū niyojento bhagavā avoca “**dhammadāyādā me, bhikkhave, bhavatha, mā āmisadāyādā**”ti. **Dhammassa me dāyādāti** mama dhammassa ogāhino, dhammabhāgabhāginoti attho. Tathā hi vakkhati “dhammakotṭhāsasseva sāmīno”ti (ma. ni. aṭṭha.1.29). **Nibbattitadhammoti** asaṃkilesikānuttarādibhāvena dhammasāmaññato niddhāritadhammo. Pariyāyeti sabhāvato parivattetvā ñāpeti etenāti **pariyāyo**, lesa, lesakāraṇaṃ vā. Tadabhāvato **nippiyāyadhammo** maggappattiyā apāyapatanādito accantameva vāraṇato. Itaro vuttavipariyāyato **pariyāyadhammo** accantaṃ apāyadukkhavaṭṭadukkhapātanato paramparāya vāraṇato. Yathā hi lokiyaṃ kusalaṃ dānasīlādi vivaṭṭaṃ uddissa nibbattitaṃ, ayaṃ taṃ asampādentampī taṃ sampāpakassa dhammassa nibbattakāraṇabhāvapariyāyena pariyāyadhammo nāma hoti, evaṃ taṃ vaṭṭaṃ uddissa nibbattitaṃ, yaṃ taṃhādīhi savisesaṃ āmasitabbato āmisanti loke pākaṭaṃ acchādanabhojanādi, tassa, taṃsadisassa ca phalavisesassa nimittabhāvapariyāyena pariyāyāmisanti vuccatīti dassento āha “**yaṃ panidaṃ...pe... idaṃ pariyāyāmisam nāmā**”ti.

“Sakalameva hidaṃ, ānanda, brahmacariyassa yadidaṃ kalyāṇamittatā”ti (saṃ. ni. 5.2, 3) ādivacanato sāvakehi adhigatopi lokuttaradhammo satthuyevāti vattabbaṃ arahatīti vuttaṃ “**nippiyāyadhammopi bhagavatoyeva santako**”ti. Sāvakānañhi dhammaditṭhipaccayassapi yonisomanasikārassa viśesapaccayo paratoghoso ca tathāgatādhiṇoti tehi paṭividdhopi dhammo dhammassāminoyevāti vattaṃ yuttaṃ. Tenāha “**bhagavatā hi**”tiādi. Tattha **anuppannassa maggassāti** kassapassa bhagavato sāsanantaradhānato pabhuti yāva imasmā buddhuppādā asambodhavasena na uppannassa ariyamaggassa. **Uppādetāti** nibbattetā. Taṃ panetaṃ maggassa bhagavato nibbattaṃ, na paccekabuddhānaṃ viya sasantāneyeva, atha kho parasantānepīti dassetuṃ “**asañjātassa maggassa sañjanetā, anakkhātassa maggassa akkhātā**”ti vuttaṃ. Tayidaṃ maggassa uppādanaṃ sañjānanañca atthato jānanaññeva asaṃmohaṇāpaṭivedhabhāvato vuttaṃ “**maggāññū maggavidū**”ti. Akkhānaṃ panassa sukusalabhāvenāti vuttaṃ “**maggakovidō**”ti. Satthārā yathāgataṃ maggaṃ anugacchantīti **maggānugā** bhagavato eva taṃ maggaṃ suṭṭhu adhigamanato. Pacchā parato sammā anu anu āgatā paṭipannāti **pacchā samannāgatā**.

**Jānaṃ jānātīti** jānitabbameva abhiññeyyādibhedam jānāti ekantahitapaṭipattito. **Passaṃ passatīti** tathā passitabbameva passati. Atha vā **jānaṃ jānātīti** sabbaññutaññānaṃ jānitabbaṃ jānātiyeva. Na hi padesaññānaṃ jānitabbaṃ sabbaṃ ekantato jānāti. **Passaṃ passatīti** dibbacakkhu paññācakkhu dhammacakkhu buddhacakkhu samantacakkhusaṅkhātehi pañcahi cakkhūhi passitabbaṃ passatiyeva. Atha vā **jānaṃ jānātīti** yathā aññe savipallāsā kāmārūpapariññāvādino jānantāpi vipallāsavasena jānanti, na evaṃ bhagavā. Bhagavā pana pahīnavipallāsattā jānanto jānātiyeva, diṭṭhidassanassa ca abhāvā passanto passatiyevāti attho. **Cakkhubhūtoti** paññācakkhumayattā tassa ca pattattā sattesu ca taduppādanato dassanapariñāyakaṭṭhena lokassa cakkhu viya bhūto. **Ñānabhūtoti** etassa ca evameva attho daṭṭhabbo. Dhammā bodhipakkhiyā, brahmā maggo, tehi uppannattā, tesamvā pattattā adhigatattā, lokassa ca taduppādanato “**dhammabhūto, brahmabhūto**”ti ca veditabbo. **Vattāti**

catusaccadhammaṃ vadatīti vattā. Ciraṃ saccappaṭivedhaṃ pavattento vadatīti **pavattā**. **Atthassa ninnetā**ti dhammatāsankhātaṃ paramatthaṃ nibbānañca niddhāretvā dassetā, pāpayitā vā. **Amatassa dātā**ti amataṃ sacchikiriyāṃ sattesu uppādentō amataṃ dadātīti amatassa dātā. Bodhipakkhiyadhammānaṃ tadāyattabhāvato **dhammassāmī**.

“Yā ca nibbānasampatti, sabbametena labbhati;  
Sukho vipāko puññānaṃ, adhippāyo samijjhati. (peṭako. 23);

Nibbānapaṭisaṃyutto, sabbasampattidāyako’’ti –

Evamādiṃ bhagavato vacanaṃ sutvā eva bhikkhū dānādipuññānaṃ vivaṭṭasannissayataṃ jānanti, na aññathāti vuttaṃ “**pariyāyadhammopi...pe... paṭilabhati**’’ti. “Edisaṃ paribhuñcītabba’’nti kappiyassa ca cīvarādīpaccayassa bhagavato vacanena vinā paṭiggahopi bhikkhūnaṃ na sambhavati, kuto paribhogotī āha “**nippariyāyāmisampī**’’tiādi.

Pariyāyāmisassa bhagavato santakabhāvo pariyāyadhammassa tabbhāveneva dīpito. Tadeva sāmibhāvaṃ dassentoti sambandho. **Tasmāti** attadhīnapaṭilābhapaṭiggahatāya attano santakattā ca. **Tatthāti** tasmīṃ dhammāmise.

Paccayā cīvarādayo paramā pāpūnitabbabhāvena uttamamariyādā etassa na uttarimanussadhammā appicchatādayo cāti **paccayaparamo**, lābhagarūti attho. **Taṇhuppādesūti** “cīvarahetu vā, bhikkhave, bhikkhuno taṇhā uppajjamānā uppajjati, piṇḍapātasenāsanaitibhavābhavahetu vā, bhikkhave, bhikkhuno taṇhā uppajjamānā uppajjati’’ti (dī. ni. 3.311; a. ni. 4.9; itivu. 105) evaṃ vuttasu catūsu taṇhuppattikoṭṭhāsesu. Appicchatāsantutṭhisallekhpavivekādayo **appicchatādayo**.

**Tatthāti** tasmīṃ ovāde, tesu vā dhammapaṭiggāhakesu bhikkhūsu. Bhavissati vā yesaṃ tatthāti yojanā. Imasmīṃ pakkhe **tatthāti** tasmīṃ ovāde icceva attho daṭṭhabbo. **Adhippāyo** āmisadāyādātāya uppajjanakaanatthānuppādassa dhammadāyādātāya uppajjanakaatṭhuppattiyā ca ākaṅkhā. Tenāha “**passati**’’tiādi. Tattha **āmise upakkhalitānanti** āmisahetu vipaṭipannānaṃ. **Attakāleti** kassapasammāsambuddhakāle. **Kapilassa bhikkhuno** vatthu kapilasuttena, “**saṅghāṭipīādittā hotī**’’tiādinā lakkhaṇasuttena (saṃ. ni. 2.218) ca vibhāvetabbāṃ. Āmisagaruko appagghabhāvena kūṭakahāpaṇo viya nittejo samaṇatejena anujjalato nibbutaṅgāro viya nippabho ca hotīti yojanā. **Tatoti** paccayagarukabhāvato. **Vivattitacittoti** vinivattitamānaso, sallekhevuttīti attho.

**Dhammadāyādāti** ettāvātā antogadhāvadhāraṇaṃ vacananti tena avadhāraṇena nivattitamatthaṃ vibhāvetuṃ “**mā āmisadāyādā**’’ti paṭikkhepo dassito. Tatheva ca vibhāvetuṃ adhippāyānisamsavibhāvanesupi dassito, tathā ādīnavavibhāvanena dhammadāyādātapaṭikkhepo. **Apadisitabbāti** heṭṭhā katvā vattabbāti. **Ādiyāti** ettha yasmā ā-kāro mariyādatto, tasmā dhammadāyādātāvidhurena āmisadāyādabhāvena hetubhūtena, karaṇabhūtena vā ādiyāṃ vivecanaṃ viññūhi visuṃ karaṇaṃ vavatthānassa hotīti āha “**visuṃ kātabbā**’’ti. Tenāha “**viññūhi gārayhā bhaveyyāthāti vuttaṃ hotī**’’ti.

“Atthi me tumhesu anukampā...pe... no āmisadāyādā’’ti bhikkhūsu attano karuṇāyanākittanaṃ tesāṃ mudukaraṇaṃ, “ahampi tenā’’tiādi pana tatopi savisesaṃ mudukaraṇanti āha “**atīva mudukaraṇattha**’’nti.

**Nālakapaṭipadādayo** nālakasuttādīsū (su. ni. 684-728) āgatapaṭipattiyo. Tā pana yasmā nālakattherādīhi paṭipannā paramasallekhevuttibhūtā atiuukkaṭṭhapaṭipattiyo, tasmā idha dhammadāyādapaṭipadāya udāharaṇabhāvena uddhaṭā. **Sakkhībhūtāti** tāya paṭipattiyā vuccamānāya “kiṃ me vinā paṭipajjanako atthī’’ti asaddahantānaṃ paccakkhakarāṇena sakkhībhūtā. **Imasminti** “tumhe ca me bhikkhave dhammadāyādā’’tiādike vākye. **Sesanti** “tumhe ca me’’tiādikāṃ sukkapakke

āgataṃ pālīpadaṃ. **Vuttanayapaccanīkenāti** “tena dhammadāyādabhāvena no āmisadāyādabhāvenā”ti evaṃ kaṇhapakkhe vuttanayassa paṭipakkhena.

**30. Thomanam sutvāti** paṭipajjanakassa puggalassa pasamsanam sutvā yathā taṃ sapaṇisassa āyasmato upasenassa paṭipattiyā sīlathomanam sutvā. **Nipātapadanti** iminā idha-saddassa anattakataṃmāha. **Pavāritoti** paṭikkhepito. Yo hi bhuñjanto bhojanena titto parivesakena upanītabhojanam paṭikkhipati, so tena pavāritena paṭikkhepito nāma hoti. Tenāha “**pavāritoti...pe... vuttam hoti**”ti. Pakārehi diṭṭhādīhi vāreti saṅghādike yācāpeti bhatte karoti etāyāti **pavāraṇā**, āpattivisodhanāya attavossaggo okāsadānam. Sā pana yasmā yebhuyyena vassamvutthehi kātābbā vuttā, tasmā “**vassamvutthapavāraṇā**”ti vuttam. Pavāreti paccaye icchāpeti etāyāti **pavāraṇā**, cīvarādīhi upanimantanā. Pakārayuttā vāraṇāti **pavāraṇā**, vippakatabhojanatādicaturaṅgasahito bhojanapaṭikkhepo. Sā pana yasmā anattirittabhojananimittāya āpattiyā kāraṇam hoti, tasmā “**anattirittapavāraṇā**”ti vuttā. Yāvadattabhojanassa pavāraṇā **yāvadattapavāraṇā**, pariyoṣitabhojanassa upanītāhārapaṭikkhepoti attho.

“Bhuttāvi”ti vacanato bhojanapāripūritā idhādhippetāti āha “**paripuṇṇoti bhojanena paripuṇṇo**”ti. **Pariyoṣitoti** etthāpi eseva nayo “bhojanena bhojanakiriyāya pariyoṣito”ti. **Aṭṭhakathāyam** pana adhippetattham pākaṭam katvā dassetuṃ bhojana-saddassa lopo vutto. **Dhātoti** titto. **Sādhakānīti** ṇāpakāni. Pariyoṣitabhojanam suhitayāvadattatāgahaṇehi bhuttāvitādayo, bhuttāvitādiggahaṇehi vā itare bodhitā hontīti aññamaññam nesam ṇāpakañāpetabbatam dassetuṃ “**yo hī**”tiādī vuttam. Evaṃ chahipi padehi udarāvadehakaṃ bhojanam dassitam, tañca kho parikkappanāvasena. Na hi bhagavā evaṃ bhuñjati. Tenāha “**sabbañcetam parikkappetvā vutta**”nti.

“Siyā eva, nāpi siyā”ti ca idaṃ atthadvayampi idha sambhavatīti vuttam “**idha ubhayampi vaṭṭati**”ti. **Athāti** anantaram, mama bhojanasamanantaramevāti attho. Taṃ pana yasmā yathāvuttakālapaccāmasanam hoti, tasmā “**tamhi kāle**”ti vuttam. **Apparuḷhahariteti** ruhamānatiṇādiharitarahite. Abhāvattho ca ayam **appa**-saddo “appiccho”tiādīsu (ma. ni. 1.252, 336; sam. ni. 2.148) viya.

**Kathitepīti pi**-saddo avuttasamuccayattho. Tena vāpasamīkaraṇādīṃ saṅgaṇhāti. Tathā hesa **vutta**-saddo “no ca kho paṭivutta”ntiādīsu (pārā. 289) vāpasamīkaraṇe dissati, “pannalomo paradattavutto”tiādīsu (cūḷava. 332) jīvitavuttiyam, “paṇḍupalāso bandhanā pavutto”tiādīsu (pārā. 92; pāci. 666; mahāva. 129; ma. ni. 3.59) apagame, “gītam pavuttam samihita”ntiādīsu (dī. ni. 1.285) pāvacanabhāvena pavattite, loke pana “vuttam parāyaṇa”ntiādīsu (mahābhāsa 7.2.26) ajjhene dissatīti.

Na ettha piṇḍapātabhojanena dhammadāyādatā nivāritā, piṇḍapātabhojanam pana anādaritvā dhammānudhammapaṭipattīti ettha kāraṇam dassento āha “**piṇḍapātam...pe... vītināmeyyā**”ti. Tattha **vītināmeyyāti** kammaṭṭhānānuyogena khepeyya. Tenāha “**ādittasīsūpamaṃ paccavekkhitvā**”ti. **Ādittasīsūpamanti**ādittasīsūpamasuttam.

**Kiñcāpīti** ayam “yadipī”ti iminā samānattho nipāto. Nipāto ca nāma yattha yattha vākye payujjati, tena tena vattabattahajotako hotīti idha “piṇḍapāta”ntiādīnā anuññāpasamsāvasena vuccamānassa atthassa jotakoti adhippāyena “**anujānanapasamsanathe nipāto**”ti vuttam, anuññāpasamsārambhe pana “asambhāvanathe”ti vuttam siyā purimeyeva sambhāvanāvibhāvanato adhikattānulomato ca.

Ekavāram pavattam piṇḍapātapāṭikkhipanam katham dīgharattam appicchatādīnam kāraṇam hotīti codanam sandhāyāha “**tassa hī**”tiādī. Tattha **atricchatāti** atra icchatīti atriccho, tassa bhāvo atricchatā, atthato paralābhapatthanā. Tathā hi vuttam “purimeyeva sakalābhena asantuṭṭhi, paralābhe ca patthanā, etam atricchatālakkaṇa”nti (vibha. aṭṭha. 849). **Pāpicchatāti** asantaguṇasambhāvanādhippāyatā. Pāpā icchā etassāti pāpiccho, tassa bhāvo pāpicchatā. Yathāha “asantaguṇasambhāvanatā paṭiggahaṇe ca amattaññutā, etam pāpicchalakkaṇa”nti (vibha. aṭṭha. 851). Mahantāni vatthūni icchatī, mahatī vā tassa

icchāti mahiccho, tassa bhāvo **mahicchatā**. Yaṃ sandhāya vuttaṃ “santaguṇasambhāvanatā paṭiggahaṇe ca amattaññūtā, etaṃ mahicchalakkaṇa”nti. Paccavekkhamāno nivāressatīti yojanā. **Assa bhikkhuno saṃvattissati** piṇḍapātaṭikkhepo.

Mahiccho puggalo yathā paccayadānavasena paccayadāyakehi bharituṃ asakkuṇeyyo, evaṃ paccayapariyesanavasena attanāpīti vuttaṃ “**attanopi upaṭṭhākānampi dubbhāro hotī**”ti. Saddhādeyyassa vinipātavasena pavattiyā **aññassa ghare chaḍḍento**. **Rittapattovāti** yesu kulesu paṭipinḍavasena pavattati, tesam sabbapacchimam attano yathāladham datvā tattha kiñci aladdhā rittapatto **vihāram pavisitvā nipajjati** jighacchādubbalyenāti adhippāyo. Yathāladhapaccayaparibhogena, puna pariyesanānāpajjanena attano subharatā, yathāladhapaccayena avaññam akatvā santosāpattiyā upaṭṭhākānam subharatā veditabbā.

**Kathāvatthūnīti** appicchatādipaṭisaṃyuttānam kathānam vatthūnīti kathāvatthūnī, appicchatādayo eva. **Tīṇīti** tīṇi kathāvatthūnī. **Abhisallekhikāti** ativiya kilese sallikhatīti abhisallekho, appiccha tādiguṇasamudāyo, so etissā atthīti abhisallekhikā, mahicchatādīnam tanubhāvāya uttarūpā appicchatādipaṭisaṃyuttatā. **Cetovinīvaraṇasappāyāti** kusalacittupattiyā nivārakānam nīvaraṇānam dūrībhāvakarāṇena cetovinīvaraṇasaṅkhātānam samathavipassanānam sappāyā. Samathavipassanācittasseva vā vibhūtibhāvakarāṇāya sappāyā upakārikāti **cetovinīvaraṇasappāyā**. **Ekantanibbidāyāti**tiādi yena nibbidādīnisaṃsena ayam kathā abhisallekhikā cetovinīvaraṇasappāyā ca nāma hoti, tam dassetuṃ vuttaṃ. Tattha **ekantanibbidāyāti** ekamsena vaṭṭadukkhatō nibbindanattāyā. **Virāgāya nirodhāyāti** tasseva virajjanattāṇca nirujjhanattāṇca. **Upasamāyāti** sabbakilesavūpasamāya. **Abhiññāyāti** sabbassapī abhiññeyyassa abhiññanāya. **Sambodhāyāti** catumaggasambodhāya. **Nibbānāyāti** anupādisesanibbānāya. Etesu hi ādito tīhi vipassanā vuttā, puna tīhi maggo, itarena nibbānam. Tena samathavipassanā ādiṃ katvā nibbānapariyosāno ayam sabbo uttarimanussadhammo dasakathāvatthulābhino sambhavatīti dasseti. **Paripūressantīti** taṃsabhāvato upakārato ca saṃvattissanti. Appicchatādayo hi ekavārauppannā upari tadattāyā saṃvattissanti. Kathāvatthuparipūraṇam sikkhāparipūraṇāṇca vuttanayeneva veditabbam.

**Amataṃ nibbānanti** anupādisesanibbānadhātuṃ. Itarā pana sekkhāsekkhadhammapāripūriyā paripuṇṇā. Nibbānapāripūri cettha tadāvahadhammapāripūrivāsena pariyāyato vuttāti veditabbā. Idāni yāyam appicchatādīnam anukkamaparivuddhiyā guṇapāripūritā, tam upamāya sādento “**seyyathāpi**”tiādimāha. Tattha **pāvussakoti** vassānamāse uṭṭhito. So hi cirānuppavatti hoti. **Pabbatakandarā** pabbatesu upaccakādhiccakāpabhavanijjharādinadiyo. **Sarasākhāti** yattha upariunnatapadesato udakam āgantvā tiṭṭhati ceva sandati ca, te. **Kusobbhā** khuddakataḷākā. **Kunnadiyoti** pabbatapādato nikkhantā khuddakanadiyo. Tā hi mahānadiyo otarantiyo paripūrenti. **Paramadhammadāyādanti** paramam uttamam dhammadāyādabhāvam, paramam dhammadāyajjam vā. **Te bhikkhūti** te dhammapaṭiggāhake bhikkhū. **Sanniyojenti** mūlaguṇehi appicchatādīhi yojento.

**Uggahetvāti** atthato byañjanato ca upadhāraṇavasena gahetvā aviparītam gahetvā. **Saṃsandetvāti** mama desanānusārena mamajjhāsayaṃ avirajjhivā. Yathā idheva **cintesūti** yathā imissā dhammadāyādadesanāya cintesī, evam aññatthāpi dhammathomanattham gandhakuṭim pavisanto cintesī. **Ekajjhāsayaṃyāti** samānādhippāyāya. **Matiyāti** paññāya. **Ayam desanā aggāti**tiādi bhagavā dhammasenāpatiṃ guṇato eva paggaṇhātīti katvā vuttaṃ.

**Cittagatiyāti** cittavasena kāyassa pariṇāmanena “ayam kāyo idaṃ cittaṃ viya hotū”ti kāyassa cittena samānagatikātādhiṭṭhānena. Katham pana kāyo dandhappavattiko lahuparivattanacittena samānagatiko hotīti? Na sabbathā samānagatiko. Yatheva hi kāyavasena cittapariṇāmane cittaṃ sabbathā kāyena samānagatikam na hoti. Na hi tadā cittaṃ sabhāvasiddhena attano khaṇena avattitvā dandhavuttikassa rūpadhammassa khaṇena vattituṃ sakkoti, “idaṃ cittaṃ ayam kāyo viya hotū”ti pana adhiṭṭhānena dandhagatikassa kāyassa anuvattanato yāva icchitaṭṭhānappatti, tāva kāyagatiṃ anulomentameva hutvā santānavasena pavattamānam cittaṃ kāyagatikam katvā pariṇāmitam nāma hoti,

evaṃ “ayaṃ kāyo idaṃ cittaṃ viya hotū”ti adhiṭṭhānena pageva lahusaññāya sukhumasaññāya ca sampāditattā abhāvitiddhipādānaṃ viya dandhaṃ avattitvā yathā lahuṃ katipayacittavāreheva icchitaṭṭhānappatti hoti, evaṃ pavattamāno kāyo cittaगतिकabhāveneva pariṇāmito nāma hoti, na ekacittakkhaṇeneva pavattiyā. Evañca katvā bāhusamiñjanappasāraṇūpamāpi upacārena vinā suṭṭhutaṃ yuttā hoti, aññathā dhammatāvīlomītā siyā. Na hi dhammānaṃ lakkhaṇaññathattaṃ iddhibalena kātuṃ sakkā, bhāvaññathattameva pana sakkāti.

**31. Bhagavato adhippāyānurūpaṃ** bhikkhūnañca ajjhāsayaṃ ñatvāti vacanaseso. Desakāle viya bhājanampi oloketvā eva mahāthero dhammaṃ katheti. **Pakkantassāti** idaṃ anādare sāmivacananti dassento “**pakkantassa sato**”tiādīmāha. **Kittakenāti** kena parimāṇena. Taṃ pana parimāṇaṃ yasmā parimeyyassa atthassa paricchindanaṃ hoti, tasmā “**kittāvatāti paricchavedavacana**”nti āha. **Nukāro pucchāyanti** ayaṃ nu-saddo idheva pucchāyaṃ āgatoti katvā vuttaṃ. Nu-saddena hettha jotiyamāno attho kiṃ-saddena parimāṇo attho parimeyyattho ca. Ettha saṃkilesapakkho vivekassa ananusikkhanaṃ āmisadāyādatā, vodānapakkho tassa anusikkhanaṃ dhammadāyādatāti. **Tihi vivekehīti** vivekattayaggahaṇaṃ tadantogadhattā vivekapañcakassa. Vivekapañcakaggahaṇe panassa sarūpena kāyaviveko gahito na siyā, tadāyattattā vā satthārā tadā payujjamānavivekadassanavasena “**tihi vivekehi**”tiādi vuttaṃ. **Aññatarampīti** kasmā vuttaṃ. Na hi kāyavivekamattena dhammadāyādabhāvo sijjhatīti? Na, vivekadvayasannissayasseva kāyavivekassa idhādhippetattā. Evañca katvā cittavivekaggahaṇampi samatthitaṃ hoti. Na hi lokiyajjhānādhigamamattena nippariyāyato satthudhammadāyādabhāvo icchito, nibbānādhigamena pana so icchito, tasmā sabbāpi sāsane vivekānusikkhanā nibbānapoṇā nibbānapabbhārā nibbānogadhā cāti vuttaṃ “**tiṇṇaṃ vivekānaṃ aññatarampī**”ti. Asati āloke andhakāro viya asati dhammadāyādatāya ekamsiyā āmisadāyādatāti āha “**āmisadāyādāva hontī**”ti. **Esa nayo sukkapakkhepīti** kaṇhapakkhato sādharmaṇavasena labbhamānaṃ atthasāmaññaṃ atidisi, na atthavisesaṃ tassa visadisattā, atthavisesameva vā atidisi visadisūdāharaṇūpāyañāyena. “**Tiṇṇaṃ vivekānaṃ aññatara**”nti idaṃ idha na labbhati. Tayopi hi vivekā, tesu eko vā itaradvayasannissayo idha labbhati.

**Dūratopīti** dūraṭṭhānatopi. Tenāha “**tiroraṭṭhatopi**”tiādi. Kāmaṃ “paṭibhātū”ti ettha paṭi-saddāpekkhāya “sāriputta”nti upayogavacanaṃ, attho pana sāmivacanavaseneva veditabboti dassento āha “**āyasmatoyeva sāriputtassa**”ti. **Bhāgo hotūti** iminābhāgattho paṭi-saddoti dasseti lakkhaṇādiatthānaṃ idha ayujjanato. Tenāha “**evaṃ saddalakkhaṇena sameti**”ti. **Dissatūti** ñāṇena dissatu, passatūti vā attho. **Upaṭṭhātūti** ñāṇassa paccupatiṭṭhatu. **Uggahessantīti** vācugataṃ karissanti. Vācugatakaraṇaṃhi uggaho. **Pariyāpuṇissantīti** tasseva vevacanaṃ. Puripucchanādinā vā atthassa citta āpādanaṃ paṭṭhapanāṃ pariyāpuṇanaṃ. **Kāraṇavacananti** yathāvuttassa kāraṇabhāvena vacanaṃ “hetumhi karaṇavacana”nti katvā. Vuttatthapaccāmasanaṃ taṃ-saddena karīyatīti. Tenāha “**yasmā**”tiādi.

**Ekenevākārenāti** āmisadāyādatāsiddhena ādiyatāsankhātena ekeneva pakārena. Tameva hi ākāraṃ sandhāyāha “**bhagavatā vuttamattha**”nti. Aññathā “satthu pavivittassa viharato sāvakā vivekaṃ nānusikkhantī”ti ekeneva ākārena so attho therenapi vutto. **Tihi ākārehīti** āmisadāyādapatiṭṭhābhūtehi tiṇṇaṃ vivekānaṃ ananusikkhanākārehi. **Ettāvatāti** “**idhāvuso...pe... nānusikkhantī**”ti ettakena kaṇhapakkhe uddesapāṭhena.

**Vitthārato suvibhatto hoti** anavasesato sammadeva niddiṭṭhattā. Nanu ca uddese satthunopi ādiyatā bhagavatā gahitā, sā na niddiṭṭhāti anuyogaṃ sandhāyāha “**so ca kho**”tiādi. **Sāvake anuggaṇhantassāti** “āmisadāyādā satthu sāvakā”ti satthu parappavādapariharaṇatthampi “tumhehi dhammadāyādehi bhavitabba”nti evaṃ sāvake anukampamānassa. Sāvakānaṃ taṃ na yuttaṃ sāmīciabhāvatoti yojanā. **Esa nayoti** yadidaṃ “ettāvatāyaṃ bhagavā”tiādinā kaṇhapakkhe uddesassa atthavibhāgadassanamukhena sambandhadassanaṃ, esa nayo sukkapakkhepi sambandhadassaneti adhippāyo. Tenāha “**ayaṃ tāvettha anusandhikkamayojanā**”ti, satthārā desitāya uddesadesanāya mahātherena desitāya ca anusandhikkamena sambandhoti attho. Yathānusandhi eva cettha anusandhi

veditabbo.

**Accantapavivittassāti** ekantaupadhiviveko viya itarepi viveko satthu ekantikāvāti. Anusikkhanam nāma anu anu pūraṇanti tappaṭikkhepena āha “**na paripūrentī**”ti, na paribrūhentīti attho, **na paripūrentīti** vā na paripālentīti attho. Yadaggena hi vivekaṃ nānusikkhanti, tadaggena na paribrūhenti, na paripālentīti vā vattabbataṃ labhantīti. Kasmā panettha “vivekaṃ nānusikkhantī”ti uddese viya avisesavacane kāyavivekasseva gahaṇaṃ katanti codanaṃ sandhāyāha “**yadi panā**”tiādi. **Pucchāyāti** pucchāto aviseso siyā vibhāgassa alabbhamānattā vissajjanassa. Nanu ca “vivekaṃ nānusikkhantī”ti avisesavacanato pāḷiyaṃ vibhāgo na labbhatevāti? Na, padantarena vibhāvitattā. Tenāha “**yesañca dhammāna**”ntiādi. **Byākaraṇapakkhoti** vissajjanapakkho. Vissajjanañca na pucchā viya avisesajotana, atha kho yathādhippetatthavibhajananti adhippāyo. **Iminā padenāti** “vivekaṃ nānusikkhantī”ti iminā padena kāyavivekaṃ aparipūriyamānaṃ dassetīti adhippāyo. **Cittavivekaṃ upadhivivekanti** etthāpi eseva nayo.

**Ettha ca nappajahantīti** pahātabbadhammānaṃ pahānābhāvavacanam pahānalakkhaṇavivekābhāvādīpanam, taṃ vatvā puna “viveke nikkhattadhurā”ti vacanaṃ tato sātisayavivekābhāvādīpananti tadubhayavivekābhāvadassanena “yesañca dhammāna”ntiādināva pārisesañāyena “vivekaṃ nānusikkhantī”ti iminā vivekadvayamūlabhūtākāyavivekābhāvadassanaṃ katanti daṭṭhabbaṃ. Avigatataṇhatāya taṃ taṃ parikkhārajātaṃ bahuṃ lanti ādiyantīti bahulā, bahulā eva **bāhulikā** yathā “venayiko”ti (ma. ni. 1.246; a. ni. 8.11; pārā. 8). Te pana yasmā paccayabahulabhāvāya yuttappayuttā nāma hontī, tasmā āha “**cīvarādibāhullāya paṭipannā**”ti. Sikkhāya ādarabhāvābhāvato sithilaṃ adalḥaṃ gaṇhantīti “**sāthalikā**”ti vuttaṃ. **Sithilanti** bhāvanapūmsakaniddeso, sithila-saddena vā samānatthassa sāthala-saddassa vasena “**sāthalikā**”ti padasiddhi veditabbā. **Avagamaṇaṭṭhenāti** adhogamaṇaṭṭhena, orambhāgiyabhāvenāti attho. **Upadhiviveketi** sabbūpadhipaṭinissaggatāya upadhīhi vivitte. **Oropitadhurāti** ujjhitussāhā.

**Aniyamenevāti** kiñci visesaṃ anāmasitvā “sāvakā”ti aviseseneva. **Niyamento** “therā”tiādinā. **Dasavasse upādāyāti** dasavassato paṭṭhāya. **Issariyeti** “seṭṭhiṭṭhānaṃ senāpatiṭṭhāna”ntiādīsu viya. Acirakkhaṇobhāsena lakkhavedhako **akkhaṇavedhi**. **Ṭṭhiyanti** avatṭhāne. **Ṭṭhānasoti** taṅkhaṇeyeva. **Ṭṭṭhatīti** ādhārādheyabhāvenāti āha “**tadāyattavuttibhāvenā**”ti. Upekkhānubrūhanā sattasaṅkhāresu udāsīnatāpi asaṅkhatādhigamassa upāyoti tabbipariyāyato cīvarādimaṇḍanā na upadhivivekapāripūriyā saṃvattatīti āha “**cīvarapatta...pe... apūrayamānā**”ti. **Tatthāti** theravāre. **Idhāti** majjhimanavakavāresu. Tathā hi “**majjhimatherakāle**”tiādi vuttaṃ.

**32. Imasmiñca kaṇhapakkheti** imasmiñca niddesavāre kaṇhapakkhe, na uddesavāre kaṇhapakkhe. Uddesavāre pana kaṇhapakkhe vuttavipariyāyena gahetabbattho “esa nayo sukkapakkhepi”ti atidesena dassito. **Vuttapaccanīkanayenāti** “kāyavivekaṃ nānusikkhanti na paripūrentī”tiādinā vuttassa atthassa paccanīkanayena, “kāyavivekaṃ anusikkhanti paripūrentī”tiādinā nayena. **Etthāti** etasmiṃ sukkapakkhe. **Saṅkhepoti** atthasaṅkhepo. **Yojanaparamparāyāti** gāmantato dūrabhāvena ekaṃ dve tīṇīti evaṃ yojanānaṃ paṭipāṭiyā. **Araññavanapatthānīti** araññesu vanasaṅḍabhūtāni. **Pantānīti** pariyaṅtāni. **Upagantaṃ yuttakālo** jarājiṇṇakālo gocaraḡāme dūre gamanāgamanasamatthātābhāvato. “Evaṃ guṇavantesu dinnam aho sudinna”nti **paccayadāyakānaṃ pasādaṃ janenti**. **Pāsamsāti** pasamsitabbā. **Ayampi mahātherotiādi** ekaṃ appamādavihāriṇaṃ vuddhataṃ niddisitvā vadantānaṃ vasena vuttaṃ. **Paviṭṭho** vivekaṭṭhānaṃ. **Sāyaṃ nikkhamati** yonisomanasikāraṃ upabrūhetvāti adhippāyo. **Kaṣiṇaparikkammaṃ karoti**, na yaṃ kiñci kiccantaraṃ. **Samāpattiyo nibbatteti**, na moghamanasikāraṃ. **Sabbathātiādito** tāva tadaṅgasena kilesehi cittaṃ vivecento tato vikkhambhanavasena samucchadavasena paṭipassaddhivasenāti sabbappakārena cittavivekaṃ pūreti. **Pamsukūlāni dhāretīti** iminā bāhulikātābhāvaṃ dasseti, **asithilaṃ sāsaṇaṃ gahetvāti** iminā sāthalikatābhāvaṃ, **vigatanīvaraṇoti** iminā okkamaṇe nikkhattadhurataṃ, **phalasaṃpattintiādinā** pavivekapubbaṅgamataṃ dasseti.

**33. Tatrāvusoti** ettha **iti-saddo** ādiattho. Tena “lobho ca pāpako” tiādinayappavattaṃ uparidesanaṃ anavasesato pariyādiyati. **Ko anusandhīti** yā sā bhagavatā saṃkilesapakkhena saha dhammadāyādapaṭipattibhāvinī “dhammadāyādā me, bhikkhave, bhavatha, mā āmisadāyādā” tiādinā desanā uddiṭṭhā, taṃ “satthu pavivittassa viharato” tiādinā ārabhitvā aṭṭhārasavārapaṭimaṇḍitāya niddesadesanāya vibhajitvā tato paraṃ “tatrāvuso lobho ca pāpako” tiādinayāya uparidesanāya sambandhaṃ pucchati. **Evanti** saṃkilesapakkhe “nappajahantī” ti pahānābhāvadassanavasena, vodānapakkhe “pajahantī” ti pahānasabbhāvadassanavasenāti evaṃ. Aniddhāritasarūpā yaṃ-taṃ-saddehi dhamma-saddena sāmāññato ye pahātabbadhammā vuttā, te sarūpato dassetunti yojanā. **Ime teti** ettha kasmā lobhādayo eva pahātabbadhammā vuttā, nanu ito aññepi mohadiṭṭhivicikicchādayo pahātabbadhammā santīti? Saccaṃ santi, te pana lobhādīhi tadekaṭṭhatā gahitā eva hontīti vuttā. Atha vā imesaṃyevettha gahaṇe kāraṇaṃ parato āvi bhavissati.

Idāni upacayena anusandhiṃ dassetuṃ “**apicā**” tiādi vuttaṃ. Tattha sāvakānaṃ yassa dhammassa dāyādabhāvo satthu abhirucito, so “cattāro satipaṭṭhāne bhāvetī” tiādinā akatthetvā “vivekaṃ anusikkhanti, te ca dhamme pajahanti, na ca bāhulikā” tiādinā kathitattā **heṭṭhā pariyāyeneva dhammo kathitoti** vuttaṃ. “Te ca dhamme nappajahanti, okkamane pubbaṅgamā” tiādinā **āmisam pariyāyenapi kathitam**. “Siyā ca me piṇḍapāto” tiādinā, “bāhulikā ca hontī” tiādinā ca **āmisam nipariyāyenapi kathitam**. Atha vā yāyaṃ bhagavatā āmisadāyādapaṭikkhepanā dhammadāyādātā vuttā, yañca tadatthaṃ vibhajantena mahātherena attanā vivekānusikkhanādi vuttaṃ, tadubhayaṃ hetuvasena vibhāvetuṃ “**tatrāvuso, lobho cā**” tiādi vuttaṃ. Hetunirodhena hi saṃkilesapakkhassa, nirodhahetusampādanena ca vodānapakkhassa tappāpakatā.

**Atītadesanānidassananti** atītāya therena yathādesitāya desanāya ca paccāmasanaṃ. Tenevāha “**satthu pavivittassa...pe... desanāyanti vuttaṃ hotī**” ti. **Tatthāti** yaṃ vuttaṃ visesato “yesaṃ dhammānaṃ satthā pahānamāhā” ti, etasmiṃ pade. Tattha hi pahātabbadhammā lobhādayo sāmāññato vuttā. **Lāmakāti** nihīnā. Lobhadosa hi hetuto paccayato sabhāvato phalato nissandato saṃkiliṭṭhapakatikā, āyatim dukkhassa pāpanaṭṭhena vā pāpakā. **Lubbhanalakkhaṇoti** ārammaṇassa abhigijjhanalakkhaṇo. Tathā hi so lubbhanti tena, sayam vā lubbhati, lubbhanamattameva vā tanti “lobho” ti vuccati. Rasādīsu abhisāṅgaraso, apariccāgapaccupaṭṭhāno, saṃyojaniyesu dhammesu assādadassanapadaṭṭhāno. **Dussanalakkhaṇoti** ārammaṇe byāpajjanalakkhaṇo. Tathā hi so dussanti tena, sayam vā dussati, dussanamattameva vā tanti “doso” ti vuccati. Rasādīsu visappanaraso, sanissayadahanaraso vā, dussanapaccupaṭṭhāno, āghātavattupadaṭṭhāno.

**Tesūtiādinā** dassanena lobhadosaṇaṃ ekantato pahātabbatādassanaṃ. **Āmisadāyādassa paccayānaṃ lābhe hotīti** idaṃ lobhassa ārammaṇaggahaṇasabhāvataṃ sandhāya vuttaṃ, taṇhāya vasena pana anugijjhanam sandhāya “**aladdhaṃ pattheti**” ti āha. Alābhe paccayānaṃ āmisadāyādassa hotīti ānetvā yojanā. **Alabhantoti** ettha “paccaye” ti vibhattim pariṇāmetvā yojetabbaṃ. **Vighātavāti** “yampicchaṃ na labhati, tampi dukkha” nti (ma. ni. 1.120; vibha. 190) vacanato icchāvighātavā. Lobho ca deyyadhamme hoti āmisadāyādassāti sambandho. Esa nayo anantarapadepi. **Deyyadhammeti** ca idaṃ nidassanamattaṃ sattakelāyanādivasenapi tassa lobhuppattisabbhāvato. “Taṇhaṃ paṭicca pariyesanā, pariyesanaṃ paṭicca lābho” ti evamādayo **nava taṇhāmūlakā. Paripūreti** āmisadāyādoti vibhattivipariṇāmo veditabbo. Āvāsamacchariyādīni **pañca macchariyāni**.

**Magganti** ariyamaggaṃ. So hi kilese mārento gacchati, nibbānatthikehi ca maggīyati, sayam vā sacchikiriyābhisamayavasena nibbānaṃ maggaṭīti nipariyāyena “maggo” ti vuccati. **Eko antoti** itarena asammisso eko koṭṭhāso, hīnatāya vā lāmakatṭhena **eko anto**. Kāmaṃ aññepi kusaladhammā ete ante asampayogato na upenti, tehi vimuttā eva, ayaṃ pana accantavimuttiyā na upetīti āha “**vimutto etehi antehi**” ti. **Tasmāti** antadvayavimuttattā. **Etesam majjhe bhavattāti** idaṃ maggassa ubhayantavimuttatāya eva vuttaṃ, na tappariyāpannatāya, vaṭṭadukkhaniissaraṇatthikehi paṭipajjitabbato ca. **Tatthāti** yathā itarena asammissatṭhena lāmakatṭhena ca lobho eko anto, tathā **kāmasukhallikānuyogoti** attho. Esa nayo sesesupi. Maggassa anupagamanañca nesam antānaṃ sabbaso

appavattikaraṇeṇeva daṭṭhabbaṃ. **Purimanayenāti** “ete dve ante na upetī”tiādīnā pubbe vuttanayena.

**Saccānanti** catunnaṃ ariyasaccānaṃ. **Dassanapariṇāyakaṭṭhenāti** dassanassa pariṇābhīsamayādibhedassa parito sabbathā nayanatṭhena pavattanattṭhena. **Cakkhukaraṇīti** dhammacakkhussa karaṇī nipphādikā. Tayidaṃ satipi paṭipadāya dhammacakkhuto anaññatte avayavavasena sijjhamāno attho samudāyena kato nāma hotīti upacārasena vuttanti daṭṭhabbaṃ. Tathā hi vakkhati “**maggoyeva hi maggatthāya saṃvattati maggena kātabbakiccakaraṇato**”ti. **Ñāṇāyāti** yāthāvato jānanāya. Tenāha “**viditakaraṇatṭhenā**”ti. Visesañātabhāvāpādanañhi viditakaraṇaṃ. **Vūpasamanatoti** samucchindanavasena vūpasamanato. Dukkḥādīnaṃ pariṇēyyādibhāvo viya abhiññeyyabhāvopi maggavaseneva pākaṭo hotīti āha “**catunnampi saccānaṃ abhiññeyyabhāvadassanato**”ti, vibhāvanatoti attho. **Sambodhoti maggo** “sambujjhati etenā”ti katvā. **Tassatthāyāti** maggakiccatthāya. Na hi maggato añño maggakiccakaro atthi. Tenāha “**maggoyeva hī**”tiādi. Atha vā sammādiṭṭhi uppajjamānā sahaṇātipaccayabhāvena itare uppādeti, evaṃ sesamaggadhammāpīti evampi maggatthāya saṃvattanaṃ veditabbaṃ. **Sacchikiriyāya paccakkhakammāyāti** sacchikaraṇasaṅkhātapaccakkhakammāya. **Nibbānāyāti** vā anupādisesanibbānāya. **Upasamāyāti** iminā saupādisesanibbānaṃ gahitanti. **Ayanti** “sā hi saccāna”ntiādīnā yathāvutto atthanayo. **Etthāti** “cakkhukaraṇī”tiādīsu padesu. **Sāro** sundaro anapanīto. **Ito aññathāti** “dukkhassa pariṇāyā diṭṭhivisuddhiṃ karotīti cakkhukaraṇī”tiādīnā atthavaṇṇanāpapaṅco kevalaṃ vitthāratthāya.

**Ayamevāti** ettha **ayanti** iminā attano aññesaṅca tassaṃ parisāyaṃ ariyānaṃ maggassa paccakkhabhāvaṃ dasseti. Āsannapaccakkhavācī hi ayaṃ-saddo. **Aññamaggapaṭisedhanatthanti** aññassa nibbānagāmiṃmaggassa atthibhāvapaṭisedhanattham. Sattāpaṭikkhepo hi idha paṭisedhanam alabbhamānattā aññassa maggassa. Buddhādīnaṃ sādḥāraṇabhāvo anaññatā. Tenāha brahmā sahaṃpati

“Ekāyanaṃ jātikhayantadassī,  
Maggam pajānāti hitānukampī;  
Etena maggena tarīṃsu pubbe,  
Tarissanti ye ca taranti ogha”nti. (saṃ. ni. 5.384, 409; mahāni. 191; cūḷani. 107, 121; netti. 170);

**Ārakattāti** iminā niruttinayena ariya-saddasiddhimāha. **Aripahānāyāti** atthavacanamattaṃ. Arayo pāpadhammā yanti apagamanti etenāti **ariyo**. **Ariyena desitoti** ettha ariyassa bhagavato ayanti **ariyo**. **Ariyabhāvappaṭilābhāyāti** ettha ariyakaro **ariyoti** uttarapadalopena ariya-saddasiddhi veditabbā. Yasmā maggaṅgasamudāye maggavohāro hoti, samudāyo ca samudāyīhi samannāgato nāma hotīti āha “**aṭṭhahi aṅgehi upetattā**”ti, tasmā attano avayavabhūtāni aṭṭha aṅgāni etassa santīti **aṭṭhaṅgiko**. Yasmā pana paramatthato aṅgāniyeva maggo, tasmā vuttaṃ “**na ca aṅgavinimutto**”ti yathā “chalaṅgo vedo”ti. Sadisūdāharaṇaṃ pana dassento “**pañcaṅgikatūriyādīni viyā**”ti āha. Ādi-saddena caturaṅginī senāti evamādīnaṃ saṅgaho. **Mārento gacchatīti** niruttinayena saddasiddhimāha. **Maggatīti** gavesati. Ariyamaggo hi nibbānaṃ ārammaṇaṃ karonto taṃ gavesanto viya hotīti. **Maggīyati nibbānatthikehi** vivaṭṭupanissayapuññakaraṇato paṭṭhāya tadattham paṭipattito. **Gammattīti** etena ādiantavipariyāyena saddasiddhimāha yathā “kakū”ti. “**Seyyathidanti nipāto**”ti vatvā tassa sabbaliṅgavibhattivacanasādḥāraṇatāya “**katamāni tāni aṭṭhaṅgāni**”ti vuttaṃ. Nanu ca aṅgāni samuditāni maggo antamaso sattaṅgavikalassa ariyamaggassa abhāvato? Saccametam saccapaṭivedhena, maggapaccayatāya pana yathāsakaṃ kiccakaraṇena paccekampi tāni maggoyevāti āha “**ekamekañhi aṅgam maggoyevā**”ti, aññathā samuditānampi nesaṃ maggakiccaṃ na sambhaveyyāti. Idāni tamevattham pāḷiyā samatthetum “**sammādiṭṭhimaggo ceva hetu cā**”ti vuttaṃ.

Sammā aviparītaṃ pariṇābhīsamayādivasena catunnaṃ saccānaṃ dassanaṃ paṭivijjhanam



lakkhaṇaṃ etissāti **sammādassanalakkhaṇā**. Sammā aviparītaṃ sampayuttadhamme nibbānārammaṇe abhiniropanaṃ appanālakkhaṇaṃ etassāti **sammābhiniropanalakkhaṇo** musāvādādīnaṃ viṣaṃvādanādikkatāya lūkhānaṃ apariggāhakānaṃ paṭipakkhabhāvato siniddhasabhāvattā sampayuttadhamme, sammāvācappaccayasubhāsitasotāraṇca janaṃ sammadeva pariggaṇhātīti sammāvācā sammāpariggaho lakkhaṇaṃ etissāti **sammāpariggahalakkhaṇā**. Yathā kāyikā kiriyā kiñci kattabbaṃ samuṭṭhāpeti, sayaṇca samuṭṭhahanaṃ ghaṭanaṃ hoti, tathā sammākammantasaṅkhātā viratipīti **sammāsamuṭṭhānalakkhaṇo sammākammanto**. Sampayuttadhammānaṃ vā ukkhipanaṃ **samuṭṭhānaṃ** kāyikakiriyāya bhārukkhipanaṃ viya. Jivamānassa sattassa, sampayuttadhammānaṃ vā suddhi vodānaṃ, ājīvasseva vā jīvitappavattiyā suddhi vodānaṃ etenāti **sammāvodānalakkhaṇo sammāājīvo**. Kosajjapakkhe patituṃ adatvā sampayuttadhammānaṃ paggaṇhanaṃ anubalappadānaṃ **paggaho**. Ārammaṇaṃ upagantvā ṭhānaṃ, tassa vā anissajjanaṃ **upaṭṭhānaṃ**. Ārammaṇe sampayuttadhammānaṃ sammā, samaṃ vā ādhānaṃ **samādhānaṃ**. Sammā saṅkappeti sampayuttadhamme ārammaṇe abhiniropetīti **sammāsaṅkappo**. Sammā vadati etāyāti **sammāvācā**. Sammā karoti etenāti sammākammaṃ, tadeva **sammākammanto**. Sammā ājīvati etenāti **sammāājīvo**. Sammā vāyamati ussahati etenāti **sammāvāyāmo**. Sammā sarati anussaratīti **sammāsati**. Sammā samādhīyati cittaṃ etenāti **sammāsamādhīti** evaṃ sammāsaṅkappādīnaṃ nibbacanaṃ veditabbaṃ.

**Micchādiṭṭhinti** sabbampi micchādassanaṃ. **Tappaccanīyakileseti** ettha **taṃ**-saddena sammādiṭṭhi. Na hi micchādiṭṭhiyā kilesā paccanīyā, atha kho sammādiṭṭhiyā. **Avijjañcāti** avijjāggahaṇaṃ tassā saṃkilesadhammānaṃ pamukhabhāvato. Tenāha “avijjā, bhikkhave, pubbaṅgamā akusalānaṃ dhammānaṃ samāpattiyā”ti (saṃ. ni. 5.1). Dassananivāraṇassa sammohassa samugghātena **asammohato**. Ettha ca **micchādiṭṭhiṃ...pe... pajahatīti** etena pahānābhisamayaṃ, **nibbānaṃ ārammaṇaṃ karotīti** etena sacchikiriyābhisamayaṃ, **sampayuttadhammeti**ādīnā bhāvanābhisamayaṃ sammādiṭṭhikiccaṃ dasseti. Pariññābhisamayo pana nānantariyatāya atthato vutto eva hotīti daṭṭhabbo.

Kathaṃ pana ekameva ñāṇaṃ ekasmiṃ khaṇe cattāri kiccāni sādheṇaṃ pavattati. Na hi tādisaṃ loke diṭṭhaṃ, na āgamaṃ vā tādiso atthīti na vattabbaṃ. Yathā hi padīpo ekasmiṃyeva khaṇe vaṭṭim dahati, snehaṃ pariyaḍiyati, andhakāraṃ vidhamati, ālokaṇca vidamaṇseti, evametam ñāṇanti daṭṭhabbaṃ. Maggasamaṅgissa ñāṇaṃ dukkhepetam ñāṇaṃ, dukkhasamudayepetaṃ ñāṇaṃ, dukkhanirodhepetam ñāṇaṃ, dukkhanirodhagāminiyā paṭipadāyapetaṃ ñāṇanti **suttapadaṃ** (vibha. 754) ettha udāharitabbaṃ. Yathā ca sammādiṭṭhi pubbabhāge dukkhādīsu viṣuṃ viṣuṃ pavattitvā maggakkhaṇe ekāva catunnaṃ ñāṇānaṃ kiccaṃ sādheṇā pavattati, evaṃ sammāsaṅkappādayo pubbabhāge nekkhammasaṅkappādīnāmakā hutvā kāmāsaṅkappādīnaṃ pajahanavasena viṣuṃ viṣuṃ pavattitvā maggakkhaṇe tiṇṇaṃ catunnaṃ kiccaṃ sādheṇā pavattanti. Sammāsamādhī pana pubbabhāgepi maggakkhaṇepi nānāyeva hutvā pavattatīti kāmañcetta sammādiṭṭhiyā sabbepi pāpadhammā paṭipakkhā, ujuvipaccanīkatādassanavasena pana sammādiṭṭhiyā kiccaniddese micchādiṭṭhiggaṇaṃ kataṃ. Teneva ca “**tappaccanīyakilese cā**”ti vuttaṃ.

Yesam kilesānaṃ anupacchindane sammādiṭṭhi na uppajjeyya, te micchādiṭṭhiyā sahaḥekatṭhatāya tadekatṭhāva tappaccanīyakilesā daṭṭhabbā. Sammāsaṅkappādīnaṃ kiccaniddesepi eseva nayo. Sotāpattimaggaḍḍivasena cattāro lokuttaramaggabhāvasāmañña ekato katvā. Lobhadosā samudayasaccaṃ, yassa pana so samudayo taṃ dukkhasaccaṃ, pahānabhāvo maggasaccaṃ, yattha taṃ pahānaṃ, taṃ nirodhasaccanti imāni cattāri saccāni. Kasmā panettha lobhadosānaṃ viṣuṃ ādito ca gahaṇaṃ? Viṣuṃ gahaṇaṃ tāva tathābujjhanakānaṃ puggalānaṃ ajjhāsayaḥavasena, imehi lobhadosehi āmisadāyādatā, tappahānena ca dhammadāyādatāti dassanattaṃ, tadanusārena catusaccayojanāya evaṃ ekekassa niyyānamukhaṃ hotīti dassanattaṃ. Sesavāresupī eseva nayo. Ādito gahaṇaṃ pana ativiya oḷārikatāya supākaṭabhāvato vakkhamānānaṃ aññaesaṇca pāpadhammānaṃ mūlabhāvato tadekatṭhatāya ca veditabbaṃ.

**Kujjhanalakkhaṇoti** kuppanasabhāvo, cittassa byāpajjanāti attho. **Caṇḍikkaṃ** luddatā,

kururabhāvoti attho. **Āghātakaraṇarasoti** “anattamaṃ me acarī”tiādīnā citte āghātassa karaṇaraso. **Dussanapaccupaṭṭhānoti** sapaṇasantānassa vināsanapaccupaṭṭhāno laddhokāso viya sapatto. **Upanandhanam** nānappakāraṇassa uparūpari nandhanam viya hotīti katvā. Tathā hesa “**veraappaṭṭinissajjanaraso, kodhānupabandhabhāvapaccupaṭṭhāno**”ti ca vutto. **Aparakāle upanāhotiādīti ādi-**saddena “upanayhanā upanayhitattam āṭṭhapanā ṭṭhapanā saṅṭṭhapanā anusamsandanā anuppabandhanā dalhīkamma”ntiādīnam (vibha. 891) niddesapadānam atthavaṇṇanam saṅgayhati. Upanāhasamaṅgī hi puggalo verassa anissajjanato ādittapūṭṭialātam viya jalati eva, cittañcassa dhoviyamānam acchacammaṃ viya, masimakkhitapilotikā viya ca na sujjhateva.

**Paraguṇamakkhanalakkhaṇoti** udakapuñchaniyā udakam viya paresam guṇānam makkhanasabhāvo. Tathābhūto cāyam attano kārakam gūthena paharantam gūtho viya paṭṭhamataram makkheti evāti daṭṭhabbo. Tathā hessa sapaṇasantānesu guṇam makkhetīti **makkhoti** vuccati. **Yugaggāho** samadhuraggahaṇam asamānassapi abhūtassa samāropanam. Samabhāvakaraṇam **samīkaraṇam**. Paresam guṇappamāṇena attano guṇānam upaṭṭhānam paccupaṭṭhapetīti āha “**paresam guṇappamāṇena upaṭṭhānapaccupaṭṭhāno**”ti. Tathā hesa paresam guṇe ḍaṃsitvā viya attano guṇehi same karotīti **paḷāsoti** vuccati.

**Parasampattikhīyanam** parasampattiyā usūyanam. Issati parasampattim na sahatīti **issā**. Tathā hesā “**parasampattiyā akkhamanalakkhaṇā**”ti vuccati. **Tatthāti** parasampattiyam. **Anabhiratirasā** abhiratipaṭṭipakkhakkicā. **Vimukhabhāvapaccupaṭṭhānā** parasampattim passitumpi appadānato. **Nigūhanalakkhaṇam** attano sampattiyā parehi sādharmaṇabhāvāsahanato. **Asukhāyanam** na sukhanam dukkhanam, arocananti adhippāyo.

Katassa kāyaduccaritādiṭṭhāpāssa paṭicchādanam **katapāpapaṭicchādanam**. Tassa pāssa āvaraṇabhāvena paccupaṭṭhāti **tadāvaraṇapaccupaṭṭhānā**, māyā, yāya samannāgato puggalo bhasmachanno viya aṅgāro, udakachanno viya khāṇu, pilotikapaṭicchāditaṃ viya ca sattham hoti. **Avijjamānaguṇappakāsanam** attani avijjamānasīlādiguṇavibhāvanam, yena sāṭṭheyyena samannāgatassa puggalassa asantaguṇasambhāvanena cittānurūpakiriyāviharato “evamcitto, evamkiriyo”ti dubbiññeyyattā kucchiṃ vā piṭṭhiṃ vā jānituṃ na sakkā. Yato –

“Vāmena sūkarō hoti, dakkhiṇena ajāmiḃ;  
Sarena nelako hoti, visāṇena jaraggavo”ti. (dī. ni. aṭṭha. 2.296; vibha. aṭṭha. 894; mahāni. aṭṭha. 166) –

Evam vuttayakkasūkarasadiṭṭhā hoti.

**Cittassa uddhumātabhāvo** thaddhalūkkhabhāvo. **Appatissayavuttīti** anivātavutti. Amaddavākārena paccupaṭṭhāti, amaddavataṃ vā paccupaṭṭhapetīti **amaddavatāpaccupaṭṭhāno**, thambho, yena samannāgato puggalo gilītanāṅgalasīso viya ajagaro, vātabharitabhastā viya ca thaddho hutvā garuṭṭhāniye ca disvā onamitumpi na icchati, pariyanteneva carati. Karaṇassa uttarakiriyā **karaṇuttariyam**. Visesato paccanīkabhāvo **vipaccanīkatā**. Parena hi kismiñci kate taddiguṇam karaṇavasena **sārambho** pavattati.

Seyyādiākārehi unnamanam **unnati**. Omānopi hi evam karaṇamukhena sampaggahavaseneva pavattati. “Ahamasmi seyyo”tiādīnā ahamkaraṇam sampaggaho **ahaṅkāro**. Pare abhibhavitvā adhikam unnamanam **abbhunnati**. Yam sandhāya vuttam “pubbakāle attānam hīnato dahati aparakāle seyyato”ti (vibha. 877).

**Mattabhāvo** jātiādīm paṭicca cittassa majjanākāro, yassa vā dhammassa vasena puggalo matto nāma hoti, so dhammo **mattabhāvo**. **Madaggāhaṇaraso** madassa gāhaṇakicco. Mado hi attano majjanākāram sampayuttadhamme gāhento viya pavattamāno taṃsamaṅgiṃ puggalampi tathā karonto

viya hoti. Ahañkāravasena puggalaṃ aṇiṭṭhaṃ karonto cittaṃ ummādhāvo viya hotīti **ummādapaccupaṭṭhāno**. Satiyā aniggaṇhitvā cittaṃ vossajjanaṃ **cittavossaggo**, sativirahitoti attho. Yathāvuttassa vossaggassa anuppadaṇaṃ punappunaṃ vissajjanaṃ **vossaggānuppadaṇaṃ**. **Imesaṃ** kodhādīnaṃ lobhādīnaṃpi vā. **Lakkhaṇādīni**ti lakkhaṇarasapaccupaṭṭhānāni. Padaṭṭhānaṃ pana dhammantaratāya na gahiṭaṃ. Nibbanaṃ “kujjhatīti **kodho**, upanayhatīti **upanāho**”tiādīnā suviññeyyamevāti na vuttaṃ, atthato pana kodho doso eva, tathā upanāho. Pavattiākāramattato hi kato nesam bhedo, makkhapaḷāsasārambhā tadākārappavattā paṭighasahagatacittuppādadhammā, māyāsāṭṭheyyathambhamadappamādā tadākārappavattā lobhasahagatacittuppādadhammā. **Thambho** vā mānaviseso cittaṃ thaddhabhāvena gahetabbato, tathā **mado**. Tathā hi so “māno maññanā”tiādīnā **vibhaṅge** (vibha. 878) niddiṭṭho. Idha pana mānātimānānaṃ visuṃ gahitattā majjanākārena pavattadhammā eva “**mado**”ti gahetabbā. Sesānaṃ dhammantarabhāvo pākato eva.

Kasmā panettha ete eva aṭṭha dukā gahitā, kimito aññepi kilesadhammā natthīti? No natthi, ime pana āmisadāyādassa savisesaṃ kilesāya saṃvattantīti taṃ visesaṃ vibhāventena āmisadāyādassa lobhādīnaṃ pavattanākāraṃ dassetuṃ “**visesato**”tiādī āradhamaṃ. Tattha **etthāti** etesu lobhādīsu. **Alabhanto** āmisanti adhippāyo. Tatuttari uppanno kodhoti ānetvā sambandhitabbam. **Santepīti** vijjamānepi. **Issatīti** issam janeti. **Padussatīti** tasseva vevacanaṃ. Tathā hi sā “issati dussati padussati”tiādīnā niddiṭṭhā. Yasmā vā issaṃ janento ekamsato paduṭṭhacitto eva hoti, tasmā “**padussati**”ti vuttaṃ. **Assāti** āmisadāyādassa. **Evam paṭipannoti** evam asantaṅgappakāsaṇaṃ paṭipadaṃ paṭipanno. **Ovadituṃ asakkuṇeyyoti** etena thambho nāma dovacassakaraṇo dhammoti dasseti. **Kiñci vadati** ovādadānavasena. **Thambhena...pe... maññantoti** iminā ca thambhassa mānavisesabhāvaṃ dasseti, thambhena vā hetunāti attho. **Matto samānoti** matto honto. **Kāma...pe... pamajjatīti** etena madavasena ekamsato pamādamāpajjatīti dasseti.

**Evanti** iminā āmisadāyādassa lobhādīnaṃ uppattikkamadassaneneva idha pāḷiyaṃ nesam desanākkamopi dassitoti daṭṭhabbo. Na kevalaṃ imeheva, atha kho aññehi ca evarūpehi pāpakehi dhammehi aparimutto hotīti sambandho. Ke pana teti? Atricchatāmahicchatādayoti. Evam mahādīnavā āmisadāyādātīti tato balavaro saṃvego janetabboti ayamettha ovādo veditabbo. **Etthāti** etasmim sutte. **Sabbatthāti** sabbesu vāresu. **Nibbisesoyevāti** eteneva paṭhamataraṃ idha dassitasaccayojanāyena sabbavāresu yojetabboti veditabbo.

**Ñānaparicayapāṭavattanti** maggassa aṭṭhaṅgasattaṅgatādivisesavibhāvanāya ñāṇassa āsevanaṭṭhena paricayo ñānaparicayo, tassa paṭubhāvattaṃ kosallatthaṃ. **Etthāti** ariyamagge. **Bhedoti** viseso. **Kamoti** aṅgānaṃ desanānupubbī. **Bhāvanāyoti** bhāvanāvidhi. “**Kadāci aṭṭhaṅgiko, kadāci sattaṅgiko**”ti sañkhepato vuttamatthaṃ vivaranto puna “**ayam hī**”tiādīmāha. Tattha **lokuttarapaṭhamajjhānavasenāti** lokuttarassa paṭhamajjhānassa vasena. Ettha ca keci jhānadhammā maggasabhāvāti ekantato jhānaṃ maggato visuṃ katvā vattum na sakkāti “lokuttarapaṭhamajjhānasahito”ti avatvā “lokuttarapaṭhamajjhānavasena”iceva vuttaṃ. Atha vā **lokuttarapaṭhamajjhānavasenāti** lokuttarā hutvā paṭhamajjhānassa vasenāti evamettha attho veditabbo. Ariyamaggo hi vipassanāya pādakabhūtaṃ, sammāsitaṃ vā paṭhamajjhānassa vasena aṭṭhaṅgiko hoti. Atha vā ajhānalābhino sukkhavipassakassa, jhānalābhino vā pādakamakattvā paṭhamajjhānassa, pakiṇṇakasankhārānaṃ vā sammāsane uppanno ariyamaggo aṭṭhaṅgiko hoti, svāssa aṭṭhaṅgikabhāvo paṭhamajjhānikabhāvenāti dassento “**paṭhamajjhānavasenā**”ti āha. Evam “**avasesajjhānavasenā**”ti etthāti yathārahaṃ attho veditabbo.

Yadi ariyamaggo sattaṅgikopi hoti, atha kasmā pāḷiyaṃ “aṭṭhaṅgiko”iceva vuttanti āha “**ukkaṭṭhaniddesato**”tiādī. Yathā cettha paṭipadāya maggavasena aṭṭhaṅgikasattaṅgikabhedo, evam bojjaṅgavasena sattaṅgikachalaṅgikabhedo veditabbo appītikajjhānavasena chalaṅgikattā, maggavasena pana desanā āgatīti svāyaṃ bhedo aṭṭhakathāyaṃ na uddhaṭo. **Iti paranti** ito aṭṭhaṅgato paraṃ ukkaṃsato, avakaṃsato pana sattaṅgato paraṃ maggaṅgaṃ nāma natthīti. **Nanu maggavibhaṅge** (vibha. 493-502) pañcaṅgikavāre pañceva maggaṅgāni uddhaṭāni, **mahāsaḷāyatane** (ma. ni. 3.431) ca

“yā tathābhūtaṣṣa diṭṭhi, yo tathābhūtaṣṣa saṅkappo, yo tathābhūtaṣṣa vāyāmo, yā tathābhūtaṣṣa sati, yo tathābhūtaṣṣa samādhi, svāssa hoti sammāsamādhi”ti vatvā pubbabhāgavasena pana “pubbeva kho panassa kāyakammaṃ vacīkammaṃ ājīvo supārisuddho hoti”ti sammāvācādayo āgatāti? Saccametaṃ, taṃ pana sammādiṭṭhiādīnaṃ pañcannaṃ kārāpakaṅgānaṃ atirekakiccadassanavasena vuttaṃ, tasmā na ariyamaggo sammāvācādivirahito atthīti **“ito parañhi maggaṅgaṃ natthi”**ti suvuttametanti daṭṭhabbaṃ.

**Sabbakusalānanti** sabbesaṃ kusalaḍḍhamānaṃ. Niddhāraṇe cetaṃ sāmivacanaṃ. Kāmāvacarādivasena taṃtaṃkusalaḍḍhammesu sā sammādiṭṭhi seṭṭhā. Tassā seṭṭhabhāvena hi “paññājīvaṃ jīvitamāhu seṭṭha”nti (saṃ. ni. 1.246; su. ni. 184) vuttaṃ, maggasammādiṭṭhiyā pana sabbaseṭṭhabhāve vattabbameva natthi. **Kusalavāreti** kusaluppattisamaye. **Pubbaṅgamā** kusalādiḍḍhamānaṃ yāthāvasabhāvabodhena sampayuttadhammānaṃ pariṇāyakabhāvato. Tenevāha **“sammādiṭṭhiṃ sammādiṭṭhīti pajānāti”**tiādi. Sā sammādiṭṭhi pabhavo etassāti tappabhavo, sammāsaṅkappo. Sammāḍḍassanavasena hi sammāsaṅkappo hoti. Tato abhinibbattānīti **tappabhavābhiniḍḍattāni**. Tappabhavābhiniḍḍattānīpi “tadabhinibbattānī”ti vuccanti kārāṇakārāṇepi kārāṇūpacāratoti āha **“tappabhavābhiniḍḍattāni sesaṅgānī”**ti. Tenāha **“sammādiṭṭhissā”**tiādi. Yathā hi sammāḍḍassanaṃ sammāvitakkaṇassa viśesapaccayo, evaṃ sammāvitakkaṇaṃ sammāpariggahassa sammāpariggaho sammāsamuttāhānaṃ, sammāsamuttāhānaṃ sammāvōdānaṃ, sammāvōdānaṃ sammāvāyāmaṃ, sammāvāyāmo sammāupaṭṭhānaṃ, sammāupaṭṭhānaṃ sammādhānaṃ viśesapaccayo, **tasmā** “purimaṃ purimaṃ pacchimassa pacchimassa viśesapaccayo hoti”ti **iminā** viśesapaccayabhāvāḍḍassanātthena **kamena etāni** sammādiṭṭhiādīni **aṅgāni vuttānīti** dassitāni.

**Bhāvanānayo**ti samathavipassanānaṃ yuganaddhabhāvena pavatto bhāvanāvidhi. Ayañhi ariyamaggakkhaṇe bhāvanāvidhi. Tassa pana pubbabhāge bhāvanānayo kassaci samathapubbaṅgamo hoti, kassaci vipassanāpubbaṅgamoti. Taṃ vidhiṃ dassetuṃ **“koci”**tiādi āradḍhaṃ. Tattha paṭhamo samathayānikassa vasena vutto, dutiyo vipassanāyānikassa. Tenāha **“idhekacco”**tiādi. **Tanti** samathaṃ samādhiṃ, jhānaḍḍhammeti vā attho. **Taṃsampayutteti** samādhisampayutte, jhānasampayutte vā dhamme. Ayañca nayo yebhuyyena samathayānikā arūpamukhena, tatthāpi jhānamukhena vipassanābhiniḍḍesaṃ karontīti katvā vutto. **Vipassanaṃ bhāvayatoti** paṭipadāññāḍḍassanavisuddhiṃ ārabhitvā yathādhigataṃ taruṇavipassanaṃ vaḍḍhentassa. **Maggo sañjāyatīti** pubbabhāgiyo lokiyamaggo uppajjati. **Āsevati** nibbidānupassanāvasena. **Bhāveti** muñcitukamyatāvasena. **Bahulīkaroti** paṭisaṅkhānupassanāvasena. **Āsevati** vā bhayatūpaṭṭhānaññāvasena. **Bahulīkaroti** vuṭṭhānagāminivipassanāvasena. **Samyojanāni pahīyanti, anusayā byantī honti** maggaṭipāṭiyā.

**Samathaṃ anuppādetvāvāti** avadhāraṇena upacārasamādhīṃ nivatteti, na khaṇikasamādhīṃ. Na hi khaṇikasamādhīṃ vinā vipassanā sambhavati. **Vipassanāpāripūriyāti** vipassanāya pariḍḍattāya vuṭṭhānagāminibhāvappattiyā. **Tatthajātānanti** tasmīṃ ariyamaggakkhaṇe uppannānaṃ sammādiṭṭhiādīnaṃ dhammānaṃ. Niddhāraṇe cetaṃ sāmivacanaṃ. **Vavassaggārammaṇatoti** vavassaggassa ārammaṇatāya. Vavassaggo vossaggo paṭinissaggoti ca apavaggoti ca atthato ekaṃ, nibbānanti vuttaṃ hoti, tasmā nibbānaṃ ārammaṇakaraṇenāti attho. **Cittassa ekaggatāti** maggasammāsamādhimāha. Ariyamaggo hi ekanta samāhito asamādhānaḍḍhetūnaṃ kilesānaṃ samucchēdanato. Sesaṃ vuttanayameva.

**Yuganaddhāva honti** tadā samādhīpaññānaṃ samarasatāya icchitabbato. Maggakkhaṇe hi na samathabhāvanāyaṃ viya samādhī, vipassanābhāvanāyaṃ viya ca paññā kiccatō adhikā icchitabbā, samarasatāya pana aññamaññassa anativattanaṭṭhena dvepi yuganaddhā viya pavattanti. Tena vuttaṃ **“samathavipassanā yuganaddhāva honti”**ti.

Dhammadāyādasuttavaṇṇanāya līnatthappakāsanā samattā.

#### 4. Bhayabheravasuttavaṇṇanā

**34. Evaṃ me sutanti** bhayabheravasuttaṃ. Ko nikkhepo? Keci tāva evamāhu “pucchāvasiko nikkhepo”ti. Duvidhā hi pucchā pākaṭāpākaṭābhedato. Tattha yassā desanāya nimittabhūto ñātuṃ icchito attho kiṃ-saddapubbakena pakāsīyati, sā **pākaṭā pucchā** yathā “kiṃsūdha vittaṃ purisassa seṭṭha”nti evamādi (saṃ. ni. 1.246; su. ni. 183). Yassā pana desanāya nimittabhūto ñātuṃ icchito attho kiṃ-saddarahitena kevaleneva saddapayogena pakāsīyati, sā **apākaṭā pucchā**. Ñātuṃ icchito hi attho “pañhā, pucchā”ti vuccati, tasmāyeva idha “ye me bho gotamā”tiādikā apākaṭāti “pucchāvasiko nikkhepo”ti. Tayidaṃ akāraṇaṃ, yasmā so brāhmaṇo “yeme bho gotamā”tiādīni vadanto na tattha kaṅkhī vicicicchī saṃsayamāpanno avoca, atha kho attanā yathānicchitamattaṃ bhagavati pasādashābhāvabhumānaṃ pavedento kathesi. Tenāha “**bhagavati pasādaṃ alatthā**”tiādi (ma. ni. aṭṭha. 1.34). **Vihāreti** vihārake nivāse. **Avicchinneyevāti** pavattamāneyeva. Padadvayassapi vasante evāti attho. **Etaṃ purohitaṭṭhānaṃ** uñhīsādikakudhabhaṇḍehi saddhiṃ laddhaṃ, tathā ca “assa raññā dinna”nti vadanti. Tenāha “**taṃ tassa raññā dinna**”nti. Brahmanti vedaṃ. So pana mantabrahmakappavasena tividho. Tattha mantā padhānaṃ mūlabhāvato, ye aṭṭhakādīhi pavuttā, itare tannissayena jātā, tena tesamyeva gahaṇaṃ “**mante sajjhāyati**”ti. Te hi guttabhāsitaḥṭāya “**mantā**”ti vuccanti. **Idameva hīti** avadhāraṇena “brahmato jātā”tiādikaṃ niruttiṃ paṭikkhipati.

**Yena vā kāraṇenāti** (sārattha. ṭī. verañjakaṇḍavaṇṇanāyaṃ 2; saṃ. ni. ṭī. 1.1.1; a. ni. ṭī. 2.2.16) hetumhi idaṃ karaṇavacanaṃ. Hetuattho hi kiriyākāraṇaṃ, na karaṇaṃ viya kiriyattho, tasmā nānappakāraguṇavisesādhigamattā idha upasaṅkamanakiriyāti “annena vasatī”tiādīsu viya hetuatthamevettaṃ karaṇavacanaṃ yuttaṃ, na karaṇatthaṃ tassa ayujjamānattāti vuttaṃ “yena vā kāraṇenā”tiādi. Bhagavato satatappavattaniratisayasāduvipulāmatarasasaddhammaphalatāya sādupalaniccaphalitamahārukkheṇa bhagavā upamito, sādupalūpabhogādhippāyaggahaṇeneva hi mahārukkheṇa sādupalatā gahitāti.

**Upasaṅkamīti** upasaṅkanto. Sampattukāmatāya hi kiñci ṭhānaṃ gacchanto taṃtaṃpadesātikkamanena upasaṅkamī, upasaṅkantoti vā vattabbaṃ labhati. Tenāha “**gatoti vuttaṃ hoti**”ti, upagatoti attho. **Upasaṅkamitvāti** pubbakālakiriyāniddesoti āha “**upasaṅkamanapariyosānadīpana**”nti. **Tatoti** yaṃ ṭhānaṃ patto “upasaṅkamī”ti vutto, tato upagataṭṭhānato. **Yathā khamanīyādīni pucchantoti** (saṃ. ni. ṭī. 1.1.112) yathā bhagavā “kacci te brāhmaṇa khamanīyaṃ, kacci yāpanīya”ntiādīnā khamanīyādīni pucchanto tena brāhmaṇena saddhiṃ samappavattamodo ahosi pubbhāsītāya, tadanukaraṇena evaṃ sopi brāhmaṇo bhagavatā saddhiṃ samappavattamodo ahosīti yojanā. Taṃ pana samappavattamodataṃ upamāya dassetuṃ “**sītodakam viyā**”tiādi vuttaṃ. Tattha **sammoditanti** saṃsanditaṃ. **Ekībhāvanti** sammodanakiriyāya samānataṃ ekarūpaṃ. **Khamanīyanti** “idaṃ catucakkaṃ navadvāraṃ sarīrayantaṃ khaṇabhaṅguratāya sabhāvato dussahaṃ, kacci khamitūṃ sakkuṇeyya”nti pucchati. **Yāpanīyanti** paccayāyattavuttikaṃ cirappabandhasaṅkhātāya yāpanāya kacci yāpetuṃ sakkuṇeyyaṃ. Sīsarogādiābādhābhāvena **kacci appābādhaṃ. Dukkhañjīvīkābhāvena kacci appātaṅkaṃ. Taṃtaṃkiccarāṇe uṭṭhānasukhatāya kacci lahuṭṭhānaṃ. Tadanarūpabalayogato kacci balaṃ. Sukhavihārasabbhāvena kacci phāsuvihāro** atthīti tattha tattha kacci-saddaṃ yojetvā attho vedītabbo.

Balavappattā pīti **pītiyeva**. Taruṇapīti **pāmojjaṃ**. Sammodanaṃ janeti karotīti sammodanikaṃ, tadeva **sammodanīyanti** āha “**sammodajjanato**”ti. Sammoditabbato **sammodanīyanti** imaṃ pana atthaṃ dassento “**sammoditūṃ yuttabhāvato**”ti āha. **Saritabbabhāvato**ti anussaritabbabhāvato. “Sarañīya”nti vattabbe dīghaṃ katvā “**sārañīya**”nti vuttaṃ. **Suyyamānasukhatoti** āpāthamadhurataṃ āha, **anussariyamānasukhatoti** vimaddaramaṇīyataṃ. **Byañjanaparisuddhatāyāti** sabhāvaniruttibhāvena tassā kathāya vacanacāturiyamāha, **atthaparisuddhatāyāti** atthassa nirupakkilesataṃ. **Anekehi pariyañeyhīti** anekehi kāraṇehi.

Abhidūraaccāsannaṃpaṭikkhepena nātidūranāccāsannaṃ nāma gahitaṃ, taṃ pana avakaṃsato

ubhinnaṃ pasāritahatthasaṅghaṭṭanena daṭṭhabbaṃ. **Gīvaṃ pasāretvā**ti gīvaṃ parivattanavasena pasāretvā.

**Yemeti** ettha sandhivasena ikāralopoti dassento “**ye ime**”tiādimāha. Uccākulīnatāya jātivāsena abhijātā **jātikulaputtā**. Tenāha “**uccākulappasutā**”ti. Ācārasampattiyā abhijātā **ācārakulaputtā**. Tenāha “**ācārasampannā**”ti. **Yattha katthaci** apākaṭepi **kule**. Tena brāhmaṇena adhippetā bhikkhūsu duvidhāpi saṃvijjantīti āha “**idha pana dvīhipi kāraṇehi kulaputtāyevā**”ti.

**Saddhāti** idaṃ karaṇatthe paccattavacananti āha “**saddhāyā**”ti, **saddhāti** vā saddahitvāti attho. Imasmiṃ pakkhe pāliyaṃ ya-kāralopena niddesoti daṭṭhabbaṃ. **Agāratoti** agāravāsato, uttarapadalopena, nissayūpacārena vā ayaṃ niddesoti. Bhikkhanasīlatādilakkhaṇo bhikkhubhāvo pabbajjāsahacaritāya saddhiṃ bhikkhubhāvaṃ anvācinantoti āha “**pabbajjaṃ bhikkhubhāvāñcā**”ti. Kammavācālakkaṇe pana bhikkhubhāve adhippete samuccayattho **ca-saddo** daṭṭhabbo. **Anagārassa bhāvoti** etena pabbajjānissito suvisuddho sīlacāraguṇaviseso gahito, kasigorakkhādikammaṭṭāṅghepo idha anuppādādīhi veditabbo. Sesaggahaṇe pana saraṇagamanādivasena pabbajjāya, saraṇagamanādivasena upasampadāya ca anekabhedatā āha “**sabbathāpī**”ti, tena tena pakārenāti attho. Puratogāmitā paṭipattigamanena, na kāyagamanenāti āha “**nāyako**”ti, sammāpaṭipattiyā nibbānasampāpakoti attho. **Hitakiriyaṃ**ti diṭṭhadhammikādīhitacariyāya. **Gāhaṇaṃ** adhisīlādīsu accantāya niyojanaṃ, na kathanamattanti dassento “**gāhetā**”ti vatvā “**sikkhāpetā**”ti āha. **Diṭṭhānugati**nti diṭṭhiyā anugamananti dassento “**dassanānugati**”nti vatvā sikkhāttayasāṅghaṃ bhagavato sāsaṇaṃ tena diṭṭhattā diṭṭhi, tassa tasseva khamanavasena khanti, rucanavasena ruci, taṃdiṭṭhikhanirucikāva bhagavato sāvakāti āha “**yaṃdiṭṭhiko**”tiādi.

Esa kira alatthāti sambandho. **Devaputte viyāti**tiādi kassaci pārijuñṇassa abhāvādīpanato “**saddhāyā**”tiādinā vuttassa pabbajitabhāvassa pākaṭikaraṇaṃ. **Saddhāya gharā nikkhama pabbajitvāti** idaṃ haṭṭhapahaṭṭhādībhāvassa kāraṇavacanāṃ. **Ghāsacchādanaparamatāya santuṭṭheti** idaṃ anussāṅkitāparisaṅkitatāya kāraṇavacananti daṭṭhabbaṃ.

**Evametanti**tiādinā āmedītavacanāṃ sampahaṃsanavasena, pasādavasena vā katanti daṭṭhabbaṃ. Tathā hi evaṃ-saddo sampaṭicchanaṭṭho abbhanumodanaṭṭho ca vutto. **Mamanti** upayogatthe sāmivacanāṃ, nipātapadaṃ vā etaṃ “**ma**”nti iminā samānatthanti daṭṭhabbaṃ. **Ādīnīti ādi**-saddena najīvikāpakatādīṃ saṅgaṇhāti **īdisānaṃyevāti** saddhāpabbajjāya vibhāvitaanabhijjhāluādisabhāvānaṃyeva, na itaresaṃ abhijjhālusabhāvānaṃ. Vuttañhetā –

“Saṅghāṭikaṇṇe cepi me, bhikkhave, bhikkhu gahetvā piṭṭhito piṭṭhito anubandho assa pade padaṃ nikkhipanto, so ca hoti abhijjhālu kāmesu tibbasārāgo byāpannacitto paduṭṭhamanasāṅkappo muṭṭhassati asampajāno asamāhito vibbhantacitto pākaṇḍriyo, atha kho ārakāva mama ahaṅca tassā”ti (itivu. 92).

Ajjhogāhetvā adhippetatthaṃ sambhavituṃ sādhetuṃ dukkhānīti **durabhisambhavāni**. Aṭṭhakathāyaṃ pana tattha nivāsoyeva dukkhoti dassetuṃ “**sambhavituṃ dukkhāni dussahāni**”ti vuttaṃ. **Araññavanapatthānīti** araṅṅalakkhaṇappattāni vanasaṇḍāni. Vanapattha-saddo hi saṇḍabhūte rukkasamūhepi vattatīti araṅṅaggahaṇaṃ. **Kiñcāpīti** anujānanasambhāvanatthe nipāto. Kiṃ anujānāti? Nippariyāyato araṅṅābhāvaṃ “**gāmato bahi araṅṅa**”nti. Tenāha “**nippariyāyena**”tiādi. Kiṃ sambhāveti? Araṅṅakaṅganipphādakattaṃ. Yañhi āraṅṅakaṅganipphādakaṃ, taṃ visesato “**araṅṅa**”nti vuttanti. Tenevāha “**yaṃ taṃ pañcadhanusatika**”ntiādi. **Nikkhamitvā bahi indakhīlāti** indakhīlato bahi nikkhamitvā, tato bahi paṭṭhāyāti attho. **Bahi indakhīlāti** yattha dve tīṇi indakhīlāni, tattha bahiddhā indakhīlato paṭṭhāya, yattha taṃ natthi, tattha tadarahaṭṭhānato paṭṭhāyāti vadanti. Yasmā bahi indakhīlato paṭṭhāya manussūpacāre bhayabheravaṃ natthi, tasmā idha nādhippetanti daṭṭhabbaṃ.

**Gāmanti**ti gāmasamīpaṃ. **Anupacāraṭṭhānanti** niccakiccavasena nupacaritabbaṭṭhānaṃ. Tenāha

“**yattha na kasīyati na vapīyati**”ti. **Pantānī**ti iminā “pariyantāna”nti imassa pariyāyassa idha pāliyaṃ gahitattā vuttaṃ “**pariyantānanti imamekaṃ pariyāyaṃ ṭhapetvā**”ti. **Dūrānanti** pana ayaṃ pariyāyo ṭhapetabbo siyā tassāpi “pantānī”ti imināva atthato gahitattā, tathā sati “na manussūpacārāna”nti edisānampi ṭhapetabbatā āpajjati, tasmā saddato eva ṭhapanam daṭṭhabbam. **Pavivekanti** pakārato, pakārehi vā vivecanam, rūpādiputhuttārammaṇe pakārato gamanādiiriyāpathappakārehi attano kāyassa vivecanam gacchatopi tiṭṭhatopi nisajjatopi ekasseva pavattati. Teneva hi vivecettabbānam vivecanākārassa ca bhedato bahuviddhattā te ekattena gahetvā “paviveka”nti ekavacanena vuttaṃ. **Dukkaram pavivekanti** vā pavivekaṃ kattuṃ na sukhanti attho. **Ekābhāveti** ekikabhāve. **Dvayamdvayārāmoti** dvinnam dvinnam bhāvābhirato. **Haranti viyāti** saṃharanti viya viḡhātuppādanena. Tenāha “**ghasanti viyā**”ti, bhayasantāsuppādanena khādituṃ āgatā yakkharakkhasapisācādayo viyāti adhippāyo. **Īdisassāti** aladdhasamādhino. **Tiṇapaṇṇamigādisaddehīti** vāteritānam tiṇapaṇṇādīnam migapakkhīādīnaṇca bhīṃsanakehi bheravehi saddehi **vividhehi ca** aññehi khāṇuādīhi yakkhādiākārehi upaṭṭhitehi **bhīṃsanakehi**. Evaṃ dukkaram durabhisambhavaṃ nāma karonto aho acchariyā eteti **vimhito**.

### Kāyakammantavārakathāvaṇṇanā

**35. Soḷasasu ṭhānesūti** “ye kho kecī”tiādīnā pāliyaṃ vakkhamānesu soḷasasu kāraṇesu. Aparisuddhakāyakammantatādayo araññe viharantānam cittutrāsanimittatāya visesato vikkhepāvahā, parisuddhakāyakammantatādayo pana tadabhāvato tesam avikkhepāvahā. Tenāha “**aparisuddhakāyakammantasandosahetū**”tiādī. **Soḷasasūti** ca vodānapakkhamyeva gahetvā vuttaṃ. Saṃkilesaggahaṇampi yāvadeva vodānadassanattanti. **Ārammaṇapariggaharahitānanti** aparisuddhakāyakammantādīkassa araññe diṭṭhassa tassa ārammaṇassa “**ye kho kecī**”tiādīnā pāliyaṃ āgatanayena pariggaṇhanañārahitānam. **Ārammaṇapariggahayuttānanti** ettha vuttavipariyāyena attho veditabbo. **Attanāti** bhagavantam sandhāya vadati, sayanti attho. **Tādisoti** ārammaṇapariggahayutto.

Sambujjhanti etenāti **sambodho**, ariyamaggoti āha “**ariyamaggappattito**”ti. Aggamaggādhigamādhīno buddhānam sabbaññutaññāñādhigamoti āha “**anabhisambuddhassāti appaṭividdhacatusaccassā**”ti. Anavasesato ñeyyam, bujjhituṃ arahatīti **bodhi**, mahāvīriyatādinā tattha visesayogato sattoti āha “**bujjhanakasattassā**”ti. Tenāha “**sammāsambodhi**”ntiādī. Niyatabhāvappattito paṭṭhāya mahāsattā yathā mahābodhiyānapaṭipadā hānabhāgiyā, ṭhitibhāgiyā vā na hoti, atha kho visesabhāgiyā nibbedhabhāgiyā ca hoti, tathā paṭipajjanato bodhiyam ninnagoṇapabbhārā evāti āha “**bodhiyā vā sattasseva laggassevā**”ti. Tenāha “**dīpaṅkarassa hī**”tiādī. **Aṭṭhadhammasamodhānenāti** –

“Manussattam liṅgasampatti, hetu satthāradassanam;  
Pabbajjā gūṇasampatti, adhikāro ca chandatā”ti. (bu. vaṃ. 2.59) –

Imesaṃ abhinīhārassa aṅgabhūtānam aṭṭhannaṃ dhammānam samodhānena samavadhānena.

**Pabbajjūpagatāti** pabbajjam upagatā. Tena pabbajjāmattena samaṇā, na samitapāpatāyāti dasseti. Jātimattena idha **brāhmaṇāti** adhippetāti āha “**bhovādino vā**”ti. Te hi “bho bho”ti vadanasilā, tenāha “bhovādī nāma so hoti, sace hoti sakiñcano”ti (dha. pa. 396; su. ni. 625). **Pāṇātipātādināti ādi**-saddena adinnādānam abrahmacariyaṇca saṅgaṇhāti. **Aparisuddhenāti** ca visesanam kāyakammantāpekkhāya, na pāṇātipātādiepekkhāya. Na hi pāṇātipātādīko tassa pubbabhāgapayogo ca koci parisuddho nāma atthi. Bhāyanaṭṭhena **bhayam**, bhīrutāvahaṭṭhena **bheravam**. **Sandosahetūti** sadosahetu. Sa-saddo hi idha sānusāro vutto. Tenāha “**attano dosassa hetū**”ti. Ekattena cittutrāsalaṅkhaṇassa bhayassa vasena “**sāvajja**”nti vuttaṃ. Cittutrāso hi ekantasāvajjo bhāyanaṭṭhena bhayañcāti. **Akkhemanti** idaṃ ubhayavasena. Cittutrāsopi hi sarīracittānam anattāhāvahato akkhema, tathā **bhāyānakārammaṇampīti**. Aṭṭhakathāyaṃ pana atthadvayaṃ yathāsankhyaṃ yojitam. Sayam

parikkappitabhayānakārammaṇanimittam cittutrāsasamuppādanavasena ānentā bhayabheravaṃ avhāyanti viya hontīti vuttam **“avhāyantīti pakkosantī”**ti. **Teti** māritamanussānaṃ ñātimittdayo. **Gacchaṃ** gahanabhūtaṃ mahantaṃ kaṅṭakasaṅḍaṃ, **gumbaṃ** nātimahantanti vadanti. **Gacchanti** pana tiṇavanaṃ veditabbaṃ, “gacche ruḷhatiṇe”ti vuttam, **gumbaṃ** kaṅṭakalatādibharitāvīruḷhaṃ. **Baddhā vadhitā viyāti** baddhā hutvā tāḷiyamānā viya.

“**Na kho panāti** ettha **khoti** avadhāraṇatthe nipāto, **panā**”ti visesatthe. Tenetaṃ dasseti “aññe samaṇabrāhmaṇā viya ahaṃ aparisuddhakāyakammanto hutvā araṇṇavanapatthāni pantāni senāsanāni na kho pana paṭisevāmi, parisuddhakāyakammantoyeva pana hutvā tāni paṭisevāmī”ti. Evaṃ vā ettha atthayojanā veditabba. “Parisuddhakāyakammantohamasmī”ti hi tena avadhāraṇena vibhāvitatthadassanaṃ. **Tesamahaṃ aññataroti** tāya parisuddhakāyakammataya tesam ariyānaṃ ahaṃ aññataroti kāyakammaṃ paṭisuddhiyā mahāsatto attānaṃ ariyesu pakkhipati. Paramasallekhabhāvappattā hi tadā bodhisattassa kāyakammaṃ paṭisuddhi, tathā vacīkammā dipāṭisuddhi, yato māro randhagavesī hutvā chabbassāni nirantaraṃ anubandho antaraṃ na labhati. Tenāha –

“Satta vassāni bhagavantaṃ, anubandhiṃ padāpadaṃ;  
Otāraṃ nādhigacchissaṃ, sambuddhassa saṭimato”ti. (su. ni. 448);

**Bhiyyoti** adhikaṃ savisesaṃ, uparūpari vā. Bhītatasitā bhayūpaddavena chambhitasarīrā haṭṭhalomā honti, abhītatasitā pana bhayūpaddavābhāvato ahaṭṭhalomā khemena sotthinā tiṭṭhantīti tesam khemappatti sotthibhāvo vā pannalomatāya pākaṭo hotīti pāḷiyaṃ “palloma”nti vuttam. Tenāha **“pannalomata”**ntiādi. Ettha ca **bhiyyo pallomamāpādiṃ araṇṇe vihārayāti** paṭiññāniddeho. **Parisuddhakāyakammantohamasmīti** hetudassanaṃ. **“Ye hi vo ariyā”**ti sadisūdāharaṇadassanaṃ. **Ye kho keci samaṇā vā brāhmaṇā vā**ti visadisūdāharaṇadassanaṃ. Sesāni anvayabyatirekavibhāvanānti daṭṭhabbanti ayamettha yuttivibhāvanā. Iminā nayena sesavāresupi yuttivibhāvanā veditabba.

Kāyakammantavāraḥkathāvaṇṇanā niṭṭhitā.

### Vacīkammantavāradīkathāvaṇṇanā

**36. Aparisuddhena musāvādādīnā**ti ettha yaṃ vattabbaṃ, taṃ heṭṭhā vuttanayameva. **Ādi-**saddena pana saṅgahitaṃ tesaṅca musāvādādīnaṃ pavattibhedam bhayabheravāvāhanamukhena dassetaṃ **“katha”**ntiādi vuttam. Tatha yaṃ vattabbaṃ, taṃ heṭṭhā vuttameva.

**Bhaṅḍesūti** savīññānakāvīññānakesu bhaṅḍesu. **Uppādetvāti** attano pariṇāmasena abhijjhāsaṅkhātaṃ visamalobhaṃ uppādetvā. **Kujjhivāti** vināsacintāvasena parassa kujjhivā. Evañhi nesam “yesam aparajjhimhā, te idāni anubandhitvā”tiādinā pacchā āsaṅkuppatti siyā. “Ete amhākaṃ pariggahavatthum gahetukāmā maññe, vināsam kātukāmā maññe”ti yathā pare parato tesam abhijjhābāyāpādappavattiṃ pariggaṇhanti, tādisam manokammantaṃ sandhāya **“te paresa”**ntiādi vuttanti daṭṭhabbaṃ. Kāmaṃ akusalakāyakammavacīkammaṃ pavattikālepi abhijjhādayo pavattantiyeva, tadā pana te cetanāpakkhikā vā abbohārikā vāti manokammantavāre eva abhijjhādivasena yojanā katā. Atha vā dvārantare pavattānampi pāṇātipātādīnaṃ vacīkammā dibhāvābhāvo viya dvārantare pavattānampi abhijjhādīnaṃ kāyakammā dibhāvābhāvo, manokammabhāvo eva pana siddhoti katvā manokammantavāre eva abhijjhādayo uddhaṭā. Tathā hi vuttam –

“Dvāre caranti kammāni, na dvārā dvāracārino;  
Tasmā dvārehi kammāni, aññamaññaṃ vavattitā”ti. (dha. sa. aṭṭha. 1.kāyakammadvāra);

Kiñcāpi aṭṭhakathāyaṃ sāsane pabbajitavasena ājīvavāre bhayabheravāvāhanaṃ yojitaṃ, “ye kho keci samaṇā vā brāhmaṇā vā”ti pana vacanato bāhirakavasena gahaṭṭhavasena ca yojanā veditabba.



Gahaṭṭhānampi hi jātidhammakuladhammadesadhammavilomanavasena aññathāpi micchājīvo labbhateva, tāya eva ca ājīvavipattiyā aññathā vā nesam araññavāso sambhaveyyāti.

37. Evaṃ ājīvattāhamakasīlavasena bhayabheravaṃ dassetvā tato paraṃ nīvaraṇappahānādivasena taṃ dassetuṃ desanā vaḍḍhitāti tadatthaṃ vivaranto “**ito para**”ntiādimāha. Tattha **nīvaraṇavasena puna vuttāti** ayamadhippāyo – evaṃ sīlavissuddhimattampi araññe viharato bhayabheravābhāvaṃ āvahati, kimaṅgaṃ pana nīvaraṇāni pahāya appanāsamādhim, upacārasamādhimeva vā sampādayatoti samādhisampadāya bhayabheravābhāvahetukaṃ dassetuṃ upari desanā vaḍḍhitāti akusalamanokammantabhāvena gahitāpi abhijjhābyāpādā nīvaraṇavasena puna vuttāti adhippāyo. Abhipubbo jhā-saddo abhijjhāyanatthoti āha “**parabhaṇḍādiabhijjhāyanasīlā**”ti. **Vatthukāmesūti** rūpādīsu kilesakāmassa vatthubhūtesu kāmesu. **Bahalakilesarāgāti** thiramūladummocanīyatāhi ajjhosāne pabhūtakilesakāmā. Abhijjhā cettha appattavisayapatthanā, tibbasārāgo sampattivisayābhiniveso. Te hi lobhābhībhūtā puggalā attani tibbasāpekkhatāya eva lobhābhībhūtātāya avavatthitārammaṇā avinichchitavisayā araññe taṃ taṃ visayaṃ anupadhāritvā viharanti, rajjuādīni yāthāvato na sallakkhenti. Tenāha “**tesa**”ntiādi. **Upaṭṭhāti** santacittatāya. Tathā hi vuttaṃ “**ākulacittā**”ti. “Idānimha naṭṭhā”ti tasanti vitasanti, āgantvā bādhiyamānā viya honti, evaṃ taṃ bhayabheravaṃ attani samāropanaṭṭhena avhāyanti pakkosantīti yojanaṃ sandhāyāha “**sesaṃ tādīsamevā**”ti. “**Anabhijjhāluhamasmī**”ti pālīpade ciraparicitaalobhajjhāsayatāya kamaladale jalabindu viya alaggamānasattā sabbattha anaṭṭhohamasmīti attho.

38. **Pakatibhāvavijahanenāti** parisuddhabhāvasaṅkhātassa ca pakatibhāvassa vijahanena. Sāvajjadhammasamuppattiyā hi cittassa anavajjabhāvo jahito hotīti. **Vipannacittāti** kilesāsucidūsitatāya kuthitacittā. Tenāha “**kilesānugataṃ...pe... pūtikāṃ hotī**”ti. **Paduṭṭhamanasaṅkappāti** visasaṃsaṭṭhamuttaṃ viya dosena padūsitacittasaṅkappā. **Vuttanayenevāti** “te avavatthitārammaṇā hontī”tiādinā abhijjhāluvāre vuttanayeneva. Yathā hi lobhavasena, evaṃ dosādivasenapi avavatthitārammaṇā hontīti. **Sabbatthāti** heṭṭhā upari cāti sabbattha ṭhānesu vaṇṇetabbā.

39. “Yā cittassa akallatā akammaññatā”ti vacanato thinaṃ cittassa gelaññabhāvena gahaṇaṃ gacchatīti āha “**cittagelaññabhūtena thinenā**”ti. Tathā “yā kāyassa akallatā akammaññatā”ti (dha. sa. 1163) vacanato middhaṃ visesato nāmakāyassa gelaññabhāvena gahaṇaṃ gacchatīti āha “**sesanāmakāyagelaññabhūtena middhenā**”ti. Sesaggahaṇaṅcettha cittanivattanatthaṃ. Idañca middhaṃ rūpakāyassapi gelaññāvahanti daṭṭhabbaṃ niddāya hetubhāvato. Tathā hi taṃ “niddā capalāyikā”ti niddiṭṭhaṃ. Tenāha “**te niddābahulā hontī**”ti.

40. **Uddhaccapakatīkāti** uddhaccasīlā anavaṭṭhitasabhāvā. Anavaṭṭhānarasañhi uddhaccaṃ. Tenāha “**vipphandamānacittā**”tiādi. **Idhāti** “avūpasantacittā”ti imasmim pade. **Kukkuccaṃ gahetuṃ vaṭṭati** saṃvaṇṇanāvasena pacchānutāpassapi cittassa avūpasamakaratā. Uddhaccaṃ pana sarūpeneva gahitanti adhippāyo.

41. **Ekamevidaṃ pañcamaṃ nīvaraṇaṃ** yadidaṃ kaṅkhā vicikicchāti ca. Yadi evaṃ kasmā dvidhā katvā vuttanti āha “**kiṃ nu kho**”tiādi. **Kaṅkhanatoti** saṃsāyanato. **Vicikicchāti vuccati** “dhammasabhāvaṃ vicinanto etāya kicchati, vigatā tikicchā vā”ti katvā.

42. Evaṃ nīvaraṇābhāvakittanamukhena samādhisampadāya bhayabheravābhāvaṃ dassetvā idāni attukkaṃsanādiabhāvakittanamukhena paññāsampadāya bhayabheravābhāvaṃ dassetuṃ “ye kho kecī”tiādinā upari desanā vaḍḍhitā, tadatthaṃ vivarituṃ “**attukkaṃsanakā**”tiādi vuttaṃ. **Ukkaṃsenti** mānavasena paggaṇhanena. Tenāha “**uce ṭhāne ṭhapentī**”ti. Thinamidduddhaccakukkuccavicikicchāvāresu gayhamānaṃ abhijjhāluvārasadisanti tattha taṃ anāmasitvā attukkaṃsakavāre kiñci visadisam atthīti taṃ dassetuṃ “**te katha**”ntiādi vuttaṃ.

43. Chambhanaṃ chambho, kāyassa chambhitattahetubhūto balavacittutrāso. So etesaṃ atthīti

**chambhī.** Tenāha “**kāyathambhanā**”tiādi. **Bhīrukajātikā**ti bhāyanakasīlā. Ekameva cetam sāvajjabhayam kāye chambhitattassa, citte ca kāye ca thaddhabhāvassa uppādanavasena “chambho bhīrutā”ti ca vuccatīti taṃsamaṅgino samaṇabrāhmaṇā “chambhī bhīrukajātikā”ti vuttā, idha bhayabheravam sarūpeneva gahitam.

**44. Labbhati pāpuṇiyatīti** lābhasaddassa kammaśādanattamāha. Sakkaccam kātabbo dāttabboti **sakkāro. Tadatthadīpakanti** lābhādīṃ pahāya araṇṇe vasato bhayabheravāvahāyanam natthīti dīpakam. So kira lābhagarutāyeva piyo gāmo etassāti “**piyagāmiko**”ti nāmaṃ labhati. **Kammamuttoti** jarājiṇṇattā kammaṃ kātum na sakkotīti sāmikehi vissattho.

**45.** Alasabhāvena sammāvāyāmassa akaraṇato kucchitam sīdantīti **kusītā.** Vīrassa bhāvo, kammaṃ vā vīriyam, vidhinā vā īretabbam pavattetabbanti vīriyam, sammāvāyāmo. Tena hīnā **hīnavīriyā.** Kāyaviññattiyā samutthānavasena pavattavīriyam **kāyikavīriyam,** vattakaraṇacaṅkamanādīsu daṭṭhabbam. Nisajja sayitvā ca kammaṭṭhānamanasikāravasena pavattavīriyam **cetasikavīriyam.** Tattha purimam visesato kosajjapaṭipakkhatāvasena, dutiyam vīriyārambhatāvasena pākaṭam hotīti dassento “**kusītā**”tiādimāha. Te hi hīnavīriyā alasatāyeva ārammaṇavavattānamattampi kātum na sakkonti.

**46. Natthassatīti** alabbhamānassati, paccayavekallena vijjamānāyapi satiyā satikiccam kātum asamattatāya evam vuttam. Na sampajānāti asampajānā. Tamyogani vattiyañcāyam **a-kāro** “ahetukā dhammā (dha. sa. 2.dukamātikā), abhikkhuko āvāso”tiādīsu (cūlava. 76) viyāti āha “**paññārahitā**”ti. Nanu soḷasamo paññāvāro, ayam sativāro, tattha kasmā samkilesapakkhe paññā gahitāti codanam sandhāyāha “**imassa cā**”tiādi. **Satibhājanīyamevetam,** yadidaṃ cuddasamo vāro, paññā panettha cuddasame vāre kevalā sati dubbalāti **satidubbalyadīpanattham** “asampajānā”ti paṭikkhepamukhena **vuttā.** Idāni vuttamevattham pākaṭataram kātum “**duvidhā hī**”tiādi vuttam.

**47.** Appanāsamādhinā, upacārasamādhinā vā cittaṃ ārammaṇe samam, sammā vā āhitam nāma hoti, nāññathāti dassento “**asamāhitāti upacārappanāsamādhivirahitā**”ti āha. **Vibbhantacittāti** anavaṭṭhitacittā. Pubbe nīvaraṇabhāvasamāññena uddhaccam gahitam “**uddhatā avūpasantacittā**”ti, idha samādhānābhāvena uddhacchahetuko cittavibbhamo vutto “**asamāhitā vibbhantacittā**”ti, ayametesam viseso. **Pubbe vuttanayenāti** pubbe “uddhaccena hi ekārammaṇe cittaṃ vipphandati dhajayaṭṭhiyam vātena paṭākā viyā”ti (ma. ni. aṭṭha. 1.40) vuttanayena. **Sabbam pubbasadisamevāti** bhayabheravāvahāyanassa abhijjhāluvāre vuttasadisatam sandhāya vadati.

**48. Duppaññāti** ettha **du-saddo** “dussīlo”tiādīsu viya abhāvatto, na “duggati, duppaṭipanno”tiādīsu viya garahatthoti dassetum “**nippaññānametam adhivacana**”nti vatvā “**paññā pana duṭṭhā nāma natthī**”ti vuttam. **Teti** duppaññā. **Sabbatthāti** catūsipi pāthavikappesu. **Elanti** vā doso vuccati. Tenāha “yā sā vācā nelā kaṇṇasukhā”ti. Tathā hi sīlam “nelāṅga”nti vuttam. Duppaññā ca kathentā sadosameva katham kathenti apaṇḍitabhāvato. Tenevāha “dubbhāsītabhāsī”ti. Tasmā elasabbhāvato elam mukham etesanti elamūgāti vuttāti evampi vā ettha attho daṭṭhabbo. Yāya paññāya vasena “paññāsampanno”ti vuttam, tam byatirekamukhena dassetum “**no ca kho**”tiādi vuttam. Nanu ca bodhisattā bahulavipassanāpaññāya samannāgatā hontīti? Honti, tadā pana bodhisattena na vipassanārambho kato, no ca vipassanāpaññā adhippetāti vuttam “**no ca kho vipassanāpaññāyā**”ti.

Keci panettha “saddhāvīrahitā aparisuddhakāyakammantādayo viya bhayabheravāvahāyanassa visesakāraṇam, nāpi saddhālutā pallomatāyāti saddhāvāro anuddhaṭo”ti vadanti, tam akāraṇam. Kammaphale hi saddahanto kammaṇḍisaraṇatameva nissāya bhayabheravam tiṇāyapi amaññamāno pallomatamāpajjeyya. Yasmā pana vīriyādayo saddhāya vinā nappavattantīti tesam upanissayabhūtā sahaṭā ca sā taggahaṇeneva gahitā hotīti visum na uddhaṭā. Tathā hi sā jhānassa pubbhāgapaṭipadāyampi na uddhaṭā, kiṃ vā etāya saddhāya, addhā sā imasmim ārammaṇapariggahaṭṭhāne na gahetabbāva, tato dhammassāminā idha na uddhaṭā, evam aññesupi edisesu ṭhānesu nicchayo kātabbo. Yathānulomadesanā hi suttantakathāti.

Vacīkammantavārādīkathāvaṇṇanā niṭṭhitā.

Soḷasaṭṭhānārammaṇapariggaho niṭṭhito.

### Bhayabheravasenāsanādivaṇṇanā

**49. Soḷasārammaṇānī** soḷasaṭṭhānāni ārammaṇāni. **Evarūpāsu rattīsūti** cātuddasādīkā upari vakkhamānā rattīyo sandhāya vadatī. **Evarūpe senāsaneti** etthāpi eseva nayo. **Yāti** aniyamato uddiṭṭhānaṃ puna “tā”ti vacanaṃ niddeso viya hotīti vuttaṃ “**yā tāti ubhayametaṃ rattīnaṃyeva uddeśaniddesavacana**”nti. **Abhīti lakkhaṇatthe** “aññe ca abhiññātā brāhmaṇamahāsālā”tiādīsu viya. Kathaṃ panettha lakkhaṇatthatā veditabbā? Lakkhīyati etenāti lakkhaṇanti āha “**candapāripūriyā**”tiādī. Puṇṇamāsiyaṃ **candapāripūriyā** amāvāsiyaṃ **candaparikkhayena**. **Ādi-**saddena candassa upaḍḍhamaṇḍalatārāhuggahatādīnaṃ saṅgaho daṭṭhabbo. **Upasaggamattameva** abhisaddo lakkhitasaddeneva lakkhaṇatthassa viññāyamānattāti adhippāyo.

**Paṭhamadivasato pabhūtī** paṭhamapāṭipadadivasato paṭṭhāya. Yasmā codako bhagavato kāle anabhilakkhitāpi aparabhāge abhilakkhitā jātā, tasmā taṃ abhilakkhaṇīyamaṃ upādāya “**sabbadassinā bhagavatā pañcamī kasmā na gahitā**”ti codeti, itaro sabbakālikāsu cātuddasādīsu gayhamānāsu asabbakālikāya kathaṃ gahaṇanti adhippāyena “**asabbakālikattā**”ti pariharati.

**Tathāvidhāsūti** “abhiññātā”tiādīnā yathā vuttā, tathāvidhāsu. Devatādhiṭṭhitabhāvena ārāmādīnaṃ lokassa cetiyabhāvoti āha “**pūjanīyatṭhena**”ti. Manussā yebhuyyena gāmādīnaṃ dvāresu tathārūpe rukkhe cetiyatṭhāniye katvā voharantīti āha “**gāmanigamādidvāresū**”tiādī. Dassanamattenapi savanamattenapi bhayuppādanena pākatikasatte bhimsentīti **bhimsanakāni**. Tenāha “**bhayaajanakāni**”tiādī. Bhāyati etasmāti **bhayaṃ**, ativiya sappatibhayaṃ **bheravaṃ**.

**Āyācanaupahāra karaṇārahanti** taṃtaṃbalikamma paṇidhikammakaraṇayoggaṃ. **Pupphadhūpa...pe... dharaṇitalanti** idaṃ yathāpaṭisūtena suppādinā upahāra karaṇadassanaṃ. **Koṭṭentoti** pahaṇanto, siṅgappahāra khurappahārehi saddaṃ karontoti adhippāyo. **Sabbacattuppadānaṃ idha magoti nāmaṃ**, na “acchacammaṃ migacammaṃ eḷakacamma”ntiādīsu (mahāva. 259) viya, rohitotiādī migavisesānanti adhippāyo. **Cāletvāti** aggamaddanena cāletvā. Moraggahaṇaṅcetha upalakkhaṇanti dassento āha “**idha sabbapakkhigahaṇaṃ adhippeta**”nti. **Esa nayoti** idaṃ yathā “moro vā”ti ettha vā-saddo avuttavikkappaṇattho, evaṃ “migo vā”ti etthāpīti migasaddassa visesatthavuttitaṃ sandhāyāha. **Ito pabhūtīti** “yaṃnūnāhaṃ yā tā rattīyo”tiādīnā bhayabheravassa gavesanacintanato pabhuti, na gavesanārambhato pabhuti. “Appeva nāmāhaṃ bhayabheravaṃ passeyya”nti etthāpi hi **ārammaṇameva bhayabheravaṃ**. **Sukhārammaṇaṃ rūpaṃ sukhamiva** “rūpaṃ sukhaṃ sukhānupatitaṃ sukhāvakkanta”ntiādīsu (saṃ. ni. 3.60). Kathaṃ bhayaggahaṇena ca rūpārammaṇaggahaṇanti āha “**parittassa cā**”tiādī. “Āgacchatī”ti vacanato gavesanārambhato pabhuti “etaṃ bhaya”nti ārammaṇaṃ adhippetanti keci “taṃ na passeyya”nti cakkhunā dassanassa adhippetattā, tasmā vuttanayeneva attho gahetabbo. **Bhayaṃ ākaṅkhamānoti** upaparikkhanavasena ahaṃ bhayavatthum ākaṅkhanto viharāmi, taṃ kimatthiyaṃ, ettakopi bhayasamannāhāro mayhaṃ ayuttoti adhippāyo.

Yaṃ pakāraṃ bhūto yathābhūto, so panettha pakāro iriyāpathavasena yutto pāḷiyaṃ tathā āgatattāti āha “**yena yena iriyāpathena bhūtassā**”ti. **Bhavitassāti** idaṃ “bhūtassā”ti iminā samānattham padanti daṭṭhabbaṃ. “Samaṅgībhūtassā”ti padaṃ purimapaḍalopena **bhūtassāti** vuttanti dassento “**samaṅgībhūtassa vā**”ti āha. **Bhayabheravārammaṇeti** bhayabheravābhimate ārammaṇe. **Neva mahāsatto tiṭṭhatīti** “tathābhūto ca taṃ paṭivineyya”nti yathā cintitaṃ, tathā paṭipannabhāvadassanaṃ. **Iriyāpathapaṭipāṭi** nāma ṭhānagamanaṇisajjānipajjāti vadanti, uppaṭipāṭi pana paṭhamam nipajjā, puna nisajjā, puna ṭhānaṃ, pacchā gamananti evaṃ veditabbā. **Āsannaapaṭipāṭiyāti** gamanassa tāva ṭhānaṃ āsannaṃ, ṭhānassa nisajjā gamanaṅca, nisajjāya nipajjā

ṭhānañca, nipajjāya nisajjā āsannā. Idha pana gamanassa ṭhānaṃ, ṭhānassa ca gamanaṃ, nisajjāya ca nipajjā, nipajjāya ca nisajjā āsannabhāvena gahitā, itare paramparāvasenāti veditabbā. Bhikkhussa pana iriyāpathā sampattapaṭipāṭiyā viya aparāparuppattivāsena vuccanti.

Bhayabheravasenaśānādivaṇṇanā niṭṭhitā.

### Asammohavīhāraṇṇanā

**50.** Ayañca me sabbaso bhayabheravābhāvo viśesato asammohadhāmmattāti dassetuṃ “**santi kho panā**”tiādīnā upari desanā vaḍḍhitāti ayaṃ vā ettha anusandhi. **Jhāyīnaṃ sammohaṭṭhānesūti** iminā ajjhāyīnaṃ sammohaṭṭhānesu vattabbameva natthīti dasseti. **Atthīti** idaṃ nipātapadaṃ puthuvacanampi hoti “atthi imasmiṃ kāye kesā”tiādīsu (dī. ni. 2.373-374; ma. ni. 1.110; 3.154; saṃ. ni. 4.127; khu. pā. 3.dvatimsākāra) viyāti “santi”ti padassa atthadassanavasena vuttaṃ. Kiṃ khaṇattayasamaṅgītāya te atthi, notī āha “**saṃvijjanti upalabbhanti**”ti, mahati lokasannivāse edisāpi **saṃvijjanti** ñāṇena gahetabbatāya **upalabbhanti**. **Odātakasiṅgalābhīti** appamāṇodātakasiṅgalābhī. Evaṃ hissa samantato āloko viya upaṭṭhāti. **Parikkammanti** samāpattipubbabhāgamāha. Ettakaṃ sūriye gate **vuṭṭhahāmīti, no ca kho addhānaparicchede kusalo hoti**, kevalaṃ “divā eva vuṭṭhahāmī”ti manasikāraṃ uppādesi. **Visadaṃ hoti** sabbaṃ ārammaṇajātaṃ, dibbacakkhunā passantassa viya **vibhūtaṃ**. **Avisadanti** ettha vuttavipariyāyena attho veditabbo. **Evaṃsaññinoti** rattiṃ “divā”ti, divā ca “ratti”ti evaṃsaññino.

**Antosenāsane rattiṃ nisinno hotīti** ratti-saddo ajjhāharitabbo. Parittāsanādīhi, aññehi vā **kāraṇehi**. **Gambhīrāya** bhūmigabbhasadisāya **ghanavanapaṭicchannāya** bahalatarajālavanapaṭalapaṭicchannāya. **Antarahitasūriyāloke** kāleti eteneva divāti avuttasiddho. Sammohavīhāro nāma bahuvīdhoti āha “**sammohavīhārānaṃ aññatara**”nti.

**Pākaṭo bodhisattassa rattindivaparicchedo** antamaso lavatuṭṭikhaṇassapi upādāya suvavatthitattā, tathā rattidivasakoṭṭhāsaparicchedo attanā kātabbakicavasena kālaññāvasena ca.

Kālatambhe laddhabbāchāyāvasena **dvaṅgulakāle**. **Yāmaghaṇṭikaṃ paharati** saṅghassa taṃtaṃvattakaraṇatthaṃ. **Muggaranti** ghaṇṭikappaharaṇamuggaraṃ. **Yāmayantaṃ patati** aññehi bhikkhūhi yojitanti adhippāyo. Yāva aññe bhikkhū bhojanasālaṃ upagacchanti, tāva divāvīhāraṭṭhānaṃ gantvā samaṇadhammaṃ karoti.

**Yaṃ kho tanti** ettha **yanti** aniyamuddeso, **khoti** avadhāraṇe, yameva puṅgalanti attho. **Tanti** vuccamānākāravacanaṃ. **Mamevāti** maṃ eva. **Asammohasabhāvoti** sabhāvabhūtaasammoho. “Uppanno”ti vuttattā “**manussaloke**”ti vuttaṃ. **Paññāsampattiyāti** yāthāvato hitassa jānānasamatthena attano paññāguṇena, na kevalaṃ ajjhāsayeneva hitesitā, atha kho payogenāti dassento “**hitūpadesako**”ti āha. Ajjhāsayena pana hitesitā “**lokānukampāyā**”ti iminā dassitā. Upakaraṇehi vinā na kadāci bhogasukhaṃ upakaraṇadānañca cāgasampattihetukanti āha “**cāgasampattiyā...pe... dāyako**”ti. **Mettāsampattiyā** hitūpasamhārena **rakkhitā**. **Karuṇāsampattiyā** dukkhāpanāyana **gopāyitā**. Nanu ca pubbepi vuttaṃ “hitāya sukhāyā”ti, atha kasmā puna taṃ gahitanti codanaṃ sandhāyāha “**idha devamanussaggahaṇenā**”tiādī. Tena pubbe avisesato hitādīni dassitāni, idāni viśesato saha payojanena tāni dassitānīti dipeti. Nibbānato paro paramo attho nāma natthīti āha “**paramatthattāyā**”ti. Hinoti nibbānaṃ gacchatīti **hitam**, maggo. Ukkāmsato sukhatthaṃ ariyaphalanti āha “**tato uttari sukhābhāvato**”ti.

Asammohavīhāraṇṇanā niṭṭhitā.

### Pubbabhāgapaṭipadādivaṇṇanā

**51. Asammohavīhāranti** asammohavuttiṃ, asammohasambodhanti vā attho. **Tanti** samathavipassanābhāvanāsankhātamaṃ paṭipadaṃ. **Pubbabhāgato pabhutīti** bhāvanāya pubbhāgavīriyārambhādito paṭṭhāya. **Kecīti** uttaravīhāravāsino.

**Bodhimaṇḍeti** (sārattha. ṭī. 1.11.verañjakaṇḍavaṇṇanā; a. ni. ṭī. 3.8.11) bodhisankhātassa ñāṇassa maṇḍabhāvappatte ṭhāne. **Caturaṅganti** “kāmaṃ taco ca nhāru ca, aṭṭhi ca avasissatū”tiādinaṃ (ma. ni. 2.184; saṃ. ni. 2.237; a. ni. 2.5; 8.13; mahāni. 17, 196) vuttacaturaṅgasamannāgataṃ. **Paggahitanti** ārambhaṃ sithilaṃ akatvā daḷhaparakkamasankhātussahanabhāvena gahitaṃ. Tenāha “**asithilappavattitanti vuttaṃ hotī**”ti. **Asallīnanti** asankucitaṃ kosajjavasena sankocaṃ anāpannaṃ.

**Upaṭṭhitāti** ogāhanasankhātena apilāpanabhāvena ārammaṇaṃ upagantvā ṭhitā. Tenāha “**ārammaṇābhīmukhībhāvenā**”ti. Sammosassa viddhaṃsanavasena pavattiyā na sammutṭhāti **asammutṭhā**. Kiñcāpi cittaṃviva cittaṃpassaddhivasena kāyapassaddhivaseneva kāyo passaddho hoti, tathāpi yasmā kāyapassaddhi uppajjamānā cittaṃpassaddhiyā saheva uppajjati, na vinā, tasmā vuttaṃ “**kāyacittaṃpassaddhisambhavenā**”ti. **Rūpakāyopi passaddhoyeva hoti** kāyapassaddhiyā ubhayesampi kāyānaṃ passambhanāvahattā. **So ca kho kāyo. Vigatadarathoti** vigatakilesadaratho. Nāmakāye hi vigatadarathe rūpakāyopi vūpasantadarathapariḷāho hoti. **Sammā āhitanti** nānārammaṇesu vidhāvanasankhātavikkhepaṃ vicchindivā ekasmiṃyeva ārammaṇe avikkhittabhāvāpādānena sammadeva āhitaṃ. Tenāha “**suṭṭhu ṭhapita**”ntiādi. Cittassa anekaggabhāvo vikkhepavasena cañcalatā, sā sati ekaggaṭāya na hotīti āha “**ekaggaṃ acalaṃ nipphandana**”nti. **Ettāvātāti** “āraddhaṃ kho panā”tiādinaṃ vīriyasatipassaddhisamādhīnaṃ kiccaṃsiddhidassanena. Nanu ca saddhāpaññānampi kiccaṃsiddhi jhānassa pubbapaṭipadāya icchitabbāti? Saccamaṃ icchitabbā, sā pana nānantariyabhāvena avuttasiddhāti na gahitā. Asati hi saddhāya vīriyārambhādīnaṃ asambhavoyeva, paññāpariggahe ca nesamaṃ asati paññāyārambhādibhāvo na siyā. Tathā asallīnāsammosatādayo vīriyādīnanti asallīnatādiggaṇenevettha paññākiccaṃsiddhi gahitāti daṭṭhabbaṃ. Jhānabhāvanāyaṃ vā samādhikiccaṃ adhikaṃ icchitabbanti dassetaṃ samādhipariyosānāva **jhānassa pubbapaṭipadā kathitāti** daṭṭhabbaṃ.

Vuttaṃ, tasmā idha na vattabbaṃ. **Visuddhimaggo** hi imissā samvaṇṇanāya ekadesabhūtoti vuttovāyamatthoti. **Viharatīti āgataṃ** paruddesikattā vihārassa. **Idha vihāsinti āgataṃ** atthuddesikattā. Idamaṃ kira sabbabuddhānaṃ avijahitanti āha “**ānāpānassatikammaṭṭhāna**”nti. Rūpavirāgabhāvanāvasena (sārattha. ṭī. 1.12.nerañjakaṇḍavaṇṇanā) pavatto catubbidhopi arūpajjhānaviseso catutthajjhānasaṅgaho evāti āha “**cattāri jhānāni**”ti. Yuttaṃ tāva cittekaggaṭā bhavokkamanatthātā viya vipassanāpādakatāpi catunnaṃ jhānānaṃ sādharmaṇāti tesamaṃ vasena “cattāri jhānāni”ti vacanaṃ, abhiññāpādakatā pana nirodhapādakatā ca catutthasseva jhānassa āveṇikā, sā kathaṃ catunnaṃ jhānānaṃ sādharmaṇā vuttāti? Paramparādhiṭṭhānabhāvato. Padaṭṭhānapadaṭṭhānampi hi padaṭṭhānanteva vuccati, kāraṇakāraṇampi kāraṇanti yathā “tiṇehi sattaṃ siddha”nti, evaṅca katvā payojananiddese aṭṭhasamāpattiggahaṇaṃ samatthitaṃ hoti. **Cittekaggaṭatthānīti** cittaṃsamādhānatthāni, diṭṭhadhammasukhavīhāratthānīti attho. Cittekaggaṭāsīsenā hi diṭṭhadhammasukhavīhāro vutto, sukkhavipassakakhīṇāsavavasena cetamaṃ vuttaṃ. Tenāha “**ekaggacittā sukhaṃ divasaṃ viharissāmā**”ti. **Bhavokkamanatthānīti** bhavesu nibbattiattāni.

Yasmā (sārattha. ṭī. 1.12.nerañjakaṇḍavaṇṇanā) bodhisattena bodhimaṇḍūpasankamanato pubbepi carimabhāve catutthajjhānaṃ nibbattitapubbaṃ, tadā pana taṃ nibbattitamattameva ahoṣi, na vipassanāpādakaṃ, tasmā “**bodhirukkhamūle nibbattita**”nti tato visesetvā vuttaṃ. **Vipassanāpādakanti** vipassanārambhe vipassanāya pādakaṃ. **Abhiññāpādakanti** etthāpi eseva nayo. Buddhānañhi paṭhamārambhe eva pādakajjhānena payojanaṃ ahoṣi, na tato paraṃ uparimaggādhigamaphalasaṃpattiabhiññāvaḷaṅjanādiatthamaṃ. Abhisambodhisamadhiḡamato paṭṭhāya hi sabbamaṃ ñāṇasaṃādhikiccaṃ ākaṅkhamattapaṭibaddhamevāti. **Sabbakiccaṃsādhakanti** anupubbavīhārādisabbakiccaṃsādhakaṃ. **Sabbalokiyalokuttaragaṇadāyakaṃ** ettha vipassanābhiññāpādakatā eva catutthassa jhānassa bhagavato sabbalokiyalokuttaragaṇadāyakatā

veditabbā. Sabbaññutaññānapadaṭṭhānañhi maggaññāṇaṃ, maggaññānapadaṭṭhānañca sabbaññutaññāṇaṃ abhisambodhi, tadadhigamasamakārameva bhagavato sabbe buddhaguṇā hatthagatā ahesuṃ, catutthajjhānasannissayo ca maggādhigamoti.

Pubbhāgapaṭipadādivaṇṇanā niṭṭhitā.

### Pubbenivāsakathāvaṇṇanā

**52. Dvinnam vijjānanti** pubbenivāsaññānadibbacakkhuññāsañkhātānaṃ dvinnam vijjānaṃ. **Anupadavaṇṇanā**ti tāsam vijjānaṃ niddesapāḷiyā anupadavaṇṇanā. **Bhāvanānayo**ti uppādanavidhi. “**So**”ti paccattavacanassa ahaṃ-saddena sambandhane kāraṇaṃ dassetuṃ “**abhininnāmesi**”ntiādi vuttaṃ. Pāḷiyam vā “**abhininnāmesi**”nti uttamapurisassa yogoti ahaṃ-saddena ānetvā vuccamāne tadattho pākaṭo hotīti “**so aha**”nti vuttaṃ. **Abhinīharinti** cittaṃ jhānārammaṇato apanetvā pubbenivāsābhimukhaṃ pesesiṃ, pubbenivāsaninnaṃ pubbenivāsapoṇaṃ pubbenivāsapabbhāraṃ akāsinti attho.

Pubbeatītajātīsu nivutthakkhandhā pubbenivāso. **Nivutthāti** ca ajjhāvutthā anubhūtā attano santāne uppajjitvā niruddhā, gocaranivāseṇa nivutthadhammā vā attano viññāṇaviññātā, paraviññāṇaviññātāpi vā chinnavaṭumakānussaraṇādīsu, taṃ pubbenivāsaṃ yāya satiyā anussarati, tāya sampayuttaṃ ñāṇaṃ **pubbenivāsānussatiññāṇaṃ**. **Paṇinivattantassāti** pubbenivāsaṃ anussaraṇavasena yāvadicchakaṃ gantvā paccāgacchantassa. **Tasmāti** vuttassevatthassa kāraṇabhāvena paccāmasanaṃ, paṇinivattantassa paccavekkhaṇabhāvatoti vuttaṃ hoti. **Idhūpapattiyāti** idha carimabhāve upapattiyā. **Anantaranti** atītānantaramāha. **Amutrāti** amukasmim bhaveti attho. **Udapādinti** uppajjim. **Tāhi devatāhī** tusitādevatāhi. **Ekagottoti** tusitagottena ekagotto. Mahābodhisattānaṃ santānassa pariyoṣānāvattāyā devalokūpapattijanakaṃ nāma akusalena kammunā anupaddutameva hotīti adhippāyena “**dukkhaṃ pana sañkhāradukkhaṃevā**”ti vuttaṃ. Mahāpuññānampi pana devaputtānaṃ pubbanimittupattikālādīsu anīṭṭhārammaṇasamāyogo hotiyevāti “**kadāci dukkhadukkhasapi sambhavo natthī**”ti na sakkā vattum. **Sattapaññāsa...pe... pariyantoti** idam manussānaṃ vassagaṇanāvasena vuttaṃ. Tattha devānaṃ vassagaṇanāya pana catusahassameva.

Atītabhave (sārattha. ṭī. 1.12. pubbenivāsakathāyaṃ) khandhā tappaṭibaddhanāmagottāni ca sabbaṃ pubbenivāsanteva saṅghatanti āha “**kiṃ veditaṃ karoti? Pubbenivāsa**”nti. **Moho paṭicchādakaṭṭhena** “**tamo**”ti vuccati “**tamo viyā**”ti katvā. **Obhāsakaraṇaṭṭhenāti** kātabbato karaṇaṃ, obhāsova karaṇaṃ, attano paccayena obhāsabhāvena nibbattetabbaṭṭhenāti attho. **Sesaṃ pasamsāvacaṇanti** paṭipakkhavidhamanapavattivisesānaṃ bodhanato vuttaṃ. **Avijjā vihatāti** etena vijjanaṭṭhena vijjāti ayampi attho dīpitoti daṭṭhabbaṃ. **Yasmā vijjā uppānāti** etena vijjāpaṭipakkhā avijjā, paṭipakkhatā cassā pahātabbabhāvena vijjāya ca pahāyakabhāvenāti dasseti. **Esa nayo itarasmimpi padadvayeti** iminā tamo vihato vinaṭṭho. Kasmā? Yasmā āloko uppānotti imamattaṃ atidissati. **Pesitattassāti** yathādhippetatthasiddhiṃ pati vissatṭhacittassa. **Yathā appamattassāti** aññassapi kassaci mādisassāti adhippāyo.

Pubbenivāsakathāvaṇṇanā niṭṭhitā.

### Dibbacakkhuññāpakathāvaṇṇanā

**53. Idhāti** bhayaabheravasutte vuttaṃ. Idha ayaṃ visesoti yojanā. **Vuttasadisameva** “**meti mayā**”tiādinā. **Parikkammakiccanti** “**abhiññāpādakacatutthajjhānato vuṭṭhāya sabbapacchimā nisajjā āvajjitabbā**”tiādinā, kasiṇārammaṇaṃ abhiññāpādakajjhānaṃ sabbākāreṇa abhinīhāraṅkhamam katvā”tiādinā ca vuttena parikkammena kiccaṃ payojanaṃ natthi. **Na tena idha atthoti** tena bhāvanāyena idha pāḷiyā atthavaṇṇanāyaṃ attho natthi tathābhāvanāya idha anadhippetattāti adhippāyo.

Dibbacakkhuñāṇakathāvaṇṇanā niṭṭhitā.

### Āsavakkhayañāṇakathāvaṇṇanā

**54. Vipassanāpādakanti** (sārattha. ṭī. 1.14.āsavakkhayañāṇakathāyaṃ; dī. ni. ṭī. 1.248; a. ni. ṭī. 2.3.59) vipassanāya padaṭṭhānabhūtaṃ. Vipassanā ca tividhā vipassanakapuggalabhedena. Mahābodhisattānañhi paccekabodhisattānañca vipassanā cintāmayañāṇasaṃvaddhitattā sayambhuñāṇabhūtā, itaresaṃ sutamayañāṇasaṃvaddhitattā paropadesasambhūtā, sā “ṭhapetvā nevasaññānāsaññāyatanaṃ avasesarūpārūpajjhānānaṃ aññatarato vuṭṭhāyā”tiādinā anekadhā arūpamukhavasena catudhātuvavatthāne vuttānaṃ tesāṃ tesāṃ dhātupariggahamukhānaṃ aññataramukhavasena anekadhāva **visuddhimagge** (visuddhi. 1.306) nānāyato vibhāvītā. Mahābodhisattānaṃ pana catuvīsatiakoṭisatasahassamukhena pabhedagamanato nānāyamaṃ sabbaññūtaññāṇasaṃvaddhitattā ariyamaggañāṇassa adhiṭṭhānabhūtaṃ pubbabhāgañāṇagabbhaṃ gaṇhāpentaṃ paripākaṃ **gacchantāṃ** paramagambhīrasaṃhasukhumataraṃ anaññasādhāraṇaṃ vipassanāñāṇaṃ hoti, yaṃ **aṭṭhakathāsu** mahāvajirañāṇanti vuccati. Yassa ca pavattivibhāgena catuvīsatiakoṭisatasahassapabbhedassa pādakabhāvena samāpajjiyamānā catuvīsatiakoṭisatasahassasaṅkhā devasikaṃ satthu vaḷaṅjanakasamāpattiyo vuccanti, svāyaṃ buddhānaṃ vipassanācāro paramatthamañjūsāya **visuddhimaggasaṃvaṇṇanāya** (visuddhi. mahāṭī. 1.144) uddesato dassito, atthikehi tato gahettabboti.

Āsavānaṃ khepanato samucchindanato āsavakkhayaṃ, ariyamaggaṃ, ukkaṭṭhaniddesavasena arahattamaggaggahaṇaṃ. Āsavānaṃ khaye ñāṇaṃ **āsavakkhayañāṇanti** dassento “**tatra cetāṃ ñāṇa**”nti vatvā khayeti ca ādhāre bhumaṃ, na visayeti dassento “tappariyā pannatā”ti āha. **Idaṃ dukkhanti** dukkhassa ariyasaccassa tadā paccakkhato gahitabhāvadassanaṃ. **Ettakaṃ dukkhanti** dukkhassa ariyasaccassa tadā paccakkhato gahitabhāvadassanaṃ. **Ettakaṃ dukkhanti** tassa paricchijja gahitabhāvadassanaṃ. **Na ito bhiyyoti** anavasesetvā gahitabhāvadassanaṃ. Tenāha “**sabbampi dukkhasacca**”ntiādi. **Sarasalakkhaṇapaṭivedhenāti** sabhāvasaṅkhātassa lakkhaṇassa asammohato paṭivijjhanena. **Asammohapaṭivedhoti** ca yathā tasmaṃ ñāṇe pavatte pacchā dukkhassa sarūpādiaparicchede sammoho na hoti, tathā pavatti. Tenāha “**yathābhūtaṃ abbhaññāsi**”nti. **Yaṃ ṭhānaṃ patvāti** yaṃ nibbānaṃ maggassa ārammaṇapaccayaṭṭhena kāraṇabhūtaṃ āgamma. Tadubhayavato hi puggalassa patti tadubhayassa patti vuttaṃ. **Patvāti** vā pāpuṇanahetu. **Appavattinti** appavattinimittaṃ. Te vā nappavattanti etthāti **appavatti**, nibbānaṃ. **Tassāti** dukkhanirodhassa. **Sampāpakanti** sacchikiriyāvasena sammadeva pāpakaṃ.

**Kilesavasenāti** āsavasaṅkhātakilesavasena. Yasmā āsavānaṃ dukkhasaccapariyāyo tappariyāpannatā, sesasaccānañca taṃsamudayādi pariyaṃ atthi, tasmā vuttaṃ. “**Pariyāyato**”ti. Dassento saccānīti yojanā. Āsavānaṃyeva cettha gahaṇaṃ “āsavānaṃ khayañāyā”ti āradhātā. Tathā hi āsavavimutti sīseneva sabbasaṃkilesavimutti vuttā. “**Idaṃ dukkhanti yathābhūtaṃ abbhaññāsi**”ntiādinā missakamaggo idha kathitoti “**saha vipassanāya koṭippattaṃ maggaṃ katheti**”ti vuttaṃ. Ettha ca saccapaṭivedhassa tadā atītakālikattā “yathābhūtaṃ abbhaññāsi”nti vatvāpi abhisamayakāle tassa paccuppannataṃ upādāya “evaṃ jānato evaṃ passato”ti vattamānakālena niddeso kato. So ca kāmaṃ maggakkhaṇato paraṃ yāvajjatanā atītakāliko eva, sabbapaṭhamamā panassa atītakālikattaṃ phalakkhaṇena veditabbanti āha “**vimuccitthāti iminā phalakkhaṇaṃ dasseti**”ti. **Jānato passatoti** vā hetuniddesoyam. Jānanahetu dassanahetu kāmāsavā cittaṃ vimuccitthāti yojanā. Bhavāsavaggahaṇeneva cettha bhavarāgassa viya bhavadiṭṭhiyāpi samavarodhoti diṭṭhāsavassapi saṅgaho daṭṭhabbo.

**Khīṇajātītiādihi** padehi. **Tassāti** paccavekkhaṇañāṇassa. **Bhūmīnti** pavattiṭṭhānaṃ. **Na tāvassa atīti jāti khīṇā** maggabhāvanāyāti adhippāyo. Tattha kāraṇamāha “**pubbeva khīṇatā**”ti. Na anāgatā assajāti khīṇāti yojanā. **Na anāgatāti** ca anāgatattasāmaññaṃ gahetvā lesena codeti. Tenāha “**anāgate vāyāmābhāvato**”ti, anāgataviseso panettha adhippeto, tassa ca khepane vāyāmopi labbhateva. Tenāha

“**yā pana maggassā**”tiādi. **Ekacatupañcavokārabhavesūti** bhavattayaggahaṇaṃ vuttanayena anavasesato jātiyā khīṇabhāvadassanattamaṃ. **Tanti** yathāvuttamaṃ jātiṃ. **Soti** bhagavā.

Brahmacariyavāso nāma idha maggabrahmacariyassa nibbattanamevāti āha “**niṭṭhita**”nti. Sammādiṭṭhiyā catūsu saccesu pariññādikiccasādhanavasena pavattamānāya sammā saṅkappādīnampi dukkhasacce pariññābhisamayānugunā pavatti, itarasaccesu ca nesamaṃ pahānābhisamayādivasena pavatti pākāṭā eva. Tena vuttamaṃ “**catūhi maggehi pariññāpahānasacchikiriyābhāvanāvasenā**”ti. **Itthattāyāti** ime pakārā itthamaṃ, tabbhāvo itthattamaṃ, tadatthanti vuttamaṃ hoti. Te pana pakārā ariyamaggabyāpārabhūtā pariññādayo idhādhippetāti āha “**evamsolaṣakiccabhāvāyā**”ti. Te hi maggaṃ paccavekkhato maggānubhāvena pākāṭā hutvā upaṭṭhahanti, pariññādīsu ca pahānameva padhānaṃ tadatthattā itaresanti āha “**kilesakkhayāyavā**”ti. Pahīnakilesapaccavekkhaṇavasena vā etaṃ vuttamaṃ. **Itthattāyāti** nissakke sampadānavacananti āha “**itthabhāvato**”ti. **Aparaṃ** anāgataṃ. **Ime pana** carimattabhāvasaṅkhātā **pañcakkhandhā**. **Pariññātā tiṭṭhantūti** etena tesamaṃ appaṭiṭṭhataṃ dasseti. A pariññāmūlakā hi patiṭṭhā. Yathāha “kabalīkāre ce, bhikkhave, āhāre atthi rāgo atthi nandī atthi taṇhā, patiṭṭhitaṃ tattha viññānaṃ virūḷha”ntiādi (saṃ. ni. 2.64; mahāni. 7; kathā. 296). Tenevāha “**chinnamūlakā rukkhā viyā**”tiādi.

**Paccavekkhaṇānāpariggahitaṃ**, na paṭhamadutiyañānadvayādhiḡamaṃ viya kevalanti adhippāyo. **Dassento** nigamanavasenaṭi adhippāyo. Sarūpato hi taṃ pubbe dassitamevāti. Pubbenivāsañānena atītārammaṇasabhāgatāya tabbhāvībhāvato ca atītamaṇānaṃ saṅgahetvāti yojanā. Tattha **atītamaṇānanti** atītakhandhāyatanadhātusaṅkhāte atītakoṭṭhāse appaṭiṭṭhataṃ ṇānaṃ. **Dibbacakkhunāti** sapaṛibhaṇḍena dibbacakkuṇānena. Paccuppannaṃso ca anāgataṃso ca paccuppannānāgataṃsaṃ, tattha ṇānaṃ **paccuppannānāgataṃsaṇānaṃ**. **Sakalalokiyalokuttaragunaṇanti** etena sabbaṃ lokaṃ uttaritvā abhibhuyya ṭhitattā sabbaññutaññānaṃsa viya sesāsādhāraṇāñānaṃsa balañānaaveṇikabuddhadhammādīnampi anaññāsādhāraṇānaṃ buddhagunaṇaṃ saṅgaho vedītabbo. Tenāha “**sabbepi sabbaññugūṇe saṅgahetvā**”ti.

Āsavakkhayañānakathāvaṇṇanā niṭṭhitā.

### Araññavāsakāraṇavaṇṇanā

**55. Siyā kho pana te brāhmaṇāti** ettha siyāti “appevā”ti iminā samānattho nipāto, tasmā “brāhmaṇa, appeva kho pana te evamassā”ti attho. Yaṃ pana **aṭṭhakathāyaṃ “kadāci”**ti vuttamaṃ, tampi imamevatthamaṃ sandhāya vuttamaṃ akāraṇaṃ brāhmaṇena parikappitamattaṃ paṭipakkhipitvā attano adhippetamaṃ kāraṇaṃ dassento. Atthova phalaṃ tadadhīnavuttitāya vaso etassāti **atthavaso**, hetūti evamaṃ vā ettha attho daṭṭhabbo. **Attano ca diṭṭhadhammasukhavihāranti** etena sathā attano vivekābhiraṭiṃ pakāsetīti dassento “**diṭṭhadhammo nāmā**”tiādimāha. Tattha **iriyāpathavihārānanti** iriyāpathapavattīnaṃ. Tappavattīyo hi ekasmiṃ iriyāpathe uppānadukkhamaṃ aññena iriyāpathena vicchinditvā haraṇato vihārāti vuccanti. **Pacchimañca janatamaṃ anukampamaṇoti** etena yo ādīto brāhmaṇena “bhavaṃ tesamaṃ gotamo pubbaṅgamo...pe... diṭṭhānugatiṃ āpajjati”ti vutto, yo ca tathā “evametaṃ brāhmaṇā”tiādinā attanā sampaṭicchito, tameva atthamaṃ nigamanavasena dassento yathānusandhināva sathā desanaṃ niṭṭhāpesi.

Araññavāsakāraṇavaṇṇanā niṭṭhitā.

### Desanānumodanāvaṇṇanā

**56. Eamaṃ niṭṭhāpitāya** desanāya brāhmaṇo tattha bhagavati pasādaṃ pavedento “**abhikkanta**”ntiādimāha. **Abhikkantāti** (sārattha. ṭī. 1.15.desanānumodanakathā; dī. ni. ṭī. 1.250; saṃ. ni. ṭī. 1.1.1; a. ni. ṭī. 2.2.16) atikkantā, vīgatāti atthoti āha “**khaye dissati**”ti. Teneva hi “**nikkhanto paṭhama yāmo**”ti vuttamaṃ. **Abhikkantataroti** ativiya kantataro manorama. Tādīso ca sundaro bhaddako



nāma hotīti āha “**sundare dissatī**”ti.

**Koti** devanāgayakkhagandhabbādīsu ko katamo. **Meti** mama. **Pādānīti** pāde. **Iddhiyāti** imāya evarūpāya deviddhiyā. **Yasasāti** iminā edisena parivārena pariḥāna. **Jalanti** vijjotamāno. **Abhikkantenāti** ativiya kantena kamanīyena abhirūpena. **Vañṇenāti** chavivañṇena sarīravañṇanibhāya. **Sabbā obhāsayaṃ disāti** dasapi disā obhāsento pabhāsento, cando viya sūriyo viya ca ekobhāsayaṃ ekālokaṃ karontoti gāthāya attho. **Abhirūpeti** uḷārarūpe sampannarūpe.

“Coro coro, sappo sappo”tiādīsu **bhaye āmedītaṃ**. “Vijjha vijjha, pahara paharā”tiādīsu **kodhe**, “sādhu sādhu”tiādīsu (ma. ni. 1.327; saṃ. ni. 2.127; 3.35; 5.1085) **pasamsāyaṃ**, “gaccha gaccha, lunāhi lunāhi”tiādīsu **turite**, “āgaccha āgacchā”tiādīsu **kotūhale**, “buddho buddhoti cintento”tiādīsu (bu. vaṃ. 2.44) **acchare**, “abhikkamathāyasmanto, abhikkamathāyasmanto”tiādīsu (dī. ni. 3.20; a. ni. 9.11) **hāse**, “kahaṃ ekaputtaka, kahaṃ ekaputtakā”tiādīsu (ma. ni. 2.353; saṃ. ni. 2.63) **soke**, “aho sukhaṃ aho sukha”ntiādīsu (udā. 20; dī. ni. 3.305; cūḷava. 332) **pasāde**. **Ca**-saddo avuttasamuccayattho. Tena garahāasammānādīnaṃ saṅgaho daṭṭhabbo. Tattha “pāpo pāpo”tiādīsu **garahāyaṃ**. “Abhirūpaka abhirūpakā”tiādīsu **asammāne** daṭṭhabbaṃ.

Nayidaṃ āmedītavasena dvikkhattuṃ vuttaṃ, atha kho atthadvayavasenāti dassento “**atha vā**”tiādīmāha. **Abhikkantanti** vacanaṃ apekkhitvā napuṃsakaliṅgavasena vuttaṃ, taṃ pana bhagavato vacanaṃ dhammassa desanāti katvā tathā vuttaṃ. Atthamattadassanaṃ vā etaṃ, tasmā atthavasena liṅgavibhattivipariṇāmo veditabbo. Dutiyapadepi eseva nayo. **Dosanāsanatoti** rāgādikilesadosavidhamanato, **guṇādhigamanatoti** sīlādiguṇānaṃ sampāpanato. Ye guṇe desanā adhigameti, tesu padhānabhūtā dassetabbāti te padhānabhūte tāva dassetuṃ “**saddhājananato paññājananato**”ti vuttaṃ. Saddhāpamukhā hi lokiyā guṇā, paññāpamukhā lokuttarā. Sīlādiatthasampattiyā **sātthato**, sabhāvaniruttisampattiyā **sabyañjanato**. Suvīñṇeyyasaddapayogatāya **uttānapadato**, saṅhasukhumabhāvena dubbīñṇeyyatthātāya **gambhīratthato**. Siniddhamudumadhurasaddapayogatāya **kaṇṇasukhato**, vipulavisuddhapemaṇiyatthātāya **hadayaṅgamato**. Mānātimānavidhamanena **anattukkaṃsanato**, thambhasārambhamaddanena **aparavambhanato**. Hitādhippāyapavattiyā paresaṃ rāgapariḷāhādīvūpasamanena ca **karuṇāsīlato**, kilesandhakāravidhamanena **paññāvadātato**. Karavīkarutamañjutāya **āpātharamaṇiyato**, pubbāparāvīruddhasuvisuddhatthātāya **vimaddakkhamato**. Āpātharamaṇiyatāya eva **suyyamānasukhato**, vimaddakkhamatāya hitajjhāsayaṃpavattitatāya ca **vīmaṃsiyamānahitato**. **Evamādīhīti** ādisaddena saṃsāracakkaniivattanato, saddhammacakkappavattanato, micchāvādavidhamanato, sammāvādapaṭiṭṭhāpanato, akusalamūlasamuddharaṇato, kusalamūlasaṃpropanato, apāyadvārapadhānato, saggamaggadvāravivaraṇato, pariyuṭṭhānavūpasamanato, anusayasamugghātanatoti evamādīnaṃ saṅgaho daṭṭhabbo.

**Adhomukhaṭṭhapitanti** kenaci adhomukhaṃ ṭhapitaṃ. **Heṭṭhāmukhajātanti** sabhāveneva heṭṭhāmukhajātaṃ. **Ugghāṭeyyāti** vivaṭaṃ kareyya. **Hatthe gahetvāti** “puratthābhimukho, uttarābhimukho vā gacchā”tiādīni avatvā hatthe gahetvā “nissandehaṃ esa maggo, evaṃ gacchā”ti vadeyya. **Kālapakkhacātuddasīti** kālapakkhe cātuddasī.

**Nikujjitaṃ** ādheyyassa anādhārabhūtaṃ bhājanāṃ ādhārabhāvāpādanavasena **ukkujjeyya**. Heṭṭhāmukhajātātāya **saddhammavimukhaṃ**, adhomukhaṭṭhapitātāya **asaddhamme patitanti** evaṃ padadvayaṃ yathārahaṃ yojetabbaṃ, na yathāsaṅkhyāṃ. Kāmaṃ kāmacchandādayopi paṭicchādakā, micchādīṭṭhi pana savisesaṃ paṭicchādīkāti āha “**micchādīṭṭhigahanapaṭicchanna**”nti. Tenāha bhagavā “micchādīṭṭhiparamāhaṃ, bhikkhave, vajjaṃ vadāmi”ti (a. ni. 1.310). Sabbo apāyagāmimaggo **kummaggo** “kucchito maggo”ti katvā. Sammādīṭṭhiādīnaṃ ujupaṭipakkhatāya micchādīṭṭhiādāyo aṭṭha micchattadhammā **micchāmaggo**. Teneva hi tadubhayapaṭipakkhataṃ sandhāya “**saggamokkhamaggaṃ ācikkhantena**”ti vuttaṃ. Sappiādisannissayo padīpo na tathā ujjalo, yathā telasannissayoti **telapajjotaggahaṇaṃ**. **Etehi pariyāyehīti** etehi

nikujjitukkujanapaṭicchannavivaraṇādiupamopamitabbapakārehi, **etehi** vā yathāvutthehi soḷasārammaṇapariggahaasammohavīhāradibbavihāravibhāvanapariyāyehi vijjāttayavibhāvanāpadesena attano sabbaññuṅaṇavibhāvanapariyāyehi ca. Tenāha “**anekapariyāyena dhammo pakāsito**”ti.

Desanānumodanāvaṇṇanā niṭṭhitā.

### Pasannakāraṇaṇā

**Pasannakāraṇanti** pasannehi kātappaṃ sakkāraṃ. **Saraṇanti** paṭisaraṇaṃ. Tenāha “**parāyaṇa**”nti. Parāyaṇabhāvo ca anathanisedhanena atthasampaṭipādanena ca hoṭīti āha “**agghassa tātā hitassa ca vidhātā**”ti. **Aghassāti** dukkhatoti vadanti, pāpatoti pana yuttaṃ. Nissakke cettaṃ sāmivacanaṃ. Ettha ca nāyaṃ gama-saddo nī-saddādayo viya dvikammako, tasmā yathā “**ajamaṃ gāmaṃ neti**”ti vuccati, evaṃ “**gotamaṃ saraṇaṃ gacchāmi**”ti vattuṃ na sakkā, “**saraṇanti gacchāmi**”ti pana vattappaṃ. Iti-saddo cettha luttaniddiṭṭho, tassa cāyamattho – gamanañca tadadhippāyena bhajanaṃ, tathā jānanaṃ vāti dassento “**iti iminā adhippāyena**”tiādimāha. Tattha **bhajāmīti**ādisu purimassa purimassa pacchimaṃ pacchimaṃ atthavacanaṃ. **Bhajanaṃ** vā saraṇādhippāyena upasaṅkamaṇaṃ, **sevanaṃ** santikāvaccarātā, **payirupāsanaṃ** vattapaṭivattakaraṇena upaṭṭhānanti evaṃ sabbathāpi anaññasaraṇataṃyeva dīpeti. “**Gacchāmi**”ti padassa kathaṃ “**bujjhāmi**”ti ayamattho labbhatīti āha “**yesañhi**”tiādi.

**Adhigatamagge, sacchikatanirodheti** padadvayenapi phalaṭṭhā eva dassitā, na maggaṭṭhāti te dassento “**yathānusiṭṭhaṃ paṭipajjamāne cā**”ti āha. Nanu ca kalyāṇaputhujjanopi yathānusiṭṭhaṃ paṭipajjatīti vuccatīti? Kiñcāpi vuccati, nippariyāyena pana maggaṭṭhā eva tathā vattabbā, na itare niyāmokkamanābhāvato. Tathā hi te eva “**apāyesu apatamāne dhāreti**”ti vuttā.

Sammattaniyāmokkamaṇena hi apāyavinimuttisambhavo. **Akkhāyatīti** ettha **iti**-saddo ādiattho, pakārattho vā. Tena “**yāvata, bhikkhave, dhammā saṅkhatā vā asaṅkhatā vā, virāgo tesam aggamaṅkhaṇatī**”ti **suttapadaṃ** (a. ni. 4.34; itivu. 90) saṅgaṇhāti, **vitthāroti** vā iminā. Ettha ca **ariyamaggo** niyyānikatāya, **nibbānaṃ** tassa tadatthasiddhihetutāyāti ubhayamevettha nippariyāyena dhammoti vutto. Nibbānañhi ārammaṇapaccayabhūtaṃ labhitvā ariyamaggassa tadatthasiddhi, ariyaphalānaṃ “**yasmā tāya saddhāya avūpasantāyā**”tiādivacanaṃ maggena samucchinnānaṃ kilesānaṃ paṭippassaddhipahānakiccatāya niyyānānugūṇatāya niyyānapariyosānatāya ca. Pariyattidhammassa pana niyyānadhammasamadhiagamahetutāyāti iminā pariyaṇena dhammabhāvo labbhati eva, svāyamattho pāṭhāruḷho evāti dassento “**na kevala**”ntiādimāha.

Kāmarāgo bhavarāgoti evamādibhedo sabbopi rāgo virajjati pahīyati etenāti **rāgavirāgoti maggo kathito**. Ejāsāṅkhātāya taṇhāya antonijjhānalakkhaṇassa sokassa ca taduppattiyāṃ sabbaso parikkhīṇattā **anejamasokanti phalaṃ kathitaṃ**. **Appaṭikūlanti** avirodhadīpanato kenaci aviruddhaṃ, iṭṭhaṃ paṇīṭanti vā attho. Paṅuṇarūpena pavattitattā, pakatṭhaguṇavibhāvanato vā **paṅuṇaṃ**. Yathāha “**vihimsasaññī paṅuṇaṃ na bhāsīṃ, dhammaṃ paṇīṭaṃ manujesu brahme**”ti. Sabbadhammakhandhā kathitāti yojanā.

**Diṭṭhisīlasaṅghātenāti** “**yāyaṃ diṭṭhi ariyā niyyānikā niyyāti takkarassa sammā dukkhakkhayāya, tathārūpāya diṭṭhiyā diṭṭhisāmaññagato viharatī**”ti (dī. ni. 3.324, 356; ma. ni. 1.492; 3.54) evaṃ vuttāya diṭṭhiyā, “**yāni tāni sīlāni akhaṇḍāni acchiddāni asabalāni akammāsāni bhujissāni viññuppasatthāni aparāmatṭhāni samādhisaṃvattanikāni, tathārūpehi sīlehi sīlasāmaññagato viharatī**”ti (dī. ni. 3.324; ma. ni. 1.492; 3.54; a. ni. 6.12; pari. 274) evaṃ vuttānaṃ sīlānañca saṃhatabhāvena, diṭṭhisīlasāmaññenāti attho. **Samhatoti** ghaṭito. Ariyapuggalā hi yattha katthaci dūre ṭhitāpi attano guṇasāmaggiyā saṃhatā eva. **Aṭṭha ca puggala dhammasā teti** te purisayugavasena cattāropi puggalavasena aṭṭheva ariyadhammassa paccakkhadassāvītāya dhammasā. Tīṇi vatthūni saraṇanti gamaṇena tikkhattuṃ gamaṇena ca **tīṇi saraṇagamaṇāni**. **Paṭivedesīti** attano hadayagataṃ vācāya pavedesi.

Pasannakāraṇaṇā niṭṭhitā.

## Saraṇagamanakathāvaṇṇanā

Saraṇagamanassa visayapabhedaphalasaṃkilesabhedānaṃ viya kattu ca vibhāvanā tattha kosallāya hotīti “**saraṇagamanesu kosallatthaṃ saraṇaṃ...pe... vedītabbo**”ti vuttaṃ tena vinā saraṇagamanasseva asambhavato. Kasmā panettha vodānaṃ na gahitaṃ, nanu vodānavibhāvanāpi tattha kosallāvahāti? Saccametam, taṃ pana saṃkilesaggahaṇeneva atthato dīpitaṃ hotīti na gahitaṃ. Yāni hi tesam saṃkilesakāraṇāni aññāṇādīni, tesam sabbena sabbaṃ anuppannānaṃ anuppādanena, uppannānaṃca pahānena vodānaṃ hotīti. Hiṃsathassa sara-saddassa vasenetam padaṃ daṭṭhabbanti “**hiṃsatīti saraṇa**”nti vatvā taṃ pana hiṃsanaṃ kesam, kathaṃ, kassa vāti codanaṃ sodhento “**saraṇagatāna**”ntiādimāha. Tattha **bhaya**nti vaṭṭabhayaṃ. **Santāsa**nti cittutrāsaṃ. Teneva cetasikadukkhasa gahitattā **dukkhanti** idha kāyikaṃ dukkhaṃ. **Duggatiparikilesanti** duggatipariyāpannaṃ sabbaṃ dukkhaṃ. Tayidaṃ sabbaṃ parato phalakathāyaṃ āvi bhavissati. **Etanti** “saraṇa”nti padaṃ.

Evam avisesato saraṇasaddassa atthaṃ dassetvā idāni visesato dassetuṃ “**atha vā**”tiādi vuttaṃ. **Hite pavattamānenāti** “sampannasīlā, bhikkhave, viharathā”tiādinā (ma. ni. 1.64, 69) atthe niyojanaena. **Ahitā ca nivattanēnāti** “**pāṇātipātassa kho pāpako vipāko pāpakaṃ abhisamparāya**”ntiādinā ādīnavadassanādīmukhena anattato vinivattanena. **Bhayaṃ hiṃsatīti** hitāhitesu appavattipavattihetukaṃ byasanaṃ appavattikaraṇena vināseti. **Bhavakantārā uttāraṇena** maggasankhāto dhammo, itaro **assāsādānena** sattānaṃ bhayaṃ hiṃsatīti yojanā. **Kārānanti** dānavasena pūjāvasena ca upanītānaṃ sakkārānaṃ. **Vipulaphalapaṭilābhakaraṇena** sattānaṃ bhayaṃ hiṃsati anuttaradakkhiṇeyyabhāvatoti adhippāyo. **Imināpi pariyaṇēnāti** imināpi vibhajitvā vuttēna kāraṇena.

“Sammāsambuddho bhagavā, svākkhāto dhammo, suppaṭipanno saṅgho”ti evam pavatto tattha ratanattaye pasādo tappasādo, tadeva ratanattayaṃ garu etassāti taggaru, tassa bhāvo taggarutā, tappasādo ca taggarutā ca **tappasādataggarutā**, tāhi. Vidhutadiṭṭhivicikicchāsammohaassaddhiyāditāya **vihatakiṇeso**. “Tadeva ratanattayaṃ parāyaṇaṃ gati tānaṃ leṇa”nti evam ākārena pavattiyā **tapparāyaṇatākārapavatto cittuppādo saraṇagamaṇaṃ** “saraṇanti gacchati etenā”ti. **Tamsamaṅgīti** tena yathāvuttacittuppādena samannāgato. **Evam upetīti** evam bhajati sevati payirupāsati, evam vā jānāti bujhatīti evamattho vedītabbo. Ettha ca pasādaggahaṇena lokiyasaraṇagamaṇamāha. Tañhi pasādappadhānaṃ, na ñāṇappadhānaṃ. Garutāgahaṇena lokuttaraṃ. Ariyā hi ratanattayaṃ guṇābhīññātāya pāsānacchattaṃ viya garuṃ katvā passanti, tasmā tappasādena vikkhambhanavasena vihatakiṇeso taggarutāya samucchadavasenāti yojetabbaṃ. Tapparāyaṇatā panettha taggatikatāti tāya catubbidhampi vakkhamānaṃ saraṇagamaṇaṃ gahitanti daṭṭhabbaṃ. Avisesena vā pasādagarutā jotitāti pasādaggahaṇena aveccappasādassa itarassa ca gahaṇaṃ, tathā garutāgahaṇēnāti ubhayaṇapi ubhayaṃ saraṇagamaṇaṃ yojetabbaṃ.

Maggakkhaṇe ijjhatīti yojanā. **Nibbānāramaṇaṃ hutvāti** etena atthato catusaccādhigamoyeva lokuttaraṃ saraṇagamaṇanti dasseti. Tattha hi nibbānadhhammo sacchikiriyābhisamayavasena, maggadhammo bhāvanābhisamayavasena paṭivijjhiyamānoyeva saraṇagamaṇattaṃ sādheti, buddhaguṇā pana sāvakagocarabhūtā pariññābhisamayavasena, tathā ariyasaṅghaguṇā. Tenāha “**kiccato sakalepi ratanattaye ijjhatī**”ti, ijjhantaṇca saheva ijjhati, na lokiyaṃ viya paṭipāṭiyā asammohapaṭivedhena paṭividhattāti adhippāyo. Ye pana vadanti “na saraṇagamaṇaṃ nibbānāramaṇaṃ hutvā pavattati, maggassa adhigatattā pana adhigatameva hoti ekaccānaṃ tevijjādīnaṃ lokiyavijjādayo viyā”ti, tesam lokiyameva saraṇagamaṇaṃ siyā, na lokuttaraṃ, taṇca ayuttaṃ duvidhassapi icchitabbattā. **Tanti** lokiyasaraṇagamaṇaṃ. **Saddhāpaṭilābho** “sammāsambuddho bhagavā”tiādinā. **Saddhāmūlikāti** yathāvuttasaddhāpubbaṅgamā **sammādiṭṭhi** buddhasubuddhataṃ dhammasudhammataṃ saṅghasuppaṭipatīṇca lokiyāvabodhavaseneva sammā ñāyena dassanato. “Saddhāmūlikā sammādiṭṭhī”ti etena saddhūpanissayā yathāvuttalakkhaṇā paññā lokiyasaraṇagamaṇanti dasseti. Tenāha “**diṭṭhijukamanti vuccatī**”ti “diṭṭhi eva attano paccayehi ujum karīyatī”ti katvā. Diṭṭhi vā ujum karīyatī etenāti **diṭṭhijukammaṃ**, tathā pavatto cittuppādo. Evaṇca katvā “tapparāyaṇatākārapavatto

cittuppādo’’ti idañca vacanaṃ samatthitaṃ hoti. Saddhāpubbaṅgamasammādiṭṭhiggahaṇaṃ pana cittuppādassa tappadhānatāyāti daṭṭhabbaṃ. ‘‘Saddhāpaṭilābho’’ti iminā mātādīhi ussāhitadārakādīnaṃ viya ñāṇavippayuttasaraṇagamaṇaṃ dasseti, ‘‘sammādiṭṭhi’’ti iminā ñāṇasampayuttasaraṇagamaṇaṃ.

**Tayidaṃ** lokiyaṃ saraṇagamaṇaṃ. **Attā** sanniyātīyati appīyati pariccajīyati etenāti **attasanniyātanaṃ**, yathāvuttaṃ diṭṭhijukammaṃ. Taṃ ratanattayaṃ parāyaṇaṃ paṭisaraṇaṃ etassāti tapparāyaṇo, puggalo, cittuppādo vā, tassa bhāvo **tapparāyaṇatā**, yathāvuttadiṭṭhijukammameva. Saraṇanti adhippāyena sissabhāvaṃ antevāsikabhāvaṃ upagacchati etenāti **sissabhāvūpagamaṇaṃ**. Saraṇagamaṇādhippāyeneva paṇipatati etenāti **paṇipāto**. Sabbattha yathāvuttadiṭṭhijukammavaseneva attho vedītabbo. **Attapariccajananti** saṃsāradukkhanittharaṇatthaṃ attano attabhāvassa pariccajanaṃ. Esa nayo sesesupi. **Buddhādīnaṃyevāti** avadhāraṇaṃ itaresupi saraṇagamaṇavisesesu yathārahaṃ vattabbaṃ. Evañhi tadaññanivattanaṃ kataṃ hoti.

Evaṃ attasanniyātanaḍīni ekena pakārena dassetvā idāni aparehipi pakārehi dassetuṃ ‘‘**apicā**’’tiādi āradhhaṃ. Tena pariyaṇantarehipi attasanniyātanaḍīni katameva hoti atthassa abhinnattāti dasseti. **Ālavakādīnanti ādi**-saddena sātāgiriheṃavataḍīnaṃ saṅgaho daṭṭhabbo. Nanu cete ālavakādayo maggeneva āgatasaraṇagamaṇā, kathaṃ tesam tapparāyaṇatāsaraṇagamaṇaṃ vuttanti? Maggenāgatasaraṇagamaṇehipi ‘‘so ahaṃ vicarissāmi gāmaṃ gāma’’ntiādinā (saṃ. ni. 1.246) tehi tapparāyaṇatākāraṇassa paveditattā tathā vuttaṃ.

**Ñāti...pe...vasenāti** ettha ñātivaseṇa bhayavaseṇa ācariyavaseṇa dakkhiṇeyyavaseṇāti paccekaṃ ‘‘vasenā’’ti padaṃ yojetabbaṃ. Tattha **ñātivaseṇāti** ñātibhāvavaseṇa. Evaṃ sesesupi. **Dakkhiṇeyyapaṇipātenāti** dakkhiṇeyyatāhetukena paṇipātena. **Itarehīti** ñātibhāvādivasappavattehi tīhi paṇipātehi. **Itarehīti**ādinā saṅkhepato vuttamatthaṃ vitthārato dassetuṃ ‘‘**tasmā**’’tiādi vuttaṃ. **Vandatīti** paṇipātassa lakkhaṇavacanaṃ. **Evarūpanti** diṭṭhadhammikaṃ sandhāya vadati. Samparāyikañhi niyyānikaṃ vā anusāsaṇaṃ paccāsīsaṇto dakkhiṇeyyapaṇipātameva karotīti adhippāyo. **Saraṇagamaṇappabhedoti** saraṇagamaṇavibhāgo.

Ariyamaggoyeva lokuttarasaraṇagamaṇanti āha ‘‘**cattāri sāmāññaphalāni vipākaphala**’’nti. **Sabbadukkhakkhayoti** sakalassa vaṭṭadukkhassa anuppādanirodho. **Etanti** ‘‘cattāri ariyasaccāni, sammappaññāya passatī’’ti (dha. pa. 190) evaṃ vuttaṃ ariyasaccadassanaṃ.

**Niccato anupagamaṇādivaseṇāti** niccanti aggahaṇādivaseṇa. **Aṭṭhānanti** hetupaṭikkhepo. **Anavakāsoti** paccayaṇaṭikkhepo. Ubhayenapi kāraṇameva paṭikkhipatī. **Yanti** yena kāraṇena. **Diṭṭhisampannoti** maggadiṭṭhiyā sampanno sotāpanno. **Kaṅci saṅkhāranti** catubhūmakesu saṅkhatasaṅkhāresu ekasaṅkhāraṃpi. **Niccato upagaccheyyāti** ‘‘nicco’’ti gaṇheyya. **Sukhato upagaccheyyāti** ‘‘ekantasukhī attā hoti arogo paraṃ maraṇā’’ti (dī. ni. 1.76) evaṃ attadiṭṭhivaseṇa sukhato gāhaṃ sandhāyetaṃ vuttaṃ. Diṭṭhivippayuttacittena pana ariyasāvako pariāhavūpasamaṇatthaṃ mattahatthiparittāsito viya cakkhabrahmaṇo ukkārahūmiṃ kaṅci saṅkhāraṃ sukhato upagacchati. Attavāre kaṣiṇādiṇāññattisaṅgahaṇatthaṃ ‘‘saṅkhāra’’nti avatvā ‘‘**kaṅci dhamma**’’nti vuttaṃ. Imesupi vāresu catubhūmakavaseneva paricchedo vedītabbo tebhūmakavaseneva vā. Yaṃ yañhi puthujjano gāhavasena gaṇhāti, tato tato ariyasāvako gāhaṃ vinivētheti. **Mātaraṇti**ādisu janikā mātā, janako pitā, manussabhūto khīṇāsavo **arahāti** adhippeto. Kiṃ pana ariyasāvako aññaṃ jīvītā voropeyyāti? Etampi aṭṭhānaṃ, puthujjanabhāvassa pana mahāsāvajjabhāvadassanaṇatthaṃ ariyasāvakassa phaladīpanatthañcevaṃ vuttaṃ. **Duṭṭhacitto** vadhakacittena paduṭṭhacitto. **Lohitaṃ uppādeyyāti** jīvamānakasaṇīre khuddakamakkhikāya pivanaṃmattampi lohitaṃ uppādeyya. **Saṅghaṃ bhindeyyāti** samānasamvāsakaṃ samānasīmāyaṃ ṭhitaṃ saṅghaṃ ‘kammena uddesena voharanto anussāvanena salākaggāhenā’’ti (pari. 458) evaṃ vuttehi pañcahi kāraṇehi bhindeyya. **Aññaṃ satthāranti** aññaṃ titthakaraṃ ‘‘ayaṃ me satthā’’ti evaṃ gaṇheyyāti **netam ṭhānaṃ vijjatīti** attho.

**Na te gamissanti apāyabhūminti** te buddhaṃ saraṇaṃ gatā tannimittaṃ apāyabhūmiṃ na

gamissanti, **devakāyaṃ** pana **paripūressantī**ti attho.

**Dasahi ṭhānehī**ti dasahi kāraṇehi. **Adhiggaṇhantī**ti adhibhavanti. **Velāmasuttādivasenāpī**ti ettha “caturāsītisahassasaṅkhānaṃ suvaṇṇapātirūpiyapātikaṃsapātīnaṃ yathākkamaṃ rūpiyasuvaṇṇahiraññapūrānaṃ karīsassa catutthabhāvappamāṇānaṃ sabbālaṅkārapaṭimaṇḍitānaṃ caturāsītiyā hatthisahassānaṃ caturāsītiyā assasahassānaṃ caturāsītiyā rathasahassānaṃ caturāsītiyā dhenusahassānaṃ caturāsītiyā kaññāsahassānaṃ caturāsītiyā pallāṅkasahassānaṃ caturāsītiyā vatthakoṭisahassānaṃ aparimāṇassa ca khajjabhojjādibhedassa āhārassa pariccajanavasena sattamāsādhikāni satta saṃvaccharāni nirantaraṃ pavattavelāmamahādānato ekassa sotāpannaṃ dinnadānaṃ mahapphalataraṃ, tato sataṃ sotāpannaṃ dinnadānato ekassa sakadāgāmiṃsa, tato ekassa anāgāmiṃsa, tato ekassa arahato, tato ekassa paccekabuddhassa, tato sammāsambuddhassa, tato buddhappamukhassa saṅghassa dinnadānaṃ mahapphalataraṃ, tato cātuddisaṃ saṅghaṃ uddissa vihārakaraṇaṃ, tato saraṇagamaṇaṃ mahapphalataraṃ”nti imamatthaṃ dīpentassa velāmasuttassa (a. ni. 9.20) vasena. Vuttañhettaṃ “yaṃ gahapati, velāmo brāhmaṇo dānaṃ adāsi mahādānaṃ, yo ekaṃ diṭṭhisampannaṃ bhojeyya, idaṃ tato mahapphalataraṃ”ntiādi (a. ni. 9.20). **Velāmasuttādī**ti **ādi**-saddena aggappasādasuttādīnaṃ (a. ni. 4.34; itivu. 90) saṅgaho daṭṭhabbo.

**Aññāṇaṃ** vatthuttayassa guṇānaṃ ajānaṇaṃ tattha sammoho, “buddho nu kho, na nu kho buddho”tiādinā vicikicchā **saṃsayo**, **micchāññāṇaṃ** tassa guṇānaṃ aguṇabhāvaparikkappanena viparītaggāho. **Ādi**-saddena anādarāgāravadīnaṃ saṅgaho. **Na mahājutikanti** na ujjalaṃ, aparisuddhaṃ apariyodātanti attho. **Na mahāvippahānti** anulāraṃ. **Sāvajjoti** diṭṭhitaṇhādivasena sadoso. Lokiyaṃ saraṇagamaṇaṃ sikkhāsamādānaṃ viya aggahitakālaparicchedaṃ jīvitapariyantameva hoti, tasmā tassa khandhabhedena bhedoti āha “**anavajjo kālakiriyāyā**”ti. **Soti** anavajjo saraṇagamaṇabhedo. Satipi anavajjatte iṭṭhaphalopi na hotīti āha “**aphalo**”ti.

Saraṇagamaṇakathāvaṇṇanā niṭṭhitā.

### Upāsakavidhikathāvaṇṇanā

**Ko upāsakoti** sarūpapucchā, tasmā kiṃlakkhaṇo upāsakoti vuttaṃ hoti. **Kasmāti** hetupucchā. Tena kena pavattinimittena upāsakasaddo tasmīṃ puggale nirulhoti dasseti. **Kimassa silanti** kīdisaṃ assa upāsakassa sīlaṃ, kittakena sīlenāyaṃ sīlasampanno nāma hotīti attho. **Ko ājīvoti** ko assa sammāājīvo, so pana micchājīvassa parivaṇṇanena hotīti sopi vibhajīyati. **Kā vipattīti** kā assa sīlassa, ājīvassa vā vipattī. Anantarassa hi vidhi vā paṭisedho vā. **Kā sampattīti** etthāpi eseva nayo.

**Yo kocīti** khattiyādīsu yo koci. Tena saraṇagamaṇamevettha kāraṇaṃ, na jātiādivisesoti dasseti. **Upāsanaṇoti** teneva saraṇagamaṇena tattha ca sakkaccakāritāya ādaragāravabahuṃānādiyogena payirupāsanaṇato. **Veramaṇiyoti** veraṃ vuccati paṇātipātādīdussīlyaṃ, tassa maṇaṇato hananato vināsanato veramaṇiyo, pañca viratiyo viratippadhānattā tassa sīlassa. Tenevāha tattha tattha “**paṭivirato hotī**”ti.

**Micchāvaṇijjāti** na sammāvaṇijjā ayuttavaṇijjā asārūppavaṇijjā. **Pahāyāti** akaraṇeneva pajahitvā. **Dhammenāti** dhammato anapetena. Tena aññampi adhammikaṃ jīvikaṃ paṭikkhipati. **Samenāti** avisamena. Tena kāyavisamādiduccaritaṃ vajjētvā kāyasamādinā sucaritena jīvaṇaṃ dasseti. **Satthavaṇijjāti** āvudhabhaṇḍaṃ katvā vā kāretvā vā yathākatāṃ vā paṭilabhivā tassa vikkayo. **Satthavaṇijjāti** manussavikkayo. **Maṃsavaṇijjāti** sūnakārādayo viya migasūkarādiḷke posētvā maṃsaṃ sampādetvā vikkayo. **Majjjavaṇijjāti** yaṃ kiñci majjaṃ yojetvā tassa vikkayo. **Visavaṇijjāti** viṣaṃ yojetvā, viṣaṃ gahētvā vā tassa vikkayo. Tattha satthavaṇijjā paroparodhanimittatāya akaraṇīyā vuttā, sattavaṇijjā abhujissabhāvakaraṇato, maṃsavisavaṇijjā vadhaḷetuto, majjavaṇijjā pamādaṭṭhānato.

**Tassevāti** pañcaveramaṇilakkhaṇassa sīlassa ceva pañcamicchāvaṇijjālakkaṇassa ājīvassa ca.

**Vipattīti** bhedo pakopo ca. **Yāyāti** yāya paṭipattiyā. **Caṇḍāloti** upāsakacaṇḍālo. **Malanti** upāsakamalam. **Patikiṭṭhoti** upāsakanihīno. Buddhādīsu kammakammaphalesu ca saddhāvīpariyāyo assaddhiyaṃ micchādhimokkho. Yathāvuttena assaddhiyena samannāgato **assaddho**. Yathāvutta sīlavipattī ājīvavipattivasena **dussīlo**. “Iminā diṭṭhādīnā idaṃ nāma maṅgalaṃ bhavissatī”ti evaṃ bālaṅaparikappitakotūhalasaṅkhātena diṭṭhasutamutamaṅgalena samannāgato **kotūhalamaṅgaliko**. **Maṅgalaṃ paccetīti** diṭṭhamaṅgalādibhedam maṅgalameva pattiyāyati. **No kammanti** kammassakataṃ no pattiyāyati. **Ito bahiddhāti** ito sabbaññubuddhasāsanato bahiddhā bāhirakasamaye. **Dakkhiṇeyyaṃ pariyesatīti** duppaṭipannaṃ dakkhiṇārahasaññī gavesatī. **Pubbakāraṃ karotīti** dānamānanādikaṃ kusalakiriyaṃ paṭhamaṃ karotī. Ettha ca dakkhiṇeyyapariyesanapubbakāre ekaṃ katvā pañca dhammā veditabbā.

Vipattiyam vuttavīpariyāyena **sampatti** nātābbā. Ayaṃ pana viseso – catunnampi parisānaṃ ratijānanaṭṭhena upāsakova ratanaṃ **upāsakaratanam**. Guṇasobhākittisaddasugandhatāhi upāsakova padumaṃ **upāsakapadumaṃ**. Tathā **upāsakapuṇḍariko**.

**Ādimhīti** ādiatthe. **Koṭiyanti** pariyantakoṭiyaṃ. **Vihāraggenāti** ovarakakoṭṭhāsena, “imasmim gabbhe vasantānaṃ idaṃ nāma panasaphalaṃ pāpuṇātī”tiādīnā taṃtaṃvasanaṭṭhānakoṭṭhāsenaṭṭhānāti attho. **Ajjatanti** ajjaiceva attho.

**Pānehi upetanti** iminā tassa saraṇagamanassa āpāṇakoṭīkataṃ dassento “yāva me jīvitaṃ pavattatī”tiādīnā vatvā puna jīvītena taṃ vatthuttayaṃ paṭipūjento “saraṇagamaṃ rakkhāmī”ti uppannaṃ tassa brāhmaṇassa adhippāyaṃ vibhāvento “**ahañhī**”tiādīmāha. **Pānehi upetanti** hi yāva me pāṇā dharanti, tāva saraṇam upetaṃ, upento ca na vācāmattena, na ekavāraṃ cittuppādanamattena, atha kho pāṇe pariccajivāpi yāvajīvaṃ upetanti evamettha attho veditabboti.

Upāsakavidhikathāvaṇṇanā niṭṭhitā.

Bhayabheravasuttavaṇṇanāya līnatthappakāsanā samattā.

## 5. Anaṅgaṇasuttavaṇṇanā

**57. Āyasmā sārīputtoti** ettha **iti**-saddo ādiattho, evamādīkanti attho. Tena “bhikkhū āmantesī”tiādīkaṃ sabbaṃ suttaṃ saṅgaṇhāti. Tenāha “**anaṅgaṇasutta**”nti. Tassa ko nikkhepo? Attajjhāsayo. Parehi anajjhīṭṭhoyeva hi mahāthero imaṃ desanaṃ ārabhi. Keci panāhu “ekacce bhikkhū saṃkiliṭṭhacitte disvā tesam cittasaṃkilesappahānāya ceva ekaccānaṃ āyatim anuppādanāya ca ayaṃ desanā āradhā”ti. **Evaṃ sabbasuttēsūti** yathā ettha anaṅgaṇasutte, evaṃ ito paresūti sabbesupī suttēsū anuttānaapubbapadavaṇṇanā eva karīyati. Tenāha “**tasmā**”tiādī. **Gaṇanaparicchedoti** gaṇanena paricchindanaṃ. Idañhi apparajakkhamahārajakkhatāvasena duvidhe satte paccekaṃ atthaññūtānathaññūtāvasena dvidhā katvā “cattāro”ti anavasesapariyādānaṃ. Vajjīputtakādayo viya puggalavādīti na gahetabbaṃ lokasamaññānusārena atthaṃ paṭivijjhituṃ samatthānaṃ vasena desanāya āradhattā, ayañca desanāyā satthu nissāya evāti dassento “**ayañhī**”tiādīmāha.

## Sammutiparamatthadesanākathāvaṇṇanā

Tattha (a. ni. ṭī. 1.1.170) sammutiyā desanā **sammutidesanā**, paramatthassa desanā **paramatthadesanā**. **Tatthāti** sammutiparamatthadesanāsu, na sammutiparamatthesu. Tenāha “**evarūpā sammutidesanā, evarūpā paramatthadesanā**”ti. Tatrīdaṃ sammutiparamatthānaṃ lakkhaṇaṃ – yasmiṃ bhinne, buddhiyā avayavavinibbhoge vā kate na taṃsamaññā, sā ghaṭapaṭāḍīpabhedā sammuti, tabbīpariyāyato paramattho. Na hi kakkhaḷaphusaṇādisabhāve ayaṃ nayo labbhati, tattha rūpādīdhammaṃ samūhasantānavasena pavattamānaṃ upādāya puggalavohārotī āha “**puggaloti sammutidesanā**”ti. Sesapadesupī eseva nayo. Uppādavayavanto sabhāvadhamaṃ na

niccāti āha “**aniccanti paramatthadesanā**”ti. Esa nayo sesapadesupi. Nanu khandhadesanāpi sammutidesanāva. Khandhaṭṭho hi rāsattṭho, koṭṭhāsattṭho vāti? Saccametam, ayam pana khandhasamañña phassādīsu tajjāpaññatti viya paramatthasannissayā tassa āsannatarā, puggalasamaññādayo viya na dūreti paramatthasaṅgahatā vuttā, khandhasīsenā vā tadupādānā sabhāvadhammā eva gahitā. Nanu ca sabhāvadhammā sabbepi sammutimukheneva desanam ārohanti, na samukhenāti sabbāpi desanā sammutidesanāva siyāti? Nayidamevaṃ desetabbadhammavibhāgena desanāvibhāgassa adhippetattā, na ca saddo kenaci pavattinimittena vinā atthaṃ pakāsetīti.

**Sammutivasena desanam sutvāti** “idhekacco puggalo attantapo hoti attaparitāpānuyogamanuyutto”tiādīnā (ma. ni. 2.413; pu. pa. 10.25 mātikā) sammutimukhena pavattitam desanam sutamayaññāpūpādanavasena sutvā. **Atthaṃ paṭivijjhivāti** tadanūsārena catusaccasaṅkhātā atthaṃ saha vipassanāya maggena paṭivijjhivā. **Mohaṃ pahāyāti** tadekaṭṭhehi kilesehi saddhiṃ anavasesaṃ mohaṃ pajahivā. **Visanti** nibbānasaṅkhātā arahattasaṅkhātāñca visesaṃ. **Tesanti** tādisānaṃ vineyyānaṃ. **Paramatthavasenāti** “pañcimāni, bhikkhave, indriyāni”tiādīnā (saṃ. ni. 5.472-474) paramatthadhammavasena. Sesam anantaranaye vuttasadisameva. **Tatthāti** tassaṃ sammutivasena paramatthavasena ca desanāyaṃ. **Desabhāsākusaloti** nānādesabhāsasu kusalo. **Tiṇṇaṃ vedānanti** nidassanamattaṃ, tiṇṇaṃ vedānaṃ sippagantānampīti adhippāyo sippuggahaṇaṇhi parato vakkhati. Sippāni vā vedantogadhe katvā “**tiṇṇaṃ vedāna**”nti vuttaṃ. **Kathetabbabhāvena ṭhitāni**, na kathaci sannihitabhāvenāti vedānampi kathetabbabhāvene vaṭṭhānaṃ dīpento “guyhā tayī nihitā gayhatī”ti micchāvādaṃ paṭikkhipati. Nānāvidhā desabhāsā etesanti **nānādesabhāsā**.

Paramo uttamo attho **paramattho**, dhammānaṃ yathābhūtasabhāvo. Lokasaṅketamattasiddhā **sammuti**. Yadi evaṃ kathaṃ sammutikathāya saccatātiāha “**lokasammutikāraṇā**”ti, lokasamaññaṃ nissāya pavattanato. Lokasamaññāya hi abhinivesena vinā nāpanā ekaccassa sutassa sāvanā viya na musā anatidhāvītābato tassā. Tenāha bhagavā “janapadaniruttiṃ nābhiniveseyya, samaññaṃ nātidhāveyyā”ti (ma. ni. 3.332). **Dhammānanti** sabhāvadhammānaṃ. **Bhūtakāraṇāti** yathābhūtasabhāvaṃ nissāya pavattanato. **Sammutiṃ voharantassāti** “puggalo satto”tiādīnā lokasamaññaṃ kathentassa.

**Hirōttappadīpanatthanti** lokapālanakicce hirōttappadhamme kiccatō pakāsetuṃ. Tesāhi kiccaṃ sattasantāneyeva pākātaṃ hotīti puggalādhiṭṭhānāya kathāya taṃ vattabbaṃ. Esa nayo sesesupi. Yasmiñhi cittuppāde kammaṃ uppannaṃ, taṃsantāne eva tassa phalassa uppattī **kammassakatā**. Evañhi kataviññānaṃ akatāgamo vā natthīti sā puggalādhiṭṭhānāya eva kathāya dīpetabbā. Tehi sattehi kātabbā puññādikiriya **paccattapurisakāropi** santānavasena nipphādetabbato puggalādhiṭṭhānāya eva kathāya dīpetabbo.

**Ānantariyadīpanatthanti** cutianantaraṃ phalaṃ anantaraṃ nāma, tasmim anantare niyuttāni, tannibbattanena anantarakaraṇasīlāni, anantarapayojanāni vāti **ānantariyāni**, mātughātādīni, tesam dīpanatthaṃ. Tānīpi hi santānavasena nipphādetabbato “mātaraṃ jīvitā voropetī”tiādīnā (paṭṭhā. 1.1.423) puggalādhiṭṭhānāya eva kathāya dīpetabbāni, tathā “so mettāsahagatena cetasā ekaṃ disaṃ pharivā viharatī”tiādīnā (dī. ni. 1.556; 3.308; ma. ni. 1.77; 2.309; 3.230; vibha. 642, 643) “so anekavihitam pubbenivāsaṃ anussarati ekampi jāti”ntiādīnā (dī. ni. 1.244, 245; ma. ni. 1.148, 384, 431; pārā. 12) “atthi dakkhiṇā dāyakato visujjhati, no paṭiggāhakato”tiādīnā (ma. ni. 3.381) ca pavattā **brahmavihārapubbenivāsadakkhiṇāvisuddhikathā** puggalādhiṭṭhānāya eva kathāya dīpetabbā sattasantānavisayattā. “Aṭṭha purisapuggalā (saṃ. ni. 1.249), na samayavimutto puggalo”tiādīnā (pu. pa. 1) ca paramatthaṃ kathentopī lokasammutiyā appahānatthaṃ puggalakathaṃ kathesi. Etena vuttāvasesāya kathāya puggalādhiṭṭhānabhāve payojanaṃ sāmāñnavasena saṅgahitanti daṭṭhabbaṃ. Kāmañcetaṃ sabbam apariññātavatthukānaṃ vasena vuttaṃ, pariññātavatthukānampi pana evaṃ desanā sukhāvahā hoti.

**Mahājanoti** lokiyamahājano. **Na jānāti** ghanavinibbhogābhāvena dhammakiccasa

asallakkhaṇena. Tattha “kiṃ nāmetam, katham nāmeta”nti saṃsayapakkhandatāya **sammohaṃ apajjati**. Viruddhābhinivesitāya **paṭisattu hoti. Jānāti** ciraparicitatthā vohārakathāya. Tato eva na **sammohamāpajjati**, na paṭisattu hoti.

**Nappajahanti** vohāramukhena paramatthassa dīpanato. Samaññāgahaṇavasena lokena ñāyati samaññāyati voharīyatīti lokasamaññā, tāya **lokasamaññāya**. Tassa tassa atthassa vibhāvane lokena nicchitam, niyatam vā vuccati voharīyatīti lokanirutti, tassaṃ **lokaniruttiyaṃ**. Tathā lokena abhilapīyatīti lokasamaññatāya lokābhilāpo, tasmim **lokābhilāpe ṭhitāyeva** appahānato. Puggalavādino viya **paramatthavasena aggahetvā**.

**Santoti** ettha **santasaddo** “dīghaṃ santassa yojana”ntiādīsu (dha. pa. 70) kilantabhāve āgato, “ayañca vitakko ayañca vicāro santā honti samitā”tiādīsu (vibha. 576) niruddhabhāve āgato, “adhigato kho myāyaṃ dhammo gambhīro duddaso duranubodho santo paṇīto”tiādīsu (dī. ni. 2.67; ma. ni. 1.281; 2.337; saṃ. ni. 2.172; mahāva. 7) santaññāgocarātāya, “upasantassa sadā satimato”tiādīsu (udā. 27) kilesavūpasame, “santo have sabbhi pavedayanti”tiādīsu (dha. pa. 15) sādhusu, “pañcime, bhikkhave, mahācorā santo saṃvijjamānā”tiādīsu (pārā. 195) atthibhāve, idhāpi atthibhāveyyeva. So ca puggalasambandhena vuttatā lokasamaññāvasenāti dassento “**lokasañketavasena atthī**”ti āha. **Atthīti** cetam nipātapadam daṭṭhabbam “atthi imasmim kāye kesā”tiādīsu (dī. ni. 2.373-374; ma. ni. 1.110; 3.154; a. ni. 6.29; 10.60) viya. **Samvijjamānāti** padassa attham dassento “**upalabbhamānā**”ti āha. Yañhi saṃvijjati, tam upalabbhatīti. Aṅganti etehi taṃsamaṅgipuggalā nihīnabhāvaṃ gacchantīti **aṅgaṇāni**, rāgādayo. Añjati makkhetīti **aṅgaṇam**, malādi. Añjeti tattha ṭhitam ahundaratāya abhīyañjetīti **aṅgaṇam**, vivaṇo bhūmipadeso. Dosādīnam pavattīākāravisesatāya nānappakārā bahulappavattiyā **tibbakilesā. Pāpakānanti** lāmakānam. **Akusalānanti** akosallasambhūtānam. **Ichhāvacarānanti** icchāvasena pavattānam. **Saha aṅgaṇenāti** aṅgaṇanti laddhanāmena yathāvuttakilesena saha vattati.

**Atthītipi na jānāti** tādisassa yonisomanasikārassa abhāvā. Yesam kilesānam atthitā, tesam sappatibhayatā visesato jānitabbāti dassetuṃ “**ime kilesā nāmā**”tiādi vuttam. Tattha **kakkhaḷāti** pharusā. **Vāḷāti** kururā. **Na gahitabbāti** na uppādetabbā. **Yāthāvasarasatoti** yathābhūtasabhāvato. **Evañcāti** “ime kilesā nāmā”tiādinā vuttappakārena. **Yena vā tena vāti** navakammesu vā pariyattidhutaṅgādīsu vā yena vā tena vā. **Tatrāti** niddhāraṇe bhummaṃ. Tam pana niddhāraṇam saṅgaṇānaṅgaṇasamudāyatoti dassento “**catūsu puggalesū**”ti vatvā puna tadekadesato dassento “**tesu vā dvīsu sāṅgaṇesū**”ti āha. Tañhi dvayaṃ paṭhamam hīnasetṭhabhāvena niddhārīyati paṭhamam uddiṭṭhattā. Niddhāraṇañhi kvaci kutoci kenaci hotīti.

**58.** Kiñcāpi aññattha “janako hetu, pariggāhato paccayo, asādhāraṇo hetu, sādāraṇo paccayo, sabhāgo hetu, asabhāgo paccayo, pubbakālīko hetu, sahappavatto paccayo”tiādinā hetupaccayā vibhajja vuccanti, idha pana “cattāro kho, bhikkhave, mahābhūtā hetū, cattāro mahābhūtā paccayā rūpakkhandhassa paññāpanāyā”tiādīsu (ma. ni. 3.85) viya hetupaccayasaddā samānatthāti dassetuṃ “**ubhayenapi kāraṇameva pucchati**”ti vuttam. Tattha **ubhayenāti** hetupaccayavacanadvayena. **Pucchati** āyasmā mahāmogallāno desanam vaḍḍhetukāmo. **Kiñcāpīti** anujānanasambhāvanatthe nipāto. Kiṃ anujānāti? Samānapi dvinnam sāṅgaṇabhāve tassā pajānanāppajānanahetukatam tesam setṭhahīnatam. Kiṃ sambhāveti? Therassa vicittapaṭibhānatāya nānāhetūpamāhi alaṅkatvā yathāpucchitassa atthassa pākāṭakaraṇam. Tenāha “**nappajānāti**”tiādi. **Hetu ceva paccayo ca** setṭhahīnabhāve. Tathāakkhātabbatāpi hi tesam tannimittā evāti.

**59.** Tanti tesam dvinnam puggalānam hīnasetṭhatāya kāraṇam. Opammehi **pākāṭataram katvā dassetuṃ. Etanti** sutte anantaram vuccamānam vīriyārambhābhāvena aṅgaṇassa appahānam. Tenāha “**na chandam...pe... sandhāyāhā**”ti. **Kattukamyatāchandhanti** kattukamyatāsañkhātām aṅgaṇassa pahātukamyatāvasena uppajjanakakusaladhammacchandam. **Na janessatīti** na uppādessati. Kusalo vāyāmo nāma chandato balavāti āha “**tato balavataram vāyāmam na karissatī**”ti, chandampi



anuppādentō kathaṃ tajjaṃ vāyāmaṃ karissatīti adhippāyo. **Thāmagatavīriyaṃ** ussoḥhībhāvappattaṃ dalhaṃ vīriyaṃ. Sāṅgaṇaggahaṇeneva aṅgaṇānaṃ kilesavatthutāya cittaṣṣa saṃkiliṭṭhatāya saddhāya puna saṃkiliṭṭhaggahaṇaṃ savisesaṃ kiliṭṭhabhāvavibhāvananti āha “**suṭṭhutaṃ kiliṭṭhacitto**”ti. **Malinacittoti**ādisupī “tehiyevā”ti ānetvā sambandhitabbaṃ. Ukkhalipucchanacolaṅkassa viya vasāpītapilotikā viya ca dummocanīyabhāvena malaggahaṇaṃ **malīnatā**, pīḷanaṃ hiṃsanaṃ avipphārikatākaraṇaṃ **vibādhanam** darathapariḷāhuppādanena paridhanaṃ upatāpanaṃ, **kālanti** kālanaṃ, yathāgahitassa attabhāvassa khepanaṃ āyukkhaṇanti attho. **Karissatīti** pavatessati, pāpuṇissatīti vuttaṃ hoti. Tathābhūto ca paṇaṃ cajjissati nāmāti āha “**marissati**”ti.

**Seyyathāpīti** upamānidassane nipāto. Tadatthaṃ dassento “**yathā nāmā**”ti āha. **Pamsuādināti ādi**-saddena jallādīnaṃ saṅgaho, **ghaṃsanādīhīti ādi**-saddena chārikāparimajjanādīnaṃ saṅgahoti. “Abhirūpāya kaññā dātabbā”tiādīsu viya antarenapī atisayatthabodhakasaddena atisayattho ñāyatīti āha “**malaggahitatarāti vuttaṃ hoti**”ti. **Paṭipucchāvacaṇanti** anumati-pucchāviseso. **Evaṃ kariyamānāti** aparibhoga-apariyodapanarajopathanikkhipanehi kiliṭṭhabhāvaṃ āpādiyamānā. **Opammaṃ sampaṭipādentoti** yathūpanītaṃ upamaṃ upameyyatthena samaṃ katvā paṭipādentō, saṃsudentoti attho. **Sāṅgaṇo puggaloti** sāṅgaṇo tasmīṃ attabhāve asujjhanakapuggalo. Āpaṇādito kulagharaṃ ānītaṣṣa malaggahitakaṃsabhājanassa tatha laddhabbāya visuddhiyā alābhato yathā anukkamena saṃkiliṭṭhatarabhāvo, evaṃ gharato nikkhantassa puggalassa pabbajjāya laddhabbāya visuddhiyā alābhato anukkamena saṃkiliṭṭhatarabhāvoti dassento “**saṃkiliṭṭhakaṃsapātiyā**”tiādīmāha. Saṃkiliṭṭhatarabhāvo ca nāma pabbajitassa ājīvavipattivasena vā siyā ācāradiṭṭhisīlavipattīsu aññataravasena vāti taṃ sabbaṃ saṅgahetvā dassetuṃ “**tassa puggalassā**”tiādī vuttaṃ. Pācittiyavītikkaṃanaggahaṇena hi ekaccadiṭṭhivipattiyāpi saṅgaho hotīti. **Ettha ṭhitassāti** etissaṃ ājīvavipattiyāṃ ṭhitassa. Iminā nayena sesesupī yathārahaṃ vattabbaṃ. Sabbaparisasādhāraṇā mahātherassa desanā, tasmā gahapativasenapī yojetabbaṃ. Tatha ukkaṃsagatasāṃkiliṭṭhatarabhāvaṃ dassento “**mātughātādīnantariyakaraṇa**”nti āha. **Avisodhetvāti** yathā attano sīle vā diṭṭhiyā vā visuddhi hoti, evaṃ kilesamalinacittasāntānaṃ avisodhetvā.

**Bhabbapuggaloti** upanissayādisampattiyā tasmīṃ attabhāve visuddhapuggalo. **Ādiṃ katvāti** iminā dhovanaghaṃsanādīhi pariyoḍapanāṃ ādimantaṃ katvā vadati. **Suddhaṭṭhānaṃ** yattha vā na rajena okiriyati. **Daṇḍakammaṃ katvāti** “ettakā udakā, vālukā vā ānetabbā”ti daṇḍakammaṃ katvā. **Ettha ṭhitassāti** parisuddhe sīle ṭhitassa. Sammāvattapaṭipattisīlehi sīlavissuddhi dassitā. Vattapaṭipattiyāpi hi aṅgaṇānaṃ vikkhambhanaṃ siyā. Tathā hissā saṃkiliṭṭhakaṃsapātiyā parisuddhapariyoḍātabhāvo upamābhāvena vutto. **Pantasenāsanavāso** kilesavikkhambhanaṃ kilesānaṃ tadaṅganivāraṇaṃ. **Sotāpatti-phalādhigamo...pe... arahattasacchikiriyāti** sattasupī ṭhānesu “parisuddhapariyoḍātabhāvo viyā”ti padaṃ ānetvā sambandhitabbaṃ. Pabbajitassa hi visuddhi nāma heṭṭhimantena sīlavissuddhiyā vā siyā kammaṭṭhānānuoyogavasena vivekavāsenā jhānassādhigamena vā vipassanābhāvanāya vā sāmāññaphalādhigamena vāti.

**Rāgaṭṭhāniyanti** rāgupattihetubhūtaṃ. Visabhāgārammaṇaṃ sandhāya vadati “**iṭṭhārammaṇa**”nti. **Tasmīnti iṭṭhārammaṇe**. **Vipannassatīti** muṭṭhassati. **Taṃ nimittanti** subhanimittaṃ. **Āvajjissatīti** ayoniso āvajjissati. **Sayameva** aññena avomisso. Kusalavārapacchindanameva cettha **anuddhaṃsanaṃ** daṭṭhabbaṃ. **Sesanti** “sāṅgaṇo saṃkiliṭṭhacitto”tiādī. **Vuttanayānusārenāti** paṭhamavāre vuttanayānusārena. **Sabbanti** mātughātādīnantariyakaraṇapariyoḍānaṃ sabbaṃ upamāsaṃsandanaṃ.

**Ativirahābhāvatoti** satisammosābhāvato, upaṭṭhitassati bhāvatoti attho. **Sesanti** “so arāgo”tiādī. “Dhovanaghaṃsanasaṅhachārikāparimajjanādīhi”tiādīnā **duṭṭiyavārānusārena**. “Ko nu kho”tiādī pucchāvasena āgataṃ, idaṃ nigamaṇavasenāti ayameva viseso.

**60. Aṅgaṇanti** tatha tatha nāmato eva vibhāvitaṃ, na pana sabhāvato, pabhedato vāti sabhāvādito

vibhāvanam sandhāyāha “**nānappakārato pākaṭam kārāpetukāmenā**”ti. **Ichhāya avacarānanti** icchāvasena avacaraṇānam. **Otiṇṇānanti** cittasantānam anupaviṭṭhānam. Te pana tattha paccayavasena nibbattattā pavattā nāma hontīti āha “**pavattāna**”nti. **Nānappakārānanti** visayabhedena pavattiākārabhedena ca nānāvidhānam. **Yenakāraṇena**. Na kevalam lābhatthikatā eva, atha kho puññavantatā sakkatagarukatā ca ettha kāraṇabhāvena gahetabbāti dassento “**pakatīyāpi cā**”tiādimāha. Tena lābhatthikopi na yo koci evam cittaṃ uppādeti puññavā sambhāvanīyoti dasseti. **Therā** avajjapaṭicchādanabhayena **majjhimānam ārocenti**, tathā majjhimā **navakānam**, navakā pana attano navakabhāvena **vighāsādādinam ārocenti** “passatha tumhākaṃ therassa kamma”nti. Vighāsādādayo nāma “īdisassa santike ovādattham tumhe āgatā”ti **bhikkhunīnam ārocenti**. **Na ca maṃ bhikkhū jāneyyunti** na ca vata maṃ bhikkhū jāneyyum, aho vata maṃ bhikkhū na jāneyyunti yojanā. **Thānam kho panetanti** ettha **kho**-saddo avadhāraṇattho, **pana**-saddo vacanālaṅkāroti āha “**atthiyevā**”ti. **Pubbe** icchuppādavāraṇānāya **vuttanayena**. **Iti**-saddo idha āsannakāraṇattho ti tam dassento “**iminā kāraṇenā**”ti āha. **Idaṅca** kopaappaccayānameva gahaṇam. **Tādisānanti** kopaappaccayādhibhūtānanti adhippāyo.

**Anurahoti** anurūpe rahasi. Evameva hi attham dassetuṃ “**vihārapaccante**”tiādi vuttam. **Purimasadisamevāti** “lābhatthiko hī”tiādinā vuttana purimena yojanāyena sadisameva.

Codanāya paṭipuggalabhāvo, codanā ca āpattiyāti cuditakena codakassa samānabhāvo āpattīāpannaṭyāti āha “**samānoti sāpattiko**”ti. Sappaṭipuggalenevassa codanicchāya kāraṇam vibhāvetuṃ “**aya**”ntiādi vuttam. Na cāyam sāpattikatāya eva samānatam icchati, atha kho aññathāpīti dassento “**apicā**”tiādimāha. Aññena vā paṭipuggalena **sappaṭipuggalo**. Ayañhi “sappaṭipuggalova maṃ codeyyā”ti icchati “evāham tassa paṭipuggalehi saddhiṃ ekajjhāsayo hutvā tassa upari kiñci vuttam kātum vā labhissāmi”ti **maññamāno**. Imasmim pana pakkhe **no appaṭipuggaloti** natthi etassa paṭipuggaloti **appaṭipuggaloti** evamattho veditabbo.

“Aho vatā”ti idam padaṃ dissatīti sambandho, imassa puggalassa icchācāre ṭhitattā bhikkhūnam dhammam deseyyāti vacanato “**taṅca kho anumati pucchāyā**”ti vuttam. Na hesa “saccam kira tvam bhikkhū”tiādinā kiñci vītikkamaṃ uddissa bhagavatā pucchitabbatam icchati. **No maggam vā phalam vā vipassanam vā antaram katvāti** maggabhāvanam vā phalasacchikiriyam vā sikhāpattavipassanānuyogam vā nirodhasamāpajjanam vā jhānasamāpajjanameva vā antaram kāraṇam katvā bhagavatā attānam paṭipucchitabbam no icchati. **Niccām aniccantiādinā** anumattiggahaṇavasena pucchitabbam icchati, uttānameva katvā pucchitabbam icchatīti attho. Upaharante passatīti sambandho. Abhabbaṭṭhānabhikkhutāya **niharissanti** sāsanato.

**Tam sampattinti** parivārasampattiñceva bhikkhūhi kariyamānam sakkāragarukārasampattiñca. **Gahetvā paribhuñjanti** mayā samvibhāge kariyamāne. **Sayameva paññayātīti** sayameva gantvā bhikkhūnam purato attānam dasseti, purato vasantaṃ pana bhikkhu purakkhatvā gacchantiyevāti adhippāyo.

**Dakkhiṇodakanti** aggato upanīyamānam dakkhiṇodakam. Yato eva-kāro, tato aññattha niyamo icchito. Avadhāraṇattham vā eva-kāraggahaṇanti katvā **ahameva labheyanti** aham labheyamevāti evametam avadhāraṇam daṭṭhabbanti adhippāyenāha “**ahameva labheyanti icchā nātimahāsāvajjā**”ti, aññathā yathārutavasena avadhāraṇe gayhamāne “na aññe labheyyu”nti ayamevettha attho siyāti. **Pāsādiko hotīti** idam tassa aggāsānādipaccāsīsanāya kāraṇadassanam.

**Anumodananti** maṅgalāmaṅgalesu anumodanāvasena pavattetabbadhammakatham. **Khaṇḍānumodananti** anumodanekadesam. “Pubbe anumoditapubbo anumodatū”ti avatvā **therena vuttamatteyeva**.

**Tādisesu ṭhānesūti** tādisesu pesalānam bahussutānam vasanaṭṭhānesu. Sabbampi ratim pavattanato

**sabbarattikāni. Vinicchayakusalānanti** anekavihitesu kaṅkhaṭṭhāniyesu kaṅkhāvinayanāya taṃ taṃ pañhānaṃ vinicchaye kusalānaṃ chekānaṃ. Tesu tesu dhammakathikesu ajjhiṭṭhesu vārena dhammaṃ kathentesu “ayaṃ byatto”ti dhammajjesakena ajjhiṭṭhattā **okāsaṃ alabhamāno**.

**Sakkaccaṅca kareyyunti** bhikkhū yaṃ mama abhivādanapaccuṭṭhānañjalikammaśāmicikammādiṃ karonti. Taṃ ādareneva kareyyuṃ, yaṅca me parikkhārajātaṃ paṭiyādentī, tampi sundaraṃ sammadeva abhisāṅkhatāṃ kareyyunti attho. **Bhāriyanti** pāsāṅcchattaṃ viya garukātabbaṃ. **Etam vidhinti** etaṃ “sakkareyyu”ntiādinā vuttasakkārādividhiṃ. **Tena** tena kāraṇena, bāhusaccādiguṇavisesavato eva sakkārādīnaṃ arahattāti attho. **Evarūpanti** idisaṃ “piyo garū”tiādinā (a. ni. 7.37) vuttappakāraṃ. **Evam kareyyunti** evaṃ “sakkareyyu”ntiādinā vuttappakāraṃ sakkārādiṃ kareyyuṃ. **Esa nayoti** yoyaṃ bhikkhuvāre vuttavidhi, eseva nayo. **Ito paresu** bhikkhunivārādīsu **vāresu**.

**Ahameva lābhī assanti** etthāpi heṭṭhā vuttanayeneva avadhāraṇaṃ gahetabbaṃ. Piṇḍapātassa pañītātā upasecanādivasenāti āha “**sappitelamadhusakkharādipūritāna**”nti. **Mañcapīṭhādīnanti** nidassanamattaṃ utusappāyānaṃ nivātānaṃ phassitatalānaṃ pihitadvāraṅkaṃ vālavātapānādīnampi pañītasenāsanabhāvato. **Ādi-saddena** vā tesampi gahaṇaṃ daṭṭhabbaṃ. **Sabbatthāpīti** sabbesu tesu catūsūpi paccayavāresu.

**61. Kāyakammaṃ disvāti** idaṃ na kāyakammaṃ cakkhuvīññeyyaṃ, kāyakammunā pana saha pavattaṃ oṭṭhaparipphandaṃ bhākuṭikaraṇaṃ kāyaṅgādiddassanaṃ kāyakammadassanaṃ viya hotīti katvā vuttaṃ. **Vacikammaṃ sutvāti** etthāpi eseva nayo, tasmā kāyavikārajanakā dhammā “dissanti”ti vuttā, vacīvikārajanakā “sūyanti”ti. Tato eva ca te **paccakkhakāle** sammukhakāle **dissanti** nāma. **Tirokkhakāle** asammukhakāle **sūyanti** nāma. Anurūpato gahaṇaṃ **anuggaho**. **Āraññikattanti** tassa bhikkhuno dhutaṅṅaṇānūrūpato gaṇhāti. Tenāha “**āraññikattaṃ anuggaṇhāti**”ti. Araññe nivāso assāti **āraññiko**. Pantaṃ pariyaṅgaṃ dūrataṃ senāsaṇaṃ assāti **pantaseṇāsano**. Taṃ pana atthamattena dassentena “**pantaseṇāsane vasati**”ti vuttaṃ. Bhikkhāsaṅkhātānaṃ piṇḍānaṃ pāto piṇḍapāto, taṃ piṇḍapātaṃ uñchati gavesatīti **piṇḍapātiko**. Piṇḍāya patituṃ carituṃ vatametassāti vā piṇḍapātī, so eva **piṇḍapātiko**. Dānato avakhaṇḍanato apetaṃ apadānaṃ, saha apadānena sapaḍānaṃ, anavakhaṇḍanaṃ. Anugharaṃ caraṇasīlo **sapaḍānacārī**. Unnatabhāvena paṃsukūlaṃ viya paṃsukūlaṃ, paṃsu viya vā kucchitabhāvaṃ ulati gacchatīti paṃsukūlaṃ, tassa dhāraṇaṃ idha paṃsukūlaṃ, taṃ sīlamassāti **paṃsukūliko**.

**Tīhi kāraṇehi lūkhaṃ veditabbaṃ** agghaphassavaṇṇaparīhānito apāṃsukūlampi, ko pana vādo paṃsukūlanti adhippāyo. **Thūladīghasuttakenāti** thūlena olambamānena dīghasuttakena. **Vaṇṇenāti** ettha phassenapi pariḥāyatīti vattabbaṃ. Tañhi tattha kharaphassampi hotiyevāti. Kasmā pana pālīyaṃ āraññikādiggahaṇena cattārova dhutaṅṅaṇā vuttāti? Padhānattā, taggahaṇeneva ca ito paresampi sukharipibhogatāya gahaṇasambhavato. Yo hi āraññiko pantaseṇāsano, tassa abbhokāsika-rukkhamūlika-nesajjika-yathāsanthatika-sosānikaṅgāni supariḍānāni. Yo ca piṇḍapātiko sapaḍānacārī ca, tassa pattapiṇḍikakhalupacchābhattikaekāsaniṅgāni. Yo pana paṃsukūliko, tassa tecīvarikaṅgaṃ supariḥaramevāti. Padhānattā hi bhagavatāpi “kadāhaṃ nandaṃ passeyyaṃ, āraññaṃ paṃsukūlika”ntiādinā (saṃ. ni. 2.242; netti. 100) tattha tattha āraññikādayo eva gayhanti. **Ettakāti** pālīyaṃ āgatānaṃ paricchiḍḍiya gahaṇametaṃ, na ettakā sabbepi ekassa ekaṃsato sambhavanti, nāpi ettakāyeva pāpadhammā pahātābbā. Na hi makkhapaḷāsādīnaṃ appahīnabhāvepi **sabrahmacārī neva sakkarontī...pe... na pūjentīti**.

**Tamatthanti** “yassa kassacī”tiādinā vuttamatthaṃ. **Upamāya pākaṭaṃ karontoti** anvayato byatirekato ca udāharaṇena vibhāvento. **Ahikuṇapādīnaṃ atipaṭikūlajigucchaniyatā** ativiya duggandhatāya. Sā ca ahīnaṃ tikhiṇakopatāya, kukkuramanussānaṃ odanakummāsūpacayatāya sarīrassa hotīti vadanti. **Imesanti** ahiādīnaṃ. **Vaḍḍhetvāti** uparūpari khipanena racitaṃ katvā. Taṃ pana vaḍḍhitānaṃ tena ca bhājanaṃ pūritaṃ hotīti āha “**vaḍḍhetvā paripūretvā**”ti. Janassa dassanayogyāṃ dassanīyaṃ **jaññaṃ**, taṃ paramaparisuddhaṃ manoharaṅgaṃ hotīti āha “**cokkhacokkha**”nti.

Abhinavanivittihā mahāmātā **vadhukā**. Sā pana puttalābhayogyatam upādāya maṅgalavacanena “janī”ti vuccati, tassā niyyamānaṃ paṇṇākāraṃ janiyā haratīti **jaññaṃ**. **Ubhayatthāti** atthadvaye. **Punaruttanti** āmedītavacanamāha. Na manāpaṃ etassāti amanāpo, tassa bhāvo **amanāpatā**, tathāpavatto cittuppādoti āha “**amanāpaṃ idanti...pe... adhvācana**”nti. Buddhavesattā liṅgassa **parisuddhakamapātisadisakā**. **Kuṇaparacanaṃ viya** icchāvācarehi santānassa bharitabhāvo. So pana tesam appahīnatāyāti āha “**icchāvācarānaṃ appahāna**”nti.

**62.** “Tena gāmantavihāraṃ anuggaṇhātī”ti vattabbe “**āraññikatta**”nti pana potthake likhitaṃ. Na hi sukkaṃpakkhe pāliyaṃ āraññikaggahaṇaṃ atthi, sati ca icchāvācarappahāne gāmantavihāro ekantena na paṭikkhipitabbo, icchitabbova tādisānaṃ uttarimanussadhammapaṭicchādanato. Tathā hi vakkhati “**appicchātāsamuṭṭhānehi**”tiādi. **Sālivarabhattaracanaṃ viya icchāvācarappahānaṃ** manuññabhāvato tittihetuto ca.

**63. Maṃ tanti** ca upayogavacanam paṭi-saddayogena, attho pana sampadānamevāti āha “**mayhaṃ tuyha**”nti ca. “**Samaye**”ti **bhummatthe** “samaya”nti **upayogavacanam**. Gijjhakūṭapaṇḍavaisigilivebhāravapullapabbatānaṃ vasena **samantato giriparikkhepena**. **Rājagaheti samīpatthe** bhumavacananti āha “**taṃ nissāya viharāmi**”ti.

**Purāṇayānakāraputtoti** purāṇe pabbajitāto pubbe yānakāraputto tathāpaññāto. **Jimhanti** gomuttakuṭilaṃ. Tenāha “**sappagatamaggasādisa**”nti. **Soti** paṇḍuputto. **Itaroti** samiti. **Cintitaṭṭhānamevāti** cintitacintitaṭṭhānameva tacchati, tañca kho na tassa cittānusārena, atha kho attano suttānusārena tacchanto yānakāraputto. **Cittanti** attano cittaṃ mama cittaṃ jānitvā viya.

“Na saddhāya pabbajito”ti imināva kammaphalasaddhāya abhāvo nesam pakāsītōti āha “**assaddhāti buddhadhammasaṅghesu saddhāviraḥitā**”ti. Pabbajitānaṃ jīvika attho etesanti **jīvatthā**. Tenāha “**iṇabhayādīhi**”tiādi. **Kerāṭikaṃ** vuccati sāṭheyyaṃ. Sāṭhānaṃ guṇavāṇijakānaṃ kammaṃ sāṭheyyanti āha “**sāṭheyyāñhi**”tiādi. Tucchasabhāvena māno naḷo viyāti naḷo, mānasāṅkhāto uggato naḷo etesanti **unnaḷā**. Tenāha “**uṭṭhitatucchamānā**”ti. Lahukatāya vā **capalā**. Pharusavacanatāya **kharavacanā**. Tiracchānakathābahulatāya **niratthakavacanapalāpino**. **Asaṃvutakammadvārāti** idaṃ kammadvārādīnaṃ asaṃvutabhāvo uppattidvārānaṃ asaṃvutatāya eva hotīti katvā vuttaṃ. Atha vā **chasa indriyesūti** nimitte bhummaṃ, chasa indriyesu nimittabhūtesu asaṃvutakammadvārāti attho. **Yā mattāti** bhojane ayuttapariyesana-ayuttapaṭiggahaṇa-ayuttapariyogevā vajjetvā yuttapariyesana-yuttapaṭiggahaṇa-yuttapariyogevā sāṅkhātā yā mattā appamattehi **jānitabbā**. Tenāha “**yuttatā**”ti. **Jāgareti** rattindivaṃ āvaraṇiyehi dhammehi cittaṃ parisodhanasāṅkhāte jāgare. Tesam jāgaritāya adhisīlasikkhāya gāvararāhitānaṃ itarasikkhāsu paṭiṭṭhā eva natthīti dassento “**sikkhāpadesu bahulagāravā na hontī**”ti vatvā tameva gāravābhāvaṃ sarūpena vibhāvento “**āpattivīkkamabahulā**”ti āha.

Pakatiyāpi siddhāya ratanattayasaddhāya kammaphalasaddhāya ca **saddhā**. **Pivanti maññe** yathā taṃ dravabhūtaṃ amataṃ laddhā. **Ghasanti maññe** yathā taṃ bahalapiṇḍikasudhābhōjanaṃ laddhā. **Attamanavācaṃ nicchārentā** “sādhu sādhu”ti. Tameva pana sādhuṅkāraṃ hadaye ṭhapetvā **abbhanumodantā**. Ettha ca attamanavācānicchāraṇaṃ pivanasadisam katvā vuttaṃ bahiddhābhāvato, manasā abbhanumodanaṃ pana abbhantarabhāvato ghasanasadisam vuttaṃ. Saṅkhādanajjhoharaṇaṇi ghasananti. Rassaṅca ekavācānaṃ hotīti āha “**rasse sati sārīputtassa upari hotī**”ti. Dīghaṅca bahuvācānaṃ hotīti āha “**dīghe sati sabrahmacārīna**”nti. “Upari hotī”ti ānetvā sambandho. **Ālasiyabyasanādīhīti** ālasiyena vā nātibyasanādīhi vā. “**Mahānāgāti vuccanti**”ti vatvā tattha kāraṇaṃ vibhāvento “**tatrā**”tiādimāha. Tattha “na gacchantīti nāgā, na āgacchantīti nāgā, na āgum karontīti nāgā”ti yo vividho vacanatto icchito, taṃ vicāretvā dassetuṃ “**chandādīhi**”tiādi vuttaṃ, taṃ pana ñeyyāvabodhāya vacanato appamattakāraṇaṃ.

Sayameva **āgum na karoti** sabbathā maggena pahīnāguttā. So kāmayogādike **sabbasaṃyoge**

dasavidhasaṃyojanappabhedāni ca sabbabandhanāni **visajja** jahitvā **sabbattha** yakkhādīsu, sabbesu vā bhavesu kenaci saṅgena **na sajjati** tīhi ca vimuttīhi **vimutto**, tato eva iṭṭhādīsu tādibhāvappattiyā **tādi**, so vuttalakkaṇena **tathattā** taṃsabhāvattā **nāgo pavuccateti** attho veditabbo. Tenāha “**evamettha attho veditabbo**”ti. **Aññehi khīṇāsavanāgehi** aggasāvakattā guṇavisesayogato **pujjatarā ca pāsamsatarā ca. Samaṃ anumodisunti** aññamaññassa subhāsītato sampañcchanena samappavattamodatāya samaṃ sadisaṃ abbhanumodiṃsu. Taṃ pana samanumodanaṃ “**tatthā**”tiādinaṃ pāḷivaseneva dasseti.

Sammutiparamatthadesanākathāvaṇṇanā niṭṭhitā.

Anaṅgaṇasuttavaṇṇanāya līnatthappakāsanā samattā.

## 6. Ākaṅkheyyasuttavaṇṇanā

**64. Sampannanti** paripuṇṇaṃ, samantato pannaṃ pattanti sampannaṃ. Tenāha “**idaṃ paripuṇṇasampannaṃ nāmā**”ti. Nanti “**suvā**”ti vuttaṃ suvagaṇaṃ. **Sampannoti** sammadeva pannaṃ gato upagato. Tenāha “**samannāgato**”ti. **Sampannanti** sampattiyuttaṃ. Sā panettha rāsasampatti adhippetā sāmāññajotanāya visese avatṭhānato. Tenāha “**seyyathāpi khuddamadhuṃ aneḷaka**”nti, niddosanti attho. Tena vuttaṃ “**idaṃ madhurasampannaṃ nāmā**”ti. Sīlassa anavasesasamādānena akhaṇḍādibhāvappattiyā ca **paripuṇṇasīlā**. Samādānato paṭṭhāya acchindanato **sīlasamaṅgino**. Samādānato hi accantavirodhidhammānuppattiyā sīlasamaṅgitā veditabbā, cetanādīnaṃ pana sīlanalakkaṇānaṃ dhammānaṃ pavattikkhaṇe vattabbameva natthi. **Visuddhimagge** (visuddhi. 1.9) **vuttā**, tasmā tattha vuttanayeneva vitthārakathā veditabbāti adhippāyo.

**Khettapāripūrīti** nissitapāripūriyā nissayapāripūrimāha nissitakammavipattisampattivisayattā yathā “**mañcā ukkuṭṭhiṃ karontī**”ti. Tathā hi khettena khaṇḍapūtiādidoso vutto. **Khettam khaṇḍam hotīti** aparipūraṃ hoti sassapāripūriyā abhāvato. Tenevāha “**sassaṃ na uṭṭheti**”ti. Pādamattassapi anekambaṇaphalanato **mahapphalaṃ hoti**. Kisalayapalālādibahutāya **mahānisamsaṃ. Evamevanti** yathā khittaṃ bījaṃ khaṇḍādicatudosavasena aparipuṇṇaṃ hoti, tadabhāvena ca paripuṇṇaṃ, evaṃ sīlaṃ khaṇḍādicatudosavasena aparipuṇṇaṃ hoti, tadabhāvena ca paripuṇṇanti, catudosatadabhāvasāmāññameva nidassananidassitabbavipattisampattīsu dasseti. **Mahapphalaṃ hoti** vipākaphalena. **Mahānisamsanti** vipulānisamsaṃ. Svāyaṃ ānisamsa idha pāḷiyaṃ nānappakārena vitthārīyati.

**Ettāvātā kirāti** (a. ni. ṭī. 2.2.37; a. ni. ṭī. 3.10.71-74) **kira**-saddo arucisūcanattho. Tenettha ācariyavādassa attano aruccanabhāvaṃ dīpeti. **Sampannasīlāti** anāmaṭṭhavisesaṃ sāmāññato sīlasaṅkhepena gahitaṃ. Tañca catubbidhanti ācariyatthero “**catupārisuddhisīlaṃ uddisitvā**”ti āha. **Tatthāti** catupārisuddhisīle. **Jeṭṭhakasīlanti** (saṃ. ni. ṭī. 3.5.412) padhānasīlaṃ. **Ubhayatthāti** uddesaniddese. Idha niddese viya uddeseṃ **pātimokkhasaṃvaro bhagavatā vutto** “**sampannasīlā**”ti vuttattāti adhippāyo. Sīlaggaḥaṇāhi pāḷiyaṃ pātimokkhasaṃvaravasena āgataṃ. Tenāha “**pātimokkhasaṃvaroyevā**”tiādi. Tattha avadhāraṇena itaresaṃ tiṇṇaṃ ekadesena pātimokkhanatogadhabhāvaṃ dīpeti. Tathā hi anolokiyolokane ājīvahetu chasikkhāpadavītikame gilānapaccayassa apaccavekkhitaparibhoge ca āpatti vihitāti. **Tiṇṇīti** indriyasamvarasīlādīni. **Sīlanti vuttaṭṭhānaṃ nāma atthīti** sīlapariyāyena tesam katthaci sutte gahitaṭṭhānaṃ nāma kiṃ atthi yathā pātimokkhasaṃvaroti ācariyassa sammukhattā apaṭikkhipantova upacārena pucchanto viya vadati. Tenāha “**ananujānanto**”ti. **Chadvārarakkhāmattakamevāti** tassa sallahukabhāvamāha cittādhiṭṭhānamattena paṭipākatikabhāvāpattito. Itaradvayepi eseva nayo. **Paccayuppattimattakanti** phalena hetuṃ dasseti. Uppādanahetukā hi paccayānaṃ uppatti. **Idamatthanti** idaṃ payojanaṃ imassa paccayassa paribhuñjaneti adhippāyo. **Nippariyāyenāti** iminā indriyasamvarādīni tiṇṇi padhānassa sīlassa parivāravasena pavattiyā pariyāyasīlāni nāmāti dasseti.

Idāni pātimokkhasaṃvarasseva padhānabhāvaṃ byatirekato anvayato ca upamāya vibhāvetuṃ “**yassa**”tiādīmāha. Tattha sotī pātimokkhasaṃvaro. **Sesānīti** indriyasamvarādīni. **Tassevāti** “sampaṇṇasīlā”ti ettha yaṃ sīlaṃ vuttaṃ, tasseva. **Sampanna-pātimokkhāti** ettha pātimokkhaggahaṇena **vevacanaṃ vatvā taṃ vitthāretvā...pe... ādimāha**. Yathā aññathāpi “idha bhikkhu sīlavā hotī”ti (mahāni. 199) puggalādhiṭṭhānāya desanāya uddiṭṭhaṃ sīlaṃ “pātimokkhasaṃvarasaṃvuto viharatī”ti (vibha. 508; mahāni. 199) niddiṭṭhaṃ.

**Pātimokkhasaṃvarasaṃvutāti** yo naṃ pāti rakkhati, taṃ mokkheti moceti āpāyikādīhi dukkhehīti “pātimokkha”nti laddhanāmena sikkhāpadasīlena pihitakāyavacīdvārā. Te pana yasmā evaṃbhūtā tena samannāgatā nāma honti, tasmā vuttaṃ “**pātimokkhasaṃvarena samannāgatā**”ti.

Aparo nayo (udā. aṭṭha. 31; itivu. aṭṭha. 97) – kilesānaṃ balavabhāvato, pāpakiriyāya sukarabhāvato, puññakiriyāya ca dukkarabhāvato bahukkhattuṃ apāyesu patanasīloti pātī, puthujjano. Aniccataṃ vā bhavadīsu kammavegakkhito ghaṭṭiyantaṃ viya anavaṭṭhānena paribbhamanato gamanasīloti pātī, maraṇavasena vā tamhi tamhi sattanikāye attabhāvassa patanasīloti pātī, sattasantāno, cittameva vā, taṃ pātim saṃsāradukkato mokkhetīti **pātimokkhaṃ**. Cittassa hi vimokkhena satto vimuttoti vuccati. Vuttañhi “cittavodānā visujjhanti”ti, “anupādāya āsavehi cittaṃ vimutta”nti (mahāva. 28) ca.

Atha vā avijjādinā hetunā saṃsāre patati gacchati pavattatīti pātī. “Avijjānīvaraṇānaṃ sattānaṃ taṇhāsamojjanānaṃ sandhāvataṃ saṃsarata”nti (saṃ. ni. 2.125) hi vuttaṃ. Tassa pātino sattassa taṇhādisaṃkilesattayato mokkho etenāti **pātimokkho**. “Kaṇṭhekālo”tiādīnaṃ viya samāsasiddhi veditabbā.

Atha vā pātetī vinipātetī dukkheti pāti, cittaṃ. Vuttañhi “cittena nīyati loko, cittena parikkassatī”ti (saṃ. ni. 1.62). Tassa pātino mokkho etenāti **pātimokkho**. Patatī vā etena apāyadukkhe saṃsāradukkhe cāti pātī, taṇhādisaṃkilesa. Vuttañhi “taṇhā janeti purisaṃ (saṃ. ni. 1.57), taṇhādutiyo purisa”ti (itivu. 15, 105; a. ni. 4.9) ca ādi. Tato pātito mokkhoti **pātimokkho**.

Atha vā patatī etthāti pātī, cha ajjhattikabāhirāni āyatanāni. Vuttañhi “chasa loko samuppanno, chasa kubbati santhava”nti (saṃ. ni. 1.70; su. ni. 171). Tato ajjhattikabāhirāyatanasaṅkhātato pātito mokkhoti **pātimokkho**. Atha vā pāto vinipāto assa atthīti pātī, saṃsāro. Tato mokkhoti **pātimokkho**. Atha vā sabbalokādhipatibhāvato dhammissaro bhagavā “pāti”ti vuccati, muccati etenāti mokkho, patino mokkho tena paññattatīti pātimokkho. Pātimokkho eva **pātimokkho**. Sabbaguṇānaṃ vā mūlabhāvato uttamaṭṭhena pati ca so yathāvuttatthena mokkho cāti pātimokkho. Pātimokkho eva **pātimokkho**. Tathā hi vuttaṃ “pātimokkhantiādīmetaṃ mukhametaṃ pamukhameta”nti (mahāva. 135) vitthāro.

Atha vā **pa**-itī pakāre, **atī**ti accantatthe nipāto, tasmā pakārehi accantaṃ mokkhetīti **pātimokkho**. Idañhi sīlaṃ sayam tadaṅgavasena, samādhisahitaṃ paññāsahitaṃ vikkhambhanavasena, samucchadavasena ca accantaṃ mokkheti mocetīti **pātimokkho**. Pati pati mokkhoti vā pātimokkho, tamhā tamhā vītikkamadosato paccekaṃ mokkhoti attho. Pātimokkho eva **pātimokkho**. Mokkho vā nibbānaṃ, tassa mokkhassa patibimbabhūtoti pātimokkho. Sīlasaṃvaro hi nibbedhabhāgiyo sūriyassa aruṇuggamaṇaṃ viya nibbānassa udayabhūto tappaṭibhāgo viya hoti yathārahaṃ kilesanibbāpanatoti pātimokkho. Pātimokkhoyeva **pātimokkho**. Atha vā mokkhaṃ pati vattati mokkhābhīmukhanti vā pātimokkhaṃ. Pātimokkhameva **pātimokkhanti** evamettha pātimokkhasaddassa attho veditabbo.

**Ācāragocarasaṃpannāti** kāyikavācasikaavītikkamasāṅkhātena ācārena ceva navesiyagocarātādisāṅkhātena gocarena ca saṃpannā, saṃpannaācāragocarātī attho. **Appamattesūti** atiparittakesu anāpattigamaṇīyesu, dukkaṭadubbhāsitamattesūti apare. **Vajjesūti** gārayhesu. Te pana ekantato akusalasabhāvā hontīti āha “**akusaladhammesū**”ti. **Bhayadassinoti** bhayato dassanasīlā,

paramānumattampi vajjaṃ sineruppamāṇaṃ viya katvā bhāyanasīlā. **Sammā ādiyitvāti** sammadeva sakkaccaṃ sabbaso ca ādiyitvā. **Sikkhāpadesūti** niddhāraṇe bhumanti samudāyato avayavaniddhāraṇaṃ dassento “**sikkhāpadesu taṃ taṃ sikkhāpadaṃ samādiyitvā sikkhathā**”ti atthamāha. Sikkhāpadameva hi samādātabbaṃ sikkhitabbañcāti adhippāyo. **Yaṃ kiñci sikkhākoṭṭhāsesūti** sikkhākoṭṭhāsesu mūlapaññattianupaññatisabbatthapaññattipadesapaññattiādibhedam yaṃ kiñci sikkhitabbaṃ paṭipajjitabbaṃ pūretabbaṃ sīlaṃ. Taṃ pana dvāravasena duvidhamevāti āha “**kāyikaṃ vācasikañcā**”ti. Imasmiṃ atthavikappe **sikkhāpadesūti** ādhāre bhummaṃ sikkhābhāgesu kassaci visuṃ aggahaṇato. Tenāha “**taṃ sabba**”nti.

**65. Kasmā āraddhanti** (a. ni. ṭi. 3.10.71-74) desanāya kāraṇapucchā. **Sīlānisamsadassanatthanti** payojananiddeso. Ko attho kva attho kva nipātītāti? Nayidamevaṃ daṭṭhabbaṃ. **Sīlānisamsadassanatthanti** hi ettha byatirekato yaṃ sīlānisamsassa adassanaṃ, taṃ imissā desanāya kāraṇanti kasmā āraddhanti vineyyānaṃ sīlānisamsassa adassanatoti atthato āpanno eva hotīti. Tenāha “**sacepi**”tiādi. **Sīlānisamsadassanatthanti** pana imassa atthaṃ vivarituṃ “**tesa**”ntiādi vuttaṃ. **Ānisamsoti** udayo. “Sīlavā sīlasampanno kāyassa bhedā paraṃ maraṇā sugatiṃ saggalokaṃ upapajjati”tiādīsu (dī. ni. 2.150; 3.316; a. ni. 5.213; mahāva. 285) pana vipākaphalampi “**ānisamsa**”ti vuttaṃ. **Ko visesoti** ko phalaviseso. **Kā vaḍḍhīti** ko abbhudayo. Vijjamānopi guṇo yāthāvato vibhāvito eva abhiruciṃ uppādeti, na avibhāvito, tasmā ekantato ānisamsakittanaṃ icchitabbamevāti dassetuṃ **visakaṇṭakavāṇijo** udāhaṇato.

Tattha **guḷo** nāma ucchurasam pacitvā cuṇṇādīhi missitvā sampiṇḍane piṇḍibhūtaṃ. **Phāṇitaṃ** apiṇḍitaṃ dravībhūtaṃ. **Khaṇḍam** bhijjanakkhamaṃ. **Sakkharā** nāma phalikasadisā. **Sakkharādīniti ādi**-saddena macchaṇḍikānaṃ saṅgaho. Tasmīṃ kāle guḷādīsu visakaṇṭakavohāro apaccantadese pacuroti “**paccantagāmaṃ gantvā**”ti vuttaṃ. **Dārake ca palāpesuṃ** “visakaṇṭakaṃ mā gaṇhantū”ti.

**Piyoti** piyāyitabbo. Piyassa nāma dassanaṃ ekantato abhinanditabbaṃ hotīti āha “**viyacakkhūhi sampassitabbo**”ti. Pītisamuṭṭhānapasannasommarūpapariggahañhi cakkhu “**piyacakkhū**”ti vuccati. **Tesanti** sabrahmacārīnaṃ. **Manavaḍḍhanakoti** pītimanassa paribrūhanato uparūpari pīticittassa uppādako. **Garuṭṭhāniyoti** garukaraṇassa ṭhānabhūto. **Jānaṃ jānāti** ṇāṇena jānitabbaṃ jānāti. Yathā vā aññe ajānantāpi jānantā viya pavattanti, na evamayam, ayaṃ pana jānanto eva jānāti. **Passam passatīti** dassanabhūtena paññācakkhunā passitabbaṃ passati, passanto eva vā passati. **Evam sambhāvanīyoti** evaṃ viññutāya paṇḍitabhāvena sambhāvetabbo.

**Sīlesvevassa paripūrakārīti** sīlesu paripūrakārī eva bhavyeyyāti evaṃ uttarapadāvadhāraṇaṃ daṭṭhabbaṃ. Evañhi iminā padena uparisikkhādvayaṃ anivattitameva hoti. Yathā pana sīlesu paripūrakārī nāma hoti, taṃ phalena dassetuṃ “**ajjhata**”ntiādi vuttaṃ. Vipassanādhiṭṭhānasamādhisaṃvattanikatāya hi idha sīlassa pāripūrī, na kevalaṃ akhaṇḍādibhāvamattaṃ. Tenāha “yāni kho pana tāni akhaṇḍāni...pe... samādhisaṃvattanikānī”ti. Evañca katvā upari sikkhādvayaṃ sīlassa sambhārabhāvena gahitanti sīlassevettha padhānaggahaṇaṃ siddhaṃ hoti. Tathā hi cittekaggatāsāṅkhārapariggahānaṃ sīlassānurakkhaṇabhāvaṃ vakkhati. Yaṃ pana vakkhati “sikkhattayadesanā jātā”ti (ma. ni. aṭṭha. 1.65), taṃ itarāsampi sikkhānaṃ idha gahitatāmattaṃ sandhāya vuttaṃ, na padhānabhāvena gahitattaṃ. Yadi evaṃ kathaṃ sīlassa appamattakatāvacaṇaṃ. Vuttañhetam “appamattakaṃ kho panetaṃ, bhikkhave, oramattaka”nti (dī. ni. 1.7). Taṃ puthujjanagocaraṃ sandhāya vuttaṃ. Tathā hi tattha na nippadesato sīlaṃ vibhattaṃ, evaṃ katvā tattha sīlamattakanti mattaggahaṇaṃ samatthitanti daṭṭhabbaṃ. **Anūnenāti** akhaṇḍādibhāvena, kassaci vā ahāpanena upapannena. **Ākārenāti** karaṇena sampādanena. **Cittasamatheti** cittasamādhāne. **Yuttoti** aviyutto pasuto. Yo sabbena sabbam jhānabhāvaṇaṃ ananuyutto, so taṃ bahi nīharati nāma. Yo ārabhitvā antarā saṅkocaṃ āpajjati, so taṃ vināseti nāma. Yo pana idiso ahutvā jhānaṃ upasampajja viharati, so **anirākatajjhānoti** dassento “**bahi anīhaṭajjhāno**”tiādimāha.

Aniccassa tebhūmakadhammassa, aniccanti vā anupassanā **aniccānupassanā**. Tathā **dukkhānupassanā anattānupassanā** ca. Tasseva nibbindanākārena pavattā anupassanā **nibbidānupassanā**. Virajjanākārena pavattā anupassanā **virāgānupassanā**. Nirodhassa anupassanā **nirodhānupassanā**. Paṭinissajjanavasena pavattā anupassanā **paṭinissaggānupassanā**. Suññāgāragato bhikkhu tattha laddhakāyavivekatāya samathavipassanāvasena cittavivekaṃ paribrūhento yathānusiṭṭhaṃ paṭipattiyā lokaṃ sāsanañca attano visesādhigamaṭṭhānabhūtaṃ suññāgārañca upasobhayamāno guṇavisesādhīṭṭhānabhāvāpādanena viññūnaṃ atthato taṃ brūhento nāma hotīti vuttaṃ “**brūhetā suññāgārāna**”nti. Tenāha “**ettha cā**”tiādi. Ayameva suññāgārānubrūhanaviññūppasatthānaṃ bhājanaṃ, na senāsanapatiṭṭhāpananti dassento āha “**ekabhūmakādi...pe... daṭṭhabbo**”ti. **Suññāgāraggaḥaṇena** cettha araññarukkhamulādi sabbhaṃ padhānānuyogakkhamaṃ senāsanam gahitanti daṭṭhabbam.

**Taṇhāvicaritadesanāti** “ajjhakkassa upādāyā”ti (vibha. 937) ādinayappavattaṃ taṇhāvicaritasuttaṃ. **Taṇhāpadaṭṭhānattāti** taṇhāsannissayattā. Na hi taṇhāvirahitā mānadiṭṭhipavatti atthi. **Mānadiṭṭhiyo osarivāti** dassetabbatāya mānadiṭṭhiyo ogāhetvāti attho. Gahaṇatthameva hi desetabbadhammassa desanāya osaraṇaṃ. **Taṇhāmānadiṭṭhiyo papañcattayaṃ** sattasantānassa saṃsāre papañcanato anuppabandhanavasena vitthāraṇato. **Sīlapadaṭṭhānattāti** sīlādhiṭṭhānattā.

Adhicittasikkhā vuttāti ānetvā sambandho. Vipassanāvasena suññāgāraḥaṇeti yojanā. **Dvepi sikkhāti** adhicittādhipaññāsikkhā. **Saṅgahetvāti** adhisīlasikkhāya saddhiṃ saṅgahetvā vuttā. Yadi evamayam sikkhattayadesanā jātāti sikkhattayānisamsappakāsāni siyāti anuyogaṃ sandhāyāha “**ettha cā**”tiādi. Tattha yaṃ vattabbam, taṃ heṭṭhā vuttameva. Indriyasamvaro viya pātimokkhasamvarassa catupārisuddhisīlassa ārakkhabhūtā cittekaggatā vipassanā ca idha gahitāti tadubhayaṃ appadhānaṃ, sīlameva pana padhānabhāvena gahitanti veditabbam. Tenāha “**sīlanurakkhikā evā**”tiādi.

**Balavatarasukhanti** samuppannabyādhidukkhatō balavataṃ, taṃ abhibhavituṃ samattham jhānasukham uppajjati. **Balavamamattaṃ hoti**, tena daḥaattasinehena viluttahadayo kusaladhamme chaḍḍento **so tathārūpesu...pe... posetā hoti**. **Balavamamattaṃ vā sineho na hoti** “suddho saṅkhārapuñño”ti yāthāvadassanena ahaṃkāramamaṃkārahāvato. Dubbhikkhabhaye khudābhibhavaṃ sandhāyāha “**sacepissa antāni bahi nikkhamanti**”ti. Byādhibhayaṃ sandhāyāha “ussusati visussanti”ti. Ādi-saddena gahitaṃ corabhayaṃ sandhāyāha “**khaṇḍākhaṇḍiko vā**”ti. **Ubhayassāti** samathavipassanādvyayassa. Ettha ca “ajjhattaṃ ceto...pe... suññāgārāna”nti imehi visesanibbedhabhāgiyabhāvāpādanena sīlam rakkhituṃ samatthā eva cittekaggatāvipassanā gahitā. Yasmā parato jhānavimokkaphalābhīññāadhiṭṭhānabhāvo sīlassa uddhaṭo, tasmā tassa bhīyopi sambhārabhūtā eva cittekaggatā vipassanā tattha tattha gahitāti veditabbā.

**Sīlādīti ādi-saddena** yathāvuttacittekaggatāvipassanā saṅgaṇhāti, sīlassa vā mūlakāraṇabhūtaṃ sabbhaṃ kammassakataññañca saṅgaṇhāti kammamāpathasammādiṭṭhiṃ vā. Sīlañhi tadaññampi puññakiriyāvattu teneva parisodhitaṃ mahapphalaṃ hoti mahānisamsanti. **Lābhī assanti** lābhā sāya saṃvaraṇasīlaparipūraṇaṃ pāliyaṃ āgataṃ kimīdisaṃ bhagavā anujānātīti? Na bhagavā sabhāvena īdisaṃ anujānātī, mahākāraṇikatāya pana puggalajjhāsayena evaṃ vuttanti dassento “**na cetthā**”tiādimāha. Tattha **ghāsesanaṃ chinnakatho na** vācaṃ **payuttaṃ bhaṇeti** chinnakatho mūgo viya hutvā obhāsaparikathānimittaviññātipayuttaṃ ghāsesanaṃ vācaṃ na bhaṇe na katheyyāti attho. **Puggalajjhāsayavasenāti** saṅkhepatō vuttamattham vivaranto “**yesaṇhī**”tiādimāha. Raso sabhāvabhūto ānisamsō **rasānisamsō**.

**Paccayadānakārāti** cīvarādipaccayavasena dānakārā. “**Devānaṃ vā**”ti vuttavacanam pākāṭikātumāha “**devāpi**”tiādi. “Pañcime gahapatayo ānisamsā”tiādīsu (dī. ni. 2.150) anisamsasaddo phalaparīyāyopi hotīti āha “**ubhayametaṃ atthato eka**”nti.

Sassusasurā ca tappakkhikā ca **sassusasurapakkhikā**. Te ñātiyonisambandhena



āvāhavivāhasambandhavasena sambandhā **ñātī**. **Sālohitā**ti yonisambandhavasena.

**Ekalohitasambaddhā**ti ekena samānena lohitasambandhena sambaddhā. **Peccabhāvaṃ gatā**ti petūpapattivasena nibbattiṃ upagatā. Te pana yasmā idha katakālakiriya kālena katajīvitupacchedā hontī, tasmā vuttaṃ “**kālakatā**”ti. **Pasannacittoti** pasannacittako. Kālakato pitā vā mātā vā petayoniṃ upapannoti adhikārato viññāyatīti vuttaṃ “**mahānisamsameva hotī**”ti, tassa tathā sīlasampannattāti adhippāyo. Ariyabhāve pana sati vattabbameva natthi. Tenāha “**anekāni kappasatasahassāni**”tiādi. **Bahukāranti** bahupakāraṃ. **Upasaṅkamananti** abhivādanādivasena upagamanāṃ. **Payirupāsananti** upaṭṭhānanti.

**66. Ajjhottharitā**ti madditā. **Ukkaṇṭhā**ti riñcanā anabhirati ananuyogo. Sīlavā bhikkhu attano sīlakaṇḍabhayena samāhito vipassako ca paccayaghātena aratiyā ratiyā ca sahitā abhibhavitāva hotīti āha “**sīlādiguṇayuttenevā**”tiādi.

**Cittutrāso** bhāyatīti **bhayaṃ**. **Ārammaṇaṃ** bhāyati etasmāti **bhayaṃ**. Purimavārasadisattā **vuttanayamevā**ti atidisiṭvāpi puna taṃ dassetuṃ “**sīlādiguṇayutto hī**”tiādi vuttaṃ. Therassa heṭṭhā nisinnattā devatāya **dārakā sakabhāvena saṇṭhātuṃ** sukhena vattituṃ **asakkontā** asamattā.

Adhikaṃ cetoti **abhiceto**, upacārajjhānacittaṃ. Tassa pana adhikatā pākatikakāmāvacaracittehi sundaratāya sapaṭipakkhato visuddhiyā cāti āha “**abhikkantaṃ visuddhicitta**”nti. **Adhicittanti** samādhimāha, so ca upacārasamādhī daṭṭhabbo. Vivekajaṃ pītisukhaṃ, samādhijaṃ pītisukhaṃ, apītijaṃ jhānasukhaṃ, satipārisuddhijaṃ jhānasukhanti catubbidhampi jhānasukhaṃ paṭipakkhato nikkhantataṃ upādāya “**nekkhammasukha**”nti vuccatīti āha “**nekkhammasukhaṃ vindantī**”ti. **Īcchiticchitakkhaṇe samāpajjituṃ samatthoti** iminā tesu jhānesu samāpajjanavasībhāvamāha, “**nikāmalābhī**”ti pana vacanato āvajjanādhiṭṭhānapaccavekkhaṇavasīyopi vuttā evāti veditabbā. **Sukheneva paccanīkadhamme vikkhambhetvā**ti etena tesam jhānasukhakhippābhīññātañca dasseti. **Vipulānanti** vepullaṃ pāpitānaṃ. Jhānānaṃ vipulatā nāma subhāvitabhāvena cīratarappatti, sā ca paricchedānurūpāya īcchitabbāti “**vipulāna**”nti vatvā “**yathāparicchedeyeva vuṭṭhātuṃ samatthoti vuttaṃ hotī**”ti āha. Paricchedakālañhi appatvāva vuṭṭhahanto akasiralābhī na hoti yāvadicchakaṃ pavattetuṃ asamattattā. Idāni teyeva yathāvutte samāpajjanādivasībhāve byatirekavasena vibhāvetuṃ “**ekacco hī**”tiādi vuttaṃ. Tattha **lābhīyeva hotīti** idaṃ paṭiladdhamattassa jhānassa vasena vuttaṃ. **Tathā**ti īcchiticchitakkhaṇe. **Pāribandhiketi** vasībhāvassa paccanīkadhamme. Jhānādhigamassa pana paccanīkadhammā pageva vikkhambhitā, aññathā jhānādhigamo eva na siyā. **Kicchena vikkhambhetī**ti kicchena visodheti. Kāmādīnavapaccavekkhaṇādīhi kāmaccchandādīnaṃ viya aññesampi samādhīpāribandhikānaṃ dūrasamussāraṇaṃ idha vikkhambhanaṃ visodhanañcāti veditabbā. **Nālikāyantanti** kāmānanālikāyantaṃ āha.

Visesena rūpāvacaracattutthajjhānaṃ sabbaso vasībhāvāpāditaṃ abhiññāpādakanti adhippāyenāha “**abhiññāpādake jhāne vutte**”ti. Arūpajjhānampi pana adhiṭṭhānatāya pādakameva cuddasadhā cittaparidamanena vinā tadabhāvato. “**Evamabhiññāpādake rūpāvacarajjhāne vutte rūpāvacaratāya kiñcāpi abhiññānaṃ lokiyavāro āgato**”ti ayañhettha adhippāyo. **Nanti** abhiññāvāraṃ. **Cattāri...pe... ariyamaggā sīlānaṃ ānisaṃso** sampannasīlasseva lābhato. **Pariyādiyitvā**ti gahetvā.

**Āngasantatāyā**ti nīvaraṇādīnaṃ paccanīkadhammānaṃ sudūratarabhāvena jhānaṅgānaṃ vūpasantatāya, nibbutasabbadarathapariḷāhatāyāti attho, yato tesam jhānānaṃ pañītatārādībhāvo. **Ārammaṇasantatāyā**ti rūpapaṭiḡhādīvigamanena saṅhasukhumādībhāvappattasantabhāvena. Yadaggena hi nesaṃ bhāvanābhisamayasabbhāvitasāṅhasukhumākārāni ārammaṇāni santāni, tadaggena jhānaṅgānaṃ santatā veditabbā. **Ārammaṇasantatāya** santatā lokuttaradhammārammaṇāhi paccavekkhaṇāhi dīpetabbā. Vimuttā visesena muttā. Ye hi jhānadhammā tathāpavattapubbabhāgabhāvanāhi tabbisesatāya sātisaṃyaṃ paṭipakkhadhammehi vimuttivasena pavattanti, tato eva tathāvimuttatāya pitu anke vissatṭhaaṅgapaccaṅgo viya kumāro nirāsaṅkabhāvena ārammaṇe adhimuttā ca pavattanti, te vimokkhāti vuccanti. Tenāha “**vimokkhāti paccanīkadhammehi**”

**vimuttattā ārammaṇe ca adhimuttattā**’ti. Yadi pi ārammaṇasamatikkamavasena pattabbāni āruppāni, na āngātikkamavasena, tathāpi yasmā ārammaṇe avirattassa jhānasamatikkamo na hoti, samatikkantesu ca jhānesu ārammaṇaṃ samatikkantameva hoti, tasmā ārammaṇasamatikkamaṃ avatvā **“rūpāvacarajjhāne atikkamivā**”ti icceva vuttaṃ. **Atikkamma rūpeti** pāliyaṃ “sampādetabbā, passitabbā”ti vā kiñci padaṃ icchitabbāṃ, asutaparikkappanena pana payojanaṃ natthīti **“santāti padasambandho**”ti vuttaṃ. Evañca katvā tena virāgabhāvena tesam santatāti ayampi attho vibhāvito hoti. Rūpajjhānādīnaṃ viya natthi etesaṃ ārammaṇabhūtaṃ vā phalabhūtaṃ vā rūpanti arūpā. Arūpā eva **ārūpā**. Tenāha **“ārammaṇato ca vipākato ca rūpavirahitā**”ti. **Nāmakāyenāti** saha jātānāmasamūhena.

**67. Saṃyojenti**ti bandhanti. Kehīti āha **“khandhagati**”tiādi. Asamucchinnarāgādikassa hi khandhādīnaṃ āyatim khandhādīhi sambandho, samucchinnarāgādikassa pana taṃ natthi katānampi kammānaṃ asamatthabhāvāpattitoti. Rāgādīnaṃ anvayato ca saṃyojanaṭṭho siddhoti āha **“khandhagati...pe... vuccanti**”ti. **Parikkhayenāti** samucchedena sabbaso āyatim anuppajjanena. Paṭipakkhadhammānaṃ anavasesato savanato pīlanato **soto**, ariyamaggoti āha **“sototi ca maggasetam adhivacana**”nti. Taṃ sotaṃ ādito panno adhigacchīti **sotāpanno**, aṭṭhamako. Tenāha **“taṃsamaṅgīpuggalassā**”ti, paṭhamamaggakkhaṇe puggalassāti adhippāyo. Idha pana **panna-saddo** “phalāsacchikiriya paṭipanno”tiādīsu (a. ni. 8.59) viya vattamānakālikoti āha **“maggena phalassa nāmaṃ dinna**”nti. Abhītakālikatte pana sarasatova nāmalābho siyā. Virūpaṃ sadukkhaṃ saupāyāsaṃ nipātetīti **vinipāto**, apāyadukkhe khipanako. **Dhammoti** sabhāvo. Tenāha **“attāna**”ntiādi. **Kasmāti** avinipātadhammatāya kāraṇaṃ pucchati. Apāyaṃ gamentīti apāyagamanīyā. Sambujjhatīti **sambodhi**, ariyamaggo. So pana paṭhamamaggassa adhigatattā avasiṭṭho eva adhigandhabbhāvena icchitabboti āha **“uparimaggattaya**”nti.

**Vaṇṇabhaṇanattam vuttāni**, na pahātabbānīti adhippāyo. Oḷārikānaṃ rāgādīnaṃ samucchindanavasena pavattamāno dutiyamaggo avasiṭṭhānaṃ tesam tanubhāvāpattiyā uppanno nāma hotīti vuttaṃ **“rāgadosamohānaṃ tanuttā**”ti. **Adhiccupattiyāti** kadāci karahaci uppajjanena. **Pariyuttānaṃ mandatāyāti** samudācāramudutāya. **Abhiṇṇam na uppajjanti** tajjassa ayonisomanasikārassa anibaddhabhāvato. **Mandamandā uppajjanti** vipallāsānaṃ tappaccayānañca mohamānādīnaṃ mudutarabhāvato. **Bahalāva uppajjanti** vatthupaṭisevanatoti adhippāyo. Tenāha **“tathā hī**”tiādi.

**Sakiṃ āgamanadhammoti** paṭisandhivasena sakiṃyeva āgamanasabhāvo. **Ekavāraṃyeva...pe... āgantvāti** iminā pañcasu sakadāgāmīsu cattāro vajjjetvā ekoyeva gahitoti dassento **“yopi hī**”tiādimāha. Tattha yvāyaṃ pañcamako sakadāgāmī “idha maggaṃ bhāvetvā devaloke nibbato, tattha yāvatāyukaṃ ṭhatvā puna idhūpapajjitvā parinibbāyati”ti vutto, tassa ekabījīnā saddhiṃ kiṃ nānākaraṇanti? Ekabījissa ekā paṭisandhi, sakadāgāmissa dve paṭisandhiyoti idaṃ tesam nānākaraṇaṃ. Yassa hi sotāpannassa ekaṃyeva khandhabījaṃ, na ekaṃ attabhāvaggahaṇaṃ, so ekabījīti.

**Heṭṭhāti** “amahaggatabhūmiya”nti heṭṭhā sambandhanena. Heṭṭhābhāgassa hitāti **heṭṭhābhāgiyā**, tesam. **Tānīti** orabbhāgiyasamyojanāni. **Kāmāvacare nibbattatiyeva** ajjhattaṃ saṃyojanattā. Tathā hesa dūratopi āvattidhammo evāti dassetuṃ gilabaḷisamacchādayo upamābhāvena vuttā. **Opapātikoti** iminā gabbhavāsadukkhabhāvamāha. **Tattha parinibbāyīti** iminā sesadukkhabhāvaṃ. Tattha parinibbānatā cassa kāmaloke khandhabījassa apunārohavasenevāti dassetuṃ **“anāvattidhammo**”ti vuttaṃ.

**68. Kevalāti** lokiyābhiññāhi asammissā. **Lokiyapañcābhiññāyopi silānaṃ ānisamso** tadavinābhāvato. Tāpi dassetuṃ ākaṅkheyya ce...pe... evamādimāhāti yojanā. Āsavānaṃ anavasesappahānato arahattamaggoyeva visesato **“āsavakkhayo**”ti vattabbataṃ arahatīti vuttaṃ **“āsavakkhaye kathite**”ti, aññathā sabbāpi chaḷabhiññā āsavakkhayo evāti. **Imesaṃ guṇānanti** lokiyābhiññānaṃ. Yathā purisassa muṇḍitaṃ sīsaṃ sikhāviraḥitattā na sobhati, evaṃ desanāya

sīsabdhūtāpi aggamaggakathā lokiyābhiññārahitā na sobhatīti āha “**ayaṃ kathā muṇḍābhiññākathā nāma bhaveyyā**”ti. **Iddhivikubbanā**ti iddhi ca vikubbanā ca. Vikubbanaggahaṇena cettha vikubbaniddhimāha, iddhiggahaṇena tadaññaṃ sabbañca abhiññākkiccam. **Yuttaṭṭhāneyevā**ti lokiyābhiññānaṃ nibbattanassa viya desanāya yuttaṭṭhāneyeva. Etena na kevalaṃ desanakkamenevāyaṃ desanā, atha kho paṭipattikkamenapīti dasseti. **Visuddhimagge** (visuddhi. 2.369) **vuttā**, tasmā tattha vuttanayeneva veditabbāti adhippāyo.

**69. Āsavānaṃ khayāti** heṭṭhimamaggena khepitāvasiṭṭhānaṃ āsavānaṃ arahattamaggena samucchindanato. Yasmā arahattamaggo na kevalaṃ āsaveyeva khepeti, atha kho avasiṭṭhe sabbakilesepi, tasmā āha “**sabbakilesānaṃ khayā**”ti. Lakkhaṇamattañhettha āsavaggahaṇaṃ, āsavānaṃ ārammaṇabhāvassapi anupagamanato anāsavaṃ. Yasmā pana tattha āsavānaṃ lesopi natthi, tasmā vuttaṃ “**āsavavirahita**”nti. **Samādhi vutto** cetosisena yathā “cittaṃ paññañca bhāvaya”nti (saṃ. ni. 1.23, 192; peṭako. 22; mi. pa. 2.1.9) adhippāyo. **Rāgato vimuttattā avijjāya vimuttattā**ti idaṃ ujuvipaccanīkapaṭippassaddhidassanaṃ daṭṭhabbaṃ, na tadaññesaṃ pāpadhammānaṃ appaṭippassaddhattā. Idāni tameva samādhipaññānaṃ rāgāvijjāpaṭipakkhataṃ āgamena dassetuṃ “**vuttaṃ ceta**”ntiādi vuttaṃ. **Samathaphalanti** samathassa phalaṃ lokiyasamathabhāvanāya hi vipassanāgatāya āhitaphalassa lokuttarasamathassa sarikkhakaphalo **cetovimutti**. **Vipassanāphalanti** etthāpi eseva nayo. **Attanoyevā**ti sutamayaññādinā viya parapaccayataṃ nayaggāhañca muñcivā paratoghosānugatabhāvanādhigamabhūtātāya attanoyeva **paññāya paccakkhaṃ katvā** sayambhuññābhūtāyāti adhippāyo. Tenāha “**aparappaccayena ñatvā**”ti.

**Sabbampi tantī** sabbampi sattarasavidhaṃ taṃ yathāvuttaṃ sīlānisamsaṃ. Yathā ānisamsavante sammadeva sampāдите tadānisamsā dassitā eva hontī tadāyattabhāvato, evaṃ ānisamsapadhānayo gyabhāvena dassite tadānisamsā dassitā eva hontīti āha “**sampiṇḍetvā dassento**”ti. Vuttasseva atthassa punavacanaṃ nigamananti vuttaṃ “**nigamanaṃ āhā**”ti. **Pubbeti** desanārambhe. **Evaṃ vuttanti** “sampannasīlā”ti evamādinā ākārena vuttaṃ. **Idaṃ sabbampīti** idaṃ “sampannasīlā”tiādikāṃ sabbampi vacanaṃ. **Etaṃ paṭiccā**ti etaṃ sampannasīlassa bhikkhuno yathāvuttasattarasavidhānisamsabhāgitaṃ sandhāya vuttaṃ. Idameva hi “iti yaṃ taṃ vuttaṃ, idameṭaṃ paṭicca vutta”nti vacanaṃ sandhāya “**sabbampi taṃ sīlānisamsaṃ sampiṇḍetvā dassento**”ti vuttaṃ. Etthāādito chahi ānisamsasehi parittabhūmikā sampatti gahitā, tadantaraṃ pañcāhi lokiyābhiññāhi ca mahaggatabhūmikā, itarehi lokuttarabhūmikāti evaṃ catubhūmikasampadānisamsasīlaṃ nāmetāṃ mahantaṃ mahānubhāvaṃ, tasmā taṃsampādane sakkaccakāritā appamattena bhavitabbaṃ.

Ākañkheyyasuttavaṇṇanāya līnatthappakāsanā samattā.

## 7. Vatthasuttavaṇṇanā

**70. Chādetabbaṃ ṭhānaṃ** vasati paṭicchādetīti **vatthaṃ**. Yaṃ samānaṃ viya na sabbaso minoti, mānassa pana samīpe, taṃ upamānaṃ. Upamīyati etāyāti upamā, upamāya bodhakavacanaṃ **upamāvacanaṃ**. **Katthaci** sutte. **Atthanti** upamīyatthaṃ. Paṭhamāṃ upamaṃ vatvā tadanantaraṃ atthaṃ vatvā puna upamaṃ vadanto “**upamāya atthaṃ parivāretvā dasseti**”ti vutto. **Atthena upamaṃ parivāretvā**ti etthāpi eseva nayo. Idāni te cattāropi pakāre sutte āgatanayeneva dassento “**seyyathāpissu, bhikkhave**”tiādimāha. Tattha **dve agārā**ti dve paṭivissakagharā. **Sadvārā**ti sammukhadvārā.

**Svāyanti** so ayaṃ evaṃ upamādassanavasenaṃ nānāyenaṃ dhammadesako bhagavā. Ekaccānaṃ veneyyānaṃ atthassa sukhāvabodho paṭhamāṃ upamādassane hetu, evaṃ paṭhamāṃ atthadassane, upamāya atthaparivāraṇe, atthena upamāparivāraṇe cā”ti imamattaṃ dasseti “**esa nayo sabbatthā**”ti iminā. **Dhammadhātuyāti** sabbaññūtaññānaṃ. Tañhi dhammadhātupariyāpannattā yathāvuttadhamme ca sabbepi ñeyyadhamme ca padahati yathāsabhāvato bujjhāti bodheti cāti dhātu, dhīyanti vā dhammā etāya sabbākārato ñāyanti ñāpiyanti cāti dhammadhātu. Tassā pana suṭṭhu

saccasampañivedhavasena laddhattā **suppaṭividdhattā**ti, yadaggena vā ñeyyaṃ tāya suppaṭividdhaṃ, tadaggena sāpissa suppaṭividdhā evāti āha “**suppaṭividdhattā**”ti.

Pakatipariyodātassa cittassa āgantukehi upakkilesehi upakkiliṭṭhabhāvadassanattamaṃ saṃkiliṭṭhavatthadassananti katvā vuttaṃ “**pakatiparisuddhaṃ vattha**”nti. **Rajādinā**ti ettharajo nāma reṇu. **Ādi**-saddena aṇutajjārīdhūmādikamaṃ vatthassa aparisuddhikāraṇaṃ saṅgaṇhāti. Sabbaso kilissati vinassati visuddhi etenāti saṃkilesa, tena **saṃkilesena paṃsurajādinā saṃkiliṭṭhaṃ** vaṇṇavināsanena vidūsitamaṃ. **Malaṃ** masi. **Jallikā** vuccati loṇapaṭalādi chaviyā upari ṭhitamaṃ sarīramalaṃ. **Ādisaddena** sarīrajallameva assukheḷasiṅghāṇikādikamaṃ tadaññamalaṃ saṅgaṇhāti. **Gahitattā**ti pariyanandhanavasena gahitattā. Rajanti sattā tenāti raṅgaṃ, raṅgameva **raṅgajātaṃ** yathā kopameva kopajātaṃ. **Upanāmeyyā**ti pakkhipeyya. **Nīlakatthāyā**ti nīlavaṇṇatthāya. **Palāsanīlādiketī ādi**-saddena kālasāmādiṃ saṅgaṇhāti. Haliddikakudhaselādike **pītakaraṅge**. Lākhāpattāṅgarasādike **lohītakaraṅge**. Mahārajanaloddakandulādike **mandarattaraṅge**. Duṭṭhu rajitavaṇṇaṃ apabhassaraṃ. Tenāha “**aparissuddhavaṇṇamevassā**”ti. **Īdisanti** durattavaṇṇaṃ. Tasmīṃ vatthe raṅgajātaṃ sayamaṃ suparisuddhaṃ samānaṃ kissa hetu kena rattavaṇṇaṃ aparissuddhaṃ hotīti raṅgajātassa niddosataṃ vadati. Tenāha “**yasmā panā**”tiādi.

Saṃkilesapakkhaṃ dassentena asaṃkiliṭṭhameva vatthamaṃ udāharitabbanti pākāṭoyamattho, saṃkiliṭṭhavatthanidassanena pana “siyā nu kho aññopi koci vireso”ti adhippāyena pucchati “**kasmā panā**”tiādinā. Itaro atthavisesoti dassento “**vāyāmahapphaladassanattā**”ntiādimāha. Ettha ca saṃkiliṭṭhacittavisodhanavidhāne saṃkiliṭṭhavatthamaṃ nidassatabbanti paṭiññā, vāyāmahapphaladassanattanti hetuattho. **Yathā hī**tiādi anvayattho. **Na tattha jātikālake viyā**tiādi byatirekattho. Sadiśūdāharaṇaṃ pana malaggahitakamaṃpātiādi daṭṭhabbaṃ. **Evamaṃ cittampī**tiādi opamattassa upameyyaupanayanaṃ. Tattha **pakatiyā**ti akittimena sabhāvena. Tanti cittamaṃ. Sāmaññaggahaṇaṇcetamaṃ cittabhāvāvisesato. Tenāha “**sakalepī**”ti. **Paṇḍarameva** na saṃkiliṭṭhaṃ saṃkilesehi asamannāgatabhāvato. Nanu kiriyāmayacittehi vipākasantāne viśesādhānaṃ labbhati, aññathā katavināsā katabbhāgamā āpajjeyyuma? Kiñcāpi labbhati, tassa saṃkilesa vaṭṭupanissayo, asuddhi vā na hoti, asaṃkilesa vivaṭṭupanissayo, visuddhi vā na hoti eva. **Upakkiliṭṭhanti** panetaṃ upakkilesanārahassa cittassa vasena vuttaṃ, na vipākabandhassa. Tenāha “**pabhassaramidaṃ bhikkhave citta**”nti, “**paṇḍaramevā**”ti ca. **Taṅca khoti** pana sakasantatipariyāpannatāya nesamaṃ kevalamaṃ ekattanayavasena vuttaṃ, na vipākadhammānaṃ kilesāsamaṅgibhāvato. Atha vā **upakkiliṭṭhanti** iminā upakkilesahetu tattha vijjamaṇaṃ viśesādhānamāha, na “saṃkiliṭṭhā dhammā”tiādisu (dha. sa. 77. dukamātikā) viya taṃsamaṅgianti daṭṭhabbaṃ. **Viśodhiyamānanti** vipassanāpaññāya anukkamena sabbupakkilesehi vimociyamānaṃ. **Sakkā** aggamaggakkhaṇe **pabhassarataṃ kātuṃ**, yato na puna upakkilissati. **Evantiādi** vuttassevatthassa nigamaṃ.

Duṭṭhagatipariyāpanavasena paṭipajjanaṃ **paṭipatti**. Sā eva kilesadarathapariḷhādivasena upāyāsadukkhā, kucchitā vā gati pavatti, duggatīhetūti vā **duggati**, duggatiyā pana paṭipattiyā gandhabbato, tassā vā nipphannabhāvato kucchito, dukkhā ca gatīti **duggati**. **Saṃkiliṭṭhacittoti** idamaṃ tassā paṭipattiyā duggatībhāvadassanattamaṃ, na viśesanattamaṃ. Na hi asaṃkiliṭṭhacittassa paṇaḅhātādivasena pavatti. **Saṃkiliṭṭhacittoti** lābhāsāya sabbaso kiliṭṭhacitto. **Dūteyyapahiṇagamananti** dūteyyamaṃ vuccati dutakammaṃ, gihīnaṃ paṇṇaṃ vā sāsanaṃ vā gahetvā tattha tattha gamaṇaṃ, paḅhiṇagamaṇaṃ gharāgharaṃ pesitassa khuddakagamaṇaṃ, dūteyyagamaṇaṃ paḅhiṇagamaṇaṅca gacchati. **Vejjakammaṇanti** ananuññāte ṭhāne lābhāsāya gahaṭṭhānaṃ bhesajjaṃ karoti. **Saṅghabhedakathā** parato āgamissati. **Veludānādīhī**ti veludānapattadānapupphadānādīhi micchājīvena **jīvikamaṃ kappeti**. **Sakalampī**ti “atthi anācāro, atthi agocaro”tiādinā **vibhaṅge** (vibha. 513, 514) āgataṃ sabbampī anācāraṃ agocaraṅca caraṇavasena paripūreti.

“**Nirayampi ...pe... peṭṭivisayampi gacchati**”ti vatvā tattha peṭṭivisayagamaṇaṃ dassento “**samaṇayakkho nāma hotī**”tiādimāha.

Sukkapakkhe **parisuddhanti** sabbaso visuddham asaṅkiliṭṭham. Parisuddhattā eva **pariyodātam**, pabhassaranti attho. **Surattavaṇṇamevassāti** suṭṭhu rattavaṇṇameva assa. **Parisuddhavaṇṇamevassāti** nīlavaṇṇopissa parisuddho ca bhaveyyāti evamādiṃ sandhāyāha “**kaṇhapakkhe vuttapaccanikeneva veditabbā**”ti. **Raṅgajātanti**ādi pana tattha vuttavaseneva veditabbaṃ. **Paṭipattisugati**ādīsu yaṃ vuttabbaṃ, taṃ paṭipattidugatiādīsu vuttavipariyāyena veditabbaṃ. **Parisuddhacittoti** suddhāsayo. **Dasa kusalakammapathe paripūretī** idaṃ kaṇhapakkhe “dasa akusalakammapathe paripūretī”ti vuttassa paṭipakkhadassanavasena vuttaṃ. Yathā hi tattha abhijjhābyāpādamicchādiṭṭhiggahaṇena kammapathasaṃsandananayena kammapathaṃ appattāya ca agāriyassa tathārūpāya micchāpaṭipattiyā saṅgaho icchito, evaṃ idhāpi anabhijjhābyāpādasammādiṭṭhiggahaṇena alobhādosāmohavasena pavattā agāriyassa sammāpaṭipatti saṅgahitāti daṭṭhabbaṃ, na kammapathappattāvāti. **Manussamahantatanti** jātirūpabhogādhipateyyādivasena manussesu mahantabhāvaṃ. Dasahi ṭhānehi aññesaṃ devānaṃ abhibhavo **devamahantatā**. Paṭipatti sugatiyā bhājiyamānattā “**anāgāmimaggaṃ bhāvetī**”ti tathā anāgāmibhāvanaṃ pāpetvā ṭhapitā. Gahitaggahaṇena sukhānubhavaṭṭhānassa adhippetattā tadabhāvato asaṅgābhavaṃ anādiyanto “**dasasu vā brahmabhavanesū**”tiādimāha.

**71. Sakabhaṇḍe chandarāgo** abhijjhāyanatṭhena **abhijjhā**, abhijjhāyanāti attho. **Parabhaṇḍe chandarāgo** visamaṃ lubbhātīti **visamalobho**. Evampi abhijjhāvisamalobhānaṃ vireso hotīti dassento “**atha vā**”tiādimāha. Tattha attano santakaṃ taṃsadiṣaṅca **yuttaṭṭhānaṃ**. Yaṃ yācītaṃ, appakasirena vā sakkā laddhuṃ, taṃ **pattaṭṭhānaṃ**. Paradāragarudārāti **ayuttaṭṭhānaṃ**. Yaṃ apatthaniyaṃ, yassa vā patthanāya byasanaṃ āpajjati, taṃ **appattaṭṭhānaṃ**. **Theroti mahāsaṅgharakkhitatthero**, yena **aṭṭhakathā** potthakaṃ āropitā. So hi antevāsikesu sākacchantesu evamāha. Sopi imasmiṃyeva sutte vinibbhogo na labbhati cittasaṅkilesassa adhippetattā. Tenāha “**yutte vā**”tiādi. Ayonisomanasikāravasena uppajjanato sampatti āyatiṅca dukkhasseva uppādanato **na koci lobho avisamo nāma**. **Abhijjhāyanatṭhenāti** yassa kassaci ārammaṇassa yuttassa ayuttassa appattassa ca abhijjhāyanavasena abhipatthanāvasena ca pavattā taṇhā **abhijjhāti** lobhato nibbisesanti dasseti. Tenāha “**ekatthametam byañjanaṃ nāna**”nti. **Dūsetīti** sabhāvasantaṃ asaṅkilesaṃ vināseti avisuddham karoti. Tenāha “**obhāsituṃ na detī**”ti. “Ime sattā ucchijjantu vinassantū”ti sattesu byāpajjanākārappavattiyā **byāpādo navavidhaāghātavatthusambhavo** vutto. Kodho pana saṅkhāresupi pavattanato dasavidhaāghātavatthusambhavo vutto. Ubhayampi paṭighameva, pavattanānattato bhinditvā vutto. Kujjhanavaseneva **cittapariyonandhano** “akkocchi maṃ avadhi ma”ntiādinā.

Suṭṭhu kataṃ karaṇaṃ **sukataṃ**, tassa pubbakāritālakkaṇassa guṇassa **vināsano** udakapuñchaniyā viya sarīrānugataṃ udakaṃ puñchanto **makkho**. Tathā hi so paresaṃ guṇānaṃ makkhanaṭṭhena “makkho”ti vuccati. Idāni **anagāriyassa vāti**ādinā saṅkhepena vuttatthaṃ vitthārena dassetuṃ “**anagāriyopi**”tiādi vuttaṃ. Nisinnakathāparikathādivasena dhammassa kathā dhammakathānayo, ekattādidhammanīti eva vā. Pakaraṇaṃ satta pakaraṇāni, tattha kosallaṃ **dhammakathānaya pakaraṇakosallaṃ**. **Ādi**-saddena vinayakkame catūsu mahānikāyesu ca kosallaṃ saṅgaṇhāti. **Acittikatoti** cittikārahito. **Yathā cāyanti** iminā yathāyaṃ makkho cittaṃ dūseti, evaṃ paḷāsopi cittaṃ dūseti, tasmā upakkilesoti dasseti. **Aniyatā gati niyāmokkamanābhāvato**. **Ādi**-saddena “rattaññū cirapabbajite puggale ajjhottharivā ‘tvampi imasmiṃ sāsane pabbajito, ahampi pabbajito, tvampi sīlamatte ṭhito ahampī’ti” evamādiṃ saṅgaho. **Yugaggāhagāhīti** “tava vā mama vā ko vireso”ti asamampi samaṃ katvā samadhuraggāhagaṇhanako. **Khīyanā** usūyanā. Attano sampattiyā nigūhanaṃ tassa parehi sādharmaṇabhāvāsahanena hotīti “**parehi sādharmaṇabhāvaṃ asahamānaṃ**”iceva vuttaṃ. Kāraṇe hi gahite phalampi gahitameva hotīti. Aññathā attano pavedanakapuggalo **kerāṭiko**, “nekatikavāñji”tipi vadanti. Sappamukhā macchavālā ekā macchajāti āyatanamaccho. Tenāha “**āyatanamaccho nāmā**”tiādi. **Baddhacaroti** antevāsī.

Sabbaso amadditasabhāvena vā tabharitabhattasadisassa thaddhabhāvassa anonamitandaṇḍasadisatāya paggaḥitasiraanivātavuttikārassa ca karaṇato **vā tabharita...pe... karaṇo**. **Taduttarikaṇoti** yaṃ yena kataṃ ducaritaṃ vā sucaritaṃ vā, taduttari, tassa dviguṇaṃ vā karaṇo. Attano maṇḍanādiatthaṃ **parena kataṃ alaṅkāradim**. **Pariyāpuṇāti vā katheti vā** attano

balānurūpaṃ. Kāmaṃ nikāyadvayaggahaṇādivasena pavatto sevitabbamāno eva, tathāpissa saṃkilesapakkhattā vuttaṃ “**mānaṃ anissāyā**”ti.

**Uṇṇativasenāti** “seyyohamasmī”tiādinā cittassa paggahaṇavasena. Pubbe kenaci attānaṃ sadisaṃ katvā pacchā tato adhikato dahanato uppajjanako **atimāno**. **Madaggahaṇākāro** jātiādiṃ paṭicca majjanākāro, sopi atthato māno eva. **Pamādo** tathāpavatto cittuppādo.

**Tasmā lobhamādiṃ katvā dassetī**ti lobhassa ādito gahaṇe kāraṇaṃ vibhāvetukāmo pucchati. **Paṭhamuppattitoti** tattha tattha bhava sabbapaṭhamaṃ uppajjanato. Sattānañhi yathādhigataṃ jhānādivisesaṃ ārabba paccavekkhaṇā viya yathāladdhaṃ upapatibhavaṃ ārabba nikanti eva. Tenāha “**sabbasattāna**”ntiādi. **Yathāsambhavaṃ itareti** itare byāpādādayo yathāpaccayaṃ uppajjanti, lobhassa viya ādito asukassa anantaraṃ asukoti vā na nesaṃ niyamo atthīti attho. Kiṃ pana ete soḷaseva cittassa upakkilesā, udāhu aññepi santīti anuyogaṃ sandhāya aññepi santīti dassento “**na ca ete**”tiādimāha. Yadi evaṃ kasmā ettakā eva idha vuttāti. Nayadassanavasenaṃ dassento āha “**etena pana...pe... veditabbā**”ti. Tena thinamidhauddhaccakukkucca-vicikicchā-attukkamsana-paravabbhanachambhitattā- bhīrukātā-ahirikānottappa-atticchatā-pāpicchatā-mahicchatādayo saṅgahitāti veditabbaṃ.

**72. Saṃkilesaṃ dassetvāti** saṃkiliṭṭhavattanidassanena saṅkhepena vuttaṃ saṃkilesaṃ vibhāgena dassetvā. **Vodānaṃ dassentoti** etthāpi eseva nayo. **Evaṃ jānitvāti** “abhijjhā visamalobho ekanteneva cittassa uppakkilesa”ti sabhāvato samudayato nirodhato nirodhūpāyato ca pubbhāgapaññāya ceva heṭṭhimamaggadvayapaññāya ca jānitvā. **Pajahatīti** ettha accantappahānameva adhippetanti dassento “**samucchedappahānavasena ariyamaggena pajahatī**”ti āha. **Ariyamaggenāti** anāgāmimaggena. Tena hi pahānaṃ idha sabbavāresu adhippetam. **Kilesapaṭipāṭi** idha kilesānaṃ desanākkamo. **Maggapaṭipāṭi**pana catunnaṃ ariyamaggānaṃ desanākkamopi tāya desanāya paṭipajjanakkamopi tāya paṭipattiyā uppattikkamopi. Tattha ye ye kilesā yena yena maggena pahīyanti, maggapaṭipāṭiṃ anoloketvā tesam tesam kilesānaṃ tena tena maggena pahānadassanaṃ kilesapaṭipāṭi na kilesānaṃ uppattikkamo idha desanākkamo cāti dassento “**abhijjhā visamalobho**”tiādimāha. Yena yena pana maggena ye ye kilesā pahīyanti maggānupubbīyā, tena tena maggena tesam tesam kilesānaṃ pahānadassanaṃ maggapaṭipāṭiyā pahānadassananti dassento “**sotāpattimaggenā**”tiādimāha.

**Imasmiṃ pana ṭhāneti** “sa kho so, bhikkhave, bhikkhū”tiādinā āgato imasmiṃ pahānavāre. **Ime kilesāti** ime yathāvuttā kilesā. **Sotāpattimaggavajjhā vā hontu sesamaggavajjhā vā**heṭṭhā dassitamaggapaṭipāṭivasena. Tattha pana ye tatiyamaggavajjhā, tesam anāgāmimaggeneva pahāne vattabbaṃ natthi, yesam panettha heṭṭhimamaggavajjhānaṃ idha saṅgahe kāraṇaṃ pacchā vattukāmena aggamaggavajjhānaṃ anādiyitvā kasmā tatiyamaggavajjhānameva gahaṇaṃ katanti āha “**ayamettha pavēnimaggāgato sambhavo**”ti, ayaṃ imassa suttassa etasmiṃ ṭhāne ācariyapaveṇiyā kathāmaggo tato āgato atthasambhavo atthatatvanti attho. Tattha heṭṭhimamaggavajjhānaṃ idha saṅgahe kāraṇaṃ pacchā vattukāmo aggamaggavajjhānaṃ aggahaṇe yuttim dassento “**so cā**”tiādimāha. **Tenāti** catutthamaggena. **Sesānanti** byāpādādīnaṃ. **Yepīti** makkhādike sandhāyāha. **Taṃsamuttāpakacittānanti** tesam makkhādīnaṃ samuttāpakacittuppādānaṃ. Tattha makkha-paḷāsa-issā-macchariya-samuttāpakam paṭighadvayacittam, visesato pañcakāmaguṇalobhena saṭho māyāvī ca hoti, pañcakāmaguṇikarāgo ca anāgāmimaggeneva niravasesato pahīyati, tasmā vuttaṃ “**taṃsamuttāpakacittānaṃ appahīnattā**”ti. Tepi suppahīnā hontīti sambandho. **Tanti** paṭhamamaggeneva pahānaṃ **pubbāparena na sandhiyati** “yathodhi kho”ti ettha odhivacanassa maggattayavācakattā. Ratanattaye aveccappasādo nāma ariyakantasīlaṃ viya sotāpannessa aṅgāni, te ca pahānato pacchā niddiṭṭhā, tasmā idha vuttappahānaṃ vikkhambhanapahānamevāti keci vadanti. **Tesam icchāmattameva** yathāvuttappahānasseva vasena aveccappasādānaṃ odhiso pahānassa vibhāvitattā, svāyamatto heṭṭhā yuttitopi pakāsītoyeva.

**74. Ekamekena padena yojetabbaṃ**, yato ekamekassapi upakkilesassa sabhāvādito dassanaṃ niyyānamukhaṃ hoti, tathā ceva heṭṭhā saṃvaṇṇitaṃ. Anāgāmimaggavasena pahānaṃ vatvā pasādassa

uddhaṭṭā vuttaṃ “**anāgāmi maggena lokuttarappasādo āgato**”ti. Yadi evaṃ kasmā “lokiyo uppajjati”ti vuttanti? “Itipi so bhagavā”tiādinayappavattassa lokiyattā. Nibbānārammaṇo eva hi lokuttaro pasādo. “Itipi so bhagavā”tiādivacanena lokiyaṃ, aveccappasādavacanena lokuttaranti **lokiyalokuttaramissakaṃ pasādaṃ dassento**. Avecca ratanattayaguṇe yāthāvato ñatvā pasādo **aveccappasādo**. So pana yasmā maggenāgatattā kenaci akampaniyo appadhamāsiyo ca hoti, tasmā vuttaṃ “**acalena accutenā**”ti. Tattha lokuttaro sabbaso buddhaguṇādāsu sammohaṃ viddhamāsentō tattha kiccato pavattati, itaro ārammaṇavasena te ārabba. **Taṃ vidhanti** taṃ tassa uppannappakāraṃ. **Anussatiṭṭhānānī**ti anussatikammaṭṭhānāni.

**75. Somanassādīti ādi**-saddena ñāṇādīni saṅgaṇhāti. Corānaṃ abhiṇhaṃ sañcaraṇaṭṭhānatāya **paccantaggahaṇaṃ**. **Paccavekkhatoti** “asukasmiṇca ṭhāne ime cime corā evaṇca evaṇca vināsītā”ti paccavekkhato **rañño viya**.

Yo yo odhi **yathodhi**. Yathā-saddo byāpanicchāyaṃ, kho saddo avadhāraṇeti dassento “**sakasakaodhivasena cattameva hoti**”tiādimāha. Tena “vanta”ntiādisupi avadhāretabbanti dasseti. **Sakasakaodhivasenā**ti saṅkhepato vuttamatthaṃ vivarituṃ “**dve odhi**”tiādi āradhāṃ. Tattha **yaṃ maggavajjhāti** yena maggena anavasesato pahātabbā. Anavasesappahānavasena hi taṃtaṃ maggavajjhānaṃ kilesānaṃ tadaññamaggavajjhehi asammissatā, aññathā ye sakasakaodhivasena uparimaggavajjhā, te heṭṭhimamaggehi pahīnāpāyagamanīyādisabhāvā eva tehi pahīyantīti pahānavasena sammissā siyuṃ. **Tena teyeva pahīnā hotīti** ethāpi eseva nayo. **Tatuttaripīti** tato pahānamittasomanassuppattito uddhampi. Paṭipakkhesu odhiso pavattikiccattā **odhīti heṭṭhā tayo maggā vuccanti**. **Te hītiādi** vuttassevatthassa vivaraṇaṃ. **Imassa bhikkhunoti** anāgāmiṃ sandhāyāha. Tena vuttaṃ “**heṭṭhā maggattayena catta**”nti.

Keci cattampi gaṇhanti, nayidamevanti dassanattaṃ “**vanta**”nti vuttaṃ. Na hi yaṃ yena vantaṃ, so puna taṃ ādiyati. Tenāha “**anādiyanabhāvadassanavasenā**”ti. Vantampi kiñci sasantatilaggaṃ siyā, nayidamevanti dassanattaṃ “**mutta**”nti vuttaṃ. Tenāha “**santatito vinimocanavasenā**”ti. Muttampi kiñci muttabandhanā viya phalaṃ kuhiñci tiṭṭhati, na evamidanti dassanattaṃ “**pahīna**”nti vuttaṃ. Tenāha “**kvaci anavaṭṭhānadassanavasenā**”ti. Yathā kiñci dunnissaṭṭhaṃ puna ādāya sammadeva nissaṭṭhaṃ paṭinissaṭṭhanti vuccati, evaṃ vipassanāya nissaṭṭhaṃ ādinnasadisam maggena pahīnaṃ paṭinissaṭṭhaṃ nāma hotīti dassanattaṃ “**paṭinissaṭṭha**”nti vuttaṃ. Tenāha “**ādinnapubbassa paṭinissaggadassanavasenā**”ti. Na kāpurisena viya parammukhena nissaṭṭhaṃ, atha kho abhimukheneva nissaṭṭhanti dassanattaṃ “**paṭinissaṭṭha**”nti vuttaṃ. Tenāha “**paṭimukhaṃ vā**”tiādi. **Upagantabbatoti** attano hitasukhaṃ paccāsāntena ekantena adhigantabbato. **Dhāraṇatoti** taṃsamaṅgīnaṃ apāyapātato sandhāraṇena. **Gantho “vedo”ti vuccati** “vidanti etenā”ti, vedehi ñāṇehi gato paṭipannoti **vedagū**. **Abhijaññāti** jāneyya. **Vedajātāti** uppannasomanassā. **Ñāṇaṃ “vedo”ti vuccati** “veditabbaṃ vedetī”ti. **Somanassaṃ “vedo”ti vuccati** ārammaṇarasam vindati anubhavatīti.

**Uppannanti** aveccappasādaṃ nissāya uppannaṃ. **Vuttappakārameva vedanti** “somanassaṃ somanassamayañāṇaṇcā”ti evaṃ vuttappakārameva. **Atthavedanti** atthe hetuphale vedaṃ. **Dhammavedanti** dhamme hetumhi vedaṃ. Tenāha “**aveccappasādassa hetu**”ntiādi. Idha dhammatthasaddā hetuphalapariyāyāti imamatthaṃ pāḷiyā eva dassetuṃ “**vuttañheta**”ntiādi vuttaṃ. **Tameva atthañca dhammañcāti** attho dhammoti ca vuttaṃ aveccappasādanimittaṃ yathāvuttaṃ kilesappahānañca. **Atthadhammānisamsabhūtaṃ vedanti** yathāvuttaatthadhammānisamsabhūtaṃ somanassamayañāṇasaṅkhātaṃ vedañca. **Pāmojjanti** taruṇapītiṃ āha. **Paccavekkhaṇākārappavattenāti** etena paccavekkhaṇā evettha anavajjasabhāvatāya dhammoti vuttoti daṭṭhabbaṃ. **Pīti jāyatīti** parappaccayaṃ balavapītimāha. **Pīnitamanassāti** passaddhiāvahehi uḷārehi pītiवेgehi tittacittassa. **Kāyoti** nāmakāyo. **Vūpasantadarathoti** kilesapariḷāhānaṃ dūrībhāvena suṭṭhu upasantadaratho. Paccavekkhaṇahetukaṃ cittassa samādhānaṃ idha adhippetanti āha “**appitaṃ viya acalaṃ tiṭṭhati**”ti.

76. Kāmaṃ “buddhe aveccappasādena samannāgatomi, dhamme saṅghe aveccappasādena samannāgatomi”ti idampi tassā paccavekkhaṇāya pavattiākārapakāsanameva, idaṃ pana visesato ratanattaye uppannasomanassādippakāsanapadaṃ. “Yathodhi kho panā”ti idampi savisesaṃ paccavekkhaṇākārapakāsanapadanti adhippāyena “**idāni yathodhi...pe... pakāsetvā**”ti vuttaṃ. Cattāropi pana vārā paccavekkhaṇākārapakāsanavasena ceva somanassādīānisamsadassanavasena ca vuttāti sakkā viññātuṃ ubhayatthāpi ubhayassa vuttattā. Yadipe ariyamaggo ekacittakkhaṇiko na puna uppajjati, paṭipakkhassa pana tena supphānattā taṃsamaṅgī aparihānadhammo taṃsilādibhāveneva vuccatīti āha “**tassa anāgāmimaggasampayuttaṃ silakkhandhaṃ dasseti**”tiādi. “Evaṃdhammā te bhagavanto ahesu”ntiādisu (dī. ni. 2.13; ma. ni. 3.197-198; saṃ. ni. 5.378) viya idha dhamma-saddo samādhipariyāyoti āha “**samādhikkhandhaṃ paññākkhandhaṃca dasseti**”ti. Tathā hi so sampayuttadhamme ekārammaṇe avikkhipamāne avippakiṇṇe avisaṭe katvā samaṃ, sammā ca ādahanto tathā te dhāretīti ca vattabbataṃ arahatīti dhammoti ca vuccati. **Anekarūpānanti** anekappakārānaṃ. Antarāyo nāma appaṭiladdhassa vā alabbhanavasena, paṭiladdhassa vā parihānavasena, tadubhayampi idha natthīti dassento “**maggassa vā**”tiādimāha. **Nevassa taṃ hoti antarāyāyāti** tassa anāgāmino piṇḍapātabhojanaṃ neva hoti antarāyāya ukkaṃsagatāya paccavekkhaṇāya paccavekkhitvā paribhuñjanato. Tañcassā ukkaṃsagamanam hatapaṭipakkhattāti dassento “**maggena visuddhacittattā**”ti āha.

**Etthāti** etasmim antarāyābhāve. **Etadeva** visuddhacittattameva **kāraṇam**. Ettha ca “nevassa taṃ hoti antarāyāyā”ti iminā heṭṭhā vuttappahānaṃ anāgāmimaggenevāti siddhaṃ hoti. Anāgāmino hi sabbaso kāmarāgo pahīno hoti, rasataṇhāya abhāvato tādisapiṇḍapātaparibhogo aggamaggādhigame kathaṅcīpi antarāyāya na hotīti. “Seyyathāpi, bhikkhave, vattha”nti vadanto bhagavādimhi attanā upanītavatthūpamaṃ anusandheti. Udakassa acchabhāvo paṅkasevālapaṇakādimalābhāvena pasannatāya, tabbipariyāyato bahalatāti āha “**acchanti vippasanna**”nti. Vaṇṇanibhāya vigatasamkilesatāya samujjalanam pabhassaratāya vatthassa, taṃ pariyodātanti vattabbataṃ labhatīti āha “**pariyodātaṃ pabhassaratāyā**”ti. **Ukkaṃ bandheyyāti** aṅgārapallamaṃ yathā dāruhaṭīkaṅgārādikena na bhijjati, evaṃ tanumatikālepādīnā bandheyya. Meghapaṭalato verambhavātadhārāsāṅghaṭṭanato vijjutā viya kevalaṃ vātadhārāsāṅghaṭṭanajantā pabhā ukkāpabhā, sā pana yasmā dvinnam vātadhārānaṃ vegasambhūtasāṅghaṭṭanahetukā, tasmā kāraṇavasena “**vātavego ukkā**”ti vuttaṃ.

77. **Yathānusandhivasenāti**ādimhi utthitadesanāya anurūpā anusandhi yathānusandhi, tassā vasena. Byatirekadassanaṃ viya hi sādhetabbassa ādimhi utthitadesanāya paṭipakkhadassanampi anurūpadesanāva sammadeva paṭiṭṭhāpanabhāvato, yathā taṃ āvattahārayojanāyaṃ visabhāgadhammāvattanti daṭṭhabbam. “**Yathānusandhivasena desanā āgatā**”ti saṅkhepato vuttamatthaṃ vitthārento tappasaṅgena itarepi anusandhī dassetuṃ “**tayo hī**”tiādimāha. **Bahiddhāti** bāhiresu vatthūsu. **Asati paritassanāti** taṇhādīṭṭhiparitassanābhāvo. **Vissajjitasuttavasenāti** “idha bhikkhu ekaccassā”tiādinā (ma. ni. 1.242) vissajjitasuttavasena. **Yena dhammenāti** silādivodānadhammesu akkhantiyādisamkilesadhammesu ca yena yena dhammena. **Cha abhiññā āgatāti** iminā “anurūpadhammavasena vā”ti vuttavikappaṃ dasseti, sesehi “paṭipakkhavasena vā”ti vuttavikappaṃ. Akkhantiyā hi kakacūpamovādo (ma. ni. 1.222) paṭipakkho, tathā diṭṭhiyā “netam mama, nesohamasmi, na meso attā”ti evaṃ paṭibhāgā suññatākārena. Sesadvayepi eseva nayo. “Citte samkiliṭṭhe duggati paṭīkaṅkhā”ti (ma. ni. 1.70) heṭṭhā kilesadesanā āgatā. **Sabboti** anavaseso. **Sabbākārenāti** ādīnāvānisamsapaccavekkhaṇapuggaladosajānanādinā sabbappakārena.

78. “Mettā bhāvetabbā byāpādassa pahānāyā”tiādivacanato (a. ni. 9.1) mettādayo byāpādavihesārātirāgānaṃ paṭipakkhā. Yasmā “so atthī”tiādinā bhagavatā anāgāmino aggamaggādhigamaṃ catusaccakammaṭṭhānaṃ matthakaṃ pāpetvā kathitaṃ, tasmā taṃ dassento “**idānissā**”tiādimāha.

**Brahmavihāradhammeti** brahmavihāre ceva brahmavihārasahagatadhamme ca. Tenāha



“**nāmavasenā**”ti. Vavatthapetvāti ānetvā sambandhitabbaṃ. Nāmantihi hi īdisesu ṭhānesu cattāro arūpino khandhā vuccanti. **Iminā nāyena**ti etena bhūtanissitānaṃ sesupādāyadhammānaṃ sabbesampi pahātabbatāṇhāvajjānaṃ tebhūmakadhammānaṃ pariggahavidhiṃ ulliṅgeti. Sabhāvato vijjamānaṃ taṃ attapaccakkhaṃ katvā ñāṇena yāthāvato paṭivijjhiyamānataṃ upādāya “atthi ida”nti yathāvavatthāpitaṃ nāmarūpaṃ. Tenevāha “**ettāvātānena dukkhasaccavavatthānaṃ kataṃ hoti**”ti. Sāvadhāraṇaṇcetanaṃ vacanaṃ, lokasamaññāsiddhaṃ sattaitthipurisādi viya, ito bāhirakaparikkappitaṃ pakatiādi drabyādi jīvādi kāyādi viya ca na paramatthato natthi, atthevāti vuttaṃ hoti. **Pajānāti**ti pubbhāge tāva lakkhaṇarasādivasena ceva paṭiggahavibhāgavasena ca pakārato jānāti, aparabhāge pana pariññābhisamayavasena paṭivijjhanto jānāti. Ekantahīnā nāma akusaladhammā sampati āyatiṅca dukkhamūlattā, tatthāpi visesato taṇhāti āha “**dukkhassa samudayaṃ paṭivijjhanto atthi hīnanti pajānāti**”ti. Attano paccayehi padhānabhāvaṃ nītattā paṇītanti iminā atthena ariyamaggova “paṇīta”nti vuccatīti āha “**pahānupāyaṃ vicinanto atthi paṇītanti pajānāti**”ti. “Uttamatthena ca paṇīta”nti vuccamāne nirodhasaccassapi saṅgaho siyā, tassa pana padantarena saṅgahitattā vuttanayenevettha attho veditabbo. Appamaññāmukhena vipassanābhinivesasseva katattā “**brahmavihārasaññāgatassā**”ti vuttaṃ. “Sabbassapi tebhūmakassa saññāgatassā”ti vuttaṃ vaṭṭatiyeva. Na cettha asaṅgaho tassāpi saññāya āgatabhāvato. Lokaṃ uttaritvā samatikkamitvā nissaritvā viṣaṃyuttaṃ hutvā ṭhitattā vuttaṃ “**uttari nissaraṇaṃ nibbāna**”nti.

**Catūhi ākārehi**ti “atthi hīna”ntiādīhi catūhi pakārehi. Anvayañāṇatāya anubodhabhūtāya vipassanāpaññāya jānanattho dhammañāṇatāya paṭivedhabhūtāya maggapaññāya dassanattho sabhāvasiddhoti dassento “**vipassanāpaññāya cattāri saccāni jānanato maggapaññāya passato**”ti vuttaṃ. **Bhayabherave vuttanayenevāti** bhayabheravasuttavaṇṇanāyaṃ attanā vuttaatthavacanatthapāṭhena idha pāṭhassa sadisattā atidisanto “**kāmāsavāpi...pe... pajānāti**”ti āha. Ettha ca yasmā “kāmāsavāpi cittaṃ vimuccati...pe... avijjāsavāpi cittaṃ vimuccati”ti “khīṇā jāti”tiādīni vadatā bhagavatā catutthamaggo niddiṭṭho, tasmā yaṃ heṭṭhā **aṭṭhakathāyaṃ** vuttaṃ “so ca upari catutthamaggasseva niddiṭṭhattā yujjati”ti, taṃ suvuttamevāti daṭṭhabbaṃ.

**Tassa codanatthāyāti** tassa brāhmaṇassa bhagavā attano codanatthāya “puccha maṃ tvam brāhmaṇa yadettha tayā manasābhisamīhita”nti codanāya, okāsadanatthāyāti adhippāyo. Desanāsannissayo brāhmaṇassa tathārūpo ettha ajjhāsayopi natthīti yathāvuttaanusandhittayavinimuttattā “**pāṭiyekkaṃ anusandhiṃ āhā**”ti vuttaṃ. Cittagatattā **abbhantarena. Kilesavuṭṭhānasinānenāti** kilesamalapavāhanena rāgapariṭhādivūpasamakarena ca aṭṭhaṅgikaariyamaggasallasinānena.

79. Dhammasabhāmaṇḍapaṃ tāvadeva upagatattā bāhukā nadito **āgataṃ viya maññamāno**. Ariyaphalamaddanacuṇṇādayo telasinehassa vivecanena. Lūkhabhāvo lokaṃ, taṃ etissā atthīti lokāti sammatā. **Lokkhasammata**ggahaṇena “tathā sā nadī loke pākāṭā”ti evaṃ pavattaṃ attano micchāgāhaṃ dīpeti. Tenāha “**visuddhabhāvaṃ detīti evaṃ sammatā**”ti. Pāpapavāhanena samparāyikādisampattiāvahato lokassa hitā **lokyā**. Lokyāti sammatāti sabbaṃ purimasadisamaṃ. Tenāha “**seṭṭhaṃ lokaṃ gamayatīti evaṃ sammatā**”ti. **Puññasammata**ti pujjabhavaphalanibbattanena sattānaṃ punanena visodhanena puññāti sammatā. **Tadatthadīpanatthamevāti** tassā pubbe āgatadesanāya atthadīpanatthameva. Vuttassevatthassa puna dīpanaṃ kimatthiyanti āha “**gāthārucikāna**”nti. Cuṇṇikavacanaṃ asambhāventā tathā ca vutte atthamabujjhanakā pajjavacanaṃ sambhāventā tathā ca vutte bujjhanakā gāthārucikā. **Visatthadīpanatthanti** visiṭṭhadīpanattham, purimadesanāya aññadīpanatthanti attho.

“Gacchati pana bhavaṃ gotamo bāhukaṃ nadiṃ sināyitu”nti (ma. ni. 1.78) heṭṭhā vuttattā **bāhukanti idameva ettha tadatthadīpakam**. **Sesāni** adhikakkādivacanāni tato visiṭṭhassa atthassa bodhanato **visatthadīpakāni**. Kasmā panettha bhagavatā brāhmaṇena avuttāni adhikakkādīni gahitānīti āha “**yatheva hī**”tiādi. Kakkanti nhānapiṇḍaṃ adhippetam, nhāyitvā adhikaṃ kakkam ettha gaṇhantīti **adhikakkam**. Tenāha “**nhānasambhārasenā**”tiādi. **Maṇḍalavāpisaṇṭhānanti**

vaṭṭapokkharāṇisaṅṭhānaṃ. **Nadiyoti** visuṃ nadiyo, na adhikakkādīni viya titthamattaṃ.

**Tīhi padehīti** sundarikāpayāgabāhukāpadehi. **Cattārīti** adhikakkādīni cattārī. **Vuttāneva hontīti** lokasammataḷakkhaṇena ekalakkhaṇatā brāhmaṇassa adhippāyena, paramatthato pana pāpapavāhalakkhaṇena ekalakkhaṇattā. Tenāha “**tasmā**”tiādi. **Kiñci** pāpasuddhiṃ **na karontiyeva**. **Na hi naṃ sodhayeti** naṃ puggalaṃ na sodhaye. **Verakibbisabhāvaṃ appattā** nāma kammaṭṭhābhāvaṃ appattā. Tenāha “**khuddakehī**”ti.

**Paṭihanantoti** ayuttabhāvadassanena taṃ diṭṭhiṃ paṭibāhanto. Tatthāyaṃ paṭibāhanavidhi yathā yaṃ kiñci udakorohanaṃ na pāpapavāhanaṃ, evaṃ yo koci nakkhattayogo pāpahetūnaṃ paṭipakkhābhāvato. Yañhi vināseti, so tassa paṭipakkho. Yathā āloko andhakārassa vijjā ca avijjāya, na evaṃ udakorohanaṃ nakkhattayogo vā pāpahetūnaṃ lobhādīnaṃ paṭipakkho, tasmā niṭṭhamettha gantabbaṃ “na udakorohanādi pāpapavāhana”nti. **Niccaṃ phaggunīnakkhattanti** suddhasīlādikassa sabbakālaṃ maṅgaladivaso evāti adhippāyo. **Itaroti** sīlādivasena asuddho. **Niccomeva uposatho** ariyuposathena upavutthabhāvato. **Suddhassāti** parisuddhamanosamācārassa. **Sucikammassāti** parisuddhakāyavacīsamācārassa. Tenāha “**nikkilesatāyā**”tiādi. **Kusalūpasañhitanti** anavajjabhāvūpagataṃ. **Vatasamādānanti** dhutadhammasamādānādi **sampannameva hoti**, nāssa vipatti atthīti attho. **Mama sāsaneyeva sināhi**, yadi accantameva suddhiṃ icchasīti adhippāyo. Tenāha “**sace**”tiādi. **Khematanti** khemabhāvaṃ. Yathā sabbabhūtāni tapavasena khemappattāni abhayappattāni honti, evaṃ karohīti taṃ heṭṭhā dassitaṃ mettādibhāvanaṃ brāhmaṇassa saṅkhepena upadisantenassa ekaccasamādhisampadā tadavinābhāvinī paññāsampadā ca dassitāti daṭṭhabbaṃ. Tenāha “**manodvārasuddhi dassitā**”ti.

Tassa pana sampadādvayassa nissayabhūtaṃ sīlasampadaṃ dassetuṃ “**sace musā na bhaṇasī**”tiādi vuttaṃ. Ettha ca yathā “sace musā na bhaṇasī”tiādinā musāvāda-pāṇātipāta-adinnādāna-paṭivirativacanena avasesakāyavacīduccaritaviratīpi vuttā eva hoti lakkhaṇahāranayena, evaṃ “saddahāno amaccharī”ti saddhādīdhanasampadāniyojaneneva avasesaariyadhanasampadāniyojanampi siddhameva hotīti saddhādayo vimuttiparipācanīyadhammā brāhmaṇassa pakāsītā evāti veditabbā. Tenevāha “**imāya eva paṭipattiyā kilesasuddhi**”ti. **Gayā sammatatarā** bāhukādīhipīti adhippāyo.

**80. Ekoti** asahāyo, esā panassa asahāyatā ekībhāvenāti. Na hissa tāva taṇhādutiyatā viḡatā. Tenevāha “**na cirassevā**”tiādi. Ekaggahaṇeneva kāyena vūpakaṭṭhatā vuttāti āha “**vupakaṭṭho cittavivekenā**”ti. Tena “divā caṅkamaṇa nisajjāyā”tiādinā (ma. ni. 1.423; 3.75; vibha. 519; mahāni. 161) āgataṃ jāgariyānuyogamāha. Tathābhūtassa cassa ekādasahi aggīhi āditte tayo bhavaṃ passato yathā pamādassa lesopi nāhosi, evaṃ kammaṭṭhānaṃ brūhento sammadeva padahati. Katthaci saṅkhāragate anapekkhacitto nibbānādhimutto eva vihāsīti dassetuṃ “**appamatto**”tiādi vuttaṃ. **Khīṇā jāṭī**tiādisu yaṃ vattabbaṃ, taṃ heṭṭhā vuttameva. Sesam suviññeyameva.

Vatthasuttavaṇṇanāya līnatthappakāsanā samattā.

## 8. Sallekhasuttavaṇṇanā

**81.** “Cundo”ti tassa mahātherassa nāmaṃ, pūjāvasena pana **mahācundoti** vuccati yathā “**mahāmoggallāno**”ti. Attano vā cundaṃ nāma bhāgineyyattheraṃ upādāya āyasmato sārīputtattherassa bhātā ayaṃ mahāthero “**mahācundo**”ti paññāyittha yathā “mahāpanthako”ti. **Sāyanhasamayanti** bhummatthe ekaṃ upayogavacananti āha “**sāyanhakāle**”ti. Na hettha accanta saṃyogo sambhavatīti. **Sattasaṅkhārehīti** saddhivihārikaantevāsikaupāsakādisatthehi ceva rūpārammaṇādīsāṅkhārehi ca. **Paṭinivattitvāti** apasakkivā. **Niliyananti** vivecanaṃ kāyacittehi tato vivittatā. **Ekībhāvoti** hi kāyavivekamāha, **pavivekoti** cittavivekaṃ. **Tato vuṭṭhitoti** tato duvidhavivekato bhavaṅguppattiyā, sabrahmacārīhi samāgamena ca apeto. **Abhivādāpetvāti** abhivādaṃ kāretvā. **Evanti** yathāvuttaabhivādavasena. Paggayhāti unnāmetvā. Anupacchinnabhavamūlānaṃ tāva

evaṃ abhivādo hotu, ucchinnabhavamūlānaṃ kimatthiyoti āha “**etaṃ āciṇṇaṃ tathāgatāna**”nti. Tena na tathāgatā samparāyikaṃyeva sattānaṃ sukhaṃ āsisanti, atha kho diṭṭhadhammikampīti daṭṭhabbaṃ. Kasmā evaṃ tathāgatā abhivadantīti tattha kāraṇamāha “**sukhakāmā hī**”tiādi. **Puthukāyāti** bahū satta kāyā. **Yakkhāti** devā. Te hi pūjanīyatāya “yakkhā”ti **vuccanti**. **Abhivadantīti** āsisitamevatthaṃ nānakaruṇāhi abhimukhaṃ katvā vadanti.

**Yāti** aniyamato gahitā niyamato dassento “**imā**”ti āha. **Imāti** ca āsannapaccakkhavacananti āha “**abhimukhaṃ karonto viyā**”ti, taṃ taṃ diṭṭhigatikaṃ cittaṅgataṃ sammukhā viya karontoti attho. **Diṭṭhiyoti** purimapadalopena pāliyaṃ vuttanti dassento “**micchādiṭṭhiyo**”ti āha. Sattesu diṭṭhigatacittuppādesu uppajjamānā, sattu vā visayabhūtesu ārabba uppajjamānā “**sattesu pātubhavanti**”ti vuttā. **Attavādenāti** attānaṃ ārabba pavattena vacanena. **Paṭisaṃyuttāti** “atthi attā”ti gāhe gāhaṇe ca visayabhāvena paṭisaṃyuttā. Diṭṭhigatikenā diṭṭhiṃ gāhantehi gāhaṇe gāhapaṇe ca diṭṭhi diṭṭhivādassa visayoti tena paṭisaṃyuttā nāma hoti. “Atthi attā”ti evaṃ pavattā diṭṭhi idha attavādapāṭisaṃyuttā, na tassā visayabhūto attā. Sā ca visayabhāvato tathāpavattena vādena paṭisaṃyuttā. **Lokavādappaṭisaṃyuttāti** etthāpi eseva nayo. **Vīsati bhavanti** tato paraṃ attavādavatthuno abhāvā. Pañcapi hi upādānakkhandhe paccekam “attā”ti te ca attano nissayabhāvena gaṇhato etāsaṃ diṭṭhīnaṃ sambhavo, tabbinimutto panāyaṃ visayo attaggaṇāṅkāro ca natthīti. **Sassato attā ca loko cāti** rūpādīsu aññataraṃ “attā”ti, “loko”ti vā gahetvā taṃ sassato sabbakālabhāvī nicco dhuvoti. Yathāha “rūpī attā ceva loko ca sassato cāti attānaṅca lokaṅca paññapeti”tiādi. **Sassatotiādisu** paṭhamo sassatavādavasena attaggāho, dutiyo ucchedavādavasena, tatiyo ekaccasassatavādavasena, catuttho takkīvādavasena pavatto, amarāvikkhepavasena vā pavatto attaggāho. **Antavāti** attano paricchedatāvasena. **Anantavāti** aparicchedatāvasena. **Antavā ca anantavā cāti** tadubhayavasena, itaro takkīvādavasena pavatto attaggāho. Evaṃ pavattattā aṭṭha hontīti yojanā.

**Ādimevāti** ādimanasikārameva. Taṃ pana sarūpato dassento “**vipassanāmissakapaṭhamamanasikāramevā**”ti āha. **Appatvāpi sotāpattimagganti** iminā avadhāraṇena nivattitaṃ dasseti. Nāmarūparicchedato pabhutī yāva udayabbayadassanaṃ, ayaṃ idha ādimanasikāroti adhippeto paññābhāvanāya ārambhabhāvato. Udayabbayānupassanāsahitatāya cassa **vipassanāmissakatā** vacanaṃ. **Evanti** imassa atthavacanaṃ “**ettakeneva upāyenā**”ti, yathāvuttaādimanasikārenāti attho. **Etāsanti** yathāvuttānaṃ attavādālokavādapaṭisaṃyuttānaṃ diṭṭhīnaṃ. Kāmaṅca tāsānaṃ tena tādāṅgavasena pahānaṃ hotiyeva, taṃ pana nādhippetam, tasmā samucchadavasena pahānaṃ paṭinissaggo ca hotīti pucchati. Sabbaso samucchinnasāmyojanatāya **anadhimānikopi samāno**. “Ariyadhammo adhigato”ti māno adhimāno, so yesaṃ atthi te **adhimānikā**, tesāṃ udayabbayaññādhigamena adhimānuppatti tadavasāno ca manasikāroti adhippeto. Tena diṭṭhīnaṃ pahānaṃ na hotīti kathāpanatthaṃ ayaṃ pucchati āha “**adhimānappahānatthaṃ pucchati**”ti. “Ādimeva nu kho...pe... paṭinissaggo hotī”ti anabhisametāvī viya vadanto adhimāne ṭhito viya hotīti āha “**adhimāniko viya hutvā**”ti. **Soti** thero. **Tesaṃ atthāyāti** tesāṃ attano antevāsikānaṃ bhagavatā etassa micchāgāhassa vivecanatthāya. Thero kira dhammasenāpati viya saddhiṃ attano antevāsikehi bhagavantaṃ upasaṅkami.

**82. Yatthāti** visaye bhummaṃ. Diṭṭhīnañhi ārammaṇanidassanametanti. Yasmā diṭṭhīnaṃ anusayanabhūmipi samudācaranāṭṭhānampi khandhā eva, tasmā āha “**yattha cetā diṭṭhiyo uppajjanti tiādi pañcakkhandhe sandhāya vutta**”nti. **Rūpaṃ abhinivissāti** “idaṃ rūpaṃ mama attā”ti diṭṭhābhinivesavasena abhinivisitvā ārabba. Abhinivisamānā eva hi diṭṭhi naṃ ārammaṇaṃ katvā uppajjati. “**So attā**”tiādisu yadidaṃ cakkhādisaṅgahaṃ rūpaṃ, sahabuddhinibandhanatāya **so me attā**, sukhāsukhaṃ ettha lokiyatīti **so loko**. “**Soevāhaṃ pecca** paraloke **bhavissāmīti** tathābhāvena **nicco**, thirabhāvena **dhuvo**, sabbadābhāvitāya **sassato**, nibbikāratāya **avipariṇāmadhammoti** attho. Yadi pañcakkhandhe sandhāya vuttaṃ, kathamekavacananti āha “**ārammaṇavasenā**”tiādi. Nānā karīyati etenāti **nānākaraṇaṃ**, viseso. **Jātivāsenāti** uppattivasena. Ye hi anibbattapubbā samānāvattā, te uppādasaṅkhātavikārasamaṅgitāya uppajjantīti samaññaṃ labhanti. Tenāha “**jātivāsenā**”tiādi. **Punappunaṃ āsevitāti** anādimati saṃsāre aparāparuppattiyā laddhāsevanā. Etena kilesānaṃ

bhāvanatthēna anusayattham viseseti. **Thāmagatā**ti thāmabhāvaṃ upagatā. Etena anusaye sabhāvato dasseti. **Thāmagamananti** ca kāmarāgādīnaṃ anaññasādhāraṇo sabhāvo. Tathā hi vuttaṃ “thāmagato anusaye pajahatī”ti (paṭi. ma. 3.21). **Appaṭiviniṭā**ti samucchadavinayavasena na paṭiviniṭā. Appahīnā hi thāmagatā kilesā anusentūti vuccanti. Etena tesam kāraṇalābhe sati uppajjanārahataṃ dasseti. **Samudācarantī**ti abhibhavanti. Etena tesam vītikkamappattataṃ dasseti. **Uppajjantī**ti pana imināva pariyaṭṭhānāvattā dassitā.

**Taṃ pañcakkhandhappabhedam ārammaṇanti** yaṃ taṃ “yattha cetā diṭṭhiyo uppajjantī”tiādīnā vuttaṃ rūpupādānakkhandhādīpañcakkhandhappabhedam diṭṭhīnaṃ ārammaṇam. **Etaṃ mayham na hotī**ti etaṃ khandhapañcakaṃ mayham santakaṃ na hoti mama kiñcanapalibodhabhāvena gahetabbatāya abhāvato. Tenassa paramatthato taṇhāvattubhāvaṃ paṭikkhipati tāvakālikādibhāvato. **Ahampi eso na asmī**ti eso pañcakkhandhappabhedo ahampi na smi, ahanti so gahetabbo na hotīti attho. Etenassa mānavattubhāvaṃ paṭikkhipati aniccadukkhaḥajegucchādibhāvato. **Eso me attāpi na hoti** attasabhāvassa tatha abhāvato mamañcassa kiñcanapalibodhabhāvena gahetabbatāya abhāvato.

Taṇhāva mamanti gaṇhāti etenāti **taṇhāgāho**. **Taṃ gaṇhantoti** taṃ uppādetto. Tenāha “**taṇhāpapañcam gaṇhātī**”ti. Papañceti santānaṃ vitthārento satte saṃsāre cirāyatīti **papañco**. **Yathā vuttapabhedanti** aṭṭhasatataṇhāvīcaritapabhedam. **Taṇhāpapañcam paṭikkhipati** khandhapañcakaṃ taṇhāvattukābhāvavibhāvanenāti adhippāyo. Parato padadvayepi eseva nayo. **Diṭṭhekaṭṭhāti** diṭṭhiyā pahānekaṭṭhā. Tena tesam paṭhamamaggavajjhataṃ dasseti. Sahajekaṭṭhā pana diṭṭhiyā taṇhā eva, na māno, sā ca kho apāyagamanīyā. **Yathā atthīti** yena aniccadukkhasubhānattākārena atthi, tathā passanto yathābhūtaṃ passati nāma. Tenāha “**khandhapañcakañhī**”tiādi. **Eteneva ākārenāti** ruppanādianiccādiākāreneva. **Gayhamānampi** appahīnavipallāsehi. **Tenākārenāti** “etaṃ mama”ntiādiākārena. **Nevatthi** yathābhūtadassanavipallāsānaṃ tadabhāvato. **Suṭṭhu passantassāti** yathā puna tathā na passitabbaṃ, evaṃ suṭṭhu sātisayaṃ passantassa.

Na ādimanasikāreneva diṭṭhippahānaṃ hoti, adhimānikānaṃ pana adhimānamattametam dassanaṃ. Maggeneva taṃ hotīti imamattham vibhāvento “**sotāpattimaggena diṭṭhippahānaṃ dassetvā**”ti āha. **Vibhajantoti** adhimānikānaṃ jhānāni asallekhabhāvena vibhajanto. **Bālaputhujjanānaṃ neva uppajjati** akārahābhāvato. **Na ariyasāvakaṇaṃ** pahīnādhimānapaccayattā. **Na aṭṭhānaniyojako** sappāyakammaṭṭhāneyeva niyojanato.

Thero “yadattham saṅgho pakkosati, so attho tatha vāsīnaṃ āgatāgatānaṃ idha ijhatī”ti taṃ udikkhanto saṅghena yāvattiyam pahitopi na gato na agāravena. Tenāha “**kimeta**”ntiādi. Paṇḍito hi tatha attano kiccameva karotīti **aññataram vuḍḍhapabbajitam pāhesi**. **Kimetanti** saṅghassa āṇāya akaraṇam nāma kimetanti karaṇe ādaram dīpento evamāha. **Saṭṭhivassātītoti** appatte pattasaññī eva saṭṭhivassātīto. Yasmā pesalā pesalehi saddhim saṃsandanti samānādhimuttitāya, tasmā thero “**sādhāvuso**”ti vatvā hatthimāpanādiṃ sabbaṃ akāsi.

**Tādisovāti** anantaram vuttattherasādisova appatte pattasaññī eva saṭṭhivassātītoti attho. **Padumagumbanti** kamalasaṇḍam. **Pāsādam pāvisi** vissattham olokanenassa puthujjanabhāvo attanāva paññāyissatīti. Tissamahāvihāre kira therā bhikkhū tadā “sakacittam pasīdati”ti vacanaṃ pūjentā kālasseva cetiyaṅgaṇam sammajjitvā ettakārammaṇameva buddhārammaṇapītiṃ uppādetvā divase divase tathā karontī. Tena vuttaṃ “**tasmīna samaye**”tiādi. “Dhammadinna, idha pattacīvaram ṭhapetī”ti **vattāpi** paṭisanthārasena kiñci **pucchitāpi nāhosi**. **Guṇam jānātīti** nimujjanādīsū vivaradānādīnā guṇam jānāti viya. **Tumhe pana na jānittha** āgantukavattassapi akaraṇato. Satthuāṇāvilāṅghinī kīdisī sā saṅghassa katikā? Katikā ca nāma sikkhāpadāvirodhena anuvattetabbā, ettakampi ajānantehi me saṃvāso natthīti ākāse abbhukkami.

**Yaṃ tassa evamassa sallekhena viharāmīti** yo “paṭhamajjhānaṃ upasampajja vihareyyā”ti

vutto, tassa bhikkhuno yaṃ “paṭhamajjhānasaṅkhātaṃ paṭipattividdhānaṃ kilese sallekhati, tena sallekhena ahaṃ viharāmi”ti adhimānavasena evamassa evaṃ bhaveyya ṭhānametaṃ vijjatīti evamettha sambandho vedītabbo. **Taṃ na yujjatīti** taṃ adhimānikassa “yathāvibhaṅgaṃ paṭhamajjhānaṃ sallekho”ti parivittakītaṃ na yujjati yuttaṃ na hoti. Tenāha “**na hī**”tiādi. Tattha sammā sabbaso ca kilese likhatīti **sallekho**, ariyamaggo. Tadupāyavipassanā **sallekhapaṭipadā**. Yaṃ pana jhānaṃ vipassanāpādaṃ, tampi jhānaṃ pariyāyena maggapādaṃ hotiyeva. Tenāha “**avipassanāpādakattā**”tiādi.

**Jhānadhammavasenā**ti vitakkādīpañcakajjhānadhammavasena. Cittuppādavāsena anekavāraṃ pavattamānampi jhānaṃ ekāvajjanatāya ekavīthipariyāpannattā ekā samāpatti evāti “**punappunaṃ samāpattivāsena**”ti vuttaṃ. Cattāri arūpajjhānāni yathāsakaṃ ekekasmimyeva ārammaṇe pavattantīti āha “**ārammaṇabhedābhāvato**”ti. **Purimakāraṇadvayavasenevā**ti “jhānadhammavasena, punappunaṃ samāpattivāsena”ti pubbe vuttapakāraṇadvayavaseneva.

Tesaṃ arūpajjhānānaṃ kilesaparilāhābhāvena **nibbutāni** aṅgāni, bhāvanāvisesavasena **sukhumāni** ārammaṇāni. **Tasmā tānīti** tesaṃ vasena tāni jhānāni santāni, tasmā “**santā ete viharā**”ti vuttaṃ. **Tesaṃ catunnampīti** catunnampi tesaṃ arūpajjhānānaṃ.

**83. Soti** adhimāniko bhikkhu, añño vā ito bāhirako tāpasaparibbājakādiko na hi sammāsati. Tattha adhimāniko appatte pattasaññitāya na sammāsati, itaro avīsayaṭāya. **Yatthāti** yasmiṃ sallekhavattusmiṃ, avihimsakatādīhi **catucattālīsāya ākārehi**.

Aṭṭha samāpattiyo nāma kilesānaṃ vikkhambhanavasena pavattā uttaruttari santapaṇītā dhammā, na tathā lokiyā avihimsādayo. Tattha kathaṃ avihimsādayo eva sallekhabhāvena vuttā, na itarāti imamatthaṃ vibhāvento codako “**kasmā panā**”tiādimāha. Itaro kāmaṃ samāpattiyo santapaṇītāsabhāvā, vaṭṭapādaṃ katāya pana kilesānaṃ sallekhapaṭipadā na hontī, avihimsādayo pana vivaṭṭapādaṃ sallekhapaṭipadāti imamatthaṃ vibhāvento “**lokuttarapādakattā**”tiādimāha. Imināyeva aṭṭhasamāpattihi avihimsādīnaṃ visesadīpakena suttana yathā mahapphalatarānaṃ hoti, taṃ pakārajātaṃ vedītabbaṃ. Idañhi dakkhiṇeyyataratāya dakkhiṇāya mahapphalataratānaṃ sandhāya vuttanti sambandho. Nanu tattha “**sotāpattiphalasacchikiriyāya paṭipanno**”ti āgataṃ, na “**saraṇagato**”ti codanaṃ sandhāyāha “**saraṇagamanato paṭṭhāyā**”tiādi. Vuttañhetā **aṭṭhakathāyaṃ** (ma. ni. aṭṭha. 3.379) “**heṭṭhimakoṭiyā tīsaraṇaṃ gato upāsakopi sotāpattiphalasacchikiriyāya paṭipanno nāmā**”ti. Yo hi vaṭṭadukkhaṃ samatikkamitukāmo pasannacitto ratanattayaṃ saraṇaṃ gacchati, tassa taṃ adhisīlādīnaṃ upanissayo hutvā anukkamena dassanamaggādhigamāya saṃvatteyyāti.

**Vihimsādivatthunti** yadetaṃ vihimsādīnaṃ vatthum vadāma, imasmiṃ vihimsādivatthusmiṃ. **Antamicchādīṭṭhiṇca micchattānaṃ ādimicchādīṭṭhiṇcāti** idaṃ desanākkamaṃ sandhāya vuttaṃ. **Missetvāti** micchādīṭṭhibhāvasamāññena ekajjhaṃ katvā. **Tathāti** iminā yathā kammaṭṭhamicchattānaṃ ante ādimhi ca vuttamicchādīṭṭhim missetvā ekajjhaṃ vuttaṃ, tathā tesaṃ ante vuttasammādīṭṭhīti imamatthaṃ upasaṃharati.

**Pāṇanti** vohārato sattaṃ, paramatthato jīvitindriyaṃ. **Atipāṇenti** saraseneva patanasabhāvaṃ aticca antarā eva pāṇenti, atikkamma vā sathādīhi abhibhavivā pāṇenti. **Adinnanti** parasantaṃ. **Ādiyantīti** gaṇhanti. **Sallekhatīti** samaṃ lekhati, pajahatīti attho. Kammaṭṭhakathā esāti “**atthabhañjanaka**”nti vuttaṃ. Piyasuññakaraṇato **pisuṇā**, pisati pare satte himsatīti vā **pisuṇā**. **Pharusāti** lūkhā, niṭṭhurāti attho. **Niratthakanti** attharahitaṃ attano paresaṇca hitavinimuttaṃ. **Micchāti** viparītā niccādivāsena pavattiyā. **Pāpikāti** lāmikā. Ekantākusalatāya **viññūhi** buddhādīhi **garahitā**. **Natthi dinnanti ādivatthukāyāti** dasavatthukamicchādīṭṭhimāha. Natthikabhāvābhinivesanavasena kammaṭṭhappattiyevassā **kammaṭṭhapariyāpannatā**. “**Rūpaṃ attā**”tiādinayappavattā attadīṭṭhi maggantārāyakarattā **aniyyānikadīṭṭhi**. Aniyānikattā eva hissā micchattapariyāpannatā. **Sammāti** aviparītā, tato **eva sobhanā** sundarā, buddhādīhi pasatthattā **viññūppasatthā**. Sesamettha

micchādiṭṭhiyaṃ vuttanayena veditabbaṃ.

Asubhādīsu subhādīākāraggahaṇato **ayāthāvāniyyānikā** ayoniso uppattiyā. **Akusalāti** ayāthāvāniyyānikā akusalā saṅkappā. **Esa nayoti** iminā “ayāthāvā aniyyānikā akusalā vācā”tiādīnā tattha tattha ayāthāvādiatthaṃ atidisati. **Vācāti** cetanā adhippetā, tathā **kammantājīvāsati** ca. Yebhuyyena atītānussaraṇavasena pavattito “**atītaṃ cintayato**”ti vuttaṃ. Tathā hi loke evaṃ vadanti “yaṃ me pahūtaṃ dhaṇaṃ ahoṣi, taṃ pamādavasena pana bahuṃ khīṇa”nti. **Satipatirūpakenāti** “cīrakatampi cīrabhāsītampi saritā”ti evaṃ vuttasatuppattipatirūpakena. **Uppattinti** cittuppattiṃ. Tathāpavattacittuppādo hi micchāsati. Sā pana kodhavasena vā “akkocchi maṃ avadhi ma”ntiādīnā (dha. pa. 3) upanayhantassa, rāgavasena vā “yānissa tāni pubbe mātugāmena saddhiṃ hasitalapitakīlītāni anussarati”ti (a. ni. 7.50) vuttanayena subhato anussarantassa, diṭṭhivasena vā “so kho pana me atto nicco dhuvo”tiādīnā micchāabhinivisantassāti evamādinā nayena pavattatīti veditabbā.

**Upāyacintāvasenāti** khippajālakumināduhalādiupakaraṇasaṃvidhānādīsu yutticintanādivasena **pāpaṃ katvā** vippañisāranimittaṃ, “**sukataṃ mayā**”ti pāmojjanimittaṃ katvā **paccavekkhaṇākārena moho** aññāṇaṃ. Tattha pana “asive sivā”ti vohāro viya ñāṇavohāro. Micchāsabhāvattā pana **micchāñāṇaṃ**veva vuccati. Ekūnavīsati bhedaṃ paccavekkhaṇañāṇaṃ sammā pekkhitattā **sammāñāṇaṃ** vuccati, itaraṃ pana jhānādi paccavekkhaṇañāṇaṃ sammādiṭṭhiyāva saṅgayhati. Rūpārūpasamāpattilābhītāmattena vaṭṭato **avimuttāyeva samānā** “**vimuttā maya**”nti **evaṃsaññino**. Pakatipurisantarañāsaṅkhātāyaṃ, guṇaviyuttassa attano sakattani avatṭhānasāṅkhātāyaṃ, attano mahābrahmunā salokatā tassa samīpatāsaṃyujjanasaṅkhātāyaṃ vā avimuttīyaṃ **vimuttisaññino**. Ekantākusalatāya hīnattā **pāpikā**. Ayāthāvātāya **viparītā**. **Yathāvuttenāti** “avimuttāyeva samānā”ti vuttappakārena. “Mayamettha sammādiṭṭhi bhavissāmā”tiādīsu phalasammādiṭṭhiādīnipi maggasammādiṭṭhiādīpakkhikānevāti adhippāyena “**phalasampayuttāni...pe... veditabbā**”ti vuttaṃ. Sabbepi pana phaladhamme vimuttikkhandhasaṅgahato “vimuttī”ti vuccamāne na koci virodho. Ettha sammāvimuttisaṅkhāte sallekhavatthumhi.

Yadi **nīvaraṇavasena vuttāni**, tasmā tīṇeva vuttānīti āha “**abhijjhālū**”tiādi. Pariyuṭṭhānappattā **thinamiddhapariyuṭṭhitā**. Yassa dhammassa atthitāya uddhatā nāma honti, so dhammo uddhaccanti āha “**uddaccena samannāgatāti uddhatā**”ti. **Vicinantāti** dhammoti vā adhammoti vā ādinā yaṃ kiñci sabhāvaṃ vinicchīnantā. **Upanāhanasilāti** parassa attano citte anubandhanasīlā. **Issantīti** usūyanti. **Saṭṭhayanīti saṭṭhā** aññathā attānaṃ aññathā pavedanakā. Te pana yasmā na yathābhūtavādino, tasmā āha “**na sammā bhāsantīti vuttaṃ hotī**”ti. **Vuttapaccanīkanayenāti** “na kodhanā akkodhanā”tiādīnā vuttaatthapaṭipakkhanayena.

Dukkhaṃ vaco etesu vippañikūlaggāhitāya vipaccanīkagāhesūti **dubbacā**. Te pana vacanakkhamā na hontīti āha “**vattuṃ dukkhā**”tiādi. Hīnācārātāya dukkhassa vā sampāpakatāya **pāpakā**. **Asaddhamavasenāti** asappurisadhamavasena. Attanā visesitabbavasena kāyaviññattīādīnaṃ kāyakammadvārādībhāvo viya assaddhiyādiassaddhammasamannāgamenaasataṃ asappurisānaṃ dhammānanti tāniyeva assaddhiyādīni asaddhammā nāma, tesam vasaṇāha “**saddhā etesaṃ natthī**”ti yathā taṃ “duppaññā”ti. Suttageyyādi **appaṃ suttaṃ etesanti appassutā**, sutena anupapannā. **Natthīti gahetabbanti** iminā abhāvatto ayaṃ appa-saddo “appaḍaṃsamakasavātātapasarīsapasamphassāna”ntiādīsu (a. ni. 10.11) viyāti dasseti. Sammāpaṭipattiyā anārambhanato **kucchitā** gārayhā **sīdanti** osīdanti saṃkilesapakkheti **kusitā** da-kārassa ta-kāraṃ katvā. Akusalānaṃ dhammānaṃ pahānāya kusalānaṃ dhammānaṃ upasampadāya **āraddhaṃ** paggahitaṃ **vīriyaṃ etesanti āraddhavīriyā**. Anuppādanena **muṭṭhā** natṭhā sati **etesanti muṭṭhassatī**. **Duṭṭhāti** dūsītā. Duppaññā nāma dūsītābhāvo paṭipakkhena vināsītābhāvoti āha “**natṭhapaññāti vuttaṃ hotī**”ti. Heṭṭhā sammādiṭṭhiggahaṇena kammassakatāpaññāya maggasammādiṭṭhiyā ca gahitattā subbacakalyāṇamittatāparivārāhi idha saddhādīhi vipassanāsambhārassa uddhaṭṭatā ca vuttaṃ “**idha vipassanāpaññā veditabbā**”ti. Tenāha “**vipassanāsambhāro hi**”tiādi. Yuttim anapekkhitvāpi ayamatto gahetabboti dassento āha

“porāṇānaṃ āṇā”ti.

**Lokuttaraguṇānaṃ antarāyakaranti** lokuttaraguṇānaṃ adhigamassa antarāyakaraṃ. **Sandiṭṭhinti** saṃ attano diṭṭhiṃ, yaṃ vā taṃ vā attanā yathāgahitadiṭṭhinti attho. Sabhāvaṃ atikkamivā parato āmasanato **parāmāsī**. **Dalḥaggāhīti** “idameva sacca”nti thiraggāhaggāhī. **Paṭinissaggīti** paṭinissajjanako. **Kummovāti** yathā kacchapo attano pādādi ke aṅge kenaci ghaṭṭito sabbāni aṅgāni attano kapāleyeva samodahati, na bahi nīharati, evamayampi “na sundaro tava gāho, chaḍḍehi na”nti vutto taṃ na vissajjeti. **Antoyeva** attano hadaye eva ṭhapetvā taṃ vadati. **Kumbhīlaggāhanti** saṃsumāraggāhaṃ. **Gaṇhantīti** yathā saṃsumārā gahitaṃ na vissajjenti, evaṃ gaṇhanti.

**84. Evaṃ catucattālīsāya ākārehīti** avihiṃsanādīhi catuadhikacattālīsappakārehi. Kasmā panettha avihiṃsā ādito vuttā? Sabbaguṇānaṃ mūlabhāvato. Avihiṃsāti hi karuṇāyetaṃ adhivacanaṃ, sā ca visesato silassa mūlakāraṇaṃ parūpaghātalakkhaṇā dussīlyā oramāpanato. Yathā hi pāṇātipāto parūpaghātalakkhaṇo, tathā paresaṃ sāpateyyāvaharaṇaṃ, sattippahāratopi dhanassāvahāro garutaroti. Tathā abrahmacariyaṃ gabbhadhāraṇādidukkhāvahanato, paradārātikkaṃ pana vattabbameva natthi. Paresaṃ visaṃvādanabhedanamamaghaṭṭanānaṃ parūpaghātabhāvo pākaṭo eva, saṃphappalāpo atthaggāhāpanato anathuppādanato, abhijjhā adinnādānādīhetuto, byāpādo pāṇātipātādīhetuto, micchādiṭṭhi sabbānatthahetuto parūpaghātalakkhaṇā, micchādiṭṭhi dhammikapaṭiñṇopi pāṇātipātādīni karoti, pare ca tattha niyojeti, kimaṅgaṃ pana itare. Vihiṃsalakkhaṇā dussīlyā oramā avihiṃsalakkhaṇā visesato silassa balavakāraṇaṃ. Sīlapadaṭṭhāno ca samādhi, samādhipadaṭṭhānā ca paññāti sabbaguṇānaṃ mūlabhūtā avihiṃsā. Apica uḷārājjhāsāyānaṃ nisammakārīnaṃ dhīrānaṃ uttamapurisānaṃ sīlaṃ viya samādhipaññāpi paresaṃ hitasukhāvahāva sampajjantīti evampi karuṇā sabbaguṇānaṃ mūlanti sā ādito vuttā.

Tato paraṃ visesato “avihiṃsāsamuṭṭhānā ime dhammā”ti dassanattamaṃ kusalakamma pathadhammā gahitā. Tato idaṃ guṇānaṃ mūlabhūtaṃ sīlaṃ, ettha paṭiṭṭhitena ime dhammā uppādetabbāti dassanattamaṃ aṭṭha sammattā gahitā. Tesāṃ visodhanāya paṭipannassa ādito evaṃ hotīti dassanattamaṃ nīvaraṇaviveko gahito, ādito nīvaraṇadvayassa aggahaṇe gahitāgahitakāraṇaṃ **aṭṭhakathāya** vuttameva. Kodhassa pana byāpādato bhedo **vattasuttavaṇṇanāyaṃ** (ma. ni. aṭṭha. 1.71) vuttanayeneva veditabbo. Kodhādippahānena cettha sallekhasiddhīti dassanattamaṃ tato upakkilesavisuddhi gahitā. Sā ca subbacakalyāṇamittaappamattatāhi sījhatīti dassanattamaṃ pakiṇṇakā gahitā. Sampannasovacassatādiguṇassa ime dhammā pāripūriṃ gacchanti, vipassanaṃ paribrūhetvā ariyamaggādhigamāya saṃvattantīti dassanattamaṃ saddhammā gahitā. Evaṃbhūtassa ayaṃ micchāgāho lokuttaraguṇādhigamassa antarāyakaro, tasmā so dūrato vajjetabbo, evaṃ yathāvuttāya sammāpaṭipattiyā ariyamaggaṃ adhigacchanto sallekhaṃ matthakaṃ pāpetīti dassanattamaṃ “sandiṭṭhiparāmāsī”tiādi vuttanti evametesāṃ catucattālīsāya sallekhākārānaṃ gahaṇapayojanaṃ anupubbī ca veditabbā. Payogato sallekhapaṭipadaṃ paṭipajjitumaṃ asakkontānaṃ cittuppādotopi bahūpakāroti āha “**cittuppādassapi bahūpakāratam dassetu**”nti.

**Kusalesu dhammesūti** avihiṃsādīsū yathāvuttaanavajjadhammesu. **Anuvidhiyanāti** cittuppādassa kāyavācāhi anuvidhānā. **Tesaṃ dhammānanti** avihiṃsādīdhammānaṃ, tesāṃ vā cittuppādavasena pavattadhammānaṃ. Idāni yathāvuttadhammaṃ vitthārato dassetuṃ “**kasmā panā**”tiādi āradhamaṃ. Saraṇagamaṇaṃ vācāya viññāpetumaṃ asakkontassa vasena vuttaṃ “**kāyena vā**”ti. “Sīlaṃ kāyena samādiyati”ti etthāpi ese va nayo. Ettha ca tathā tathā pavattasallahukakāmāvacarakusalacittuppattim upādāya tathārūpakusalakāyavacīkammānaṃ bahūpakāratā vuttāti na sabhāvato cittuppādassa bahūpakāratam nīyatīti daṭṭhabbaṃ.

**85. Hitādhigamāyāti** diṭṭhadhammikādihitasampattiyā, ariyamaggādhigamāya eva vā. Ariyamaggo hi ekantahitattā hito nāma. Parivajjanavasena kamaṇaṃ pavatti parikkamananti āha “**parikkamanāya parivajjanattāyā**”ti. Sammādasanupāyasaṃvidhānena **avihiṃsā paṭiyattā** sammāsambuddhena. **Sukhenevāti** akiccheneva. Eteneva **upāyenāti** eteneva avihiṃsāpade vuttena vidhinā. **Sabbapadāntīti**

sesāni tecattālīsa padāni.

**86. Akusalā** paṭisandhiajanakā nāma uddhaccasahagatacittuppādadharmā aññepi pavattivipākamattadāyino, **dinnāya paṭisandhiyā vipākajanakā**, paccayavekallena vipaccitum aladdhokāsā ahosikammādayo vā **ajanakā**. **Jātivasenāti** akusalaajātivaseṇa. **Adhobhāgaṅamanīyāti** apāyagamanīyā. **Evaṃnāmāti** nāmaggaṇeṇa sabhāvaṃ upalakkheti sati paccayasamavāye taṃsabhāvānativattanato. Tenāha “**vipākakāle aniṭṭhākantavipākattā**”ti. Vuttanayeneva kusalapakkho veditabbo. Ayaṃ pana vireso, idha paṭisandhiajanakā abhiññāsahagatadharmā, sesaṃ vuttasadisameva. **Sabbe akusalāti** ettha vihiṃsamekaṃ ṭhapetvā itare sabbe akusalā upamābhūtā. Vihimsā hi upameyyaṃ. **Sabbe kusalāti** etthāpi eseva nayo. **Eteneva upāyenāti** yathā vihiṃsānaṃ upameyyatā, tadavasesānaṃ kusalākusalānaṃ upamābhāvo vutto, iminā nayena akusalaṃ paṇātipātādiakusalena itarena, kusalaṇca paṇātipātāpaṭiviratiādikusalena itarena upametabbaṃ.

**87. Parinibbāpaneti** kilesapariḷāhavūpasamane. Parito limpanaṭṭhena palipaṃ vuccati mahākaddamaṃ, taṃ pana ekantato gambhīrampi hotīti “**gambhīrakaddame nimuggo**”ti vuttaṃ. Palipaṃ viya **palipanti pañca kāmaguṇā vuccanti, tasmā evaṃ** idāni vuccamāneṇa upamopameyyasaṃsandananayena **ettha** imasmiṃ ṭhāne **atthayojanā veditabbā**. **Na hi taṃ kāraṇanti** ettha kāraṇaṃ nāma hatthassa vā pādassa vā apalipannabhāvo, so pana natthi. Esa nayo upameyyepi.

**Tattha siyā** kassaci parivitakko “bhagavato desanānubhāvena bhikkhūdayo kathenti”ti. “**Bhagavāyeva hi tattha uddharatī**”ti vatvā upamāya tadatthaṃ vibhāvetuṃ “**rañño**”tiādi vuttaṃ. Puthujjanā tāvatiṭṭhantu, sāvakasikhāppattavisesānampi ariyānaṃ desanā satthuyeva desanāti dassetuṃ “**kiñcāpi**”tiādimāha. Tathā hi tehi desitasuttāni buddhavacanameva, tesam desanāya laddhavisēsāpi ariyā buddhaputtāyevāti.

**Anibbisatāyāti** anibbisevanatāya. **Asikkhitavinayatāyāti** pañcannaṃ vinayānaṃ sādaraṃ asikkhitabhāvena. Te pana vinayā tissannaṃ sikkhānaṃ sikkhāpanena hotīti āha “**tisso sikkhā sikkhāpessatī**”ti. **Kiṃ pana tanti?** “Ṭhānametaṃ vijjatī”ti ettha vuttaṃ kiṃ pana ṭhānanti āha “**apalipapalipannatta**”ntiādi. Yasmā pāḷiyaṃ “so vata cundā”tiādinā sāmāññatthaṃ upamābhāvena gahetvā visesattho upameyyabhāvena vutto, tasmā tamatthaṃ “**evamattho veditabbo**”tiādinā sādharmaṇato vatvā puna asādharmaṇato vivaranto “**kiṃ vuttaṃ hotī**”tiādimāha. **Parassa vihiṃsācetanāṃ nibbāpessatī**ti idam yo avihimsāsānkhātāṃ sammāpaṭipattiṃ disvā diṭṭhānugatiṃ āpajjanto dhammadesanāya paro avihimsako hoti, tādisaṃ sandhāya vuttaṃ. Ādesanāhi tassa vacananti. Tenāha “**ayaṃ yā esā vihiṃsakassā**”ti. Pubbe **vihiṃsakassa** micchāpaṭipajjantassa. **Vihimsāpahānāya maggaṃ bhāvayatotiādinā** attano eva avihimsāya vihiṃsāparinibbānāya saṃvattanamāha. Tenāha “**parinibbuto viyā**”tiādi. **Sabbapadesūti** “paṇātipātissā”tiādinā āgatesu tecattālīsāya padesu.

**88. Evanti** desitākāraparāmasanaṃ. **Tassāti** sallekhassa. “Atthi khvesa brāhmaṇa, pariyāyo”tiādīsu (a. ni. 8.11; pārā. 3-10) viya **pariyāya**-saddo kāraṇatthoti āha “**sallekhakāraṇa**”nti. **Tesaṃ vasenāti** sallekhānaṃ vasena. Mettāya upasaṃharaṇavasena **hitam esantena**. Karuṇāya vasena **anukampamāneṇa**. **Pariggahetvāti** parito gahetvā, paritvāti attho. **Pariccāti** parito itvā, samantato pharivā icceva attho. **Mā pamajjitthāti** “jhāyathā”ti vuttasamathavipassanānaṃ aññāneṇa, aññeṇa vā kenaci pamādakāraṇeṇa mā pamādaṃ āpajjittha. Niyyānikasāsane hi akattabbakāraṇampi pamādoti. **Vipattikāleti** sattaasappāyādivipattiyuttakāle. Yathāvuttā pañca pariyāyā aññepi sabbe sāsanaṃ paṇātipātādiakusalena itarena, kusalaṇca paṇātipātāpaṭiviratiādikusalena itarena upametabbaṃ.

Sallekhasuttavaṇṇanāya līnatthappakāsanā samattā.

## 9. Sammādiṭṭhisuttavaṇṇanā



**89. Kathetukamyatāpucchā evāti** avadhāraṇena itarā catasso pucchā nivatteti itarāsaṃ asambhavato, tattha yathāpucchitassa atthassa vissajjanato ca “ayaṃ sammādiṭṭhī”ti yāthāvato ajānantāpi puthujjanā bāhirakatāpasādayo attano samānasīle ʘhitam **sammādiṭṭhīti vadanti**. **Anussavādivasenāpīti** anussavākāraparivittakadiṭṭhinijjhānakkhantivasenāpi. Yathāsamaṅgitākārassa atthassa evametanti nijjhānakkhamāpanato ekantato yāthāvaggāho hotīti āha “**attapaccakkhenapī**”ti, yāthāvato lakkhaṇassa paṭividdhattā attano paccakkhabhāvenāti attho. **Bahunnam vacanam upādāyāti** iminā sāsane loke ca niruḷhatāya ayaṃ āmedītapayogoti sāsanaṃ niruḷhatāya ca sampasādam upādāyapi tadubhayiko āmedītapayogo daṭṭhabbo. **Atthanti vacanatham**. **Lakkhaṇanti sabhāvaṃ**. **Upādāyāti** gahetvā. **Sobhanāyāti** sundarāya. **Pasatthāyāti** pasamsāya. Tesu purimena dhammānaṃ yathāsabhāvāvabodhasaṅkhātāṃ sammādiṭṭhisabhāvaṃ dasseti. Tena hi sā sabbadhamme abhibhavitvā sobhati. Dutiyaṃ sampayuttadhammesu pariṇāyikabhāvaṃ. Tena hi sā sampayuttadhamme ṇāṇamaye viya taṃsamaṅginaṇca puggalaṃ ṇāṇapiṇḍaṃ viya karoti, tassa “paṇḍito nipuṇo cheko viññū vibhāvī”tiadinā disāsu pasamsā pattharati.

**Kammassakatāñāṇanti** kammaṃ sako etassāti kammassako, tassa bhāvo kammassakatā, tattha ṇāṇaṃ “idaṃ kammaṃ sattānaṃ sakaṃ, idaṃ no saka”nti evaṃ jānanañāṇaṃ. **Saccānulomikañāṇanti** ariyasaccānaṃ paṭivedhassa anulomato saccānulomikaṃ ṇāṇaṃ, vipassanāñāṇaṃ. **No saccānulomikāyāti** bāhirako saccānulomikāya sammādiṭṭhiyā no sammādiṭṭhi sabbena sabbaṃ tassa abhāvato. Tattha kāraṇamāha “**attadiṭṭhiparāmāsakattā**”ti. Kammassa katādiṭṭhi pana bāhirakassa attadiṭṭhiṃ anurujjhantī pavattati “atthi dinna”ntiadinayappavattito. **Sāsaniko dvīhipīti** sāsaniko puthujjano kammassakatāñāṇādīhi dvīhipi sammādiṭṭhi. Okkantasammattaniyāmatā “**sekkho niyatāyā**”ti vuttaṃ. Asekkhāya sammādiṭṭhiyā sammādiṭṭhīti ānetvā sambandhitabbaṃ. Tīsupi puggalesu sekkho idha sammādiṭṭhīti adhippetoti dassento “**niyatāya niyyānikāyā**”tiadinā.

Idāni yathāvuttamattham pāliya vibhāvetuṃ “**tenevāhā**”tiadinā vuttaṃ. **Antadvayanti** “sassaṃ, ucchedaṃ, kāmasukhaṃ, attakilamatha”nti etaṃ antadvayaṃ. Līnuddhaccapattīṭṭhānāyūhanantadvayaṃ anupagamaṃ atthasiddhameva. **Ujubhāvenāti** ujusabhāvena maggena, majjhimāya paṭipattiyāti attho. Dhamme pasādaggahaṇena satthari saṅge ca pasādopi gahitoyeva hotīti “**dhamme**”icceva vutto tadavinābhāvato. Yasmā esa niyatāya sammādiṭṭhiyā samannāgato sammādiṭṭhīti adhippeto, taṇca vaṭṭato niyyānaṃ vivatṭadhiḡamaṃ hotīti āha “**āgato imaṃ saddhamma**”nti. Nibbānañhi santo sadā vijjamaṇo dhammoti katvā saddhammoti imaṃ phalehi asādhāraṇena pariyaṇena vattabbaṃ labhati. Tayidamassa āgamaṃ sacchikiriyābhisamayo, so ca pahānābhisamayādīhi saheva idha ijjhātīti dassento “**sabbadiṭṭhigahanāni**”tiadinā. Tattha **sabbadiṭṭhigahanāni vinibbeṭhento sabbakilese pajahantoti** padadvayaṃ pana pahānābhisamayamāha, **jātiṃsaṃsārā nikkhamantoti** iminā pariññābhisamayaṃ. Samatikkamattho hi pariññattho. **Paṭipattim pariniṭṭhapentoti** iminā bhāvanābhisamayaṃ daṭṭhabbaṃ.

**Kālaparicchedavacananti** paricchijjatīti paricchedo, kālo eva paricchedo kālaparicchedo, yo so akusalapajānanādinā paricchinno maggavuṭṭhānakālo maggakkhaṇo, tassa vacananti attho. Tenāha “**yasmim kāle**”ti. **Akusalañcāti ca**-saddo samuccayattho. Tena vakkhamānaṃ akusalamūlādīṃ samuccinoti. **Dasākusalakammamapathanti** kutoyaṃ viseso, yāvataṃ aniddhāritavisesaṃ akusalaṃ gahitanti? Na sāmāññajotanāya visese avatṭhānato. Kiṃ vā imāya yutticintāya, yasmā paṭhamavārena uddesavasena desitassa atthassa vitthāradesanā dutiyavāro. Tenevāha “**katamaṃ panāvuso**”tiadinā. Yasmā lokuttarā sammādiṭṭhi idha adhippetā, tasmā nirodhārammaṇāya pajānanāya maggapaññāya kiccavasena sammohato “idaṃ dukkha”nti dasākusalakammamapathaṃ paṭivijjhanto “**akusalaṃ pajānāti**”ti vuccatīti attho. **Tassāti** akusalakammamapathasaṅkhātassa dukkhassa. **Teneva pakārenāti** “nirodhārammaṇāya pajānanāya kiccavasena”ti vuttappakārena.

**Kusalanti** etthāyaṃ vacanattho – kucchite pāpadhamme salayati calayati kampaṭīti **kusalaṃ**, kucchitena vā ākārena sayantīti kusā, pāpakā dhammā. Te kuse lunāti chindatīti **kusalaṃ**. Kucchitānaṃ

vā sānato tanukaraṇato ñāṇaṃ kusaṃ nāma, tena lātabbaṃ gaḥetabbaṃ pavattetabbanti **kusalaṃ**. Yathā vā kuso ubhayabhāgagataṃ hatthapadesaṃ lunāti, evamidam uppannānuppannavasena ubhayabhāgagataṃ saṃkilesapakkhaṃ lunāti chindati, tasmā kuso viya lunātīti **kusalaṃ**. Kucchitānaṃ vā sāvajjadhammānaṃ salanato saṃvaraṇato **kusalaṃ**. Kusaladhammavasena hi akusalā manacchaṭṭhesu dvāresu appavattiyā saṃvutā honti. Kucchite vā pāpadhamme salayati gameti apañetīti **kusalaṃ**. Kucchitānaṃ vā pāṇātipātādīnaṃ sānato nisānato tejanato kusā, dosalobhādayo. Sādīnavavasena cetanāya tikkhābhāvappattiyā pāṇātipātādīnaṃ mahāsāvajjātā. Te kuse lunāti chindatīti **kusalaṃ**. Kucchitānaṃ vā sānato antakaraṇato vināsanato kusāni, puññakiriyavasena pavattāni saddhādīni indriyāni. Tehi lātabbaṃ pavattetabbanti **kusalaṃ**. “Ku”iti vā bhūmi vuccati, adhiṭṭhānabhāvena taṃsadisassa attano nissayabhūtaṃ rūpārūpapabandhassa sampati āyatiñca anudāhena vināsanato kuṃ sasantīti kusā, rāgādayo. Te viya attano nissayassa lavanato chindanato **kusalaṃ**. Payogasampādītā hi kusaladhammā accantameva rūpārūpadhamme appavattikaraṇena samucchindanti. Kusalassa mūlanti **kusalāmūlaṃ**, suppatiṭṭhitabhāvasādhanena kusalassa patiṭṭhā nidānanti attho. **Akusalamūlanti** etthāpi eseva nayo.

**Akusalanti** pana na kusalaṃ akusalaṃ, kusaladhammānaṃ paṭipakkhavasena akusalanti padassa attho veditaḥho. Evañhi ārogyānavajjasukhavipākakosallasambhūtaṭṭhena kusalaṃ vuccatīti. Yathā yaṃ dhammajātaṃ na arogaṃ na avajjaṃ na sukhavipākaṃ na ca kosallasambhūtaṃ, taṃ akusalanti ayamattho dassito hoti. Evaṃ yaṃ na kucchitānaṃ salanasabhāvaṃ, na kusena, kusehi vā pavattetabbam, na ca kuso viya lavanakaṃ, taṃ akusalaṃ nāmāti ayampi attho dassitoti veditaḥho. **Vatthupajānanā**ti dukkhādivatthuno pajānanā paṭivedho. Tathā bujjanakapuggalānaṃ ajjhāsayaavasena desanā pavattāti āha “**akusalādipajānanenāpi**”ti. Teneva ca saṃkhittena desanā pavattā. Bhāvanāmanasikāro pana “sabbaṃ bhikkhave abhiññeyya”nti (saṃ. nī. 4.46; paṭi. ma. 1.3) vacanato anavasesato rūpārūpadhammānaṃ pariggahavaseneva pavattati. Tenāha “**desanāyevā**”tiādi. Tattha **manasikārapaṭivedhoti** pubbhāge pavattavipassanāmanasikāro ariyamaggapaṭivedho ca. Kassaci akopānato vitthāravaseneva vuttaṃ vipassanaṃ anuyuñjantā maggaṃ paṭivijjhantāpi vitthāranayeneva paṭivijjhantīti attho visuddhikkamassa abhāvato.

**Bhikkhū**ti mahāvihāre dhammasaṅgītivasena pañcanikāyamaṇḍale nisinnabhikkhū. **Theroti** tattha saṅghattheroti vadanti. Vatthasuttavaṇṇanāyaṃ vuttanayena pana mahāsaṅgharakkhitattherassa antevāsikabhikkhū sandhāya “**āhamsū**”ti vuttaṃ. **Theroti** pana mahāsaṅgharakkhitatthero. So hi imasmiṃ majjhimanikāye taṃ taṃ vinicchayaṃ kathesi. **Rāsitoti** piṇḍato, ekajjhanti attho.

### Akusalakammavapaṇṇanā

**Akosallappavattiyāti** kosallapaṭipakkhato akosallaṃ vuccati aññānaṃ, tato pavattanato, akosallasambhūtatīti attho. Ñāṇapaṭipakkho aññānaṃ mittapaṭipakkho amitto viya kusalapaṭipakkho akusalaṃ kusalena pahātabbattā, na pana kusalānaṃ pahāyatattā. Kusalameva hi payogasampāditaṃ akusalaṃ pajahati. Saha avajjehi lobhādīhi vattatīti **sāvajjaṃ**. Dukkho aniṭṭho catukkhandha-saṅkhāto vipāko etassāti **dukkhavipākaṃ**. Tattha sāvajjavacanena akusalānaṃ pavattidukkhatam dasseti, dukkhavipākavacanena vipākadukkhatam. Purimañhi pavattisambhavavasena akusalassa lakkhaṇavacanam, pacchimaṃ tālantare vipākuppādanasamatthāvasena. Tathā purimena akusalassa avisuddhasabhāvataṃ dasseti, pacchimena avisuddhavipākataṃ. Purimena akusalaṃ kusalasabhāvato nivatteti, pacchimena abyākatasabhāvato savipākattadīpakattā pacchimassa. Purimena vā avajjavantatādassanato kiccaṭṭhena rasena anattahajananasatam dasseti, pacchimena sampattiatthena aniṭṭhavipākatasatam. Purimena ca upaṭṭhānākāraṭṭhena paccupaṭṭhānena saṃkilesapaccupaṭṭhānatam, pacchimena phalaṭṭhena dukkhavipākappaccupaṭṭhānatam. Purimena ca ayonisomanasikāram akusalassa padaṭṭhānam pakāseti. Tato hi taṃ sāvajjam jātam, pacchimena akusalassa aññesaṃ padaṭṭhānabhāvam vibhāveti. Tañhi dukkhavipākassa kāraṇanti. **Samkiliṭṭhanti** saṃkilesehi samannāgatam, dasahi kilesavatthūhi vibādhitam, upatāpitaṃ vā tehi vidūsitam malīnakatañcāti attho. Idañcassa dukkhavipākatañcāti atthe idañca dukkhavipākataṃ apaccakkhatāya asaddahantānaṃ paccakkhato

ādīnavadassanena samṁvejanattham vuttam. **Sādhāraṇā** sabbassapi akusalassa.

Saraseneva (dha. sa. mūlaṭī. 1) patanasabhāvassa antarā eva atīva pātanaṃ **atipāto**, saṅikaṃ patitum adatvā sīgham pātananti attho. Atikkammavā satthādīhi abhibhavitvā pātanaṃ **atipāto**. Payogavattumamahantatādīhi **mahāsāvajjatā** tehi paccayehi uppajjamānāya cetanāya balavabhāvato. Ekassa hi payogassa sahasā nipphādanavasena sakiccasādhikāya bahukkhattum pavattajavanehi laddhāsevanāya ca sannitṭhāpakacetanāya vasena payogassa mahantabhāvo. Satipi kadāci khuddake ceva mahante ca paṇe payogassa samabhāve mahantaṃ hanantassa cetanā tibbākārā uppajjatīti vatthussa mahantabhāvo. Iti ubhayampetaṃ cetanāya balavabhāveneva hotīti. Yathāvuttapaccayapariyāyepi tamtam paccayehi cetanāya balavatāya eva mahāsāvajjabhāvo veditabbo. Payogavattuā dipaccayānañhi amahattepi hantabbassa guṇavantatāya mahāsāvajjatā, tabbipariyāyena appasāvajjatā ca vatthussa mahattāmahattesu viya daṭṭhabbā. Kilesānaṃ upakkamaṇaṃ dvinnāṇca mudutāya tibbatāya ca appasāvajjatā mahāsāvajjatāpi yojetabbā. Paṇo paṇasaññitā vadhakacittaṇca pubbabhāgiyāpi honti, upakkamo vadhakacetanāsamuttṭhāpito. Paṇca sambhārā hi pāṇātipātacetanāti sā pañcasambhāravanimuttā daṭṭhabbā. Ayaṇca vicāro adinnādānādīsipi yathārahaṃ vattabbo. Vijjanapaharaṇādivasena sahatthenanibbatto **sāhatthiko**, āṇāpanavasena pavatto **āṇattiko**, ususattiyantapāsāṇādinissajjanavasena pavatto **nissaggiyo**, aduhalasajjanādivasena pavatto **thāvaro**, āthabbaṇikādīnaṃ viya mantaparijappanavasena pavatto **vijjāmayo**, kammavipākajiddhimayo **iddhimayo** dāṭhakoṭanādīni viya.

Yadi “mama ida”nti parena pariggahitaṃ adinnaṃ, uttānaseyyakadārakasantaṃ kathaṃ tassa pariggahasaññāya eva abhāvato ti āha “**yattha paro**”tiādi. Paro nāma viññū vā aviññū vā atthi tassa vatthussa sāmiko. Aviññūpi hi viññukāle yathākāmaṃ karonto **adaṇḍārahoti**. Mantaparijappanena parasantakaharaṇaṃ vijjāmayo, vinā mantena parasantakassa kāyavacīpayogehi parikaḍḍhanaṃ tādiseniddhivasena iddhimayo payogoti adinnādāne **cha payogā sāhatthikādayo** vuttā. **Yathānurūpanti** ettha sāhatthiko tāva pañcannampi avahārānaṃ vasena pavattati, tathā āṇattiyō nissaggiyo ca. Thāvaro theyyāvahārapasayhāvahārapaṭicchannāvahāravasena. Tathā sesāpīti daṭṭhabbā.

**Methunasamācāresūti** sadārāsantosa-paradāragamanavasena duvidhesu methunasamācāresu. Ayamevahi bhedo idhāhippeto. **Gottarakkhitā** sagottehi rakkhitā. **Dhammarakkhitā** sahadhammikehi rakkhitā. **Sārakkhā** sasāmikā. Yassā gamane raññā daṇḍo ṭhapito, sā **saparidaṇḍā**. Bhariyabhāvattaṃ dhanena kītā **dhanakkītā**. Chandena vasantī **chandavāsini**. Bhogattaṃ vasantī bhogavāsini. Paṭattaṃ vasantī **paṭavāsini**. Udakapattaṃ āmasitvā gahitā **odapattakinī**. Cumbaṭakaṃ apanetvā gahitā **obhaṭacumbaṭā**. Karamarānītā **dhajāhatā**. Taṅkhaṇikā **muhuttikā**. Abhibhavitvā vītikkame micchācāro mahāsāvajjo, na tathā dvinnaṃ samānachandatāya. Abhibhavitvā vītikkamane satipi maggenamaggapaṭipattiadhivāsane purimuppānasevanābhisandhipayogābhāvato micchācāro na hoti abhibhuyyāmānassāti vadanti. Sevanācittē sati payogābhāvo appamāṇaṃ yebhuyyena itthiyā sevanāpayogassa abhāvato. Tathā sati puretaraṃ sevanācittassa upatṭhānēpi tassā micchācāro na siyā, tathā purissappi sevanāpayogābhāveti, tasmā attano ruciyā pavattitassa vasena tayo, balakkārena pavattitassa vasena tayoti sabbepi aggahitaggahaṇena **cattāro sambhārāti** vuttanti veditabbā.

**Atthabhañjakoti** kammāpathavasena vuttam. Kammāpathakathā hesāti. **Assāti** viṣamvādakassa. Musā vadati etenāti **cetanā musāvādo**, imasmiṃ pakkhe atathākārena vatthuno viññāpanapayogo musā, taṃsamuttṭhāpikā cetanāmusāvādoti vuttattā tato aññathā vattum “**aparo nayo**”tiādi vuttam. **Attano santakaṃ adātukāmatāyāti**tiādi musāvādasamāññena vuttam. Hasādhippāyenapi viṣamvādanapurakkhārassa musāvādo. **Parassāti** viṣamvādanavasena viññāpetabbassa. **Soti** musāvādapayogo.

**Suññabhāvanti** pītivirahitatāya rittabhāvaṃ. Pharusasaddatāya **neva kaṇṇasukhā**. Atthavipannatāya **na hadayasukhā**. **Samkiliṭṭhacittassāti** dosena, lobhena vā dūsitacittassa.

**Ekantapharusā cetanā**ti etena duṭṭhacittatameva vibhāveti, duṭṭhacittatā cassa amaraṇādhippāyavasena daṭṭhabbā. Sati hi maraṇādhippāye atthasiddhi, tadabhāve paṇātipātabyāpādā siyunti. Yaṃ paṭicca pharusavācā payujjati, tassa sammukhāva sīsaṃ eti. Parammukhāpi sīsaṃ eti evāti apare. Tatthāyaṃ adhippāyo yutto siyā – sammukhā payoge agāravādīnaṃ balavabhāvato siyā cetanā balavatī, parassa ca tadatthaviññāpanaṃ, na tathā asammukhāti. Yathā ca akkosite mate ālahane katā khamāpanā upavādantarāyaṃ nivatteti, evaṃ parammukhā payuttā pharusavācā hotiyevāti sakkā viññātum. **Tassāti** ekantapharusacetanāya eva pharusavācābhāvassa āvibhāvattamaṃ. **Mammacchedako** savanapharusatāyāti adhippāyo. **Cittasaṅghātāya pharusavācā na hoti** kammaṃ pathā'ppattattā, kammabhāvaṃ pana na sakkā vāretum. Evaṃ anvayavasena cetanāpharusatāya pharusavācaṃ sādhetvā idāni tameva byatirekavasena sādhetum “**vacanasāṅghātāyā**”tiādi vuttaṃ. **Esāti** pharusavācā. Kammaṃ pathabhāvaṃ appattā **appasāvajjā**, itarā **mahāsāvajjā**. Tathā kilesānaṃ mudutibbatābhedehi sabbamaṃ purimasadisamaṃ.

**Āsevanamaṃ** bahulīkaraṇamaṃ. Yaṃ uddissa pavattito, tena aggahite **appasāvajjo**, gahite **mahāsāvajjo** kammaṃ pathappattito. Yo koci pana samphappalāpo dvīhi sambhārehi sijjhati. Kilesānaṃ mudutibbatāvasenapi appasāvajjamahāsāvajjatā veditabbā.

**Attano pariṇāmanamaṃ** cittenevāti veditabbaṃ. **Hitasukhamaṃ byāpādayatīti** yo taṃ uppādeti, tassa hitasukhamaṃ vināseti. **Aho vatāti** iminā accantavināsacintanaṃ dīpeti. Evaṃ hissa dāruṇapavattiyā kammaṃ pathappatti. **Yathābhuccagahaṇābhāvenāti** yāthāvaggāhassa abhāvena aniccādisabhāvassa niccādito gahaṇena. **Micchā passatīti** vitathamaṃ passati. **Samphappalāpo viyāti** iminā āsevanassa mandatāya appasāvajjataṃ, mahantatāya mahāsāvajjataṃ dasseti. **Gahitākāraviparītātīti** micchādīṭṭhiyā gahitākārasa viparītabhāvo. **Vatthunoti** tassā ayathābhūtasabhāvamāha. **Tathābhāvenāti** gahitākāreneva **tassa** dīṭṭhigatikassa, **tassa** vā vatthuno **upaṭṭhānaṃ** evametamaṃ, na ito aññathāti.

**Dhammatoti** sabhāvato. **Koṭṭhāsototi** phassapañcamakādīsū cittaṅgakoṭṭhāsesu yaṃ koṭṭhāsā honti, tatoti attho. **Cetanādhamaṃ**ti cetanāsabhāvā.

**Paṭipāṭiyā sattāti** ettha nanu cetanā abhidhamme kammaṃ pathesu na vuttāti paṭipāṭiyā sattanaṃ kammaṃ pathabhāvo na yuttoti? Na, avacanaṃ aññahetukattā. Na hi tattha cetanāya akammaṃ pathattā kammaṃ patharāsīmhi avacanaṃ, kadāci pana kammaṃ patho hoti, na sabbadāti kammaṃ pathabhāvassa aniyatattā avacanaṃ. Yadā pana kammaṃ patho hoti, tadā kammaṃ patharāsisaṅgaho na nivārito. Etthāha – yadi cetanāya sabbadā kammaṃ pathabhāvābhāvato aniyato kammaṃ pathabhāvoti kammaṃ patharāsīmhi avacanaṃ, nanu abhijjhādīnaṃ kammaṃ pathabhāvamaṃ appattānaṃ atthitāya aniyato kammaṃ pathabhāvoti tesampi kammaṃ patharāsīmhi avacanaṃ āpajjatīti? Nāpajjati kammaṃ pathatātaṃ sabhāgatāhi tesamaṃ tattha vuttattā. Yadi evamaṃ cetanāpi tattha vattabbā siyā? Saccametamaṃ, sā pana paṇātipātādīkāti pākaṭo, tassā kammaṃ pathabhāvoti na vuttā siyā. Cetanāya hi – “cetanāmaṃ, bhikkhave, kammaṃ vadāmi (a. ni. 6.63; kathā. 539), tividhā, bhikkhave, kāyasañcetanā akusalaṃ kāyakamma”ntiādivacanaṃ (kathā. 539) kammaṃ bhāvo pākaṭo, kammaṃ meva ca sugatiduggatīnaṃ tattha uppajjanakasukhadukkhānañca pathabhāvena pavattamaṃ kammaṃ pathoti vuccatīti pākaṭo tassā kammaṃ pathabhāvo, abhijjhādīnaṃ pana cetanāsamāhanabhāvena sucaritaduccaritabhāvo cetanājanitapiṭṭhivaṭṭakabhāvena sugatiduggatitaduppajjanakasukhadukkhānaṃ pathabhāvo cāti na tathā pākaṭo kammaṃ pathabhāvoti teyeva tena sabhāvena dassetumaṃ **abhidhamme** cetanā kammaṃ patharāsībhāvena na vuttā, atathājātiyakattā vā cetanā tehi saddhiṃ na vuttāti daṭṭhabbamaṃ. **Mūlamaṃ patvāti** mūladesanaṃ patvā, mūlasabhāvesu dhammesu vuccamānesūti attho.

**Adinnādānaṃ sattārammaṇanti** idaṃ “pañca sikkhāpadā parittārammaṇā eva vā”ti imāya pañhapucchakapāḷiyā virujjhati. Yañhi paṇātipātādīdussīlyassa ārammaṇamaṃ, tadeva taṃ veramaṇiyā ārammaṇamaṃ. Vītikkamitabbavatthuto eva hi viratīti. **Sattārammaṇanti** vā sattasaṅkhātamaṃ saṅkhārārammaṇameva upādāya vuttanti nāyamaṃ virodho. Tathā hi vuttaṃ **sammohavinodaniyamaṃ**

(vibha. aṭṭha. 714) “yāni sikkhāpadāni ettha sattārammaṇānīti vuttāni, tāni yasmā sattoti saṅkhyamaṃ gataṃ saṅkhārameva ārammaṇaṃ karonti”ti. Visabhāgavatthuno “itthī, puriso”ti gahetabbato **sattārammaṇoti eke**. “Eko diṭṭho, dve sutā”tiādinā samphappalapane **diṭṭhasutamutaviññātavasena**. **Tathā abhijjhāti** ettha **tathā**-saddo “diṭṭhasutamutaviññātavasena”ti idampi upasaṃharati, na sattasaṅkhārārammaṇataṃ eva dassanādivasena abhijjhāyanato. “Natthi sattā opapātikā”ti pavattamānāpi **micchādiṭṭhi** tebhūmakadhammavisayāvāti adhippāyenassā **saṅkhārārammaṇatā** vuttā. Kathaṃ pana micchādiṭṭhiyā sabbe tebhūmakadhammā ārammaṇaṃ hontīti? Sādhāraṇato. “Natthi sukataḍḍakkaṭṭānaṃ kammānaṃ phalaṃ vipāko”ti hi pavattamānāya atthato rūpārūpāvacaradhammāpi gahitā eva hontīti.

Sukhabahulatāya rājāno hasamānāpi “coraṃ ghātethā”ti vadanti, hāso pana tesam aññavisayoti āha “**sanniṭṭhāpaka...pe... hotī**”ti.

**Kesañcī**ti sahaḷātānaṃ adinnādānādīnaṃ. **Sampayuttapabhāvakaṭṭhenā**ti sampayutto hutvā uppāḍakaṭṭhena. **Kesañcī**ti asahaḷātānaṃ. **Upanissayapaccayaṭṭhenā**ti etena mūlaṭṭhena lobhassa upakārataṃ nivatteti. Suppatiṭṭhitabhāvasādhanatṭho hi mūlaṭṭho, so ca hetupaccayatāvinābhāvī, tena cettha mūlamiva mūlanti gahetabbam, nippariyāyato pana pubbe “kesañcī”ti vuttānaṃ sahaḷātānaṃ mūlabhāvo veditabbo. **Ratto khoti**ādinā suttapadenāpi pāṇātipātādīnaṃ akusalānaṃ lobhassa mūlakāraṇataṃ vibhāveti, na mūlaṭṭhenu pakāratthaṃ avisesato tesam hetupaccayatābhāvato.

Akusalakammāpathavaṇṇanā niṭṭhitā.

### **Kusalakammāpathavaṇṇanā**

**Veranti** pāṇātipātādīpāpadhammaṃ. So hi verahetutāya “vera”nti vuccati, taṃ **maṇati** “mayi idha ṭhitāya kathamāgacchasi”ti tajjentī viya nivāretīti **veramaṇī**. Tenāha “**pajahati**”ti. “Viramaṇī”ti vattabbe niruttinayena eva-kāraṃ katvā evaṃ vuttaṃ. **Vibhaṅge** (vibha. 703, 704) eva niddisanavasena evaṃ vuttā. Asamādinnaṣṭhassa sampattato yathāupaṭṭhitavītikkamitabbavatthuto virati **sampattavirati**, samādānavasena uppannā virati **samādānavirati**, samādānavasena uppannā virati **samādānavirati**, kilesānaṃ samucchindanavasena pavattāvirati **samucchedavirati**.

Jīvamānasasassa maṃsarudhirasammissatāya **allasasamaṃsaṃ**. **Muñci** sabbattha samakaruṇatāya. **Saccaṃ vatvā** “etena saccavajjena mayhaṃ mātu rogo sammatū”ti **adhiṭṭhāsi**.

**Mahāsappoti** ajagaro. **Muñcitvā agamāsi** sīlatejēna.

Kosallaṃ vuccati ñāṇaṃ, kosallena, kosallato vā **pavattiyā** upagamanato. **Kucchitasayanatoti** kucchitenākārena sayanato anusayanato, pavattanato vā. “Veramaṇīkusalā”ti vattabbāpi pucchānurūpaṃ vissajjananti “kusalā”ti na vuttā, “kusala”ntveva vuttā.

Kāmañcettha pāliyaṃ viratiyova āgatā, sikkhāpadavibhaṅge (vibha. 704) pana cetanāpi āharitvā dīpitāti tadubhayampi gaṇhanto “**cetanāpi vaṭṭanti viratiyopi**”ti āha.

**Anabhijjhā hi mūlaṃ patvā** kammāpathakoṭṭhāsaṃ patvā anabhijjhāti vuttadhammo mūlato alobho kusalamūlaṃ hotīti evamattho daṭṭhabbo. Sesapadadvayepi eseva nayo.

Dussīlyārammaṇā tadārammaṇā jīvitindriyādiārammaṇā kathaṃ dussīlyāni pajahantīti taṃ dassetuṃ “**yathā panā**”tiādi vuttaṃ.

**Anabhijjhā ...pe... viramantassāti** abhijjhamaṃ pajahantassāti attho. Na hi manoduccaritato virati

atthi anabhijjhādīheva tappahānasiddhito. **Tesu alobhoti**ādīsu yaṃ vattabbaṃ, taṃ akusalamūlesu vuttanayeneva veditabbaṃ.

**Appanāvāranti** nigamanavāraṃ. **Ekena nayanā**ti vedanādivasena arūpamukheneva anekavidhesu vipassanākammatṭhānesu ekena kammatṭhānanayena. “**Ṭhapetvā abhijjhaṃ nava akusalakammamapathā**”ti vattabbaṃ. **Dasāti** vā idaṃ “kusalakammamapathā”ti iminā sambandhitabbaṃ “akusalakammamapathā ca dasa kusalakammamapathā cā”ti. “Ṭhapetvā abhijjha”nti hi imināva akusalakammamapathānaṃ navabhāvo vutto hoti. Atha vā **dasāti** idaṃ ubhayathāpi sambandhitabbaṃ. Abhijjhā hi pahātābbāpi sati pariññeyyatāṃ nātivattatīti. Tathā hi vuttaṃ “rūpataṇhā piyarūpaṃ sātārūpa”ntiādi, tasmā sā tāya pariññeyyatāya dukkhasaccepi saṅgahaṃ labhateva, pahātābbāṃ pana upādāya “ṭhapetvā abhijjha”nti vuttaṃ. Tenevāha “**pariyāyena pana sabbepi kammamapathā dukkhasacca**”nti. Abhijjhālobhānaṃ pavattiākārasiddhabhedāṃ upādāya “**ime dve dhammā**”ti vuttaṃ. Suttantanayena taṇhā “samudayasacca”nti vuttatī āha “**nippariyāyena samudayasacca**”nti. **Appavattī**ti appavattinimittamāha yathā “rāgakkhaya dosakkhaya”ti (saṃ. ni. 4.314). Sappaccayatāya saṅkhatasabhāve dukkhasacce gahite appaccayatāya asaṅkhatāṃ nirodhasaccaṃ paṭipakkhato āvattati, ekantasāvajje ācayagāmilakkhaṇe samudayasacce gahite sāvajjā vigamaṇaṃ apacayagāmilakkhaṇaṃ maggasaccaṃpaṭipakkhato āvattatīti dve āvattahāravasena veditabbānti vuttaṃ. Tenevāha **nettiyaṃ** (netti. 4.niddesavāra) –

“Ekamhi padaṭṭhāne, pariyesati sesakaṃ padaṭṭhānaṃ;  
Āvattati paṭipakkhe, āvatto nāma so hāro”ti.

**Sabbākārenā**ti kāmarāgarūparāgādisabbappakārehi, sabbato vā apāyagamanīyādiākārato, tattha kiñcīpi anavasesetvā vā. **Sabbākārenevā**ti sabbākārato. **Niharitvā**ti apanetvā, samucchinditvāicceva attho. **Kañci dhammaṃ anavakārīkaritvā**ti rūpavedanādīsu kañci ekadhammampi avinibbhogaṃ katvā, ekekato aggahetvā samūhatova gahetvāti attho. **Asmīti** ahamasmīti mānaggāhasena. So pana yasmā pañcakkhandhe niravasesato gaṇhāti, tasmā vuttaṃ “**samūhaggahaṇākārenā**”ti. Yasmā cettha aggamaggacittaṃ vuccati, tasmā āha “**diṭṭhisadisam mānānusaya**”nti. “Yaṃ rūpaṃ taṃ aha”ntiādinā yathā diṭṭhi rūpādīṃ “ahamasmī”ti gaṇhantī pavattati, evaṃ mānopi “seyyohamasmī”tiādināti āha “**mānānusayo asmīti pavattatā diṭṭhisadiso**”ti. **Paricchedakaroti** osānaparicchedakaro ito paraṃ dukkhasābhāvakarāṇato. **Kammamapathadesanāyā**ti kammamapathamukhena pavattacatusaccadesanāya. **Manasikārappaṭivedhavasenā**ti vipassanāmanasikāramaggappaṭivedhavasena.

Kusalakammamapathavāraṇṇanā niṭṭhitā.

### Āhāravāraṇṇanā

**90. Āharatī**ti (saṃ. ni. ṭi. 2.2.11) āneti, uppādeti upatthambheti cāti attho. **Nibbattā**ti pasutā. Tato paṭṭhāya hi loke jātavohāro. Paṭisandhiggahaṇato pana paṭṭhāya yāva mātukucchito nikkhamaṇaṃ, tāva sambhavesino. Esa tāva gabbhaseyyakesu bhūtasambhavesivibhāgo, itaresu pana paṭhamacittādivasena vutto. **Sambhava**-saddo cettha gabbhaseyyakānaṃ vasena pasūtipariyāyo, itaresaṃ vasena uppattipariyāyo. Paṭhamacittapaṭhamairiyāpathakkhaṇesu hi te sambhavaṃ uppattīṃ esanti upagacchanti nāma, na tāva bhūtā uppattiyā na suppatiṭṭhitattā. **Bhūtāyeva** sabbaso bhavesanāya samucchinnattā. **Na puna bhavissantī**ti avadhāraṇena nivattitamattaṃ dasseti, “yo ca kālaghaso bhūto”tiādīsu (jā. 1.2.190) bhūta-saddassa khīṇāsavavācītā daṭṭhabbā. **Vā-saddo cettha sampiṇḍanatto** “agginā vā udakena vā”tiādīsu (udā. 76) viya.

Yathāsakaṃ paccayabhāvena attabhāvassa paṭṭhapanamevetthaāhārehi kātabbaanuggahoti adhippāyenāha “**vacanabhedo...pe... ekoyevā**”ti. **Sattassa uppannadhammānanti** sattassasantāne uppannadhammānaṃ. Yathā “vassasataṃ tiṭṭhati”ti vutte anuppabandhavasena pavattatīti vuttaṃ hoti, evaṃ **ṭhitiyā**ti anuppabandhavasena pavattiyāti attho, sā pana avicchedoti āha “**avicchedāyā**”ti.

Anuppabandhadhammuppattiyā sattasantāno anuggahito nāma hotīti āha “**anuppannānaṃ uppādāyā**”ti. **Etānīti** ʃhītiyanuggahapadāni. **Ubhayattha daṭṭhabbāni**, na yathāsankhyaṃ.

Vatthugatā oḷā vatthu viya tena saddhiṃ āharitabbataṃ gacchatīti vuttaṃ “**ajjho haritabbato āhāro**”ti. Nibbattitaojaṃ pana sandhāya “**kabaḷīkārāhāro ojaṭṭhamakarūpāni āharatī**”ti vakkhati. **Oḷārikatā** appojatāya, na vatthuno thūlatāya, kathinatāya vā, tasmā yasmim vatthusmim parittā oḷā hoti, taṃ oḷārikam. Sappādayo dukkhuppādakatāya oḷārikāveditabbā. Visāṇādīnaṃ tivassachaddītanam pūtibhūttatā mudukatāti vadanti, taracchakheḷatemikatāya pana tathābhūtānaṃ tesam mudukatā. Dhammasabhāvo hesa. **Sasānaṃ āhāro sukhumo** taruṇatiṇasassakhādanato. **Sakuṇānaṃ āhāro sukhumo** tiṇabājādikhādanato. **Paccantavāsīnaṃ sukhumo**, tesaṃhi sākapaṇṇasukkhakurapadumapattampi āhāroti. **Tesam** paranimmitavasavattīnaṃ. **Sukhumotvevāti** na kiñci upādāya, atha kho sukhumo icceva **niṭṭham patto** tato paraṃ sukhumassa abhāvato.

Vatthuvaseṇa panettha āhārassa oḷārikasukhumatā vuttā, sā cassa appojamahojatāhi veditabbāti dassetuṃ “**ettha cā**”tiādi vuttaṃ. **Parissamanti** khudāvasena uppannaṃ sarīrakhedam. **Vinodetīti** vatthu tassa vinodanamattaṃ karoti. **Na pana sakkoti pāletunti** sarīraṃ yāpetuṃ nappahoti nissārattā. **Na sakkoti parissamaṃ vinodetuṃ** āmasayassa apūraṇato.

**Chabbidhopīti** iminā kassacipi phassassa anavasesitabbatamāha. **Āhārassadesanākkamenevettha** phassādīnaṃ dutiyādītā, na aññena kāraṇenāti āha “**desanānayo evā**”tiādi. Manaso sañcetanā, na sattassāti dassanattaṃ manogahaṇam yathā “**cittassa ʃhīti (dha. sa. 11), cetovimutti cā**”ti (ma. ni. 1.69) āha “**manosañcetanāti cetanā evā**”ti. **Cittanti** yaṃ kiñci cittaṃ, na vipākaviññānameva.

Pubbe “**āhāranti paccaya**”nti vuttattā “**yadi paccayaṭṭho āhāraṭṭho**”tiādinā codeti. **Atha kasmā imeyeva cattāro vuttāti** atha kasmā cattārova vuttā, ime eva ca vuttāti yojanā. **Visesapaccayattāti** etena yathā aññe paccayadhammā attano paccayuppannassa paccayāva honti, ime pana tathā ca honti aññathā cāti samānepi paccayatte atirekapaccayā honti, tasmā āhārāti vuttāti imamatthaṃ dasseti. Idāni taṃ atirekapaccayatam dassetuṃ “**visesapaccayo hī**”tiādi āradham. **Visesapaccayo rūpakāyassa kabaḷīkāro āhāro** upatthambhakabhāvato. Tenāha **aṭṭhakathāyaṃ** (visuddhi. 2.708; paṭṭhā. aṭṭha. paccayuddesavaṇṇanā) “**rūpārūpānaṃ upatthambhakattena upakārakā cattāro āhārā āhārapaccayo**”ti. Upatthambhakattaṃhi satipi janakatte arūpīnaṃ āhārānaṃ āhārajarūpasamuṭṭhāpakarūpāhārassa ca hoti, asati pana upatthambhakatte āhārānaṃ janakattaṃ natthīti upatthambhakattaṃ padhānaṃ. Janayamānopi hi āhāro avicchedavasena upatthambhayamāno eva janetīti upatthambhakabhāvo eva āhārabhāvo. **Vedanāya phasso visesapaccayo**. “**Phassapaccayā vedanā**”ti hi vuttaṃ. “**Saṅkhārapaccayā viññāna**”nti (udā. 1; ma. ni. 3.126) vacanato **viññāṇassamanosañcetanā**. “**Cetanā tividham bhavaṃ janetī**”ti hi vuttaṃ. “**Viññāṇapaccayā nāmarūpa**”nti pana vacanato **nāmarūpassa viññāṇam visesapaccayā**. Na hi okkantiviññāṇābhāve nāmarūpassa attasambhavo. Yathāha “**viññāṇaṇca hi, ānanda, mātukucchismiṃ na okkamissatha, api nu kho nāmarūpaṃ mātukucchismiṃ samuccissathā**”tiādi (dī. ni. 2.115). Vuttamevatthaṃ suttēna sādhetuṃ “**yathāhā**”tiādi vuttaṃ.

Evam yadipi paccayaṭṭho āhāraṭṭho, visesapaccayatāya pana ime eva āhārāti vuttāti taṃ nesam visesapaccayatam avibhāgato dassetvā idāni vibhāgato dassetuṃ “**ko panetthā**”tiādi āradham. **Mukhe ʃhapitamattoyeva** asaṅkhādīto, tattakenapi abhantarassa āhārassa paccayo hoti eva. Tenāha “**aṭṭha rūpāni samuṭṭhāpetī**”ti. Sukhavedanāya hito **sukhavedaniyo**. **Sabbathāpīti** cakkhusamphassādivasena. Yattakā phassassa pakārabhedā, tesam vasena sabbappakāropi **phassāhāro**. Yathārahaṃ **tisso vedanā āharati**, anāhārako natthi.

**Sabbathāpīti** idhāpi phassāhāre vuttanayānusāreṇa attho veditabbo. **Tisantativasenāti** kāyadasakam bhāvadasakam vatthudasakanti tividhasantativasena. **Sahajātādipaccayanayenāti** sahajātādipaccayavidhinā. Paṭisandhiviññāṇaṇhi attanā sahajātānāmassa sahajātāaññamaññanissayavipākīndriyasampayuttaatthiavigatapaccayehi paccayo hontoyeva

āhārapaccayatāya taṃ āhāretī vuttaṃ, sahaḷātarūpesu pana vatthuno sampayuttapaccayaṃ ṭhapetvā vippayuttapaccayena, sesarūpassa aññamaññapaccayañca ṭhapetvā vuttanayenevayojanā kātābbā. **Tānīti** napuṃsakaniddeso anapuṃsakānampi napuṃsakehi saha vacanato.

**Sāsavā kusalākusalacetanāva vuttā.** Visapaccayabhāvadassanaṃ hetanti. Tenāha “**avisesena panā**”tiādi. **Paṭisandhiviññānameva vuttanti** etthāpi eseva nayo. Yathā tassa tassa phalassa visesato paccayatāya etesaṃ āhāraṭṭho, evaṃ avisesatoṇṇi dassantena “**avisesena panā**”tiādi vuttaṃ. Tattha **taṃsampayuttataṃsamuṭṭhānadhammānanti** tehi phassādīhi sampayuttadhammānañceva taṃsamuṭṭhānarūpadhammānañca. Tattha **sampayutta**ggahaṇaṃ yathārahato daṭṭhabbaṃ, **samuṭṭhān**aggahaṇaṃ pana avisesato.

**Upatthambhento āhārakiccaṃ sādhetīti** upatthambhento ye va rūpaṃ samuṭṭhāpeti, ojaṭṭhamakarūpasamuṭṭhāpaneneva panassa upatthambhanakiccāsiddhi. **Phusantoyevāti** phusanakiccaṃ karonto eva. **Āyūhamānāvāti** cetayamānā eva abhisandahantī eva. **Vijānantamevāti** upapattiparikappanavasena vijānantameva āhārakiccaṃ sādhetīti yojanā. Sesapadadvayepi eseva nayo. Āhārakiccāsādhanañca tesāṃ vedanādiuppattihetutāya attabhāvassa pavattanameva.

**Kāyaṭṭhapanenāti** kasmā vuttaṃ? Nanu kammajādirūpaṃ kammādināva pavattatīti codanaṃ sandhāyāha “**kammajanitopi**”tiādi. Upādinnarūpasantatiyā upatthambhaneneva utucittajarūpasantatīnampi upatthambhanasiddhi hotīti “**dvinnam rūpasantatīna**”nti vuttaṃ. Upatthambhanameva sandhāya “**anupālako hutvā**”ti ca vuttaṃ. Rūpakāyassa ṭhitihetutā hi yāpanā anupālanā.

**Sukhādivatthubhūtaṃti** sukhādīnaṃ pavattiṭṭhānabhūtaṃ. Ārammaṇampi hi vasati ettha ārammaṇakaraṇavasena tadārammaṇā dhammāti vatthūti vuccati. **Phusantoyevāti** idaṃ phassassa phusanasabhāvattā vuttaṃ. Na hi dhammānaṃ sabhāvena vinā pavatti atthi. Vedanāpavattiyā vinā sattānaṃ sandhāvanatā natthīti āha “**sukhādi...pe... hotī**”ti, na cettha saññībhavakathāyaṃ asaññībhavo dassetabbo, tassāpi vā kāraṇabhūtavedanāpavattivaseneva ṭhitiyā hetuno abyāpitā. Tathā hi “**manosañcetanā...pe... bhavamūlanipphādanato sattānaṃ ṭhitiyā hotī**”ti vuttā, tato eva “**viññānaṃ vijānantamevāti** upapattiparikappanavasena vijānantamevā”ti vuttovāyamatthoti.

**Cattāri bhayāni daṭṭhabbāni** ādīnavavibhāvanato. **Nikantīti** nikāmanā. Rasataṇhaṃ sandhāya vadati. Sā hi kabaḷikāre āhāre balavatī. Teneva tattha avadhāraṇaṃ kataṃ. Bhāyati etasmāti **bhayaṃ, nikantiyevabhayaṃ** mahānatthahetuto. **Upagamaṇaṃ** visayindriyaviññāṇesu visayaviññāṇesu eva ca saṅgativasena pavatti, taṃ vedanādiuppattihetutāya “**bhaya**”nti vuttaṃ. Avadhāraṇe payojanaṃ vuttanayameva. Sesadvayepi esevanayo. **Āyūhanaṃ** abhisandahanaṃ, saṃvidhānantipi vadanti. Taṃ bhavūpapattihetutāya “**bhaya**”nti vuttaṃ. **Abhinipāto** tattha tattha bhava paṭisandhiggahaṇavasena nibbatti. So bhavūpapattihetukānaṃ sabbesaṃ anattānaṃ mūlakāraṇattā “**bhaya**”nti vutto. Idāni nikantiādīnaṃ sappaṭibhayaṃ vitthārato dassetuṃ “**kiṃkāraṇā**”tiādi āradham. Tattha **nikantiṃ katvāti** ālayaṃ janetvā, taṇhaṃ uppādetvāti attho.

**Phassa upagacchantāti** cakkhusamphassādibhedam phassaṃ pavattentā. **Phassassādinoti** kāyasamphassavasena phoṭṭhabbasaṅkhātassa phassassa assādanasīlā. Kāyasamphassavasena hi sattānaṃ phoṭṭhabbataṇhā pavattatīti dassetuṃ phassāhārādīnavadassane phoṭṭhabbārammaṇaṃ uddhaṭaṃ “**paresaṃ rakkhitagopitesū**”tiādinā. **Phassassādinoti** vā phassāhārassādinoti attho. Sati hi phassāhāre sattānaṃ phassārammaṇe assādo, nāsati. Tenāha “**phassassādamūlaka**”ntiādi.

Jātinimittassa bhayassa abhinipātasabhāvena gahitattā “**tammūlaka**”nti vuttaṃ, kammāyūhananimittanti attho.

**Abhinipataṭīti** abhinibbattati. Paṭhamābhinibbatti hi sattānaṃ tattha tattha āṅgarakāsusadise bhava



abhinipātasadisīti. **Tammūlakattāti** nāmarūpanibbattimūlakattā.

**Tatrāti** tāsū upamāsu. **Bhūtamatthaṃ katvāti** na parikkappitamatthaṃ, atha kho bhūtaṃ bhūtapubbaṃ atthaṃ katvā. Pātheyyahatthesu gacchantesu pātheyyaṃ, gacchantaṃ viya hotīti vuttaṃ “**gantvā pātheyyaṃ niṭṭhāsī**”ti. **Gantvāti** vāgamanahetūti attho. Khuppiṃpāsāturatāya ghanacchāyaṃ rukkhāṃ upagantaṃ asamattā **viraḷhacchāyāyaṃ nisīdimṃsu. Na dāni sakkā taṃ mayā kātum** atidubbalaḷhāvato. Parikkhalitagatitaruṇadārako khuppiṃpāsābhībūto ca, tasmā **gacchantoyeva mato.**

**Sajātimaṃsatāyāti** (saṃ. ni. 1. 2.2.63) samānajātimaṃsatāya, manussamaṃsatāyāti attho. Yaṃ manussamaṃsaṃ, tañhi loke jigucchānīyattā paṭikulaṃ. Tathā hi taṃ viññūhi vajjitaṃ, manussamaṃsesupī ñātimaṃsaṃ ayuttaparibhogatāya paṭikulaṃ, tatthāpi puttamaṃsaṃ, tatthāpi piyaputtamaṃsaṃ, tatthāpi taruṇamaṃsaṃ, tatthāpi āmakamaṃsaṃ, tatthāpi agorasābhisaṅkhatāṃ, tatthāpi aloṇaṃ, tatthāpi adhūpitanti evaṃ heṭṭhimato uttaruttarassa paṭikulatarabhāvākāraṇatā daṭṭhabbā. **Puttamaṃsasadisanti** paṭikulatāupaṭṭhāpanena puttamaṃsasadisamaṃ katvā passati. **Tattha nikantiṃ pariyādiyāti** ariyamaggena āhāre sāpekkhaṃ khepeti.

**Sā gāvīti** “seyyathāpi bhikkhave gāvī”ti (saṃ. ni. 2.63) evaṃ sutte vuttagāvī. **Uddāletvāti** uppātetvā. **Nissāya tiṭṭhatīti** paṭiccapaccayaṃ katvā pavattati. Dukkhadukkhatādivasena tiṇṇampi vedayitānaṃ dukkhabhāvaṃ sandhāyāha “**vedayitadukkhassā**”ti.

Sādhusammaṭāpi gati vipariṇāmasaṅkhārādukkhatāvasena kilesadukkhavasena ca mahāpariḷāhāyevāti vuttaṃ “**mahāpariḷāhaṭṭhena tayo bhavā**”ti. **Yathā upakaḍḍhakā dve purisā,** evaṃ kusalākusalavasena dve manosañcetanā. Yathā manosañcetanā na pavattati, tathā paṭipajjanto tattha nikantiṃ pariyādiyāti veditabbo.

Sattisatena hatā **eva** upamā sattisatāhatūpamā, tassaṃ **sattisatāhatūpamāyaṃ. Taṃ** sattisatāṃ. **Assa** purisassa. **Patitokāseti** purimasattīhi patitappadeso. **Dukkhassa pamāṇaṃ natthi** anekassa aparāparaṃ uppajjanato. **Khandhajananti** khandhānaṃ aparāparuppādo, paṭhamābhiniḷbatti pana paṭisandhi eva. **Āgucārī puriso viya paṭisandhiviññānaṃ** nānappakāradukkhuppādasannissayato, tehi ca dukkhehi upagantabbato. Sampayuttadhammānaṃ pamukkhabhāvena pavattiyā “**viññānaṃsa dukkhuppādoti** vuttā. Tathā hi vuttaṃ “manopubbaṅgamā dhammā”ti (dha. pa. 1, 2) yathā viññānaṃ āyatīṃ paṭisandhivasena na pavattati, evaṃ karaṇaṃ tattha nikantiṃ pariyādānaṃ daṭṭhabbaṃ.

**Pariññātaṃ vatthūti** dukkhasaccamāha. **Pañcakāmaguṇiko rāgoti** pañcakāmaguṇārammaṇo rāgo. **Pariññāto hotīti** paricchijja jānanaṃ samatikkanto hoti. Rasataṇhāya hi sammadeva vigatāya rūpataṇhādayopi vigatāyeva honti. Tathā ca sati kāmarāgasamyojanaṃ samucchinnameva hoti, evaṃ karaṇaṃ tattha nikantiṃ pariyādānaṃ daṭṭhabbaṃ. Pariññābhisaṃmaye hi siddhe pahānābhisaṃmayo siddho evāti. Pahāne ca kāmarāgasamyojane orambhāgiyasamyojanānaṃ lesopi nāvasissatīti dassento āha “**natthi taṃ samyojana**”ntiādi. Tena kabaḷikārāhārapariññā anāgāmitaṃ pāpetīti dasseti. Sesāhārapariññā pana arahattaniṭṭhā evāti dassento “**phasse bhikkhave**”tiādimāha. Tattha **tisso taṇhāti** kāmataṇhā rūpataṇhā arūpataṇhāti imā tisso taṇhā.

“**Purimataṇhāsamudayā**”ti saṅkhepato vuttamatthaṃ vitthārato dassetuṃ “**katha**”ntiādi āradhamaṃ. Tattha **taṇhāpaccayanibbattāti** taṇhāpaccayā nibbattā. Paṭisandhikkhaṇe purimataṇhāsamudayā āhārānaṃ samudayadassaneneva pavattikkhaṇepi upādinnakāhārasamudayo dassito hotīti taṃ anāmasitvā anupādinnakānaṃ taṇhāsamudayaṃ dassetuṃ “**yasmā panā**”tiādi vuttaṃ. **Idhāti** imasmīṃ sutte **missitvā kathitā** avisesitattā. **Sahajātataṇhāpaccayanibbattoti** ettha **sahajātaggahaṇaṃ** asahajātataṇhāpaccayanibbattopi anupādinnakāhāro labbhatīti dassanattaṃ. So pana asahajātataṇhāpaccayanibbattatāsāmaññenapi yathāvuttaupādinnakāhārena saṃsayamaṃ janeyyāti na uddhaṭo, na ca etaṃ karaṇaṃ “**rāgaṃ upanissāya domanassaṃ uppajjati**”ti vacanato, taṇhapanissayapaṭighacittasamuttānāya ca ojāya vasena anupādinnakāhārassa labbhanato. Kathamaṃ

pana taṅhā ojāya upanissayapaccayo; na hi **paṭṭhāne** katthaci rūpassa upanissayapaccayo vutto atthīti. Nāyaṃ virodho “yasmim̐ sati yaṃ hoti, so tassa upanissayo”ti suttantanayassa adhippetatā yathāvuttatthasambhavato. Tenevāha “**imissā...pe... taṅhāya nirodhenā**”ti.

Kāraṇe sabbaso niruddhe phalampi sabbaso nirujjhatīti āha “**āhāranirodho paññāyatī**”ti. Āhārānaṃ dukkhasaccekadesattā āhāraggaṇaṃ dukkhasaccaggahaṇameva hotīti āha “**idha cattāripi saccāni sarūpeneva vuttāni**”ti. Saccadesanā dukkhādīnaṃ yāvadeva pariññeyyādibhāvasandassanattā, tasmā jarāmarañādīsu pariññeyyādibhāvo asammohato sallakkhetabboti dassento “**sabbattha asammuyhantena saccāni uddharitabbāni**”ti āha.

Āhāravāraṇṇanā niṭṭhitā.

### Saccavāraṇṇanā

**91. Yena yena pariyāyena byākarotīti yena yena dukkhādijarāmarañādipariyāyena ariyasaccāni saṅkhepato ca vitthārato ca katheti. Dukkhaṅti dukkhasaccaṃ** dukkhaṃ, na dukkhamattaṃ.

Saccavāraṇṇanā niṭṭhitā.

### Jarāmarañavāraṇṇanā

**92. Tesam̐ tesanti** byāpanicchāvasenāyaṃ niddeso kato, tasmā yathā “gāmo gāmo ramaṇīyo”ti vutte ramaṇīyatāya tādisā sabbepi gāmā saṅgahaṃ gacchanti, evaṃ “tesam̐ tesam̐ sattānaṃ jāti”ti vutte jātisāṅkhātavikārasena sabbepi sattā saṅgahaṃ gacchanti. Tenāha “**saṅkhepato anekesaṃ sattānaṃ sādharāṇaniddeso**”ti.

**Gatijātivasenāti** (saṃ. ni. ṭī. 2.1.2) pañcagativasena, tathāpi ekekāya gatiyā khattiyādibhummadevādihatthiādijātivasena ca. Nikiyyanti sattā ettha, etena vāti **nikāyo**, gottacaraṇādīvibhāgo. Jarāya sabhāvo nāma vayohāni, tasmā **jarāti** vayohānisāṅkhātassa sabhāvassa niddeso, pākaṭajarāvasena niddeso khaṇḍiccādivasena gahaṇato. Jīraṇameva **jīraṇatā**, jīrantassa vā ākāro tā-saddena vutto. Tenāha “**ayaṃ ākāraniddeso**”ti. Dantādīnaṃ vasena khaṇḍaṃ jātaṃ etassāti khaṇḍito, puggalo. Tassa bhāvo **khaṇḍiccaṃ**. Palitaṃ etassa atthīti palito, tassa bhāvo **pāliccaṃ**. Vali taco etassāti valittaco, tassa bhāvo **valittacatā**. **Ime** khaṇḍiccādayo jarā. **Vikārānaṃ dassanavasenāti** vipattidassanavasena. **Vātassāti** mahato vātakkhandhassa. **Khaṇḍiccādivasena gatamaggo pākaṭo**, tasmā khaṇḍiccādiggaṇaṃ jarāya kiccaniddesoti vuttanti dasseti. **Na ca khaṇḍiccādīneva jarāti** kalalakālato pabhuṭi purimarūpānaṃ jarāpattakkhaṇe uppajjamānāni pacchimarūpāni paripakkarūpānurūpāni pariṇataparīṇatāni uppajjantīti anukkamena supariṇatarūpānaṃ paripākakāle uppajjamānāni khaṇḍiccādisabhāvāni uppajjanti, tāni udakādimaggesu tiṇarukkhasaṃbhaggatādayo viya paripākagatamaggasaṅkhātesu paripakkarūpesu uppannāni “jarāya gato maggo”iceva vuttāni, na jarāti.

**Pakatiyāti** phalavipaccanapakatiyā, jarāya vā pāpuṇitabbaṃ phalamevapakati, tāya jarā dīpitā. **Suppasannānīti** suṭṭhu pasannāni. Tameva suppasannataṃ kiccato dassetuṃ “**sukhumampī**”tiādi vuttaṃ. Tikkhavisadatā hi tesam̐ indriyānaṃ suppasannatā. **Āluṭitānīti** ākulāni. **Avisadānīti** abyattāni.

**Kāmaṃ** rūpadhammesupi khaṇikajarā durupalakkhitā paṭicchannāva, sā pana yasmā santānavasena pavattiyā paribyattāva hotīti “**pākaṭajarā**”iceva vuttā. Avīci nirantarā jarā **avīcijarā** sati santāne sattānaṃ anuppabandhato. **Tato aññesūti** mandadasakādīsu pubbdadasakādīparicchedato aññesu yathāvuttesu. **Antarantarāti** tesu eva vuttappakāresu purimadasakādito pacchimadasakādīnaṃ antarantarā. **Vaṇṇavisesādīnanti** vaṇṇavisesasaṅṭhānavisesasamphassavisesādīnaṃ.

**Vacanakavasenā**ti ka-kārena hi padaṃ vaḍḍhetvā vuttaṃ, tasmā cavanaṃ cutīti vuttaṃ hoti. Taṃ pana ekacatupañcavokārabhavesu cutiyā avisesato gahaṇanti āha “**ekacatupañcakkhandhānaṃ sāmāññavacana**”nti. **Cavanakavasenā**ti vā cavanakassa puggalassa vassenāti attho. Cavanaugheva **cavanatā**ti āha “**bhāvavacanenā**”ti. **Lakkhaṇanidassananti** vayasāṅkhātassa lakkhaṇassa nidassanaṃ. Cavantassa vā ākāro tā-saddena vutto “**cavanatā**”ti. Bhijjanaṃ **bhedoti** vuttaṃ “**cutikkhandhānaṃ bhaṅgupattiparidīpana**”nti. Yathā bhinnassa ghaṭassa kenaci pariyāyena ghanaghaṭabhāvena ṭhānaṃ natthi, evaṃ bhinnānaṃ khandhānanti cavanaṃ antarahitaṃ nāmāti āha “**antaradhānanti...pe... paridīpana**”nti. Yo maccūti vuccati bhedo, yañca maraṇaṃ pānacāgo, tadubhayaṃ ekajjhaṃ katvā vuttaṃ “**maccu maraṇa**”nti evaṃ vā ettha attho daṭṭhabbo. Kālassa antakassa kiriyāti yā loke vuccati, sā cuti, maraṇanti attho. Cavanakālo eva vā anatikkamanīyattā visesena kāloti vuttoti tassa kiriyā atthato cutikkhandhānaṃ bhedappattiyeva. “Cutī cavanatā”tiādīnā pubbe vohāramissakena niddiṭṭhaṃ.

Idāni nibbattitaparamatthanayeneva niddesoti dassetuṃ “**paramatthena dīpetu**”nti vuttaṃ. “Cavanakavasenā”tiādīnā hi puggalavasena ca vohārādhiṭṭhānā saṃvaṇṇanā katā. **Na kiñci** kaḷevaram **nikkhipaki** opapātikānaṃ cutikkhandhānaṃ antaradhānamevahoti, tato paraṃ utusamuṭṭhānarūpasantati na pavattati. “Jāṭisamudayā”tiādīsu yaṃ vattabbaṃ, taṃ “taṇhāsamudayā”tiādīsu vuttanayaneva sakkā viññātunti na vuttaṃ.

Jarāmarāṇavāraṇṇanā niṭṭhitā.

### Jātivāraṇṇanā

**93. Jāyanaṭṭhenā**tiādī āyatanavasena yonivasena ca dvīhi dvīhi padehi sabbasatte pariyādiyitvā jātiṃ dassetuṃ vuttaṃ. **Sammohavinodaniyaṃ** (vibha. aṭṭha. 191) pana “jāyamānakavasena **jāti**, sañjāyanavasena sañjātī”ti vuttattā tattha ekekeneva padena sabbasatte pariyādiyitvā jātiṃ dassētīti daṭṭhabbaṃ. Sampuñṇā jāti **sañjātī**ti katvā “**sā paripuñṇāyatanavasena yuttā**”ti vuttaṃ. Eteneva kevalaṃ jātisaddena vuttāya jātiyā aparipuñṇāyatanatā daṭṭhabbā. Abhibyattā nibbatti **abhinibbatti**, pākāṭā nibbattīti attho. “Tesaṃ tesaṃ sattānaṃ...pe... abhinibbattī”ti sattavasena pavattattā **vohāradesanā**.

**Tatra tatrā**ti ettha catuvokārabhave dvinnaṃ, ekavokārabhave dvinnaṃ, sesarūpadhātuyaṃ paṭisandhikkhaṇe uppajjamānānaṃ pañcannaṃ, kāmadhātuyaṃ vikalāvikalindriyavasena sattannaṃ navannaṃ dasannaṃ, puna dasannaṃ, ekādasannañca āyatanānaṃ vasena saṅgaho vedītabbo. Yadi pi cutikkhandhā anantarānaṃ paṭisandhikadhammānaṃ anantarādīnā paccayā hontī, ye pana samudayā ajanakā, te ettha upapattibhavoti adhippetā. Janako eva bhavoti adhippetoti dassento “**jātiyā paccayabhūto kammabhavo vedītabbo**”ti āha.

Jātivāraṇṇanā niṭṭhitā.

### Bhavavāraṇṇanā

**94.** Bhāvanabhavanaṭṭhena bhavo duvidho. Tattha kammabhavo “bhavati etasmā upapattibhavo”ti bhāvanaṭṭhena **bhavo**. **Aṭṭhakathāyaṃ** pana upapattibhavaṃ “bhavatīti bhavo”ti vatvā tassa kāraṇattā kammaṃ phalūpacārena bhavoti ayamattho vutto, ubhayatthāpi upapattibhavahetubhāvanettha kammaṃ kammabhavapariyāyoti dassitaṃ hoti. **Sabbathāpī**ti bhāvanabhavanakusalākusalaupapattisampattibhavahīnapanāṭīdīnā sabbappakārenapi. **Kāmabhavoti vuttaṃ** kāmataṇhāhetukato kāmataṇhāya ārammaṇabhāvato ca. Rūpabhavūpagakammaṃ rūpabhavo, tathā arūpabhavūpagakammaṃ arūpabhavo, taṃtaṃnibbattakkhandhā rūpārūpupattibhavā, rūpārūpabhavabhāvo pana tesaṃ “kāmabhavo”ti ettha vuttanayeneva vedītabbo.

Bhavavāraṇṇanā niṭṭhitā.

### Upādānavāraṇṇanā

**95. Upādānanti** catubbidhampi upādānaṃ. Yathā hi kāmāssādavasena, bhavassādavasena vā taṃtaṃsugatibhavūpagaṃ kammaṃ karontassa kāmupādānaṃ, evaṃ ucchedādimicchābhinivesavasenāti cattāripi upādānāni yathārahaṃ tassa tassa kusalakammabhavassa upanissayavaseneva paccayā honti, akusalakammabhavassa asahajātassa anantarassa upanissayavasenapi ārammaṇavasenapi. Sahajātassa kāmupādānaṃ sahajāta-aññamañña-nissaya-sampayutta-atthi-avigata-hetu-vasena sattadhā, sesaupādānāni tattha hetupaccayabhāvaṃ pahāya maggapaccayaṃ pakkipitvā sattadhāva paccayā honti. Anantarassa pana anantarasamanantaraanantarūpanissayanatthivigatāsevanavasena paccayā honti. Tassidampi **sahajātādīti ādi**-saddena saṅgahitanti daṭṭhabbaṃ. **Vatthukāmaṃ upādiyati** cittaṃ, puggalo vā **etenāti** attho. **Tanti** vatthukāmaṃ. Kāmetīti kāmo ca so upādiyatīti upādānañcāti yojanā. **Vuttanayenāti abhidhamme** vuttanayena.

**Sassato attāti** idaṃ purimadiṭṭhiṃ upādiyamānaṃ uttaradiṭṭhiṃ nidassetuṃ vuttaṃ. Yathā esā diṭṭhi dalhīkaraṇavasena purimaṃ purimaṃ uttarā uttarā upādiyati, evaṃ “natthi dinna”ntiādikāpīti. **Attaggahaṇaṃ** pana attavādupādānanti nayidaṃ diṭṭhupādānadassananti daṭṭhabbaṃ. **Loko cāti** attaggahaṇavinimutttagahaṇaṃ diṭṭhupādānabhūtaṃ idha purimadiṭṭhiuttaradiṭṭhivacanehi vuttanti veditabbaṃ. **Sabbadiṭṭhigatassa** “diṭṭhupādāna”nti **etaṃ adhvacaṇaṃ** “sabbāpi diṭṭhi diṭṭhupādāna”nti vacanato.

**Sīlabbatam upādiyantīti** sīlabbatam “suddhimaggo”ti upādiyanti. **Etena** micchābhinivesena. **Sayaṃ vā taṃ** micchābhinivesasahagataṃ. Sīlabbatasahacaraṇato **sīlabbatañca taṃ** dalhaggāhabhāvato **upādānañcāti sīlabbatupādānaṃ**. **Evaṃ suddhīti abhinivesatoti** evaṃ gosīlagovatādicaraṇena saṃsārasuddhīti abhinivesabhāvato. Etena taṃ sahadharaṇato abhinivesassa taṃsaddārahataṃ dasseti.

**Vadantīti** “atthi me attā”tiādīnā voharanti. **Etena** diṭṭhigatena. **Attavādamattamevāti** attāti vācāmattameva. Etena vācāvattumattametam, yadidaṃ bāhirakaparikkappito attāti dasseti.

**Taṇhā kāmupādānassāti** ettha “tattha katamaṃ kāmupādānaṃ? Yo kāmesu kāmaccando kāmārogo kāmanandī kāmataṇhā kāmāsneho kāmāpariḷāho kāmamucchā kāmajjhosaṇaṃ. Idaṃ vuccati kāmupādāna”nti vacanato taṇhādalhattam kāmupādānaṃ. **Taṇhādalhattanti** ca purimataṇhāupanissayapaccayato dalhābhūtā uttarataṇhā eva. Keci panāhu –

“Appattavisayapatthanā taṇhā andhakāre corassahatthappasāraṇaṃ viya, sampattavisayaggahaṇaṃ upādānaṃ tasseva bhaṇḍaggahaṇaṃ viyā”ti. Appicchasantuṭṭhipaṭipakkhā ete dhammā pariyesanārakkhadukkhāmūlāni, tasmā vuttalakkhaṇā taṇhā vuttalakkhaṇasseva upādānassa anānantarassa upanissayavasena paccayo, ārammaṇādivasenapi paccayo hotiyeva, anantarādīnaṃ pana anantarādivasena paccayo. Sabbassapi hi lobhassa taṇhāpariyāyopi kāmupādānapariyāyopi labbhatevāti. **Avasesānanti** diṭṭhupādānādīnaṃ. **Sahajātādivasenāti** sahajātānaṃ sahajātādivasena, asahajātānaṃ anantaraupanissayādivasenāti sabbaṃ heṭṭhā vuttanayeneva veditabbaṃ.

Upādānavāraṇṇanā niṭṭhitā.

### Taṇhāvāraṇṇanā

**96.** “Cakkhusamphasso”tiādi phassassa mātito nāmaṃ viya puttassa vatthuto tassa nissayabhāvena uppattihetuttā, ārammaṇaṃ pana kevalaṃ uppattihetūti vuttaṃ “**seṭṭhi...pe... nāma**”nti. **Kāmarāgabhāvenāti** vatthukāmassa rajjanavasena. **Rūpaṃ assādentīti** rūpārammaṇaṃ

taṇhābhinandanāvasena abhīramamānā eva assādentī. **Niccantiādinā** diṭṭhābhinandanāmukhena rūpaṃ abhīramantī. **Pecca na bhavissatī** bhijjivā na hoti puna anuppajjanato. **Tathā saddakaṇhādayopīti** yathā rūpaṇhā kāmarāgabhāvena sassatarāgavasena ucchedarāgavasenāti ca pavattiyā tisso taṇhā, tathā saddataṇhā gandharasaphoṭṭhabbadhammataṇhāpi. **Taṇhāvicarītānī** taṇhāsamudācārā, samudācāravasena pavattataṇhāti attho.

**Ajjhattikassupādāyāti** (vibha. aṭṭha. 973; sam. ni. ṭī. 2.2.2) ajjhattikaṃ khandhapañcakaṃ upādāya. Upayogatthe hi idaṃ sāmivacanaṃ. **Asmīti hotīti** yadetaṃ ajjhattaṃ khandhapañcakaṃ upādāya taṇhāmānadiṭṭhivasena samūhagāhato asmīti evaṃ hoti, tasmīṃ satīti attho. **Itthasmīti hotīti** khattiyādīsu “idaṃpakāro aha”nti evaṃ taṇhāmānadiṭṭhivasena hotīti idamettha anupanidhāya gahaṇaṃ. **Evamādināti ādi-saddena** “evaṃsmīti, aññathāsmīti, bhavissanti, itthaṃ bhavissanti, evaṃ bhavissanti, aññathā bhavissanti, asasmīti, satasmīti, siyanti, itthaṃ siyanti, evaṃ siyanti, aññathā siyanti, apāhaṃ siyanti, apāhaṃ itthaṃ siyanti, apāhaṃ evaṃ siyanti, apāhaṃ aññathā siya”nti (vibha. 973) imesaṃ taṇhāvicarītānaṃ gahaṇaṃ. Tattha **evaṃsmīti** idaṃ samato upanidhāya gahaṇaṃ, yathā ayaṃ khattiyō, yathā ayaṃ brāhmaṇō, evaṃ ahampīti attho. **Aññathāsmīti** idaṃ asamaṇō upanidhāya gahaṇaṃ, yathā ayaṃ khattiyō, yathā ayaṃ brāhmaṇō, tato aññathā ahaṃ hīno vā adhiko vāti attho. Iti imāni pubbe vuttāni dveti etāni paccuppannavasena cattāri taṇhāvicarītāni. **Bhavissantiādinī** pana cattāri anāgatavasena vuttāni. Tesāṃ purimacatukke vuttanayeneva attho vedītabbo. **Asasmīti** asatīti asaṃ. Niccassetāṃ adhivacanaṃ, tasmā sassato asmīti attho. **Satasmīti** sīdatīti sataṃ. Aniccassetāṃ adhivacanaṃ, tasmā asassato asmīti attho. Iti imāni dve sassatucchedavasena vuttāni. Ito parāni **siyantiādinī** cattāri saṃsayaparivittakavasena vuttāni, tāni purimacatukke vuttanayena atthato vedītabbāni. **Apāhaṃ siyantiādinī** cattāri “api nāmāhaṃ bhaveyya”nti evaṃ patthanākappanavasena vuttāni, tāni purimacatukke vuttanayeneva vedītabbāni.

Ettha ca sassatucchedavasena vuttā dve diṭṭhisīsā nāma, asmi, bhavissaṃ, siyaṃ, apāhaṃ siyanti ete pana cattāro suddhasīsā eva, “itthasmī”tiādayo tayo tayoti dvādasa sīsamūlakā nāma. Evametāni dve diṭṭhisīsā, cattāro suddhasīsā, dvādasa sīsamūlakāti ajjhattikassupādāya aṭṭhārassa taṇhāvicarītāni vedītabbāni.

**Bāhirassupādāyāti** bāhiraṃ khandhapañcakaṃ upādāya. Idampi hi upayogatthe sāmivacanaṃ. **Imināti** iminā rupena vā...pe... viññānena vāti evaṃ rūpādīsu ekameva “aha”nti, itaraṃ kiñcanapalibodhabhāvena gahetvā taṇhādivasena “asmī”ti abhinivisati, “iminā”ti ayamettha vireso. **Asmīti** iminā khaggena vā chattaṇa vā abhisekena vā “khattiyohamasmī”ti abhinivisati. **Bāhirarūpādinissitānīti** bāhirāni parasantatipariyāpannāni rūpavedanādīni nissitāni. **Aṭṭhārasāti** iminā “asmī”tiādinayappavattāni aṭṭhārassa, tāni pubbe vuttanayeneva vedītabbāni. “Iminā”ti hi ayamevettha vireso, tasmā “dve diṭṭhisīsā”tiādinā vuttanayeneva niddhāretvā vedītabbā. Ubhayaṃ pana ekajjhaṃ katvā āha “**chattīmsā**”ti.

**Niddesatthenāti** “chayime āvuso taṇhākāyā”tiādiniddesapāḷiyā atthavacanena. **Niddesavittārāti** tassa ca niddesassa aṭṭhasatataṇhāvicaritavasena vitthārena. **Vitthārassa ca puna saṅgahatoti** dvīhi ākārehi vitthāritassa aṭṭhārasataṇhāvicaritapabhedassa chaḷeva tissoyevāti ca puna saṅgahaṇato ca.

**Vipākavedanā adhippetā** visesato attānaṃ assādetabbato. Tameva hissā assādetabbataṃ pakāsetuṃ “**katha**”ntiādi vuttaṃ. **Assādanenāti** abhīratīyā. **Mamāyantāti** dhanāyantā. **Cittakārādīnanti ādi-saddena** iṭṭhavaṇṇārammaṇadāyakaṇaṃ saṅgaho. **Sippasandassanakādīnanti ādi-saddena** vejjādīnaṃ saṅgaho. Vejjā hi rasāyatanojāvasena tadupatthambhitavasena ca dhammārammaṇassa dāyaka. Svāyaṃ **ādi-saddo** “vīṇāvādakādī”tiādinā paccekaṇca yojetabbo, **puttaṃ mamāyantāti** puttaṃ sampiyāyantā. Putto viya cettha vedanā daṭṭhabbā, sappāyasappikhīrādīni viya vedanāya paccayabhūtāni iṭṭharūpādīrammaṇāni, dhāti viya rūpādichaḷārammaṇadāyaka cittaakārādayo daṭṭhabbā.

Tañhāvāraṇṇanā niṭṭhitā.

### Vedanāvāraṇṇanā

97. Cakkhusamphassajā eva vedanā atītādibhedabhinnā rāsivasena ekajjhaṃ gahetvā eko vedanākāyo yathā vedanākkhandho, evaṃ sotasamphassajādikāti pāḷiyam “chayime āvuso vedanākāyā”ti vuttanti āha “**vedanākāyāti vedanāsamūhā**”ti. Cakkhusamphassato jātā **cakkhusamphassajā vedanā**. Sā pana upādinnāpi anupādinnāpi, tadubhayassapi saṅgaṇhantena atthavaṇṇanāya katattā āha “**ayaṃ tāvettha sabbasaṅgāhikakathā**”ti. Idāni “vipākavidhi aya”nti upādinnayeva gaṇhanto “**vipākavasena**”tiādimāha. **Manodvāre manoviññāṇadhātusampayuttāti** tadārammaṇamanoviññāṇadhātusampayuttā.

**Avasesānanti** sampañchanādivedanānaṃ. **Upanissayādīti ādi**-saddena anantarādīnaṃ saṅgaho daṭṭhabbo. Anantarānañhi anantarādivasena, itaresaṃ upanissayavasena phasso paccayo hoti, manodvāre pana tadārammaṇavedanānaṃ manosamphasso upanissayavasena paccayo. **Advārikānanti** dvārarahitānaṃ. Na hi paṭisandhiādivedanānaṃ kiñci dvāraṃ atthi. **Sahajātamanosamphassasamudayāti** etenassa tāsam sahajātakoṭiyā paccayabhāvamāha.

Vedanāvāraṇṇanā niṭṭhitā.

### Phassavāraṇṇanā

98. Cakkhuṃ nissāya uppanno samphasso **cakkhusamphasso**. **Pañcavattukāti** cakkhādipañcavattukā cakkhādipañcavattusannissayā. “Upādinnakakathā esā”ti **bāvīsati**ggahaṇaṃ, pavattikathābhāvato **lokiyaggahaṇaṃ**. **Vipākamanasampayuttaphassāti** vipākamanoviññāṇasampayuttā phassā. Paccayuppanna viya paccayenapi upādinnakeneva bhavitabbanti “**channaṃ cakkhādīnaṃ āyatanāna**”nti vuttaṃ.

Phassavāraṇṇanā niṭṭhitā.

### Salāyatanaṅgavāraṇṇanā

99. Nidassanamattañcetaṃ, tasmā yathā ettha arūpalokāpekkhāya chaṭṭhāyatanañca salāyatanañca salāyatanaṅgavāraṇṇanā ekaseso icchitabbo, evaṃ yesaṃ paccayuppanno upādinnō, paccayo pana anupādinnotipi icchitabbo. Tesam matena bāhirāyatanaṅgavāraṇṇanā ekaseso veditabbo “chaṭṭhāyatanañca salāyatanañca salāyatanaṅgavāraṇṇanā”nti. Visuddhimaggopi imassa āgamassa atthasaṃvaṇṇanāti āha “**visuddhimagge...pe... vuttanayamevā**”ti. Esa nayo aññatthāpi visuddhimaggaggahaṇe.

Salāyatanaṅgavāraṇṇanā niṭṭhitā.

### Nāmarūpavāraṇṇanā

100. **Namanalakkhaṇanti** ārammaṇābhimukhaṃ namanasabhāvaṃ tena vinā apavattanato. **Ruppanaṃ** sītādivirodhipaccayasannipāte visadisuppatti. Ime pana **tayoti**ādīnā sabbacittupādāsādhāraṇavaseneva taṃsaṅkhārakkhandhaggahaṇaṃ, tasmā ye yattha asādhāraṇā, tepi atthato gahitāyevāti dasseti.

**Upādiyivāti** paccaye katvā. Paccayakaraṇameva hi paccayuppanna paccayabhūtaḍḍhamānaṃ upādiyanaṃ. Samūhasambandhe sāmivacanaṃ etanti “**samūhatthe etaṃ sāmivacana**”nti vuttaṃ tena vinā sambandhassa bhāvato. **Tenāti** tasmā. **Taṃ sabbampīti** taṃ bhūtopādāyapabhedam sabbampi

sattavīsatividhaṃ. **Yassa nāmassāti** catuvokārabhave nāmassa. **Viññāṇampi** tappariyāpannameva veditabbaṃ. **Rūpassāti** ekavokārabhave rūpassa. **Viññāṇaṃ** pana pañcavokārabhave saṅkhāraṇiññānameva. **Yassa** pañcavokārabhave nāmarūpassa. **Tassa vassenāti** sahaḷāṭṭassa sahaḷāṭṭādivasena, anantarassa anantarādivasena, itarassa upanissayādivasena tassa nāmassa yathārahaṃ tassa tassa viññāṇassa paccayabhāvo veditabbo.

Nāmarūpavāraṇṇanā niṭṭhitā.

### Viññāṇavāraṇṇanā

**101. Tebhūmakavipākaggahaṇe** kāraṇaṃ heṭṭhā vuttameva. **Saṅkhāro yassa viññāṇassāti** ettha aṭṭhavidhopi kāmāvacarapuññābhisaṅkhāro soḷasavidhassa kāmāvacaravipākaviññāṇassa, pañcavidhopi rūpāvacarapuññābhisaṅkhāro pañcavidhassa rūpāvacaravipākaviññāṇassa, dvādasavidhopi apuññābhisaṅkhāro sattavidhassa akusalavipākaviññāṇassa, catubbidhopi āneñjābhisaṅkāro catubbidhassa arūpāvacaravipākaviññāṇassa yathārahaṃ paṭisandhipavattīsu kammaṃpaccayena ceva upanissayapaccayena ca paccayo hoti. Ayamettha saṅkhepo, vitthāro pana **visuddhimagge** (visuddhi. 2.620) vuttanayena veditabbo.

Viññāṇavāraṇṇanā niṭṭhitā.

### Saṅkhāravāraṇṇanā

**102. Abhisaṅkharāṇalakkhaṇoti** abhisañcetaṃyitasabhāvo, āyūhanalakkhaṇoti attho. **Copanavassenāti** kāyaviññāṭṭisaṅkhāṭṭacopanavasena. Tena pañcadvārikacetanā paṭikkhipati. **Vacanabhedavassenāti** vācānicchāraṇavasena. Vacīviññāṭṭisamuṭṭhāpanavassenāti attho. Yathāvuttā vīsati, nava mahaggatakusalacetanā cāti **ekūnatim̐sa manosāñcetanā**. “**Kusalānaṃ upanissayavasenā**”ti vuttaṃ, ekaccānaṃ ārammaṇavassenapīti vattabbaṃ. **Sahaḷāṭṭādivassenāti** sahaḷāṭṭa-aññamañña-nissaya-sampayutta-atthi-avigatahetuvasena, anantarānaṃ anantarasamanantaraanantarūpanissayanatthivigatāsevanasena paccayo. **Api**-saddena upanissayaṃ saṅgaṇhāti.

Saṅkhāravāraṇṇanā niṭṭhitā.

### Avijjāvāraṇṇanā

**103. “Dukkhasacceaññāṇa”**nti saṅkhepatō vuttamatthaṃ vivarituṃ “**tatthā**”tiādi āradhhaṃ. **Tanti aññāṇaṃ**. Satipi pahātabbatte pariññeyyattavasena **antogadhaṃ**. **Dukkhasaccañcassāti** vatthusaṅkhāṭṭaṃ sampayuttakhandhasaṅkhāṭṭaṇca dukkhasaccaṃ assa aññāṇassa. Taṃ hissa nissayapaccayo hoti. **Tassāti** dukkhasaccassa. **Yāthāvalakkhaṇapaṭivedhanivāraṇenāti** saṅkhāṭṭaaviparītasabhāvapaṭivijjhanassa nivāraṇena. Etenassa pariññābhisaṃmayasaṅkhāṭṭassa ariyamaggapaṭivedhassa vibandhakabhāvamāha. **Ñāṇappavattiyāti** “idaṃ dukkhaṃ, ettakaṃ dukkha”nti anubujjhanākārāya pubbabhāgañāṇappavattiyā. **Etthāti** dukkhasacce. **Appadānenāti** avissajjanena. Etenassā anubodhañāṇassapi vibandhakatamāha.

**Tīhi kāraṇehi veditabbaṃ** antogadhābhāvato. Idha sampayuttakhandhavaseneva vatthuto samudaye aññāṇaṃ daṭṭhabbaṃ. **Ekenevāti** itaraṃ kāraṇattayaṃ paṭikkhipati. Yadiṇi aññāṇaṃ nirodhamagge ārammaṇaṃ na karoti, kuto tadantogadhatabbatthutā, te pana jānitukāmassa tappāṭicchādanavasena anirodhamaggesu nirodhamaggaggāhahetutāvasena ca pavattamānaṃ “**nirodhe paṭipadāyaṇca aññāṇa**”nti vuccati. Tenāha “**paṭicchādanato**”tiādi. Tassattho vuttoyeva. **Gambhīrattāti** sabhāveneva gambhīrattā. Agāḍhaapatiṭṭhābhāvena taṃvisayassa ñāṇassa uppādetuṃ asakkuṇeyyattā **duddasaṃ**. **Purimaṃ pana** saccadvayaṃ. **Vañcaniyatṭhenāti** vañcakabhāvena

ayāthāvabhāvena upaṭṭhānato **duddasattā gambhīraṃ**, na sabhāvato, tasmā taṃvisayaṃ aññāṇaṃ uppajjati. **Tatthāti** tasmim purimasaccadvaye aniccādisabhāvalakkhaṇassa duddasattā eva niccādivipallāsavasena pavattati aññāṇanti ānetvā sambandhitabbaṃ.

Idāni niddesavibhāgenapi avijjāya saccesu pavattivibhāgaṃ dassetuṃ “**apicā**”tiādi vuttaṃ. Tattha **dukkheti** ettakena bhummaniddesena. **Saṅgahatoti** pariññeyyatāya dukkhena saṅgahetabbato. Tena niddhāraṇatthaṃ dasseti. Dukkhasmiñhi avijjā niddhāriyati, na aññasmiṃ. **Vatthutoti** ādhāratthaṃ. Dukkhasannissayā hi avijjā. **Ārammaṇatoti** visayatthaṃ taṃ ārabba pavattanato. **Kiccatoti** byāpanatthaṃ chādanavasena taṃ byāpetvā pavattanato. Iminā nayena sesesupi attho veditabbo. **Avisesatoti** visesābhāvato, vuttanayena dukkhādīsu pavattiākāravisesaṃ aggahetvāti attho. **Sabhāvatoti** sarasalakkhaṇato. Catunnampi saccānaṃ ajānanasabhāvā hi avijjā. Kāmarāgabharāgā kāmāsavabhavāsavāti āha “**sahajātādivasenā**”ti. Nanu avijjā eva avijjāsavo, so kathaṃ avijjāya paccayoti āha “**pubbuppanā**”tiādi.

Avijjāvāraṇṇanā niṭṭhitā.

### Āsavavāraṇṇanā

**104. Āsavavāre** āsava-saddattho āsavavicāro ca heṭṭhā vuttoyeva. Kasmā panāyaṃ vāro vutto, nanu avijjādikāva paṭiccasamuppādadesanāti codanaṃ sandhāya “**ayaṃ vāro**”tiādi āradhamaṃ. **Paṭiccasamuppādapadesūti** paṭiccasamuppādakoṭṭhāsesu. Dvādasakoṭṭhāsā hi satthu paṭiccasamuppādadesanā. **Tassāpi paccayadassanavasena**ti nāyaṃ kāpilānaṃ mūlapakati viya appaccayā, atha kho sappaccayāti avijjāyapi paccayadassanavasena. **Āsavasamudayenāti** atītabhave āsavānaṃ samudayena etarahi avijjāya samudayo, etarahi avijjāya samudayena anāgate āsavasamudayoti evaṃ āsavāvijjānaṃ paccayapaccayuppannakabhāvena aparāparaṃ pavattamānaṃ ādikoṭṭiabhāvene va tannimittassa saṃsārassa ādikoṭṭiabhāvato anamataggatāsiddhi veditabbā.

**Dvattiṃsa ṭhānānīti** dvattiṃsa saccappaṭivedhakāraṇāni, dvattiṃsa vā catusaccakammaṭṭhānāni. **Imamhā sammādiṭṭhisuttāti** yāya ariyasāvako sammādiṭṭhi nāma hoti, sā ariyā sammādiṭṭhi ettha vuttāti sammādiṭṭhisuttaṃ, ito sammādiṭṭhisuttato.

**Catusaccapariyāyehīti** catusaccādhigamakāraṇehi. **Arahattapariyāyehīti** “so sabbaso rāgānusayaṃ pahāyā”tiādinā arahattādhigamakāraṇehi. Tenāha “**catusaṭṭhiyā kāraṇehī**”ti.

Āsavavāraṇṇanā niṭṭhitā.

Sammādiṭṭhisuttavaṇṇanāya līnatthappakāsanā samattā.

### 10. Satipaṭṭhānasuttavaṇṇanā

**105. Jānapadinoti** (dī. ni. ṭī. 2.95) janapadavanto, janapadassa vā issarā **rājakumārā**. Gottavasena **kurū** nāma. Tesam nivāso yadi eko janapado, kathaṃ bahuvacananti āha “**ruḷhīsaddenā**”ti. Akkharacintakā hi īdisesu ṭhānesu yutte viya salīngavacanāni (pāṇini 1.251) icchanti, ayamettha ruḷhī yathā aññatthāpi “āngesu viharati, malle su viharatī”ti ca. Tabbisesane pana janapada-sadde jāti-sadde ekavacanameva. **Aṭṭhakathācariyā panāti pana**-saddo visesatthajotano. Tena puthuatthavisayatāya evaṃ taṃ bahuvacananti “bahuke panā”tiādinā vakkhamānaṃ visesaṃ dīpeti. **Sutvāti** mandhātumahārājassa ānubhāvadassanānusārena paramparāgataṃ kathaṃ sutvā. **Anusamyāyantenāti** anuvicarantena. **Etesam ṭhānanti** candimasūriyamukhena cātumahārājikabhavanamāha. Tenāha “**tattha agamāsī**”tiādi. **Soti** mandhātumahārājā. **Tanti** cātumahārājikarajjaṃ. **Gahetvāti** sampācchitvā. **Puna pucchi** pariñāyakarataṃ. **Dovārikabhūmiyaṃ tiṭṭhanti** sudhammāya



devasabhāya devapurassa ca catūsu dvāresu ārakkhāya adhikatattā.

**Dibbarukkasahassa paṭimaṇḍitanti** idaṃ “cittalatāvana” ntiādīsupi yojetabbaṃ.

**Pathaviyaṃ paṭiṭṭhāsīti** bhassitvā pathaviyā āsanne ṭhāne aṭṭhāsī, ṭhatvā ca nacirasseva antaradhāyī tenattabhāvena rañño cakkavattissariyassa abhāvato. “Ciratarāṃ kālaṃ ṭhatvā” ti apare. **Devabhāvo pāturahosi** devaloke pavattivipākādāyino aparāpariyāyavedanīyassa kammassa katokāsattā. Avayave siddho vireso samudāyassa viresako hotīti **ekampi raṭṭhaṃ bahuvacanena voharīyati**.

**Da-kārena atthaṃ vaṇṇayanti** niruttinayena. **Kammāsoti** kammāsapādo vuccati uttarapadalopena yathā “rūpabhavo rūpa” nti. Kathaṃ pana so kammāsapādoti āha “**tassa kirā**” tiādi. **Damitoti** ettha kīdisaṃ damanaṃ adhippetanti āha “**porisādabhāvato paṭisedhito**” ti. **Ime pana therāti** majjhimbhāṇake vadati, te pana cūlakammāsadammaṃ sandhāya tathā vadanti. Yakkhiniputto hi kammāsapādo alīnasattukumārakāle bodhisattena tattha damito, sutasomakāle pana bārāṇasirājā porisādabhāvapaṭisedhanena yattha damito, taṃ mahākammāsadammaṃ nāma. **Puttoti** vatvā **atrajoti** vacanaṃ orasaputtabhāvadassanattaṃ.

Yehi āvasitapadeso kururaṭṭhanti nāmaṃ labhi, te uttarakuruto āgatā manussā tattha rakkhitaniyāmeneva pañca silāni rakkhiṃsu, tesāṃ diṭṭhānugatiyā pacchimā janatāti, so desadhamavasena avicchedato vattamāno **kuruvattadhammoti** paññāyittha, ayañca attho **kurudhammajātakena** (jā. 1.3.76-78) dīpetabbo. So aparabhāge yattha paṭṭhamaṃ saṃkiliṭṭho jāto, taṃ dassetuṃ “**kururaṭṭhavāsīna**” ntiādi vuttaṃ. Yattha bhagavato vasanokāso koci vihāro na hoti, tattha kevalaṃ gocaragāmakittanaṃ nidānakathāya pakati, yathā taṃsakkesu viharati devadahaṃ nāma sakkānaṃ nigamoti imamatthaṃ dassento “**avasanokāsato**” tiādimāha.

### Uddesavārakathāvaṇṇanā

**106. Kasmā bhagavā imaṃ suttamabhāsīti** asādhāraṇasamuṭṭhānaṃ pucchati, sādharmaṇaṃ pana pākāṭanti anāmaṭṭhaṃ, tena suttanikkhepo pucchitoti katvā itaro “**kururaṭṭhavāsīna**” ntiādinā aparajjhāsāyoyaṃ suttanikkhepoti dasseti. Etena bāhirasamuṭṭhānaṃ vibhāvanti daṭṭhabbaṃ. Ajjhattikaṃ pana asādhāraṇaṃ **mūlapariyāyasuttādiṭṭhikāyaṃ** vuttanayeneva veditabbaṃ. Kururaṭṭhaṃ kira (dī. ni. ṭī. 2.373) tadā tannivāsīnaṃ sattānaṃ yebhuyyena yonisomanasikāravantatāya pubbe ca katapuññatābalena utuādisampannameva ahoṣi. Tena vuttaṃ “**utupaccayādisampannattā**” ti. **Ādi-saddena** bhojanādisampattiṃ saṅgaṇhāti. Keci pana “pubbe kuruvattadhammānuṭṭhānavāsānāya uttarakuru viya yebhuyyena utuādisampannameva hontāṃ bhagavato kāle sātisaṃ utusappāyādiyuttaṃ taṃ raṭṭhaṃ ahoṣī” ti vadanti. **Cittasarīrakallatāyāti** cittassa sarīrassa ca arogatāya. **Anuggahitapaññābalāti** laddhupakāraññānubhāvā, anu anu vā āciṇṇapaññātejā. **Ekavīsatiyā ṭhānesūti** kāyānupassanāvasena cuddasasūṭhānesu, vedānupassanāvasena ekasmim ṭhāne, tathā cittānupassanāvasena, dhammānupassanāvasena pañcasu ṭhānesūti evaṃ ekavīsatiyā ṭhānesu. **Kammaṭṭhānaṃ arahatte pakkipitvāti** catusaccakammaṭṭhānaṃ yathā arahattaṃ pāpeti, evaṃ desanāvasena arahatte pakkipitvā. Suvāṇṇacaṅkoṭakasuvāṇṇamañjūsāsu pakkhittāni sumanacampakādinānāpupphāni maṇiputtādisattaratanāni ca yathā bhājanasampattiyā savisesaṃ sobhanti, kiccakarāni ca honti manuññābhāvato, evaṃ siladassanādisampattiyā bhājanavisesabhūtāya kururaṭṭhavāsīparisāya desitā ca bhagavato ayaṃ desanā bhīyosomattāya sobhati, kiccakarī ca hotīti imamatthaṃ dasseti “**yathā hi puriso**” tiādinā. **Etthāti** kururaṭṭhe.

**Pakatiyāti** sarasato, imissā satipaṭṭhānasuttadesanāya pubbeṭī adhippāyo. **Anuyuttā viharanti** satthu desanānusāratoti adhippāyo. **Vissaṭṭhaattabhāvanāti** aniccādivasena kismiñci yonisomanasikāre cittāṃ aniyojtvā rūpādīrammaṇe abhirativasena viassaṭṭhacittena **bhavituṃ na vaṭṭati**, pamāḍavīhāraṃ pahāya appamattena bhavitabbanti adhippāyo.

**Ekāyanoti** ettha **ayana-saddo** maggapariyāyo. Na kevalamayanameva, atha kho aññepi bahū

maggapariyāyāti paduddhāraṃ karonto “**maggassa hī**”tiādi vatvā yadi maggapariyāyo ayana-saddo, kasmā puna maggoti vuttanti codanaṃ sandhāyāha “**tasmā**”tiādi. Tattha ekamaggoti eko eva maggo. Na hi nibbānagāmī maggo añño atthīti. Nanu satipaṭṭhānaṃ idha “maggo”ti adhippetam, tadaññe ca bahū maggadhammā atthīti? Saccaṃ atthi, te pana satipaṭṭhānaggahaṇeneva gahitā tadavinābhāvato. Tathā hi ñāṇavīriyādayo niddese gahitā. Uddese pana satiyā eva gahaṇaṃ veneyyajjhāsavāsenaṭi daṭṭhabbam. **Na dvedhāpathabhūtoti** iminā imassa maggassa anekamaggatābhāvaṃ viya anibbānagāmibhāvābhāvañca dasseti. **Ekenāti** asahāyena. Asahāyatā ca duvidhā attadutiyaṭābhāvena vā, yā “vūpakaṭṭhakāyatā”ti vuccati, taṇhādutiyaṭābhāvena vā, yā “pavivittacittatā”ti vuccati. Tenāha “**vūpakaṭṭhena pavivittacittenā**”ti. Seṭṭhopi loke “eko”ti vuccati “yāva pare ekato karosi”tiādisūti āha “**ekassāti seṭṭhassā**”ti. Yadi saṃsārato nissaraṇaṭṭho ayaṇaṭṭho aññesampi upanissayasampannaṃ sādharmaṇo kathaṃ bhagavatoti āha “**kiñcāpi**”tiādi. **Imasmiṃ khoti** ettha **kho**-saddo avadhāraṇe, tasmā imasmiṃ yevāti attho. **Desanābhedoyeva heso**, yadidaṃ maggoti vā ayanoti vā. Tenāha “**attho paneko**”ti.

**Nānāmukhabhāvanānāyappavattoti** kāyānupassanādikumhena tatthāpi ānāpānādikumhena bhāvanānāyena pavatto. **Ekāyananti** ekagāminam, nibbānagāminanti attho. Nibbānañhi adutiyaṭā seṭṭhattā ca “eka”nti vuccati. Yathāha “ekañhi saccaṃ na dutiyamatthī”ti (su. ni. 890) “yāvata, bhikkhave, dhammā saṅkhatā vā asaṅkhatā vā, virāgo tesam aggamakkhāyatī”ti (a. ni. 4.34; itivu. 90) ca. Khayo eva antoti khayanto, jātiyā khayantaṃ diṭṭhavāti **jātikhayantadassī**. Avibhāgena sabbepe satte hitena anukampatīti **hitānukampī**. **Atarimsūti** tarimsu. **Pubbeti** purimakā buddhā, **pubbe** vā atītakāle.

**Tanti** taṃ tesam vacanaṃ, **taṃ** vā kiriyāvuttivācakattaṃ na yujjati. Na hi saṅkheyyappadhānatāya sattavācino eka-saddassa kiriyāvuttivācakatā atthi. “Sakimpi uddham gaccheyyā”tiādisu (a. ni. 7.72) viya “**sakim ayano**”ti iminā byañjanaena bhavitabbam. **Evam attham yojetvāti** evam padattham yojetvā. **Ubhayathāpīti** purimanayena pacchimanayena ca. **Na yujjati** idhādhippetamaggassa anekavāraṃ pavattisabbhāvato. Tenāha “**kasmā**”tiādi. **Anekavārampi ayatīti** purimanayassa, anekañcassa ayanam **hotīti** pacchimanayassa ca paṭikkhepo.

**Imasmiṃ padeti** “ekāyano ayaṃ bhikkhave maggo”ti imasmiṃ vākye, imasmiṃ vā “pubbabhāgamaggo lokuttaramaggo”ti saṃsayaṭṭhāne. **Missakamaggoti** lokiyena missako lokuttaramaggo. Visuddhiādīnaṃ nippariyāyahetuṃ saṅgaṇhanto ācariyaṭṭhero “missakamaggo”ti āha, itaro pariyāyahetu idhādhippetoti “**pubbabhāgamaggo**”ti.

**Saddam sutvāvāti** “kālo, bhante, dhammassavanāyā”ti kālārocanasaddam sutvā. **Evam ukkhipitvāti**. Evam “madhuraṃ imaṃ kuhiṃ chaḍḍemā”ti achaḍḍentā ucchubhāraṃ viya paggahetvā na vicaranti. **Āluḷetīti** viluḷito ākulo hotīti attho. **Ekāyanamaggo vuccati** **pubbabhāgasatipaṭṭhānamaggoti**. Ettāvata idhādhippetatthe siddhe tasseva alaṅkārattham so pana yassa pubbabhāgamaggo, taṃ dassetuṃ “**maggānaṭṭhaṅgiko**”tiādikā gāthāpi paṭisambhidāmaggatova ānetvā ṭhapitā.

**Nibbānagamaṇaṭṭhenāti** nibbānaṃ gacchati adhigacchati etenāti nibbānagamaṇam, so eva aviparītasabhāvatāya attho, tena nibbānagamaṇaṭṭhena, nibbānādhigamupāyatāyāti attho. **Magganiyaṭṭhenāti** gavesitabbatāya, “**gamaṇiyaṭṭhenā**”ti vā pāṭho, upagantabbattāti attho. **Rāgādīhīti**. Iminā rāgadosamohānaṃyeva gahaṇaṃ “rāgo malaṃ, doso malaṃ, moho mala”nti (vibha. 924) vacanato. “Abhijjhāvisamalobhādīhī”ti pana iminā sabbesampi upakkilesānaṃ saṅgaṇhanattham te visum uddhaṭā. **Sattānaṃ visuddhiyāti** vuttassa atthassa ekantikataṃ dassento “**tathā hī**”tiādimāha. Kāmaṃ “visuddhiyā”ti sāmāññajotānā, cittavisuddhi eva panettha adhippetāti dassetuṃ “**rūpamalavasena panā**”tiādi vuttaṃ. Na kevalam **aṭṭhakathā**vacanameva, atha kho idamettha āhaccabhāsītanti dassento “**tathā hī**”tiādimāha.

Sā panāyaṃ cittavisuddhi sijjhamānā yasmā sokādīnaṃ anuppādāya saṃvattati, tasmā vuttaṃ “**sokaparidevānaṃ samatikkamāyā**”tiādi. Tattha socanaṃ ñātibyasanādinimittam cetaso santāpo antonijjhānaṃ **soko**. Ñātibyasanādinimittameva sokādhikatāya “kahaṃ, ekaputtaka, kahaṃ, ekaputtakā”ti paridevavasena lapanam **paridevo**, āyatim anuppajjanaṃ idha **samatikkamoti** āha “**pahānāyā**”ti. Tam panassa samatikkamāvahataṃ nidassanavasena dassento “**ayaṃ hī**”tiādimāha.

Tattha **yaṃ pubbe taṃ visodhehīti** atītesu khandhesu taṇhāsaṃkilesavisodhanaṃ vuttaṃ. **Pacchāti** parato. **Teti** tuyhaṃ. **Māhūti** mā ahu. **Kiñcananti** rāgādikiñcanaṃ. Etena anāgatesu khandhesu saṃkilesavisodhanaṃ vuttaṃ. **Majjheti** tadubhayavemajjhe. **No ce gahessasīti** na upādiyissasi ce. Etena paccuppanne khandhapabandhe upādānappavatti vuttā. **Upasanto carissasīti** evaṃ addhattayagatasamkilesavisodhane sati nibbutasabbapariḷāhatāya upasanto hutvā viharissasīti arahattanikūṭena gātham niṭṭhapesi. Tenāha “**imaṃ gātha**”ntiādi.

**Puttāti** orasā, aññepi vā ye keci. **Pitāti** janako. **Bandhavāti** ñātakā. Ayañhettha attho – puttā vā pitā vā bandhavā vā **antakena** maccunā **adhipannassa** abhibhūtassa maraṇato tāṇāya na honti, tasmā **natthi ñātisū tāṇatāti**. Na hi ñātinam vasena maraṇato ārakkhā atthi, tasmā paṭācāre “ubho puttā kālakatā”tiādinā (apa. therī 2.2.498) mā niraṭṭhakaṃ paridevi, dhammaṃyeva pana yāthāvato passāti adhippāyo.

**Sotāpattiphale patiṭṭhitāti** yathānulomaṃ pavattitāya sāmukkaṃsikāya dhammadesanāya pariyoṣāne saḥassanayapaṭimaṇḍite sotāpattiphale patiṭṭhahi. Kathaṃ panāyaṃ satipaṭṭhānamaggavasena sotāpattiphale patiṭṭhasīti āha “**yasmā panā**”tiādi. Na hi catusaccakammaṭṭhānakathāya vinā sāvakānaṃ ariyamaggādhigamo atthi. “**Imaṃ gātham sutvā**”ti pana idaṃ sokavinodanavasena pavattitāya gāthāya paṭhamaṃ sutattā vuttaṃ. Esa nayo itaragāthāyapi. **Bhāvanāti** paññābhāvanā. Sā hi idhāhippetā. **Tasmāti** yasmā rūpādīnaṃ aniccādito anupassanāpi satipaṭṭhānabhāvanā, tasmā. **Tepīti** santatimahāmattpaṭācārā.

**Pañcasate coreti** satasatacoraparivāre pañca core paṭipāṭiyā pesesi. Te araññaṃ pavisitvā theram pariyesantā anukkamena therassa samīpe samāgacchimsu. Tenāha “**te gantvā theram parivāretvā nisīdīmsū**”ti. Vedanaṃ vikkhambhetvā pītipāmojjaṃ uppajjīti sambandho. Therassa hi silam paccavekkhato suparisuddham silam nissāya uḷāram pītipāmojjaṃ uppajjamānaṃ ūruṭṭhibhedajanitaṃ dukkhavedanaṃ vikkhambhesi. **Pādānīti** pāde. **Saññāpessāmīti** saññāttim karissāmi. **Adḍiyāmīti** jjugucchāmi. **Harāyāmīti** lajjāmi. **Vipassisanti** sammasiṃ.

**Pacalāyantānanti** pacalāyanaṃ niddaṃ upagātānaṃ. **Vatasampannoti** dhutacaraṇasampanno. **Pamādanti** pacalāyanaṃ sandhāyāha. **Oruddhamānasoti** uparuddhaadhicitto. **Pañjarasminti** sarīre. Sarīrañhi nhārusambandhaaṭṭhisāṅghātātāya idha “pañjara”nti vuttaṃ.

Pītavannaṃyā paṭākāya pariharaṇato mallayuddhacittakatāya ca **pītamallo**. **Tīsu rajjesūti** paṇḍucolaḡoḷarajjesu. Mallā sīhaḷadīpe sakkārasammānaṃ labhantīti **tambapaṇṇidīpaṃ āgamma**. **Taṃyeva aṅkusaṃ katvāti** “rūpādayo ‘mamā’ti na gahetabbā”ti na tumhākavaggena (saṃ. ni. 3.33-34) pakāsitamatthaṃ attano cittamattahatthino aṅkusaṃ katvā. **Jaṇṇukehi caṅkamati** “nisinne niddāya avasaro hotī”ti. **Byākaritvāti** attano vīriyārambhassa saphalatāpavedanamukhena sabrahmacārīnaṃ ussāhaṃ janento aññaṃ byākaritvā. **Bhāsītanti** vacanaṃ. Kassa pana tanti āha “**buddhaseṭṭhassa, sabbalokaggavādino**”ti. **Na tumhākantiādi** tassa pavattiākāradassanaṃ. Tayidaṃ me saṅkhārānaṃ accantavūpasamakāraṇanti dassento “**aniccā vatā**”ti gātham āhari. Tena idānāhaṃ saṅkhārānaṃ khaṇe khaṇe bhaṅgasāṅkhātassa rogassa abhāvena aroga parinibbutoti dasseti.

**Assāti** sakkassa. **Upapattīti** devūpapattī. **Punapākatikāva ahosi** sakkabhāveneva upapannattā. **Subrahmāti** evaṃ nāmo. Accharānaṃ nirayūpapattim disvā tato pabhuti satataṃ pavattamānaṃ attano cittutrāsaṃ sandhāyāha “**niccaṃ utrastamidaṃ citta**”ntiādi. Tattha **uttrastanti** santastaṃ bhītaṃ.

**Ubbigganti** samviggam. **Utrastanti** vā samviggam. **Ubbigganti** bhayavasena saha kāyena sañcalitam. **Anuppannesūti** anāgatesu. **Kicchēsūti** dukkhesu. Nimittatthe bhummavacanam, bhāvīdukkhapavattinimittanti attho. **Uppatitesūti** uppannesu kicchēsūti yojanā, tadā attano parivārassa uppannadukkhanimittanti adhippāyo.

**Bojjhāti** bodhito, ariyamaggatoti attho. **Aññatrāti** ca padaṃ apekkhitvā nissakkavacanam, tasmā bodhiṃ ṭhapetvāti attho. Esa nayo sesesupi. **Tapasāti** tapokammato. Tena maggādhigamassa upāyabhūtam dhutaṅgasevanādisallekhapaṭipadam dasseti. **Indriyasamvarāti** manacchaṭṭhānam indriyānam samvaraṇato. Etena satisamvarasīsenā sabbampi samvarasīlam, lakkhaṇahāranayena vā sabbampi catupārisuddhisīlam dasseti. **Sabbanissaggāti** sabbupadhinissajjanato sabbakilesappahānato. Kīlesesu hi nissatṭhesu kammavaṭṭam vipākavatṭaṅca nissatṭhameva hotīti. **Sotthinti** khemaṃ anupaddavataṃ.

Ñāyati nicchayena kamati nibbānam, taṃ vā ñāyati paṭivijjhīyati etenāti **ñāyo**, ariyamaggoti āha “**ñāyo vuccati ariyo aṭṭhaṅgiko maggo**”ti. **Tañhāvānavirahitattāti** tañhāsankhātavānavivittattā. Tañhā hi khandhehi khandham, kammunā vā phalam, sattehi vā dukkham vinati saṃsibbatīti vānanti vuccati. Tayidaṃ natthi ettha vānam, na vā etasmiṃ adhigate puggalassa vānanti **nibbānam**, asaṅkhatā dhātu. Parapaccayena vinā paccakkhakaṇaṃ sacchikiriyāti āha “**attapaccakkhatāyā**”ti.

Nanu “visuddhiyā”ti cittavisuddhiyā adhippetattā visuddhiggahaṇenevettha sokasamatikkamādayopī gahitā eva hontī, te puna kasmā gahitāti anuyogaṃ sandhāya “**tattha kiñcāpi**”tiādi vuttaṃ. **Sāsanayuttikovideti** saccapaṭiccasamuppādādīlakkhaṇāyaṃ dhammanītiyaṃ cheke. **Taṃ taṃ attham nāpetīti** ye ye bodhaneyyapuggalā saṅkhepavittārādivasena yathā yathā bodhetabbā, attano desanāvīlāsena bhagavā te te tathā tathā bodhento taṃ tamattham nāpeti. **Taṃ taṃ pākaṭam katvā dassentoti** atthāpattim aḅaṇento taṃ taṃ attham pākaṭam katvā dassento. Na hi sammāsambuddhā atthāpattiñāpakādisādhaniyavacanāti. **Samvattatīti** jāyati, hotīti attho. Yasmā anatikkantasokaparidevassa na kadāci cittavisuddhi atthi sokaparidevasamatikkamamukheneva cittavisuddhiyā ijjhanato, tasmā āha “**sokaparidevānam samatikkamena hoti**”ti. Yasmā pana domanassapaccayehi dukkhadhammehi puṭṭham puthujjanam sokādayo abhibhavanti, pariññātesu ca tesu te na hontī, tasmā vuttaṃ “**sokaparidevānam samatikkamo dukkhadomanassānam atthaṅgamenā**”ti. **Ñāyassāti** aggamaggassa tatiyamaggassa ca. Tadadhigamena hi yathākkamaṃ dukkhadomanassānam atthaṅgamo. Sacchikiriyābhisamayasaḅabhāvīpi itarābhisamayo tadavinābhāvato sacchikiriyābhisamayahetuko viya vutto “**ñāyassādhigamo nibbānassa sacchikiriyāyā**”ti. Phalañāṇena vā paccakkhakaṇaṃ sandhāya vuttaṃ “**nibbānassa sacchikiriyāyā**”ti. Sampadānavacanañcetam daṭṭhabbam.

**Vaṇṇabhaṇananti** pasamsāvacanam. Tayidaṃ na idheva, atha kho aññatthāpi sathā akāsiyevāti dassento “**yatheva hi**”tiādimāha. Tatthaādimhi kalyāṇam, ādi vā kalyāṇam etassāti **ādīkalyāṇam**. Sesapadadvayepi eseva nayo. Atthasampattiyā **sātham**. Byañjanasampattiyā **sabyañjanam**. Sīlādiपांचadhammakhandhapāripūrito upanetabbassa abhāvā ca **kevalaparipuṇṇam**. Nirupakkilesato apanetabbassa abhāvā ca **parisuddham**. Seṭṭhacariyabhāvato sāsana **brahmacariyam maggabrahmacariyaṅca** vo **pakāsessāmīti** ayamettha saṅkhepo, vitthāro pana **visuddhimagge** (visuddhi. 1.147) vuttanayena veditabbo. **Ariyavaṃsāti** ariyānam buddhādīnam vaṃsā paveṇīyo. **Aggaññāti** “aggā”ti jānitabbā sabbavaṃsehi seṭṭhabhāvato. **Rattaññāti** “cirarattā”ti jānitabbā. **Vaṃsaññāti** “buddhādīnam vaṃsā”ti jānitabbā. **Porāṇāti** purātanā anadhunātanattā. **Asamkiṇṇāti** avikiṇṇā anapanītā. **Asamkiṇṇapubbāti** “kiṃ imehi”ti ariyehi na apanītapubbā. **Na samkiyāntīti** idānīpi tehi na apanīyanti. **Na samkiyissantīti** anāgatepi tehi na apanīyissanti. **Appaṭikuṭṭhā...pe...** **viññūhīti** ye loke viññū samaṇabrāhmaṇā, tehi apaccakkhatā aninditā, agarahitāti attho. **Visuddhiyātiādi**hīti visuddhiādidīpanehi. **Padehīti** vākyehi, visuddhiatthātādībhedabhinnehi vā dhammakotṭhāsehi.

**Upaddaveti** anathe. **Visuddhinti** visujjhanam samkilesappahānam. Vācuggatakaraṇam **uggaho**. **Pariyāpuṇanam** paricayo. Atthassa hadaye ṭhapanam **dhāraṇam**. Parivattanam **vācanam**. **Gandhārakoti** gandhāradese uppanno. **Pahontīti** sakkonti aniyānamaggāti micchāmaggā, micchattaniyatāniyatamaggāpi vā. Suvaṇṇanti kūṭasuvaṇṇampi vuccatī. **Paṇīti** kācamaṇipi. **Muttāti** velujāpi. **Pavāḷanti** pallavopi vuccatīti **rattajambunadā**dipadehi te visesitā.

**Na tato heṭṭhāti** (sam. ni. ṭī. 2.5.367; dī. ni. ṭī. 2.373) idhādhippetakāyādīnam vedanādisabhāvattābhāvā, kāyavedanācittavimuttassa tebhūmakadhammassa visuṃ vipallāsavattantārahāvena gahitattā ca heṭṭhāgahaṇesu vipallāsavattūnam anīṭṭhānam sandhāya vuttam, pañcamassa pana vipallāsavattūno abhāvā “**na uddha**”nti āha. Ārammaṇavibhāgena hettha satipaṭṭhānavibhāgoti. **Tayo satipaṭṭhānāti** satipaṭṭhānasaddassa atthuddhāradassanam, na idha pāḷiyam vuttassa satipaṭṭhānasaddassa atthadassananti. **Ādisu hi satigocaroti** ettha **ādi**-saddena “phassasamudayā vedanānam samudayo, nāmarūpasamudayā cīttassa samudayo, manasikārasamudayā dhammānam samudayo”ti satipaṭṭhānāti vuttānam satigocarānam pakāsake suttapadese saṅgaṇhāti. Evaṃ paṭisambhidāpāḷiyampi (paṭi. ma. 3.34) avasesapāḷippadesadassanattho **ādi**-saddo daṭṭhabbo. **Satiyā paṭṭhānanti** satiyā patiṭṭhātabbaṭṭhānam. Dānādīni satiyā karontassa rūpādīni kaṣiṇādīni ca satiyā ṭhānam hontīti taṃnivāraṇatthamāha “**padhānam ṭhāna**”nti. Pa-saddo hi idha “paṇīṭā dhammā”tiādīsu (dha. sa. 14 tikamātikā) viya padhānatthadīpakoti adhippāyo.

**Ariyoti** ariyam sabbasattaseṭṭham sammāsambuddhamāha. **Etthāti** etasmim saḷāyatanavibhaṅgasutte (ma. ni. 3.311). Suttekaḍḍesena hi suttam dasseti. Tattha hi –

“Tayo satipaṭṭhānā yadariyo...pe... maraḥatīti iti kho panetaṃ vuttam, kiñcetaṃ paṭicca vuttam. Idha, bhikkhave, satthā sāvakānam dhammaṃ deseti anukampako hitesī anukampaṃ upādāya “idaṃ vo hitāya idaṃ vo sukhāyā”ti. Tassa sāvakā na sussūsanti, na sotaṃ odahanti, na aññā cīttam upaṭṭhapenti, vokkamma ca satthusāsanā vattanti. Tatra, bhikkhave, tathāgato na ceva anattamano hoti, na ca anattamanataṃ paṭisaṃvedeti, anavassuto ca viharati sato sampajāno. Idaṃ, bhikkhave, paṭhamam satipaṭṭhānam, yadariyo...pe... arahati.

Puna caparam, bhikkhave, satthā...pe... idaṃ vo sukhāyāti. Tassa ekacce sāvakā na sussūsanti...pe... vattanti. Ekacce sāvakā sussūsanti...pe... na ca vokkamma satthusāsanā vattanti. Tatra, bhikkhave, tathāgato na ceva anattamano hoti, na ca anattamanataṃ paṭisaṃvedeti, na ceva attamano hoti, na ca attamanataṃ paṭisaṃvedeti. Anattamanatañca attamanatañca tadubhayam abhinivajjetvā upekkhato viharati sato sampajāno. Idaṃ vuccati, bhikkhave, dutiyam satipaṭṭhānam...pe... arahati.

Puna caparam...pe... sukhāyāti. Tassa sāvakā sussūsanti...pe... vattanti. Tatra, bhikkhave, tathāgato attamano ceva hoti, attamanatañca paṭisaṃvedeti, anavassuto ca viharati sato sampajāno. Idaṃ vuccati, bhikkhave, tatiyam satipaṭṭhānam...pe... arahatī”ti (ma. ni. 3.311) –

Evaṃ paṭighānūyehi anavassutā, niccam upaṭṭhitassatitāya tadubhayavītivattā “satipaṭṭhāna”nti vuttā. Buddhānamyeva hi niccam upaṭṭhitassatitā hoti āveṇīkadhamabhāvato, na paccakabuddhādīnam. **Pa**-saddo ārambham joteti, ārambho ca pavattīti katvā āha “**pavattayitabbatoti attho**”ti. **Satiyā** karaṇabhūtāya **paṭṭhānam** paṭṭhapetabbaṃ **satipaṭṭhānam**. Ana-saddo hi bahulavacanena kammattthopi hotīti.

Tathāssa kattuattthopi labbhatīti “**patiṭṭhātīti paṭṭhāna**”nti vuttam. Tattha **pa**-saddo bhūsatthavisiṭṭham pakkhandhanam dīpetīti “**okkantivā pakkhandivā pavattatīti attho**”ti āha. Puna bhāvattam sati-saddam paṭṭhāna-saddaṅca vaṇṇento “**atha vā**”tiādīmāha. Tena purimavikappe sati-saddo paṭṭhāna-saddo ca katthuatthoti viññāyati. **Saraṇaṭṭhena**ti cirakatassa cirabhāsītassa ca anussaraṇaṭṭhena. **Idanti** yam “satiyeva satipaṭṭhāna”nti vuttam, idaṃ **idha** imasmim suttapadese

adhippetam.

**Yadi evanti** yadi sati eva satipaṭṭhānaṃ, sati nāma eko dhammo, evaṃ sante kasmā “**satipaṭṭhānā**”ti bahuvacananti āha “**satibahuttā**”tiādi. Yadi bahukā etā satiyo, atha kasmā “maggo”ti ekavacananti yojanā. **Maggatṭhenāti** niyyānatṭhena. Niyyāniko hi maggadhammo, teneva niyyānikabhāvena ekattupagato ekantato nibbānaṃ gacchati, atthikehi ca tadatthaṃ maggīyatīti attanāva pubbe vuttaṃ paccāharatī “**vuttañceta**”nti. Tatha **catassopi cetāti** kāyānupassanādivasena catubbidhāpi ca etā satiyo. **Aparabhāgeti** ariyamaggakkhaṇe. **Kiccaṃ sādhayamānāti** pubbhāge kāyādisu ārammaṇesu subhasaññādividhamanena visuṃ visuṃ pavattitvā maggakkhaṇe sakimyeva tatha catubbidhassapi vipallāsassa samucchadavasena pahānakiccaṃ sādhayamānā ārammaṇakaraṇavasena nibbānaṃ gacchanti. Catubbidhakiccāsādhaneva hettha bahuvacananiddeso. **Evañca satīti** maggatṭhena ekattaṃ upādāya “maggo”ti ekavacanena ārammaṇabhedenā catubbidhatam upādāya “cattāro”ti ca vattabbatāya sativijjamānattā. **Vacanānusandhinā** “ekāyano aya”ntiādikā desanā **sānusandhikāva**, na ananusandhikāti adhippāyo. Vuttamevatthaṃ nidassanena paṭipādetuṃ “**mārasenappamaddana**”nti suttapadaṃ (saṃ. ni. 5.224) ānetvā “**yathā**”tiādinā nidassanaṃ saṃsandeti. **Tasmātiādi** nigamaṇaṃ.

Visesato kāyo ca vedanā ca assādassakāraṇanti tappahānatthaṃ tesu taṇhāvattūsu oḷārikasukhumesu asubhadukkhabhāvadassanāni mandatikkhapaññehi taṇhācaritehi sukarānīti tāni tesam “visuddhimaggo”ti vuttāni tathā “niccaṃ attā”ti abhinivesavattutāya diṭṭhiyā visesakāraṇesu cittadhammesu aniccānattatādassanāni sarāgādivasena saññāphassādivasena nīvaraṇādivasena ca nātipphabhedatippabhedagatesu tesu tappahānatthaṃ mandatikkhapaññānaṃ diṭṭhacaritānaṃ sukarānīti tesam tāni “visuddhimaggo”ti vuttāni. Ettha ca yathā cittadhammānampi taṇhāya vatthubhāvo sambhavati, tathā kāyavedanānampi diṭṭhiyāti satipi nesam catunnampi taṇhādiṭṭhiyā vatthubhāve yo yassa sātisayapaccayo, taṃdassanattaṃ visesaggahaṇaṃ katanti daṭṭhabbaṃ. Tikkhapaññasamathayāniko oḷārikārammaṇaṃ pariggaṇhanto tatha aṭṭhatvā jhānaṃ samāpajjitvā vuṭṭhāya vedanaṃ pariggaṇhātīti vuttaṃ. “**Oḷārikārammaṇe asaṅghahanato**”ti. Vipassanāyānikassa pana sukhume citte dhammesu ca cittaṃ pakkhandatīti cittadhammānupassanānaṃ mandatikkhapaññāvīpassanāyānikānaṃ visuddhimaggatā vuttā.

**Tesam tatthāti** ettha tatha-saddassa “pahānattha”nti etena yojanā. Parato **tesam tatthāti** etthāpi esevanayo. Pañca kāmagaṇā savisesā kāye labbhantīti visesena kāyo kāmoghassa vatthu, bhavesu sukhaggahaṇavasena bhavassādo hoti bhavoghassa vedanā vatthu, santatighanagahaṇavasena visesato citte attābhīniveso hotīti diṭṭhoghassa cittaṃ vatthu, dhammesu vinibbhogassa dukkaratā dhammānaṃ dhammamattatāya duppaṭivijjhataṃ sammoho hotīti avijjoghassa dhammā vatthu, tasmā tesam pahānatthaṃ **cattārova vuttā**.

Yadaggena ca kāyo kāmoghassa vatthu, tadaggena abhijjhākāyaganthassa vatthu, dukkhāya vedanāya paṭighānusayo anusetīti dukkhadukkhavipariṇāmadukkhasaṅkhāradukkhabhūtā vedanā visesena byāpādakāyaganthassa vatthu, citte nīcaggahaṇavasena sassatassa attano sīlena suddhītiādi parāmasanaṃ hotīti sīlabbataparāmāsassa cittaṃ vatthu, nāmarūpaparicchedena bhūtaṃ bhūtao apassantassa bhavavibhavadīṭṭhisāṅkhāto idaṃsaccābhīniveso hotīti tassa dhammā vatthu, sukhavedanāssādivasena paralokanirapekkho “natthi dinna”ntiādikam parāmāsaṃ uppādetīti diṭṭhupādānassa vedanā vatthu santatighanagahaṇavasena sarāgādicitte sammoho hotīti mohāgatiyā cittaṃ vatthu, dhammasabhāvānavabodhena bhayaṃ hotīti bhayāgatiyā dhammā vatthu. Ye panettha avuttā, tesam vuttanayena vatthubhāvo yojetabbo. Tathā hi oghesu vuttanayā eva yogāsavevapi yojanā atthato abhinnattā. Tathā paṭhamoghataiyacatutthagānathayojanāya vuttanayā eva kāyacittadhammānaṃ itarūpādānavatthutā yojanā, tathā kāmoghavyāpādakāyaganthayojanāya vuttanayā eva kāyavedanānaṃ chandadosāgati vatthutā yojanā vā.

“Āhārasamudayā kāyasamudayo, phassasamudayā vedanāsamudayo, (saṃ. ni. 5.408)

sankhārapaccayā viññāṇaṃ, viññāṇapaccayā nāmarūpa’’nti (ma. ni. 3.126; udā. 1; vibha. 225) vacanato kāyādīnaṃ samudayabhūtā kabaḷīkārāhārāphassamanosañcetanāviññāṇāhārā kāyādi pari jānana na pariññātā hontīti āha “**catubbidhāhārapariññāttha**’’nti **pakaraṇanayoti nettipakaraṇavasena** suttanta saṃvaṇṇanāyayo.

**Saraṇavasenā**ti kāyādīnaṃ kusalādidhammānañca upadhāraṇavasena. Saranti gacchanti nibbānaṃ etāyāti satīti imasmiṃ atthe ekatte ekasabhāve nibbāne samosaraṇaṃ samāgamo **ekattasamosaraṇaṃ**. Etadeva hi dassetuṃ “**yathā hī**’’tiādi vuttaṃ. Ekanibbānapavesahetubhūtā vā samānatā eko satipaṭṭhānassa bhāvo ekattaṃ, tatha samosaraṇaṃ taṃsabhāgatā **ekattasamosaraṇaṃ**. Ekanibbānapavesahetubhāvamaṃ pana dassetuṃ “**yathā hī**’’tiādimāha. Etasmiṃ atthe saraṇekattasamosaraṇāni saheva satipaṭṭhānekabhāvassa kāraṇatthena vuttānīti daṭṭhabbāni, purimasmiṃ visuṃ. **Saraṇavasenā**ti vā “gamanavasenā’’ti atthe sati tadeva gamaṇaṃ samosaraṇanti, samosaraṇe vā satisaddatthavasena avuccamāne dhāraṇatāva satīti satisaddatthantarābhāvā purimaṃ satibhāvassa kāraṇaṃ, pacchimaṃ ekabhāvassāti nibbānasamosaraṇepi sahitāneva tāni satipaṭṭhānekabhāvassa kāraṇāni vuttāni honti. **Cuddasavidhena, navavidhena, soḷasavidhena, pañcavidhenā**ti idaṃ upari pāḷiyaṃ (ma. ni. 1.107) āgatānaṃ ānāpānapabbādīnaṃ vasena vuttaṃ, tesamaṃ pana antarabhedavasena tadanugatabhedavasena ca bhāvanāya anekavidhatā labbhatiyeva. Catūsu disāsu utṭhānakabhaṇḍasadisatā kāyānupassanāditaṃsaṃsatipaṭṭhānabhāvanānubhāvassa daṭṭhabbā.

“Gocare, bhikkhave, caratha sake pettike visaye’’tiādivacanato (dī. ni. 3.80; saṃ. ni. 5.372) bhikkhugocarā ete dhammā, yadidaṃ kāyānupassanādayo. Tatha yasmā kāyānupassanādipaṭipattiyā bhikkhu hoti, tasmā “kāyānupassī viharatī’’tiādinā bhikkhuṃ dasseti, bhikkhumhi taṃ niyatoti āha “**paṭipattiyā bhikkhubhāvadassanato**’’ti. Satthu cariyānuvidhāyakattā sakalasāsanasampaṭiggāhakattā ca **sabbappakārāya anusāsaniyā bhājanabhāvo**.

**Samaṃ careyyā**ti kāyādivisamacariyaṃ pahāya kāyādīhi samaṃ careyya. Rāgādivūpasamena **santo**. Indriyadameṇa **danto**. Catumagganiyāmeṇa **niyato**. Seṭṭhacaritāya **brahmacārī**. Kāyadaṇḍādiropānena **nidhāya daṇḍaṃ**. Ariyabhāve ṭhito **so** evarūpo bhāhitapāpasamitapāpabhinnakilesatāhi **brāhmaṇo samaṇo bhikkhū**ti veditaḃbo.

“Ayañceva kāyo bahiddho ca nāmarūpa’’ntiādisu (dī. ni. ṭī. 2.373) khandhapañcakaṃ, “sukhañca kāyena paṭisaṃvedetī’’tiādisu (ma. ni. 1.271, 287; pārā. 11) nāmakāyo kāyoti vuccatīti tato visesanatthaṃ “**kāyeti rūpakāye**’’ti āha.

**Asammissatoti** “vedanādayopi ettha sitā ettha paṭibaddhā’’ti kāye vedanādiānupassanāpasaṅgepi āpanne tato asammissatoti attho. Samūhavisayatāya cassa kāya-saddassa samudāyupādānatāya ca asubhākārassa “kāye’’ti ekavacanaṃ, tathā ārammaṇādivibhāgena anekabhedabhinnampi cittaṃ cittabhāvasamāññena ekajjhaṃ gahetvā “citte’’ti ekavacanaṃ, vedanā pana sukhādivibhedabhinnā visuṃ visuṃ anupassitabbāti dassentena “vedanāsū’’ti bahuvacanaṃ vuttā, tatheva ca niddeso pavattito, dhammā ca paropāṇāsabhedā anupassitabbākārena ca anekabhedā evāti tepi bahuvacanaseneva vuttā. Avayavīgāha-samaññātidhāvana-sārādānābhini vesanisedhanatthaṃ kāyaṃ aṅgapaccaṅgehi, tāni ca kesādihi, kesādike ca bhūtopādāyarūpehi vinibbhujjanto “**tathā na kāye**’’tiādimāha. Pāsādādinagarāvayavasamūhe avayavīvādinopi avayavīgāhaṃ na karonti, nagaraṃ nāma koci attho atthīti pana kesañci samaññātidhāvanaṃ siyāti itthipurisādisamaññātidhāvane nagaranidassanaṃ vuttaṃ. Aṅgapaccāṅgasamūho, kesalomādisamūho bhūtopādāyasamūho ca yathāvuttasamūhe tabbinimutto kāyopi nāma koci natthi, pageva itthiādayoti āha “**kāyo vā...pe... dissati**’’ti. **Koci dhammoti** iminā sattajīvādiṃ paṭikkhipati, avayavī pana kāyapaṭikkhepeveva paṭikkhittoti. Yadi evamaṃ kathaṃ kāyādisaññābhiddhānānītiāha “**yathāvutta...pe... karontī**’’ti.

**Yaṃ passati** itthiṃ purisaṃ vā. Nanu cakkhunā itthipurisadassanaṃ natthīti? Saccametamaṃ, “itthiṃ passāmi, purisaṃ passāmi’’ti pana pavattasāññāya vasena “yaṃ passati’’ti vuttaṃ. Micchādassanena vā

diṭṭhiyā yaṃ passati, na taṃ diṭṭhaṃ, taṃ rūpāyatanam na hotīti attho viparītaggāhavasena micchāparikkappitarūpattā. Atha vā taṃ kesādhūtopādāyasamūhasaṅkhātā diṭṭhaṃ na hoti acakkhaviññānaviññeyyattā, diṭṭhaṃ vā taṃ na hoti. **Yaṃ diṭṭhaṃ taṃ na passatīti** yaṃ rūpāyatanam kesādhūtopādāyasamūhasaṅkhātā diṭṭhaṃ, taṃ paññācakkhunā bhūtato na passatīti attho. **Apassaṃ bajjhateti** imaṃ attabhāvaṃ yathābhūtaṃ paññācakkhunā apassanto “etaṃ mama, esohamasmi, eso me atto”ti kilesabandhanena bajjhati.

**Na aññadhamaṇupassīti** na aññasabhāvānupassī, asubhādito aññākārānupassī na hotīti attho. **Kim vuttaṃ hotīti**ādinā tamevatthaṃ pākaṭaṃ karoti. **Pathavīkāyanti** kesādhikoṭṭhāsapathaviṃ dhammasamūhattā “kāyo”ti vadati, lakkhaṇapathavimeva vā anekappabhedaṃ sakalasarāgataṃ pubbāpariyabhāvena ca pavattamānaṃ samūhavasena gahetvā “kāyo”ti vadati. **Āpokāyanti**ādisupi eseva nayo.

**Evaṃ gahetabbassāti** “ahaṃ mama”nti evaṃ attattaniyabhāvena andhabālehi gahetabbassa. Idāni sattannaṃ anupassanākārānampi vasena kāyānupassanaṃ dassetuṃ “**apicā**”tiādi āraddhaṃ. Tattha **aniccato anupassatīti** catusamuṭṭhānikakāyaṃ “anicca”nti anupassati, evaṃ passanto evaṃ cassa aniccākārāmpi anupassatīti vuccati. Tathābhūtassa cassa niccaggāhassa lesopi na hotīti vuttaṃ “**no niccato**”ti tathāhesa “niccasaññaṃ pajahatī”ti (paṭi. ma. 3.35) vutto. Ettha ca “aniccato eva anupassati”ti eva-kāro luttaniddiṭṭhoti tena nivattitamattaṃ dassetuṃ “**no niccato**”ti vuttaṃ. Na cettha dukkhato anupassanādinivattanamāsaṅkitabbaṃ paṭiyogīnivattanaparattā eva-kārassa, uparidesanāruḷhattā ca tāsam.

**Dukkhato anupassatīti**ādisupi eseva nayo. Ayaṃ pana viseso – aniccassa dukkhattā tameva kāyaṃ dukkhato anupassati, dukkhassa anattattā **anattato anupassati**. Yasmā pana yaṃ aniccaṃ dukkhaṃ anattā, taṃ anabhinanditabbaṃ, na tattha rajjitabbaṃ, tasmā vuttaṃ “**nibbindati no nandati, virajjati no rajjati**”ti. So evaṃ arajjanto rāgaṃ **nirodheti no samudeti**, samudayaṃ na karotīti attho. Evaṃ paṭipanno ca **paṭinissajjati no ādiyati**. Ayañhi aniccādinupassanā tadaṅgavasena saddhiṃ kāyatannissayakhandhābhisaṅkhārehi kilesānaṃ pariccajanato, saṅkhatadosadassanena tabbiparīte nibbāne tanninnatāya pakkhandanato “pariccāgapaṭinissaggo ceva pakkhandanapaṭinissaggo cā”ti vuccati, tasmā tāya samannāgato bhikkhu vuttanayena kilese ca pariccajati, nibbāne ca pakkhandati, tathābhūto ca nibbattanavasena kilese na ādiyati, nāpi adosadassitāvasena saṅkhatārammaṇaṃ. Tena vuttaṃ “**paṭinissajjati no ādiyati**”ti. Idāni tahi anupassanāhi yesaṃ dhammānaṃ pahānaṃ hoti, taṃ dassetuṃ “**so taṃ aniccato anupassanto niccasaññaṃ pajahatī**”ti. Tattha **niccasaññaṃ**ti “saṅkhārā niccā”ti evaṃ pavattaviparītasāññaṃ. Diṭṭhicittavipallāsapahānamukheneva saññāvīpallāsappahānanti saññāgahaṇaṃ, saññāsīsena vā tesampi gahaṇaṃ daṭṭhabbaṃ. **Nandinti** sappītikataṇhaṃ. Sesam vuttanayemeva.

**Viharatīti** iminā kāyānupassanāsamaṅgino iriyāpathavīhāro vuttoti āha “**iriyatī**”ti iriyāpathaṃ pavattetīti attho. Ārammaṇakaraṇavasena abhiyāpanato “**tīsu bhavesū**”ti vuttaṃ, uppajjanavasena pana kilesā parittabhūmakā evāti. Yādipi kilesānaṃ pahānaṃ ātāpananti taṃ sammādiṭṭhiādinampi attheva, ātāpa-saddo pana vīriyeyeva niruḷhoti vuttaṃ “**vīriyassetam nāma**”nti. Atha vā paṭipakkhapahāne sampayuttadhammānaṃ abhussahanavasena pavattamānassa vīriyassa sātisayaṃ tadātāpananti vīriyameva tathā vuccati, na aññe dhammā. **Ātāpīti** cāyamīkāro pasamsāya, atisayassa vā dīpakoti ātāpīgahaṇena sammappadhānasamaṅgitaṃ dasseti. Sammā, samantato, sāmañca pajānanto **sampajāno**, asammisato vavatthāne aññadhamaṇupassitābhāvena sammā aviparītaṃ, sabbākārapajānanena samantato, uparūpari visesāvahabhāvena pavattiyā sayam pajānantoti attho. Yadi paññāya anupassati, kathaṃ satipaṭṭhānatāti āha “**na hī**”tiādi. **Sabbatthikanti** sabbattha bhavaṃ sabbattha līne uddhate ca citte icchitabbattā, sabbe vā līne uddhate ca bhāvetabbā bojjaṅgā atthikā etāyāti **sabbatthikā**. Satiyā laddhūpakārāya eva paññāya ettha yathāvutte **kāye** kammaṭṭhāniko bhikkhu **kāyānupassī viharati**. **Antosaṅkhepo** anto olīyano, kosajjanti attho. **Upāyapariggaheti** ettha sīlavīsodhanādi gaṇanādi uggahakosallādi ca **upāyo**, tabbipariyāyato **anupāyo** veditabbo. Yasmā ca



upaṭṭhitassati yathāvuttaupāyaṃ na pariccajati, anupāyañca na upādiyati, tasmā vuttaṃ **“mutṭhassati...pe... asamatto hoti”**ti. **Tenāti** upāyānupāyānaṃ pariggahaparivajjanesu apariccāgāpariggahesu ca asamatthabhāvena **assa** yogino.

Yasmā satiyevettha satipaṭṭhānaṃ vuttā, tasmāssa sampayuttā dhammā vīriyādayo ānganti āha **“sampayogaṅgañcassa dassetvā”**ti. Aṅga-saddo cettha kāraṇapariyāyo daṭṭhabbo, satiggahaṇeṇeva cettha samādhissati gahaṇaṃ daṭṭhabbaṃ tassā samādhikkhandhe saṅgahitattā. Yasmā vā satisisenāyaṃ desanā. Na hi kevalāya satiyā kilesappahānaṃ hoti, nibbānādhigamo vā, na ca kevalā sati pavattati, tasmāssa jhānadesanāyaṃ savitakkādivacanassa viya sampayogaṅgadassanatāti aṅga-saddassa avayavapariyāyātā daṭṭhabbā. **Pahānaṅganti** “viviceva kāmehi”tiādīsu (dī. ni. 1.226; ma. ni. 1.271, 287; saṃ. ni. 2.152; a. ni. 4.123; pārā. 11) viya pahātabbaṅgaṃ dassetuṃ. Yasmā ettha lokiyamaggo adhippeto, na lokuttaramaggo, tasmā pubbabhāgiyameva vinayaṃ dassento **“tadaṅgavinayena vā vikkhambhanavinayena vā”**ti āha. **Tesaṃ dhammānanti** vedanādidhammānaṃ. Tesañhi tattha anadhippetattā **“atthuddhāranayenetam vutta”**nti vuttaṃ.

Avisesena dvīhipi nīvaraṇappahānaṃ vuttanti katvā puna ekekena vuttaṃ pahānavisesaṃ dassetuṃ **“visesenā”**ti āha. Atha vā “vineyya nīvaraṇānī”ti avatvā abhijjhādomanassavacanassa payojanaṃ dassento **“visesenā”**tiādīmāha. Kāyānupassanābhāvanāya hi ujuvipaccanīkānaṃ anurodhādīnaṃ pahānaṃ dassanaṃ etassa payojananti. **Kāyasampattimūlakassāti** rūpa-bala-yobbanārogyādi-sarīrasampadā-nimittassa. Vuttavipariyāyato **kāyavipattimūlako virodho** veditabbo. **Kāyabhāvanāyāti** kāyānupassanābhāvanāya. Sā hi idha “kāyabhāvanā”ti adhippetā. **Tenāti** anurodhādippahānavacanena. **Yogānubhāvo hīti**ādī vuttassevatthassa pākāṭakaraṇaṃ.

**Satisampajaññenāti** atisampajaññaggahaṇena. **Sabbatthikakammaṭṭhānanti** buddhānussati mettā maraṇassati asubhabhāvanā ca. Idañhi catukkaṃ yoginā parihariyamānaṃ “sabbatthikakammaṭṭhāna”nti vuccati atisampajaññabalena avicchinnassa tassa pariharitabbattā, **satiyā vā samatho vutto** tassā samādhikkhandhena saṅgahitattā.

**Tenāti** saddatthaṃ anādiyitvā bhāvatthasseva vibhajanavasena pavattena vibhaṅgapāṭhena saha. **Aṭṭhakathānayoti** saddatthassapi vīvaraṇavasena yathārahaṃ vutto atthasaṃvaṇṇanāyayo. **Yathā saṃsandatīti** yathā atthato adhippāyato ca avilomento aññadatthu saṃsandati sameti, evaṃ veditabbo.

**Vedanādīnaṃ puna vacaneti** ettha nissayapaccayabhāvavasena cittadhammānaṃ vedanāsannissitattā pañcavokārabhave arūpadhammānaṃ rūpapaṭibaddhavuttito ca vedanāya kāyādiānupassanāpasaṅgepi āpanne tadasammissato vavatthānadassanatthaṃ ghanavinibbhogādīdassanatthañca dutiyavedanāgahaṇaṃ. Tena na vedanāyaṃ kāyānupassī, cittadhammānupassī vā, atha kho vedanānupassīyevāti vedanāsaṅkhāte vatthusmiṃ vedanānupassanākārasseva dassanena asammissato vavatthānaṃ dassitaṃ hoti. Tathā “yasmim samaye sukhā vedanā, na tasmim samaye dukkhā adukkhamasukhā vā vedanā. Yasmim vā pana samaye dukkhā adukkhamasukhā vā vedanā, na tasmim samaye itarā vedanā”ti vedanābhāvasāmaññe aṭṭhatvā taṃ taṃ vedanaṃ vinibbhujitvā dassanena ghanavinibbhogo dhuvabhāvaviveko dassito hoti. Tena tāsaṃ khaṇamattāvattānadassanena aniccatāya tato eva dukkhatāya anattatāya ca dassanaṃ vibhāvitam hoti. **Ghanavinibbhogādīti ādi-**saddena ayampi attho veditabbo. Ayañhi vedanāyaṃ vedanānupassīyeva, na aññadhammānupassī. Kiṃ vuttaṃ hoti – yathā nāma bālo amaṇisabhāvepi udakabubbuḷake maṇiākārānupassī hoti, na evamayaṃ ṭhitiramaṇiyepi vedayite, pageva itarasmim manuññākārānupassī, atha kho khaṇabhaṅguratāya avasavattitāya kilesāsucipaggharaṇatāya ca aniccaanattaasubhākārānupassī, vipariṇāmadukkhatāya saṅkhāradukkhatāya ca visesato dukkhānupassīyevāti vuttaṃ hoti. Evaṃ cittadhammesupi yathārahaṃ puna vacane payojanaṃ vattabbaṃ. **“Kevalaṃ panidhā”**tiādīnā idha ‘ettakaṃ veditabba’nti veditabbaparicchedaṃ dasseti. **Esā nayoti** iminā yathā cittaṃ dhammā ca anupassitabbā, tathā tāni anupassanto “citte cittānupassī, dhammesu dhammānupassī”ti veditabboti imamattaṃ atidisati.

**Yo sukhaṃ dukkhato addāti** yo bhikkhu sukhavedanaṃ vipariṇāmadukkhataya “dukka”nti paññācakkhunā addakkhi. **Dukkhamaddakkhi sallatoti** dukkhavedanaṃ pīḷajanato antotudanato dunnīharaṇato ca sallanti addakkhi passi. **Adukkhamasukhanti** upekkhāvedanaṃ. **Santanti** sukhadukkhāni viya anolārikatāya paccayavasena vūpasantasabhāvatāya ca santaṃ. **Aniccatoti** hutvā abhāvato udayabbayavantato tāvakālikatoniccapaṭikkhepato ca “anicca”nti yo addakkhi. **Sa ve sammaddaso bhikkhu** ekamsena pariyyattaṃ vā vedanāya sammā passanakoti attho.

**Dukkhatīpīti** saṅkhāradukkhataya dukkhā itipi. **Sabbaṃ taṃ dukkhasmīti** sabbaṃ taṃ vedayitaṃ dukkhasmīṃ antogadhaṃ pariyāpannaṃ vadāmi saṅkhāradukkhataṇatīvattanato. **Sukhadukkhato pi cāti** sukhādīnaṃ ṭhitivipariṇāmaññāṇasukkhataya vipariṇāmaṭhītiññāṇadukkhataya ca vuttattā tissopi sukkhato, tissopi ca dukkhato anupassitabbāti attho. Rūpādi-**ārammaṇachandādi-adhipati-ñāṇādi-sahajāta-**kāmāvacarādi-**bhūminānattabhedānaṃ** kusalākusala-taṃvipākakiriyā-nānattādi-bhedānaṃ, ādi-saddena saṅkhārikāsaṅkhārikasa-vatthukāvattukādi-nānattabhedānaṃ vasenāti yojetabbaṃ. **Suññatadhammassāti** “dhammā hontī”tiādīnā (dha. sa. 121) suññatavāre āgatasuññatasabhāvassa vasena. **“Kāmañcetthā”**tiādīnā pubbe pahīnattā puna pahānaṃ na vattabbanti codanaṃ dasseti, maggacittakkhaṇe vā ekattha pahīnaṃ sabbattha pahīnameva hotīti visuṃ visuṃ na vattabbanti. Tattha purimāya codanāya nānāpuggalaparīhāro, pacchimāya nānācittakkhaṇikaparīhāro. Lokiyabhāvanāya hi kāye pahīnaṃ na vedanādīsu pahīnaṃ hoti yadipi na pavatteyya, na paṭipakkhabhāvanāya tattha sā abhijjhādomanassassa appavatti hotīti puna tappahānaṃ vattabbamevāti. **Ekattha pahīnaṃ sesesupi pahīnaṃ hotīti** maggasatipatṭhānabhāvanaṃ, lokiyabhāvanāya vā sabbattha appavattimattaṃ sandhāya vuttaṃ. “Pañcapi khandhā loko”ti hi vibhaṅge (vibha. 362, 364, 366, 373) catūsipi ṭhānesu vuttanti.

Uddesavāraṇṇanāya līnatthappakāsanā samattā.

### Kāyānupassanāvaṇṇanā

### Ānāpānappabbavaṇṇanā

**107.** Bāhirakesupi ito ekadesassa sambhavato sabbappakāraggahaṇaṃ kataṃ **“sabbappakārakāyānupassanānibbattakassā”**ti. Tena ye ime ānāpānappabbādivasena āgatā cuddasappakārā, tadantogadhā ca ajjhātādianupassanā pakārā, tathā **kāyagatāsatisutte** (ma. ni. 3.154) vuttā kesādivaṇṇasaṅghānakasiṅgārāmaṇacatukkañjānappakārā, lokiyādippakārā ca, te sabbepi anavasesato saṅgaṇhāti. Ime ca pakārā imasmīmyeva sāsane, na ito bahiddhāti vuttaṃ **“sabbappakāra...pe... paṭisedhano cā”**ti. Tattha **tathābhāvapaṭisedhanoti** sabbappakārakāyānupassanānibbattakassa puggalassa aññāsāsanassa nissayabhāvapaṭisedhano. Etena “idha, bhikkhave”ti ettha idha-saddo antogadhaevasaddatthoti dasseti. Santi hi ekapaḍānīpi sāvadhāraṇāni yathā “vāyubhakkho”ti (dī. ni. ṭī. 2.374). Tenāha **“idheva samaṇo”**tiādī. Paripuṇṇasamaṇakaraṇadhammo hi so, yo sabbappakārakāyānupassanānibbattako. **Parappavādāti** paresaṃ aññatitthiyānaṃ nānappakārā vādā titthāyatanāni.

Araññādikasseva bhāvanānurūpasenāsanataṃ dassetuṃ **“imassa hī”**tiādī vuttaṃ. Duddamo damathaṃ anupagato goṇo **kūṭagoṇo**. Dohanakāle yathā thanehi anavasesato khīraṃ na paggharati, evaṃ dohapāṭibandhinī **kūṭadhenu**. Rūpasaddādi ke paṭicca uppajjanakaassādo **rūpārammaṇādīraso**. **Pubbe āciṅṅārammaṇanti** pabbajjāto pubbe, anādimati vā saṃsāre paricīṭārammaṇaṃ.

**Nibandheyyāti** bandheyya. **Satiyāti** sammadeva kammaṭṭhānassa sallakkhaṇavasena pavattāya satiyā. **Ārammaṇeti** kammaṭṭhānārammaṇe. Daḷhanti thiraṃ, yathā satokārissa upacārappanābhedo samādhi ijjhati, tathā thāmagataṃ katvāti attho.

**Visesādhigamaḍṭṭhadhammasukhavihārapadaṭṭhānanti** sabbesaṃ buddhānaṃ, ekaccānaṃ

paccekabuddhānaṃ, buddhasāvakaṇāṇa viśesādhigamaśśa, aññaṇa kammaṭṭhāṇeṇa adhigataviśeśānaṃ dīṭṭhadhammasukhavihāraśśa ca padaṭṭhāṇabhūtaṃ. **Vatthuvijjācariyo viya bhagavā** yogīnaṃ anurūpanivāśaṭṭhānupadiśānato. **Bhikkhu dīpisaḍiso** arañña ekākī viharitvā paṭipakkhānimmathāṇeṇa icchitathasāḍhanato. **Phalamuttamanti** sāmāññaṭṭhānaṃ sandhāyāha. **Parakkamajavayoggaḥmūmanti** bhāvanuśśāhajavāśśa yoggakaṛaṇabhūmibhūtaṃ.

**Assāśapassāśānaṃ vaśśena sikkhatoti** assāśapassāśānaṃ dīgharaśśaṭṭhāpajānaṇa-sabbakāyapaṭiśāṃvedana-oḷārikoḷārikapaṭiṭṭhāśśambhaṇavaśśena bhāvaṇānuyogaṃ sikkhato, tathābhūto vā hutvā tiśśo sikkhā pavattayato. **Assāśapassāśānimitte**ti assāśapassāśāśānīśśayena upaṭṭhitapaṭiḥbhāgaṇimite. **Assāśapassāśe pariggaṇhāti** rūpamukhena vipassānaṃ abhinivīśānto, yo “assāśapassāśakammiko”ti vutto. **Jhānaṅgaṇi pariggaṇhāti** arūpamukhena vipassānaṃ abhinivīśānto. **Vatthu nāma karajakāyo** cittacetasiḥkānaṃ pavattiṭṭhāṇabhāvato. **Añña satto vā puggalo vā natthīti** viśuddhadiṭṭhi “tayidaṃ dhammamattaṃ na ahetukaṃ, nāpi iśśarādivīśāmahetukaṃ, atha kho avijjādīhi eva sahetuka”nti addhattayepi kaṅkhāvitaraṇeṇa **vitīṇṇakaṅkha** “yaṃ kiñci rūpa”ntiādinā (ma. ni. 1.361; ma. ni. 2.113; ma. ni. 3.86; a. ni. 4.181; paṭi. ma. 1.48) kalāpaśśamaśśanaśśavaśśena **tilakkhaṇaṃ āropetvā** udayabbayānupassānaḍivāśśena **vipassānaṃ vaḍḍhento anukkameṇa** maggaṭipāṭiyā.

**Parāśśa vā assāśapassāśakāyēti** idaṃ śāśśamaśśanaśśaravaśśeṇāyāṃ pāli pavattāti katvā vuttaṃ, śāśśathavaśśena paṇa parāśśa assāśapassāśakāyē appaṇānīmittuppaṭṭi eva natthīti. **Idaṃ ubhayaṃ na labbhatīti** “ajjhattaṃ, bahiddhā”ti ca vuttaṃ idaṃ dhammaḍvayaggaṭitaṃ ekato āraṃmaṇabhāveṇa na labbhati.

Samudeti etaśśmāti śāśśamudayo, śo eva kāraṇaṭṭhena dhammoti śāśśamudayaḍdhammo, assāśapassāśānaṃ pavattiḥhetukarajakāyādi. Taśśa anupassānaśśiḷo **śāśśamudayaḍdhammānupassī**. Taṃ paṇa śāśśamudayaḍdhammaṃ upamāmukhena daśśento “**yathā nāmā**”tiādimāha. Taṭṭha **bhaśśanti** ruttiṃ. **Gaggaraṇāliṇti** ukkāpaṇāliṃ. **Teti** karajakāyāḍdike. Yathā assāśapassāśakāyo karajakāyāḍdisambandhī phalaḥbhāveṇa, evaṃ tepi assāśapassāśakāyāśāmbandhīno hetubhāveṇāti “śāśśamudayaḍdhammā kāyāśśmi”nti vattaḥbataṃ labhanti vuttaṃ “**śāśśamudaya...pe... vuccati**”ti. Paḥkativācī vā **dhammaśśaddo** “jātidhammāna”ntiādiśśu (ma. ni. 1.131; ma. ni. 3.373; paṭi. ma. 1.33) viyāti kāyāśśa paḥcayāśāmaḍvāyē uppaṇaṇapaḥkatiḥkānupassī “**śāśśamudayaḍdhammānupassī**”ti vutto. Tenāha – “karajakāyāñcā”tiādi. Evañca katvā **kāyāśśmīnti** bhūmmaḍvacānañca śāśśamaṭṭhitaṃ hoti. **Vayaḍdhammānupassīti** ettha ahetukaṭṭepi viṇāśśaśśa yeśāṃ hetuḍdhammānaṃ abhāve yaṃ na hoti, taḍdabhāvo taśśa abhāvāśśa hotu viya vohaṛīyatīti upacāraṭo karajakāyāḍdiabhāvo assāśapassāśakāyāśśa vāyākaṛaṇaṃ vutto. Tenāha “**yathā bhaśśāyā**”tiādi. Ayaṃ tāvettha paṭṭhamavīkappaśśavaśśena atthaviḥbhāvaṇā. ḍutiyavīkappaśśavaśśena paṇa upacāreṇa viṇāyeva attho veditaḥbo. Ajjhattaḥbahiddhānupassānaḍ viya bhīnnavatthūviśāyatāyā śāśśamudayaḍvayaḍdhammānupassānaḍapi ekakāle na labbhatīti āha “**kāleṇa śāśśamudayaṃ kāleṇa vāyaṃ anupassānto**”ti.

**Atthi kāyoti** evaśśaddo luttanīḍḍiṭṭhoti “**kāyova atthī**”ti vatvā avadhāraṇeṇa nīvatthitaṃ daśśento “**na satto**”tiādimāha. Taśśattho – yo rūpāḍdiśśu śāśśatvaśśiśāṭṭatāyā paśśeśāñca śāḥḥajāpaṇaṭṭhena, śāśśavagūṇayogato vā “**satto**”ti paśśeḥi paṛīkappaṭo. Taśśa śāśśatṭanīkāyāśśa pūraṇato ca caḍvanupaḥpaḥḥānaḍdhammaṭāyā galānaṭo ca “**puggalo**”ti. Thīyati śāśśaḥḥāññaṭi ettha gaḥbhoti “**itthī**”ti. Puri pure bhāge śeti pavattaṭṭi “**purīśśo**”ti. Āhito aḥḥamāno etthāti “**attā**”ti, attāno śāśśatākaḥbhāveṇa “**attāniya**”nti. Paṛo na hotīti katvā “**aha**”nti, maṃma śāśśatākaṇti katvā “**mama**”nti. Vuttappaḥkāravinīmutto aññaoti katvā “**koci**”ti, taśśa śāśśatākaḥbhāveṇa “**kassaḥcī**”ti paṛīkappaṭeḥḥaḥbo koci natthi, keḍalaṃ kāyo eva atthīti attāṭṭāniyaśśuññaṭameva kāyāśśa viḥbhāveti. **Evanti** “kāyova atthī”tiādinā vuttappaḥkāreṇa. **Ñāṇapaṃaṇaṭṭhāyāti** kāyānupassānaññaṇapaṃaṇaṃ paṃaṇaṃ pāpaṇaṭṭhāyā. **Satīpaṃaṇaṭṭhāyāti** kāyapaṛīggāḥhīkaśāṭīpaḍvattaṃ śāṭīpaṃaṇaṃ paṃaṇaṃ pāpaṇaṭṭhāyā. Imāśśa ḥi vuttānaḍyena “atthi kāyo”ti apaṛāpaṛuppaṭṭivaśśena paḥcupaṭṭhīṭā śāṭī bhīyyośśo maṭṭāyā taṭṭha ñāṇāśśa śāṭīyā ca paṛībrūhaṇāyā hoti. Tenāha “**śāśśatīpaḥpaḥḥāññaṃ vaḍḍhatthāyā**”ti.

Imissā bhāvanāya taṇhādiṭṭhigāhānaṃ ujupaṭipakkhattā vuttaṃ “**taṇhā...pe... viharatī**”ti. Tathābhūto ca loke kiñci “aha”nti vā “mama”nti vā gahetabbaṃ na passati, kuto gaṇheyya. Tenāha “**na ca kiñci**”tiādi. **Evampīti** ettha **pi**-saddo heṭṭhā niddiṭṭhassa tādisassa atthassa abhāvato avuttasamuccayatthoti dassento “**upari atthaṃ upādāyā**”ti āha. “**Eva**”nti pana niddiṭṭhākārassa paccāmasanaṃ nigamanavasena katanti āha “**iminā pana...pe... dassetī**”ti. Pubbabhāgasatipaṭṭhānassa idhāhippetattā vuttaṃ “**sati dukkhasacca**”nti. Sā pana sati yasmiṃ attabhāve, tassa samuṭṭhāpikā taṇhā tassāpi samuṭṭhāpikā eva nāma hoti tadabhāve abhāvatoṭi āha “**tassā samuṭṭhāpikā purimataṇhā**”ti. **Appavattīti** appavattinimittaṃ, na pavattati etthāti vā **appavattī. Catusaccavasenāti** catusaccakammaṭṭhānavasena. **Ussakkivāti** visuddhiparamparāya āruhitvā, bhāvanaṃ upari netvāti attho. **Niyyānamukhanti** vaṭṭadukkhato nissaraṇūpāyo.

Ānāpānappabbavaṇṇanā niṭṭhitā.

### Iriyāpathapabbavaṇṇanā

**108. Iriyāpathavasenāti** iriyanaṃ iriyā, kiriyā, idha pana kāyikapayogo veditabbo. Iriyānaṃ patho pavattimaggoti iriyāpatho, gamanādisarīrāvattā. Gacchanto vā hi satto kāyena kattabakiriyāṃ kareyya ṭhito vā nisinno vā nipanno vāti. Tesāṃ vasena, iriyāpathavibhāgenāti attho. **Puna caparanti** puna ca aparāṃ, yathāvuttaānāpānakammaṭṭhānato bhiiyopi aññaṃ kāyānupassanākammaṭṭhānaṃ kathemi, suṇāthāti vā adhippāyo. **Gacchanto vāti**ādi gamanādimattajānanassa gamanādigatavisesajānanassa ca sādharmaṇavacanāṃ. Tattha gamanādimattajānanāṃ idha nādhippetaṃ, gamanādigatavisesajānanāṃ pana adhippetanti taṃ vibhajitvā dassetuṃ “**tattha kāma**”ntiādi vuttaṃ. **Sattūpaladdhinti** satto atthīti upaladdhiṃ sattaḡgāhaṃ **na jahati** na pariccajati “ahaṃ gacchāmi, mama gamana”nti gāhasabbhāvato. Tato eva **attasaññaṃ** “atthi attā kārako vedako”ti evaṃ pavattaṃ viparītasāññaṃ na **ugghāṭeti** nāpaneti apaṭipakkhabhāvato, ananabrūhanato vā. Evaṃ bhūtassa cassa kuto kammaṭṭhānādibhāvoti āha “**kammaṭṭhānaṃ vā satipaṭṭhānabhāvanā vā na hotī**”ti. **Imassa panāti**ādisukkapakkhassa vuttavipariyāyena attho veditabbo. Tameva hi atthaṃ vivarituṃ “**idaṃ hī**”tiādi vuttaṃ. Tattha **ko gacchatīti** gamanakiriyāya kattupucchā, sā kattubhāvavisiṭṭhaattapaṭikkhepatthā dhammamattasseva gamanasiddhidassanato. **Kassa gamananti** akattutāvisiṭṭhaattaggāhapaṭikkhepatthā. **Kimkāraṇāti** pana paṭikkhittakattukāya gamanakiriyāya aviparītakāraṇapucchā “gamananti attā manasā saṃyujjati, mano indriyehi, indriyāni attehī”ti evamādigamanakāraṇapaṭikkhepanato. Tenāha “**tatthā**”tiādi.

**Na koci satto vā puggalo vā gacchati** dhammamattasseva gamanasiddhito tabbinimuttassa ca kassaci abhāvato. Idāni dhammamattasseva gamanasiddhiṃ dassetuṃ “**cittakiriyavāyodhātuvipphārenā**”tiādi vuttaṃ. Tattha cittakiriyā ca sā vāyodhātuyā vipphāro vipphandanañcāti **cittakiriyavāyodhātuvipphāro**, tena. Ettha ca cittakiriyaggahaṇena anindriyabaddhavāyodhātuvipphāraṃ nivatteti, vāyodhātuvipphāraggahaṇena cetanāvācīviññattibhedāṃ cittakiriyāṃ nivatteti, ubhayena pana kāyaviññattiṃ vibhāveti. “**Gacchati**”ti vatvā yathā pavattamāne kāye “gacchati”ti vohāro hoti, taṃ dassetuṃ “**tasmā**”tiādi vuttaṃ. **Tanti** gantukāmatāvasena pavattacittaṃ. **Vāyaṃ janetīti** vāyodhātuadhikāṃ rūpakalāpaṃ janeti, adhikatā cettha sāmattihyato, na pamāṇato. Gamanacittasamuṭṭhitaṃ sahaṡātarūpakāyassa thambhanasandhāraṇacalanānaṃ paccayabhūtena ākāravisesena pavattamānaṃ vāyodhātuṃ sandhāyāha “**vāyo viññattiṃ janetī**”ti. Adhippāyasahabhāvī hi vikāro viññatti, yathāvuttaadhikabhāveneva ca vāyogahaṇaṃ, na vāyodhātuyā eva janakabhāvato, aññathā viññattiyā upādāyarūpabhāvo durupapādo siyā. **Purato abhinīhāro** puratobhāgena kāyassa pavattanaṃ, yo “abhikkamo”ti vuccati.

“**Eseva nayo**”ti atidesavasena saṅkhepato vatvā tamevatthaṃ vivarituṃ “**tatrāpi hī**”tiādi vuttaṃ. **Koṭito paṭṭhāyāti** heṭṭhimakoṭito paṭṭhāya. **Ussitabhāvoti** ubbidhabhāvo.

**Evaṃ pajānatoti** evaṃ cittakiriyavāyodhātuvipphāreneva gamanādhāvō hotīti pajānato tassa evaṃ pajānanāya nicchayagamanatthaṃ “**evaṃ hotī**”ti vicāraṇā **vuccati** loke yathābhūtaṃ ajānantehi

micchābhinivesavasena, lokavohārasasena vā. **Atthi panāti** attano eva vīmaṃsanavasena pucchāvacaṇaṃ. **Natthi** nicchayasasena sattassa paṭikkhepavacaṇaṃ. **Yathā panāti**ādi tassevatthassa upamāya vibhāvaṇaṃ.

**Nāvā mālutavegenāti yathā** acetanā nāvā vātavegena desantaraṃ **yāti, yathā** ca acetano **tejanaṃ** kaṇḍo **jiyāvegena** desantaraṃ **yāti**, tathā acetano **kāyo vātāhato** yathāvuttavāyunā nīto desantaraṃ **yāti**ti evaṃ upamāsaṃsandanaṃ vedītabbaṃ. Sace pana koci vadeyya “yathā nāvāya tejanassa ca pellakassa purisassa vasena desantaragamaṇaṃ, evaṃ kāyassāpī”ti, hotu, evaṃ icchitovāyamatto. Yathā hi nāvā tejanānaṃ saṃhatalakkhaṇasseva purisassa vasena gamaṇaṃ, na asaṃhatalakkhaṇassa, evaṃ kāyassāpīti kā no hāni, bhīyyopi dhammamattatāva patīṭṭhaṃ labhati, na purisavādo. Tenāha “**yantaṃ suttavasena**”tiādi.

Tattha **payuttanti** heṭṭhā vuttanayena gamaṇādikiriyāvasena payojitaṃ. **Ṭhātīti** tiṭṭhati. **Etthāti** imasmiṃ loke. **Vinā hetupaccayeti** gantukāmatācitta-taṃsamuttāhāna-vāyodhātu-ādihetupaccayehi vinā. **Tiṭṭheti** tiṭṭheyya. **Vajeti** vajeyya gaccheyya ko nāmāti sambandho. Paṭikkhepattho cettha **kiṃ**-saddoti hetupaccayavirahena ṭhānagamaṇapaṭikkhepamukhena sabbāyapi dhammapavattiyā paccayādhīnavuttitāvibhāvanena attasuññatā viya aniccadukkhatāpi vibhāvitāti daṭṭhabbā.

**Paṇihitoti** yathā yathā paccayehi pakārato nihito ṭhapito. **Sabbasaṅgāhikavacaṇanti** sabbesaṃ catunnaṃpi iriyāpathānaṃ saṅgaṇhanavacaṇaṃ, pubbe viṣuṃ viṣuṃ iriyāpathānaṃ vuttatā idaṃ tesāṃ ekajjhaṃ gahetvā vacaṇanti attho. Purimanayo vā iriyāpathappadhāno vuttoti tattha kāyo appadhāno anuniṭṭhādīti idha kāyaṃ padhānaṃ appadhānaṃca iriyāpathaṃ anuniṭṭhādaṃ katvā dassetuṃ dutiyanayo vuttoti evampettha dvinnaṃ nayānaṃ viṣeso vedītabbo. **Ṭhitoti** pavatto.

Iriyāpathapariggaṇhanampi iriyāpathavato kāyasseva pariggaṇhanaṃ tassa avatthāvisesabhāvatoti vuttaṃ “**iriyāpathapariggahaṇena kāye kāyānupassī viharatī**”ti. Tenevettha rūpakkhandhavaseneva samudayādayo uddhaṭā. Esa nayo sesavāresupi. **Ādināti** ettha **ādi**-saddena yathā “taṇhāsamudayā kammaṣamudayā āhārasamudayā”ti nibbattilakkhaṇaṃ passantopi rūpakkhandhassa udayaṃ passatīti ime cattāro āhārā saṅgayhanti, evaṃ “avijjānirodhā rūpanirodhā”tiādayopi pañca ākāra saṅgahitāti daṭṭhabbo. Sesāṃ vuttanayameva.

Iriyāpathapabbavaṇṇanā niṭṭhitā.

### Catusampajaññapabbavaṇṇanā

**109. Catusampajaññavasena**ti (dī. ni. ṭī. 1.284; saṃ. ni. 5.368; dī. ni. abhi. ṭī. 2.214) samantato pakārehi, pakaṭṭhaṃ vā savisesaṃ jānātīti sampajāno, sampajānassa bhāvo **sampajaññaṃ**, tathāpavattaṃ ñāṇaṃ. Cattāri sampajaññāni samāhaṭāni **catusampajaññaṃ**, tassa vasena. Abhikkamaṇaṃ **abhikkantanti** āha “**abhikkantaṃ vuccati gamaṇa**”nti. Tathā paṭikkamaṇaṃ **paṭikkantanti** āha “**paṭikkantaṃ vuccati nivattana**”nti. **Nivattananti** ca nivattimattaṃ, nivattitvā pana gamaṇaṃ gamaṇameva. **Abhiharantoti** gamaṇavasena kāyaṃ upanento.

Sammā pajānaṇaṃ sampajānaṃ, tena attanā kātabbassa karaṇasīlo **sampajānakārīti** āha “**sampajaññena sabbakiccakarī**”ti. Sampajānasaddassa sampajaññapariyāyatā pubbe vuttāyeva. **Sampajaññaṃ karotevāti** abhikkantādīsu asammohaṃ uppādeti eva. Sampajānassa vā kāro etassa atthīti **sampajānakārī**. Dhammato vaḍḍhisāṅkhātena saha atthena pavattatīti sātthakaṃ, abhikkantādi. Sātthakassa sampajānaṇaṃ **sātthakasampajaññaṃ**. Sappāyassa attano upakārāvahassa hitassa sampajānaṇaṃ **sappāyasampajaññaṃ** abhikkamādīsu bhikkhācāragocare, aññatthāpi ca pavattesu avijahite kammaṭṭhānasāṅkhāte gocare sampajaññaṃ **gocarasampajaññaṃ**. Abhikkamādīsu asammuyhanameva sampajaññaṃ **asammohasampajaññaṃ**. **Pariggaṇhitvāti** paṭisaṅkhāya.

**Tasminti** sātthakasampajaññavasena pariggahitaatthe. Attho nāma dhammato vaḍḍhīti yaṃ sātthakanti adhippetam gamanam, tam sappāyamevāti siyā kassaci āsaṅkāti tannivattanattham “**cetiya**dassanam tāvā”tiādi āradham. **Cittakammarūpakāni viyāti** cittakammakatapaṭimāyo viya, yantapayogena vā vicittakammaṭimāyo viya. **Asamapekkhanam** gehasitaaññānupekkhāvasena ārammaṇassa ayoniso gahaṇam. Yaṃ sandhāya vuttam “cakkhunā rūpaṃ disvā uppajjati upekkhā bālassa mūlhassa puthujjanassā”tiādi (ma. ni. 3.308). Hatthiādisammaddena **jīvitantarāyo**, visabhāgarūpadassanādinā **brahmacariyantarāyo**.

Pabbajitadivasato paṭṭhāya bhikkhūnam anuvattanakathā āciṇṇā, ananuvattanakathā pana tassā dutiyā nāma hotīti āha “**dve kathā nāma na kathitapubbā**”ti.

**Evanti** “sace panā”tiādikaṃ sabbampi vuttākāram paccāmasati, na “purisassa mātugāmāsubha”ntiādikaṃ vuccamānam. Yogakammasa pavattiṭṭhānatāya bhāvanāya ārammaṇam kammaṭṭhānanti vuccatīti āha “**kammaṭṭhānasāṅkhātam gocara**”nti. **Uggahetvāti** yathā uggahanimittam uppajjati, evam uggahakosallassa sampādanavasena uggahetvā. **Haratīti** kammaṭṭhānam pavatteti, yāva piṇḍapāṭapaṭikkamā anuyūñjatīti attho. **Na paccāharatīti** āhārūpabhogato yāva divāṭṭhānupasaṅkamanā kammaṭṭhānam na paṭineti.

**Sarīraparikammanti** mukhadhovanādisarīrapaṭijagganam. **Dve tayo pallaṅketi** dve tayo nisajjāvāre, dve tīni uñhāsanāni. Tenāha “**usumam gāhāpento**”ti. **Kammaṭṭhānasīsenevāti** kammaṭṭhānaggeneva, kammaṭṭhānam padhānam katvā evāti attho. Tena “pattopi acetano”tiādinā (ma. ni. aṭṭha. 1.109) vakkhamānam kammaṭṭhānam, yathāparihariyamānam vā avijahitvāti dasseti. “Paribhogacetiyato sarīracetiyaṃ garutara”nti katvā “**cetiyaṃ vanditvā**”ti pubbakālakiriyāvasena vuttam. Tathā hi **aṭṭhakathāyaṃ** (vibha. aṭṭha. 809; ma. ni. aṭṭha. 3.128; a. ni. aṭṭha. 1.1.275) “cetiyaṃ bādhayamānā bodhisākhā haritabbā”ti vuttā.

**Janasaṅgahatthanti** “mayi akathente etesaṃ ko kathessatī”ti dhammānuggahena janasaṅgahattham. **Tasmāti**. Yasmā “dhammakathā nāma kathetabbāyevā”ti **aṭṭhakathācariyā** vadanti, yasmā ca dhammakathā kammaṭṭhānavinimuttā nāma natthi, tasmā. **Anumodanam katvāti** etthāpi “kammaṭṭhānasīsenevā”ti ānetvā sambandho. **Sampattaparicchedenevāti** “paricito aparicito”tiādivibhāgam akatvā sampattakoṭiyāva. **Bhayeti** paracakkādibhaye.

**Kammajatejoti** gahaṇim sandhāyāha. **Kammaṭṭhānaviṭṭhiṃ nārohati** khudāparissamena kilantakāyattā samādhānābhāvato. **Avasesaṭṭhāneti** yāguyā aggahitaṭṭhāne. **Poṅkhānupoṅkhanti** kammaṭṭhānupaṭṭhānassa avicchedadassanavacanametam, yathā poṅkhānupoṅkhapavattāya sarapaṭipāṭiyā avicchedo, evametassāpīti.

**Nikkhattadhuro** bhāvanānuyoge. Vattapaṭipattiyā apūraṇena **sabbavatthāni bhinditvā**. “Kāme avītarāgo hoti, kāye avītarāgo, rūpe avītarāgo, yāvadattham udarāvadehakaṃ bhūñjitvā seyyasukham passasukham middhasukham anuyutto viharati, aññataram devanikāyaṃ paṇidhāya brahmacariyaṃ caratī”ti (dī. ni. 3.320; ma. ni. 1.186) evam vutta **pañcavidhacetokhilavinibandhacitto**. **Caritvāti** pavattitvā.

**Attakāmāti** attano hitasukham icchantā, dhammacchandavantoti attho. Dhammoti hi hitam, tannimittakaṅca sukhanti. Atha vā viññūnam nibbisesattā attabhāvapariyāpannattā ca attā nāma dhammo, tam kāmenti icchantīti attakāmā. **Usabham** nāma vīsati yaṭṭhiyo. **Tāya saññāyāti** tāya pāsāṇasaññāya, ettakam ṭhānam āgatāti jānantāti adhippāyo. **Soyeva nayoti** “ayaṃ bhikkhū”tiādiko yo ṭhāne vutto, so eva nisajjāyapi nayo. Pacchato āgacchantānam chinnabhattabhāvabhayenapi yonisomanasikāram paribrūheti.

**Bahāpadhānam pūjessāmīti** amhākaṃ atthāya lokanāthena cha vassāni kataṃ dukkaracariyaṃ

evāhaṃ yathāsatti pūjessāmīti. Paṭipattipūjā hi satthupūjā, na āmisapūjā. **Ṭhānacaṅkamanamevāti** adhiṭṭhātabbairiyāpathavasena vuttaṃ, na bhojanādikālesu avassaṃ kattabbanisajjāya paṭikkhepavasena.

Vīthiṃ otaritvā ito cito ca anoloketvā paṭhamameva vīthiyo sallakkhetabbāti āha **“vīthiyo sallakkhetvā”**ti. Yaṃ sandhāya vuccati **“pāsādikena abhikkantenā”**ti, taṃ dassetuṃ **“tattha cā”**tiādi vuttaṃ.

Paccekabodhiṃ sacchikaroti, yadi upanissayasampanno hotīti sambandho. Evaṃ sabbattha ito paresupi. Tattha paccekabodhiyā upanissayasampadā kappānaṃ dve asankhyeyyāni satasahassaṅca tajjaṃ puññañānasambharaṇaṃ, sāvakabodhiyaṃ aggasāvakānaṃ ekaṃ asankhyeyyaṃ kappasatasahassaṅca, mahāsāvakānaṃ kappasatasahassameva, itaresaṃ atītāsu jātisu vivaṭṭasannissayavasena nibbattitaṃ nibbedhabhāgiyaṃ kusalaṃ. **Bāhiyo dārucīriyoti** bahi visaye sañjātasamvaḍḍhatāya bāhiyo, dārucīrapariharaṇena dārucīriyoti ca samaññāto. So hi āyasmā –

“Tasmā tiha te, bāhiya, evaṃ sikkhitabbaṃ ‘diṭṭhe diṭṭhamattaṃ bhavissati, sute... mute... viññāte viññātamattaṃ bhavissati’ti. Yato kho te, bāhiya, diṭṭhe diṭṭhamattaṃ bhavissati, sute... mute... viññāte viññātamattaṃ bhavissati, tato tvam, bāhiya, na tena. Yato tvam, bāhiya, na tena, tato tvam, bāhiya, na tattha. Yato tvam, bāhiya, na tattha, tato tvam, bāhiya, nevidha na huraṃ na ubhayamantarena, esevanto dukkhassā”ti (udā. 10) – ettakāya desanāya arahattaṃ sacchākāsi.

**Tanti** asammuyhanaṃ. **Evanti** idāni vuccamānākārena veditabbaṃ. **Attā abhikkamatīti** iminā andhaputhujjanassa diṭṭhiggāhavasena abhikkame sammuyhanaṃ dasseti, ahaṃ **abhikkamāmīti** pana iminā mānaggāhavasena, tadubhayaṃ pana taṇhāya vinā na hotīti taṇhāggāhavasenaṃpi sammuyhanaṃ dassitameva hoti. **“Tathā asammuyhanto”**ti vatvā taṃ asammuyhanaṃ yena ghanavinibbhogena hoti, taṃ dassento **“abhikkamāmī”**tiādimāha. Tattha yasmā vāyodhātuyā anugatā tejodhātu uddharaṇassa paccayo. Uddharaṇagatikā hi tejodhātūti uddharaṇe vāyodhātuyā tassā anugatabhāvo, tasmā imāsaṃ dvinnamettha sāmattiyato adhimattatā, itarāsaṅca omattatāti dassento **“ekeka...pe... balavatiyo”**ti āha. Yasmā pana tejodhātuyā anugatā vāyodhātu atiharaṇavītiharaṇānaṃ paccayo. Tiriyagatikāya hi vāyodhātuyā atiharaṇavītiharaṇesu sātisayo byāpāroti tejodhātuyā tassā anugatabhāvo, tasmā imāsaṃ dvinnamettha sāmattiyato adhimattatā, itarāsaṅca omattatāti dassento **“tathā atiharaṇavītiharaṇesū”**ti āha. Satipi anugamanānugantabbatāvisese tejodhātu-vāyodhātu-bhāvamattaṃ sandhāya **tathā-saddaggaṇaṃ**. Tattha akkantaṭṭhānato pādassa ukkhipanaṃ **uddharaṇaṃ**, ṭhitaṭṭhānaṃ atikkamitvā purato haraṇaṃ **atiharaṇaṃ** khāṇuādīpariharaṇatthaṃ, patiṭṭhitapādaghaṭṭanapariharaṇatthaṃ vā passena haraṇaṃ **vītiharaṇaṃ**, yāva patiṭṭhitapādo, tāva āharaṇaṃ **atiharaṇaṃ**, tato paraṃ haraṇaṃ **vītiharaṇanti** ayaṃ vā etesaṃ viseso.

Yasmā pathavīdhātuyā anugatā āpodhātu vossajjanassa paccayo. Garutarasabhāvā hi āpodhātūti vossajjane pathavīdhātuyā tassā anugatabhāvo, tasmā tāsā dvinnamettha sāmattiyato adhimattatā, itarāsaṅca omattatāti dassento āha **“vossajjane...pe... balavatiyo”**ti. Yasmā pana āpodhātuyā anugatā pathavīdhātu sannikkhepanassa paccayo, patiṭṭhābhāve viya patiṭṭhāpanepi tassā sātisayakiccattā āpodhātuyā tassā anugatabhāvo, tathā ghaṭṭanakiriyāya pathavīdhātuyā vasena sannirumbhanassa sijjhanato tatthāpi pathavīdhātuyā āpodhātuanugatabhāvo, tasmā vuttaṃ **“tathā sannikkhepanasannirumbhanesū”**ti. **Tatthāti** tasmim abhikkamane, tesu vā vuttesu uddharaṇādīsu chasu koṭṭhāsesu. **Uddharaṇeti** uddharaṇakkhaṇe. **Rūpārūpadhammāti** uddharaṇākārena pavattā rūpadhammā, taṃsamuṭṭhāpakā arūpadhammā ca **atiharaṇaṃ na pāpuṇanti** khaṇamattāvaṭṭhānato. **Tattha tatthevāti** yattha yattha uppannā, tattha tattheva. Na hi dhammānaṃ desantarasaṅkamaṇaṃ atthi. **Pabbaṃ pabbantiādi** uddharaṇādikoṭṭhāse sandhāya vuttaṃ, taṃ sabhāgasantativasena vuttanti veditabbaṃ. Atiittaro hi rūpadhammānaṃpi pavattikkhaṇo gamanassādānaṃ devaputtānaṃ heṭṭhupariyena paṭimukhaṃ dhāvantaṇaṃ sirasi pāde ca baddhadhuradhārāsamāgamatopi sīghataro. Yathā tilānaṃ bhajjiyamānaṇaṃ paṭapaṭāyanena bhedo lakkhiyati, evaṃ saṅkhatadhammānaṃ uppādenāti dassanattaṃ **“paṭapaṭāyantā”**ti vuttaṃ. Uppannā hi ekantato bhijjantīti.

**Saddhiṃ rūpenā**ti idaṃ tassa tassa cittassa nirodhena saddhiṃ nirujjhanakarūpadhammānaṃ vasena vuttaṃ, yaṃ tato sattarasamacittassa uppādakkaṇe uppannaṃ. Aññathā yadi rūpārūpadhammā samānakkhaṇā siyuṃ, “rūpaṃ garupariṇāmaṃ dandhanirodha”ntiādivacanehi (vibha. aṭṭha. 26) virodho siyā, tathā “nāhaṃ, bhikkhave, aññaṃ ekadhammampi samanupassāmi, yaṃ evaṃ lahuparivattaṃ, yathayidaṃ citta”nti evamādipāliyā (a. ni. 1.48). Cittacetāsikā hi sārammaṇasabhāvā yathābalaṃ attano ārammaṇapaccayabhūtamattaṃ vibhāvento eva uppajjantīti tesam taṃsabhāvanipphattianantaram nirodho, rūpadhammā pana anārammaṇā pakāsetabbā, evaṃ tesam pakāsetabbabhāvanivatti soḷasaḥi cittehi hotīti taṅkhaṇāyukatā tesam icchitā, lahuviññāṇavisayaṅgatimattapaccayatāya tiṇṇaṃ khandhānaṃ, visayaṅgatimattatāya ca viññāṇassa lahuparivattitā, dandhamahābhūtapaccayatāya rūpadhammānaṃ dandhaparivattitā, nānādhātuyā yathābhūtaññaṃ kho pana tathāgatasseva, tena ca purejātapaccayo rūpadhammova vutto, pacchājātapaccayo ca tasevāti rūpārūpadhammānaṃ samānakkhaṇatā na yujjateva, tasmā vuttanayenevettha attho veditabbo.

**Aññaṃ uppajjate cittaṃ, aññaṃ cittaṃ nirujjhatī**ti yaṃ purimuppannaṃ cittaṃ, taṃ aññaṃ, taṃ pana nirujjhantaṃ aparassa anantarādipaccayabhāveneva nirujjhatīti tato laddhapaccayaṃ aññaṃ uppajjate cittaṃ. Yadi evaṃ tesam antaro labbheyyāti noti āha “**avīcimanusambandho**”ti, yathā vīci antaro na labbhati, tadevetanti avisesavidu maññanti, evaṃ anu anu sambandho cittasantāno rūpasantāno ca **nadīsotova** nadiyaṃ udakappavāho viya vattati.

**Abhimukhaṃ lokitaṃ ālokitanti** āha “**puratopekkhana**”nti. Yasmā yaṃdisābhimukho gacchati tiṭṭhati nisīdati vā, tadabhimukhaṃ pekkhanaṃ ālokitaṃ, tasmā tadanugataṃ vidisālokanam vilokitanti āha “**vilokitaṃ nāma anudisāpekkhana**”nti. Sammajjanaparibhaṇḍādikaraṇe olokittassa, ullokaharaṇādīsu ullokittassa, pacchato āgacchantaparissayassa parivajjanādīsu apalokittassa siyā sambhavoti āha “**iminā vā mukhena sabbānipi tāni gahitānevā**”ti.

**Kāyasakkhinti** kāyena sacchikatavantaṃ, paccakkhakārinanti attho. So hi āyasmā vipassanākāle eva “yamevāhaṃ indriyesu aguttadvārataṃ nissāya sāsane anabhiratiādivippakāraṃ patto, tameva suṭṭhu niggaṇhissāmī”ti ussāhajāto balavahirottappo, tatha ca katādhikārattā indriyasamvare ukkaṃsapāramippatto, teneva naṃ satthā “etadaggaṃ, bhikkhave, mama sāvakanam bhikkhūnaṃ indriyesu guttadvārānaṃ yadidaṃ nando”ti (a. ni. 1.235) etadagge ṭhapesi.

**Sāthakatā ca sappāyatā ca** ālokitavilokittassa **veditabbā**. **Tasmāti** “kammaṭṭhānāvijahanasseva gocarasampajaññabhāvato”ti vuttamevatthaṃ hetubhāvena paccāmasati. **Attano kammaṭṭhānavaseneva ālokanavilokanaṃ kātabbamaṃ**, khandhādikammaṭṭhānā añño upāyo na gavesitabboti adhippāyo. Ālokitādisamaññāpi yasmā dhammamattasseva pavattiviseso, tasmā tassa yāthāvato jānanaṃ asammohasampajaññanti dassetuṃ “**abbhantare**”tiādi vuttaṃ.

“**Paṭhamajavanepi ...pe... na hotī**”ti idaṃ pañcadvāraviññānavīthiyaṃ “itthī puriso”ti rajjanādīnaṃ abhāvaṃ sandhāya vuttaṃ. Tattha hi āvajjanavoṭṭhabbanānaṃ ayoniso āvajjanavoṭṭhabbanavasena itṭhe itthirūpādīmhi lobho, aniṭṭhe ca paṭigho uppajjati, manodvāre pana “itthī puriso”ti rajjanādi hoti, tassa pañcadvārajavanaṃ mūlaṃ, yathāvuttaṃ vā sabbamaṃ bhavaṅgādi, evaṃ manodvārajavanassa mūlavasena mūlapariññā vuttā. Āgantukatāvākālikatā pana pañcadvārajavanasseva apubbabhāvavasena ittarabhāvavasena ca vuttā. **Heṭṭhupariyavasena bhijjitvā patitesūti** heṭṭhimassa uparimassa ca aparāparaṃ bhaṅgappattimāha. **Tanti** javanaṃ. Tassa na yuttanti sambandho. **Āgantuko** abbhāgato. Udayabbayapariicchinnō tāvatako kālo etesanti **tāvākālikāni**.

**Etamaṃ** asammohasampajaññaṃ. **Tatthāti** pañcakkhandhavasena ālokanavilokane paññāyamāne tabbinimutto **ko eko āloketi, ko viloketi**. **Upanissayapaccayoti** idaṃ suttantanayena pariyāyato vuttaṃ. **Sahajātapaccayoti** nidassanamattametamaṃ aññaṃañña-sampayutta-atthiavigatādipaccayānampi labbhanato.



**Maṇisappo nāma** ekā sappajātīti vadanti. **Laḷananti** kampananti vadanti, liḷākaraṇaṃ vā laḷanaṃ.

**Uṇhapakatiko** pariḷāhabahulo. Sīlassa vidūsanena ahitāvahattā **micchājīvasena uppamaṃ asappāyaṃ**. **Cīvarampi acetananti**ādīnā cīvarassa viya “**kāyopi acetano**”ti kāyassa attasuññatāvibhāvanena “**abbhantare**”tiādīnā vuttamevatthaṃ vibhāvento itarītarasantosassa kāraṇaṃ dasseti. Tenāha “**tasmā**”tiādi. **Catupañcagaṇṭhikāhatoti** āhatacatupañcagaṇṭhiko, catupañcagaṇṭhikāhi vā hatasobho.

**Aṭṭhavidhopi atthoti** aṭṭhavidhopi payojanaviseso. Pathavīsandhārakajalassa taṃsandhārakavāyuna viya paribhuttassa āhārassa vāyodhātunāva āsaye avatṭhānanti āha “**vāyodhātuvaseva tiṭṭhati**”ti. **Atiharatīti** yāva mukhā abhiharati. **Vītiharatīti** tato yāva kucchi, tāva harati. **Atiharatīti** vā mukhadvāraṃ atikkāmento harati. **Vītiharatīti** kucchigataṃ passato harati. **Parivatteti** aparāparaṃ cāreti. Ettha ca āhārassa dhāraṇaparivattanasamcunṇanavisosanāni pathavīdhātusahitā eva vāyodhātu karoti, na kevalāti tāni pathavīdhātuyāpi kiccabhāvena vuttāni. **Allattañca anupāletīti** vāyuādīhi atisosanaṃ yathā na hoti, tathā anupāleti allaādīhi atisosanaṃ yathā na hoti, tathā anupāleti allabhāvaṃ. **Tejodhātūti** gahaṇīsankhātā tejodhātu. Sā hi anto pavitṭhaṃ āhāraṃ paripāceti. **Añjaso hotīti** āhārassa pavesanādīnaṃ maggo hoti. **Ābhujatīti** pariyesanañjoharaṇajijñāñnatādīṃ āvajjeti, vijānātīti attho. Taṃtaṃvijānananipphādakoyeva hi payogo “**sammāpayogo**”ti vutto. Yena hi payogena pariyesanādi nipphajjati, so tabbisayavijānanampi nipphādeti nāma tadavinābhāvato. Atha vā **sammāpayogaṃ** sammāpaṭipattiṃ **anvāya** āgamma **ābhujati** samannāharati. Ābhogapubbako hi sabbopi viññāṇabyāpāroti tathā vuttaṃ.

**Gamanatoti** bhikkhācāravaseṇa gocaragāmaṃ uddissa gamanato. **Pariyesanatoti** gocaragāme bhikkhatthaṃ āhiṇḍanato. **Paribhogatoti** āhārassa paribhuñjanato. **Āsayatoti** pittādīsayato. Āsayati ettha ekajjhaṃ pavattamānopi kammabalavatthito hutvā mariyādasena aññamaññaṃ asaṅkarato sayati tiṭṭhati pavattatīti **āsayo**, āmāsayaṃ upari tiṭṭhanako pittādiko. Mariyādattho hi ayamākāro. Nidheti yathābhutto āhāro nicito hutvā tiṭṭhati etthāti nidhānaṃ, āmāsayo. Tato **nidhānato**. **Aparipakkatoti** gahaṇīsankhātēna kammajatejēna avipakkato. **Paripakkatoti** yathābhuttassa āhārassa vipakkabhāvato. **Phalatoti** nipphattito. **Nissandatoti** ito cito ca vissandanato. **Sammakkhanatoti** sabbaso makkhanato. Ayamettha saṅkhepo, vitthāro pana **visuddhimaggasaṃvaṇṇanāya** (visuddhi. mahāṭī. 1.294) gaḥetabbo.

**Aññe ca rogā** kaṇṇasūlabhagandarādayo. **Aṭṭhāneti** manussāmanussapariggahite ayutte ṭhāne khettadevāyatanādike. Nissaṭṭhattā **neva attano** kassaci anissajjitattā jigucchanīyattā ca **na parassa**. **Udakatumbatoti** veḷunālīdiudakabhājanato. **Tanti** chaḍḍitaukaṃ.

**Addhānairiyāpathā** cirappavattikā dīghakālikā iriyāpathā. **Majjhimā** bhikkhācāraṇādivaseṇa pavattā. **Cuṇṇikairiyāpathā** vihāre aññatthāpi ito cito ca parivattanādivaseṇa pavattāti vadanti. “**Gateti gamane**”ti pubbe abhikkamaṇṭhikamaggahaṇena gamanenapi purato pacchato ca kāyassa atiharaṇaṃ vuttanti idha gamanameva gahitanti keci.

Yasmā mahāsīvattheravāde anantare anantare iriyāpathe pavattarūpārūpadhammānaṃ tattha tattheva nirodhadassanavasena sampajānakāritā gahitā, idañcettha sampajāññavipassanācāravaseṇa āgataṃ, tasmā vuttaṃ “**tayidaṃ mahāsīvattherena vuttaṃ asammohadhuraṃ imasmiṃ satipaṭṭhānabhutte adhippeta**”nti. **Sāmaññaphale** (dī. ni. 1.214; dī. ni. aṭṭha. 1.214; dī. ni. ṭī. 1.214) **pana sabbampi catubbidhaṃ sampajāññaṃ labbhati** yāvadeva sāmaññaphalavisesadassanaparattā tassā desanāya. **Satisampayuttassevāti** idaṃ yathā sampajāññakiccassa padhānatā, evaṃ satikiccassāpīti dassanattaṃ, na satiyā sabbhāvamattadassanattaṃ. Na hi kadāci satirahitā ñāṇappavatti atthi. **Etāni padānīti** sampajāññapadāni. **Vibhattānevāti** visuṃ vibhattāneva. Imināpi sampajāññassa viya satiyāpi padhānataṃyeva vibhāveti.

Aparo nayo – eko bhikkhu gacchanto aññaṃ cintento aññaṃ vitakkento gacchati, eko kammaṭṭhānaṃ avissajjtvāva gacchati, tathā eko tiṭṭhanto nisīdanto sayanto aññaṃ cintento aññaṃ vitakkento sayati, eko kammaṭṭhānaṃ avissajjtvāva sayati, etthakena pana na pākaṭaṃ hotīti caṅkamanena dīpentī. Yo hi bhikkhu caṅkamaṇaṃ otarivā caṅkamaṇakoṭiyaṃ ṭhito pariggaṇhāti “pācīnacaṅkamaṇakoṭiyaṃ pavattā rūpārūpadhammā pacchimacaṅkamaṇakoṭiṃ appatvā ettheva niruddhā, pacchimacaṅkamaṇakoṭiyaṃ pavattāpi pācīnacaṅkamaṇakoṭiṃ appatvā ettheva niruddhā, caṅkamaṇamajjhe pavattā ubho koṭiyo appatvā ettheva niruddhā, caṅkame pavattā rūpārūpadhammā ṭhānaṃ appatvā ettheva niruddhā, ṭhāne pavattā nisajjaṃ, nisajjāya pavattā sayanaṃ appatvā etthevaniruddhā”ti, evaṃ pariggaṇhanto pariggaṇhantoyeva cittaṃ bhavaṅgaṃ oṭāreti, utṭhahanto kammaṭṭhānaṃ gahetvāva utṭhahati, ayaṃ bhikkhu **gatādīsu sampajānakārī** nāma hoti, evampi sutte kammaṭṭhānaṃ avibhūtaṃ hoti, tasmā yo bhikkhu yāva sakkoti, tāva caṅkamitvā ṭhatvā nisīditvā sayamāno evaṃ pariggahetvā sayati “kāyo acetano, mañco acetano, kāyo na jānāti “ahaṃ mañce sayito”ti, mañco na jānāti “mayi kāyo sayito”ti, acetano kāyo acetane mañce sayito”ti, evaṃ pariggaṇhantoyeva cittaṃ bhavaṅgaṃ oṭāreti, pabujjhanto kammaṭṭhānaṃ gahetvāva pabujjhati, ayaṃ **sutte sampajānakārī** nāma hotīti.

Kāyādikiriyānibbattanena tammayattā āvajjanakiriyāsamuṭṭhitattā ca javanaṃ, sabbampi vā chadvārappavattaṃ kiriyāmayapavattaṃ nāma, tasmim sati jāgaritaṃ nāma hotīti pariggaṇhanto **jāgarite sampajānakārī** nāma. Apica rattindivaṃ cha koṭṭhāse katvā pañca koṭṭhāse jaggantopi **jāgarite sampajānakārī** nāma hoti. Vimuttāyatanasīsenā dhammaṃ desentopi bāttimsatiracchānakathaṃ pahāya dasakathāvatthunissitaṃ sappāyakathaṃ kathentopi **bhāsīte sampajānakārī** nāma. Aṭṭhatimsāya ārammaṇesu cittaruciyaṃ manasikāraṃ pavattentopi dutiyaṃ jhānaṃ samāpannopi **tuṅhībhāve sampajānakārī** nāma. Dutiyāñhi jhānaṃ vacīsāṅkhāravirahato viśesato tuṅhībhāvō nāma. Rūpadhammasseva pavattīākāravisesā abhikkamādayoti vuttaṃ “**rūpakkhandhasseva samudayo ca vayo ca nīharitabbo**”ti. Sesam vuttanayameva.

Catusampajāññapabbavaṇṇanā niṭṭhitā.

### Paṭikūlamanasikārapabbavaṇṇanā

**110. Paṭikūlamanasikāravasenāti** (dī. ni. ṭī. 2.377) jigucchānīyatāya. Paṭikūlameva paṭikūlaṃ yo paṭikūlasabhāvo paṭikūlākāro, tassa manasikaraṇavasena. Antarenapi hi bhāvavācīnaṃ saddaṃ bhāvavatto viññāyati yathā “paṭassa sukka”nti. Yasmā **visuddhimagge** (visuddhi. 1.182-183) vuttaṃ, tasmā tattha taṃsaṃvaṇṇanāyañca vuttanayena vedittabbaṃ. Vatthādīhi pasibbakākārena bandhitvā kataṃ āvaṭanaṃ **putoḷi**. **Vibhūtākāro**ti paṇṇattiṃ samatikkamitvā asubhabhāvassa upaṭṭhitākāro. Iti-saddassa ākāratthataṃ dassento “**eva**”nti vatvā taṃ kāraṇaṃ sarūpato dassento “**kesādīpariggahaṇenā**”ti āha.

Paṭikūlamanasikārapabbavaṇṇanā niṭṭhitā.

### Dhātumanasikārapabbavaṇṇanā

**111. Dhātumanasikāravasenāti** pathavīdhātuādikā catasso dhātuyo ārabha pavattabhāvanāmanasikāravasena, catudhātuvavatthānavasenāti attho. Dhātumanasikāro dhātukammaṭṭhānaṃ catudhātuvavatthānanti hi atthato ekaṃ. **Goghātakoti** jīvikatthāya gunnaṃ ghātako. **Antevāsikoti** kammakaraṇavasena tassa samīpavāsī. **Ṭhita**-saddo “ṭhito vā”tiādīsu (dī. ni. 1.263; a. ni. 5.28) ṭhānasāṅkhātairiyāpathasamaṅgitāya, **ṭhā**-saddassa vā gativinivattiatthāyā aññattha ṭhapetvā gamaṇaṃ sesairiyāpathasamaṅgitāya bodhako, idha pana yathā tathā rūpakāyassa pavattīākārabodhako adhippetoti āha “**catunnaṃ iriyāpathānaṃ yena kenaci ākārena ṭhitattā yathāṭhita**”nti. Tattha **ākārenāti** ṭhānādīnā rūpakāyassa pavattīākārena. Ṭhānādayo hi iriyāpathasāṅkhātāya kāyīkīriyāya patho pavattimaggoti “iriyāpatho”ti vuccanti. **Yathāṭhitanti**

yathāpavattaṃ. Yathāvuttaṭṭhānamevettha “pañidhāna”nti adhippetanti āha “**yathāṭṭhitattā ca yathāpañihita**”nti. **Ṭhitanti** vā kāyassa ṭhānaśāṅkhātairiyāpathasamāyogaparidīpanaṃ. **Pañihitanti** tadaññairiyāpathasamāyogaparidīpanaṃ. **Ṭhitanti** vā kāyasaṅkhātānaṃ rūpadhammaṇaṃ tasmim̐ tasmim̐ khaṇe sakiccavasena avaṭṭhānaparidīpanaṃ. **Pañihitanti** paccayakiccavasena tehi tehi paccayehi pakārato nihitaṃ pañihitanti evampettha attho veditabbo. **Paccavekkhatī** pati pati avekkhati, ñānacakkhunā vinibbhujitvā visuṃ visuṃ passati.

Idāni vuttamevatthaṃ bhāvatthavibhāvanavasena dassetuṃ “**yathā goghātakassā**”tiādi vuttaṃ. Tattha **posentassā**ti maṃsūpacayaparibrūhanāya kuṇḍakabhattakappāsāṭṭhiādīhi saṃvaddhentaṃ. **Vadhitam matanti** hiṃsitaṃ hutvā mataṃ. **Matanti** ca matamattaṃ. Tenevāha “**tāvadevā**”ti. **Gāvīti saññā na antaradhāyati** yāni āṅgapaccaṅgāni yathāsannivṭṭhāni upādāya gāvīsamaññā matamattāyapi gāvīyā, tesam̐ taṃsannivesassa avinaṭṭhattā. Vilīyanti bhijjanti vibhujjantīti **bīlā** bhāgā va-kārassa ba-kāraṃ, i-kārassa ī-kāraṃ katvā. **Bīlasoti** bīlaṃ bīlaṃ katvā. **Vibhajitvā**ti aṭṭhisāṅghāṭato maṃsaṃ vivecetvā, tato vā vivecitamaṃsaṃ bhāgaso katvā. Tenevāha “**maṃsasaññā pavattatī**”ti. **Pabbajitassapi** apariggahitakammaṭṭhānassa. **Ghanavinibbhoganti** santatisamūhakiccaghanānaṃ vinibbhujanaṃ vivecanaṃ. **Dhātuso paccavekkhatoti** ghanavinibbhogakaraṇena dhātuṃ dhātuṃ pathavīdīdhātuṃ visuṃ visuṃ katvā paccavekkhantaṃ. **Sattasaññā**ti attānudiṭṭhivasena pavattā saññāti vadanti, vohārasena pavattasattasaññāyapi tadā antaradhānaṃ yuttameva yāthāvato ghanavinibbhogassa sampādanato. Evañhi sati yathāvuttaopammaṭṭhena upameyyattho aññadatthu saṃsandati sameti. Tenevāha “**dhātuvaseneva cittaṃ santiṭṭhatī**”ti. **Dakkhoti** cheko taṃtaṃsamaññāya kusalo, yathājāte sūnasmiṃ naṅguṭṭhakhuravisāṇādivante aṭṭhimāṃsādiavayavasamudāye avibhatte gāvīsamaññā, na vibhatte, vibhatte pana aṭṭimāṃsādiavayavasamaññāti jānanako. **Catumahāpatho viya catuiriyāpathoti** gāvīyā ṭhitacatumahāpatho viya kāyassa pavattimaggabhūto catubbidho iriyāpatho. Yasmā **visuddhimagge** (visuddhi. 1.306) **vitthāritā**, tasmā tattha **taṃsaṃvaṇṇanāya**ñca (visuddhi. mahāṭī. 1.306) vuttanayeneva veditabbā.

Dhātumanasikārapabbavaṇṇanā niṭṭhitā.

### Navasivathikapabbavaṇṇanā

**112.** Sivathikāya apaviddhauddhumātakādīpaṭṭisaṃyuttānaṃ odhiso pavattānaṃ kathānaṃ tadabhidheyyānañca uddhumātakādīsubhabhāgānaṃ sivathikapabbānīti saṅgītikārehi gahitasamaññā. Tenāha “**sivathikapabbehi vibhajitu**”nti. **Uddham jīvitapariyādānā**ti jīvitakkhayato upari maraṇato paraṃ. **Samuggatenā**ti utṭhitena. **Uddhumātattā**ti uddham uddham dhumātattā sūnattā. Setarattehi viparibhinnaṃ vimissitaṃ nīlaṃ vinīlaṃ, purimavaṇṇavipariṇāmaṃbhūtaṃ vā nīlaṃvinīlaṃ, vinīlameva **vinīlakanti** ka-kārena padavaḍḍhanamāha anattantārato yathā “pītakaṃ lohita”nti (dha. sa. 616). **Paṭikūlakattā**ti jigucchaniyattā. **Kucchitaṃ vinīlaṃ vinīlakanti** kucchanattho vā ayaṃ ka-kāroti dassetuṃ vuttaṃ yathā “pāpako kittisaddo abbhuggacchatī”ti (dī. ni. 3.316; a. ni. 5.213; mahāva. 285). **Paribhinnaṭṭhānehi** kākakaṅkādihi. **Vissandamānaṃ pubbanti** vissavantaṃ pubbaṃ, tahaṃ tahaṃ paggharantapubbanti attho. **Tathābhāvanti** vissandamānapubbabhāvaṃ.

**So bhikkhūti** yo “passeyya sarīraṃ sivathikāya chaḍḍita”nti vutto, so bhikkhu. **Upasaṃharati** sadisaṃ. **Ayampi khotī**adi upasaṃharaṇākāradassanaṃ. **Āyūti** rūpajīvitindriyaṃ, arūpajīvitindriyaṃ panettha viññānagatikameva. **Usmā**ti kammajatejo. **Evampūtikasabhāvoti** evaṃ ativiya pūtikasabhāvo, na āyūādīnaṃ avigame viya mattasoti adhippāyo. Ediso bhavissatīti **evambhāvīti** āha “**evamuddhumātādibhedo bhavissatī**”ti.

**Luñcitvā luñcitvā**ti uppātetvā uppātetvā. **Sesāvasesamaṃsalohitayuttanti** sabbaso akhādītattā tahaṃ tahaṃ sesena appāvasesena maṃsalohitena yuttaṃ. **Aññena hatthaṭṭhikanti** avisesena hatthaṭṭhikānaṃ vippakiṇṇatā jotitāti anavasesato tesam̐ vippakiṇṇataṃ dassento

“**catusaṭṭhibhedampī**”tiādimāha. **Terovassikānīti** tirovassaṃ gatāni. Tāni pana saṃvaccharam vītivattāni hontīti āha “**atikkantasamvaccharānī**”ti. Purānatāya ghanabhāvavigamena vicuṇṇatā idha pūtibhāvoti so yathā hoti, taṃ dassento “**abbhokāse**”tiādimāha. Khajjamānatādivasena dutiyasivathikapabbādīnaṃ vavattthitathā vuttaṃ “**khajjamānādīnaṃ vasena yojanā kātabbā**”ti.

Navasivathikapabbavaṇṇanā niṭṭhitā.

**Imāneva dveti** avadhāraṇena appanākammaṭṭhānaṃ tattha niyāmeti aññapabbesu tadabhāvato. Yato hi eva-kāro, tato aññattha niyāmeti, tena pabbadvayassa vipassanākammaṭṭhānatāpi appaṭṭisiddhāti daṭṭhabbā aniccādidassanato. Saṅkhāresu ādīnavavibhāvanāni sivathikapabbānīti āha “**sivathikānaṃ ādīnavānupassanāvāsena vuttattā**”ti. Iriyāpathapabbādīnaṃ anappanāvahatā pākāṭā evāti “**sesāni dvādasāpī**”ti vuttaṃ. Yaṃ panettha atthato avibhattaṃ, taṃ suviññeyyamevāti.

Kāyānupassanāvaṇṇanā niṭṭhitā.

### Vedanānupassanāvaṇṇanā

**113. Sukhaṃ vedananti** ettha sukhayātīti **sukhā**, sampayuttadhamme kāyañca laddhassāde karotīti attho. Suṭṭhu vā khādāti, khanati vā kāyikaṃ cetasañca ābādhanti **sukhā**. Sukaraṃ okāsādānaṃ etissāti **sukhāti** apare. Vedayati ārammaṇarasam anubhavatīti **vedanā**. **Vedayamānoti** anubhavamāno. **Kāmantiādīsu** yaṃ vattabbaṃ, taṃ iriyāpathapabbe vuttameva. Sampajānassa vediyanaṃ **sampajānavediyanaṃ**.

“**Vohāramattaṃ hoti**”ti etena “sukhaṃ vedanaṃ vedayamāno sukhaṃ vedanaṃ vedayāmī”ti idaṃ vohāramattanti dasseti. **Vatthuārammaṇāti** rūpādiārammaṇā. Rūpādiārammaṇāñhi vedanāya pavattiṭṭhānatāya “vatthū”ti adhippetam. **Assāti** bhavēyya. Dhammavinimuttassa aññassa kattu abhāvato dhammasseva kattubhāvaṃ dassento “**vedanāva vedayati**”ti āha. **Nitthunantoti**. Balavato vedanāvegassa nirodhane ādīnavam disvā tassa avasarādānavasena nitthunanto. **Vīriyasamataṃ yojetvāti** adhvāsanaṃvīriyassa adhimattattā tassa hāpanavasena samādhinā samarasatāpādanena vīriyasamataṃ yojetvā. **Saha paṭisambhidāhīti** lokuttarapaṭisambhidāhi saha. Lokiyānampi vā sati uppattikāle tattha samatthataṃ sandhāyāha “**saha paṭisambhidāhī**”ti. **Samasīṭi** vārasamasīṭi hutvā, paccavekkhaṇavārassa anantaravāre parinibbāyīti attho.

**Yathā ca sukhaṃ, evaṃ dukkhanti** yathā “sukhaṃ vedayati”tiādinā sampajānavediyanaṃ sandhāya vuttaṃ, evaṃ dukkhampi. Tattha dukkhayātīti **dukkhā**, sampayuttadhamme kāyañca pīleti vibādhatīti attho. Duṭṭhuṃ vā khādāti, khanati vā kāyikaṃ cetasañca sātanti **dukkhā**. Dukkaraṃ okāsādānaṃ etissāti **dukkhāti** apare. **Arūpakammaṭṭhānanti** arūpapariggahaṃ, arūpadhammamukhena vipassanābhinivesanti attho. Rūpakammaṭṭhānena pana samathābhinivesopi saṅgayhati, vipassanābhiniveso pana idhādhippetoti dassento āha. “**Rūpapariggaho arūpapariggahotipi etadeva vuccati**”ti. **Catudhātuvavatthānaṃ kathesīti** etthāpi “yebhuyyēnā”ti padaṃ ānetvā sambandhitabbaṃ. **Tadubhayanti** catudhātuvavatthānassa saṅkhepavittthāradvayamāha. **Saṅkhepamanasikāravasena** mahāsatiṭṭhāne, **vittthāramanasikāravasena** rāhulovāda- (ma. ni. 2.115-117) dhātuvibhaṅgādīsu (vibha. 174-175).

**Yebhuyyaggahaṇena** tadaññadhammavasenaṃ arūpakammaṭṭhānakathāya atthitā dīpitāti taṃ vibhāgena dassetuṃ “**tividho hī**”tiādi vuttaṃ. Tattha **abhinivesoti** anuppaveso, ārambhoti attho. Ārambhe eva hi ayaṃ vibhāgo, sammasanaṃ pana anavasesatova dhamme pariggahetvā vattati. **Pariggahite rūpakammaṭṭhāneti** idaṃ rūpamukhena vipassanābhinivesaṃ sandhāya vuttaṃ, arūpamukhena pana vipassanābhiniveso yebhuyyena samathayānikassa icchitabbo, so ca paṭhamam jhānaṅgāni pariggahetvā tato paraṃ sesadhamme pariggaṇhāti. **Paṭhamābhiniṭṭhoti** sabbe cetasañca cittāyātā cittakiriyabhāvena vuccantīti phasso cittaṃ paṭhamābhiniṭṭhoti vutto, uppannaphasso puggalo,

cittacetāsikarāsi vā ārammaṇena phuṭṭho phassasahajātāya vedanāya taṃsamakārameva vedeti, phasso pana obhāsassa viya paḍīpo vedanādīnaṃ paccayaviseso hotīti purimakālo viya vuccati, yā tassa ārammaṇābhiniropanalakkhaṇatā vuccati. **Phusantoti** ārammaṇassa phusanākārena. Ayañhi arūpadhammatā ekadesena anallīyamānopi rūpaṃ viya cakkhu, saddo viya ca sotaṃ cittaṃ ārammaṇaṅca phusanto viya saṅghaṭṭento viya ca pavattati. Tathāhesa “saṅghaṭṭanaraso”ti vuccati.

**Ārammaṇaṃ anubhavantī**ti issaravatāya visavitāya sāmibhāvena ārammaṇarasam anubhavantī. Phassādīnañhi sampayuttadhammānaṃ ārammaṇe ekadeseneva pavatti phusanādīmatābhāvato, vedanāya pana iṭṭhākārasambhogādivasena pavattanato ārammaṇe nippadesato pavatti. Phusanādībhāvena hi ārammaṇaggahaṇaṃ ekadesānubhavanaṃ, vedayitābhāvena gahaṇaṃ yathākāmaṃ sabbānubhavanaṃ evasabhāvāneva tāni gahaṇānīti na vedanāya viya phassādīnampi yathāsakaṃ kiccakaraṇena sāmibhāvānubhavanaṃ codetabbaṃ. **Vijānantanti** paricchindanavasena visesato jānantaṃ. Viññānañhi minitabbavattum nāliya minanto puriso viya ārammaṇaṃ paricchijja vibhāventaṃ pavattati, na saññā viya sañjānanamattaṃ hutvā. Tathā hi anena kadāci lakkhaṇattayavibhāvanāpi hoti. Imesaṃ pana phassādīnaṃ tassa tassa pākaṭabhāvo paccayavisesasiddhassa pubbābhogassa vasena veditabbā.

Evam tassa tasseva pākaṭabhāvepi “sabbaṃ, bhikkhave, abhiññeyya”nti (saṃ. ni. 4.46; paṭi. ma. 1.3) “sabbaṅca kho, bhikkhave, abhijāna”nti (saṃ. ni. 4.26) ca evamādivacanato sabbe sammāsanupagā dhammā pariggahetabbāti dassento “**tattha yassā**”tiādīmāha. Tattha **phassapañcamakeyevā**ti avadhāraṇaṃ tadantogadhattā taggahaṇeneva gahitattā catunnaṃ arūpakkhandhānaṃ. Phassapañcamakaggahaṇaṅhi tassa sabbacittuppādasādhāraṇabhāvato, tattha ca phassacetanāggahaṇena sabbasaṅkhārakkhandhadhammasaṅgaho cetanāpadhānattā tesam. Tathā hi suttantabhājanīye **saṅkhārakkhandhavibhaṅge** (vibha. 12) “cakkhusamphassajā cetanā”tiādīnā cetanāva vibhattā, itare pana khandhā sarūpeneva gahitā.

**Vatthum nissitā**ti ettha vatthu-saddo karajakāyavisayoti kathamidam viññāyatīti āha “**yaṃ sandhāya vutta**”ntiādi. Kattha pana vuttaṃ? **Sāmaññaphale. Soti** karajakāyo. **Pañcakkhandhavinimuttaṃ nāmarūpaṃ natthīti** idam adhikāravasena vuttaṃ. Aññathā hi khandhavinimuttampi nāmaṃ athevāti. **Avijjādihetukā**ti avijjātaṇhupādānādihetukā. **Vipassanāpaṭipāṭiyā...pe... vicaratīti** iminā balavavipassanaṃ vatvā puna tassa ussukkāpanaṃ visesādhigamaṅca dassento “so”tiādīmāha.

**Idhāti** imissaṃ dutiyasatipatṭhānadesanāyaṃ, tassā pana vedanānupassanāvasena kathetabbattā **bhagavā vedanāvasena kathesi**. Yathāvuttesu ca tīsu kammaṭṭhānābhiniवेशesu vedanāvasena kammaṭṭhānābhiniवेशo sukaro vedanānaṃ vibhūtabhāvatoṭi dassetuṃ “**phassavasena hi**”tiādi vuttaṃ. **Na pākaṭaṃ hotīti** idam tādise puggale sandhāya vuttaṃ, yesam ādīto vedanāva vibhūtarā hutvā upatṭhāti. Evañhi yaṃ vuttaṃ “phasso pākaṭo hoti, viññānaṃ pākaṭaṃ hoti”ti, taṃ avirodhitam hoti. **Vedanānaṃ uppattipākaṭatāyāti** ca idam sukhadukkhavedanānaṃ vasena vuttaṃ. Tāsañhi pavatti oḷārikā, na itarāya. Tadubhayaggahaṇamukhena vā gahetabbattā itarāyapi pavatti viññūnaṃ pākaṭā evāti “**vedanāna**”nti avisesaggahaṇaṃ daṭṭhabbaṃ. **Yadā sukhaṃ uppajjatīti**ādi sukhavedanāya pākaṭabhāvavibhāvanaṃ. **Neva tasmim samaye dukkhaṃ vedanaṃ vedetīti** tasmim sukhavedanāsamāṅgisamaye neva dukkhaṃ vedanaṃ vedeti niruddhattā, anuppannattā ca yathākkamaṃ atītānāgatānaṃ, paccuppannāya pana asambhavo vuttoyeva. Sakiccakkaṇamattāvatṭhānato **aniccā**. Sameccasambhuyya paccayehi katattā **saṅkhatā**. Vatthārammaṇādīpaccayaṃ paṭicca uppannattā **paṭiccasamuppannā**. Khayavayapalujjananirujjanapakatīyā **khayadhammā...pe... nirodhadhammā**ti daṭṭhabbā.

Kilesehi āmasitabbato āmisaṃ nāma pañca kāmagaṇā, ārammaṇakaraṇavasena saha āmishēti **āmisā**. Tenāha “**pañcakāmagaṇāmisanissitā**”ti. **Ito paranti** “atthi vedanā”ti evamādīpāḷim sandhāyāha “**kāyānupassanāyaṃ vuttanayamevā**”ti.

Vedanānupassanāvaṇṇanā niṭṭhitā.

### Cittānupassanāvaṇṇanā

114. Sampayogavasena (dī. ni. ṭī. 2.381) pavattamānena saha rāgenāti **sarāgaṃ**. Tenāha “**lobhasahagata**”nti. **Vītarāganti**. Ettha kāmaṃ sarāgapadapaṭiyoginā vītarāgavasena bhavitabbaṃ, sammasanacārassa pana idhādhippetattā tebhūmakasseva gahaṇanti “**lokiyakusalābyākata**”nti vatvā “idaṃ panā”tiādinā tameva adhippāyaṃ vivarati. Sesāni dve dosamūlāni, dve mohamūlānīti **cattāri akusalacittāni**. Tesañhi rāgena sampayogābhāvato nattheva sarāgatā, tannimittakatāya pana siyā taṃsahitatālesoti nattheva vītarāgatāpīti dukavinimuttatā evettha labbhatīti āha “**neva purimapadaṃ, na pacchimapadaṃ bhajantī**”ti. Yadi evaṃ padesikaṃ pajānaṃ āpajjati? Nāpajjati dukantarapariyāpannattā tesam. Akusalamūlesu saha moheneva vattatīti **samohanti** āha “**vicikicchāsahagatañceva uddhaccasahagatañcā**”ti. Yasmā cettha saheva mohenāti samohanti purimapadāvadhāraṇampi labbhatiyeva, tasmā vuttaṃ “**yasmā panā**”tiādi. Yathā pana atimūlhatāya pāṭipuggalikanayena savisesaṃ mohavantatāya momūhacittanti vattabbato vicikicchuddhaccasahagatadvayaṃ visesato “samoha”nti vuccati, na tathā sesākusalacittānīti “**vaṭṭantiyevā**”ti vuttaṃ. Sampayogavasena thinamiddhena anupatītaṃ anugantanti thinamiddhānupatītaṃ pañcavidhaṃ sasaṅkhārikākusalacittaṃ **saṅkuṭitacittaṃ. Saṅkuṭitacittaṃ nāma** ārammaṇe saṅkocanavasena pavattanato. Paccayavisesavasena thāmajātena uddhaccena sahaṅgataṃ pavattaṃ saṃsaṭṭhanti **uddhaccasahagataṃ**, aññathā sabbampi akusalacittaṃ uddhaccasahagatamevāti. **Pasaṭacittaṃ nāma** sātīsayam vikkhepavasena pavattanato.

Kilesavikkhambhanasamatthatāya vipulaphalatāya dīghasantānatāya ca mahantabhāvaṃ gataṃ, mahantehi vā uḷāraccandādīhi gataṃ paṭipannanti **mahaggataṃ**. Taṃ pana rūpārūpabhūmikaṃ tato mahantassa loke abhāvato. Tenāha “**rūpārūpāvacara**”nti. Tassa cettha paṭiyogī parittamevāti āha “**amahaggatanti kāmāvacara**”nti. Attānaṃ uttaritum samatthehi saha uttarehīti **sauttaraṃ**, tappaṭipakkhena **anuttaraṃ**, tadubhayaṃ upādāya veditabbanti āha “**sauttaranti kāmāvacara**”ntiādi. Paṭipakkhavikkhambhanasamatthena samādhinā sammadeva āhitaṃ **samāhitaṃ**. Tenāha “**yassā**”tiādi. **Yassāti** yassa cittassa. Yathāvuttana samādhinā na samāhitanti **asamāhitaṃ**. Tenāha “**ubhayasamādhiraṅgata**”nti. Tadaṅgavimuttiyā **vimuttaṃ**, kāmāvacaraṃ kusalaṃ. Vikkhambhanavimuttiyā **vimuttaṃ**, mahaggatanti tadubhayaṃ sandhāyāha “**tadaṅgavikkhambhanavimuttihi vimutta**”nti. Yattha tadubhayaṃ vimutti natthi, taṃ ubhayaṃ vimuttirahitanti gayhamāne lokuttaracittepi siyā āsaṅkāti tannivattanattaṃ “**samuccheda... pe... okāsova natthī**”ti āha. Okāsābhāvo ca sammasanacārassa adhippetattā veditabbo. Yaṃ panettha atthato avibhattaṃ, taṃ heṭṭhā vuttanayamevāti.

Cittānupassanāvaṇṇanā niṭṭhitā.

### Dhammānupassanāvaṇṇanā

#### Nīvaraṇapabbavaṇṇanā

115. Pahātabbādīdhammavibhāgadassanavasena pañcadhā dhammānupassanā niddiṭṭhāti ayamatto pālito eva viññāyatīti tamattaṃ ullingento “**pañcavidhena dhammānupassanaṃ kathetu**”nti vuttaṃ. Yadi evaṃ kasmā nīvaraṇādivaseneva niddiṭṭhanti? Veneyyajjhāsayaṃ. Yesañhi veneyyānaṃ pahātabbadhammesu paṭhamam nīvaraṇāni vibhāgena vattabbāni, tesam vasenettha bhagavatā paṭhamam nīvaraṇesu dhammānupassanā kathitā. Tathā hi kāyānupassanāpi samathapubbaṅgamā desitā, tato pariññeyyesu khandhesu āyatanesu, bhāvetabbesu bojjhaṅgesu pariññeyādivibhāgesu saccesu ca uttarā desanā desitā, tasmā cettha samathabhāvanāpi yāvadeva vipassanattaṃ icchitā, vipassanāpadhānā vipassanābahulā ca satipaṭṭhānadesanāti tassā vipassanābhīnivesavibhāgena desitabhāvaṃ vibhāvento “**apicā**”tiādimāha. Tattha khandhāyatanadukkhasaccavasena

missakapariggahakathanam daṭṭhabbam. **Saññāsāṅkhārakkhandhapariggahampīti** pi-saddena sakalapañcupādānakkhandhapariggaham sampiṇḍeti itaresam tadantogadhattā. “Kaṇhasukkānam yugandhatā natthi”ti pajānanakāle abhāvā “**abhiṇhasamudācāravasenā**”ti vuttaṃ. **Yathāti** yenākārena. So pana “kāmacchandassa uppādo hoti”ti vuttattā kāmacchandassa kāraṇākārova, atthato kāraṇamevāti āha “**yena kāraṇenā**”ti. **Ca**-saddo vakkhamānatthasamuccayattho.

**Tatthāti** “yathā cā”tiadinā vuttapade. **Subhampīti** kāmacchandopi. So hi attano gahaṇākārena “**subha**”nti vuccati, tenākārena pavattanakassa aññassa kāmacchandassa nimittattā “**subhanimitta**”nti ca. Itṭham, itṭhākārena vā gayhamānam rūpādi **subhārammaṇam**. Ākaṅkhitassa hitasukhassa anupāyabhūto manasikāro **anupāyamanasikāro**. **Tanti** ayonisomanasikāram. **Tatthāti** nipphādetabbe ārammaṇabhūte ca duvidhepi subhanimitte. **Āhāroti** paccayo.

**Asubhampīti** asubhajjhānampi uttarapadalopena. Tam pana dasasu aviññānakāsubhesu, kesādīsu ca pavattaṃ daṭṭhabbam. Kesādīsu hi saññā asubhasaññāti **girimānandasutte** (a. ni. 10.60) vuttāti. Ettha ca catubbidhassa ayonisomanasikārassa yonisomanasikārassa ca gahaṇam niravasesadassanattam katanti daṭṭhabbam. Tesu pana asubhe “subha”nti, “asubha”nti ca manasikāro idhāhippeto, tadanukūlattā vā itarepīti.

Ekādasasu (a. ni. ṭī. 1.1.16) asubhesu paṭikūlakārassa uggaṇhanam, yathā vā tattha uggaṇhanimittam uppajjati, tathā paṭipatti **asubhanimittassa uggaḥo**. Upacārappanāvahāya asubhabhāvanāya anuyuñjanam **asubhabhāvanānuyogo**. Bhojane mattaññuno thinamiddhābhivahāvābhāvā otāram alabhamāno kāmacchando pahīyatīti vadanti. Bhojananissitam pana āhāre paṭikūlasaññam, tabbipariṇāmassa, tadādharassa, tassa ca udariyabhūtassa asubhatādassanam, kāyassa āhāraṭṭhitikatādassanañca yo sammadeva jānāti, so visesato **bhojane mattaññū** nāma, tassa ca kāmacchando pahīyateva. **Asubhakammikatissatthero** dantaṭṭhidassāvī. **Abhidhammapariyāyena** (dha. sa. 1159, 1503) sabbopi lobho kāmacchandanivaraṇanti āha “**arahattamaggenā**”ti.

**Paṭighampi** purimuppammaṃ **paṭighanimittam** parato uppajjanakapaṭighassa kāraṇanti katvā. Mejjati hitapharaṇavasena siniyatīti mitto, tasmim mitte bhavā, mittassa vā esāti mettā, tassā **mettāya**.

Mettāyanassa sattesu hitapharaṇassa uppādanam pavattanam **mettānimittassa uggaḥo**. **Odhisakaanodhisakadisāpharaṇānanti** attaatiyasaḥāyamajjhāttaverīvasena odhisakatā, sīmāsambhede kate anodhisakatā, ekādidiṣapharaṇavasena disāpharaṇatā mettāya uggaṇhe veditabbā. Vihāraracchāgāmādivasena vā odhisakadisāpharaṇam, viharādiuddesarahitam puratthimādidisāvasena anodhisakadisāpharaṇanti evam vā dvidhā uggaṇham sandhāya “**odhisakaanodhisakadisāpharaṇā**”nti vuttaṃ. Uggaḥo ca yāva upacārā daṭṭhabbo, uggaḥitāya āsevanā bhāvanā. Tattha “sabbe sattā, pāṇā, bhūtā, puggalā, attabhāvapariyāpannā”ti etesam vasena pañcavidhā, ekekasmim “averā hontu, abyāpajjā, anīghā, sukhī attānam pariharantū”ti catudhā pavattito vīsatividhā anodhisakapharaṇā mettā, “sabbā itthiyo, purisā, ariyā, anariyā, devā, manussā, vinipātikā”ti sattodhikaraṇavasena pavattā sattavidhā aṭṭhavīsatividhā vā, dasahi disāhi disodhikaraṇavasena pavattā dasavidhā ca, ekekāya vā disāya sattādiitthādiaverādibhedena asītādhikacatusatappabhedā ca odhibhopharaṇā veditabbā.

Yena ayonisomanasikārena aratiādikāni uppajjanti, so aratiādīsu **ayonisomanasikāro**, tena. Nipphādetabbe hi idaṃ bhummaṃ. Esa nayo ito paresupi. **Ukkaṇṭhitā** pantasenāsanesu adhikusalesu dhammesu ca uppajjanabhāvāriṇānā. **Kāyavināmanāti** kāyassa virūpenākārena nāmanā.

Kusaladhammasampaṭipattiyā paṭṭhapanasabhāvatāya, tappaṭipakkhānam visosanasabhāvatāya ca ārambhadhātuādito pavattavīriyanti āha “**paṭhamārambhavīriya**”nti. Yasmā paṭhamārambhamattassa kosajjavidhamanam thāmagamañca natthi, tasmā vuttaṃ “**kosajjato nikkhantatāya tato balavatara**”nti. Yasmā pana aparāparuppattiyā laddhāsevanam uparūparivisesam āvahantaṃ ativiya

thāmagatameva hoti, tasmā vuttaṃ “**paraṃ paraṃ ṭhānaṃ akkamanato tatopi balavatara**”nti.

**Atibhojane nimittaggāho**ti atibhojane thinamiddhassa nimittaggāho, “ettake bhutte thinamiddhassa kāraṇaṃ hoti, ettake na hoti”ti thinamiddhassa kāraṇākāraṇaggāho hotīti attho. **Divā sūriyālokanti** divā gahitanimittaṃ sūriyālokaṃ rattiyaṃ manasikarontassapīti evamettha attho veditabbo. Dhutaṅgaṇaṃ vīriyanissitattā vuttaṃ “**dhutaṅganissitasappāyakathāyapī**”ti.

Kukkuccampi katākatānusocanavasena pavattamānaṃ cetaso avūpasamāvahatāya uddhaccena samānalakkhaṇamevāti “**avūpasamo nāma avūpasantākāro, uddhaccakukkuccamevetam atthato**”ti vuttaṃ.

Bahussutassa ganthato atthato ca suttādīni vicārentassa atthavedādīpaṭilābhasabbhāvato vikkhepo na hoti, yathāvidhipaṭipattiyā yathānurūpapaṭikārappavattiyā ca katākatānusocanañca na hotīti “**bāhusaccenapi...pe... uddhaccakukkuccaṃ pahīyati**”ti āha. Yadaggena bāhusaccena uddhaccakukkuccaṃ pahīyati, tadaggena paripucchakatāvinayapakataññutāhipi taṃ pahīyatīti daṭṭhabbaṃ. Buddhasevitā ca buddhasīlitaṃ āvahaṭīti cetaso vūpasamakaratā uddhaccakukkuccapahānakārī vuttā. Buddhattaṃ pana anapekkhitvā vinayadharā kukkuccavinodakā kalyāṇamittā vuttāti daṭṭhabbā. Vikkhepo ca bhikkhuno yebhuyyena kukkuccaḥetuko hotīti “**kappiyākappiyaparipucchāmahulassā**”tiādīnā vinayanayeneva paripucchakatādayo niddiṭṭhā. **Pahīne uddhaccakukkuceti** niddhāraṇe bhummaṃ. **Kukkuccassa** domanassasahagatattā **anāgāmimaggena āyatīṃ anuppādo** vutto.

Tiṭṭhati pavattati etthāti ṭhānīyā, vicikicchāya ṭhānīyā **vicikicchāṭṭhānīyā**, vicikicchāya kāraṇabhūtā dhammā. Tiṭṭhatīti vā ṭhānīyā, vicikicchā ṭhānīyā etissāti **vicikicchāṭṭhānīyā**, atthato vicikicchā eva. Sā hi purimuppanā parato uppajjanakavicikicchāya sabhāgahetutāya asādhāraṇaṃ.

**Kusalākusalāti** kosallasambhūtaṭṭhena kusalā, tappaṭipakkhato akusalā. Ye akusalā, te **sāvajjā asevitabbā hīnā ca**. Ye kusalā, te **anavajjā sevitabbā paṇītā ca**. Kusalāpi vā hīnehi chandādīhi āradhā **hīnā**, paṇītehi **paṇītā**. **Kaṇhāti** kālakā, cītassa apabhassarabhāvakaraṇā. **Sukkāti** odātā, cītassa pabhassarabhāvakaraṇā. Kaṇhābhijātihetuto vā **kaṇhā**, sukkābhijātihetuto **sukkā**. Te eva **sappaṭibhāgā**. Kaṇhā hi ujuvipaccanīkatāya sukkehi sappaṭibhāgā, tathā sukkāpi itarehi. Atha vā kaṇhasukkā ca sappaṭibhāgā ca **kaṇhasukkasappaṭibhāgā**. Sukkā hi vedanā dukkhāyavedanāya sappaṭibhāgā, dukkhā ca vedanā sukhāya vedanāya sappaṭibhāgāti.

Kāmaṃ bāhusaccaparipucchakatāhi aṭṭhavatthukāpi vicikicchā pahīyati, tathāpi ratanattayavicikicchāmūlikā sesavicikicchāti katvā āha “**tīṇi ratanāni ārabbhā**”ti. Ratanattayaḡuṇāvabodhe hi “satthari kaṅkhatī”ti (dha. sa. 1008, 1123, 1167, 1241, 1263, 1270; vibha. 915) ādivicikicchāya asambhavoti. Vinaye pakataññutā “sikkhāya kaṅkhatī”ti (dha. sa. 1008, 1123, 1167, 1241, 1263, 1270; vibha. 915) vuttāya vicikicchāya pahānaṃ karotīti āha “**vinaye ciṅnavasībhāvassapī**”ti. **Okappanīyasaddhāsāṅkhātāadhimokkhabahulassāti** saddheyyavatthuno anupavisanasaddhāsāṅkhātāadhimokkhena adhimuccanabahulassa. Adhimuccanañca adhimokkhuppādanamevāti daṭṭhabbaṃ. Saddhāya vā ninnapoṇatā adhimutti adhimokkho.

**Subhanimittaasubhanimittādīsūti** “subhanimittādīsū asubhanimittādīsū”ti ādi-saddo paccekaṃ yojetabbo. Tattha paṭhamena **ādi-saddena** paṭighanimittādīnaṃ saṅgaho, dutiyena mettācetovimuttīādīnaṃ. Sesamettha yaṃ vattabbaṃ, taṃ vuttanayamevāti.

Nīvaraṇapabbavaṇṇanā niṭṭhitā.

**Khandhapabbavaṇṇanā**



116. Upādānehi ārammaṇakaraṇādivasena upādātābbā vā khandhā **upādānakkhandā**. Iti rūpanti ettha **iti**-saddo idaṃ-saddena samānatthoti adhippāyenāha “**idaṃ rūpa**”nti. Tayidaṃ sarūpato anavasesapariyādānaṃ hotīti āha – “**ettakaṃ rūpaṃ, na ito paraṃ rūpaṃ atthī**”ti. Itīti vā pakāratthe nipāto, tasmā “**iti rūpa**”nti iminā bhūtopādādivasena yattako rūpassa bhedo, tena saddhiṃ rūpaṃ anavasesato pariyādiyitvā dasseti. **Sabhāvatoti** ruppanasabhāvato cakkhādivaṇṇādisabhāvato ca. **Vedanādisupīti** ettha “ayaṃ vedanā, ettakā vedanā, na ito paraṃ vedanā atthīti sabhāvato vedanaṃ pajānātī”tiādīnā, **sabhāvatoti** ca anubhavasabhāvato sātādisabhāvato cāti evamādinā yojetabbam.

Khandhapabbavaṇṇanā niṭṭhitā.

### Āyatanapabbavaṇṇanā

117. **Chasu ajjhattikabāhiresūti** (dī. ni. ṭī. 2.384) “chasu ajjhattikesu chasu bāhiresu”ti “**chasū**”ti padaṃ paccekam yojetabbam. Kasmā panetāni ubhayāni chaḷeva vuttāni? Chaviññānakāyupattidvārārammaṇavavattānato. Cakkhuviññānavīthiyā pariyāpannassa hi viññānakāyassa cakkhāyataneva upattidvāram, rūpāyataneva ca ārammaṇam, tathā itarāni itaresam, chaṭṭhassa pana bhavaṅgamanasaṅkhāto manāyatanevadeso upattidvāram, asādhāraṇaṅca dhammāyatanaṃ ārammaṇam. Cakkhatīti **cakkhu**, rūpaṃ assādeti vibhāveti cāti attho. Suṇātīti **sotaṃ**. Ghāyatīti **ghānaṃ**. Jīvitanimittatāya raso jīvitam, taṃ jīvitamavhāyatīti **jivhā**. Kucchitānaṃ sāsavadhammānaṃ āyo upattidesoti **kāyo**. Munāti ārammaṇam vijānātīti **mano**. Rūpayati vaṇṇavikāram āpajjamānaṃ hadayaṅgatabhāvaṃ pakāsetīti **rūpaṃ**. Sappati attano paccayehi harīyati sotaviññeyyabhāvaṃ gamīyatīti **saddo**. Gandhayati attano vatthum sūcetīti **gandho**. Rasanti taṃ sattā assādentīti **raso**. Phusīyatīti **phoṭṭhabbam**. Attano lakkhaṇam dhārentīti **dhammā**. Sabbāni pana āyānaṃ tananādiatthena **āyatanāni**. Ayamettha saṅkhepo, vitthāro pana **visuddhimagge** (visuddhi. 2.510-512) **taṃsaṃvaṇṇanāya** (visuddhi. mahāṭī. 2.510) ca vuttanāyena veditabbo.

**Cakkhuṅca pajānātīti** ettha **cakkhu** nāma pasādacakkhu, na sasambhāracakkhu, nāpi dibbacakkhuādikanti āha “**cakkhupasāda**”nti. Yaṃ sandhāya vuttaṃ “yaṃ cakkhu catunnaṃ mahābhūtānaṃ upādāya pasādo”ti (dha. sa. 596-599). **Ca**-saddo vakkhamānatthasamuccayattho. **Yāthāvasarasalakkhaṇavasenāti** aviparītassa attano rasassa ceva lakkhaṇassa ca vasena, rūpesu āviñchanakiccassa ceva rūpābhigāhātārahābhūtapasādalakkhaṇassa ca vasenāti attho. “Cakkhuṅca paṭicca rūpe cā”tiādīsu (ma. ni. 1.204, 400; 3.421, 425-426; saṃ. ni. 2.43-45; 4.54-55; kathā. 465, 467) samuditāniyeva rūpāyatanaṃ cakkhuviññānupattihetu, na visuṃ visunti imassa atthassa dassanattham “**rūpe cā**”ti puthuvacanaggahaṇam, tāya eva ca desanāgatiyā kāmaṃ idhāpi “rūpe ca pajānātī”ti vuttaṃ, rūpabhāvasāmaññena pana sabbam ekajjham gahetvā “**bahiddhā catusamuṭṭhānikarūpañcā**”ti ekavacanavasena attho vutto. **Sarasalakkhaṇavasenāti** cakkhuviññānaṃ visayabhāvakkiccassa ceva cakkhupaṭiḥananalakkhaṇassa ca vasenāti yojetabbam.

**Ubhayaṃ paṭiccāti** cakkhum upanissayapaccayavasena paccayabhūtam, rūpe ārammaṇādhipatiārammaṇūpanissayavasena paccayabhūte ca paṭicca. Kāmañcāyaṃ suttantaṃvaṇṇanā, nipariyāyakathā nāma abhidhammasannissitā evāti abhidhammanāyeneva saṃyojanāni dassento “**kāmarāga...pe... avijjāsamojāna**”nti āha. Tattha kāmesu rāgo, kāmo ca so rāgo cāti **kāmarāgo**, so eva bandhanaṭṭhena **samojanaṃ**. Ayañhi yassa saṃvijjati, taṃ puggalaṃ vaṭṭasmiṃ saṃyojati bandhati, itī dukkhena sattaṃ, bhavādike vā bhavantarādīhi, kammunā vā vipākaṃ saṃyojati bandhatīti **samojanaṃ**. Evaṃ paṭiḥhasamojanādīnampi yathārahaṃ attho vattabbo. **Sarasalakkhaṇavasenāti** ettha pana sattaṃ vaṭṭato anissajjanasaṅkhātassa attano kiccassa ceva yathāvuttabandhanasaṅkhātassa lakkhaṇassa ca vasenāti yojetabbam.

Bhavassāda-diṭṭhissāda-nivattanattham **kāmassādaggaṇam**. **Assādayatoti** abhiraṃmantassa. **Abhinandatoti** sapppītikatanhāvasena nandantassa. Padadvāyenaṃ balavato kāmarāgassa paccayabhūtā kāmarāguppatti vuttā. Esa nayo sesesupi. **Etaṃ ārammaṇanti** etaṃ evaṃsukhamaṃ evaṃdubbibhāgaṃ

ārammaṇaṃ. **Niccaṃ dhuvanti** etaṃ nidassanamattaṃ, “ucchijjissati vinassissatīti gaṇhato”ti evamādīnampi saṅgaho icchitabbo. **Bhavaṃ patthentassāti** “īdise sampattibhave yasmā amhākaṃ idaṃ iṭṭhārammaṇaṃ sulabhaṃ jātaṃ, tasmā āyatimpi sampattibhavo bhavyeyā”ti bhavaṃ nikāmentassa. Evarūpaṃ sakkā laddhanti yojanā. **Usūyatoti** usūyaṃ issaṃ uppādayato. **Aññassa maccharāyatoti** aññena asādhāraṇabhāvakaraṇena macchariyaṃ karoto. **Sabbeheva** yathāvuttehi navahi saṃyojanehi.

**Taṅca kāraṇanti** subhanimittapaṭiṅghanimittādivibhāvaṃ iṭṭhāniṭṭhādirūpārammaṇaṅceva tajjāyonisomanasikāraṅcāti tassa tassa saṃyojanassa kāraṇaṃ. Avikkhambhitaasamūhatabhūmiladdhuppannataṃ sandhāya “**appahīnatthena uppannassā**”ti vuttaṃ. Vattamānuppannataṃ **samudācāraggaṇeneva** gahitā. **Yena kāraṇenāti** yena vipassanāsamathabhāvanāsaṅkhātena kāraṇena. **Taṅhi** tassa tadaṅgavasena ceva vikkhambhanavasena ca pahānakāraṇaṃ. Issāmacchariyānaṃ apāyagamanīyatāya paṭhamamaggavajjhataṃ vuttā. Yadi evaṃ “tiṇṇaṃ saṃyojanānaṃ parikkhayaṃ sotāpanno hotī”ti (a. ni. 4.241) suttapadaṃ kathanti? Taṃ suttantapariyāyena vuttaṃ. Yathānulomasāsanaṅhi suttantadesanā, ayaṃ pana abhidhammanayena saṃvaṇṇanāti nāyaṃ doso. **Oḷārikassāti** thūlassa, yato abhiṅhasamuppattipariyūṭṭhānatibbatāva hoti. **Aṇusahagatassāti** vuttapakāraoḷārikābhāvena aṇubhāvaṃ sukhumabhāvaṃ gatassa. Uddhaccasaṃyojanassapettha anuppādo vuttoyeva yathāvuttasaṃyojanehi avinābhāvato. Sotādīnaṃ sabhāvasarasalakkhaṇavasena pajānanā, tappaccayānaṃ saṃyojanānaṃ uppādāpajānanā ca vuttanayeneva veditabbāti dassento “**eseva nayo**”ti atidisati.

**Attano vā dhammesūti** attano ajjhātikāyatanadhammesu, attano ubhayadhammesu vā. Imasmiṃ pakkhe **ajjhātikāyatanapariggahaṇenāti** ajjhātikāyatanapariggaṇhanamukhenāti attho, evaṅca anavasesato saparasantānesu āyatanānaṃ pariggaho siddho hoti. **Parassa vā dhammesūti** etthāpi eseva nayo. **Rūpāyatanassāti** aḍḍhekādasapabbedarūpasabhāvassa āyatanassa. Rūpakkhandhe vuttanayena nīharitabbāti ānetvā sambandhitabbaṃ. **Sesakhandhesūti** vedanāsaṅkhārahārakkhandhesu. **Vuttanayenāti** iminā atidesena rūpakkhandhe āhārasamudayāti, viññāṇakkhandhe nāmarūpasamudayāti, sesakkhandhesu phassasamudayāti imaṃ viśesaṃ vibhāveti, itaraṃ pana sabbattha samānanti. Khandhapabbe viya āyatanapabbepi lokuttaranivattanaṃ pāḷiyaṃ gahitaṃ natthīti āha “**lokuttaradhammā na gahetabbā**”ti.

Āyatanapabbavaṇṇanā niṭṭhitā.

### Bojjhaṅgapabbavaṇṇanā

**118. Bujjhanakasattassāti** kilesaniddāya paṭibujjhanakasattassa, ariyasaccānaṃ vā paṭivijjhanakasattassa. **Āngesūti** kāraṇesu, avayavesu vā. Udayabbayañāṇuppādato paṭṭhāya sambodhipaṭipadāyaṃ ṭhito nāma hotīti āha “**āraddhavipassakato paṭṭhāya yogāvacaroti sambodhī**”ti.

“**Satisambojjhaṅgaṭṭhānīyā**”ti padassa attho “vicikicchāṭṭhānīyā”ti ettha vuttanayena veditabbo. **Tanti** yonisomanasikāraṃ. **Tatthāti** satiyaṃ. Nipphādetabbe cetāṃ bhumbaṃ.

Sati ca sampajaññaṅca **satisampajaññaṃ** (dī. ni. ṭī. 2.385; saṃ. ni. ṭī. 2.5.232; a. ni. ṭī. 1.1.418). Atha vā satipadhānaṃ abhikkantādisāttakabhāvapariggaṇhanaññaṃ **satisampajaññaṃ**. Taṃ sabbattha satokāribhāvāvahattā satisambojjhaṅgassa uppādāya hoti. Yathā paccanīkadhammānaṃ pahānaṃ anurūpadhammasevanā ca anuppannānaṃ kusalānaṃ dhammānaṃ uppādāya hoti, evaṃ satirahitapuggalavivajjhanā, satokāripuggalasevanā, tattha ca yuttapayuttatā satisambojjhaṅgassa uppādāya hotīti imamatthaṃ dasseti “**satisampajañña**”ntiādīnā.

Dhammānaṃ, dhammesu vā vicayo dhammavicayo, so eva sambojjhaṅgo, tassa

**dhammavicayasambojjhaṅgassa.** “**Kusalākusalā dhammā**”tiādīsu yaṃ vattabbaṃ, taṃ heṭṭhā vuttameva. Tattha **yonisomanasikārabahulīkāroti** kusalādīsu taṃtaṃsabhāvarasalakkhāṇādikassa yāthāvato avabujjhanavasena uppanno ñāṇasampayuttacittuppādo. So hi aviparītamanasikāratāya “yonisomanasikāro”ti vutto, tadābhogātāya āvajjanāpi taggatikāva, tassa abhiñhapavattanaṃ bahulīkāro. **Bhiyyobhāvāyāti** punappunabhāvāya. **Vepullāyāti** vipulabhāvāya. **Pāripūriyāti** paribrūhanāya.

**Paripucchakatāti** pariyogāhetvā pucchakabhāvo. Ācariye payirupāsivā pañcapi nikāye saha aṭṭhakathāya pariyogāhetvā yaṃ yaṃ tattha gaṇṭhiṭṭhānabhūtaṃ, taṃ taṃ “idaṃ bhante kathaṃ, imassa ko attho”ti khandhāyatanādiatthaṃ pucchantassa dhammavicayasambojjhaṅgo uppajjati. Tenāha “**khandhadhātu...pe... bahulatā**”ti.

**Vatthuisadakiriyāti** ettha cittacetāsikānaṃ pavattiṭṭhānabhāvato sarīraṃ, tappaṭibaddhāni cīvarādīni ca idha “vatthūnī”ti adhippetāni. Tāni yathā cittassa sukhāvahāni honti, tathā karaṇaṃ tesam visadabhāvakaraṇaṃ. Tena vuttaṃ “**ajjhattikabāhirāna**”ntiādi. **Ussannadosanti** vātādiussannadosam. **Sedamalamakkhanti** sedena ceva jallikāsānkhātena sarīramalena ca makkhitaṃ. **Ca**-saddena aññampi sarīrassa pīlavahaṃ saṅgaṇhāti. **Senānaṃ vāti vā**-saddena pattādīnaṃ saṅgaho daṭṭhabbo. **Avisade** sati, visayabhūte vā. Kathaṃ bhāvanamanuyuttassa tāni visayo? Antarantarā pavattanacittuppādavasenevaṃ vuttaṃ. Te hi cittuppādā cittekaggaṭāya aparissuddhabhāvāya samvattanti. **Cittacetāsikesu** nissayādiṭṭhāyabhūtesu. **Ñāṇampīti pi**-saddo sampiṇḍanattho. Tena na kevalaṃ taṃ vatthuyeva, atha kho tasmim aparissuddhe ñāṇampi aparissuddhaṃ hotīti nissayāparissuddhiyā taṃnissitāparissuddhi viya visayassa aparissuddhatāya visayīnaṃ aparissuddhim dasseti.

**Samabhāvakaraṇanti** kiccato anūnādhikabhāvakaraṇaṃ. Yathāpaccayaṃ saddheyyavatthusmim adhimokkakkiccessa paṭutarabhāvena paññāya avisadātāya vīriyādīnaṃ sithilatādīnā **saddhindriyaṃ balavaṃ hoti**. Tenāha “**itarāni mandāni**”ti. **Tatoti** tasmā saddhindriyassa balavabhāvato itaresaṅga mandatā. Kosajjapakke patitvaṃ adatvā sampayuttadhammānaṃ paggaṇhanaṃ anubalappadānaṃ paggaho, paggahova kiccaṃ **paggaḥakiccaṃ**. “Kātum na sakkotī”ti ānetvā sambandhitabbaṃ. Ārammaṇaṃ upagantvā ṭhānaṃ, anissajjanaṃ vā **upaṭṭhānaṃ**. Vikkhepaṭipakkho, yena vā sampayuttā avikkhittā honti, so **avikkhepo**. Rūpagataṃ viya cakkhunā yena yāthāvato visayasabhāvaṃ passati, taṃ **dassanakkiccaṃ kātum na sakkoti** balavatā saddhindriyena abhibhūtattā. Sahajātadhammesu indaṭṭhaṃ kārentānaṃ sahapavattamānānaṃ dhammānaṃ ekarasatāvaseneva atthasiddhi, na aññathā.

**Tasmāti** vuttamevatthaṃ kāraṇabhāvena paccāmasati. **Tanti** saddhindriyaṃ.

**Dhammasabhāvapaccavekkhaṇenāti** yassa saddheyyavatthuno uḷaratādiguṇe adhimuccanassa sātīsayappavattiyā saddhindriyaṃ balavaṃ jātaṃ, tassa paccayapaccayuppannatādivibhāgato yāthāvato vīmaṃsanena. Evañhi evaṃdhammatānayaena sabhāvasarasato pariggayhamāne savipphāro adhimokkho na hoti “ayaṃ imesaṃ dhammānaṃ sabhāvo”ti pariājanavasena paññābyāpārassa sātīsayattā. Dhuriyadhammesu hi yathā saddhāya balavabhāve paññāya mandabhāvo hoti, evaṃ paññāya balavabhāve saddhāya mandabhāvo hoti. Tena vuttaṃ “**taṃ dhammasabhāvapaccavekkhaṇena... pe... hāpetabba**”nti. **Tathā amanasikārenāti** yenākārena bhāvanamanuyuñjantassa saddhindriyaṃ balavaṃ jātaṃ, tenākārena bhāvanāya ananuyuñjanatoti vuttaṃ hoti. Idha duvidhena saddhindriyassa balavabhāvo attano vā paccayavisesavasena kiccuttariyato vīriyādīnaṃ vā mandakiccatāya. Tattha paṭhamavikappe hāpanavidhi dassito, dutiyavikappe pana yathā manasikaroto vīriyādīnaṃ mandakiccatāya saddhindriyaṃ balavaṃ jātaṃ, tathā amanasikārena, vīriyādīnaṃ paṭukiccabhāvāvahena manasikārena saddhindriyaṃ tehi samarasam karontena hāpetabbaṃ. Iminā nayena sesindriyesupi hāpanavidhi veditabbo.

**Vakkalittheravatthūti** so hi āyasmā saddhādhimuttāya katādhikāro satthu rūpakāyadassanapasuto

eva hutvā viharanto satthārā “kiṃ te, vakkali, iminā pūtikāyena diṭṭhena, yo kho, vakkali, dhammaṃ passati, so maṃ passati” tiādīnā (saṃ. ni. 3.87) ovaditvā kammaṭṭhāne niyojitopi taṃ ananuyuñjanto paṇāmito attānaṃ vinipātetuṃ papātaṭṭhānaṃ abhiruhi. Atha naṃ satthā yathānisinnova obhāsagissajjanena atthānaṃ dassetvā –

“Pāmojjabahulo bhikkhu, pasanno buddhasāsane;  
Adhigacche padaṃ santaṃ, saṅkhārūpasamaṃ sukha” nti. (dha. pa. 381);

Gāthaṃ vatvā “ehivakkalī” ti āha. So tena amateneva abhisitto haṭṭhatuṭṭho hutvā vipassanaṃ paṭṭhapesi, saddhāya pana balavabhāvato vipassanāvīthiṃ na otarati. Taṃ ñatvā bhagavā tassa indriyasamattapaṭipādanāya kammaṭṭhānaṃ sodhetvā adāsi. So satthārā dinnanayena vipassanaṃ ussukkāpetvā maggapaṭipāṭiyā arahattaṃ pāpuṇi. Tena vuttaṃ “**vakkalītheravatthu cettha nidassana**” nti.

**Itarakiccabhedanti** upaṭṭhānādikiccavisesaṃ. **Passaddhādīti ādi**-saddena samādhiupekkhāsambojjhaṅgānaṃ saṅgaho. **Hāpetabbanti** yathā saddhindriyassa balavabhāvo dhammasabhāvapaccavekkhaṇena hāyati, evaṃ vīriyindriyassa adhimattatā passaddhiādibhāvanāya hāyati samādhipakkhiyattā tassā. Tathāhi sā samādhindriyassa adhimattataṃ kosajjapātato rakkhantī vīriyādibhāvanā viya vīriyindriyassa adhimattataṃ uddhaccapātato rakkhantī ekaṃsato hāpeti. Tena vuttaṃ “**passaddhādibhāvanāya hāpetabba**” nti. **Soṇattherassa vatthūti** sukhumālasonattherassa vatthu. So hi āyasmā, satthu, santike kammaṭṭhānaṃ gahetvā sītavane viharanto “mama sarīraṃ sukhumālaṃ, na ca sakkā sukheva sukhaṃ adhigantuṃ, kāyaṃ kilametvāpi samaṇadhammo kātabbo” ti ṭhānacaṅkamameva adhiṭṭhāya padhānamanuyuñjanto pādātalesu phoṭesu uṭṭhitesupi vedanaṃ ajjuhekkhitvā dalhāvīriyaṃ karonto accāraddhavīriyatāya visesaṃ nibbattetuṃ nāsakkhi. Satthā tattha gantvā vīnūpamovādena ovaditvā vīriyasamatāyojanavidhiṃ dassento kammaṭṭhānaṃ sodhetvā gijjhakūṭaṃ gato. Theropi satthārā dinnanayena vīriyasamataṃ yojetvā bhāvato vipassanaṃ ussukkāpetvā arahatte patiṭṭhāsi. Tena vuttaṃ “**soṇattherassa vatthu dassetabba**” nti. **Sesesupīti** satisamādhipaññindriyesupi.

**Samatanti** saddhāpaññānaṃ aññamaññaṃ anūnānadhikabhāvaṃ, tathā samādhivīriyānaṃ. Yathā hi saddhāpaññānaṃ visuṃ visuṃ dhuriyadhamabhūtānaṃ kiccatto aññamaññānātivattanaṃ visesato icchitabbaṃ, yato nesaṃ samadhuratāya appanā sampajjati, evaṃ samādhivīriyānaṃ kosajjudhaccapakkhikānaṃ samarasatāya sati aññamaññūpatthambhanato sampayuttadhammānaṃ antadvayapātābhāvena sammadeva appanā ijhatīti. **Balavasaddhoti**ādī vuttassevatthassa byatirekamukhena samatthanaṃ. Tassattho – yo balavatiyā saddhāya samannāgato avisadaññaṃ, so **mudhāpasanno hoti, na** aveccappasanno. Tathā hi so **avatthusmiṃ pasīdati** seyyathāpi tithiyasāvaka. **Kerāṭīkapakkhanti** sātheyyapakkhaṃ bhajati. Saddhāhīnāya paññāya atidhāvanto “deyyavatthupariccāgena vinā cittuppādamattenapi dānamayaṃ puññaṃ hotī” tiādīni parikappeti hetupatirūpakehi vañcīto, evaṃbhūto ca sukkhatakkaviluttacitto paṇḍitānaṃ vacanaṃ nādiyati, saññattim na gacchati. Tenāha “**bhesajjasamuṭṭhito viya rogo atekiccho hotī**” ti. Yathā cettha saddhāpaññānaṃ aññamaññaṃ samabhāvo atthāvaho, anatthāvaho visamabhāvo, evaṃ samādhivīriyānaṃ aññamaññaṃ avikkhepāvaho samabhāvo, itaro vikkhepāvaho cāti. **Kosajjaṃ adhibhavati**, tena appanaṃ na pāpuṇātīti adhippāyo. **Uddhaccaṃ adhibhavatīti** etthāpi eseva nayo. **Tadubhayanti** saddhāpaññadvayaṃ samādhivīriyadvayañca. **Samam kātabbanti** samarasam kātabbam.

**Samādhikammikassāti** samathakammaṭṭhānikassa. **Evanti** evaṃ sante, saddhāya thokaṃ balavabhāve satīti attho. **Saddahantoti** “pathavīti manasikāramattena kathaṃ jhānuppattī” ti acintetvā “addhā sammāsambuddhena vuttavidhi ijjhissatī” ti saddahanto saddhaṃ janento. **Okappentoti** ārammaṇaṃ anupavisitvā viya adhimuccanavasena avakappento pakkhandanto. **Ekaggatā balavati vaṭṭati** samādhipadhānattā jhānassa. **Ubhinnanti** samādhipaññānaṃ. Samādhikammikassa samādhino adhimattatāya paññāya adhimattatāpi icchitabbatī āha “**samatāyapī**” ti, samabhāvenapīti attho.

**Appanā**ti lokiyaappanā. Tathā hi “**hotiyevā**”ti sāsankam vadati. Lokuttarappanā pana tesam samabhāveneva icchitā. Yathāha “samathavipassanam yuganaddham bhāveti”ti (a. ni. 4.17; paṭi. ma. 2.5). Yadi visesato saddhāpaññanam samādhivīriyānañca samatā icchitā, katham satīti āha “**sati pana sabbattha balavati vaṭṭati**”ti. **Sabbatthāti** līnuddhaccapakkhikesu pañcasu indriyesu. Uddhaccapakkhikekadese gaṇhanto “**saddhāvīriyapaññāna**”nti āha. Aññathā pīti ca gahetabbā siyā. Tathā hi “**kosajjapakkhikena samādhinā**”icceva vuttam, na “passaddhisamādhieupekkhāhi”ti. **Sāti** sati. Sabbesu rājakammesu niyutto **sabbakammiko**. **Tenāti** tenā sabbattha icchitabbatthena kāraṇena. **Āha** aṭṭhakathāyam. Sabbattha niyuttā **sabbatthikā**, sabbena vā līnuddhaccapakkhiyena bojjhaṅgena atthetabbā sabbatthiyā, sabbatthiyāva **sabbatthikā**. **Cittanti** kusalacittam. Tassa hi **sati paṭisaraṇam** parāyaṇam appattassa pattiyā anadhigatassa adhigamāya. Tenāha “**ārakkhapaccupaṭṭhānā**”tiādi.

**Khandhādibhede anogāhapaññānanti** pariyattibāhusaccavasenapi khandhāyatanādīsu appatīṭṭhitabuddhīnam. Bahussutasevanā hi sutamayaññāvahā. Taruṇavipassanāsamaṅgīpi bhāvanāmayaññe ṭhitattā ekamsato paññavā eva nāma hotīti āha “**samapaññāsa...pe... puggalasevanā**”ti. Neyyadhammassa gambhīrabhāvavasena tapparicchedakaññāssa gambhīrabhāvaggahaṇanti āha “**gambhīresu khandhādīsu pavattāya gambhīrapaññāyā**”ti. Tañhi ñeyyam tādīsāya paññāya caritabbato gambhīraññācariyam, tassā vā paññāya tattha pabhedato pavatti gambhīraññācariyā, tassā paccavekkhaṇāti āha “**gambhīrapaññāya pabhedapaccavekkhaṇā**”ti. Yathā sativepullappatto nāma arahā eva, evam so eva paññāvepullappattopīti āha “**arahattamaggena bhāvanāpāripurī hoti**”ti. **Vīriyādīsupi** eseva nayo.

“Tattam ayokhilaṃ hatthe gamentī”tiādinā (ma. ni. 3.250, 267; a. ni. 3.36) pañcavidhabandhanakammakāraṇam niraye nibbattasattassa yebhuyyena sabbapaṭhamam karontīti devadūtasuttādīsu tassā ādito vuttattā ca āha “**pañcavidhabandhanakammakāraṇato paṭṭhāyā**”ti. **Sakaṭavāhanādikāleti ādi**-saddena tadaññam manussehi tiracchānehi ca vibādhiyamānakālam saṅgaṇhāti. **Ekam buddhantaranti** idam aparāparam petesuyeva uppajjanakasattavasena vuttam, ekaccānam vā petānam ekaccatiracchānānam viya tathā dīghāyukabhāvato. Tathā hi kāḷo nāgarājā catunnam buddhānam adhigatarūpadassano.

**Evam ānisamsadassāvinoti** vīriyāyatto **eva** sabbo lokuttaro lokiyo ca visesādhigamoti evam vīriye ānisamsadassanasīlassa. **Gamanavīthinti** sapubbabhāgam nibbānagāminim ariyamaggapaṭipadam. Sā hi bhikkhuno vaṭṭanissaraṇāya gantabbā paṭipajjitabbā paṭipadāti katvā gamanavīthi nāma. **Kāyadalhībahuloti** yathā tathā kāyassa dalhīkammapasuto. **Piṇḍanti** raṭṭhapiṇḍam. Paccayadāyakānam attani kārassa attano sammāpaṭipattiyā mahapphalabhāvassa karaṇena piṇḍassa bhikkhāya paṭipūjanā **piṇḍāpacāyanam**.

**Nīharantoti** pattatthavikato nīharanto. **Tam saddam sutvāti tam** upāsikāya vacanam pañāsāladvāre ṭhitova pañcābhīññatāya dibbasotena sutvā. Manussasampatti dibbasampatti ante nibbānasampattīti **tisso sampattiyo**. **Dātuṃ sakkhissasīti** “tayi katena dānamayena veyyāvaccamayena ca puññakammena khattavisesabhāvūpagamanena aparāparam devamanussasampattiyo ante nibbānasampattiñca dātuṃ sakkhissasī”ti thero attānam pucchati. **Sitam karontovāti** “akiccheneva mayā vaṭṭadukkham samatikkanta”nti paccavekkhaṇāvasāne sañjātapāmojjavasena sitam karonto eva.

**Vippaṭipannanti** jātidhammakuladhammādilaṅghanena asammāpaṭipannam. **Evam** yathā asammāpaṭipanno putto tāya eva asammāpaṭipattiyā kulasantānato bāhiro hutvā pitu santikā dāyajjassa na bhāgī, evam **kusītopi** teneva kusītabhāvena asammāpaṭipanno satthu santikā laddhabbaariyadhadāyajjassa na bhāgī. **Āraddhavīriyova labhati** sammāpaṭipajjanato. Uppajjati vīriyasambojjhaṅgoti yojanā. Evam sabbattha.

**Mahāti** sīlādīhi guṇehi mahanto vipulo anaññasādhāraṇo. Tam panassa guṇamahattam dasasahasilokadhātukampanena loke pākānti dassento “**satthuno hi**”tiādimāha.

Yasmā satthusāsane pabbajitassa pabbajjupagamena sakyaputtiyabhāvo sampajāyati, tasmā buddhaputtabhāvaṃ dassento “**asambhinnāyā**”tiādimāha.

Alasānaṃ bhāvanāya nāmamattampi ajānantānaṃ kāyadaḷhībahulānaṃ yāvadatthaṃ bhuñjitvā seyyasukhādianuyuñjanakānaṃ tiracchānakathikānaṃ puggalānaṃ dūrato vajjanā **kusītapuggalaparivajjanā**. “Divasaṃ caṅkamaṇa nisajjāyā”tiādinā (ma. ni. 1.423; 3.75; sam. ni. 4.120; a. ni. 3.16; vibha. 519; mahāni. 161) bhāvanārambhavasena āradbhavīriyānaṃ daḷhaparakkamānaṃ kālena kālaṃ upasaṅkamaṇā **āradbhavīriyapuggalasevanā**. Tenāha – “**kucchiṃ pūretvā**”tiādi. **Visuddhimagge** pana jātimahattapaccavekkhaṇā sabrahmacārimahattapaccavekkhaṇāti idaṃ dvayaṃ na gahitaṃ, thinamidbhavinodanāta sammappadhānapaccavekkhaṇāta idaṃ dvayaṃ gahitaṃ. Tattha ānisaṃsadassāvitāya eva sammappadhānapaccavekkhaṇā gahitā hoti lokiyalokuttaravisesādhigamassa vīriyāyattatādasanabhāvato. Thinamidbhavinodanaṃ tadadhimuttatāya eva gahitaṃ, vīriyuppādane yuttappayuttassa thinamidbhavinodanaṃ atthasiddhameva. Tattha thinamidbhavinodana-kusītapuggalaparivajjana-āradbhavīriyapuggalasevana-tadadhimuttatā paṭipakkhavidhamaṇapaccayūpasamhāravasena, apāyapaccavekkhaṇādayo samuttejanavasena vīriyasambojjhaṅgassa uppādakā daṭṭhabbā.

Purimuppannā pīti parato uppajjanakapītiyā kāraṇabhāvato “**pītiyeva pītisambojjhaṅgaṭṭhāniyā dhammā**”ti vuttā, tassā pana bahuso pavattiyā puthuttaṃ upādāya bahuvacananiddeso, yathā sā uppajjati, evaṃ paṭipatti, **tassā uppādakamanasikāro**.

Buddhānussatiyā upacārasamādhiniṭṭhattā vuttaṃ “**yāva upacārā**”ti. **Sakalasarīraṃ pharamānoti** pītisamuṭṭhānehi paṇītarūpehi sakalasarīraṃ pharamāno. Dhammaguṇe anussarantassapi yāva upacārā sakalasarīraṃ pharamāno pītisambojjhaṅgo uppajjati. Evaṃ sesaanussatīsu pasādanīyasuttantapaccavekkhaṇāyaṇca yojetabbaṃ tassāpi vimuttāyatanabhāvena taggatikkattā. **Samāpattiyā...pe... samudācarantīti** idaṇca upasamānussatidassanaṃ. Saṅkhārānaṃhi sappadesavūpasamepi nippadesavūpasame viya tathā paññāya pavattito bhāvanāmanasikāro kilesavikkhambhanasamattho hutvā upacārasamādhim āvahanto tathārūpapītisomanassasamannāgato pītisambojjhaṅgassa uppādāya hotīti. Pasādanīyesu ṭhānesu pasādasinehābhāvena thusasamahadayatā lūkhatā, sā tattha ādaragāravākaraṇena viññāyati āha “**asakkaccakiriyāya saṃsūcitalūkhabhāve**”ti.

Kāyacittadarathavūpasamalakkhaṇā passaddhi eva passaddhisambojjhaṅgo, tassa **passaddhisambojjhaṅgassa**.

**Paṇītabhojanasevanatāti** paṇītasappāyabhojanasevanatā. **Utuiriyāpathasukhaggahaṇa**na sappāyautuiriyāpathaggahaṇaṃ daṭṭhabbaṃ. Taṅhi tividhaṃ sappāyaṃ seviyamānaṃ kāyassa kallatāpādanavasena cittassa kallataṃ āvahantaṃ duvidhāyapi passaddhiyā kāraṇaṃ hoti. Ahetukaṃ sattesu labbhamānaṃ sukhaṃ dukkhanti ayameko anto, issarādivisamahetukanti pana ayaṃ dutiyo, ete ubho ante anupagamma yathāsakaṃ kammaṇā hotīti ayaṃ majjhimā paṭipatti. Majjhato payogo yassa hoti majjhattapayogo, tassa bhāvo **majjhattapayogatā**. Ayaṅhi pahāya sāraddhakāyataṃ passaddhakāyatāya kāraṇaṃ hontī passaddhidvayaṃ āvahati, eteneva sāraddhakāyapuggalaparivajjanapassaddhakāyapuggalavasevānaṃ tadāvahanatā samvaṇṇitāti daṭṭhabbaṃ.

Yathāsamāhitākārasallakkhaṇavasena gayhamāno purimuppanno samatho eva **samathanimittaṃ**. Nānārammaṇe paribbhamanaṃ vividhaṃ aggaṃ etassāti byaggo, vikkhepo. Tathā hi so anavaṭṭhānāraso bhantatāpaccupaṭṭhāno ca vutto. Ekaggatābhāvato byaggapaṭipakkhoti **abyaggo**, samādhī. So eva nimittanti pubbe viya vattabbaṃ. Tenāha “**avikkhepaṭṭhena ca abyagganimitta**”nti.

Vatthuvisadakiriyā indriyasamattapaṭipādanā ca paññāvahā vuttā, samādhānāvahāpi tā honti samādhānāvahabhāveneva paññāvahabhāvato vuttaṃ “**vatthuvisada...pe... veditabbā**”ti.

Karaṇabhāvanākosallānaṃ avinābhāvato, rakkhaṇakosallassa ca tammūlakattā “**nimittakusalatā nāma kasiṇanimittassa uggahaṇakusalatā**” icceva vuttaṃ. **Kasiṇanimittassāti** ca nidassanamattaṃ daṭṭhabbaṃ. Asubhanimittassādikassapi hi yassa kassaci jhānuppattinimittassa uggahaṇakosallaṃ nimittakusalatā evāti.

**Atisithilavīriyatādīhīti ādi**-saddena paññāpayogamandataṃ pamodavekallañca saṅgaṇhāti. **Tassa paggahaṇanti** tassa līnassa cittaṃ dhammavicayasambojjhaṅgādisamuṭṭhāpanena layāpattito samuddharaṇaṃ. Vuttañhettaṃ bhagavatā –

“Yasmiñca kho, bhikkhave, samaye līnaṃ cittaṃ hoti, kālo tasmim samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāya. Taṃ kissa hetu? Līnaṃ, bhikkhave, cittaṃ, taṃ etehi dhammehi susamuṭṭhāpayaṃ hoti. Seyyathāpi, bhikkhave, puriso parittaṃ aggim ujāletukāmo assa, so tattha sukkhāni ceva tiṇāni pakkhipeyya, sukkhāni ca gomayāni pakkhipeyya, sukkhāni ca kaṭṭhāni pakkhipeyya, mukhavātañca dadeyya, na ca paṃsukena okireyya, bhabbo nu kho so puriso parittaṃ aggim ujāletunti? Evaṃ sante” ti (saṃ. ni. 5.234).

Ettha ca yathāsakaṃ āhārasena dhammavicayasambojjhaṅgādīnaṃ bhāvanā samuṭṭhāpanāti veditabbaṃ, sā anantaraṃ vibhāvītā eva.

**Accāraddhavīriyatādīhīti ādi**-saddena paññāpayogabalavataṃ pamoduppilāvanañca saṅgaṇhāti. **Tassa niggaṇanti** tassa uddhatacittaṃ samādhisambojjhaṅgādisamuṭṭhāpanena uddhatāpattito nisedhanaṃ. Vuttampi cettaṃ bhagavatā –

“Yasmiñca kho, bhikkhave, samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya. Taṃ kissa hetu? Uddhataṃ, bhikkhave, cittaṃ, taṃ etehi dhammehi suvūpasamayaṃ hoti. Seyyathāpi, bhikkhave, puriso mahantaṃ aggikkhandhaṃ nibbāpetukāmo assa, so tattha allāni ceva tiṇāni...pe... paṃsukena ca okireyya, bhabbo nu kho so puriso mahantaṃ aggikkhandhaṃ nibbāpetunti? Evaṃ bhante” ti (saṃ. ni. 5.234).

Etthāpi yathāsakaṃ āhārasena passaddhisambojjhaṅgādīnaṃ bhāvanā samuṭṭhāpanāti veditabbā. Tattha passaddhisambojjhaṅgassa bhāvanā vuttā eva, samādhisambojjhaṅgassa vuccamānā, itarassa anantaraṃ vakkhati.

**Paññāpayogamandatāyāti** paññābyāpārassa appabhāvena. Yathā hi dānaṃ alobhappadhānaṃ, sīlaṃ adosappadhānaṃ, evaṃ bhāvanā amohappadhānā. Tattha yadā paññā na balavatī hoti, tadā bhāvanā pubbenāparaṃ visesāvahā na hoti, anabhisankhato viya āhāro purisassa yogino cittaṃ abhiruciṃ na janeti, tena taṃ nirassādaṃ hoti, tathā bhāvanāya sammadeva avīthipaṭṭipattiyā upasamasukhaṃ na vindati, tenāpi cittaṃ nirassādaṃ hoti. Tena vuttaṃ “**paññāpayoga...pe... nirassādaṃ hoti**” ti. Tassa saṃveguppādanaṃ pasāduppādanañca tikicchananti taṃ dassento “**aṭṭha saṃvegavatthūni**” tiādīmāha. Tattha jātijarābyādhimaraṇāni yathārahaṃ sugatiyaṃ duggatiyañca hontīti tadaññameva pañcavidhabandhanādi-khuppiṃpāsādi-aññamaññavibādhanādihetukaṃ apāyadukkhaṃ daṭṭhabbaṃ, tayidaṃ sabbaṃ tesam tesam sattānaṃ paccuppanabhavanissitaṃ gahitanti atīte anāgate ca kāle vaṭṭamūlakadukkhāni viṣuṃ gahitāni. Ye pana sattā āhārūpajīvino, tattha ca uṭṭhānaphalūpajīvino, tesam aññehi asādhāraṇaṃ jīvikadukkhaṃ aṭṭhamam saṃvegavatthu gahitanti daṭṭhabbaṃ. **Ayaṃ vuccati samaye sampahaṃsanatāti** ayaṃ sampahaṃsitabbasamaye vuttanayena tena saṃvejanavasena ceva pasāduppādanavasena ca sammadeva pahamaṃsanā, saṃvegajanapubbakapasāduppādanena bhāvanācittaṃ tosanāti attho.

**Sammāpaṭṭipattiṃ āgammāti** līnuddhaccavirahena samathavīthipaṭṭipattiyā ca sammā avisamaṃ

sammadeva bhāvanāpaṭipattiṃ āgamma. **Alīnantiādīsu** kosajjapakkhiyānaṃ dhammānaṃ anadhimattatāya **alīnaṃ**, uddhaccapakkhiyānaṃ anadhimattatāya **anuddhatam**, paññāpayogasattiyā upasamasukhādhiḡamena ca **anirassādam**, tato eva **ārammaṇe samappavattam samathavīthipaṭipannañca**. Tattha alīnatāya **paggahe**, anuddhatatāya **niggahe**, anirassādatāya **sampahaṃsane na byāpāram āpajjati**, alīnānuddhatatāhi ārammaṇe samappavattam, anirassādatāya samathavīthipaṭipannaṃ. Samappavattiyā vā **alīnaṃ anuddhatam**, samathavīthipaṭipattiyā **anirassādanti** daṭṭhabbam. **Ayaṃ vuccati samaye ajjupekkhanatāti** ayaṃ ajjupekkhitabbasamaye bhāvanācittassa paggahaniggahasampahaṃsanesu byāvaṭatāsankhātāṃ paṭipakkhaṃ abhibhuyya pekkhanā vuccati.

Paṭipakkhavikkhambhanato vipassanāya adhiṭṭhānabhāvūpagamanato ca upacārajjhānampi samādānakiccanipphattiyā puggalassa samāhitabhāvasādhanamevāti tattha samadhurabhāvenāha “**upacāram vā appanam vā**”ti.

**Upekkhāsambojjhaṅgaṭṭhānīyā dhammāti** ettha yaṃ vattabbam, taṃ heṭṭhā vuttānusārena veditabbam.

Anurodhavirodhavippahānavasena majjhatabhāvo upekkhāsambojjhaṅgassa kāraṇaṃ tasmim sati sijjhanato, asati ca asijjhanato, so ca majjhatabhāvo visayavasena duvidhoti āha “**sattamajjhattatā saṅkhāramajjhattatā**”ti. Tadubhaye ca virujjhanam passaddhisambojjhaṅgabhāvanāya eva dūrīkatanti anurujjhanasseva pahānavidhiṃ dassentena “**sattamajjhattatā**”tiādi vuttam. Tenevāha “**sattasaṅkhārakelāyanapuggalaparivajjanatā**”ti. Upekkhāya hi visesato rāgo paṭipakkho. Tathā cāha “upekkhā rāgabahulassa visuddhimaggo”ti (visuddhi. 1.269).

**Dvīhākārehīti** kammassakatāpaccavekkhaṇaṃ attasuññatāpaccavekkhaṇanti imehi dvīhi kāraṇehi. **Dvīhevāti** avadhāraṇaṃ saṅkhyāsamānatāya. **Assāmikabhāvo** anattaniyatā. Sati hi attani tassa kiñcanabhāvena cīvaraṃ aññañca kiñci attaniyaṃ nāma siyā, so pana koci natthevāti adhippāyo. **Anaddhaniyanti** na addhānakkhamaṃ, na ciraṭṭhāyi ittaram aniccanti attho. **Tāvakālikanti** tasseva vevacanaṃ.

**Mamāyatīti** mamattam karoti, “mama”nti taṇhāya pariggayha tiṭṭhati. **Dhanāyantāti** dhanam drabyam karontā.

Ayaṃ satipaṭṭhānadesanā pubbabhāgamaggavasena desitāti pubbabhāgiyabojjhaṅge sandhāyāha “**bojjhaṅgapariggāhikā sati dukkhasacca**”nti.

Bojjhaṅgapabbavaṇṇanā niṭṭhitā.

### Catusaccapabbavaṇṇanā

**119. Yathāsabhāvatoti** aviparītasabhāvato bādhanalakkhaṇato, yo yo vā sabhāvo **yathāsabhāvo**, tato, ruppanādikakkhālādisabhāvatoti attho. **Janikaṃ samuṭṭhāpikanti** pavattalakkhaṇassa dukkhasa janikaṃ nimittalakkhaṇassa samuṭṭhāpikaṃ. **Purimataṇhanti** dukkhanibbattito puretarasiddham taṇham.

Sasantatipariyāpannānaṃ dukkhasamudayānaṃ appavattibhāvena pariggayhamāno nirodhopi sasantatipariyāpanno viya hotīti katvā vuttam “**attano vā cattāri saccāni**”ti. **Parassa vāti** etthāpi eseva nayo. Tenāha bhagavā – “imasmiṃyeva byāmamatte kaḡevare sasaññimhi samanake lokañca paññapemi, lokasamudayañca paññapemi, lokanirodhañca paññapemi, lokanirodhagāminipaṭipadañca paññapemi”ti (sam. ni. 1.107). Katham pana ādikampiko nirodhasaccāni pariggaṇhātīti? Anussavādisiddhamākāram pariggaṇhāti, evañca katvā lokuttarabojjhaṅge uddissapi pariggaho na



virujjhati. **Yathāsambhavatoti** sambhavānurūpaṃ, ṭhapetvā nirodhasaccaṃ sesasaccavasena samudayavayā veditabbāti attho.

Catusaccapabbavaṇṇanā niṭṭhitā.

“Aṭṭhikasankhalikaṃ samaṃsa”ntiādīkā satta sivathikā aṭṭhikakammaṭṭhānatāya itarāsaṃ uddhumātakādīnaṃ sabhāvenevāti navannaṃ sivathikānaṃ appanākammaṭṭhānatā vuttā. **Dveyevāti** “ānāpānaṃ, dvattiṃsākāro”ti imāni dveyeva. **Abhinivesoti** vipassanābhiniveso, so pana sammasanīyadhamme pariggaho. Iriyāpathā ālokitādayo ca rūpadhammaṇaṃ avatthāvisesamattatāya na sammasanupagā viññattiādayo viya. Nīvaraṇabojjhaṅgā ādito na pariggahetabbāti vuttaṃ “**iriyāpatha...pe... na jāyati**”ti. Kesādiapadesena tadupādānadhammā viya iriyāpathādiapadesena tadavatthā rūpadhammā pariggayhanti, nīvaraṇādīmukhena ca taṃ sampayuttā taṃnissayadhammāti adhippāyena mahāsīvatthero “**iriyāpathādīsipi abhiniveso jāyati**”ti āha. **Atthi nu kho** metiādi pana sabhāvato iriyāpathādīnaṃ ādikammikassa anicchitabhāvadassanaṃ. Apariññāpubbikā hi pariññāti.

**137.** Kāmaṃ “idha, bhikkhave, bhikkhū”tiādīnā uddesaniddesesu tattha tattha bhikkhuggahaṇaṃ kataṃ, taṃ paṭipattiyā bhikkhubhāvadassanatthaṃ, desanā pana sabbasādhāraṇāti dassetuṃ “**yo hi koci, bhikkhave**”icceva vuttaṃ, na bhikkhuyevāti dassento “**yo hi koci, bhikkhu vā**”tiādīmāha. **Dassanamaggena** ñātamariyādaṃ anatikkamitvā jānantī sikhāpattā aggamaggapaññā aññā nāma, tassa phalabhāvato aggaphalampīti āha “**aññāti arahatta**”nti. Appatarepi kāle sāsanaṃ niyyānikabhāvaṃ dassentoti yojanā.

**138.** Niyyātentoti nigamento.

Papañcasūdaniyā majjhimanikāyaṭṭhakathāya

Satipaṭṭhānasuttavaṇṇanāya līnatthappakāsanā samattā.

Niṭṭhitā ca mūlapariyāyavaggavaṇṇanā.

Paṭhamo bhāgo niṭṭhito.

Namo tassa bhagavato arahato sammāsambuddhassa

## Majjhimanikāye

### Mūlapaṇṇāsa-ṭīkā

(Dutiyo bhāgo)

## 2. Sīhanādavaggo

### 1. Cūlasīhanādasuttavaṇṇanā

**139.** Suttadesanāvattusāṅkhātassa atthassa uppatti aṭṭhuppatti, sā tassa atthīti **aṭṭhuppattikoti** vuttovāyamatto. **Lābhasakkārapaccayāti** lābhasakkāranimittaṃ, bhagavato saṅghassa ca uppannaṃ lābhasakkārahetu, attano vā lābhasakkāruppādanahetu. **Titthiyaparideviteti** titthiyānaṃ “kiṃ bho samaṇoyeva gotamo samaṇo”tiādīnā vipalapanimittaṃ. “**Mahālābhasakkāro uppajji**”ti vatvā

samantapāsādikattham tassa uppattikāraṇaṃ dassento “**catuppamāṇiko hī**”tiādimāha. Cattāri pamāṇāni catuppamāṇāni, catuppamāṇāni etassa atthīti **catuppamāṇiko**. Lokoyeva saṅgama samāgama vasanaṭṭhena **lokasannivāso**, sattakāyoti attho. Pamināti uḷāratādivisesaṃ etenāti pamāṇaṃ (a. ni. ṭī. 2.4.65) rūpaṃ rūpakāyo pamāṇaṃ etassāti **rūpappamāṇo**. Tato eva rūpe pasannoti **rūpappasanno**. Sesapadesupi eseva nayo. **Ghosoti** pavattathutighoso (a. ni. ṭī. 2.4.65). **Lūkhanti** paccayalūkhatā. **Dhammoti** silādayo guṇadhammā adhippetā.

**Tesaṃ** puggalānaṃ. **Ārohanti** uccataṃ. Sā ca kho tasmim̐ tasmim̐ kāle pamāṇayuttā daṭṭhabbā. **Pariṇāhanti** nātikisanātiṭhulātavasena mitapariṇāhaṃ. **Sañṭhānanti** tesaṃ tesaṃ aṅgapaccaṅgānaṃ susaṅghitataṃ. **Pāripūrinti** sabbesaṃ sarīrāvayavānaṃ paripuṇṇataṃ avekallataṃ. **Tattha pamāṇaṃ gahetvāti** tasmim̐ rūpe rūpasampattiyāṃ pamāṇabhāvaṃ upādāya. **Pasādaṃ janetīti** adhimokkhaṃ uppādeti.

**Paravaṇṇanāyāti** “amuko ediso ca ediso cā”ti yasaguṇavacanena. **Parathomānāyāti** sammukhāva parassa silāghuppādanena abhitthavanena. **Parapasamsanāyāti** parammukhā parassa guṇasaṃkittanena. **Paravaṇṇahārikāyāti** paramparavaṇṇahārikāya paramparāya parassa kittisaddūpasamhārena. **Tatthāti** tasmim̐ thutighose.

**Cīvaralūkhanti** thūlajinṇabahutunnakatādim̐ cīvarassa lūkhabhāvaṃ. **Pattalūkhanti** anekaganthikāhatādim̐ pattassa lūkhabhāvaṃ. **Vividhaṃ vā dukkarakārikanti** dhutaṅgasevanādivasena pavattaṃ nānāvidhaṃ dukkaracariyaṃ.

**Sīlaṃ vā passivāti** silāpāripūrivasena visuddhaṃ kāyavacīsucaritaṃ ñānacakkhunā passivā. Jhānādiadhigamasiddhaṃ **samādhiṃ vā**. Vipassanābhiññāsāṅkhataṃ **paññaṃ vā**.

Bhagavato sarīraṃ disvāti sambandho. **Rūpappamāṇopi sammāsambuddheyeva pasīdati** aparimitakālasamupacitapuññānubhāvanipphannāya sabbaso anavajjāya sabbākāraparipuṇṇāvayavāya rūpakāyasampattiyā samantapāsādikatā, yassā rucirabhāvo visuddhe vigatavalāhake deve puṇṇamāsiyaṃ paripuṇṇakalābhāgamaṇḍalaṃ candamaṇḍalaṃ abhibhavivā atirocati, pabhassarabhāvo saradasamayāṃ saṃvaddhitadiguṇatejakiraṇaṇālasamujjalaṃ sūriyamaṇḍalaṃ abhibhavati, sommakiraṇarasasamujjalabhāvehi tadubhayehi abhibhuyya vattamānaṃ ekasmim̐ khaṇe dasasahasilokadhātuṃ vijjotanasamatthaṃ mahābrahmuno pabhāsamudayaṃ abhivihacca bhāsate tapate virocati ca.

Satipi aṅgapariccāgādīnaṃ dānapāramibhāve pariccāgavisesabhāvadassanattañceva sudukkarabhāvadassanattañca **aṅgapariccāgādiggaṇaṃ**, tatthāpi ca aṅgapariccāgato visuṃ **nayanapariccāgaggahaṇaṃ**, pariccāgabhāvasamaññepi rajjapariccāgato **puttadārapariccāgaggahaṇaṃ** kataṃ. **Ādinā nayanāti ādi**-saddena pubbayogapubbacariyādihetusampattiyā, “itipi so bhagavā”tiādinā (dī. ni. 1.157, 255) vuttāya phalasampattiyā, “so dhammaṃ deseti”tiādinā (dī. ni. 1.255) vuttāya sattupakārikariyāya ca saṅgho daṭṭhabbo. **Sammāsambuddheyeva pasīdati** yathāvuttaguṇānaṃ anaññasādhāraṇabhāvato acchariyabbhutabhāvato ca. Sesesupi eseva nayo.

“**Cīvaralūkhaṃ disvā**”ti vatvā taṃ dassetaṃ “**sace bhagavā**”tiādi vuttaṃ. **Sāṇapaṃsukūlacīvarenāti** matakalevaraṃ paliveṭhetvā chaḍḍitena tumbamate kimī papphotetvā gahitena sāṇapaṃsukūlacīvarena. **Bhāriyanti** garukaṃ, dukkaranti attho. Vadhu yuvatimajjhimitthivasena, bālayobbanapurānavasena vā **tividhanāṭakatā**. **Hareṇuyūsaṃ** maṇḍalalalāyāraso. “Yāpessati nāmā”ti nāma-saddaṃ ānetvā sambandho. Nāma-saddayogena hi anāgatakālassa viya payogo, yāpeti icceva attho. **Appānakanti** nirassāsaṃ nirodhitassāpassāsaṃ.

**Samādhiguṇanti** sādharmaṇato vuttamatthaṃ vivarati jhānādiggaṇena. Mānadabbanimadanena

nibbisevanabhāvāpādanampi damanamevāti vuttaṃ “**pāthikaputtadamanādīnī**”ti. **Ādi**-saddena saccakālavakabakadamanādīnaṃ saṅgho. **Bāverunti** evaṃnāmakaṃ visayaṃ. **Sarasampannoti** aṭṭhaṅgasamannāgatenā sarena samannāgato. Tena brahmassaratākaraṅgabhāṇitā dāssanena lakkhaṇahāranayena avasesalakkhaṇapāripūriṃ viya tadavinābhāvato buddhānaṃ desanāvīlāsāṇca vibhāveti.

**Hatappabhāti** buddhānubhāvena vigatatejā. **Kālapakkhūpameti** sattānaṃ byāmo handhakārābhībhavena kālapakkharattūpame. **Sūriyeti** sūriye udayitvā obhāsenteti adhippāyo.

**Siṅghāṭaketi** tikoṇaracchāyaṃ. **Catukketi** sandhiyaṃ. **Paridevantīti** anutthunāvasena vippalapanti. Sokādhikakato hi vacīpalāpo paridevo. **Loke uppajjamāneyeva uppannāti** attano dīṭṭhivādassa purātanabhāvaṃ dīpentī.

**Sesapadesupīti** “idha dutiyo samaṇo”tiādīsu sesavāresupi (a. ni. ṭī. 2.4.241-242) yathā hi “viviceva kāmehī”ti (pārā. 11; dī. ni. 1.226; saṃ. ni. 2.152; a. ni. 4.123) ettha kato niyamo “vivicca akusalehī”ti (pārā. 11; dī. ni. 1.226; saṃ. ni. 2.152; a. ni. 4.123) etthāpi katoyeva hoti sāvadhāraṇasseva atthassa icchitabbattā, evamidhāpīti. Tenāha “**dutiyaḍayopi**”tiādi. Sāmaññaphalādhigamavasena nipariyāyato samaṇabhāvoti tesam vasetthā cattāro samaṇā desitāti tamatthaṃ suttantarena samatthetum “**tenevāhā**”tiādi vuttaṃ. Paṭipattikkamena desanākkamena ca sakadāgāmiādīnaṃ dutiyaḍitā vuttāti sotāpannassa paṭhamatā avuttasiddhāti na coditā. **Phalaṭṭhakasamaṇāva adhippetā** samitapāpasamaṇaggahaṇato. Kasmā panettha **mahāparinibbāne** viya maggaṭṭhā tadatthāya paṭipannā ca na gahitāti? Veneyyājñhāsayaṃ. Tattha hi maggaḍdhigamatthāya vipassanāpi ito bahiddhā natthi, kuto maggaḍḍhalānīti dassentena bhagavatā “ñāyassa dhammassa padasavattī, ito bahiddhā samaṇopi natthi”ti vuttaṃ. Idha pana niṭṭhānappattameva taṃtaṃsamaṇabhāvaṃ gaṇhantena phalaṭṭhakasamaṇāva gahitā “maggaṭṭhato phalaṭṭho savisesaṃ dakkhiṇeyyo”ti. Svāyamattho dvīsu suttesu desanābhedeneva viññāyatīti.

**Rittāti** vivittā. **Tucchāti** nissārā paṭipannakasārābhāvato. Pavadanti etehīti **pavādā**, dīṭṭhigatikānaṃ nānādīṭṭhidīpakā samayāti āha “**cattāro sassatavādā**”tiādi. Tattha yaṃ vattabbaṃ, taṃ parato āgamissati. **Teti** yathāvuttasamaṇā. **Etthāti** “parappavādā”ti vutte bāhirakasamaye.

**Yanti** yasmiṃ. Bhummatthe hi idaṃ paccattavacaṇaṃ. Ñāyo vuccati saha vipassanāya ariyamaggo. Tena hi nibbānaṃ ñāyati gammati paṭivijjhatīti. So eva nibbānasampāpakahetutāya dhammoti āha “**ñāyassa dhammassā**”ti.

**Tesaṃ** parappavādasāsanānaṃ **akhetatā khetatā ca ariyamaggassa** abhāvabhāvā suparisuddhassa sīlassa suparisuddhāya samathavipassanāya **abhāvato sāvato ca**. Tadubhayaṇca durakkhātasvākkhātabhāvahetukaṃ, so ca asammāsambuddhasammāsambuddhapaveditatāyāti parājikāya satthu vipattihetutāya sāsanaṃ aniyānabhāvoti dasseti.

Idāni yathāvuttamatthaṃ pariyaḍato ca pāḷiyā ca samatthetum “**tenāha bhagavā**”tiādīnā pāḷiṃ dassetvā upamāpadesena tattha suttam vibhāvento “**yasmā**”tiādīmāha. Tattha yasmā ekaccānaṃ viśesato sīhānaṃ purimaṃ pādadvayaṃ hatthakiccampi karoti, tasmā āha “**surattahatthapādo**”ti. **Sīhassa kesā** nāma kesarāyatanā khandhalomā. **Gocariyahatthikulaṃ** nāma pakatihatthikulaṃ, yaṃ “kālāvaka”ntipi vuccati. **Ghoṭako** nāma assakhaḷuṅko. Sineruparibhaṇḍe simbalirukkhehi sañchādito paññāsajoyano daho simbalidaho, taṃ parivāretvā mahantaṃ simbalivanaṃ, taṃ sandhāyāha “**simbalidahavane**”ti. Aññatitthāvāsabhūmiyaṃ imesu samaṇesu ekacco na uppajjati, īdiso panettha vikappo natthi, sabbena sabbam na uppajjantevāti dassento “**ekasamaṇopi**”ti āha. **Ariyamaggaparikkhateti** ariyamagguppattiyā abhisankhate, yadā sāsanaṃ sammāpaṭipattiyā ariyamaggo dibbati, tadāti attho.

**Sammāti** suṭṭhu. Suṭṭhu nadanaṃ nāma hetuyuttaṃ suṭṭhu katvā kathananti āha “**hetunā**”ti. So ca hetu aviparīto eva icchitabboti āha “**nayenā**”ti, nāyenāti attho. Evaṃbhūto ca so yathādhippetatthaṃ karoti sādhetīti dassento āha “**kāraṇenā**”ti. Yadi tiracchānasīhassa nādo sabbatiracchānaekaccamanussāmanussanādato seṭṭhattā seṭṭhanādo, kimaṅgaṃ pana tathāgatasīhanādoti āha “**sīhanādanti seṭṭhanāda**”nti. Yadi tiracchānasīhanādassa seṭṭhanādatā nibbhayatāya appaṭisattutāya icchitā, tathāgatasīhanādasseva ayamatto sātisayoti āha “**abhītanādaṃ appaṭināda**”nti. Idānissa seṭṭhanādabhāvaṃ kāraṇena paṭipādentō “**imesañhī**”tiādīmāha. Tena “sammā”ti vuttamatthaṃ samattheti. Tattha **atthitāyāti** iminā sīhanādassa uttamattatthaṃ dasseti. Bhūtaṭṭho hi uttamattṭho. Tāya eva bhūtaṭṭhatāya abhītanādatāti dassento “**ime samaṇā...pe... nāma hotī**”ti āha. Abhūtañhi vadato kutoci bhayaṃ vā āsaṅkā vā siyāti “idhevā”ti niyamassa aviparītataṃ dassento “**amhākampi...pe... appaṭinādo nāma hotī**”ti āha. Yañhi aññatthāpi atthi, taṃ idhevāti avadhāretuṃ na yuttanti.

**140. Khoti** avadhāraṇe. Tena vijjati evāti dasseti. Yanti karaṇatthe paccattanti āha “**yena kāraṇenā**”ti. **Titthaṃ nāma dvāsaṭṭhi diṭṭhiyo** tabbinimuttassa kassaci diṭṭhivipphanditassa abhāvato. Pāragamanasaṅkhātaṃ taraṇaṃ diṭṭhigatikānaṃ (a. ni. ṭi. 2.3.62) tattha tattheva aparāparaṃ ummujjananimujjanavasena pilavananti āha “**taranti uppalavanti**”ti. **Uppādetāti** pūraṇādiko. Titthe jātāti **titthiyā**, yathāvuttaṃ vā diṭṭhigatasāṅkhātaṃ titthaṃ etesaṃ atthīti titthikā, titthikā eva **titthiyā**. Assasanti ettha, etenāti vā **assāso**, avassayo.

Pakatatthaniddeso yaṃ-taṃ-saddoti tassa “bhagavatā”tiādīhi padehi samānādhikaraṇabhāvena vuttassa yena abhisambuddhabhāvena bhagavā pakato satthubhāvena adhigato supākaṭo ca, taṃ abhisambuddhabhāvaṃ saddhiṃ āgamanapaṭipadāya atthabhāvena dassento “**yo so...pe... abhisambuddho**”ti āha. Satipi nāṇadassanasaddānaṃ idha paññāvevacanabhāve tena tena visesena nesam savisaye visesappavattidassanatthaṃ (sārattha. ṭi. parivāra 3.1) asādhāraṇavisesavasena vijjāttayavasena vijjābhīññānāvaraṇavasena sabbaññutaññānaṃsaṃsacakkhuvasena paṭivedhadesanāññāvasena ca te yojetvā dassento “**tesaṃ tesa**”ntiādīmāha. Tattha **āsayānusayaṃ jānatā** āsayānusayaññāna, **sabbaṃ ñeyyadhammaṃ passatā** sabbaññutānāvaraṇaññānehi. **Pubbenivāsādīhīti** pubbenivāsaāvakkhayaññānehi. Anaññasādhāraṇapuññānubhāvanibbatto anuttaraññādhigamaladdhapurāvattako ca bhagavato rūpakāyo atikkammeva devānaṃ devānubhāvaṃ vattaṭīti āha “**sabbasattānaṃ...pe... passatā**”ti. **Paṭivedhapaññāyāti** maggapaññāya. Tāya hi sabbaso ñeyyadhammesu sammohassa vidhamitattā pacchā pavattajānaṃ tassa jānaṃ viya vuccati.

**Arīnanti** kilesārīnaṃ, pañcavidhamārānaṃ vā sāsanaṃpaccatthikānaṃ vā aññatitthiyānaṃ, tesam hananaṃ pāṭihāriyehi abhibhavanaṃ appaṭibhānatākaraṇaṃ ajjupekkhanaṃ vā. **Kesivinayasutta**ñcetta (a. ni. 4.111) nidassanaṃ. Tathā ca ṭhānāṭṭhānādīni vā **jānatā**, yathākammupage satte **passatā**, savāsānānamāsavānaṃ khīṇattā **arahatā**, abhiññeyyādibhede dhamme abhiññeyyādito aviparītāvabodhena **sammāsambuddhena**. Atha vā tīsu kālesu appaṭihataññānatāya **jānatā**, kāyakammādīnaṃ nāṇānuparivattanena nisammakāritāya **passatā**, ravādīnampi (sārattha. ṭi. parivāra 3.1) abhāvasādhikāya pahānasampadāya **arahatā**, chandādīnaṃ ahānihetubhūtāya akkhayapaṭibhānasādhikāya sabbaññutāya **sammāsambuddhena**. Evaṃ dasabalaṭṭhārasāveṇikabuddhadhammavasenaṃ yojanā veditabbā. **Yeti** caturo dhamme. **Attanīti** amhesu. Na rājarājamahāmattādīsu upatthambhaṃ sampassamānā, na kāyabalaṃ sampassamānāti yojanā.

**Uppannapasādoti** aveccappasādaṃ vadati. Vakkhati hi “cattāri sotāpannassa aṅgāni kathitāni”ti (ma. ni. aṭṭha. 1.140). Kāmaṃ asekkhāpi asekkhāya samasikkhatāya sahadhammikā eva, ciṇṇabrahmacariyatāya pana sahadhammaṃ carantīti na vattabbāti asekkhavāro na gahito. **Sabbepeteti** ete yathāvuttā bhikkhūdayo sotāpannādayo ca puthujjanā ariyā cāti sabbepi ete taṃtaṃsikkhāhi samānadhammattā sahadhammattā “**sahadhammikā**”ti vuccanti. Idāni nibbattitaariyadhammavaseneva sahadhammike dassento “**apicā**”tiādīmāha. **Maggadassanaṃhīti** pariññābhīsamayādivasena

saccapaṭivedhena “nava maggaṅgāni, aṭṭha bojjhaṅgāni” tiādinā vivādo natthi.

**Ekadhammacāritāyā**ti samānadharmacāritāya. Na hi paṭividdhasaccānaṃ “mayā dhammo sudiṭṭho, tayā duddiṭṭho” tiādinā vivādo atthi. Diṭṭhisīlasāmaññena saṅghatā hi te uttamapurisā. **Imināti** “sahadhammikā kho panā” tiādivacanena. Tattha **piyamanāpaggahaṇena** sīlesu paripūrakāritāpadesena ekadesena gahitaṃ saṅghasuppaṭipattiṃ paripuṇṇaṃ katvā dasseti. Ye hi sampannasīlā suvisuddhadassanā, te viññūnaṃ piyā manāpāti. **Ettāvātāti** “atthi kho no āvuso” tiādinayappavattena ratanattayapasādajotanena **akkhātā** tesu tesu suttapadesesu.

**141. Sathari pasādoti pasādaggahaṇena** “bhagavatā” tiādinā vā pasādaniyā dhammā gahitā. Tena buddhasubuddhataṃ dasseti, tathā “**dhamme pasādo**” ti iminā dhammasudhammataṃ, itarena saṅghasuppaṭipannataṃ. Yena cittena aññattha anupalabbhamānena sāsaneveva samaṇo ito bahiddhā natthīti ayamatto, sammadeva, paṭiṭṭhāpitoti vedittabbaṃ. Tatrāyaṃ yojanā – yasmā sammāsambuddho ambhākaṃ satthā, tasmā atthi kho no, āvuso, sathari pasādo, sammāsambuddhattā cassa svākhāto dhammoti atthi dhamme pasādo, tato eva ca atthi sīlesu paripūrakāritāti sahadhammikā...pe... pabbajitā cāti evamettha sathari pasādena dhamme pasādo, tena saṅghasuppaṭipattīti ayañca nayo lesenapi parappavādesu natthīti idheva samaṇo...pe... samaṇehi aññehīti.

Paṭividdhasaccānaṃ pahīnānurodhānaṃ gehassitapemassa asambhavo evāti “**idānī**” ti vuttaṃ. Yadi evaṃ “upajjhāyena, bhikkhave, saddhivihārikamhi puttapemaṃ upaṭṭhapetabbaṃ” tiādivacanāṃ (mahāva. 65) kathanti? Nayidaṃ gehassitapemaṃ sandhāya vuttaṃ, taṃsadisattā pana pemamukhena vutto mettāsneho. Na hi bhagavā bhikkhū saṃkilese niyojeti. **Evarūpaṃ pemaṃ sandhāyāti** pasādāvahaguṇāvahato pūraṇādīsu bhāti pasādo na hoti, pasādapatirūpakā pana lobhapavattīti daṭṭhabbā. **Theroti** mahāsaṅgharakkhitatthero. Yena **aṭṭhakathā** potthakaṃ āropitā. **Ekova satthā** anaññasādhāraṇaguṇattā, aññathā anacchariyattā satthulakkhaṇameva na paripūreyya. **Visuṃ katvāti** aññehi vivecetvā attano āveṇikaṃ katvā. “Amhākaṃ satthā” ti byāvadantānaṃ aññesaṃ satthā na hotīti atthato āpannameva hoti, tathā ca padesavattiniṃ tassa satthutaṃ paṭijānantā paripuṇṇalakkhaṇasatthutaṃ icchantānampi tato viruddhā satthubhāvapariyesanena parājitaṃ honti. **Pariyattidhammeti** adhikabrahmaguṇasuttageyyādippabhedasamaye. Tattha **ajasīla...pe... kukkurasīlādīsūti** idaṃ yebhuyyena aññatitthiyānaṃ tādisaṃ vatasamādānasabbhāvato vuttaṃ, **ādi-**saddena yamaniyamacātuyāmasaṃvarādīnaṃ saṅghoti. **Adhippayāsoti** adhikaṃ payasati payujjati etenāti adhippayāso, savisesaṃ adhikattabbakiriyā (a. ni. ṭi. 2.3.117). Tenāha “**adhikappayogo**” ti.

**Tassa pasādassa pariyoṣānabhūtāti** tassa sathari dhamme ca pasādassa niṭṭhānabhūtā. **Niṭṭhāti** makkho. Samayavādīnañhi tasmim tasmim samaye tadupadesake ca pasādo yāvadeva makkhādhiḡamanatṭho. Diṭṭhiḡatikā tathā tathā attano laddhivasena niṭṭhaṃ parikappenti yevāti āha “**niṭṭhaṃ apaññapento nāma natthī**” ti. **Brāhmaṇānanti** brāhmaṇavādīnaṃ. Tesāṃ ekacce brahmunā salokatā niṭṭhāti vadanti, ekacce tassa samīpatā, ekacce tena saṃyogo niṭṭhāti vadanti. Tattha ye salokatāvādīno samīpatāvādīno ca, te dvedhāvādīno, itare advedhāvādīno. Sabbepi te atthato brahmalokupapattiyānyeva niṭṭhāsaññino. Tattha hi nesāṃ niccābhiniveso yathā taṃ bakassa brahmino. Tena vuttaṃ “**brahmaloko niṭṭhā**” ti. **Brahmalokoti** paṭhamajjhānabhūmi. **Mahātāpasānanti** vekhanasādītāpasānaṃ. Mahābrahmā viya paṭhamajjhānabhūmiyaṃ ābhassaresu eko sabbasetṭho natthīti “**ābhassarā**” ti puthuvacanāṃ. **Paribbājakānanti** sañcayādiparibbājakānaṃ. Anto ca mano ca etassa natthīti **anantamānaso**. Ājīvakānañhi sabbadābhāvato ananto, sukhadukkhādisamatikkamanato amānaso. Iminā aṭṭhahi lokadhammehi upakkiliṭṭhacittataṃ dasseti.

**Papañce** yaṃ vattabbaṃ, taṃ hetṭhā vuttameva. **Taṇhādīṭṭhiyova adhippetā** mamañkāraahañkāravīgamassa adhippetattā. Yathā pañcasu ṭhānesu ekova kilesa lobho āgato, evaṃ dvīsu ṭhānesu tayo kilesā āgatā “doso moho diṭṭhī” ti. “Sadosassā” ti hi vuttaṭṭhāne paṭiḡhaṃ akusalamūlaṃ gahitaṃ, “paṭiviruddhassā” ti virodho, “samohassā” ti moho akusalamūlaṃ, “aviddasuno” ti malyaṃ, asampajāññaṃ vā, “saupādānassā” ti “natthi dinna” ntiādinā nayena gahaṇaṃ, “papañcārāmassā” ti papañcuppattivāsena.

**Ākāratoti** pavattiākārato. Padantarena rāgavisesassa vuccamānattāādito vuttaṃ sarāgavacanāṃ oḷārikaṃ rāgavisayanti āha “**pañcakāmaguṇikarāgavasenā**”ti. **Gahaṇavasenā**ti daḷhaggahaṇavaseṇa. “Anuruddhapaṭiviruddhassā”ti ekapadavaseṇa pāḷiyāṃ āgatattā ekajjhaṃ paduddhāro kato. Tattha pana “anuruddhassā”ti subhavasenāti evamattho vattabbo. Na hi paṭivirujjhaṃ subhavasena hoti. **Papañcuppattidassanavasenā**ti kilesakammavipākāṇaṃ aparāparuppattipaccayatāya saṃsārassa papañcaṇaṃ papañco, tassa uppattihetubhāvadassanavaseṇa. Taṇhā hi bhavuppattiyā visesapaccayo. **Taṇhāpaccayā upādānadassanavasenā**ti taṇhāpaccayassa upādānassa dassanavaseṇa, yadavatthā taṇhā upādānassa paccayo, tadavatthādassanavaseṇa. Phalena hi hetuvisesakittanametanti. **Evam viddhamsethā**ti kāmarāgabhavataṇhādivaseṇa lobhaṃ kasmā evaṃ vippakiretha. **Taṇhākaraṇavaseṇā**ti taṇhāyanakaraṇavaseṇa subhākāraggahaṇavaseṇa. Subhanti hi ārammaṇe pavatto rāgo “subha”nti vutto.

**142.** Vadanti etenāti **vādo**, diṭṭhivādo. Diṭṭhivaseṇa hi “sassato attā ca loko ca, asassato attā ca loko cā”ti ca diṭṭhigatikā paññapenti. Tenāha “**dvemā, bhikkhave, diṭṭhiyo**”ti (ma. ni. 1.142). Taṇhārahitāya diṭṭhiyā abhāvato taṇhāvaseneva ca attano sassatabhāvābhinivesoti katvā vuttaṃ “**taṇhādiṭṭhivaseṇā**”ti. **Allīnā**ti nissitā. **Upagatā**ti avissajjanavaseṇa ekibhāvamiva gatā. **Ajjhositā**ti tāya diṭṭhiyā gilitvā pariniṭṭhāpitā viya tadantogadhā. Tenāha “**anupavittā**”ti. Yathā gahaṭṭhānaṃ kāmajjhosānaṃ vivādamūlaṃ, evaṃ pabbajitānaṃ diṭṭhajjhosānanti āha “**vibhavadiṭṭhiyā te paṭiviruddhā**”ti. Diṭṭhivirodhena hi diṭṭhigatikavirodho.

Khaṇikasamudayo uppādakkhaṇoti āha “**diṭṭhīnaṃ nibbattī**”ti. Diṭṭhinibbattiggahaṇeneva cettā yathā diṭṭhīnaṃ paṭiccasamuppannatā vibhāvītā, evaṃ diṭṭhivatthunopīti ubhayesampi aniccatā dukkhatā anattatā ca vibhāvītāti datṭhabbaṃ. Yāni **paṭisambhidānaya** (paṭi. ma. 1.122) “paccayasamudayo atṭha ṭhānāni”ti vuttāni, tāni dassento “**khandhāpi**”tiādīmāha. Tattha khandhāpi diṭṭhiṭṭhānaṃ ārammaṇatṭhena “rūpaṃ attato samanupassatī”tiādivacanato (saṃ. ni. 3.81; 4.345). **Avijjāpi diṭṭhiṭṭhānaṃ** upanissayādivaseṇa paccayabhāvato. Yathāha – “assutavā, bhikkhave, puthujjano ariyānaṃ adassāvī ariyadhammassa akovido”tiādi (ma. ni. 1.2, 461; saṃ. ni. 3.1, 7). **Phassopi diṭṭhiṭṭhānaṃ**. Yathā cāha “tadapi phassapaccayā (dī. ni. 1.118-130), phussa phussa paṭisaṃvediyanti”ti (dī. ni. 1.144) ca. **Saññāpi diṭṭhiṭṭhānaṃ**. Vuttañhetam “saññānidānā hi papañcasāṅkhātī (su. ni. 880), pathaviṃ pathavito saññatvā”ti (ma. ni. 1.2) ca ādi. **Vitakkopi diṭṭhiṭṭhānaṃ**. Vuttampi cetam “takkañca diṭṭhīsu pakappayitvā, saccaṃ musāti dvayadhammāhū”ti (su. ni. 892; mahāni. 121) “takki hoti vīmaṃsī”ti (dī. ni. 1.34) ca ādi. **Ayonisomanasikāropi diṭṭhiṭṭhānaṃ**. Yathāha bhagavā “tasseva ayoniso manasikaroto channaṃ diṭṭhīnaṃ aññatarā diṭṭhi uppajjati, atthi me attāti assa saccato thetato diṭṭhi uppajjati”tiādi (ma. ni. 1.19). Samuṭṭhāti etenāti samuṭṭhānaṃ, tassa bhāvo **samuṭṭhānaṭṭho**, tena. **Khaṇikatthaṅgamo** khaṇikanirodho. **Paccayatthaṅgamo** avijjādīnaṃ accantanirodho. So pana yena hoti, tam dassento “**sotāpattimaggo**”ti āha. Cattāro hi ariyamaggā yathārahaṃ tassa tassa saṅkhāragatassa accantanirodhahetu, khaṇikanirodho pana ahetuko.

**Ānisaṃsanti** udayaṃ. So pana diṭṭhadhammikasamparāyikavasena duvidho. Tattha samparāyiko duggatiparikilesatāyāādīnavapakkhiko evāti itaraṃ dassento “**yam sandhāyā**”tiādīmāha. **Ādīnavampi diṭṭhadhammikameva** dassento “**diṭṭhiggahaṇamūlakam upaddava**”ntiādīmāha. **Sotiādīnavo. Ādīnanti ādi**-saddena naggiyānasanasāṅkaṭivatādīnaṃ saṅgaho. Nissarati etenāti nissaraṇanti vuccamāne dassanamaggo eva diṭṭhīnaṃ nissaraṇaṃ siyā, tassa pana atthaṅgamapariyāyena gahitattā sabbasaṅkhatanissaṭaṃ nibbānaṃ diṭṭhīhipi nissaṭanti katvā vuttaṃ “**diṭṭhīnaṃ nissaraṇaṃ nāma nibbāna**”nti. **Iminā**tiādīsu vattabbaṃ anuyogavatte vuttanayameva.

**143. Diṭṭhicchedanaṃ dassentoti** sabbupādānapariññādassanena sabbaso diṭṭhīnaṃ samucchavidhiṃ dassento. **Vuttāyevā**ti –

“Upādānāni cattāri, tāni atthavibhāgato;

Dhammasaṅkhepavithhārā, kamato ca vibhāvaye’’ti. (visuddhi. 2.645) –

Gāthaṃ uddisitvā atthavibhāgādivasena vuttāyeva. Kāmaṃ ito bāhirakānaṃ ‘‘imāni upādānāni ettakāni cattāri, na ito bhīyyo’’ti īdisaṃ ñānaṃ natthi, kevalaṃ pana keci ‘‘kāma pahātabbā’’ti vadanti, keci ‘‘natthi paro lokoti ca, micchā’’ti vadanti, apare ‘‘sīlabbatena suddhīti ca, micchā’’ti vadanti, attadiṭṭhiyā pana micchābhāvaṃ sabbaso na jānanti eva. Yattakaṃ pana jānanti, tassapi accantappahānaṃ na jānanti, tathāpi sabbassa pariññeyyassa pariññeyyaṃ paññapemaicceva tiṭṭhanti. Evaṃbhūtānaṃ pana nesaṃ tattha yādisī paṭipatti, taṃ dassento sathā ‘‘**santi, bhikkhave**’’tiādimāha. Tattha **santīti** saṃvijjanti. Tena tesāṃ diṭṭhigatikānaṃ vijjamānatāya avicchedataṃ dasseti. **Eketi** ekacce. **Samaṇabrāhmaṇāti** pabbajjupagamanena samaṇā, jātimattena ca brāhmaṇā. **Sabbesanti** anavasesānaṃ upādānānaṃ **samatikkamaṃ** pahānaṃ. **Sammā na paññapenti** yesaṃ paññapenti, tesampi sammā pariññaṃ na paññapenti. Idāni taṃ atthaṃ vitthārato dassetuṃ ‘‘**keci**’’tiādi vuttaṃ. Tattha hotika-kuṭṭhaka-bahūdaka-haṃsa-paramahaṃsa-kājaka-tidaṇḍa-monavata-seva-pārupaka-pañcamarattika- somakāraka-mugabbata-carabāka-tāpasa-niganthā-jīvaka-isi-pārāyanika-pañcātapika-kāpila- kāṇāda-saṃsāramocaka-aggibhattika-magavatika-govatika-kukkuravatika-kāmaṇḍaluka-vaggulivatika-ekasāṭhaka-odakasuddhika-sarīrasantāpaka-sīlasuddhika-jhānasuddhika-catubbidha-sassatavādādayo channavuti taṇhāpāsena ḍaṃsanato, ariyadhammassa vā vibādhanato **pāsaṇḍā**. **Vatthupaṭisevanaṃ kāmaṃ** byāpārassa vatthuno paṭisevanasaṅkhātaṃ kāmaṃ. **Theyyena sevantīti** paṭihatthādisamaññāya lokassa vacanavasena sevanti. **Tiṇi kāraṇāni** ‘‘natthi dinna’’ntiādinayappavattāni diṭṭhivisesabhūtāni vaṭṭakāraṇāni.

**Atthasallāpikāti** atthassa sallāpikā, dvinnaṃ adhippetatthasallāpavibhāvinīti adhippāyo. Dvinnañhi vacanaṃ sallāpo. Tenāha ‘‘**pathavī kirā**’’tiādi.

Yo titthiyānaṃ attano sathari dhamme sahadhammikesu ca pasādo vutto, tassa anāyatanagatatā appasādakabhāvadassanaṃ pasādapacchedo. Tathāpavatto vādo **pasādapacchedavādo** vutto. **Evarūpeti** īdisa vuttanayena kilesānaṃ anupasamasāṃvattanike. **Dhammeti** dhammapatirūpake. **Vinayeti** vinayapatirūpake. Titthiyā hi kohaññe thatvā lokaṃ vañcentā dhammaṃ kathemāti ‘‘sattime kāyā akaṭā akaṭavidhā’’tiādinā (dī. ni. 1.174) yaṃ kiñci kathetvā tathā ‘‘vinayaṃ paññapemā’’ti gosīlavagguvatādīni paññapetvā tādisaṃ sāvake sikkhāpetvā ‘‘dhammavinayo’’ti kathenti, taṃ sandhāyetaṃ vuttaṃ ‘‘dhammavinaye’’ti. Tenāha ‘‘**ubhayenapi aniyānikam sāsanaṃ dasseti**’’ti. Parittampi nāma puññaṃ kātukāmaṃ maccheramalābhībhūtāya nivārentassa antarāyaṃ tassa karoto diṭṭheva dhamme viññūhi garahitabbatā samparāye ca duggati pāṭikaṅkhā, kimaṅgaṃ pana sakalavaṭṭadukkhaniissaraṇāvahe jinacacce pahāradāyino titthakarassa tadovādakarassa cāti imamattaṃ dassento ‘‘**aniyānikasāsanaṃ hi**’’tiādimāha. Yathā so pasādo samparāye na sammaggato attano pavattivasenāti dassento ‘‘**kañci kālam gantvāpi pacchā vinassati yevā**’’ti āha, aveccappasādo viya accantiko na hotīti attho.

**Sampajjamānā** yathāvidhipaṭipattiyā **tiracchānayoṇiṃ āvhati**. Kammasarikkhakena hi vipākeneva bhavitabbaṃ. **Sabbampi kāraṇabhedanti** sabbampi yathāvuttaṃ titthakarānaṃ sāvakānaṃ apāyadukkhāvaṃ micchāpaṭipattisaṅkhātaṃ kāraṇavisesaṃ. **So pana** pasādo **na niyyāti** micchattapakkhikattā surāpītasīṅgāle pasādo viya. Surāṃ parissāvetvā chaḍḍitakasaṭaṃ **surājallikaṃ**. Brāhmaṇā nāma dhanaluddhāti adhippāyenāha ‘‘**imaṃ vañcessāmi**’’ti. **Kāmasatāti** kahāpaṇasatā.

**144. Tassāti** pasādassa. Sabbopi lobho kāmupādānanteva vuccatīti āha ‘‘**arahattamaggena kāmupādānassa pahānapariñña**’’nti. **Evarūpeti** īdisa sabbaso kilesānaṃ upasamasāṃvattanike. Yathānusiṭṭhaṃ paṭipajjamānānaṃ apāyesu apatanavasena dhāraṇaṭṭhena **dhamme**. Sabbaso vinayanaṭṭhena **vinaye**. Tattha bhavadukkhaniissaraṇāya saṃvattane.

**Namassamāno aṭṭhāsi** dve asaṅkhyeyyāni paccekabodhipāramīnaṃ pūraṇena tattha buddhasāsane paricayena ca bhagavati pasannacittatāya ca. ‘‘**Ulūkā**’’tyādigāthā rukkhadevatāya bhāsītā. **Kāluṭṭhitanti**

sāyanhakāle divāvihārato uṭṭhitam. **Duggateso na gacchatīti** duggatiṃ eso na gamissati. **Morajiko** murajavādako. **Mahābherivādakavattu**ādīnīpi sitapātukaraṇam ādiṃ katvā vitthāretabbāni.

**Paramattheti** lokuttaradhamme. **Kim pana vattabbanti** dhammepi paramatthe nimittam gahetvā suṇantānam. **Sāmaṇeravattūti** pabbajitadivaseyeva sappena daṭṭho hutvā kālam katvā devalokam upapannasāmaṇeravattu.

**Khīrodananti** khīrena saddhiṃ sammissam odanam. **Timbarusakanti** tindukaphalam. Tipusasadisā ekā vallijāti timbarusam, tassa phalam timbarusakanti ca vadanti. **Kakkārikanti** khuddakaelālukam. Mahātipusanti ca vadanti. **Vallipakkanti** khuddakatipusavalliyā phalam. **Hatthapatāpakanti** mandāmukhi. **Ambakañjikanti** ambulakañjikam. Khaḷayāguntipi vadanti. **Doṇinimajjaninti** satelam tilapiññākam. **Vidhupananti** caturassabḷjanim. **Tālavaṇṭanti** tālapattehi katamaṇḍalabḷjanim. **Morahatthanti** morapiñchehi katam makasabḷjanim.

**Vuttanayānusārenevāti** yasmā idhāpi yathāvuttam sabbampi kāraṇabhedam ekato katvā dassento sathā “tam kissa hetū”ntiādīmāha, tasmā tattha aniyyānikasāsane vuttanayassa anussaraṇavasena yojetvā veditabbam.

**145. Pariññanti** pahānapariññam. **Tesam paccayam dassetunti** upādānānam pariññā nāma pahānapariññā. Tesam accantanirodho adhippeto, so ca paccayanirodhena hotīti tesam paccayam mūlakāraṇato pabhutī dassetum. **Ayanti** idāni vuccamāno **ettha** “ime cā”tiādipāṭhe “kim nidānā”tiādisamāsapadānam attho. **Sabbapadesūti** “taṇhāsamudayā”tiādīsu sabbesu padesu. Iminā eva ca sabbaggaṇena “phassanidānā”tiādīnampi padānam saṅgaho daṭṭhabbo. Ime aññatitthiyā upādānānampi samudayam na jānanti, kuto nirodham, tathāgato pana tesam tappaccayapaccayānampi samudayañca atthaṅgamañca yāthāvato jānāti, tasmā – “idheva, bhikkhave, samaṇo...pe... suññā parappavādā samaṇebhi aññehī”ti (ma. ni. 1.139) yathāraddhasīhanādam matthakam pāpetvā dassento “ime ca, bhikkhave, cattāro upādānā”tiādīnā (ma. ni. 1.145) nayena desanam paṭiccasamuppādamukhena otārento vaṭṭam dassetvā “yato ca kho”tiādīnā vivaṭṭam dassento arahattena desanāya kūṭam gaṇhi, tamattham dassento “**yasmā pana bhagavā**”tiādīmāha. Tam suviññeyyameva.

Cūlasīhanādasuttavaṇṇanāya līnatthappakāsanā samattā.

## 2. Mahāsīhanādasuttavaṇṇanā

### Vesālīnagaravaṇṇanā

**146. Aparāparanti** punappunam. **Visālībhūtātāyāti** gāvutantaram gāvutantaram puthubhūtātāya. **Tatrāti** tassam visālībhūtātāyam. **Chaḍḍitamatteti** vissaṭṭhamatte. **Ūmibhayādihīti** ūmikumbhīlāvaṭṭasamsukābhayehi. Udaḍḍappavāhenāgatassapi ca usmā na vigacchati, usmā ca nāma īdisassa saviññāṇakatāya bhaveyyāti “**siyā gabbho**”ti cintesi. **Tathā** hītiādi tattha kāraṇacintā. Puññavantaṭāya **duggandham** nāhosi, sausumatāya **pūtikabhāvo**. Dārakānam puññūpanissayato **aṅguṭṭhakato cassa khīram nibbatti**, khīrabhattaṅga labhi. Carimakabhava bodhisatte kucchigate bodhisattamātu viya udaracchaviyā acchavippasannatāya nicchavi viyāti katvā āha “**nicchavī ahesu**”nti. **Tesanti** dvinnam dārakānam. **Mātāpitaroti** posakamātāpitaro. **Abhisīncitvā rājānam akamsu** rajjasampattiyā dāyakassa kammassa katattā, asambhinne eva rājakule uppannattā ca. Kumārassa puññānubhāvasaṅcoditā devatādhiggahitāti keci.

**Purassa apareti** purassa aparadisāya gāvutamatte ṭhāne jīvākambavanam viya sapākāramandirake. **Acirapakkantoti** ettha na desantarapakkamanam adhippetam, atha kho sāsano apakkamananti dassento “**vibbhamitvā**”tiādīmāha. Tenevāha “imasmā dhammavinayā”ti. **Parisatīti** parisāyam, janāsamūheti attho. Janāsamūhagato pana “**parisamajjhe**”ti vutto. Bhāvanāmanasikārena vinā



pakatiyāva manussehi nibbattetabbo dhammoti **manussadhammo**, manussattabhāvāvaho vā dhammo **manussadhammo**, anulāraṃ parittakusalaṃ. Yaṃ asatipi buddhuppāde vattati, yañca sandhāyāha “hīnena brahmacariyena, khattiye upapajjati”ti. “Amhākaṃ buddho”ti buddhe mamattakārino **buddhamāmakā**. Sesapadadvayepi eseva nayo.

### Uttarimanussadhammādivaṇṇanā

Alaṃ ariyāya ariyabhāvāyāti **alamariyo**, rūpāyatanam jānāti cakkhuviññāṇam viya passati cāti **ñāṇadassanam**, dibbacakkhu. Sammasanupage ca pana dhamme lakkhaṇattayañca tathā jānāti passati cāti **ñāṇadassanam**, vipassanā. Nibbānam, cattāri vā saccāni asammohapaṭivedhato jānāti passati cāti **ñāṇadassanam**, maggo. Phalaṃ pana nibbānavaseneva yojetabbaṃ. Paccavekkhaṇā maggādhigatassa atthassa paccakkhato jānanaṭṭhena **ñāṇadassanam**, sabbaññutā anāvaraṇatāya samantacakkhutāya ca **ñāṇadassanam**. **Lokuttaramaggo adhippeto**, tasmīñhi paṭisiddhe sabbesampi buddhaguṇānaṃ asambhavoti adhippāyo. Tenāha “**tañhi so bhagavato paṭisedheti**”ti.

**Sukhamaṃ dhammantaram** nāma jhānavipassanādikaṃ ācariyānuggahena **gahitaṃ nāma natthi**. **Takkapariyāhatanti** “iti bhavissati, evaṃ bhavissatī”ti taṃtaṃdassetabbamatthatakkanaena vitakkanamattena parito āhataṃ parivattitaṃ katvā. Tenāha “**takketvā**”tiādi. **Lokiyapaññaṃ anujānāti** upanisinnaparisaṃyāya anukūladhammakathanatoti adhippāyo. Tenāha “**samaṇo gotamo**”tiādi. Paṭibhātīti paṭibhānam, “iti vakkhāmī”ti evampavattaṃ kathanacittaṃ, tato paṭibhānato jānanaṃ paṭibhānam, āgamābhāvato sayameva upaṭṭhitattā **sayampaṭibhānam**. Tenāha “**imināssa dhammesu paccakkhabhāvaṃ paṭibhāti**”ti. **Suphusitanti** nibbivaraṃ. Aphasitatte hi sukkena vacīghoso na niccharati. **Dantāvaraṇanti** oṭṭhadvayaṃ. Jivhāpi thaddhatāya sukkena vacīghoso na niccharatīti āha “**mudukā jivhā**”ti. Karavīkarutamañjutāya **madhuo saro**. Elaṃ vuccati doso, elaṃ gaḷatīti elagaḷā, na elagaḷā **anelagaḷā**, niddosā, na rujjhatīti attho. Sabbametam rañjanasseva kāraṇam dassento vadati.

**Pañca dhammāti** gambhīraññācariyabhūtānaṃ khandhādīnaṃ uggahaṇa-savana-dhāraṇa-paricaya-yonisomanasikāre sandhāyāha. **Takkarassa sammā dukkhakkhayāyāti** ettha **sammā**-saddo ubhayatthāpi yojetabbo “sammā takkarassa sammā dukkhakkhayāyā”ti. Yo hi sammā dhammaṃ paṭipajjati, tasseva sammā dukkhakkhayo hoti. Yo pana vuttanayena takkaro, tassa niyyānaṃ atthato dhammasseva niyyānanti āha “**so dhammo...pe... niyyāti gacchati**”ti.

**147. Kodhanoti** kujjhanasīlo. Yasmā pana sunakkhatto kodhavasena kurūro pharusavacano ca, tasmā āha “**kodhanoti caṇḍo pharuso cā**”ti. **Tasmiṃ attabhāve maggaphalānaṃ upanissayo natthīti** tasmiṃ attabhāve uppajjanārahānaṃ maggaphalānaṃ upanissayo natthi. **Taṃ buddhā “moghapuriso”ti vadanti** yathā taṃ sudinnalāḷudāyīādike. **Upanissaye satipi tasmiṃ khaṇe magge vā phale vā asati “moghapuriso”ti vadanti** yathā taṃ dhaniyūpasenattherādike. Samucchinnopanissaye pana vattabbameva natthi. Yathā “makkhali moghapuriso manussakhippaṃ maññe”ti (a. ni. 1.311) tathā sunakkhattopīti āha “**imassa panā**”tiādi. **Assāti** etena. Kattari hidaṃ sāmivacanaṃ. **Kodhenāti** kodhahetunā.

**Bhagavatoti** sampadānavacanaṃ kuddhapadāpekkhāya. **Pubbeti** bhikkhukāle. **Saddaṃ sotukāmoti** so kira dibbacakkhunā tāvatimsabhavane devatānaṃ rūpaṃ passanto oṭṭhacalanam passati, na pana saddaṃ suṇāti, tasmā tasmaṃ saddaṃ sotukāmo ahoṣi. Tena vuttaṃ “**saddaṃ sotukāmo...pe... pucchi**”ti. So ca atīte ekaṃ sīlavantaṃ bhikkhuṃ kaṇṇasakkhaliyaṃ paharivā badhiraṃkāsi, tasmā parikammaṃ karontopi abhabbova dibbasotādhigamāya. Taṃ sandhāya vuttaṃ “**upanissayo natthīti natvā parikammaṃ na kathesi**”ti. **Cintesīti** attano micchāparivitakkiteṇa ayoniso ummujjanto cintesi.

Niyyānikattāvabodhanato abhedopacārena “**desanāddhammo niyyāniko**”ti vutto. Niyyāno vā ariyamaggo bodhetabbo etassa atthīti **niyyāniko desanāddhammo**. **Attani atthitaṃ dasseti** kiccāsiddhidassanena tattha tattha pākāṭikatattā, na paṭiññāmatteṇa. Tathā hi yathāparādham

taṃtaṃsikkhāpadapaññattiyā yathādhammaṃ veneyyajjhāsayaṇurūpañca aviparītadhammadeśanāya devamanussehi yathābhisaṅkhatapañhānaṃ tadajjhāsayaṇukūlaṃ ṭhānaso vissajjanena ca bhagavato sabbattha appaṭihataññācārabhāvena **sabbaññutaññāṇaṃ** viññūnaṃ pākaṭaṃ, tathā tattha tattha yamakapāṭihāriyakaraṇādīsu **iddhividhaññāṇādīni**. Tenāha “**mayhañcā**”tiādi. Anveti yathāgahitasāṅketassa anugamanavasena eti jānātīti **anvayo**. Tenāha “**anubujjhatīti attho**”ti. Saṅketānugamanañcetta “yathāparādhaṃ taṃtaṃsikkhāpadapaññattiyā”tiādinā vuttanayameva. **Evam yojanā veditabbāti** yathā sabbaññutaññāṇena yojanā katā, evaṃ “evarūpampi nāma mayhaṃ iddhividhaññāṇasaṅkhātaṃ uttarimanussadhamma”ntiādinā tattha tattha yojanā veditabbā.

Uttarimanussadhammādivaṇṇanā niṭṭhitā.

### Dasabalaññavaṇṇanā

148. Yadi pi ādito abhiññāttayavasena deśanāya āgatattā cetopariyaññānantaraṃ upari tisso abhiññā vattabbā siyunti vattabbaṃ siyā, atthato pana vijjāttayaṃ yathāvuttaabhiññāttayamevāti katvā “**tisso vijjā vattabbā siyū**”nti vuttaṃ. Kasmā panettha “**tāsu vuttāsu upari dasabalaññāṇaṃ na paripūrati**”ti vuttaṃ, nanu imāni ñāṇāni sesābhiññā viya attano visayassa abhijānanaṭṭhaṃ upādāya abhiññāsu vattabbāni, akampiyatṭhaṃ pana upatthambhanaṭṭhañca upādāya balaññāṇesu yathā sammāsatiādayo indriyabalabojjhaṅgamaggaṅgesūti? Nayidamevaṃ. Tattha hi dhammaṇaṃ dhammakiccavisesavibhāvanaparāya deśanāya vuttaṃ, idha pana satthu guṇavisesavibhāvanaparāya deśanāya tathā vuttaṃ na sakkā atthato anaññattā, ekaccānaṃ puthujjanānaṃ evaṃ cittaṃ uppajjeyya “kimidaṃ bhagavā heṭṭhā vuttageṇa punapi gaṇhanto guṇādhikadassanaṃ karotī”ti. Tasmā suvuttametam “upari dasabalaññāṇaṃ na paripūrati”ti.

**Aññehi asādhāraṇāni**ti kasmā vuttaṃ (a. ni. ṭī. 3.10.21), nanu cetāni sāvakaṇampi ekaccānaṃ uppajjantīti? Kāmaṃ uppajjanti, yādisāni pana buddhānaṃ ṭhānāṭṭhānaññādīni, na tādisāni tadaññesaṃ kadācīpi uppajjantīti aññehi asādhāraṇāni. Tenāha “**tathāgatasseva balāni**”ti. Imameva hi yathāvuttalesaṃ apekkhitvā tadabhāvato āsayānusayaññādīsu eva asādhāraṇaguṇasamaññā nirulhā. Kāmaṃ ñāṇabalānaṃ ñāṇasambhāro visesapaccayo, puññasambhāropi pana nesaṃ paccayo eva, ñāṇasambhārasapi vā puññasambhārabhāvato “**puññussayasampattiyā āgatāni**”ti vuttaṃ.

**Pakatihatthikulanti** (saṃ. ni. 2.22) giricaranadīcaravanacarādippabhedā gocariyakālāvakanāmā sabbāpi balena pākatikā hatthijāti. **Dasannaṃ purisānanti** thāmamajjhimānaṃ dasannaṃ purisānaṃ. Ekassa tathāgataṃ kāyabalanti ānetvā sambandho. **Ekassāti** ca tathā heṭṭhākathāyaṃ āgatattā deśanāsotena vuttaṃ. **Nārāyanaṅghātabalanti** ettha nārā vuccanti rasmiyo, tā bahū nānāvidhā ito uppajjantīti **nārāyanaṃ**, vajiraṃ, tasmā nārāyanaṅghātabalanti vajiraṅghātabalanti attho. **Ñāṇabalaṃ pana pāliyaṃ āgatameva**, na kāyabalaṃ viya atthakathāruḥamevāti adhippāyo. “**Samyuttake āgatāni tesattati ñāṇāni sattaṃsattati ñāṇāni**”ti vuttaṃ (vibha. mūlaṭī. 760), tattha pana nidānavagge sattaṃsattati āgatāni catucattārīsaṅga, tesattati pana paṭisambhidāmagge (paṭi. ma. 1.73 mātikā) sutamayādīni āgatāni dissanti, na samyuttake. **Aññānipīti** etena ñāṇavattuvibhaṅge ekakādivasena vuttāni, aññattha ca “pubbante ñāṇa”ntiādinā (dha. sa. 1076) brahmajālādīsu (dī. ni. 1.36) ca “tayidaṃ tathāgato pajānāti, imāni ditṭhiṭṭhānāni evaṃ gahitāni”tiādinā vuttāni anekāni ñāṇappabhedāni saṅgaṇhāti. Yathāvapaṭivedhato sayañca akampiyam puggalañca taṃsamaṅgiṃ neyyesu adhibalaṃ karotīti āha “**akampiyatṭhena upatthambhanaṭṭhena cā**”ti.

Usabhassa idanti **āsabhaṃ**, (a. ni. ṭī. 2.4.8) seṭṭhaṃ ṭhānaṃ. Sabbaññutaṭṭhājanavasena abhimukhaṃ gacchanti, atṭha vā parisā upasaṅkamantīti **āsabhā**, pubbabuddhā. **Idam panāti** buddhānaṃ ṭhānaṃ sabbaññutameva vadati. **Tiṭṭhamānovāti** avadantopi (saṃ. ni. ṭī. 2.2.22) tiṭṭhamānova paṭijānāti nāmāti attho. **Upagacchatīti** anujānāti.

**Aṭṭhasu parisāsūti** “abhiñāmi kho panāhaṃ, sārīputta, anekasataṃ khattiyaparisaṃ...pe... tatra vata maṃ bhayaṃ vā sārājjaṃ vā okkamissatīti nimittametāṃ, sārīputta, na samanupassāmi”ti (ma. ni. 1.151) vuttāsu aṭṭhasu parisāsu. **Abhītanādaṃ nadatīti** parato dassitaññāyogena dasabalohanti abhītanādaṃ nadatī. **Sihanādasuttēna khandhavagge** (saṃ. ni. 3.78) āgatena.

“Devamanussānaṃ catucakkaṃ vattatī”ti (a. ni. 4.31) suttasesena sappurisūpassayādīnaṃ phalasampattipavattī, purimasappurisūpassayādīnaṃ upanissāya pacchimasappurisūpassayādīnaṃ sampattipavattī vā vuttatī ādi-saddena tattha ca cakka-saddassa gahaṇaṃ veditabbaṃ. Vicakkasaṅghānā asani eva **asanivicakkaṃ. Uracakkādīsūti ādi-saddena** āñāsamūhādīsūpi cakka-saddassa pavattī veditabbā. “Saṅghabhedāṃ karissāma cakkabheda”ntiādīsū (pārā. 409; cūḷava. 343) hi āṇā “cakka”nti vuttā, “devacakkaṃ asuracakka”ntiādīsū (a. ni. 1.2.4.8) samūhoti. Paṭivedhaniṭṭhattā arahattamaggaññāṃ paṭivedhoti **“phalakkhaṇe uppannaṃ nāmā”**ti vuttaṃ. Tena paṭiladdhassapi desanāññassa kiccanipphatti parassa bujjanamattena hotīti **“aññātakonḍaññaṃ sotāpatti...pe... phalakkhaṇe pavattaṃ nāmā”**ti vuttaṃ. Tato paraṃ pana yāva parinibbānā desanāññāppavattī tasēva pavattitassa dhammacakkassa ṭhānanti veditabbaṃ pavattitacakkassa cakkavattino cakkaranassa ṭhānaṃ viya.

**“Tiṭṭhatī”**ti vuttaṃ, kiṃ bhūmiyaṃ puriso viya? Noti āha **“tadāyattavuttitāyā”**ti. **Ṭhānanti** cettha attalābho dharamānātā ca, na gatinivattīti āha **“uppajjati ceva pavattati cā”**ti. Yattha panetaṃ dasabalaññaṃ vitthāritaṃ, taṃ dassento **“abhidhamme panā”**tiādīmāha. Sesesūpi eseva nayo.

Samādiyantīti **samādānāni**, tāni pana samādiyitvā katāni hontīti āha **“samādiyitvā katāna”**nti. **Kammameva vā kammamādānanti** etena samādānasaddassa apubbatthābhāvaṃ dasseti muttagatasadde gatasaddassa viya. **Gatīti** nirayādigatiyo. **Upadhīti** attabhāvo. **Kāloti** kammaṃ vipaccanārahakālo. **Payogoti** vipākuppattiyā paccayabhūtā kiriyā.

**Agatigāmininti** nibbānagāminiṃ. Vakkhati hi “nibbānañcāhaṃ, sārīputta, pajānāmi nibbānagāmiñca maggaṃ nibbānagāminiñca paṭipada”nti (ma. ni. 1.153). Bahūsūpi manussesu ekameva pāṇaṃ ghātesu kāmaṃ sabbesaṃ cetanā tasēvekassa jīvitindriyārammaṇā, taṃ pana kammaṃ tesāṃ nānākāraṃ. Tesu (vibha. aṭṭha. 811) hi eko ādarena chandajāto karotī, eko “ehi tvampi karohī”ti parehi nippīḷito karotī, eko samānacchando viya hutvā appaṭibhāmaṇo vicarati. Tesu eko teneva kammena niraye nibbattati, eko tiracchānāyoniyaṃ, eko pettivisaye. Taṃ tathāgato āyūhanakkhaṇe eva – “iminā nīhārena āyūhitattā esa niraye nibbattissati, esa tiracchānāyoniyaṃ, esa pettivisaye”ti jānāti. Niraye nibbattamānampi – “esa mahāniraye nibbattissati, esa ussaniraye”ti jānāti. Tiracchānāyoniyaṃ nibbattamānampi – “esa apādako bhavissati, esa dvipādako, esa catuppado, esa bahuppado”ti jānāti. Pettivisaye nibbattamānampi – “esa nijjhāmatāṅhiko bhavissati, esa khuppiṇāsiko, esa paradattūpajīvī”ti jānāti. Tesu ca kammesu – “idaṃ kammaṃ paṭisandhimākaḍḍhissati, idaṃ aññaṃ dinnāya paṭisandhiyā upadhivepakkaṃ bhavissatī”ti jānāti.

Tathā sakalagāmaṃvāsikesu ekato piṇḍapātaṃ dadamānesu kāmaṃ sabbesampi cetanā piṇḍapātārammaṇāva, taṃ pana kammaṃ tesāṃ nānākāraṃ. Tesu hi eko ādarena karotīti sesaṃ purimasadisāṃ, tasmā tesu keci devaloke nibbattanti, keci manussaloke, taṃ tathāgato āyūhanakkhaṇe eva jānāti – “iminā nīhārena āyūhitattā esa manussaloke nibbattissati, esa devaloke, tatthāpi esa khattiyakule, esa brāhmaṇakule, esa vessakule, esa suddakule, esa paranimmitavasavattīsū, esa nimmānarattīsū, esa tusitesu, esa yāmesu, esa tāvatimsesu, esa cātumahārājikesu, esa bhummadevesū”tiādīnā tattha tattha hīnapaṇītasuvaṇṇadubbaṇṇaappaparivāramahāparivāratādibhedāṃ taṃ taṃ visesaṃ āyūhanakkhaṇe eva jānāti.

Tathā vipassanaṃ paṭṭhapentesūyeva – “iminā nīhārena esa kiñci sallakkhetuṃ na sakkhissati, esa mahābhūtamattameva vavattapessatī, esa rūpariggaheyeva ṭhassati, esa arūpariggaheyeva, esa nāmarūpariggaheyeva, esa paccayapariggahe eva, esa lakkhaṇārammaṇikavipassanāya eva, esa

paṭhamaphaleya, esa dutiyaphale eva, esa tatiyaphale eva, esa arahattam pāpuṇissatī” ti jānāti. Kasinaparikkammaṃ karontesupī – “imassa parikkammamattameva bhavissati, esa nimittam uppādesatti, esa appanam eva pāpuṇissati, esa jhānam pādakam katvā vipassanam paṭṭhapetvā arahattam gaṇhissatī” ti jānāti. Tenāha “**imassa cetanā**” tiādi.

Kāmanato, kāmetabbato, kāmapaṭisaṃyuttato ca kāmo dhātu **kāmadhātu**. Ādi-saddena byāpādadhātu-rūpadhātu-ādīnam saṅgaho. **Vilakkhaṇatāyāti** visadisasabhāvatāya. **Khandhāyatanadhātulokanti** anekadhātuṃ nānādhātuṃ khandhalokam āyatanalokam dhātulokam yathābhūtam pajānāti yojanā. “Ayaṃ rūpakkhandho nāma...pe... ayaṃ viññāṇakkhandho nāma. Tesupī ekavidhena rūpakkhandho, ekādasavidhena rūpakkhandho (vibha. 33). Ekavidhena vedanākkhandho, bahuvividhena vedanākkhandho (vibha. 34-61). Ekavidhena saññākkhandho, bahuvividhena saññākkhandho (vibha. 62-91). Ekavidhena saṅkhārakkhandho, bahuvividhena saṅkhārakkhandho (vibha. 92-120). Ekavidhena viññāṇakkhandho, bahuvividhena viññāṇakkhandho” ti (vibha. 121-149) evaṃ tāva khandhalokassa, “idaṃ cakkhāyatanam nāma...pe... idaṃ dhammāyatanam nāma. Tattha dasāyatanā kāmāvacarā, dve cātubhūmakā” tiādinā (vibha. 156-171) āyatanalokassa, “ayaṃ cakkhudhātu nāma...pe... ayaṃ manoviññādhātu nāma, tattha soḷasa dhātuyo kāmāvacarā, dve cātubhūmakā” tiādinā (vibha. 172-188) dhātulokassa anekasabhāvaṃ nānāsabhāvañca pajānāti. Na kevalam upādinnakasaṅkhāralokasseva, atha kho anupādinnakasaṅkhāralokassapi – “imāya nāma dhātuyā ussannattā imassa rukkhasa khandho seto, imassa kāḷo, imassa maṭṭho, imassa sakaṇṭako, imassa bahalattaco, imassa tanuttaco, imassa pattam vaṇṇasaṅghānādivasena evarūpaṃ, imassa pupphaṃ nīlam pītam lohitaṃ odātam sugandham duggandham, imassa phalam khuddakam mahantaṃ dīgham rassam vaṭṭam susaṅghānam dussaṅghānam mudukam pharusam sugandham duggandham madhuraṃ tittakam kaṭukam ambilaṃ kasāvaṃ, imassa kaṇṭako tikhiṇo kuṅṭho ujuko kuṭilo tambo kāḷo odāto hotī” tiādinā pajānāti. Sabbaññubuddhādīnam eva hi etaṃ balaṃ, na aññesaṃ.

**Nānādhimuttikatanti** nānāajjhāsayatam. Adhimutti nāma ajjhāsayadhātu ajjhāsayasabhāvo. So pana hīnapañitātāsamaññena pāḷiyam dvidhāva vuttopi hīnapañitādibhedena anekavidhoti āha “**hīnādīhi adhimuttihi nānādhimuttikabhāva**” nti. Tattha tattha ye ye sattā yaṃyaṃ adhimuttikā, te te taṃtadadhimuttike eva sevanti bhajanti payirupāsanti dhātusabhāgato. Yathā gūthādīnam dhātusabhāvo eso, yaṃ gūthādīhi eva saṃsandanti samenti, evaṃ (puggalānam ajjhāsayassevesa sabhāvo, yaṃ) (vibha. mūlaṭī. 813) hīnajjhāsayā dussīlādīhi eva saṃsandanti samenti, sampannasīlādayo ca sampannasīlādīheva. Tam nesaṃ nānādhimuttikam bhagavā yathābhūtam pajānāti.

**Vuddhiṇca hāniṇcāti** paccayavisesena sāmattiyato adhikam anadhikatañca. Indriyaparopariyattañānaniddese (vibha. 814; paṭī. ma. 1.113) “āsayam jānāti anusayam jānāti” ti āsayādijānanam kasmā niddiṭṭhanti? Āsayajānanādīnā ye hi indriyehi paroparehi sattā kalyāṇapāpāsayādīkā honti, tesam jānanassa vibhāvanato. Evañca katvā indriyaparopariyattaāsayānusayañānanam visum asādhāraṇatā, indriyaparopariyattanānādhimuttikatāñānanam visum balatā ca siddhā hoti. Tattha āsayanti yattha sattā nivasanti, tam tesam nivāsattānam diṭṭhigatam vā yathābhūtañānam vā **āsayo. Anusayo** appahīnabhāvena thāmagato kilesa. Tam pana bhagavā sattānam āsayam jānanto tesam tesam diṭṭhigatānam, vipassanāmaggañānañca appavattikkhaṇepi jānāti. Vuttam hetam –

“Kāmam sevantaṃyeva bhagavā jānāti ‘ayaṃ puggalo kāmagaruko kāmasayo kāmadhimutto’ ti. Kāmam sevantaññeva jānāti ‘ayaṃ puggalo nekkhammagaruko nekkhammasayo nekkhammadhimutto’ ti. Nekkhammam sevantaññeva jānāti. Byāpadam, abyāpadam, thinamiddham, ālokasaññam sevantaṃyeva jānāti ‘ayaṃ puggalo thinamiddhagaruko thinamiddhāsayo thinamiddhadhimutto’ ti” (paṭī. ma. 1.113).

**Paṭhamādīnam catunnam jhānānanti** rūpāvacarānam paṭhamādīnam paccanīkajhāpanaṭṭhena ārammaṇūpanijhānaṭṭhena ca jhānānam. Catukkanayena hetam vuttam. **Aṭṭhannam vimokkhānanti**

ettha paṭipāṭiyā satta appitappitakkhaṇe paccanīkadhammehi vimuccanato ārammaṇe ca adhimuccanato vimokkhā nāma, aṭṭhamo pana sabbaso saññāvedayitehi vimuttattā apagamavimokkho nāma. Catukkanayapañcakanayesu paṭhamajjhānasamādhi savitakkasavicāro nāma, pañcakanaye dutiyajjhānasamādhi avitakkavicāramatto, nayadvayepi upari tīsu jhānesu samādhi avitakkaavicāro, samāpattīsu paṭipāṭiyā aṭṭhannaṃ samādhītipi nāmaṃ, samāpattītipi cittekaggatāsabbhāvato, nirodhasamāpattiyā tadabhāvato na samādhīti nāmaṃ. **Hānabhāgiyadhammanti** appaṇehi paṭhamajjhānādīhi vuṭṭhitassa saññāmanasikārānaṃ kāmādiānupakkhandanaṃ.

**Visesabhāgiyadhammanti** paṇehi paṭhamajjhānādīhi vuṭṭhitassa saññāmanasikārānaṃ dutiyajjhānādīpakkhandanaṃ. Iti saññāmanasikārānaṃ kāmādidutiyajjhānādīpakkhandanāni hānabhāgiyavisesabhāgiyadhammāti dassitāni, tehi pana jhānānaṃ taṃsabhāvātā dhamma-saddena vuttā. **Tasmāti** vuttamevatthaṃ hetubhāvena paccāmasati. **Vodānanti** paṇatāsāṅkhātāṃ vodānaṃ. Tañhi paṭhamajjhānādīhi vuṭṭhahitvā dutiyajjhānādiadhigamassa paccayattā “**vuṭṭhāna**”nti vuttaṃ. Ye (a. ni. 1. 3.10.21) pana “nirodhato phalasaṃpattiyā vuṭṭhānanti paḷi natthī”ti vadanti, te “nirodhā vuṭṭhahantassa nevasaññānāsaññāyatanaṃ phalasaṃpattiyā anantarapaccayena paccayo”ti imāya **pāḷiyā** (paṭṭhā. 1.1.417) paṭisedhetabbā. Yo samāpattīlābhī samāno eva “**na** labhāmaha”nti, kammaṭṭhānaṃ samānaṃ eva “**na** kammaṭṭhāna”nti saññī hoti, so sampattimyeva samānaṃ “**vipattī**”ti paccetīti veditabbo.

**149. Appananti** nigamaṇaṃ. **Na tathā daṭṭhabbanti** yathā paravādinā vuttaṃ, tathā na daṭṭhabbaṃ. **Sakasakakiccomeva jānāti** tñānāṭṭhānājanānādiṃ sakaṃ sakaṃyeva kiccaṃ kātuṃ jānāti, yathāsakameva visayaṃ paṭivijjhatīti attho. **Tampīti** tehi dasabalaññehi jānitabbampi.

**Kammantaravipākantamevāti** kammantarassavipākantameva jānāti, cetanācetanāsampayuttadhamme nirayādinibbānagāminipaṭipadābhūte kammanti gahetvā āha “**kammaparicchedamevā**”ti. Dhātunānattañca dhātunānattakāraṇaṃ **dhātunānattakāraṇanti** ekadesasarūpekaseso daṭṭhabbo. Tañhi ñāṇaṃ tadubhayampi jānāti, “imāya nāma dhātuyā ussannattā”tiādīnā (vibha. aṭṭha. 812) tathā ceva saṃvaṇṇitaṃ. **Saccaparicchedamevāti** pariññābhīsamayādivasena saccānaṃ paricchindanameva. **Appetum na sakkoti** aṭṭhamanavamabalāni viya taṃsadiṣaṃ iddhividhaññānaṃ viya **vikubbitum**. Etenassa balasadiṣatañca nivāreti. Jhānādiññānaṃ viya vā **appetum vikubbituñca**. Yadihi “jhānādīpaccavekkhaṇāññānaṃ sattaṃabalā”nti tassa savitakkasavicāratā vuttā, tathāpi “jhānādīhi vinā paccavekkhaṇā natthī”ti jhānādisahagataṃ ñāṇaṃ tadantogadhaṃ katvā evaṃ vuttanti veditabbāṃ. Atha vā sabbaññutaññānaṃ jhānādikiccaṃ viya na sabbāṃ balakiccaṃ kātuṃ sakkotīti dassetum “**jhānaṃ hutvā appetum na sakkoti iddhi hutvā vikubbitum na sakkoti**”ti vuttaṃ, na pana kassaci balassa jhānaiddhibhāvatoṭi daṭṭhabbaṃ. Evaṃ kiccavisesavasenaṃpi dasabalaññasabbaññutaññānaṃ viṣesaṃ dassetvā idāni vitakkatikabhūmantaravasenaṃpi taṃ dassetum “**apicā**”tiādi vuttaṃ. **Paṭipāṭiyāti**ādito paṭṭhāya paṭipāṭiyā.

Anupadavañṇanaṃ katvā veditabbānīti sambandho. Kilesāvaraṇaṃ niyatamicchādīṭṭhi, kilesāvaraṇassa abhāvo āsavakkhayādhigamassa tñānaṃ, tabbhāvo aṭṭhānaṃ, anadhigamassa pana tadubhayaṃ yathākkamaṃ aṭṭhānañca tñānañcāti tattha kāraṇaṃ dassento “**lokiya...pe... dassanato cā**”ti āha. Tattha lokiyasammādīṭṭhiyā tñiti āsavakkhayādhigamassa tñānaṃ kilesāvaraṇābhāvassa kāraṇatā. Sā hi tasmīṃ sati na hoti, asati ca hoti. Etena tassā aṭṭhitīyā tassa aṭṭhānatā vuttā eva. **Nesaṃ** veneyyasattānaṃ. **Dhātuvemattadassanatoti** kāmādhātuādīnaṃ pavattibhedadassanato. Yadaggena dhātuvemattaṃ jānāti, tadaggena cariyāviṣesaṃpi jānāti. **Dhātuvemattadassanatoti** vā dhammadhātuvemattadassanato. Sabbāpi hi cariyā dhammadhātupariyāpannā evāti. **Payogaṃ anādiyitvāpi** santatimahāmatādīnaṃ (dha. pa. 142) viya. **Dibbacakkhuññānubhāvato pattabbenāti** ettha dibbacakkhunā parassa hadayavatthusannissayalohitavañṇadassanamukhena tadā pavattamānacittajānanatthaṃ parikkammaṃ nāma sāvakaṇaṃ, tañca kho ādikammikānaṃ, yato dibbacakkhuññānubhāvato cetopariyaññānaṃ pattabbatā siyā, buddhānaṃ pana yadihi āsavakkhayaññādhigamato pageva dibbacakkhuññādhigamo, tathāpi tathā parikkammaṃ natthi vijjāttayasiddhiyā sijjhanato. Sesābhīññāttaye cetopariyaññānaṃ dibbacakkhuññādhigamena pattanti ca

vattabbataṃ labhatīti tathā vuttanti daṭṭhabbāṃ.

**Puna evarūpiṃ vācaṃ na vakkhāmīti** cittaṃ uppādentō taṃ vācaṃ pajahati nāma. Vācāya pana so attho pākaṭo hotīti “**vadanto**”ti vuttaṃ. **Diṭṭhiṃ na gaṇhissāmīti** diṭṭhiggāhapaṭikkhepo. Diṭṭhiyā anuppādanaṃ pajahanamevāti āha “**pajahanto**”ti. So ariyūpavādī **niraye ṭhapitoyeva**, nāssa nirayūpapattiyā koci vibandho ekamsiko ayamatthoti adhippāyo.

**Assāti** ekamsikabhāvassa. Sikkhāhi sīlasamādhipaṇṇāhi, tadatthāya vipassanāya ca vinā aññārādhanaṃ asambhavato “**lokiyalokuttarā sīlasamādhipaṇṇā veditabbā**”ti vatvā puna āsannatare sīlādike dassento “**lokuttaravaseneva vinivattetumpi vaṭṭati**”ti āha, tasmā aggamaggapariyāpannā sīlādayo veditabbā. Aggamaggaṭṭhassa hi diṭṭheva dhamme ekamsikā aññārādhanaṃ, itaresaṃ anekamsikāti. Sampajjanaṃ **sampadā**, nipphattīti attho, tasmā **evaṃsompadanti** evaṃnavirajjhanakanipphattikanti vuttaṃ hoti. Tenāha “**imampi kāraṇa**”ntiādi. Tattha **kāraṇanti** yutti. Tatrāyaṃ yuttiniddhāraṇā “nirayūpago ariyūpavādī tadādāyassa avijjamānato seyyathāpi micchādiṭṭhī”ti. Ettha ca “taṃ vācaṃ appahāyā”tiādivacanena tadādāyassa appahānena ca ariyūpavādo antarāyiko anantthāvaho ca, pahānena pana accayaṃ desetvā khamāpanena anantarāyiko atthāvaho ca yathā taṃ vuṭṭhitā desitā ca āpattīti dasseti.

Dasabalaññaṇavaṇṇanā niṭṭhitā.

### Catavesārajjaññaṇavaṇṇanā

**150.** Byāmoḥabhayaṃ (a. ni. ṭi. 2.4.8) saraṇapariyesanaṃ sārājjanaṃ sārādo, byāmoḥabhayaṃ, vigato sārādo etassāti visārādo, tassa bhāvo **vesārajjaṃ**. Taṃ pana ñāṇasampadaṃ pahānasampadaṃ desanāvisesasampadaṃ khemaṃ nissāya pavattaṃ catubbidhaṃ paccavekkhaṇaṇaṃ. Tenāha “**catūsu ṭhānesū**”tiādi. **Dassitadhammesūti** vuttadhammesu. Vacanamattameva hi tesāṃ, na pana dassanaṃ tādissasseva dhammassa abhāvato. Bhagavatā eva vā “ime dhammā anabhisambuddhā”ti parassa vacanavasena **dassitadhammesu**. “Dhammapaṭisambhidā”tiādisu (vibha. 718) viya **dhamma**-saddo hetupariyāyoti āha “**sahadhammenāti sahetunā**”ti. **Hetūti** ca upapattisādhanaḥetu veditabbo, na kārako sampāpako ca. **Appamāṇanti** anidassanaṃ. Nidassanañhi anvayato byatirekato pamāṇaṅgatāya “pamāṇa”nti vuccati. **Nimittanti** codanāya kāraṇaṃ. Tattha codako codanaṃ karotīti **kāraṇaṃ**, dhammo codanaṃ karoti etenāti **kāraṇaṃ**. Tenāha “**puggalopī**”tiādi. **Khemanti** kenaci appaṭibandhiyabhāvena anupaddutaṃ.

Antarāyo etesaṃ atthi, antarāyevā yuttāti **antarāyikā**. Evaṃbhūtā pana te yasmā antarāyakaṃ nāma honti, tasmā āha “**antarāyaṃ karontīti antarāyikā**”ti. Asañcicca vītikkamo na tathā sāvajjoti katvā vuttaṃ “**sañcicca vītikkantā**”ti. **Satta āpattikkhandhātiādi** nidassanamattaṃ itaresampi catunnaṃ “antarāyikā”ti vuttadhammānaṃ tabbhāve byabhicārābhāvato. **Idha pana methunadhammo adhippetoti** idaṃ aṭṭhuppattivasena vuttaṃ **ariṭṭhasikkhāpadaṃ** (pāci. 417-422) viya. Yasmā taṅkhaṇampi kāmesu (a. ni. ṭi. 2.4.8) ādīnavaṃ disvā viratto (a. ni. ṭi. 2.4.8) hoti ce, visesaṃ adhigacchati, na kāmesu āsatto, tasmā vuttaṃ “**methunaṃ...pe... antarāyo hoti**”ti. Tattha **yassa kassacīti** na kevalaṃ pabbajitasseva, atha kho yassa kassaci. Tathā hi vuttaṃ “methunamanuyuttassa, mussatevāpi sāsana”nti. **Tasmim aniyānikadhammeti** tasmim parena parikappitaṇiyānikadhammanimittaṃ. Nimittatthe hi idaṃ kammaṃyoge bhumaṃ.

Catavesārajjaññaṇavaṇṇanā niṭṭhitā.

### Aṭṭhaparisavaṇṇanā

**151.** Purisassa sūrataraḥbhāvo nāma saṅgāme pākaṭo hoti, na gehe nisinnakāle, evaṃ vesārajjaññaṇassa ānubhāvo paṇḍitaparisāsu yattha katthacīti dassento “**vesārajjaññaṇassa**

**baladassanatta**”nti āha. **Sannipatitvā nisinnaṭṭhānanti** ṭhānasīsenā sannipatitakhattiyaparissimeva dasseti. **Eveva nayo sabbatthāti** atidesena āvibhāvitamattham dassetuṃ “**māarakāyikāna**”ntiādi vuttam sadisatthavisayattā atidesassa. Yathā hi khattiyānaṃ samūho khattiyaparissāti ayamattho labbhati, na evaṃ “māraparisā”ti ettha, mārasa parisāti pana māraparisāti ayamattho adhippeto. Tenāha “**māarakāyikānaṃ...pe... na mārāna**”nti. **Māarakāyikānanti** mārapakkhiyānaṃ. **Uggaṭṭhānadassanavasena**ti sārājjitabbaṭṭhānadassanavasena, evaṃ ugga khattiyā attano puññatejenāti adhippāyo. **Brāhmaṇā tisu vedesūti** idaṃ itaresaṃ avisayadassanavasena vuttam. Vede sajjhāyantāpi hi khattiyā vessā ca tadatthavicāraṇāya yebhuyyena asamatthā evāti. Kasmā panettha yāmādi parisā na gahitāti? Bhusaṃ kāmābhigiddhatāya yonisomanasikāravirahato. Yāmādayo hi ulāruḷāre kāme paṭisevanta tathābhigiddhatāya dhammassavanāya sabhāvena cittampi na uppādentī, mahābodhisattānaṃ pana buddhānaṃ ānubhāvena ākaḍḍhiyamānā kadāci tesam payirupāsanaḍḍhi karonti tādisse mahāsamaye. Teneva hi vimānavatthudesanāpi tannimittā bahulā nāhosi. Manussānaṃ vasenāyaṃ katā.

Paracakkavāḷesu ca manussānaṃ visesādhigamo natthīti pucchati “**kiṃ pana bhagavā aññāni cakkavāḷāni pi gacchati**”ti. Itaro yadipi tesam ariyadhammādhigamo natthi, vāsānāya pana tattha gantvā dhammaṃ desetīti dassento “**āmagacchati**”ti āha. **Keyūraṃ** nānāvidharatanaparissibbitasuvaṇṇajālavinaddham bhujābharaṇaṃ. **Aṅgadaṃ** nānāgandhagandhitam, kevalam vā suvaṇṇamayam bāhuvalayam. **Chinnassarāti** dvidhābhūtassarā (dī. ni. ṭī. 2.172) **gaggarassarāti** gaggarikāya viya gaggarāyamānakharassarā (dī. ni. ṭī. 2.172; a. ni. ṭī. 3.8.69). **Bhāsantaranti** tesam bhāsam (dī. ni. ṭī. 2.172; a. ni. ṭī. 3.8.69) sandhāyāha. “**Vīmaṃsā uppajjati**”ti saṅkhepato vuttam vivarituṃ “**idaṃ vuttam hoti**”tiādi vuttam.

**Saṅgammāti** samāgantvā. Ādito lāpo **ālāpo**, vacanapaṭivacanasena samam lāpo **sallāpo**. Sammā, samaññā vā kathā saṃkathā, saṃkathāva **sākkacchā**.

Atṭhaparisaṃvaṇṇanā niṭṭhitā.

### Catuyonivaṇṇanā

**152.** Yavanti tāya sattā amissitāpi samānajātītāya missitā viya hontīti **yoni**. Sā pana atthato aṇḍādiuppattitṭhānavisiṭṭho khandhānaṃ bhāgaso pavattivisesoti āha “**khandhakoṭṭhāso yoni nāmā**”ti. **Aṇḍe jātāti** paṭhamāya jātiyā vasena vuttam, dutiyāya pana aṇḍato, aṇḍe vā bhijjamāne jātāti evamattho veditabbo. Tenāha “**abhinibbhijja jāyanti**”ti. **Vināti** etehi aṇḍādīhi bāhirapaccayehi vinā. **Uppatitvā viyāti** uppajjanavasena patitvā viya. Bāhirapaccayanirapekkhattāyeva vā upapatane sādhuḷāriṇo upapātikā, te eva idha **opapātikāti** vuttā. **Ādi**-saddena gabbhamale nibbattamahāpadumakumārādīnaṃ saṅgaho. Nijjhāmatanḥikapetānaṃ niccaṃ dukkhāturatāya kāmasevanā natthi, tasmā te gabbhaseyyakā na hontī, jālavantatāya na tāsam kucchiyaṃ gabbho saṅṭhāti, tasmā te opapātikāyeva saṃsedajattāyapi asambhavato. **Nerayikā viyāti** nidassanāpadesena tesampi opapātikattaṃ dīpeti. **Avasesāti** nijjhāmatanḥikanerayike ṭhapetvā avasesā vinipātikā. Yakkhānaṃ cātumahārājikatāya opapātikabhāve eva āpanne taṃ nivattetuṃ “**evaṃ yakkhāpi**”ti vuttam. Tathā hi te na bhummadevā na ca vinipātikāti.

Catuyonivaṇṇanā niṭṭhitā.

### Pañcagativaṇṇanā

**153. Gantabbāti** upapajjitabbā. Yathā hi kammabhavo paramatthato asatipi kārake paccayasāmaggiyā siddho taṃsamaṅginā santānalakkhaṇena sattena katoti voharīyati, tathā upapattibhavalakkhaṇā gatiyo paramatthato asatipi gamake taṃtaṃkammavasena yesam tāni kammāni, tehi gantabbāti voharīyantīti. Evaṃ saddatthato gatiṃ dassetvā atthuddhāranayenapi taṃ dassetuṃ “**apicā**”tiādi vuttam. Yesu nirayādibhedesu upapattibhavesu gati-saddo nirūḷho, tato aññatthāpi

gatisaddappavatti atthi, taṃ ekena gati-saddena visesetvā āha “**gatigati**”ti yathā “**dukkhadukkhaṃ, (saṃ. ni. 4.327) rūparūpa**”nti (visuddhi. 2.449) ca. Uppādāvattāya gamanaṃ upagamananti “**nibbattigati**”ti vuttā. **Gatinti** cittagatiṃ. Tenāha “**ajjhāsayaḡati nāma**”ti, ajjhāsayaḡappavattīti attho. **Tadaṭṭhakathāyaṃ** (ma. ni. aṭṭha. 2.503) pana “**gatinti nipphatti**”nti attho vutto. Brahmanimantanasutte (ma. ni. 1.503) hi ayaṃ pālīti. **Jutinti** ānubhāvaṃ. **Vibhavoti** vināso. So hi vigamoti atthena gati. Teneva **nibbānaṃ arahato gatīti** (pari. 339) anupādisesanibbānaṃ arahato gati vigamo vibhavoti anekatthattā dhātūnaṃ. **Dveveva gatiyoti** dveva nipphattiyoti atthoti āha “**ayaṃ nipphattigati nāma**”ti.

Yassa uppajjati, taṃ brūhento eva uppajjati ayo, sukhaṃ. Natthi ettha ayoti **nirayo**. Tato eva ramitabbaṃ assādetabbaṃ tattha natthīti dassento āha “**niratiatthena nirassādaṭṭhena nirayo**”ti. **Tiriyāṃ aṅcītāti** devamanussādayo viya uddhaṃ dīghā ahutvā tiriyāṃ dīghābhi attho. Pakatṭhato sukhato ayaṃ apagamo **peccabhāvo**, taṃ peccabhāvaṃ **pattānaṃ visayoti** petayonimeva vadati. **Manaso ussannattāti** satisūrabhāvabrahmacariyayogyatādiguṇavasena upacitamānasatāya ukkaṭṭhaguṇacittatāyāti atto. Ayaṃ panattho nippariyāyato jambudīpavāsīvasena veditabbo. Yathāha – “**tīhi, bhikkhave, ṭhānehi jambudīpikā manussā uttarakuruke manusse adhiggaṇhanti deve ca tāvatimse. Katamehi tīhi? Sūrā satimanto idha brahmacariyavāso**”ti (a. ni. 9.21). Tehi pana samānarūpādītāya saddhiṃ parittadīpavāsīhi itaramahādīpavāsīnopi manussāteva paññāyimsu. Lokiyā pana “**manuno apaccabhāvena manussā**”ti vadanti. Ayamettha saṅkhepo, vitthāro pana paramatthadīpaniyaṃ **vimānavatthusaṃvaṇṇanāyaṃ** (vi. va. aṭṭha. 3) vuttanayena gahetabbo. **Ānubhāvehīti** devānubhāvasaṅkhātehi iddhivisesehi. Tattha kāmā devā kāmaguṇehi ceva iddhivisesehi ca itare iddhivisesehiva **dibbanti** kīlanti jotanti, saraṇanti vā gammanti, abhitthaviyantīti vā **devāti**.

**Tiracchānayaniṅcātīdīsūti** ettha tiracchānayanipettivisaḡaggahaṇena khandhānaṃ eva gahaṇaṃ tesāṃ tādīsassa paricchinnassa okāsassa abhāvato. Yattha vā te araṅṅasamuddapabbatādīke nibaddhavāsaṃ vasanti, tādīsassa ṭhānassa vasena okāsopi gahetabbo. Nirayūpagādīhi sattehi maggitabbato **maggo** paṭipajjitabbā **paṭipadā** cāti taṃ taṃ kammameva vuttanti āha “**ubhayenapi**”tiādi. **Yathā ca paṭipannoti** iminā tassa kammassa katūpacitākāramāha. Ettha ca **nirayagāmiṅca maggaṃ nirayagāmiṅca paṭipadanti** iminā sādharāṇato nirayasāṃvattaniyaṃ kammaṃ vatvā puna taṃ taṃ santānapatitāyā asādharāṇataṃ dassetuṃ “**yathāpaṭipanno**”tiādi vuttanti daṭṭhabbaṃ. **Vinipatantīti** vivasā, virūpaṃ vā nipatanti. Kasmā panettha paṅcagatiparicchadakaṅṅaṇaṃ dassento bhagavā “**nibbānaṅcāha**”ntīādimāhāti anuyogaṃ sandhāyāha “**idaṃ panā**”tiādi. Na hi bhagavā attano buddhasubuddhataṃ vibhāvento sāvasesaṃ katvā desanaṃ deseti.

Paṅcagativaṇṇanā niṭṭhitā.

### Ñānapavattākāraṇaṇā

**154. Ñānapavattākāraṇanti** ñānaṃ pavattīākāraṃ, ñānaṃ vā pavattīpakāraṃ. **Ekantadukkhāti** ekantena dukkhā accantadukkhā. Tā pana sabbakālaṃ dukkhā sukhālayenapi asammissāti dassento āha “**niccadukkhā nirantaradukkhā**”ti. **Bahalāti** atanukā, mahantāti attho. **Tibbāti** vā tikhiṇā. **Kharāti** kakkhaḷā. **Kaṭukāti** vā anīṭṭhā. Kassati khaṅṅiyatīti **kāsu**, āvāṭo. Kasīyati cīyatīti **kāsu**, rāsi. **Phunantīti** dvīhi hatthehi aṅgārāni ukkhipitvā paṭivātaṃ ophunanti, tena tesāṃ sakalasarīraṃ ḡayhati. Tenāha “**paridaḡḡhagattā**”ti. Purisappamāṇaṃ **porisaṃ. Ekapathenevāti** ekamaggabhūteneva. **Anukkamanīyenaṅti** ukkamituṃ apakkamituṃ asakkuṇeyyena.

Nanu ca dibbacakkhuṅṅaṇaṃ paccuppannavāṇṅārammaṇaṃ, tena kathaṃ rūpantarasaṃgiṃ niraye nibbattasattaṃ “**ayaṃ so**”ti jānātīti codanaṃ sandhāyāha “**tattha kiṅcāpi**”tiādi. Yathākammūpagaṅṅaṇena “**ayaṃ so**”ti sallakkheti, tassa pana dibbacakkhuṅṅaṇena pattabbattā “**dibbacakkhubalaṃ nāma etanti** vuttaṃ.



**Purimanayenevāti** “gūthakūpo viya tiracchānayani daṭṭhabbā”tiādīnā aṅgārakāsupamāyaṃ vuttanayeneva. Dukkā vedanā bahulā etāsūti **dukkhabahulā. Bahalapattapalāsoti** aviraḷatanuvipulapaṇṇo. Sukhaparibhogaṃ mahāpāsādaṃ dassetuṃ “**dīghapāsādo**”ti vuttaṃ caturassapāsādādīnaṃ khuddakattā. **Uṇṇāmayaattharaṇenāti** uṇṇāmayaalohitaattharaṇena. Uttaraṃ uparibhāgaṃ chādetīti **uttaracchado**, vitānaṃ. Taṃ pana lohitavitānaṃ idhāhippetanti “**rattavitānenā**”ti vuttaṃ.

**Aparabhāgayojanāti** pāliyaṃ “aparena samayenā”ti vuttassa aparabhāgassa yojanā. Sā pana ekadesena purimabhāge vutte eva suviññeyyā hotīti “**yathā so**”tiādīmāha. **Maggāruḷhamevāti** maggaṃ upagatamattameva.

**Niyamābhāvāti** “dibbacakkhunāva passatī”ti niyamassa abhāvā. “**Dibbacakkhunāpi passissatī**”ti idaṃ na anuttarasukhānubhavanassa dibbacakkhugocarattā vuttaṃ, anāgatassa pana tassa dibbacakkhuparibhaṇḍabhūtena anāgataṃsaññāna dāssanamevāti kāraṇūpacārena vuttaṃ. Pāliyaṃ pana “cetasā ceto paricca pajānāmi”cceva vuttaṃ. “**Atthato pana nānā hoti**”ti saṅkhepatō vuttamatthaṃ vivarituṃ “**devalokasukhaṃ hī**”tiādīṃ vatvā yathā dāssitaupamāhipi ayamattho pākaṭṭo evāti dassento “**upamāyampi**”tiādīmāha. Gotrabhuññāpādato paṭṭhāya nirodhaṃ passitvā uppannamaggaphalapaccavekkhaṇavasena ceva parato phalasaṃpattisaṃpajjanavasena ca ariyasāvako nirodhe sayito viya hoti tadapassayeneva pavattanatoti āha “**nirodhasayanavaragata**”nti. Tenāha “**nibbānā...pe... passatī**”ti.

Ñānapavattākāraṇaṇā niṭṭhitā.

### Dukkarakārikādisuddhivaṇṇanā

**155.** Pucchānusandhiādiānusandhittayato aññattā “**pāṭiyekkaṃ anusandhivasenā**”ti vuttaṃ. Na kevalaṃ “**dukkarakārikāya suddhi hoti**”ti evaṃladdhiko eva, atha kho dukkaracārīsu abhippasannoti dassetuṃ “**apicā**”tiādī vuttaṃ. **Catukunḍikoti** dvīhi pādehi hatthehīti catūhi aṅgehi kuṇḍanako āhiṇḍanako. **Chamānikīṇṇanti** bhūmiyaṃ khittāṃ. **Bhakkhasanti** āhāraṃ.

Macchariyamalādīpāpadhammavigamanato mettādiguṇānubrūhanato ca brahmaṃ seṭṭhaṃ cariyanti **brahmācariyaṃ**, dānaṃ. Tathā hi taṃ bhagavatā paṇḍitapaññattaṃ vuttaṃ. Evaṃ sesesupi yathārahaṃ brahmācariyapariyāyo niddhāretvā vattabbo. **Kinti** kīdisaṃ. **Vatanti** samādinnavataṃ. **Suciṇṇassāti** suṭṭhu ciṇṇassa puññaṃ. **Iddhīti** ānubhāvo. **Jutīti** vatthābharaṇobhāsasamuḷḷalā sarīrapabbhā. **Balavīriyūpapattīti** kāyabalena ceva ussāhena ca samannāgamo.

**Tena pāṇi kāmādadoti** tena addhikānaṃ upagacchantānaṃ hatthaṃ pasāretvā asayhasēṭṭhino dānaṭṭhānadassanamayena puññaṃ idāni mayhaṃ hattho kapparukkho viya kāmādadō icchicchitadāyī, kāmādadō honto ca madhussavo iṭṭhavatthuvissajjanako jāto. **Tena me brahmācariyenāti** tena mama yathāvuttakāyaveyyāvāṭiyakammasaṅkhātena seṭṭhacariyena. **Puññanti** puññaṃphalaṃ. Tampi hi puḷḷasabhāvato, uttarapadalopena vā “evamidaṃ puññaṃ pavaḍḍhatī”tiādīsū (dī. ni. 3.80) “puñña”nti vuccati.

Pañca sikkhāpadāni samāhaṭṭāni **pañcasikkhāpadaṃ** yathā “tibhavaṃ, tisakaṭṭa”nti ca. **Brahmācariyasanti** dhammadesanāya. Sā hi vineyyānaṃ brahmābhāvāvahanato brahmaṃ seṭṭhaṃ cariyaṃ, brahmuno vā bhagavato vācasikaṃ cariyanti “brahmācariya”nti vuccati.

**Sahassaṃ maccuhāyīnanti** sahassamattā arahattasamadhigamena maccuvisayātikkaṃena maccupahāyino jātā. **Brahmācārī bhavissāmāti** ettha yena brahmācariyena te brahmācārīnanti vuccanti, taṃ brahmācariyaṃ niddhāretvā āha “**methunavirati brahmācariyanti vuttā**”ti.

**Nātikkamāmāti** na aticarāma agamanīyaṭṭhānepi itarattḥāpi na vītikkamāma. Tenāha “**aññatra tāhi brahmacariyaṃ carāmā**”ti. **Amhanti** amhākam.

**Attadamanavasenāti** yathāpaṭiññaṃ arahantānaṃ anukaraṇākārena pavattacittadamanavasena, manacchaṭṭhānaṃ indriyānaṃ damanenāti attho. Sikhāppattaseṭṭhacariyatāya **ariyamaggo brahmacariyaṃ**. Brahmaṃ seṭṭhaṃ carati etenāti **brahmacariyaṃ**, satthusāsanaṃ.

**Ataramānānanti** na taramānānaṃ desakālaṃ udikkhantānaṃ. **Phalāsāva samijjhatīti** sudullabhaphalepi āsā sammāpayogamanvāya samijjhāti eva. **Vipakkabrahmacariyosmīti** visesena nipphannaṇāṭṭajjhāsayo paripuṇṇaṭṭarāmanoratho. So hi seṭṭhamanosamācāratāya brahmacariyapariyāyena vutto.

**Idameva suttaṃ** āgataṭṭhānanti adhippāyo tepiṭake buddhavacane idameva suttapadaṃ “vīriyaṃ brahmacariya”nti āgataṭṭhānanti attho. Vīriyañhi tasmim visaye uttamaṃ paramukkamaṃ sagataṃ tādisacariyāhetu cāti brahmacariyanti idha vuttaṃ. **Caturaṅgasamannāgatanti** catubbidhadukkarakiriyaṃ sādhaḥassa catubbidhassa attano pavattiākārassa vasena caturaṅgasamannāgataṃ.

Koci chinnabhinnapaṭapilotikadharo dasantayuttassa vatthassa abhāvato nicceloti vattabbaṃ labheyyāti taṃ nivattento āha “**naggo**”ti. **Evam akāsim**, evampi sattapīlā mā ahoṣīti adhippāyo. Yathā “abhihaṭṭaṃ na sādīyāmi”tiādi (ma. ni. 1.155) bhikkhāpariyesane ukkaṭṭhacāritādassanaṃ, evaṃ “naehi bhaddantikādibhāvopī”ti gahetabbaṃ. **Purisaragatāyāti** purisasamīpagatāya. Saṃkittiyanti etāyāti **saṃkitti**, gāmaṃvāsīādīhi samudāyavasena kariyamānakiriyaṃ. Idha pana bhattasaṃkitti adhippetāti āha “**saṃkittetvā katabhattesū**”ti. Dadanti tāyāti **datti**. Ekāhaṃ antarabhūtaṃ etassa atthīti **ekāhikaṃ**. Esa nayo sesapadesupi. **Ekāhavārenāti** ekāhikavārena. “Ekāhika”ntiādinā vuttavidhimeva paṭipāṭiyā pavattabhāvaṃ dassetaṃ puna vuttaṃ. Tenāha “**iti evarūpa**”ntiādi.

**Erakatiṇādīni vāti** erakatiṇādīni ganthitvā katanivāsanaṃ chavadussāni, nihīnadussānīti attho. **Tantāvutānanti** tantaṃ pasāretvā vītānaṃ. **Pakatikaṇṭaketi** salākakaṇṭake.

**156. Nekavassagaṇasañjātanti** anakavassasamūhasañjātaṃ. Nanu ca idāneva “sāyatatiyakampi udakorohanānuyogamanuyutto”ti vuttaṃ, “nekavassagaṇikaṃ rajojallaṃ kāye sannicita”nti ca, tadubhayaṃ ekasmim kathaṃ sambhavatīti āha “**idaṃ attano rajojallakavatasamādānakālaṃ sandhāya vadatī**”ti. Eteneva “acelako homi”ti vuttaacelakapaṭiññā, “sāñānīpi dhāremi”tiādinā vuttachannakapaṭiññā, tatthāpi sāṇa-masāṇa-chavadussādi-nivattha-paṭiññā ca aviruddhāti daṭṭhabbā tasmim tasmim kāle tathā tathā paṭipannatā. **Teti** acelakā. **Saṅghātanti** sabbaso ghātaṃ. Tenāha “**vadha**”nti. **Sīlavā nāma natthi** “anabhisandhikampi pāpaṃ hotī”ti evaṃ laddhikattā. **Sīlaṃ adhiṭṭhāyāti** idaṃ paṭikkamanakiriyaṃ sandhāya vuttaṃ.

**Pāsaṇḍapariggahaṇatthāyāti** pāsaṇḍesu asārasārabhāvavīmaṃsanatthāya. **Taṃ pabbajjanti** ājīvakaṃpabbajjaṃ. **Vikaṭabhojaneti** vikatabhojane virūpabhojane. Tenāha “**apakatibhojane**”ti.

**157. Bhimsanakatasminti** bhāvasādhanabhāvī idaṃ padanti āha “**bhimsanakatasmim bhimsanakakiriyaṃ**”ti. “Bhimsanakatasmī”nti vattabbe ekassa ta-kārassa lopo daṭṭhabbo. Yebhuyyaggahaṇaṃ lomavantavasenaṃ yojetabbaṃ, na lomavasenaṃ āha “**bahutarānaṃ vā**”tiādi.

Su-sadde u-kārassa o-kāraṃ katvā pāliyaṃ “**sotatto**”ti vuttanti tadatthaṃ vivaranto “**sutatto**”ti āha. Suṭṭhu avatattoti vā **sotatto**. **Sosinnoti** etthāpi eseṃ nayo. **Suddhivasanattāyāti** saṃsārasuddhigavesanattāya.

**Vihārasminti** paccatte bhummavacananti āha “**vihāro eva hi ‘vihārasmi’nti vutto**”ti. **Teneva cāti** teneva vibhattivipallāsavasena. **Evam atthoti** ayam evam līngavipallāsavasena attho veditabbo. Dukkappattoti ānetvā sambandho. **Sabbatthāti** sukhadukkhe lābhālābhādike ca. **Tulitoti** tulāsadiso.

Dukkarakārikādisuddhivaṇṇanā niṭṭhitā.

### Āhārasuddhivaṇṇanā

**158. Sujjhitunti** saṃsārato sujjhitum.

**159. Āsītikapabbānīti** āsītikapiṭṭhipabbāni, “kālapabbānī”ti vadanti. Pabbānaṃ **majjhe. Unnatunnatānīti** maṃse milāte dvinnam sandhīnam antare vātenuddhumātadhamanījālatāya unnatāni unnatānīti. **Ānisadanti** ānisadaṭṭhānam. **Nisinnatṭhānanti** paṃsūhi, vālikāhi vā nicitam nisinnatṭhānam. **Saraponkhenāti** sarassa poṅkhappadesena, saraponkhasaññitena vā maggena. **Akkantanti** akkantaṭṭhānam. Takkagoḷikasadisānam, sarīraghaṃsanattham kata kuruvindagoḷakānam vā **āvali** vaṭṭanāhāro. **Vaṃsatoti** piṭṭhivaṃsato. **Maṇḍaleti** bhittipādānam matthake ṭhapitamaṇḍalake sīsaggena **patiṭṭhahanti. Na evam phāsuḷiyoti** yathā yathā vuttagopānasiyo papatā tiṭṭhanti, na evam bodhisattassa phāsukāpi papatā ṭhitā.

**Okkhāyikāti** avakkhāyikā, heṭṭhā hutvā ninnabhāvena paññāyamānā. **Evarūpāti** yathāvuttarūpā, ninnatarāti attho. **Yāva piṭṭhikaṇṭakam allīnā hotīti** mayham udaracchavi yāva piṭṭhikaṇṭakam, tāva tam āhacca ṭhitattā allīnā hoti udariyassa parikkhayena antānañca suṭṭhumilātātāya. **Bhāriyabhāriyāti** garutarā. Sahadaracchaviṃ piṭṭhikaṇṭakam, sahapiṭṭhikaṇṭakam udaracchavinti yojanā. **Neva nikkhamati** āhārasannissayaāpodhātuyā sabbaso visukkhattā. **Pūtimūlānīti** lomamūlānam paribrūhanake maṃse lohite ca parikkhīṇe tāni sukkhāni ṭhānato bhaṭṭhāni abhāveneva “pūtimūlānī”ti vuttāni. Tenāha “**tassa panā**”tiādi.

**Adhigatāti** idāni adhigatā. **Yathā etarahi vipassanāpaññāya adhigatattāti** iminā kiñcāpi mahābodhisattā paripākagataññā vasiḃhūtajjhānābhīññā vipassanāya parikkammaṃ karonti, yathā ca nesam carimabhava vipassanācāro, na tathā tadāti dasseti. **Etadevāti** yaṃ yena vuttam atthajātam, etadeva **ettha** etasmim pāṭhapadesa **yuttam** pubbenāparam avirujjhanato. **Itarathāti** bhikkhūhi vuttappakārena **ananurūpo siyā** “imissā”ti vuttāya aññatte.

Āhārasuddhivaṇṇanā niṭṭhitā.

### Saṃsārasuddhiādivaṇṇanā

**160. Saṃsārenāti** aparāparam cavanupapajjanavasena bhavesu saṃsaraṇena. Yaṃ sandhāya vuttam –

“Khandhānañca paṭipāṭi, dhātuāyatanāna ca;  
Abbocchinnaṃ vattamānā, saṃsāroti pavuccatī”ti. (visuddhi. 2.619; dī. ni. aṭṭha. 2.95; saṃ. ni. aṭṭha. 2.2.60; a. ni. aṭṭha. 2.4.199; dha. sa. aṭṭha. nidānakathā; vibha. aṭṭha. 226; su. ni. aṭṭha. 2.523; udā. aṭṭha. 39; itivu. aṭṭha. 14, 58; theragā. aṭṭha. 1.67, 99; bu. vaṃ. aṭṭha. 58; cūḷani. aṭṭha. 6; paṭi. ma. aṭṭha. 2.1.117; visuddhi. mahāṭi. 1.127; a. ni. ṭi. 2.4.9; sāratta. ṭi. 1.1);

**Bahukanti** bahukālam bahukhattum. **Upapajjitvāti** tattha tattha bhava nibbattivā. **Āvāsenāti** tasmim tasmim sattāvāse āvasanena nibbattivā jīvanena. **Khandhāyeva vuttā** tesamyeva pavattivisesassa tena tena pariyāyena vuttattā. **Bahuyāgeti** ajasūkaragomāyvādike bahuvidhe

mahāyaññe. **Bahuaggī**ti vācāpeyyādivasena antamaso pākayaññādivasena ca bahukepi aggī paricaraṇena.

161. Bāladārakopi “daharo”ti vuccatīti tato visesanattham **“yuvā”**ti vuttam. Atikkantapaṭhamavayā sattā sabhāvena palitasirā hontīti paṭhamavaye ṭhitabhāvaṃ dassetuṃ **“susukāḷakeso”**ti vuttam. **Jarājīṇṇoti** jarāya jīṇṇo, na akālikena jarāya abhibhūto. Ukkamsagatabuddhatāya **vuddho**. Tenāha **“vaḍḍhitvā ṭhitaṅgapaccaṅgo”**ti, ārohapariṇāhavasena vuddhirahitoti attho. **Jātimahallakoti** jātiyā mahallako, na bhogaparivārādīhīti attho. **Addhagatoti** ettha **addha**-saddo dīghakālavācīti āha **“bahuaddhānam gato”**ti. **Vayoti**ādipadalopenāyaṃ niddesoti āha **“pacchimavaya”**nti. **Padasatampi...pe... samatthātī**ti padasatampi padasahassampi sotapaṭhamāgacchantameva uggahaṇasamatthātā pariggahetuṃ samatthātā. Ayañca gatiyā byāpāroti sakkā viññātuṃ gahaṇamattabhāvato. **Tadevāti** padasatampi padasahassampi. **Ādhāraṇam** apilāpanavasena hadaye dhāraṇam. **Upanibandhanam** yathā na pamuṭṭham hoti, tathā upecca aparāparam nibandhanam. Ayam pana satiyā byāpāroti sakkā viññātuṃ. Pāḷiyañca “paramāya gatiyā ca satiyā ca dhitiyā cā”ti vuttam, parato ca “evam adhimattagatimanto”ti vuttam. **Samatthavīriyam dhiti nāmā**ti visiṭṭhavisayaṃ dassento yathāvuttasatisamāyogaṃ tassa dīpeti. **Tassāti** yathāvuttagatisatidhīti subhadhātavacīparicitassa pariyattidhammassa āgamavasena atthadassanasamatthātā yuttivasena kāraṇadassanasamatthātā.

Daḷham (a. ni. ṭī. 3.9.38) thiraṃ dhanu etassāti daḷhadhanvā, so eva idha **“daḷhadhammā”**ti vutto. Paṭisattavidhamanattam dhanuṃ gaṇhātīti **dhanuggaho**, so eva usuṃ saraṃ asati khipatīti **issāsoti** āha **“dhanuṃ gahetvā ṭhito issāso”**ti. Dvisahassapalaṃ lohādībhāraṃ vahituṃ samattham **dvisahassathāmaṃ**. Tenāha **“dvisahassathāmaṃ nāmā”**tiādi. **Daṇḍeti** dhanudaṇḍe. **Yāva kaṇḍappamāṇā**ti dīghato yattakaṃ kaṇḍassa pamāṇam, tattake dhanudaṇḍe ukkhittamatte āropito ceva hoti jiyādaṇḍo, so ca bhāro pathavito muccati, evam idam “dvisahassathāmaṃ nāma dhanūti daṭṭhabbam. **Uggahitasippoti** uggahitadhanusippo. **Katahatthoti** thiratarāṃ lakkhesu avirajjhanasarakkhepo. Idiso pana tattha vasībhūto katahattho nāma hotīti āha **“cinṇavasībhāvo”**ti. Kataṃ rājakulādīsu upecca asanaṃ etena so **katūpāsanoti** āha **“rājakulādīsu dassitasippo”**ti. **Evam katanti** evam antosusirakaraṇādīnā sallahukam kataṃ.

**Oloketīti** udikkhati. **Evam santepi tesam vāro paññāyatīti** tesam bhikkhūnaṃ “ayam paṭhamam pucchati, ayam dutiya”ntiādinā pucchanavāro tādisassa paññavato paññāyati sukhumassa antarassa labbhanato. **Buddhānam pana vāroti** idise ṭhāne buddhānam desanāvāro aññesaṃ napaññāyanato buddhānamyeva paññāyati. Idāni tameva paññāyanatam yuttito dassento **“vidatthacaturaṅgulachāya”**ntiādimāha. Accharāsaṅghāṭamatte khaṇe aneka-koṭṭisahassa-cittapavattisambhavato **“vidatthacaturaṅgulachāyam atikkamanato puretaramyeva bhagavā...pe... kathetī”**ti vatvā tato lahutarāpi satthu desanāpavatti athevāti dassento **“tiṭṭhantu vā tāva ete”**tiādimāha. Idāni tattha kāraṇam dassetuṃ **“kasmā”**tiādi vuttam. **Soḷasa padāni kathetīti** etena lokiyajanassa ekapaduccāraṅgakkhaṇe bhagavā aṭṭhavīsasatapaḍāni kathetīti dasseti. Idāni tassapi kāraṇam dassetuṃ **“kasmā”**tiādi vuttam.

**Dhammoti** pāḷi. Pajjati attho etenāti **padam**, tadattho. Attham byañjetīti **byañjanam**, akkharam. Tañhi padavākyakkharabhāvehi paricchijjamānaṃ tam tam attham byañjeti pakāseti. Tenāha **“dhammapadabyañjananti pāḷiyā padabyañjanam, tassa tassa atthassa byañjanakam akkhara”**nti. Etena aparāparehi padabyañjanehi sucirampi kālam kathentassa tathāgatassa na kadāci tesam pariyādānam atthīti dasseti. Pañham byākaronti etenāti **pañhabyākaraṇam**, tathāpavattapaṭibhānam. Aparikkhayapaṭibhānā hi buddhā bhagavanto, yato vuttam “natthi dhammadesanāya hānī”ti (dī. ni. ṭī. 3.141, 305; vibha. mūlaṭī. 1.suttantabhājanīyavaṇṇanā). Tenāha **“iminā kim dassetī”**tiādi. Tathā āsannapariniḍḍhānassapi bhagavato desanāya itarāya ca visesātāvoti paṭhamabuddhavadānampi majjhimabuddhavadānampi pacchimabuddhavadānampi sadisameva. Āsītikavassato param **pañcamo āyukoṭṭhāso**.

162. Kāmañcetta bhagavatā nāgasamālattherassa acchariyaabbhutaṭṭapavedanamukhena attano lomānaṃ haṭṭhabhāvassa paveditattā “**lomahaṃsanapariyāyo**”ti nāmaṃ gahitaṃ, tathāpi sabbaññutaññādi-anaññasādhāraṇaṇāññānubhāva-vibhāvanādivasena soḷasasamūhato sīhanādassa nadanena desanāya pavattitattā “mahāsīhanādo” tveva saṅgītikāramahātherehi nāmaṃ ṭhapitanti daṭṭhabbaṃ.

Mahāsīhanādasuttavaṇṇanāya līnatthappakāsanā samattā.

### 3. Mahādukkhakkhandhasuttavaṇṇanā

163. **Tato paranti** tiṇṇaṃ janānaṃ upari saṅgho catuvaggakaraṇīyādikammehi paṭikammappattattā. **Gāmaṃ gatoti vuccati** gāmaṃ uddissa gatattā, evaṃ sāvattiṃ pavisituṃ viharato nikkhantā “pavisimsū”ti vuttā. **Pariññanti** pahānapariññaṃ. Sā hi samatikkamo, na itarā. **Rūpavedanāsupīti** “rūpānaṃ pariññaṃ, vedanānaṃ pariñña”nti etthāpi. Kāmaṃ sabbesaṃ titthiyānaṃ kāmādiṭṭhānaṃ paññāpanahetubhūto samayo natthi, yesaṃ pana atthi, te upādāya “**sakasamayaṃ jānantā**”ti vuttā. “Yato yato kho bho ayaṃ bhikkhu vivicceva kāmehi...pe... paṭhamaṃ jhānaṃ upasampajja viharati, ettavatā kho bho kāmānaṃ pariñña hoti”ti evaṃ sarūpato paṭhamajjhānaṃ vibhāvetuṃ asakkontāpi kevalaṃ accantappahānasaññāya **kāmānaṃ pariññaṃ paññapeyyuṃ paṭhamajjhānaṃ vadamānā**. Taṃ kissa hetu? Tādisassa āgamādhigamassābhāvato. **Rūpavedanāpariññāsupi** eseva nayo. **Vuccehāti** vucceyya. **Dutiyaṭṭhāpīti** “anusāsaniyā vā anusāsani”nti evaṃ vuttavākyepi. **Te** kira bhikkhū.

165. **Na ceva sampāyissanti** na ceva sammadeva pakārehi gamessanti ñāpessanti. Tenāha “**sampādetvā kathetuṃ na sakkhissanti**”ti. Yasmā avisaye pañho pucchito hoti, tasmā āpajjissanti yojanā. **Sadevake**ti arūpadevaggahaṇaṃ. Te hi lokiyadevehi dīghāyukatādinā ukkaṭṭhā. **Samāraketi** kāmāvacaradevaggahaṇaṃ. **Sabrahmaketi** rūpāvacarabrahmaggaṇaṃ. **Sassamaṇabrāhmaṇiyāti** ettha **samaṇaggahaṇena** pabbajite, **brāhmaṇaggahaṇena** jātibrahmaṇe, puna **devaggahaṇena** sammutideve, manussaggahaṇena avasiṭṭhamanusakāyaṃ pariyādiyati. **Lokapajaggahaṇena** pana payojanaṃ aṭṭhakathāyaṃ dassitameva. **Aññathā ārādhanā nāma natthīti** iminā kāmarūpavedanāsu assādādānaṃ yāthāvato avabodho eva ito bāhirakānaṃ natthi, kuto pavedanāti dasseti.

166. **Cittārādhananti** yāthāvapavedanena paresaṃ cittassa paritosanaṃ. **Bandhanaṭṭhena guṇāti** kāmarāgasamyojanassa paccayabhāvena vatthukāmesupi bandhanaṭṭho vutto, koṭṭhāsaṭṭho vā guṇaṭṭho daṭṭhabbo. **Tarayanti** taramānā yanti gacchanti. Atītiṭṭhābhinnapaṭhamādivayā eva cittatā rāsibhāvena vayoguṇāti gahitāti āha “**rāsaṭṭho guṇaṭṭho**”ti. **Cakkhuviññeyyāti** vā cakkhuviññānataṃdvārikaviññānehi vijānitabbā. **Sotaviññeyyāti**tiādisupi eseva nayo. **Iṭṭhārammaṇabhūtāti** sabhāveneva iṭṭhārammaṇajātikā, iṭṭhārammaṇabhāvaṃ vā pattā. **Kamaṇiyāti** kāmetabbā. **Manavaḍḍhanakāti** manoharā. Etena parikkappanātopi iṭṭhabhāvaṃ gaṇhāti. **Piyajātikāti** piyāyitabbasabhāvā. **Kāmūpasamhitāti** kāmarāgena upecca sandhāniyā sambaddhā (a. ni. ṭī. 3.6.63) kātabbāti āha “**ārammaṇaṃ katvā**”ti.

167. **Saññaṃ ṭhapetvāti** “imasmim āṅgulikādiṭṭhāpabbe gahite satam hoti, imasmim sahassa”ntiādinā saññaṇaṃ katvā gaṇanā. **Acchiddagaṇanāti** “ekam dve”tiādinā navantavidhinā nirantaragaṇanā. **Piṇḍagaṇanāti** saṅkalanapaṭuppādanādinā piṇḍitvā gaṇanā. Tenāha “**khettaṃ oloketvā**”tiādi. Kasanaṃ **kasīti** kasiggahaṇena sabbo kasipaṭibaddho jīvikūpāyo gahitoti āha “**kasīti kasikamma**”nti. **Jaṅghavaṇijjāti** jaṅghasatthavasena vaṇijjaṃ āha, **thalavaṇijjāti** sakaṭasatthavasena. **Ādi-saddena** nāvāpañādivasena vohāraṃ. **Vaṇippathoti** vaṇijjamaggo, dānaggahaṇavasena saṃvohāroti attho. Usūnaṃ asanakammaṃ **issattaṃ**, dhanusippena jīvikā, idha pana issattaṃ viyāti **issattaṃ**, sabbaāvudhajīvikāti āha “**āvudhaṃ gahetvā upaṭṭhānakamma**”nti. Porohiccāmaccaṃkammādi **rājakammaṃ**. **Ādi-saddena** rathasippakhattavijjāsippādi-vuttāvasesaṃ mahāsippaṃ khuddakasippaṃca saṅgaṇhāti. **Sītassa purakkhatoti** sītassa purato kato. Yo hi sītakāle jīvikāhetu sītalapadesaṃ

pakkhandati, so vālamigādīhi viya sītena paripātiyamāno tena purato kato viya hoti. Tenāha “**sītena bādhiyamāno**”ti. **Uṇhassa purakkhatoti** etthāpi ese va nayo. **Saritvāti** saṃsappitvā. **Ghaṭṭiyamānoti** hiṃsiyamāno bādhiyamāno. Ābādhanam **ābādho**, pīlāti attho. **Kāmahetunti** vā bhāvanapuṃsakaniddeso yathā “visamaṃ candimasūriyā parivattantī”ti (a. ni. 4.70). Tathā sesapadadvayepi. Tenevāha “**kāmānameva hetū**”ti. **Kāmānam hetūti** ettha purimapaḍāvadhāraṇamayuttaṃ tadaññapaccayapaṭikkhepāpattito, tathā uttarapaḍāvadhāraṇam kāmānam kadāci ahētubhāvassapi sambhavato, tasmā “**uppajjatiyevā**”ti vuttaṃ.

**Uṭṭhahatoti** iminā uṭṭhānavīriyam vuttanti āha “**ājīvasamuṭṭhāpakavīriyenā**”ti. **Taṃ vīriyanti** ājīvikasamuṭṭhāpakavīriyam. **Pubbenāparam ghaṭentassāti** ārambhato paṭṭhāya nirantaram pavattentassa. **Citte uppannalavasokena socatīti** cittasantāpena anto nijjhāyati. **Kāye uppannadukkhenti** tasseeva sokassa vasena kāye uppannadukkhena. Sokuddesena taṃ taṃ vipālapento vā **paridevati**. **Uraṃ tāletvāti** vakkhappadesam paharivā. “**Mogha**”ntiādi paridevanākāradassanañceva sammohāpajjanākāradassanañca. **Meti** vatvā puna **noti** puthuvacanam attano ubhayathāpi voharitabbato, byāmūlḥavacanam vā sokavasena.

**168.** Idha kāmaggaṇena viśesato vatthukāmā gahitāti kāmādiggaṇam kataṃ, nānantariyatāya pana kilesakāmopi gahito eva. **Asicammanti** ettha **cammaggaṇena** na kevalam cammamayassa, cammaparisibbitasseva vā gahaṇam, atha kho sabbassapi āvudhabādhakassa gahaṇanti dassento “**khetaḥkaphalakādīni**”ti āha. **Ādi-saddena sarādisaṅgaho**. **Dhanukalāpaṃ sannayhitvāti** dhanuñceva khurappatūñiñca sannayhitvā, dhanudaṇḍassa jiyāya tathābhāvakarāṇādipi (a. ni. ṭi. 3.5.76) dhanuno sannayhananti. Dvinnam senānam byūhasamvidhānena vā **ubhatobyūlham**. **Vijjotalantesūti** nisitapīṭaphalatāya vijjotanasena parivattamānesu.

Pākārasamīpātisaṅkhārātāya pākārapādā **upakāriyo**, yā “uddāpā”ti vuccanti. **Satadantenāti** anekasatadantakena, yassa tikhiṇadantāni anekasatāni mūlāni honti. Atibhārātāya dasavīsamattāpi janā ukkhipitum na sakkonti, yantavasena pana ukkhipitvā bandhitvā ṭhapenti. Tenāha “**aṭṭhadantākārenā**”tiādi. **Omaddantīti** oṭṭhapenti.

**169.** **Sandhimpī chindanti** corikāya jīvitukāmā. **Nillopanti** nissesavilopaṃ, ekaṃ parittaṃ gāmaṃ parivāretvā tattha kiñcīpi gayhūpagaṃ asetvā karamaraggahaṇam. Tenāha “**mahāviloḥpa**”nti. **Panthaduhanakammaṃ** aṭavimagge ṭhatvā addhikānam vilumpanam. **Pahārasādhanattham** (a. ni. ṭi. 2.2.1) daṇḍappahārassa sukhasiddhiattham. Kañjito nibbattaṃ kañjiyam, āranālam. Yam “bilaṅga”ntipi vuccati, taṃ yatha siñcati, sā **kañjiyaukkhalikā**. Bilaṅgathālikasadisakaraṇam **bilaṅgathāliyam**. **Sīsakapālam uppāṭetvāti** ayogūlapavesanappamānam chiddam katvā. **Saṅkhamuṇḍakammakāraṇanti** saṅkham viya muṇḍakammakāraṇam.

**Rāhumukhakammakāraṇanti** rāhumukhagata-sūriyasadisa-kammakāraṇam. **Jotimālikanti** jotimālavantaṃ kammakāraṇam. **Hatthapajjotikanti** hatthapajjotanakammakāraṇam. **Erakavattakammakāraṇanti** erakavattasādise sarīrato baddhe uppāṭanakammakāraṇam. **Cīrakavāsikakammakāraṇanti** sarīrato uppāṭitabaddhacīrakāhi nivāsāpanakammakāraṇam. Taṃ karontā yathā gīvato paṭṭhāya baddhe kantivā kaṭiyameva ṭhapenti, evam gopphakato paṭṭhāya kantivā kaṭiyameva ṭhapenti. **Aṭṭhakathāyam** pana “**kaṭito paṭṭhāya kantivā gopphakesu ṭhapenti**”ti vuttaṃ. **Eṇeyyakammakāraṇanti** eṇimīgasadisakammakāraṇam. **Ayavalayāni datvāti** ayavalayāni paṭimuñcitvā. **Ayasūlāni koṭṭenti** kapparaṇṇukakoṭṭisu ayasūlāni pavesenti. Nti taṃ tathākatakammakāraṇam sattaṃ.

**Baḷisamaṃsikanti** baḷisehi maṃsuppāṭanakammakāraṇam. **Kahāpaṇikanti** kahāpaṇamattaso chindanakammakāraṇam. **Koṭṭenti** chindanti. **Khārāpatacchikanti** tacchetvā khārāvāsīñcanakammakāraṇam. **Palighaparivattikanti** palighassa viya parivattanakammakāraṇam. **Ekābaddham karonti** ayasūlassa koṭṭanena. **Palālapīṭhakanti** palālapīṭhassa viya sarīrassa

saṃvellanakammakāraṇaṃ. **Kāraṇikāti** ghātanakāraṇā. **Palālavaṭṭim viya katvāti** yathā palālapīṭhaṃ karontā palālavaṭṭim katvā saṃvellanavasena naṃ (a. ni. ṭī. 2.2.1) veṭṭenti, evaṃ karontīti attho. **Chātakehīti** bubhukkhitehi koleyyakasunakhehi. Balavanto hi te javayoggā sūrā ca honti. Kammavasena sampareti etthāti samparāyo, paraloko. Tattha bhavoti **samparāyiko**.

**170.** Chandarāgo vinīyati ceva pahīyati ca etthāti nibbānaṃ **chandarāgavinayo chandarāgappahānañcāti**. Tenāha “**nibbānañhī**”ti. Tattha **āgammāti** idaṃ yo chandarāgaṃ vineti pajahati, tassa ārammaṇaṃ sandhāya vuttaṃ. **Tīhi pariññāhīti** iminā ñātatīraṇapariññāhi pariṇānissantīti netam ṭhānaṃ vijjati. Ko pana vādo pahānapariññāyāti dasseti? **Tathabhāvāyāti** pariṇānanakabhāvāya.

**171.** **Aparittenāti** ahīnena. **Vipulenāti** mahatā. Yadi vaṇṇasampattidassanatthaṃ, vaṇṇadasakaṃ kasmā na gahitanti āha “**mātugāmassa hī**”tiādi. Bhojanasampadādīnaṃ alābhepīti dassanatthaṃ “**duggatakule nibbattassapī**”ti vuttaṃ. **Thokaṃ thokaṃ vaṇṇāyatanam pasīdati** maṃsassa paribrūhanato thanamaṃsāni vaḍḍhanti jāyanti. Vaṇṇeti hadayaṅgatabhāvaṃ pakāsento viya hotīti **vaṇṇo**. So eva sāmaggopabhogādīnā nibhātīti **nibhā**. Tenāha “**vaṇṇanibhāti vaṇṇoyevā**”ti.

**Bhogganti** ativiya vaṅkatāya bhoggaṃ. Tādisaṃ pana sarīraṃ bhaggaṃ viya hotīti āha “**bhagga**”nti. Tenāha “**imināpissa vaṅkabhāvameva dīpeti**”ti. Dantānaṃ chinnabhinnatāya ekaccānaṃ patanena ca **khaṇḍitadantaṃ**. Kesānaṃ setavaṇṇatāya palitanti āha “**paṇḍarakesa**”nti. Kesānaṃ mattaso siyane khallāṭavohāroti bahuso siyanaṃ sandhāyāha “**mahākhallāṭasīsa**”nti. Vassasatikakāle uppajjanatilakāni sandhāyāha “**tilakāhatagatta**”nti. Tāni pana kānici setāni honti kānici kāḷānīti āha “**setakāḷatilakehī**”ti. **Byādhikanti** sañcātabyādhiṃ. **Bāḷhagilānanti** māraṇanti kagelaññena gilānaṃ.

**173.** **Tasmiṃ samayeti** tasmiṃ jhānaṃ upasampajja viharāṇasamaye. **Na cetetīti** na abhisandahati. Byābādhanaṭṭhena byābādho, byābādhova byābajjhaṃ, natthi ettha byābajjhanti **abyābajjhaṃ**, dukkharahitaṃ. Tenāha “**niddukkamevā**”ti.

**174.** **Aniccādiākāro**ti aniccākāro dukkhākāro vipariṇāmakāro calādiākāro ca.

Mahādukkhakkhandhasuttavaṇṇanāya līnatthappakāsanā samattā.

#### 4. Cūladukkhakkhandhasuttavaṇṇanā

**175.** **Sakkesūti** ettha yaṃ vattabbaṃ, taṃ satipaṭṭhānasuttavaṇṇanāyaṃ vuttanayeneva veditabbanti taṃ ekadesena dassento “**so hī**”ti āha. Tattha yena rājakumārā sakyā nāma jātā, yato tesam nivāsaṭṭhānatāya janapado tathā vuccati, taṃ vattabbanti āha “**sakyānaṃ pana uppatti ambaṭṭhasutte āgatāvā**”ti. **Kapilavatthūti vuttaṃ** purimasaññāvasena.

**Nānappakārakanti** “lobhadhammā”ti bahuvacanassa nimittaṃ vadati. Lobho hi tena tena avatthāvisesena pavattiākārabhedena “chando rāgotanḥā āsatti apekkhā”tiādinā anekappabhedo, lubbhanalakkhaṇena pana “lobho”tveva vuccati. Tenāha “**nānappakāraṃ lobhamyevā**”ti. Tathā “doso paṭigho kodho upanāho virodho”tiādinā, “muyhanaṃ asamapekkhanaṃ apaccavekkhaṇā dummejjhaṃ bālya”ntiādinā (dha. sa. 390) ca dosamohānaṃ nānappakāratam sandhāyāha “**itaresupi dvīsu eseva nayo**”ti. **Pariyādiyivāti** parito sabbaso ādāya. Gahetvāti ayamettha atthoti āha “**gahaṇe āgata**”nti. **Pariyādiyati**ti parikkhīṇoti. Dī-saddaṇhi saddavidū khayatthaṃ vadanti.

**Ekadāti** āmeḍitalopena niddesoti āha “**ekekasmim kāle**”ti. **Lobhadosaṃmohāti** paṭhamamaggena pahīnāvasesā lobhadosaṃmohā. **Niravasesā pahiyanti**, aññathā dutiyamaggena kiṃ kataṃ siyāti adhippāyo. Samudācarappattaṃ pana disvā “**appahīnaṃ me atthī**”**tipi jānāti**. Evaṃ kathaṃ

niravasesappahānasaññāti āha “**appahīnakaṃ...pe... saññī hotī**”ti. Evaṃ paṭhamamaggeneva samucchinnasamsayassa “ko su nāma me dhammo ajjhataṃ appahīnoti **evaṃ sandheho kathaṃ uppajjati**”ti vatvā “**paṇṇattiyā akovidattā**”ti kāraṇamāha. Vinayakukkuccaṃ viya hi paṇṇattiyam akusalatāya ariyānampi katthaci vimatimattaṃ uppajjati yathā taṃ sabbaso appahīnasammohānanti. Attano avisaye anabhijānaṃ paṇṇattikosallena kimettha payojanaṃ, paccavekkhaṇāmattena ayamatto sijjhatīti dassento “**kiṃ tassa paccavekkhaṇā natthī**”ti āha. Itaro “natthī”ti na sakkā vattunti katvā “atthī”ti vatvā tattha labbhamānavibhāgaṃ dassento “**sā panā**”tiādimāha. Tattha **sāti** paccavekkhaṇā. **Sabbesanti** sabbesaṃ ariyānaṃ. Yathā paripuñṇā na hoti, na evaṃ sabbaso na hotīti āha “**imāsu panā**”tiādi.

**176. Ajjhantanti** niyakajjhataṃ adhippetanti āha “**tava santāne**”ti. **Appahīnoti** anavasesato appahīno. **Duvidheti** vatthukāmakilesakāme. Kilesakāmopi hi yadaggena assādīyati, tadaggena paribhuñjīyati.

**177.** Assādīyatīti assādo, sukhaṃ. Appo appamattako assādo etesūti **appassādā**. Tenāha “**parittasukhā**”ti. Pariyesanadukkhādihetukaṃ diṭṭhadhammikaṃ tattha duccharitacaraṇena samparāyikañca dukkhamettha kāmesu bahukanti **bahudukkhā**. **Bahupāyāsāti** bahuparikkilesā. Te pana parikkilesā vakkhamānanayena bahūyevettha diṭṭhadhammikāpīti āha “**diṭṭhadhammika...pe... bahū**”ti. Te ca parikkilesā yasmā taṃsamaṅgino hitapaṭipattiyā antarāyakarā idha ceva paraloke ca ādīnavakāraṇaṃca pavattanti, tasmā vuttaṃ “**diṭṭhadhammika...pe... bahū**”ti. **Evaṃ cepīti** evaṃ “appassādā kāma”tiādinā ākārena. **Nayenāti** dhammena. **Kāraṇenāti** yuttiyā. Suṭṭhu diṭṭhaṃ hotīti sambandho. **Vipassanāpaññāyāti** ariyamaggapaññāya. Sā cattāripi saccāni visesato passatīti **vipassanāti** adhippetā. Tenāha “**heṭṭhāmaggadvayañānenāti attho**”ti. **Pītisukhanti** pītisukhavantaṃ jhānadvayaṃ. **Dve maggeti** heṭṭhāmagge. Āvaṭṭanasīlo ābhujanasīlo na hotīti **anāvaṭṭi neva hoti** sabbaso appahīnakāmarāgachando. Tenāha “**kasmā**”tiādi. **Orodhanāṭakā pajahanapaññāti** ādīnavānupassanāñānamāha.

**179. Assādopi kathito**, “appassādā”ti hi iminā yāvatako kāmesu assādo, taṃ sabbam anavasesato pariggahetvā cassa parittabhāvo dassitoti **ādīnavopi kathito** saṅkhepeneva sesassaādīnavassa dassitattā. **Taṃ kathetunti** taṃ nissaraṇaṃ “ekantasukhapaṭisaṃvedī”ti iminā kathetuṃ. **Imehi antehīti** “pañcime, mahānāma, kāmaguṇā”tiādinā kāmaguṇadassanamukhena kāmasukhallikānuyogaṃ “ubbhaṭṭhakā honti āsanapaṭikkhattā”tiādinā attakilamathānuyogañca dassetvā imehi dvīhi antehi muttaṃ mama sāsanti, phalasaṃpattipariyosānattā sāsanasampattiyā “**upariphalasaṃpattisīsenā sakalasāsanam dassetu**”nti āha. Gijjhasadiso kūṭoti majjhepadaloṭisaṃāso yathā “sākapathivo”ti (paṇini. 2.1.60). Dutiye panettha gijjhavantatāya gijjhā kūṭe etassāti **gijjhakūṭo**. Uddhamyeva tiṭṭhanakā nisajjāya vuṭṭhitakālato paṭṭhāya ekaṭṭhāneneva tiṭṭhanakā. Tenāha “**anisinnā**”ti. **Nigaṇṭhasāti** nāṭaputtassa. Natthi etassa parisesanti **aparisesaṃ**. Evaṃ saṅkhābhavacanamattamassāti āha “**aparisesasaṅkhāta**”nti. Niccaṭṭhena satata-saddena abhiṅghappavatti jotitā siyāti “**samita**”nti vuttaṃ. Tena nirantarappavattiṃ dassetīti evaṃ vā ettha attho daṭṭhabbo.

**180. Yaṃ karoti, taṃ jānātīti** dukkhassa nijjaraṇakhepanaṃ nāma viññūnaṃ kiccaṃ, viññūnā ca purisena katākatam jānitabbaṃ, tasmā tumhehi purāṇānaṃ kammānaṃ byantibhāvaṃ karontehi paṭhamaṃ tāva ettakāni purāṇāni kammānīti jānitabbāni, tato “ettakaṃ kālaṃ katena tapasā ettakāni tāni byantikātāni, idāni ettakāni kātabbāni”tiādinā ayaṃ vidhi purisena viya attanā kātabbakiccaṃ paricchinditabbanti dasseti. Tenāha “**tumhehipi tathā nātabbaṃ siyā**”ti. **Suddhantanti** suddhakoṭṭhāsaṃ, āyatim anavassavasiddhaṃ kammakkhayaṃ, tato vā dukkhakkhayaṃ attho. **Suddhantaṃ patto atthīti pucchati** iminā akusalānaṃ pahānaṃ, kusalānaṃ bhāvanā ca sabbena sabbam nigaṇṭhasamaye natthi sabbaso visuddhibhāvanāya abhāvato, tasmā kuto dukkhakkhayaṃ sambhavoti dasseti.

**Evaṃ ajānanabhāve satīti** “ahuvamheva maya”ntiādinā vuttappakārassa ajānane sati, tasmim



tumhehi aññāyamāneti attho. **Luddāti** ghorā. Te pana yasmā kāyavācāhi nihīnameva karonti, tasmā vuttam **“luddācārā”**ti. **Lohitapāṇitveva vuccati** tajjākiriyačaraṇato. Māgavikakevaṭṭacoraghātakādayo **māgavikādayo. Kakkhalakammāti** pharusakammā. **Te nigaṇṭhesu pabbajantīti** pubbe mahādukkhasaṃvattaniyakammassa katattā hi tumhe etarahi īdisaṃ mahādukkham paccanubhavathāti dasseti.

**Vādeti** diṭṭhiyaṃ, samayeti attho. **Sukhena sukhanti** ettha **sukhenāti** paṭipattisukhena, sukhāya paṭipattiyāti attho. **Sukhanti** vimokkhasukham, idha loke sukham adhigacchantā kasivaṇijjādidukkhapaṭipattiyāva adhigacchanti, evaṃ mokkhasukhampīti adhippāyo. Sarīrāvayavasampattiyāpi bimbino sārōti **bimbisāro. Te nigaṇṭhā...pe... sandhāya vadanti**, na pana bhagavato accantasantapaṇītam nibbānasukhapaṭivedanaṃ jānanti. **Sahasāti** ravā. **Appaṭisaṅkhāti** na paṭisaṅkhāya avicāretvā. Tenāha **“sāhasaṃ katvā”**tiādi.

Aññāhi vedanāhi avomissaṃ ekantaṃ sukham **ekantasukham**, tassa paṭisaṃvedī. Tenāha **“nirantarasukhapaṭisaṃvedī”**ti. **Kathāpatiṭṭhāpanatthanti** “ekantasukhapaṭisaṃvedī”ti evaṃ āradhakathāya patiṭṭhāpanattham. **Rājavāreti** rājānaṃ uddissa āgatadesanāvāre. **Sukham pucchitum hotīti** “yadi satta rattindivāni nappahoti, kiṃ cha rattindivāni pahoti”tiādinā pucchanasukham hoti. “Aham kho”tiādinā pavatto **suddhavāro** suddhanissandassa phalasaṃpattisukhassa vasena āgatattā. **Anacchariyaṃ hoti**, satta rattindivāni pahontassa ekasmiṃ rattindive kiṃ vattabbanti. **Uttānatthameva** vuttanayattā suviññeyyattā.

Cūladukkhakkhandhasuttavaṇṇanāya līnatthappakāsanā samattā.

## 5. Anumānasuttavaṇṇanā

**181. Vuttānusārenāti** “kurūsu, sakkesū”ti ca ettha vuttanayānusārena, “bhaggā nāma jānapadino rājakumārā”tiādinā nayena vacanatto veditabboti attho. **Vatthupariggahadivaseti** nagaramāpanattham vatthuvijjācariyena nagaraṭṭhānassa pariggaṇhanadivase. **Athāti** pacchā. **Nagare nimmiteti** tattha anantarāyena nagare māpīte. Tameva susumāragiraṇaṃ subhanimittaṃ katvā **“susumāragiri”tvevassa nāmaṃ akamsu**. Susumārasaṅṭhānattā susumāro nāma eko giri, so tassa nagarassa samīpe, tasmā taṃ susumāragiri etassa atthīti **“susumāragiri”**ti vuccatīti keci. **Bhesakaḷāti** vuccati ghammaṇḍagacchaṃ, keci “setarukha”nti vadanti, tesam bahulatāya pana taṃ vanam bhesakaḷāvananteva paññāyittha. **Bheso** nāma eko yakkho ayuttakārī, tassa tato galītaṭṭhānatāya taṃ vanam **bhesakaḷāvanam** nāma jātanti keci. **Abhayadinnatṭhāne jātam** virūḷham, saṃvaddhanti attho.

**Ichāpetīti** yaṃ kiñci attani garahitabbaṃ vattum sabrahmacārīnaṃ icchaṃ uppādeti, tadatthāya tesam attānaṃ vissajjetīti attho. Paṭhamaṃ dīno hitūpadeso **ovādo**, aparāparaṃ dīno **anusāsani**. Paccuppannātītavīsayo vā **ovādo**, anāgatavīsayo **anusāsani**. Otīṇnavatthuko **ovādo**, itaro **anusāsani**. **So cāti** evaṃ pavāretā so bhikkhu. Dukkham vaco etasmiṃ vipaṭikūlaggāhe vipaccanīkasāte anādare puggaleti **dubbaco**. Tenāha **“dukkhena vattabbo”**ti. **Upari āgatehīti** “pāpiccho hoti”tiādinā (ma. ni. 1.181) āgatehi soḷasahi pāpadhammehi. Pakārehi āvahaṃ padakkhiṇaṃ, tato padakkhiṇato gahaṇasīlo padakkhiṇaggāhī, na padakkhiṇaggāhī **appadakkhiṇaggāhī. Vāmatoti** apasabyato, vuttavipariyāyatoti adhippāyo.

**Asantasambhāvanapatthanānanti** asantehi avijjamānehi guṇehi sambhāvanassa patthanābhūtaṃ. Paṭi-saddo paccattikapariyāyo, pharaṇaṃ vāyamaṇaṃ idha tathāvaṭṭhānanti āha **“paṭippharatīti paṭiviruddho paccanīko hutvā tiṭṭhatī”**ti. **Apasādetīti** khipeti tajjeti. Tathābhūto ca paraṃ ghaṭṭento nāma hotīti āha **“ghaṭṭeti”**ti. **Paṭiāropetīti** yādisena vutto, tassa paṭibhāgabhūtaṃ dosaṃ codakassa upari āropeti.

**Paṭicaratīti** (a. ni. ṭī. 2.3.68) paṭicchādanavasena carati pavattati, paṭicchādanattho eva vā carati-

saddo anekatthattā dhātūnanti āha “**paṭicchādeti**”ti. **Aññenaññanti** paṭicchādanākāradassananti āha “**aññena kāraṇenā**”tiādi. Tattha **aññaṃ kāraṇaṃ vacanaṃ vāti** yaṃ codakena cuditakassa dosavibhāvanaṃ kāraṇaṃ, vacanaṃ vā vuttaṃ, tato aññeneva kāraṇena, vacanena vā paṭicchādeti. **Kāraṇenāti** codanāya amūlikabhāvādiṇi yuttiyā. **Vacanenāti** tadatthabodhanena. **Ko āpannoti**ādinā codanaṃ avissajjetvā vikkhepāpajjanaṃ aññenaññaṃ paṭiccarāṇanti dasseti, bahiddhā kathāapanāmanaṃ vissajjetvāti ayameva tesam vireso. Tenāha “**itthannāma**”ntiādi.

Apadīyanti dosā etena rakkhīyanti, lūyanti, chijjantīti vā **apadānaṃ**, (a. ni. ṭi. 2.3.2) sattānaṃ sammā, micchā vā pavattapayogo. Tenāha “**attano cariyāyā**”ti.

**183. Anuminitabbanti** anu anu minitabbo jānitabbo. **Attānaṃ anuminitabbanti** ca idaṃ paccatte upayogavacanaṃ. Tenāha “**anuminitabbo tuletabbo tīretabbo**”ti. **Attānaṃ anuminitabbanti** vā attani anumānaññaṃ pavattetabbaṃ. Tatrāyaṃ nayo – appiyabhāvāvahā mayi pavattā pāpicchatā pāpicchābhāvato parasmim pavattapāpicchatā viya. Esa nayo sesadhammesupi. Aparo nayo – sabrahmacārīnaṃ piyabhāvaṃ icchantena pāpicchatā pahātabbā sīlavisuddhihetubhāvato attukkaṃsanādippahānaṃ viya. Sesadhammesupi eseva nayo.

**184. Paccavekkhitabboti** “na pāpiccho bhavissāmi, na pāpikānaṃ icchānaṃ vasaṃ gato”tiādinā pati pati divasassa tikkhattuṃ vā ñāṇacakkhunā avekkhitabbaṃ, ñāṇaṃ pavattetabbanti attho. Pāpicchatādinā pahānaṃ pati avekkhitabbaṃ, ayañca attho tabba-saddassa bhāvattatāvasena vedītabbo, kammattatāvasena pana **aṭṭhakathāyaṃ “attāna**”nti paccatte upayogavacanaṃ katvā vuttaṃ. **Sikkhantenāti** tissopi sikkhā sikkhantena. Tenāha “**kusalesu dhammesū**”ti.

**Tilakanti** kāḷatilasetatilādīlakam. **Sabbappahānanti** sabbappakārapahānaṃ. **Phale āgateti** phale uppanne. **Nibbāne āgateti** nibbānassa adhigatattā. **Bhikkhupātimokkhanti** “so samaṇo, sa bhikkhū”ti evaṃ vuttabhikkhūnaṃ pātimokkhaṃ, na upasampannānaṃ eva na pabbajitānaṃ evāti daṭṭhabbaṃ. Yasmā cidaṃ bhikkhupātimokkhaṃ, tasmā vuttaṃ “**idaṃ divasassa tikkhattu**”ntiādi. **Apaccavekkhituṃ na vaṭṭati** attavisuddhiyā ekantahetubhāvato.

Anumānasuttavaṇṇanāya līnatthappakāsanā samattā.

## 6. Cetokhilasuttavaṇṇanā

**185.** Ceto tehi khilayati thaddhabhāvaṃ āpajjatīti **cetokhilā**. Tenāha “**cittassa thaddhabhāvā**”ti. Yasmā tehi uppannehi cittaṃ uklāpījātaṃ thānaṃ viya amanuññaṃ khettaṃ viya ca khāṇukanicitaṃ amahapphalaṃ hoti. Tena vuttaṃ “**kacavarabhāvā khāṇukabhāvā**”ti. “Cittassā”ti ānetvā sambandhitabbaṃ. **Cittaṃ bandhitvāti** tañhāpavattibhāvato kusalacārassa avasaracajanavasena cittaṃ baddhaṃ viya samorodhetvā. Tenāha “**muṭṭhiyaṃ katvā viya gaṇhanti**”ti. Saddatthato pana ceto virūpaṃ nibandhīyati saṃyamīyati etehīti **cetaso vinibandhā** yassa catubbidhaṃ sīlaṃ akhaṇḍādibhāvappattiyā suparisuddhaṃ visesabhāgiyattā appakasireneva maggaphalāvahaṃ mahāsaṅgharakkhitattherassa viya, so tādisena sīlena imasmim dhammavinaye vuddhim āpajjissatīti āha “**sīlena vuddhi**”nti. Yassa pana ariyamaggo uppajjanto virūlhamūlo viya pādapo suppatiṭṭhito, so sāsane virūlhim āpannoti āha “**maggena virūlhi**”nti. Yo sabbaso kilesanibbānappatto, so arahā sīlādīdhammakhandhapāripūriyā sativepullappatto hotīti āha “**nibbānena vepulla**”nti. Dutiyavikappe attho vuttanayānusārena vedītabbo.

Buddhānaṃ dhammakāyo viya rūpakāyopi anaññasādhāraṇatāya anuttaraguṇādhiṭṭhānatāya ca apaccakkhakarīnaṃ saṃsayavatthu hotiyevāti “**sarīre vā guṇe vā kaṅkhati**”ti vuttaṃ. Tattha yathā mahāpurisalakkhaṇena anubyañjanādayo rūpakāyaguṇā gahitā eva honti avinābhāvato **“dvattimsavaralakkhaṇappaṭimaṇḍita**”micceva vuttaṃ, evaṃ anāvaraṇaṇānaṃ sabbepi anantāparimeyyabhedā dhammakāyaguṇā gahitā eva hontīti **sabbaññutaññāṇaggaṇameva** kataṃ

nānantariyabhāvatoti daṭṭhabbam. **Kaṅkhabhīti** “aho vata te guṇā na bhavēyyuṃ, bhavēyyuṃ vā”ti patthanuppādanavasena kaṅkhati. Purimo hi viparītajjhāsayo, itaro yathābhūtañāñajjhāsayo. **Vicinantoti** vicayabhūtāya paññāya te vivecetukāmo tadabhāvato kiccham dukkham āpajjati, kicchappatti ca tattha nicchetuṃ asamatthāyevāti āha “**vinicchetuṃ na sakkoti**”ti. Vigatā cिकicchāti **vicिकicchā**. **Adhimokkham na paṭilabhatīti** “evameta”nti okappanavasena guṇesu vinicchayaṃ nādhigacchati. **Otaritvāti** nāñena anupavisitvā. **Pasīditunti** “pasannarūpadhammakāyaguṇehi bhagavā”ti pasīdituṃ. **Anāvilo** akālusso hotuṃ **na sakkoti**. “Kaṅkhati”ti iminā dubbalā vimatī vuttā, “vicिकicchati”ti iminā majjhimā, “nādhimuccatī”ti iminā balavatī, “na sampasīdatī”ti iminā tividhāyapi vimatīyā vasena uppannacittakālussiyaṃ vuttanti daṭṭhabbam.

**Ātappāyāti**ādito tapati santapati kileseti **ātappam**, ārambhadhātu, tadatthāya. **Anuyogāyāti** yathā saṃkilesadhammānaṃ avasaro na hoti, evaṃ anu anu yuñjanaṃ **anuyogo**, nikkamadhātu, tadatthāya. Tenāha “**punappunam yogāyā**”ti. **Sātaccāyāti** yathā uparūpari visesādhigamo hoti, tathā satatassa nirantarapavattassa anuyogassa bhāvo **sātaccam**, parakkamadhātu, tadatthāya. **Padhānāyāti** santamevaṃ tividhadhātusamvaḍḍhitānubhāvaṃ sabbakilesaviddhamsananasamattham padhānasankhātam vīriyaṃ, tadatthāya. Ettha ca ātappāya cittaṃ na namati yathāvuttakaṅkhāvasena, pageva anuyogādiatthanti dassetuṃ cattāripi padāni gahitāni, anavasesavisesadassanattham vā. Keci pana “ātappavevacanāneva anuyogādīpadānī”ti vadanti. Ettāvatā bhagavā sathari kaṅkhāya cittaṃ thaddhakacavarakhāṇukabhāvena akusalabhāvādiāpādanato cetokhilabhāvaṃ dasseti. Sesesupi e seva nayo.

Sikkhāggahaṇena paṭipattisaddhammassa gahitattā vuttaṃ “**pariyattidhamme ca paṭivedhadhamme cā**”ti. Pariyattidhamme yathā kaṅkhāya sambhavo, taṃ dassetuṃ “**caturāsīti dhammakhandhasahassānī**”tiādi vuttaṃ. Tayidaṃ nidassanamattaṃ daṭṭhabbam paramparāya paṭivedhāvahabhāvādivasenaapi ekaccānaṃ tattha samsayuppattito. Yathā ca paṭivedhe kaṅkhā vuttā, evaṃ adhigamadhammepi pavattatīti veditabbā. Tathā hi ekacce “kasiṇādibhāvanāya jhānāni ijjhantī”ti vadanti. “Kasiṇanissando āruppāti, mettādinissando catutthabrahmavihāro”ti evamādinā kaṅkhatīyevāti. Ettha ca navalokuttaresu paññattiyāmyeva kaṅkhāpavatti veditabbā asaṃkilesikattā lokuttaradhammānaṃ.

**Evarūpanti** edisaṃ suppaṭipatti-ujuppaṭipatti-nāyappaṭipatti-sāmīcippaṭipatti-sāṅkhātam sammāpaṭipadam. **Adhisīlasikkhā**dayo lokuttaradhammassa anudhammabhūtā veditabbā. Evañhi maggaphalasikkhāhi imāsaṃ viseso siddho hoti. Tathā hi vuttaṃ “sikkhāggahaṇena paṭipattisaddhammassa gahitattā”ti. Ettha ca yathā vicिकicchā vatthuttayassa sikkhāya ca guṇesu anadhimuccanaasampasīdanavasena appaṭipattibhāvato cittaṃ thaddhabhāvo āsappanaparisappanavasena pavattiyā kacavarakhāṇukabhāvo ca, evaṃ sabrahmacārīsu āghātaçaṇḍikkādivasena cittaṃ thaddhabhāvo ca upahananavirujjhanādivasena kacavarakhāṇukabhāvo ca veditabbo. Ariyaçaṅghavisayā vicिकicchā, puggalavisayā kāci natthīti saṅghavisayāva gahitā, sāsanikavasena cāyaṃ cetokhiladesanāti sabrahmacārīvisayova kopo gahito.

**186.** Yathā vatthukāmo, evaṃ kilesakāmopi assādanīyo evāti “**kilesakāmeṇī**”ti vuttaṃ. Tenāha bhagavā “rūpaṇhā loke piyarūpaṃ sātārūpaṃ, etthesā taṇhā uppajjamānā uppajjati, ettha nīvisamānā nīvisatī”tiādi (dī. ni. 2.400; ma. ni. 1.133; vibha. 203). **Kāmaniddese** (mahāni. 1) sabbepi tebhūmakā dhammā kāmaṇīyaṭṭhena “**kāmā**”ti vuttā, balavakāmarāgavatthubhūtāyevettha kāmaggaṇena gahitāti. Vinibaddhavatthubhāvena yathā viṣuṃ attano kāyo gahito, tathā paresaṃ tathārūpā rūpadhammā samūhaṭṭhenāti āha “**rūpeti bahiddhārūpe**”ti. Yathā hi pañcakāmaguṇiko rāgo jhānādivisesādhigamassa vinibaddhāya saṃvattati, evaṃ attano kāye apekkhā bahiddhā ca sakaparikkhārañātīmittādīsu apekkhāti. Keci panettha “rūpeti rūpajjhāne”tiādinā papañcenti. Tadayuttaṃ jhānādhigamavinibaddhānaṃ sīlassa ca saṃkilesabhūtānaṃ cetovinibaddhabhāvena gahitattā.

**Yāvadatthanti** yāva attheti abhikaṅkhati, tāva. Tenāha “**yattakaṃ icchati, tattaka**”nti. Nti yāvadatthaṃ udarapūraṃ bhuttaṃ. **Avadehanato** pūraṇato. **Seyyasukhanti** seyyaṃ paṭicca uppajjanakasukhaṃ. **Passasukhanti** passānaṃ samparivattanena uppajjanakasukhaṃ. **Niddāsukhanti** niddāyanena uppajjanakasukhaṃ.

**Sīlenāti**di patthanākāradassanaṃ. **Vatasamādānanti** dhutaṅgādivatānuṭṭhānaṃ. **Tapoti** vīriyārambho. So hi kilesānaṃ tapanatṭhena niggaṇhanaṭṭhena **tapacaraṇanti** vuttaṃ.

**189. Chandaṃ nissāyāti** chandaṃ dhuraṃ, chandaṃ jeṭṭhakaṃ, chandaṃ pubbaṅgamaṃ katvā pavattivāsena chandaṃ nissāya. Jeṭṭhakaṭṭhena padhānabhūtā, padhānabhāvaṃ vā pattāti **padhānabhūtā. Tehi dhammehīti** chandanissayena pavattasamādhinā ceva “padhānasāṅkhāro”ti vuttavīriyena ca. **Upetanti** sampayuttaṃ. Ijjanatṭhena **iddhi**, nipphattiatṭhena paṭilābhatṭhena cāti attho, tassā **iddhiyā pādaṃ** pādaṃ padaṭṭhānabhūtaṃ. Atha vā ijjhanti tāya iddhā vuddhā ukkaṃsagatā hontūti **iddhi**, sāva uparivisesānaṃ adhiṭṭhānabhāvato **pādo**. Tenāha “**iddhibhūtaṃ vā pādanti iddhipāda**”nti. **Sesesupīti** vīriyiddhipādādisupi. **Assāti** iddhipādassa. **Attho dīpitoti** dīpanatṭhaṃ kataṃ, tasmā **visuddhimaggasaṃvaṇṇanāyaṃ** (visuddhi. mahāṭī. 2.369) tassa atthavicāro gahetabbo. Iddhipādānaṃ samādhipadhānattā vuttaṃ “**vikkhambhanappahānaṃ kathita**”nti. Tesam tesam kusaladhammānaṃ anuppannānaṃ uppādanakiriyaṃ uppānnānaṃ paribrūhanakiriyaṃ ussahanato **ussolhī**, thāmapattā parakkamadhātu. Sā pana catunnaṃ iddhipādānaṃ visesapaccayabhūtā te upādāya “**pañcamī**”ti vuttā, sā ca yasmā samathavipassanābhāvanāsu tattha caādimaṃjhapariyosānesu sādhetabbaṃ vīriyaṃ, tasmā āha “**ussolhīti sabbattha kattabbavīriyaṃ dassetī**”ti. Pubbhāgiyasamathavipassanāsādhanaṃ pahātabbadhammavibhāgena bhinditvā āha “**pañca cetokhilappahānāni pañca vinibandhappahānāni**”ti. **Bhoboti** yutto arahati nipphattiyā. **Nānenāti** maggañānena. **Kilesabhedāyāti** kilesānaṃ samucchindanāya. **Khemassāti** anupaddavassa.

**Sambhāvanattheti** (sārattha. ṭī. 1.11; a. ni. ṭī. 3.7.71) “api nāmevaṃ siyā”ti vikappanatto sambhāvanatto. Evaṃ hīti evaṃ ekameva saṅkhyāṃ avatvā aparāya saṅkhyāya saddhiṃ vacanaṃ loke siliṭṭhavacanaṃ hoti yathā “dve vā tīṇi vā udakaphusitāni”ti. **Sammā adhisayitānīti** pādāṭhī attanā nesam kiñci upaghātaṃ akarontiyā bahivātādi parissayapariharaṇatṭhaṃ sammadeva upari sayitāni. **Utum gāhāpentiyāti** tesam allasinehapariyādānatṭhaṃ attano kāyusmāvasena utum gaṇhāpentiyā. Tenāha “**usmīkatāni**”ti. **Sammā paribhāvitānīti** sammadeva sabbaso kukkuṭavāsānāya vāsītāni. Tenāha “**kukkuṭagandhaṃ gāhāpitāni**”ti. Ayañca kukkuṭagandhaparibhāvanā sammāadhisayanasammāparisedananipphattiyā “**anunipphādī**”ti (sārattha. ṭī. 1.11) daṭṭhabbā. Tehi pana saddhiṃyeva ijjanato vuttaṃ “**tividhakiriyaṅkaraṇenā**”ti. Kiñcāpi na evaṃ “aho vatime”tiādinaṃ icchā uppajjeyya, kāraṇassa pana sampādītattā atha kho bhabbāva abhinibbhijjuntūti yojanā. Kasmā bhabbāti āha “**te hi yasmā tāyā**”tiādī. Ettha yathā kapālassa tanutā ālokassa anto paññāyamānassa kāraṇaṃ, tathā kapālassa tanutāya nakhasikhāmukhatuṅḍakānaṃ kharatāya ca allasinehassa pariyādānaṃ kāraṇavacananti daṭṭhabbaṃ, **tasmāti** ālokassa anto paññāyamānato, sayañca paripākagattā.

**Opammasamapaṭipādananti** opammatṭhassa upameyyena sammadeva paṭipādanaṃ. **Atthenāti** upameyyatṭhena. Yathā kukkuṭiyā aṅḍesu tividhakiriyaṃ karaṇaṃ kukkuṭacchāpakānaṃ aṅḍakosato nikkhamanassa mūlakāraṇaṃ, evaṃ bhikkhuno ussolhīpannasāni aṅḍāni avijjaṅḍakosato nikkhamanassa mūlakāraṇanti āha “**tassā kukkuṭiyā...pe... samannāgatabhāvo**”ti. Paṭicchādanasāmaññena avijjāya aṅḍakosasadisatāya balavavipassanāvasena avijjaṅḍakosassa tanubhāvo, vipassanāññānassa pariṇāmakālo vuṭṭhānagāminibhāvāpatti, tadā ca sā maggañānagabbhaṃ dhārentī viya hotūti āha “**gabbhaggahaṅkālo**”ti. **Abhiññāpakketi** lokiyābhiññāpakke. Lokuttarābhiññā hi avijjaṅḍakosaṃ padālikāti. **Gāthāya avijjaṅḍakosaṃ paharāṭīti** desanāvīlāsena vineyyasantānagataṃ avijjaṅḍakosaṃ ghaṭṭeti, yathāṭhāne ṭhātuṃ na deti.

**Paṭisaṅkhānappahānanti** tadaṅgappahānapubbakaṃ vikkhambhanappahānaṃ. Pubbhāgiyā

iddhipādā pāliyaṃ gahitāti “**iddhipādehi vikkhambhanappahāna**”nti vuttaṃ.  
 “Ussolhipannarasaṅgasamannāgato bhikkhu bhabbo abhinibbidāyā”tiādivacanato (ma. ni. 1.189)  
 lokuttariddhipādā pana sambodhaggahaṇeṇeva gahitā. **Magge āgate**  
 ussolhipannarasaṅgasamannāgatassa bhikkhuno vipassanaṃ ussukkāpayato magge āgate uppanne,  
 pāliyaṃ vā abhinibbidāsambodhaggahaṇehi **magge āgate. Phale āgate** etthāpi vuttanayena attho  
 veditabbo. Nibbānassa pana pāliyaṃ anāgatattā nissaraṇappahānaṃ na gahitaṃ. Sesam  
 suviññeyyameva.

Cetokhilasuttavaṇṇanāya līnatthappakāsanā samattā.

## 7. Vanapatthapariyāyasuttavaṇṇanā

**190.** Vanīyati vivekakāmehi bhajīyati, vanute vā te attasampattiyā vasanattāya yācanto viya hotīti  
 vanam, patiṭṭhanti ettha vivekakāmā yathādhippetavisesādhigamenāti pattham, vanesu pattham  
 gahanattāne senāsanam **vanapattham**. Pariyāyati attano phalam pariggahetvā vattatīti **pariyāyo**,  
 kāraṇanti āha “**vanapatthapariyāyanti vanapatthakāraṇa**”nti. Vanapatthañhi tam upanissāya  
 viharato upanissayakāraṇam. Tenāha “vanapattham upanissāya viharatī”ti. Pariyāyati  
 desetabbamattham patiṭṭhpetīti **pariyāyo**, desanā. Vanapattham ārabba pavattā desanā  
**vanapatthadesanā**, tam, ubhayatthāpi vanapatthaggahaṇam lakkhaṇamattam gāmādīnampettha  
 kāraṇabhāvassa, desanāya visayabhāvassa ca labbhamānattā.

**191.** Nissāyati apassāya, vivekavāsassa apassayaṃ katvāti attho. **Na upaṭṭhātī**tiādihi tasmiṃ  
 vanapatthe senāsanasappāyābhāvaṃ, utupuggaladhammassavanasappāyābhāvampi vā dasseti.  
**Jīvitasambhārati** (a. ni. ṭī. 3.9.6) jīvitappavattiyā sambhārā paccayā. **Samudānetabbāti** sammā nīyena  
 anavajjauñchācariyādinā uddham uddham ānetabbā pāpuṇitabbā. Te pana tathā samudānitā samāhaṭā  
 nāma hontīti āha “**samāharitabbā**”ti. **Dukkheṇa uppajantīti** sulabhuppādā na honti. Etena  
 bhojanasappāyādiabhāvaṃ dasseti. **Rattibhāgam vā divasabhāgam vāti** bhummatthe  
 upayogavacananti āha “**rattikoṭṭhāse vā divasakoṭṭhāse vā**”ti. **Rattiṃyeva pakkamitabbam**  
 samaṇadhammassa tattha anipphajjanato.

**192-3. Saṅkhāpīti** “yadatthamahaṃ pabbajito, na metaṃ idha nipphajjati, cīvarādi pana  
 samudāgacchati, nāham tadattham pabbajito, kiṃ me idha vāsenā”ti paṭisaṅkhāyapi. Anantaravāre  
**saṅkhāpīti** “yadatthamahaṃ pabbajito, tam me idha nipphajjati, cīvarādi pana na samudāgacchati,  
 nāham tadattham pabbajito”ti paṭisaṅkhāyapīti attho. Tenāha “**samaṇadhammassa**  
**nipphajjanabhāvaṃ jānitvā**”ti.

**195-7. So puggalo anāpucchā pakkamitabbam, nānubandhitabboti** “so puggalo”ti padassa  
 “nānubandhitabbo”ti iminā sambandho. Yassa yena hi sambandho, dūraṭṭhenapi so bhavati. **Tam**  
**puggalanti** “so puggalo”ti paccattavacanam upayogavasena pariṇāmetvā tam puggalam anāpucchā  
 pakkamitabbanti attho. Atthavasena hi vibhattivipariṇāmoti. **Tam āpucchā pakkamitabbanti** etthāpi  
 eseva nayo. **Āpucchā pakkamitabbanti** ca kataññutakataveditāya niyojanam.

**198. Evarūpoti** yaṃ nissāya bhikkhuno guṇehi vuddhiyeva pāṭikaṅkhā, paccayehi ca na parissamo,  
 evarūpo daṇḍakammādīhi niggaṇhāti cepi, na pariccajitabboti dasseti “**sacepi**”tiādinā.

Vanapatthapariyāyasuttavaṇṇanāya līnatthappakāsanā samattā.

## 8. Madhupiṇḍikasuttavaṇṇanā

**199. Jātivanti** sayamjātam vanam. Tenāha “**aropima**”nti. **Paṭisallānatthāyati** ekībhāvatthāya,

puthuttārammaṇato vā cittaṃ paṭinivattetvā accantasante nibbāne phalasaṃpattivasena allīyāpanattham. Daṇḍo pāṇimhi assāti **daṇḍapāṇi**. Yathā so “daṇḍapāṇi”ti vuccati, taṃ dassetuṃ “**ayaṇhī**”tiādi vuttaṃ. **Daṇḍavittatāyā**ti daṇḍe soṇḍatāya. So hi daṇḍapasuto daṇḍasippe ca sukusalo tattha pākaṭo paññāto, tasmā daṇḍam gahetvāva vicarati. **Jaṅghākilamathavinodanattanti** rājasabhāya ciranisajjāya uppannajaṅghāparissamassa apanayanattham. **Adhiccanikkhamanoti** yādicchakanikkhamano, na abhiñhanikkhamano. **Olubbhāti** sannirumbhitvā ṭhito. Yathā so “olubbhā”ti vutto, taṃ dassetuṃ “**gopālakadārako viyā**”tiādi vuttaṃ.

**200.** Vadanti etenāti **vādo**, diṭṭhīti āha “**kiṃ vādīti, kiṃ diṭṭhiko**”ti? **Kimakkhāyīti** kimācikkhako, kīdisadhammakatho? **Acittikārenāti** anādarena. Tathāpucchane kāraṇam dassento “**kasmā**”tiādimāha. **Nassatetanti** nassatu etaṃ kulam.

**Attham na jānātīti** attham ce ekadesena jāneyya, taṃ micchā gahetvā paṭippharivāpi tiṭṭheyya. Tassa dīgharattam ahitāya dukkhāyāti tadassa atthajānanam bhagavatā icchitam. **Viggāhikakathanti** viggahakatham, sārambhakathanti attho. Nanu bhagavatā saddhim loke puthū samaṇabrāhmaṇā nānāvādā santīti codanam sandhāyāha “**tathāgato hī**”tiādi. **Na vivadati** vivādahetukānam kāmadiṭṭhijhosānānam maggeneva samugghātittā, tadabhāvato pana **loko tathāgatena vivadati**. Dhammavādī yathābhūtavādī dhammavādīhi na vivadati tesam vivaditukāmatāya eva abhāvato, adhammavādī pana tiṇāyapi namaññamāno tehi kiñci vivadati. Tenāha “**na, bhikkhave, dhammavādī kenaci lokasmiṃ vivadati**”ti (saṃ. ni. 3.94). Adhammavādī pana asamucchinnavivādahetukattā vivadateva. Tathā cāha “**adhammavādīva kho, bhikkhave, vivadati**”ti.

**Yathā ca panāti** ettha **yathā**-saddo “yathā ca anuppanassa kāmaccchandassa uppādo hoti, tañca pajānāti”tiādīsu (a. ni. 3.122) viya kāraṇattho āha “**yena kāraṇenā**”ti. Kāraṇākāro vā idha yathā-saddena vutto, so pana atthato kāraṇamevāti vuttaṃ “**yena kāraṇenā**”ti. “Idam katham idam katham”ti pavattanato kathamkathā, vicikicchā. Sā yassa natthi, so akathamkathī, taṃ **akathamkathim**. Vipparisārukkuccam bhagavatā anāgāmmimaggeneva chinnaṃ, hatthapādakukkuccam aggamaggena āveṇikadhammādhigamato. Aparāparaṃ uppajjanakabhavo “**bhavābhavo**”ti idhādhippetoti āha “**punappunabbhave**”ti. Saṃvarāsaṃvaro phalāphalam viya khuddakamahanto bhavo “**bhavābhavo**”ti vuttoti āha “**hīnapaṇīte vā bhavo**”ti. Bhavo vuḍḍhippato “**abhavo**”ti vuccati yathā “asekkhā dhammā”ti (dha. sa. 11.tikamātikā). **Kilesasaññāti** kāmasaññādike vadati. Kilesā eva vā saññānāmena vuttā “saññā pahāya amatam eva pāpuṇātī”tiādīsu viya. **Attano khīṇāsavabhāvam dīpetīti** imināva paresaṅca tathattāya dhammam desetīti ayampi attho vibhāvītōti daṭṭhabbam. **Nīharitvā kīlāpetvāti** nīharitvā ceva kīlāpetvā ca, nīharaṇavasena vā kīlāpetvā. **Tivisākhanti** tibhaṅgabhākuṭi viya nalāte jātattā **nalāṭikam**.

**201.** Kinti nu khoti kiṃ kāraṇenāti attho. **Anusandhim gahetvāti** pucchānusandhim uṭṭhapetvā. **Yatonidānanti** yaṃnidānam, yaṃkāraṇāti vuttaṃ hoti. Purimāpade hi vibhatti alopaṃ katvā niddeso, chaajjhātikabāhirāyatanādīnidānanti ayameva attho. Saṅkhāyanti saṅkhābhāvena ṇāyantīti **saṅkhāti** āha “**saṅkhāti koṭṭhāsā**”ti. Kāmañcettha mānōpi papañco, abhinandanasabhāve eva pana gaṇhanto “**taṇhāmānadīṭṭhipapañcasampayuttā**”ti āha. Tathā hi vakkhati “abhinanditabba”ntiādi. **Samudācarantīti** sabbaso uddham uddham pariyādāya pavattanti. Mariyādattho hi ayamākāro, tena ca yogena **purisanti** upayogavacanam yathā “tathāgataṃ, bhikkhave, arahantaṃ sammāsambuddham dve vitakkā samudācarantī”ti (itīvu. 38). Taṇhādayo ca yathāsakaṃ pavattīākāram avilaṅghantiyo āsevanavasena uparūpari pavattanti. Tathā hi tā “papañcasāṅkhā”ti vuttā.

**Kāraṇeti** pavattipaccaye. **Ekāyatanampi ...pe... natthīti** cakkhāyatanādi ekampi āyatanam abhinanditabbam abhivaditabbam ajjhositabbañca natthi ce, nanu natthi eva, kasmā “natthi ce”ti vuttanti? Saccam natthi, appahīnābhinandanābhivadanaajjhosānānam pana puthujjanānam abhinanditabbādippakārāni āyatanāni hontīti tesam na sakkā natthīti vattu, pahīnābhinandanādīnam pana sabbathā natthīti “natthi ce”ti vuttaṃ. **Aham mamanti abhinanditabbanti** diṭṭhābhinandanāya

“aha”nti taṇhābhīnandanāya “mama”nti rocetabbaṃ. **Abhivaditabbanti** abhinivisanasamuṭṭhāpanavasena vattabbaṃ. Tenāha “**ahaṃ mamanti vattabba**”nti. **Ajjhosivāti** diṭṭhi taṇhā vatthum anupavisitvā gāhadvayaṃ anaññasādhāraṇaṃ viya katvā. Tenāha “**gilitvā pariniṭṭhapetvā**”ti. **Etenāti** “ettha ce natthī”tiādivacanena. **Etthāti** āyatanesu. Taṇhādīnaṃ avatthubhāvadassanamukhena **taṇhādīnaṃyeva appavattiṃ** kilesaparinibbānaṃ kathitanti. Tenāha bhagavā “**esevanto**”tiādi, ayameva abhinandanādīnaṃ natthibhāvako maggo, tappaṭṭipassaddhibhūtaṃ phalaṃ, taṃnissaraṇaṃ vā nibbānaṃ rāgānusayādīnaṃ anto avasānaṃ appavattīti attho. Tenāha “**ayaṃ ...pe... anto**”ti. **Sabbatthāti** “esevanto paṭighānusayānaṃ”tiādīsu sabbapadesu.

**Ādiyātīti** pahāradānādivasena gayhati. **Matthakappattaṃ kalahanti** bhaṇḍanādimate aṭṭhatvā mukhasatthi vitudanādivasena matthakappattaṃ kalaṃ. Yāya karotīti sambandho. Sesapadesupi eseva nayo. Viruddhaggāhavasena **nānāgāhamattaṃ**, tathā viruddhavādavasena **nānāvādamattaṃ**. **Evam pavattanti** garukātabbesupi gāraṃ akatvā “tuvam tuva”nti evam pavattaṃ sārāmbhakathaṃ, yāya cetanāya yaṃ karoti, sā tuvaṃ tuvaṃ. **Nissāyāti** paṭicca, nissayādipaccaye katvāti attho. Kilesānaṃ uppattinimittatā tāva āyatanānaṃ hotu tabbhāve bhāvato, nirodhanimittatā pana kathaṃ. Na hettha lokuttaradhammānaṃ saṅgaho lokiyānaṃyeva adhippetattāti codanaṃ sandhāyāha “**nirujjhamānāpī**”tiādi. Nāmamattena nimittataṃ sandhāya vuttoti dassento “**yatthuppannā, tattheva niruddhā hontī**”ti vatvā tamatthaṃ suttantarena sādheṃto “**svāyamattho**”tiādimāha.

Tattha **samudayasaccapañhenāti** mahāsatiṭṭhāne samudayasaccaniddesena. So hi “**kattha uppajjamānā**”tiādīnā pucchāvasena pavattatā pañhoti vutto. Nanu tattha taṇhāya uppattinirodhā vuttā, na sabbakilesānanti īdisī codanā anavakāsāti dassento “**yatheva cā**”tiādimāha. **Laddhavohāreti** iminā rāgādīnaṃ appavattinimittatāya antoti samaññā nibbānassāti dasseti. Eteneva abhinandanādīnaṃ abhāvoti ca idaṃ saṃvaṇṇitanti daṭṭhabbaṃ. Kathaṃ pana sabbasaṅkhatavinissaṭṭe nibbāne akusaladhammānaṃ nirodhasambhavoti āha “**yañhi yattha natthi, taṃ tattha niruddhaṃ nāma hotī**”ti. Yvāyaṃ appavattiyāṃ nirodhavohāro vutto, svāyamattho nirodhapañhena dīpetabbo. Na hi tattha uppajjitvā niruddhā vitakkavicārā paṭṭipassaddhāti vuttā, atha kho appavattā evāti.

**203. Evaṃsāmpadanti** evaṃsāmpajjanakaṃ evaṃ passitabbaṃ idaṃ mama ajjhesanaṃ. Tenāha “**īdisanti attho**”ti. **Jānaṃ jānātīti** (a. ni. ṭī. 3.10.113-116) sabbaññūtaññāṇena jānitabbaṃ sabbam jānāti. Ukkatṭhaniddesena hi avisesaggahaṇena ca “jāna”nti iminā niravasesaṃ ñeyyajātaṃ pariggaṇhātīti tabbisayāya jānanakiriyāya sabbaññūtaññāṇameva karaṇaṃ bhavitum yuttaṃ. Atha vā pakaraṇavasena “bhagavā”ti saddantarasañnidhānena cāyamattho vibhāvetabbo. **Passitabbameva passatīti** dibbacakkhu-paññācakkhu-dhammacakkhu-buddhacakkhu-samantacakkhu-saṅkhātehi ñāṇacakkhūhi passitabbaṃ passati eva. Atha vā **jānaṃ jānātīti** yathā aññe savipallāsā kāmarūpapariññāvādino jānantāpi vipallāsavasena jānanti, na evaṃ bhagavā. Bhagavā pana pahīnavipallāsattā jānanto jānāti eva, diṭṭhidassanassa ca abhāvā passanto passatiyevāti attho. **Dassanapariñāyakaṭṭhenāti** yathā cakkhu sattānaṃ dassanattaṃ pariṇeti, evaṃ lokassa yāthāvadassanasādhanaṃ dassanakiccapariñāyakaṭṭhena **cakkhubhūto**, paññācakkhumayattā vā sayambhuññāṇena paññācakkhum bhūto pattoti vā **cakkhubhūto**. **Ñāṇabhūtoti** etassa ca evameva attho daṭṭhabbo. **Dhammā vā** bodhipakkhiyā tehi uppānattā lokassa ca taduppādanato, anaññasādhāraṇaṃ vā dhammaṃ pattoti **dhammabhūto**. **Brahmā** vuccati maggo tena uppānattā lokassa ca taduppādanattā, tañca sayambhuññāṇena pattoti **brahmabhūto**. Catusaccadhammaṃ vadatīti **vattā**. Ciraṃ saccapaṭivedhaṃ pavattento vadatīti **pavattā**. **Atthaṃ nīharitvāti** dukkhādiatthaṃ tatthāpi piḷānādiatthaṃ uddharitvā. Paramatthaṃ vā nibbānaṃ pāpayitā, amatasacchikiriyāṃ sattesu uppādentō amataṃ dadātīti **amatassa dātā**. Bodhipakkhiyadhammānaṃ tadāyattabhāvato **dhammassāmī**.

**204.** So vā uddeso attanopi hotīti thero “**yaṃ kho no**”ti āha. Sabbalokasādhāraṇā hi buddhānaṃ desanāti. Idāni yehi dvārārammaṇehi purisaṃ papañcasaññāsāṅkhā samudācaranti, tāni tāva dassento papañcasaññāsāṅkhā dassetuṃ yena saḷāyatanavibhaṅgena niddeso kato, tassa atthaṃ dassetuṃ

“**cakkhuñcā**”tiādi āraddhaṃ. Tattha **nissayabhāvenāti** nissayapaccayabhāvena. Nissayapaccayo ca pasādacakkhuyeva hoti, na cuddasasambhāraṃ, catucattālīsasambhāraṃ vā sasambhāracakkhunti āha “**cakkhupasādañca paṭiccā**”ti. **Ārammaṇabhāvenāti** ārammaṇapaccayabhāvena. Ārammaṇapaccayo ca catusamuṭṭhānikarūpesu yaṃ kiñci hotīti āha “**catusamuṭṭhānikarūpe ca paṭiccā**”ti.

Ettha cakkhu ekampi viññāṇassa paccayo hoti, rūpāyatanaṃ pana anekameva saṃhatanti imassa visesassa dassanattaṃ nissayabhāvena “**cakkhupasādañca ārammaṇabhāvena catusamuṭṭhānikarūpe ca**”ti vacanabhedo kato. Kiṃ pana kāraṇaṃ cakkhu ekampi viññāṇassa paccayo hoti, rūpaṃ pana anekamevāti? Paccayabhāvavisesato. Cakkhu hi cakkhuvīññāṇassa nissayapurejātaindriyavippayuttapaccayehi paccayo hontaṃ atthibhāveneva hoti tasmīṃ sati tassa bhāvato, asati abhāvato, yato taṃ atthiavigatapaccayehissa paccayo hotīti vuccati, tannissitatā cassa na ekadesena allīyanavasena icchitabbā arūpabhāvato. Atha kho garurājādīsū sissarājapurisādīnaṃ viya tappaṭibaddhavuttitāya, itare pana paccayā tena tena visesena veditabbā.

Sacāyaṃ paccayabhāvo na ekasmiṃ na sambhavatīti ekampi cakkhu cakkhuvīññāṇassa paccayo hotīti dassetuṃ pāḷiyāṃ “**cakkhuñcāvuso, paṭiccā**”ti ekavacanavasena vuttaṃ. Rūpaṃ pana yadipi cakkhu viya purejātaatthi-avigatapaccayehi paccayo hoti puretaraṃ uppannaṃ hutvā vijjamānakkhaṇe eva upakārakatā tathāpi anekameva saṃhataṃ hutvā paccayo hoti ārammaṇabhāvato. Yañhi paccayadhammaṃ sabhāvabhūtaṃ, parikappitākāramattaṃ vā viññāṇaṃ vibhāventaṃ pavattati, tadaññesañca satipi paccayabhāve so tassa sārammaṇasabhāvātāya yaṃ kiñci anālam bhivā pavattituṃ asamattassa olubbhapavattikāraṇabhāvena ālambanīyato ārammaṇaṃ nāma, tassa yasmā yathā tathā sabhāvūpaladdhi viññāṇassa ārammaṇapaccayalābho, tasmā cakkhuvīññāṇaṃ rūpaṃ ārabha pavattamānaṃ tassa sabhāvaṃ vibhāventameva pavattati. Sā cassa indriyādhīnavuttikassa ārammaṇasabhāvūpaladdhi na ekadvikalāpagatavaṇṇavasena hoti, nāpi katipayakalāpagatavaṇṇavasena, atha kho ābhogānurūpaṃ āpāthagatavaṇṇavasenāti anekameva rūpaṃ saṃhaccakāritāya viññāṇassa paccayo hotīti dassento “**rūpe ca uppajjati cakkhuvīññāṇa**”nti bahuvacanavasena.

Yaṃ pana **paṭṭhāne** (paṭṭhā. 1.1.2 paccayaniddesa) “rūpāyatanaṃ cakkhuvīññāṇadhātuyā taṃsāmpayuttakānañca dhammānaṃ ārammaṇapaccayena paccayo”ti vuttaṃ, taṃ yādisaṃ rūpāyatanaṃ cakkhuvīññāṇassa ārammaṇapaccayo, tādisaṃ sandhāya vuttaṃ. Kīdisaṃ pana tanti? Samuditanti pākaṭoyamattho. Evañca katvā yadeke vadanti “āyatanasallakkhaṇavasena cakkhuvīññāṇādayo sallakkhaṇavisayā, na drabyasallakkhaṇavasena”ti, tampi suvuttameva hoti. Na cettha samudāyārammaṇatā āsaṅkitabbā samudāyābhogasseva abhāvato, samuditā pana vaṇṇadhammā ārammaṇapaccayā honti. Kathaṃ pana paccekaṃ asamattā samuditā ārammaṇapaccayā honti. Na hi paccekaṃ daṭṭhuṃ asakkontā andhā samuditā passantīti? Nayidamekantikaṃ visuṃ visuṃ asamattānampi sivikāvahanādīsū samattatāya dassanato. Kesādīnañca yasmīṃ ṭhāne ṭhitānaṃ paccekaṃ vaṇṇaṃ gahetuṃ na sakkā, tasmīmyeva ṭhāne samuditānaṃ taṃ gahetuṃ sakkāti bhīyyopi tesāṃ saṃhaccakāritā paribhāyā. Etena kiṃ cakkhuvīññāṇassa paramānurūpaṃ ārammaṇaṃ, udāhu taṃsamudāyotiādīkā codanā paṭikkhattīti veditabbā. “**Sotañca, āvuso, paṭiccā**”tiādīsūpi iminā nayena attho veditabbo. **Cakkhuvīññāṇaṃ nāmāti** cakkhunissitarūpavijjānanalakkhaṇaṃ cakkhuvīññāṇaṃ nāma uppajjati.

**Tiṇṇaṃ saṅgatiyāti** cakkhu, rūpaṃ, cakkhuvīññāṇanti imesaṃ tiṇṇaṃ saṅgatiyā samodhānena. **Phasso nāmāti** arūpadhammopi samāno ārammaṇe phusanākāreneva pavattanato phusanalakkhaṇo phasso nāma dhammo uppajjati. **Sahajātādivasenāti** cakkhuvīññāṇasāmpayuttāya saṃjātaaññamaññādivasena, anantarāya anantarādivasena, itarāya upanissayavasena paccayabhāvato **phassapaccayā** phassakāraṇā **vedanā uppajjati**. Anubhavanasamakālema ārammaṇassa sañjānaṃ hotīti “**tāya vedanāya yaṃ ārammaṇaṃ vedeti, tadeva saññā sañjānāti**”ti vuttaṃ. Cakkhudvārikā dhammā idhādhīpetāti tadanūsārena pana aparāparuppānānaṃ vedanādīnaṃ gahaṇe sati, yanti vā kāraṇavacanaṃ, yasmā ārammaṇaṃ vedeti, tasmā taṃ sañjānātīti attho. Na hi asati vedayite kadāci saññuppatti atthi. Sesapadesūpi eseva nayo. Saññāya hi yathāsaññātaṃ vijjamānaṃ, avijjamānaṃ vā



ārammaṇaṃ vitakkavasena parikkappeti, yathāparikkappitañca taṃ diṭṭhitaṇhāmānaññānāhi maññamāno papañcetīti vutto. Tenevāha “pathaviṃ pathavito sañjānā”ti, “pathaviṃ pathavito saññatvā pathaviṃ maññatī”tiādi (ma. ni. 1.2), “takkañca diṭṭhīsu pakappayitvā, saccam musāti dvayadhammamāhū”ti (su. ni. 892; mahāni. 121) ca. Balappattapapañcavasenevāyamatthavaṇṇanā katā, **aṭṭhakathāyaṃ** pana paridubbhalavasena.

**Cakkhurūpādīhi kāraṇehīti** cakkhuvīññānaphassavedanāsaññāvitakkehi kāraṇabhūtehi. Akāraṇabhūtānampi tesam atthitāya kāraṇaggahaṇaṃ. Pariññātā hi te akāraṇaṃ. Tenāha “**apariññātakāraṇa**”nti. Tīhipi pariññāhi apariññātavatthukaṃ. **Abhibhavanti** ajjhottharanti. **Sahajāta** **hontīti** ettha “cakkhusamphassapaccayā vedanākkhandho atthi kusalo”tiādivacanato vedanāsaññā asahajātāpi gahetabbā. **Yadi evanti** “papañcetī”ti ettha yadi pañcadvārajavanasaṃhajātā papañcasāṅkhā adhippetā tāsam paccuppannavisayattā, **kasmā atītānāgataggahaṇaṃ katanti** codeti. Itaro “**tathā uppajjanato**”tiādinā pariharati. Tattha **tathā uppajjanatoti** yathā vattamānakāle, evaṃ atītākāle anāgatakāle ca cakkhudvāre papañcasāṅkhānaṃ uppajjanato atītānāgataggahaṇaṃ kataṃ, na atītesu, anāgatesu vā cakkhurūpesu cakkhudvārikānaṃ tāsam uppajjanato.

**Manañjāvuso, paṭiccāti** ettha duvidhaṃ maṇaṃ kevalaṃ bhavaṅgaṃ, sāvajjanaṃ vā. Duvidhā hi kathā. Uppattidvārakathāyaṃ dvikkhattuṃ calitaṃ bhavaṅgaṃ manodvāraṃ nāma, cakkhādi viya rūpādīnā yena taṃ ghaṭṭitaṃ tattha upari viññānuppattiyā dvārabhāvato. Paccayakathāyaṃ sāvajjanabhavaṅgaṃ, “manosamphassapaccayā atthi kusalo”tiādisu hi sāvajjanamanosamphasso icchito, na bhavaṅgamanosamphasso asambhavato. Tattha paṭhamanayaṃ sandhāyāha “**mananti bhavaṅgacitta**”nti. **Dhammeti tebhūmakadhammārammaṇanti** iminā sabhāvadhammesu eva kilesuppattīti keci, tadayuttaṃ tadupādānāyapi paññattiyā dhammārammaṇatāya vuttattā. Idha pana tebhūmakāpi dhammā labbhantīti dassanattam “**tebhūmakadhammārammaṇa**”nti vuttaṃ, na paññattiyā anārammaṇattā. Evañcetam sampaṭicchitabbam, aññathā akusalacittuppādā anārammaṇā nāma siyūṃ. Uppattidvārakathāyaṃ cakkhuvīññānādi viya āvajjanampi dvārapakkhikamevāti vuttaṃ “**manoviññānanti āvajjanaṃ vā**”ti. Paccayakathāyaṃ pana āvajjanaṃ gahitanti “**javanaṃ vā**”ti vuttaṃ. Nayadvaye dhammānaṃ saṃhajātavibhāgaṃ dassetuṃ “**āvajjane gahite**”tiādi vuttaṃ. **Yuttamevāti** nippariyāyato yuttameva.

So yāva na paccayaṇṇavedho sambhavati, tāva paññattimukheneva sabhāvadhammā paññāyanti paccakaṃ apaññāpaneti āha “**phasso nāma eko dhammo uppajjati**”ti. **Evaṃ phassapaññattim paññāpessatīti** paññāpetvā tabbisayadassanaṃ ñānaṃ uppādessati. **Imasmiṃ sati idaṃ hotīti** imasmiṃ cakkhuādi paccaye sati idaṃ phassādikaṃ paccayuppannaṃ hoti. **Dvādasāyatanavasene**ti dvādasannaṃ āyatanānaṃ vasena āgatena paṭicasamuppādanayavasena. **Dvādasāyatanapaṭikkhepavasene**ti “imasmiṃ asati idaṃ na hotī”ti paccayābhāvapaccayuppannābhāvadassanakkame dvādasannaṃ āyatanānaṃ paṭikkhepavasena.

**Sāvakena pañho kathitoti** ayaṃ pañho sāvakena kathito, iti iminā kāraṇena mā nikkāṅkhā ahuvattha. Atha vā saṃkhittena vuttamattham vitthārena vibhajantena etadagge ṭhapitena mahāsāvakena pañho kathitoti iminā kāraṇena etasmiṃ pañhe mā nikkāṅkhā ahuvattha, heraññike sati kahāpaṇaṃ sayam nicchinantā viya ahutvā bhagavato eva santike nikkāṅkhā hotha.

**205.** Ākaronti phalaṃ tāya tāya mariyādāya nibbattenti **ākārā**, kāraṇāni. **Pāṭiyekakāraṇehīti** channaṃ dvārānaṃ vasena viṣuṃ viṣuṃ papañcakāraṇassa niddiṭṭhattā vuttaṃ. Atha vā yadipi yattakehi dhammehi yaṃ phalaṃ nibbattati, tesam samuditānaṃyeva kāraṇabhāvo sāmaggīyāva phaluppattito, tathāpi paccakaṃ tassa kāraṇamevāti katvā vuttaṃ “**pāṭiyekakāraṇehī**”ti. **Padehīti** nāmādi padehi ceva taṃsamudāyabhūtehi vākyehi ca. Tenāha “**akkharasampiṇḍanehi**”ti. Akkharāniyeva hi atthesu yathāvaccam padavākyabhāvena paricchijjanti. **Byañjanehīti** atthassa abhībyañjanato byañjanasaññītehi vaṇṇehi. Tāni pana yasmā pariyāyassa akkharānato “akkharānī”ti vuccanti, tasmā āha “**akkharehī**”ti. Ettha ca imehi ākārehi imehi padabyañjanehi papañcasamudācārassa vaṭṭassa ca vivaṭṭassa ca

dassanaattho vibhattoti yojanā. **Paṇḍiccenāti** paññāya. “Kittāvatā nu kho, bhante, paṇḍito hoti? Yato kho bhikkhu dhātukusalo ca hoti”ti (ma. ni. 3.124) ādisuttapadavasena paṇḍitalakkhaṇaṃ dassento “**catūhi vā kāraṇehi**”tiādimāha. Saccapaṭivedhavasena paṇḍiccaṃ dassitanti paṭisambhidāvasena mahāpaññataṃ dassetuṃ “**mahante atthe**”tiādi vuttaṃ.

**Gulapūvanti** guḷe missitvā katapūvaṃ. **Baddhasattugulakanti** madhusakkharāhi piṇḍikatam sattupiṇḍaṃ. **Asecitabbakaṃ** madhuādinā pageva tehi samayojitabbattā. **Cintakajātikoti** dhammacintāya cintakasabhāvo. **Sabbaññūtaññānevassāti** sabbaññūtaññāneva assa suttassa guṇaṃ paricchindāpetvā nāmaṃ gaṇhāpessāmi.

Madhupiṇḍikasuttavaṇṇanāya līnatthappakāsanā samattā.

## 9. Dvedhāvitakkasuttavaṇṇanā

**206. Dve dve bhāgeti** dve dve koṭṭhāse katvā. Kāmañcetta “imaṃ ekaṃ bhāgamakāsiṃ, imaṃ dutiyabhāgamakāsi”nti vacanato sabbepi vitakkā saṃkilesavodānavibhāgena dveva bhāgā katā, aparāparuppattiyā panetesam abhiñhācāraṃ upādāya pāliyaṃ “dvidhā katvā”ti āmeḍitavacananti “**dve dve bhāge katvā**”ti āmeḍitavacanaseneva vutto. Atha vā bhāgadavayassa sappaṭibhāgatāya tattha yaṃ yaṃ dvayampi kho ujuvipaccanīkaṃ, taṃ taṃ visuṃ visuṃ gahetukāmo bhagavā āha “dvidhā katvā vitakke vihareyya”nti. Evaṃ pana cintetvā tattha micchāvitakkānaṃ sammāvitakkānañca anavasesam asaṅkarato ca gahitabhāvaṃ dassento “**imaṃ ekaṃ bhāgamakāsiṃ, imaṃ dutiyabhāgamakāsi**”nti avoca. **Kāmapaṭisaṃyuttoti** kāmarāgasanīkhatena kāmena sampayutto, kāmena paṭibaddho vā. Sesesupi eseva nayo. Ayaṃ pana viseso – byāpajjati cittaṃ etenāti **byāpādo**, doso. Vihimsati etāya satte, vihiṃsanaṃ vā tesam etanti **vihiṃsā**, paresam viheṭhanākārena pavattassa karuṇāpaṭipakkhassa pāpadhammasetaṃ adhivacanaṃ. **Ajjhattanti** ajjhaddhammārammaṇamāha. **Bahiddhāti** bāhiradhammārammaṇaṃ. **Oḷārikoti** bahalakāmarāgādipaṭisaṃyutto. Tabbipariyāyena **sukhumo**. **Vitakko akusalapakkhikoyevāti** iminā vitakkabhāvasāmaññena tatthāpi akusalabhāvasāmaññena ekabhāgakaraṇaṃ, na ekacittuppādapariyāpannatādivasenāti dasseti.

Nekkhamaṃ vuccati lobhātikkantattā paṭhamajjhānaṃ, sabbākusalehi nikkhantattā sabbam kusalaṃ. Idha pana kāmavitakkapaṭipakkhassa adhippetattā āha “**kāmehi nissaṭo nekkhammapaṭisaṃyutto vitakko**”ti. Soti nekkhamavitakko. **Yāva paṭhamajjhānāti** paṭhamasamannāhārato paṭṭhāya yāva paṭhamajjhānaṃ etthuppanno vitakko nekkhamavitakkoyeva. **Paṭhamajjhānanti** ca idaṃ tato paraṃ vitakkābhāvato vuttaṃ. Na byāpajjati cittaṃ etena, byāpādassa vā paṭipakkhoti **abyāpādo**, mettāpubbabhāgo mettābhāvanārambho. Na vihiṃsanti etāya, vihiṃsāya vā paṭipakkhoti **avihiṃsā**, karuṇāpubbabhāgo karuṇābhāvanārambho.

Mahābodhisattānaṃ mahābhinnikkhamaṃ nikkhantakālato paṭṭhāya laddhāvasarā sammāsaṅkappā uparūpari savisesam pavattantīti āha “**chabbassāni...pe... pavattiṃsū**”ti. Nāṇassa aparipakkattā pubbavāsanāvasena satisammosato kadāci micchāvitakkalesopi hotiyevāti taṃ dassetuṃ “**satisammosena...pe... tiṭṭhanti**”ti āha. Yathā nīccapihitepi gehe kadāci vātapāne vivaṭamatte laddhāvasaro vāto anto paviseyya, evaṃ guttindriyepi bodhisattasantāne satisammosavasena laddhāvasaro akusalavitakko uppajji, uppanno ca kuslavāraṃ pacchinditvā atṭhāsi, atha mahāsatto taṃmuhuttuppannameva paṭivinodetvā tesam āyatim anuppādāya “ime micchāvitakkā, ime sammāvitakkā”ti yāthāvato te paricchinditvā micchāvitakkānaṃ avasaraṃ adento sammāvitakke parivaḍḍhesi. Tena vuttaṃ “**mayhaṃ ime**”tiādi.

**207.** Pamādo nāma sativippavāsoti āha “**appamattassāti satiyā avippavāse thitassā**”ti. **Ātāpavāriyavantassāti** kilesānaṃ niggaṇhanavīriyavato. **Pesitacittassāti** bhavavimokkhāya vissatṭhacittassa kāye ca jīvite ca nirapekkhassa. “**Evaṃ paṭipākatiko jāto**”ti attano attabhāvaṃ nissāya pavattaṃ somanassākāraṃ gehassitasomanassapakkhikaṃ akāsi, paññāmahantatāya

sukhumadassitā.

**Apariññāyaṃ ʒhitassāti** na pariññāyaṃ ʒhitassa, apariggahitapariññassāti attho. **Vitakko...pe... etāni tīṇi nāmāni labhatīti** tādissassa uppanno micchāvitakko yathārahaṃ attabyābādhako ubhayabyābādhako ca na hotīti na vattabbo taṃ sabhāvānativattanatoti adhippāyo. Anuppannānuppādauppannaparihāninimittatāya paññaṃ nirodhetīti **paññānirodhiko**. Tenāha “**anuppannāyā**”tiādi. **Natthibhāvaṃ gacchatīti** paṭisaṅkhānabalena vikkhambhanappahānamāha. **Nirujjhatīti**ādihipi tadeva vadati. **Vigatantanti**ādihi pana samūlaṃ uddhaṭaṃ viya tadā appavattanakaṃ akāsinti vadati.

**208. Cittavipariṇāmahāvo** cittassa aññathattaṃ pakaticittavigamo. **Anekaggatākāro** vikkhepo. Tattha vitakkena cittaṃ vihaññamānaṃ viya hotīti āha “**taṃ gahetvā vihiṃsāvitaṅkaṃ akāsī**”ti. **Kāruññanti** paradukkhanimittaṃ cittakhedam vadati. Tenevāha – “paradukkhe sati sādhuṇaṃ manaṃ kampeṭīti karuṇā”ti (ma. ni. ʒ. 1.1; saṃ. ni. ʒ. 1.1.1). Nti karuṇāyanavasena pavattacittapakamaṇaṃ sandhāya “**uppajjati vihiṃsāvitaṅkaṃ**”ti āha, na sattesu vihiṃsā pavattatīti adhippāyo.

**Tena tena cassākārenāti** yena yena ākārena bhikkhunā anuvitakkitaṃ anuvicāritaṃ, tena tena ākārenassa **cetaso nati hoti**. Tenevāha “**kāmavitakkādīsū**”tiādi. **Pahāsīti** kālavipallāsena vuttanti āha “**pajahati**”ti. Pahānaṃ panassa siddhameva paṭipakkhassa siddhattāti dassetuṃ “**pahāsī**”ti vuttaṃ yathā “**asāmi bhoge gāmi kādīyimsū**”ti. **Bahulamakāsīti** etthāpi eseva nayo. **Evamevaṃ namatīti** kāmavitakkasampayogākārameva hoti, kāmavitakkasampayuttākārena vā pariṇamati. Kasaṇaṃ **kiṭṭhaṃ**, kasīti attho, tannibhattatā pana kāraṇūpacārena sassaṃ “**kiṭṭha**”nti vuttanti āha “**sassasambādhe**”ti. **Cattāri bhayānīti** vadhabandhājānigarahāni. **Upaddavanti** anathuppādabhāvaṃ. **Lāmakanti** nihīnabhāvaṃ. **Dhandhesūti** attano khandhesu. **Otāranti** anuppavesam kilesānaṃ. Saṃkilesato visujjhaṇaṃ **visuddhi**, sā eva **vodānanti** āha “**vodānapakkhanti idaṃ tasseva vevacana**”nti.

**209. Sabbakusalaṃ nekkhammaṃ** sabbākusalapaṭipakkhatāya tato nissaṭṭatā. **Nibbānameva nekkhammaṃ** sabbakilesato sabbasaṅkhatato ca nissaṭṭatā. **Kiṭṭhasambādhaṃ viya rūpādiārammaṇaṃ** pamāde sati anathuppattitṭhānabhāvato. **Kūṭagāvo viya kūṭacittaṃ** duddamabhāvato. **Paṇḍitagopālako viya bodhisatto** upāyakosallayogato. **Catubbidhabhayaṃ viya micchāvitakkā** sappatibhayaabhāvato. Paññāya vuddhi etassa atthīti **paññāvuddhiko**. Vihaññati cittaṃ etenāti vighāto, cetodukkhaṃ, tappakkhiko vighātapakkhiko, na vighātapakkhikoti **avighātapakkhiko**. **Nibbānasamvattaniko** nibbānavaho. **Ugghātiyeyyāti** uddhaṭaṃ siyā vikkhittaṇca bhaveyyāti attho. **Sanṭhapemīti** sammadeva paṭṭhapemī. Yathā pana ṭhapitaṃ sanṭhapitaṃ nāma hoti, taṃ dassetuṃ “**sannisīdāpemī**”tiādi vuttaṃ. **Sannisīdāpemīti** samādhipaṭipakkhe kilese sannisīdāpento cittaṃ gocarajjhatte sannisīdāpemi. Abyaggabhāvāpādakena **ekaggaṃ karomi**, yathā ārammaṇe suṭṭhu appitaṃ hoti, **evaṃ sammā** sammadeva **ādahāmi** samāhitaṃ karomi, yasmā tathāsamāhitaṃ cittaṃ suṭṭhu ārammaṇe āropitaṃ nāma hoti, na tato paripatati, tasmā vuttaṃ “**suṭṭhu āropemīti attho**”ti. **Mā ugghātiyittāti** mā haññittha, mā ūhataṃ atthāti attho.

**210. Soyeva...pe... vuttoti** iminā kiñcāpi ekaṃyeva kusalavitakkaṃ maggakkhaṇe viya tividhattasambhavato tividhanāmikaṃ katvā dassitaṃ viya hoti, na kho panetaṃ evaṃ daṭṭhabbaṃ. Pabandhapavattañhi upādāya ekattanayena “**soyeva byāpādapaccanīkaṭṭhenā**”tiādi vuttaṃ. Ekajātiyesu hi kusalacittesu uppanno vitakko samānākāratāya so evāti vattabbaṭaṃ labhati yathā “**sā eva tittirī, tāni eva osadhānī**”ti (saṃ. ni. ʒ. 2.2.19). Na hi tadā mahāpurisassa asubhamettākaruṇāsannissayā te vitakkā evaṃ vuttāti.

**Samāpattiṃ nissāyāti** samāpattiṃ samāpajjitvā, tato vuṭṭhahitvāti attho. Vipassanāpi taruṇāti yojanā. **Kāyo kilamati** samathavipassanānaṃ taruṇatāya bhāvanāya pubbenāparaṃ visesassa alabbhamānattā. Tenāha “**cittaṃ haññati vihaññati**”ti. **Vipassanāya bahūpakārā samāpatti**, tathā hi vuttaṃ – “**samādhiṃ, bhikkhave, bhāvētha, samāhito yathābhūtaṃ jānāti passati**”ti (saṃ. ni. 3.5; 4.99;

5.1071).

Yathā vissamaṭṭhānaṃ yodhānaṃ parissamaṃ vinodeti, tathā parissamavinodanattamaṃ phalakehi kātappaṃ vissamaṭṭhānaṃ phalakoṭṭhako, samāpattiyā pana vipassanā bahukāratarā samādhiparipanthakānaṃ, sabbesampi vā kilesānaṃ vimathanena dubbalabhāvāpajjanato. Tenāha “**vipassanā thāmajātā samāpattimpi rakkhati, thāmajātaṃ karotī**”ti. Nanu cevaṃ itarītarasannissayadoso āpajjati? Nayidamekantiṃ, itarītarasannissayāpi kiccāsiddhi loke labbhati dassetuṃ “**yathā hi**”tiādi vuttaṃ.

**Gāmantam āhaṣeṭi** gāmasamīpaṃ upanītesu. **Etāgāvoti sati uppādanamattameva kātappaṃ** yathā gāvo rakkhitabbā, tadabhāvato. **Tadāti** samathavipassanānaṃ thāmajātakāle. Anupassanānaṃ lahuṃ lahuṃ uppattim sandhāya “**ekappahārenea āruḥhova hotī**”ti vuttaṃ, kameneva pana anupassanāpaṭipāṭim ārohati.

**215.** Evaṃ bhagavā attano appamādaṭṭipadaṃ, tāya ca laddhaṃ anaññasādhāraṇaṃ visesaṃ dassento hetusampattiyā saddhim phalasampattim dassetvā idāni sattūpakārasampattim dassetuṃ “**seyyathāpi**”tiādimāhāti evaṃ ettha anusandhi veditabbā. Araññalakkhaṇayoggamattena **araññaṃ**. Mahāvanatāya **pavanaṃ**. Pavaddhañhi vanaṃ pavanaṃ. **Catūhi yogehī** jighacchāpīpāsābhayaṭṭipattisānkhātayogehi. **Khemaṃ** anupaddavataṃ. Suvatthim anupaddavaṃ āvahaṭi **sovattiko**. Pītim kuṭṭhim gameti upaneti **pītigamaṇiyo**. Pītaṃ pānatitthaṃ gacchaṭi **pītagamaṇiyo**. **Sākhādīhī** kaṇṭakasākhākaṇṭakalatāvanehi. Anāsayaḡāmitāya udakasanniruddhopi **amaggo** vutto, itarāni apītigamaṇiyatāyapi. **Ādi**-saddena gahanaṃ pariggaṇhāti. Okemigaluddakassa gocare carati **okacaro**, dīpakamigo. Araññe mige disvā tehi saddhim palāyeyyāti **dīgharajjubandhanaṃ**.

**Idha vasantī** migānaṃ āsayaṃ vadati, tato āsayaṃ **iminā maggena nikkhamanti**. **Ettha carantī** etasmiṃ thāne gocaraṃ gaṇhanti. **Ettha pivantī** etasmiṃ nipānatitthe udakaṃ pivanti. **Iminā maggena pavisantī** iminā maggena nipānatitthaṃ pavisanti. **Maggaṃ pidhāyati** pakatimaggaṃ pidahitvā. **Na tāva kiñci karoti** anavasese vanamige ghātetukāmo.

**Avijjāya aññāṇā hutvāti** avijjāya nivutattā ñāṇarahitā hutvā, nandīrāgena upanīta rūpārammaṇādīni ābandhitvā. Palobhanato **okacaraṃ nandīrāgoti**. Byāmohanato **okacārikaṃ avijjāti katvā dasseti**. Tesanti okacarokacārikānaṃ. **Sākhābhaṅgenāti** tādisena lūkhataragandhena sākhābhaṅgena. **Manussagandhaṃ apantvā** tassa sākhābhaṅgassa gandhena. **Sammattoti** sammajjito byāmuñcho.

Buddhānaṃ khemamaggavacaraṇaṃ kummaggapīdhānañca **sabbalokasādhāraṇampi** atthato veneyyapuggalāpekkhamevāti dassento “**aññātakonḡaṇḡādīnaṃ bhābbapuggalāna**”nti āha. **Ūhatoti** samūhato nīhatoti āha “**dvedhā chetvā pātito**”ti. **Nāsītāti** adassanaṃ gamitāti āha “**sabbena sabbam samugghātītā**”ti. **Hitūpacāranti** sattānaṃ hitacariyaṃ.

Dvedhāvitakkasuttavaṇṇanāya līnatthappakāsānā samattā.

## 10. Vitakkasaṇṭhānasuttavaṇṇanā

**216.** **Dasakusalakammāpathavasenaṇāti** idaṃ nidassanaṃ attamaṃ daṭṭhabbaṃ vaṭṭapādakasamāpatticittasāpi idha adhicittabhāvena anicchitattā. Tenāha “**vipassanāpādakaatṭhasamāpatticitta**”nti. Atha vā anuttarimanussadhammasaṅgahitameva kevalaṃ “pakaticitta”nti vattabbanti dassento “**dasakusalakammāpathavasena uppannaṃ cittaṃ cittamevā**”ti vatvā yadettha adhicittanti adhippetamaṃ, taṃ tadeva dassento “**vipassanāpādakaatṭhasamāpatticitta**”nti āha. Itarassa panettha vidhi na paṭisedhetī daṭṭhabbaṃ.

Vipassanāya sampayuttaṃ adhicittanti keci. **Anuyuttenā**ti anuppanassa uppādanavasena, uppanassa paribrūhanavasena anu anu yuttana. **Mūlakammaṭṭhānanti** pārihāriyakammaṭṭhānaṃ. **Gahetvā viharantoti** bhāvanaṃ anuyuñjanto. Bhāvanāya appanaṃ appatopi adhicittamanuyuttoyeva tadatthepe taṃsaddavohārato.

Yehi phalaṃ nāma yathā uppajjanaṭṭhāne pakappiyamānaṃ viya hoti, **tāni nimittāni**. Tenāha “**kāraṇāni**”ti. **Kālena kālanti** ettha **kālenā**ti bhummatthe karaṇavacananti āha “**samaye samaye**”ti. **Nanu ca...pe... nirantaraṃ manasi kātabbanti** kasmā vuttaṃ, nanu ca bhāvanāya vīthipaṭipannattā abbudaṇiharaṇavidhiṃ dassentena bhagavatā “**pañca nimittāni kālena kālaṃ manasi kātabbāni**”ti ayaṃ desanā āradhāti? “Adhicittamanuyuttenā”ti vuttattā avicchedavasena bhāvanāya yuttappayutto adhicittamanuyutto nāmāti codakassa adhippāyo. Itaro bhāvanaṃ anuyuñjantassaādikammikassa kadāci bhāvanupakkilesā uppajjeyyūṃ, tato cittassa visodhanatthāya yathākālaṃ imāni nimittāni manasi kātabbānti “kālena kāla”nti satthā avocāti dassento “**pāliyañhi**”tiādīmāha. Tattha **imānti** imāni pāliyaṃ āgatāni pañca nimittāni. **Abbudanti** upaddavaṃ.

**Chandasahagatā rāgasampayuttā**ti taṇhāchandasahagatā kāmarāgasampayuttā. **Īṭṭhāniṭṭhaasamapekkhitesū**ti iṭṭhesu piyesu, aniṭṭhesu appiyesu, asamaṃ asammā pekkhitesu. **Asamapekkhananti** gehassitaaññānupekkhāvasena ārammaṇassa ayoniso gahaṇaṃ. Yaṃ sandhāya vuttaṃ – “cakkhunā rūpaṃ disvā upekkhā bālassa mūlhassa puthujjanassā”tiādi (ma. ni. 3.308). **Te** parivitakkā. **Tato nimittato aññanti** tato chandūpasamhitādiakusalavitakkuppattikāraṇato aññaṃ navam nimittaṃ. “Manasikaroto”ti hi vuttaṃ, tasmā ārammaṇaṃ, tādiso purimuppanno cittappavattiākāro vā nimittaṃ. **Kusalanissitaṃ nimittanti** kusalacittappavattikāraṇaṃ **manasi kātabbaṃ** citte ṭhapetabbaṃ, bhāvanāvasena cintetabbaṃ, cittasantāne vā saṅkamitabbaṃ. Asubhañhi asubhanimittanti. Saṅkhāresu uppanne chandūpasamhite vitakketi ānetvā sambandhitabbaṃ. Evaṃ “**dosūpasañhite**”tiādīsū yathārahaṃ taṃ taṃ padaṃ ānetvā sambandhitabbaṃ. **Yattha katthacī**ti “sattesu saṅkhāresū”ti yattha katthaci. **Pañcadhammūpanissayoti** pañcavidho dhammūpasamhito upanissayo.

Evaṃ “**chandūpasañhite**”tiādinā saṅkhepato vuttamatthaṃ vitthārato dassetuṃ “**imassa hatthā vā sobhanā**”tiādi āradhamaṃ. Tattha “**asubhato upasaṃharitabba**”nti vatvā upasaṃharaṇākārassa dassanaṃ “**kimhi sārattosi**”ti. **Chavirāgenā**ti chavirāgatāya kālasāmādivaṇṇanibhāya. **Kuphalapūritoti** pakkehi kuṇapaphalehi puṇṇo. “Kaliphalapūrito”ti vā pāṭho.

**Assāmikatāvakālikabhāvavasenā**ti idaṃ pattaṃ anukkamena vaṇṇavikārañceva jiṇṇabhāvañca patvā chiddāvachiddaṃ bhinnaṃ vā hutvā kapālaniṭṭhaṃ bhavissati. Idaṃ cīvaram anupubbena vaṇṇavikāraṃ jiṇṇatañca upagantvā pādapuñchanacolaṃ hutvā yaṭṭhikoṭiyā chaḍḍaniyaṃ bhavissati. Sace pana nesaṃ sāmiko bhaveyya, na nesaṃ evaṃ vinassituṃ dadeyyāti evaṃ assāmikabhāvavasena, “anaddhaniyaṃ idaṃ tāvakālika”nti evaṃ tāvakālikabhāvavasena ca manasikaroto.

**Āghātavinaya...pe... bhāvetabbā**ti – “pañcime, bhikkhave, āghātaṭṭhāvinayā. Yattha hi bhikkhuno uppanno āghāto sabbaso paṭivinetabbo”tiādinā nayena āgatassa **āghātavinayasuttassa** (a. ni. 5.161) ceva **kakacūpamovāda**(ma. ni. 1.222-233) **chavālātūpamā**dīnañca (itivu. 91) vasena āghātaṃ paṭivinodetvā mettā bhāvetabbā.

**Garusaṃvāsoti** garuṃ upanissāya vāso. **Uddesoti** pariyattidhammassa uddisāpanaṇceva uddisanañca. **Uddiṭṭhaparipucchananti** yathāuggahitassa dhammassa atthaparipucchā. **Pañca dhammūpanissayāti** garusaṃvāsādike pañca dhamme paṭicca. **Mohadhātū**ti moho.

**Upanissitabbā**ti upanissayitabbā, ayameva vā pāṭho. **Yattappaṭiyattoti** yatto ca gāmappavesanāpucchākaraṇesu ussukkaṃ āpanno sajjito ca hotīti attho. **Athassa moho pahiyatī**ti assa bhikkhuno evaṃ tattha yuttappayuttassa pacchā so moho vigacchati. **Evampī**ti evaṃ uddese appamajjanenapi. Puna **evampī**ti atthaparipucchāya kaṅkhāvinodanepi. **Tesu tesu ṭhānesu attho**

**pākaṭo hotīti** suyyamānassa dhammassa tesu tesu padesu “idha sīlaṃ kathitaṃ, idha samādhi, idha paññā”ti so so attho vibhūto hoti. Idaṃ cakkhurūpālokādi **imassa** cakkhuvīññāṇassa **kāraṇaṃ, idaṃ** sālībījabhūmisalilādi **imassa** sālīaṅkurassa **kāraṇaṃ. Idaṃ na kāraṇanti** tadeva cakkhurūpālokādi sotaviññāṇassa, tadeva sālībījādi kudrusakaṅkurassa na kāraṇanti **ṭhānāṭṭhānavinicchaye** cheko hoti.

**Ārammaṇesūti** kammaṭṭhānesu. **Ime vitakkāti** kāmavitakkādayo. Sabbe kusalā dhammā sabbākusalapaṭipakkhātī katvā “pahīyanti”ti vattabbe na sabbe sabbesaṃ ujuvipaccanīkabhūtātī “pahīyanti evā”ti sāsāṅkaṃ vadatī. Tenāha “**imānī**”tiādi.

**Kusalanissitanti** kusalena nissitaṃ nissayitabbaṃ. **Kusalassa paccayabhūtanti** tasveva vevacanaṃ, kusaluppattikāraṇaṃ yathāvuttaasubhanimittādimeva vadatī. **Sārapphalaketi** candanamaye sārapphalake. **Visamāṇinti** visamākārena tattha ṭhitaṃ āṇiṃ. **Haneyyāti** pahareyya nikkhāmeyya.

**217. Aṭṭoti** āturo, duggandhabādhatāya pīlito. **Dukkhitoti** sañjātadukkho. **Imināpi kāraṇenāti** akosallasambhūtātāya kusalapaṭipakkhatāya gehassitarogena sarogātāya ca **ete akusalā** viññūgarahitabbatāya jigucchaniyatāya ca **sāvajjā** aniṭṭhaphalatāya nirassādasamvattaniyatāya ca **dukkhavipākāti** evaṃ tena tena kāraṇena akusalādi bhāvaṃ **upaparikkhato**.

“Āturaṃ asuciṃ pūtiṃ, passa nande samussayaṃ;  
Uggharantaṃ paggharantaṃ, bālānaṃ abhinandita”nti. (apa. therī 2.4.157) –

Evamādi **kāyavicchandanīyakathādīhi** vā. **Ādi-saddena** –

“Tasseva tena pāpiyo, yo kuddhaṃ paṭikujjhati;  
Kuddhaṃ appaṭikujjhanto, saṅgāmaṃ jeti dujjaya”nti. (theragā. 442) –

Evamādi paṭighavūpasamanakathādīkāpi saṅgaṇhātī.

**218.** Na saraṇaṃ **asati**, ananussaraṇaṃ. Amanasikaraṇaṃ **amanasikāro. Kammaṭṭhānaṃ** **gahetvā nisīditabbanti** kammaṭṭhānāmanasikāreneva nisīditabbaṃ. **Uggahito dhammakathāpabandhoti** kammaṭṭhānassa upakāro dhammakathāpabandho. **Muṭṭhipotthakoti** muṭṭhippamaṇo pārihāriyapotthako. **Samannānentenāti** samannāharantena. **Okāso na hoti** āraddhassa pariyoṣāpetabbato. Āraddhassa antagamaṇaṃ anārambhovātī theravādo. **Tassāti** upajjhāyassa. **Pabbhārasodhanaṃ** kāyakammaṃ, ārabhanto eva vitakkaniggaṇhanatthaṃ saṃyuttanikāyasajjhāyanaṃ vacīkammaṃ, dassanakiccapubbakammakaraṇatthaṃ tejokasiṇaparikkamanti tīṇi kammāni ācīnoti. Thero tassa āsayaṃ kasiṇaṅca savisesaṃ jānitvā “**imasmiṃ vihāre**”tiādimavoca. Tenassa yathādhippāyaṃ sabbāṃ sampāditaṃ. **Asatipabbaṃ nāma** asatiyā vitakkaniggahaṇavibhāvanato.

**219. Vitakkamūlabhedāṃ pabbanti** vitakkamūlassa tammūlassa ca bhedavibhāvanaṃ vitakkamūlabhedāṃ pabbaṃ. Vitakkaṃ saṅkharotīti vitakkasaṅkhāro, vitakkapaccayo subhanimittādīsūpi subhādīnā ayonisomanasikāro. So pana vitakkasaṅkhāro saṃtiṭṭhātī etthātī **vitakkasaṅkhārasaṅṭhānaṃ**, asubhe subhantiādi saññāvīpallāso. Tenāha “**vitakkānaṃ mūlaṅca mūlamūlaṅca manasi kātabba**”nti. **Vitakkānaṃ mūlamūlaṃ gacchantassāti** upaparikkhanavasena micchāvīvitakkānaṃ mūlaṃ uppattikāraṇaṃ ṇānagatiyā gacchantassa. Yāthāvato jānantassa pubbe viya vitakkā abhiṅgaṃ nappavattantīti āha “**vitakkacāro sithilo hotī**”ti. **Tasmiṃ sithilībhūte matthakaṃ gacchanteti** vuttanayena vitakkacāro sithilabhūto, tasmiṃ vitakkānaṃ mūlagamane anukkamena thirabhāvappattiyā matthakaṃ gacchante. **Vitakkā sabbaso nirujjhantīti** micchāvīvitakkā sabbepi gacchanti na samudācaranti, bhāvanāpāripūriyā vā anavasesā pahīyanti.

**Kaṇṇamūle patitanti** sasakassa kaṇṇasamīpe kaṇṇasakkhalim paharantaṃ viya upapatitaṃ. Tassa kira sasakassa heṭṭhā mahāmūsikāhi khatamahāvāṭaṃ umaṅgasadisam ahoṣi, tenassa pātena mahāsaddo ahoṣi. **Palāyimsu** “pathavī udriyati”ti. **Mūlamūlaṃ gantvā anuvijjeyyanti** “pathavī bhijjati”ti yatthāyaṃ saso uṭṭhito, tattha gantvā tassa mūlakāraṇaṃ yaṃnūna vīmaṃseyyaṃ. Pathaviyā bhijjanaṭṭhānaṃ gate “ko jānāti, kiṃ bhavissati”ti saso “na sakkomi sāmī”ti āha. Ādhipaccavato hi yācanaṃ saṅhamudukaṃ. **Duddubhāyatī** duddubhāti saddaṃ karoti. Anuravadassanañhetam. **Bhaddanteti** migarājassa piyasamudācāro, migarāja, bhaddaṃ te atthūti attho. **Kimetanti** kiṃ etaṃ, kiṃ tassa mūlakāraṇaṃ? **Duddubhanti** idampi tassa anuravadassanameva. Evanti yathā sasakassa mahāpathavībhedaṇaṃ ravanāya micchāgāhasamuṭṭhānaṃ amūlaṃ, evaṃ vitakkacāropi saññāvipallāsasamuṭṭhāno amūlo. Tenāha “**vitakkāna**”ntiādi.

**220. Abhidantanti** abhibhavanadantaṃ, uparidantanti attho. Tenāha “**uparidanta**”nti. So hi itaraṃ musalaṃ viya udukkhalaṃ visesato kassaci khādanakāle abhibhuyya vattati. **Kusalacittenāti** balavasammāsaṅkappasampayuttena. **Akusalacittanti** kāmavitakkādisahitaṃ akusalacittaṃ. **Abhiniggaṇhitabbanti** yathā tassa āyatim samudācāro na hoti, evaṃ abhibhavitvā niggaṇhetabbam, anuppattidhammatā āpādetabbāti attho. **Ke ca tumhe** satipi cirakālabhāvanāya evaṃ adubbalaṃ **ko cāhaṃ** mama santike laddhappatiṭṭhe viya ṭhitepi idāneva appatiṭṭhe karonto iti evaṃ **abhibhavitvā**. Taṃ pana abhibhavanākāraṃ dassento “**kāmaṃ taco cā**”tiādinā caturaṅgasamannāgatavīriyapaggaṇhanamāha. **Atthadīpikanti** ekantato vitakkaniggaṇhanatthajotakaṃ. **Upamanti** “seyyathāpi, bhikkhave, balavā puriso”tiādikam upamaṃ.

**221. Pariyādānabhājanīyanti** yaṃ taṃ ādito “adhicittamanuyuttena bhikkhunā pañca nimittāni kālena kālaṃ manasi kātabbānī”ti niddiṭṭhaṃ, tattha tassa nimittassa manasikaraṇakālapariyādānassa vasena vibhajaṇaṃ. Nigamaṇaṃ vā etaṃ, yadidaṃ “yato kho, bhikkhave”tiādi. Yathāvuttassa hi atthassa puna vacanaṃ nigamaṇanti. Tathāpaṭipannassa vā vasībhāvavisuddhidassanattaṃ “**yato kho, bhikkhave**”tiādi vuttaṃ. **Satthācariyoti** dhanubbedācariyo. Yathā hi sasanato asatthampi satthaggaṇeṇeva saṅgayhati, evaṃ dhanusippampi dhanubbedapariyāpannamevāti.

Pariyāyati parivitakketīti **pariyāyo**. Vāroti āha “**vitakkavārapathesū**”ti, vitakkānaṃ vārena pavattanamaggesu. **Ciṇṇavasīti** āsevitavasī. **Paguṇavasīti** subhāvitavasī. Sammāvitakkaṃyeva yathicchitaṃ tathāvitakkanato, itarassa panassa setughātoyevāti.

Vitakkasaṅṭhānasuttavaṇṇanāya līnatthappakāsanā samattā.

Niṭṭhitā ca sīhanādavaggaṇṇanā.

### 3. Opammavaggo

#### 1. Kakacūpamasuttavaṇṇanā

**222. Moḷinti** kesaracanaṃ. **Vehāyasanti** ākāse. **Ratanacaṅkoṭavarenāti** ratanasilāmayavaracaṅkoṭakena sahasanetto sirasā paṭiggahi. “Suvaṇṇacaṅkoṭakavarenā”tipi (bu. vaṃ. aṭṭha. 23 dūrenidānakathā; jā. aṭṭha. 1.2 avidūrenidānakathā) pāṭho.

**Sāti moḷi**. Moḷi etassa atthīti moḷiko, moḷiko eva **moḷiyo**. **Phaggunoti** pana nāmaṃ. **Saṅkhāti** samaññā. Velīyati khaṇamuhuttādivasena upadisīyatīti **velā**, kāloti āha “**tāyaṃ velāyaṃ...pe... ayaṃ kālavelā nāmā**”ti. Velayati paricchēdavasena tiṭṭhatīti **velā**, sīmā. Velayati saṃkilesapakkhaṃ cālayatīti **velā**, silaṃ. Anatikkamaṇaṭṭhōpi cassa saṃkilesadhammanimittaṃ acalanameva. Viññupurisābhāve chapañcavācāmatṭaṃ **ovāde pamāṇaṃ nāma**. **Davasahagataṃ katvāti** kīḷasahitaṃ katvā.

**Missībhūtoti** ananulomikasamsaggavasena missībhūto. “**Avanṇaṃ bhāsati**”ti saṅkhepato vuttaṃ vivarituṃ “tāpanapacanakottaṇādīni”tiādi vuttaṃ. **Adhikaraṇampi karotīti** ettha yathā so adhikaraṇāya parisakkati, taṃdassanaṃ “**imesaṃ bhikkhūna**”ntiādi. **Adhikaraṇaṃ ākaḍḍhatīti** adhikaraṇaṃ uddissa te bhikkhū ākaḍḍhati, adhikaraṇaṃ vā tesu uppādentō ākaḍḍhati. **Uddesapadaṃ vāti** padaso uddesamattaṃ vā. **Neva piyakamyatāyāti** neva attani satthuno piyabhāvakāmatāya. **Na bhedādhippāyenāti** na satthuno tena bhikkhunā bhedādhippāyena. **Atthakāmatāyāti** molīyaphaggunassa hitakāmatāya.

**224. Avanṇabhāsaneti** bhikkhunīnaṃ aguṇakathane. Chandādīnaṃ vatthubhāvato kāmaguṇā gehaṃ viya gehaṃ, te ca te sitā nissitāti **gehassitāti** vuttā. Taṇhāchandāpi tāsāṃ kattukāmatāpīti ubhayepi **taṇhāchandā, paṭighachandā** pana tesāṃ kattukāmatā eva. Phalīkamaṇi viya pakatīpabhassarassa cittasantānassa upasaṅgo viya vipariṇāmakāraṇaṃ rāgādayoti āha “**rattampi cittaṃ vipariṇata**”ntiādi. **Hitānukampīti** karuṇāya paccupaṭṭhāpanamāha. “Yassantarato na santi kopā”tiādīsu (udā. 20) viya **antara-saddo** cittapariyāyoti āha “**dosantaroti dosacitto**”ti.

**225.** Dubbacatāya ovādaṃ asampaṭicchanto citteneva **paṭiviruddho aṭṭhāsi. Gaṇhimsu** cittaṃ, hadayagāhīniṃ paṭipajjimsūti attho. **Pūrayimsu** ajjhāsayanti attho. **Ekasmiṃ samaye** paṭhamabodhiyaṃ. Ekāsanāṃ bhojanassa **ekāsanabhōjanaṃ**, ekavelāyameva bhojanaṃ. Tañca kho pubbaṇhe evāti āha “**ekaṃ purebhattabhōjana**”ntiādi. Sattakkhattuṃ bhuttabhōjanampi imasmiṃ sutte ekāsanabhōjananteva adhippettaṃ, na ekāsanikatāya ekāya eva nisajjāya bhojanaṃ. “Appaḍaṃsa... pe... samphassa”ntiādīsu viya **appa-saddo** abhāvattoti āha “**nirābādhattaṃ, niddukkhatta**”nti. Padhānādivasena sallahukaṃ akicchaṃ uṭṭhānaṃ **sallahukauṭṭhānaṃ. Na ekappahārenāti** na ekavārena, na ekasmiṃyeva kāleti adhippāyo. **Dve bhōjanānīti** “aparaṇhe rattiya”nti kālavasena dve bhōjanāni. **Pañca guṇeti** appābādhdhīke pañca ānisaṃse. **Satuppādakaraṇīyamattamevāti** satuppādādamattakaraṇīyameva, nivāretabbassa punappunaṃ samādapanañca nāhosi.

**Maṇḍabhūmīti** ojavantabhūmi, yattha pariśiṅcanena vinā sassāni kiṭṭhāni sampajjanti. Yuge yojetabbāni yoggāni, tesāṃ ācariyo **yoggācariyo**, tesāṃ sikkhāpanako. Gāmaṇihattīdayopi “yoggā”ti vuccantīti āha pāliyaṃ “**assadammasārathī**”ti. Catūsū maggesu **yena yena maggena icchati**. Javasamaḡādībhedaṃsu gaṭṭisū **yaṃ yaṃ gaṭṭiṃ. Taṃ taṃ** maggaṃ **āruḷhāva** otiṇṇāyeva. **Neva vāretabbā** rasmiviniggaṇhanena. **Na vijjhītabbā** patodalattīhiyā. **Gamanamevāti** ime yuttā mama icchānurūpaṃ mandaṃ gacchanti, samaṃ gacchanti, sīghaṃ gacchantīti khuresu nimittaggaṇaṃ paṭṭhapetvā sārathīnā tesāṃ gamanameva passitabbaṃ hoti, na tatha niyojanaṃ. **Tehipi** bhikkhūhi. **Pajahimsu** pajahitabbaṃ. **Sāladūsanāti** sālarukkhaṃvīsanāsakā. **Aññā ca valliyo** sālarukkhe vinandhitvā ṭhitā. **Bahi nīharaṇenāti** sālavanato bahi chaḍḍanena. **Susaṇṭhitāti** saṇṭhānasampannā, **mariyādaṃ bandhitvāti** ālavālasampādanavasena mariyādaṃ bandhitvā. **Kipillapuṭakaṃ** tambakīpillakapuṭakaṃ. **Sukkhadaṇḍakaharaṇaṃ** ālavālabbhantarā.

**226.** Videharaṭṭhe jātasamvadaḍḍhatāya **vedehikā**. Paṇḍā vuccati paññā, tāya itā gatā pavattāti **paṇḍitā. Gahapatānīti** gehasāminī. **Soraccenāti** saṃyamena. **Nivātavuttīti** paṇipātakārī. **Nibbutāti** nibbutaduccarītapariḷhā. **Uṭṭhāhikāti** uṭṭhānavīriyavātī. **Kibbisāti** kurūrā.

**227. Evaṃ akkhantiyā dosaṃ dassetvāti** “guṇavanto”ti loke patthaṭakittisaddānampi akkhantīnimittaṃ ayasuppattiguṇaparihānīdiṃ akkhamatāyaādīnavaṃ pakāsetvā. **Vacanapatheti** vacanamagge yuttakālādīke. Saṇhābhāvopi hi vacanassa pavattīākāroti katvā “vacanapatho” tveva vutto. **Tesaṃyeva** kālādīnaṃ. Mettā etassa atthīti mettaṃ, uppannaṃ mettacittaṃ etesanti **uppannamettacittā**. Puna “kālena vā, bhikkhave”tiādi (pari. 362, 363) pāli dhammasabhāvadassanavasena pavattā “paraṃ codanāvasena vadantā nāma imehi ākārehi vadantī”ti. **Adhimuñcitvāti** abhirativasena tasmīṃ puggale bhāvanācittaṃ muñcitvā vissajjetvā. So puggalo ārammaṇaṃ etassāti **tadārammaṇaṃ**, mettacittaṃ. Yadi evaṃ padesavisayaṃ taṃ kathaṃ nippadesavisayaṃ viya hotīti codento “**kathaṃ tadārammaṇaṃ sabbāvantaṃ lokaṃ karotī**”ti āha,



itaro “**pañca vacanapathe**”tiādinā pariharati. Idha **tadārammaṇāñcā**ti tasseva mettacittassa ārammaṇaṃ katvāti pāliyaṃ vacanaseso daṭṭhabbo. Tenāha “**puna tassevā**”tiādi. Sabbā sattakāyasaṅkhātā pajā etassa atthīti **sabbāvanti** imamattaṃ dassento “**sabbāvanta**”nti āha. **Vipulenā**ti mahājanārammaṇena. Mahantapariyāyo hi vipula-saddo, mahattañcetha bahukabhāvo. Tenāha “**anekasattārammaṇenā**”ti. **Taṅca puggalanti** pañca vacanapathe gahetvā āgatapuggalaṃ. **Cittassā**ti mettāsahagatacittassa. Ettha ca mettāsahagatena cetasā viharissāmāti sambandho. Tattha kathanti āha “**taṅca puggalaṃ sabbañca lokaṃ tassa cittassa ārammaṇaṃ katvā adhimuccitvā**”ti.

**228. Tadatthadīpikanti** yā mettaṃ cetovimuttiṃ sammadeva bhāvetvā t̥hitassa nibbikārato kenaci vikāraṃ na āpādetabbatā, tadatthajotikaṃ. **Apathavinti** pathavī na hotīti apathavī. **Nippathavinti** sabbena sabbam pathavībhāvābhāvaṃ. **Tiriyam pana aparicchinnā**ti kasmā vuttaṃ, nanu cakkavālapabbatehi taṃ taṃ cakkavālam paricchindati? Na, tadaññacakkavālapathaviyā ekābaddhabhāvato. Tiṇṇaṅhi cakkānaṃ antarasadise tiṇṇam tiṇṇam lokadhātūnaṃ antareyeva pathavī natthi lokantaranirayabhāvato. Cakkavālapabbatantarehi sambaddhaṭṭhāne pathavī ekābaddhāva. Vivatṭakāle hi saṅṭhahamānāpi pathavī yathāsaṅṭhitapathaviyā ekābaddhāva saṅṭhahati. Tenāha “**tiriyam pana aparicchinnā**”ti. Imināva gambhīrabhāvena vuttaparimāṇato paraṃ natthīti dīpitaṃ hoti.

**229. Haliddīti** haliddivaṇṇaṃ adhippetanti āha “**yam kiñci pītakavaṇṇa**”nti. Vaṇṇasaṅkhātam rūpaṃ assa atthīti rūpī, na rūpīti **arūpī**ti āha “**arūpo**”ti. Tenevāha “**sanidassanabhāvapaṭikkhepato**”ti.

**230. Pañca yojanasatānī**ti himavantato samuddam pavitṭhaṭṭhānavasena vuttaṃ, na anotattadahamukhato. Aññā nadiyo upādāya labbhamānaṃ gambhīrataṃ appameyyaudakatañca gahetvā “**gambhīrā appameyyā**”ti vuttaṃ. **Aṭṭhakathāyam** pana tiṇṇukkāya tāpetabbatābhāvadassanaparametanti vuttaṃ “**etena payogenā**”tiādi.

**231. Tūlinī** viya **tūlinī**ti āha “**simbalitūlalātūlasamānā**”ti. Sassaranti evampavatto saddo **sassarasaddo**. Anuravadassanañhetam. Tathā **bhabbharasaddo**. Sabbametaṃ mettāvihārino cittassa dūsetum asakkuṇeyyabhāvadassanaparam. Ayañhettha saṅkhepattho – yathā mahāpathavī kenaci purisena apathaviṃ kātuṃ na sakkā, yathā ākāse kiñci rūpaṃ paṭṭhapetuṃ na sakkā, yathā gaṅgāya udakaṃ tiṇṇukkāya tāpetuṃ na sakkā, yathā ca biḷārabhastam thaddham pharusañca samphassaṃ kātuṃ na sakkā, evamevaṃ mettāya cetovimuttiyā āsevītāya bhāvitāya bahulīkatāya pañca vacanapathe gahetvā āgatapurisena kenaci pariyāyena cittassa aññathattam kātuṃ na sakkāti.

**232. Ocarakā**ti parūpaghātavasena hīnakammakārino. Tenāha “**nīcakammakārakā**”ti. **Anadhivāsana**nti akkhamanena. **Mayham ovādakaro na hotīti** paramhi anattakārimhi cittapadosanena āghātuppādanena mama sāsane sammāpaṭipajjamāno nāma na hoti.

**233. Anunti** appakaṃ tanu parittakaṃ. **Thūlanti** mahantaṃ oḷārikaṃ. Vacanapathassa pana adhippetattā taṃ sāvajjavibhāgena gahetabbanti āha “**appasāvajjam vā mahāsāvajjam vā**”ti. Khantiyā idaṃ bhāriyaṃ na hotīti avocuṃ “**anadhi...pe... passāmā**”ti. **Dīgharattanti** cirakālam, accantamevāti attho. Accantañca hitasukham nāma aññādhigamenevāti āha “**arahattena kūṭam gaṇhanto**”ti.

Kakacūpamasuttavaṇṇanāya līnatthappakāsanaṃ samattā.

## 2. Alagaddūpamasuttavaṇṇanā

**234. Bādhayimsū**ti (sārattha. ṭī. pācittiya 3.417) haniṃsu. Tamtaṃsampattiyā vibandhanavasena sattasāntānassa antare vemajjhe eti āgacchatīti antarāyo, diṭṭhadhammikādiattho, anatikkamanaṭṭhena

tasmim̄ antarāye niyuttā, antarāyaṃ vā phalaṃ arahanti, antarāyassa vā karaṇasīlāti **antarāyikā**. Tenāha “**antarāyaṃ karontīti antarāyikā**”ti. **Ānantariyadhammā** ānantariyasabhāvacetanādhammā. Tatrāyaṃ vacanattho – cutianantaraphalaṃ anantaraṃ nāma, tasmim̄ anantare niyuttā, tannibbattanena anantarakaraṇasīlā, anantarapayojanāti vā ānantarikā, te eva **ānantariyā**ti vuttā. Kammāni eva antarāyikāti **kammantarāyikā**. **Mokkhasseva antarāyaṃ karoti, na saggassa** micchācāralakkhaṇābhāvato. Na hi bhikkhuniyā dhammarakkhitabhāvo atthi. Pākati kabhikkhunīvasena cetam̄ vuttam̄, ariyāya pana pavattam̄ apāyasam̄vattaniyameva. Nandamānavako cettha nidassanam̄. Ubhinnaṃ samānacchandatāvasena vā asaggantarāyikatā, mokkhantarāyikatā pana mokkhatthapaṭipattiyā vidūsanato, abhibhavitvā pana pavattiyam̄ saggantarāyikatāpi na sakkā nivāretunti. Ahetukadiṭṭhiakiriyadiṭṭhinatthikadiṭṭhiyova niyatabhāvaṃ pattā **niyatamicchādiṭṭhidhammā**. **Paṭisandhidhammā**ti paṭisandhicittuppādamāha. Paṇḍakādiggahaṇaṅcetta nidassanamattam̄ sabbāyapi ahetukapaṭisandhiyā vipākantarāyikabhāvato. Yā hi ariye upavadati, sā cetanā **ariyūpavādadharmā**. **Tato paranti** khamāpanato upari. Yaṃ panetta vattabbaṃ, tam̄ mahāsīhanādassa līnatthapakāsane vuttameva. **Yāva bhikkhubhāvaṃ paṭijānāti** pārājikaṃ āpanno. **Na vuṭṭhāti** sesam̄ garukāpattim̄. **Na deseti** lahukāpattim̄.

**Ayaṃ bhikkhu** ariṭṭho. **Rasena rasam̄ saṃsanditvā**ti anavajjena paccayaparibhuñjanarasena sāvajjam̄ kāmaguṇaparibhogarasam̄ samānetvā. **Upanento viyāti** bandhanam̄ upanento viya. “Ghaṭento viyā”tipi pāṭho. **Upasamharanto viyāti** sadisatam̄ upasamharanto viya ekantasāvajje anavajjabhāvapakkepena. **Pāpakanti** lāmakaṭṭhena duggatisampāpanaṭṭhena ca pāpakam̄. Setukaraṇavasena **mahāsamuddam̄ bandhantena viya**. **Sabbaññutaññāṇena** “sāvajja”nti diṭṭham̄ “anavajja”nti gahaṇena tena **paṭivirujjhanto**. Ekantato anantarāyikanti gahaṇena **vesārajjāññam̄ paṭibhānto**. Kāmakaṇṭakehi ariyamaggasammāpaṭipatti na upakkilissatīti vadanto “**ariyamagge khāṇukaṇṭakādīni pakkhipanto**”ti vutto. Paṭhamapārājikasikkhāpadasaṅkhāte, “abrahmacariyam̄ pahāyā”ti (dī. ni. 1.8, 194) ādidesanāsāṅkhāte ca **āṇācakke**.

Pucchamānā **samanuyuñjanti nāma**. Pucchā hi anuyogoti. Tenādhiyatāya laddhiyā anuvajjanattham̄ paccanubhāsanena puna paṭijānāpanam̄ paṭiṭṭhāpanam̄, tam̄ panassa ādāya samādāpanam̄ viya hotīti āha “**samanugāhanti nāmā**”ti. Tassā pana laddhiyā anuyuñjitāya vuccamānampi kāraṇam̄ kāraṇapatirūpakamevāti tassa pucchanaṃ **samanubhāsanam̄**. **Anudhanaṭṭhena** anupāyapaṭipattiyā sampati āyatiṅca anudhanaṭṭhena. **Mahābhītāpanaṭṭhena** anavaṭṭhitasabhāvatāya. **Ittarapaccupaṭṭhānaṭṭhena** muhuttaramaṇiyatāya. **Tāvakālikatṭhena** parehi abhibhavanīyatāya. **Sabbaṅgapaccaṅgapalibhañjanaṭṭhena** chedanabhedanādiadhikaraṇabhāvena. Ugghātasadisatāya **adhikuṭṭanaṭṭhena**. Avāṇe vaṇam̄ uppādetvā anto anupavisanasabhāvatāya **vinivijjanaṭṭhena**. Diṭṭhadhammikasamparāyikaanattanimittatāya **sāsaṅkasappaṭibhayaṭṭhena**. **Diṭṭhithāmenāti** tassā diṭṭhiyā thāmagatabhāvena. **Diṭṭhiparāmāsenāti** diṭṭhisāṅkhātaparāmāsanena. Diṭṭhiyeva hi dhammasabhāvaṃ atikkamitvā parato āmasanena parāmāso. **Abhinivissāti** taṇhābhinivesapubbaṅgamena diṭṭhābhinivesena “idamevettha tatha”nti abhinivisitvā. **Yasmā hi abhinivesanam̄ tattha abhiniviṭṭham̄ nāma hoti**. Tasmā āha “**adhiṭṭhahitvā**”ti.

**235. Natthīti vattukāropīti** attano laddhim̄ niguhetukāmatāya avajānitukāmopi. **Sampaṭicchati** paṭijānāti. **Dve kathāti** viṣam̄vādanakatham̄ sandhāya vadati. Abhūtakathā hi pubbe pavattā bhūtakathāya vasena dve kathāti vuccati.

**236. Kassa kho nāmāti** iminā satthā “na mama tuyham̄ tādisassa atthāya dhammadesanā nāma bhūtapubbā”ti dasseti. Tenāha “**khattiyassa vā**”tiādi.

Ñāṇamayā usmā etassa atthīti usmī, tathārūpehi paccayehi anusmīkato tasmim̄ attabhāve paṭivedhagabbhoapi **usmīkatoti** vikatabhāvato paññābījamaṃsa imasmim̄ dhammavināyehi nu atthīti bhagavā bhikkhū pucchati. Te **paṭikkhipantā vadanti** ṭhānagatena duccharitena ñāṇupahatabhāvaṃ sampassantā. **Nittejabhūtoti** nittejam̄ bhūto tejohānippatto. Tato eva bhikkhūnampi sammukhā

oloketum asamatthatāya **pattakkhandho** adhomukho. Sahadhammikaṃ kiñci vattum avisahanato **appaṭibhāno**. **Sampattūpaganti** sampattiāvahaṃ. **Paṭippassambhenti** paṭisedhento.

**237.** Antarāyakaraladdhiyā sabhāvavibhāvanena **parisaṃ sodheti**. **Nissāreti** nīharati avisuddhadiṭṭhitāya. **Kassaci** buddhānubhāvaṃ ajānantassa. Tassa hi evaṃ bhaveyya “sahasā kathita”nti. Na hi kadāci buddhānaṃ sahasā kiriyā nāma atthi. **Assāti** “kassaci”ti vuttabhikkhussa. **Sutvāpi tuṅhībhāvaṃ āpajjeyyāti** athāpi siyāti sambandho. **Taṃ sabbanti** “sace hī”tiādīnā vuttam sabbam parikkappanaṃ. **Na karissantīti** parisāya laddhiṃ sodhetīti sambandho. **Laddhiṃ pakāsentoti** mahāsāvajjatāvasena pakāseno. **Saññāvitakkehi** subhanimittānubyañjanaggāhādivasena pavattehi saññāvitakkehi. Tenāha “**kilesakāmasampayuttehi**”ti. **Methunasamācāranti** idaṃ adhikāravasena vuttam. Tadaññampi pana – “apica kho mātugāmassa ucchādanaṃ parimaddanaṃ nahāpanaṃ sambāhanaṃ sādīyatī”tiādīnā (a. ni. 7.50) āgataṃ visabhāgavattuvisayaṃ āmisaparibhogaṃ. “Aññatreva kāmehi aññatra kāmasaññāhi aññatra kāmavitakkehi samācarissatī”ti **netam ṭhānaṃ vijjati**.

**238.** Yoniso paccavekkhaṇena natthi ettha chandarāgoti nicchandarāgo, taṃ **nicchandarāgaṃ**. Kadāci uposathikabhāvena samādinnaṣīlāpi honti kadāci notī **anibaddhasīlānaṃ gahaṭṭhānaṃ**. Sīlasamādānabhāvato **antarāyakaraṃ**. Vatthukāmānaṃ **sacchandarāgaparibhogaṇca**. Apaccavekkhaṇena **bhikkhūnaṃ āvaraṇakaraṃ**. Paccayānaṃ **sacchandarāgaparibhogaṇca**. Ayaṃ ariṭṭho duggahitāya pariyattiyā vasena amhe ceva abbhācikkhati, attānaṇca khanati, bahuṇca apuññaṃ pasavatīti evaṃ saññā mā hontūti **duggahitāya pariyattiyā dosaṃ dassento āha**. **Uggaṇhantīti** sajjhāyanti ceva vācugataṃ karontā dhārenti cāti attho.

**Suttanti**ādīnā navappabhedampi pariyattidhammaṃ pariyādiyati. Kathaṃ suttaṃ navappabhedam? Sagāthakañhi suttaṃ **geyyaṃ**, nigāthakaṃ suttaṃ **veyyākaraṇaṃ**, tadubhayavinimuttaṇca suttaṃ udānādivisesasaññāvirahitaṃ natthi, yaṃ suttaṅgaṃ siyā, maṅgalasuttādīnaṇca suttaṅgasaṅgaho na siyā gāthābhāvato dhammapadādīnaṃ viya, geyyaṅgasaṅgaho vā siyā sagāthakattā sagāthāvaggassa viya, tathā ubhatovibhaṅgādīsu sagāthakappadesānanti? Vuccate –

Suttanti sāmāññavidhi, visesavidhayo pare;  
Sanimittā nirūḷhattā, sahatāññena naññato. (dī. ni. ṭī. 1.nidānakathāvaṇṇanā; a. ni. ṭī. 2.4.6;  
sārattha. ṭī. 1.bāhiraṇidānakathā);

Sabbassapi hi buddhavacanassa suttanti ayaṃ **sāmāññavidhi**. Tenevāha āyasmā mahākaccāno **nettiyaṃ** (netti. 1.saṅgahavāra) “navavidhasuttantapariyeṭṭhi”ti. “Ettakaṃ tassa bhagavato suttagataṃ suttapariyāpannaṃ (pāci. 655, 1242), sakavāde pañca suttasatānī”ti (dha. sa. aṭṭha. nidānakathā; kathā. aṭṭha. nidānakathā) evamādi ca etassa atthassa sādhaṃ. Tadekadesesu pana geyyādayo **visesavidhayo** tena tena nimittena paṭiṭṭhitā. Tathā hi geyyassa sagāthakattaṃ tabbhāvanimittaṃ. Lokepi hi sasiloṃ sagāthakaṃ vā cuñṇiyaganthaṃ “geyya”nti vadanti. Gāthāvirahe pana satī puccham katvā vissajjanabhāvo veyyākaraṇassa tabbhāvanimittaṃ. Pucchāvissajjanañhi “byākaraṇa”nti vuccati, byākaraṇameva veyyākaraṇaṃ.

Evaṃ sante sagāthakādīnampi puccham katvā vissajjanavasena pavattānaṃ veyyākaraṇabhāvo āpajjati? Nāpajjati geyyādisaññānaṃ anokāsabhāvato, “gāthāvirahe satī”ti visesitattā ca. Tathā hi dhammapadādīsu kevalaṃ gāthābandhesu, sagāthakattepi somanassaññāmayikagāthāyuttesu, “vuttañheta”nti (itivu. 1) ādivacanasambandhesu, abbhutadhammapaṭisaṃyuttesu ca suttavisesesu yathākkamaṃ gāthā-udāna-itivuttaka-abbhutadhamma-saññā paṭiṭṭhitā, tathā satipi gāthābandhabhāve bhagavato atītasu jāṭīsu cariyānubhāvappakāsakesu jātakasaññā, satipi pañhavissajjanabhāve sagāthakatte ca kesuci suttantesu vedassa labhāpanato vedallasaññā paṭiṭṭhitāti evaṃ tena tena sagāthakattādīnā nimittena tesu tesu suttavisesesu geyyādisaññā paṭiṭṭhitāti visesavidhayo suttaṅgato pare geyyādayo. Yaṃ panettha geyyaṅgādīnimittarahitaṃ, taṃ suttaṅgaṃ visesasaññāparihārena

sāmaññasaññāya pavattanatotī. Nanu ca sagāthakaṃ suttaṃ geyyaṃ, niggāthakaṃ suttaṃ veyyākaraṇanti suttaṅgaṃ na sambhavatīti codanā tadavatthā evāti? Na tadavatthā sodhitattā. Sodhitañhi pubbe “gāthāvirahe sati pucchāvissajjanabhāvo veyyākaraṇassa tabbhāvanimitta”nti.

Yañca vuttaṃ “gāthābhāvato maṅgalasuttādīnaṃ suttaṅgasaṅgaho na siyā”ti (khu. pā. 5.1; su. ni. 261), taṃ na, **nirulhata**. Nirulho hi maṅgalasuttādīnaṃ suttabhāvo. Na hi tāni dhammapadabuddhavaṃsādayo viya gāthābhāvena paññātāni, kintu suttabhāvene. Teneva hi **aṭṭhakathāyaṃ** “suttanāmaka”nti nāmaggaṇaṃ kataṃ. Yaṃ pana vuttaṃ “sagāthakattā geyyaṅgasaṅgaho siyā”ti, tadapi natthi, yasmā **sahatāññena**. Saha gāthāhīti hi sagāthakaṃ, sahabhāvo ca nāma atthato aññena hoti, na ca maṅgalasuttādīsū gāthāvinimutto koci suttapadeso atthi, yo “saha gāthāhī”ti vucceyya, na ca samudāyo nāma koci atthi. Yadapi vuttaṃ “ubhatovibhaṅgādīsū sagāthakappadesānaṃ geyyaṅgasaṅgaho siyā”ti, tadapi **na aññato**. Aññā eva hi tā gāthā jātakādipariyāpannattā, ato na tāhi ubhatovibhaṅgādīnaṃ geyyaṅgabhāvoti. Evaṃ suttādīnaṃ aṅgānaṃ aññamaññasankarābhāvo veditabbo.

**Atthathanti** atthabhūtaṃ yathābhūtaṃ atthaṃ. Anattampi keci vipallāsavasena “attho”ti gaṇhantīti “atthatta”nti visesetvā vuttaṃ. **Kāraṇatthanti** kāraṇabhūtaṃ atthaṃ, sīlaṃ samādhissa kāraṇaṃ, samādhi vipassanāyāti evaṃ tassa tassa kāraṇabhūtaṃ atthaṃ. Tenāha “**imasmim̐ ṭhāne sīla**”ntiādi. Tenetaṃ dasseti – imasmim̐ ṭhāne sīlaṃ kathitaṃ, tañca yāvadeva samādatthaṃ, samādhi vipassanatto, vipassanā maggatthā, maggo phalatto, vaṭṭaṃ kathitaṃ yāvadeva vivaṭṭādhiḡamatthanti jānituṃ na sakkontīti. Evaṃ pāliyaṃ “attha”nti iminā bhāsitatthapayojanattānaṃ gahitattā veditabbā. **Na pariggaṇhantīti** na vicārentī, nijjhānapaññakkhamā na honti, nijjhāyitvā paññāya rocetvā gahetabbā na hontīti adhippāyo. **Iti** evaṃ etāya pariyattiyā **vādappamokkhānisamsā** attano upari parehi āropitavādassa niggahassa mokkhapayojanā hutvā dhammaṃ pariyāpuṇanti. **Vādappamokkho** vā nindāpamokkho. **Yassa cāti** yassa ca sīlādipūraṇena pattabbassa, maggassa vā tadadhigamena pattabbassa, phalassa vā tadadhigamena pattabbassa, anupādāvimokkhassa vā atthāya. **Dhammaṃ pariyāpuṇanti**, ñāyena pariyāpuṇantīti adhippāyo. **Nānubhonti** na vindanti. **Tesaṃ te dhammā duggahitā** upārambhamānadappamakkhapaḷāsādihetubhāvena **dīgharattaṃ ahitāya dukkhāya saṃvattanti**.

**239.** Alaṃ pariyatto gado assāti **alagaddo** anunāsikalopaṃ da-kārāgamañca katvā. Vaṭṭadukkhakantārato nittharaṇattāya pariyatti **nittharaṇapariyatti**. Bhaṇḍāgāre niyutto bhaṇḍāgāriko, bhaṇḍāgāriko viya bhaṇḍāgāriko, dhammaratanānupālako. Aññaṃ atthaṃ anapekkhitvā bhaṇḍāgārikasseva sato pariyatti **bhaṇḍāgārikapariyatti**. “Vamsānurakkhakovā”ti avadhāraṇaṃ sīhāvalokanañāyena **tantidhārakova pavēṇipālakovāti** purimapadadvayepi yojetabbā.

Yadi tantidhāraṇādiatthaṃ buddhavacanassa pariyāpuṇanaṃ bhaṇḍāgārikapariyatti, kasmā “khīṇāsavassā”ti visesetvā vuttaṃ, nanu ekaccassa puthujjanassapi ayaṃ nayo labbhatīti anuyogaṃ sandhāyāha “**yo panā**”tiādi. **Attano ṭhāneti** nittharaṇaṭṭhāne. Kāmaṃ puthujjano “paveṇim̐ pālessāmī”ti ajjhāsāyena pariyāpuṇāti. Attano pana bhavakantārato anittiṇṇattā tassa sā pariyatti nittharaṇapariyatti eva nāma hotīti adhippāyo. Tenāha “**puthujjanassā**”tiādi.

**Nijjhānaṃ khamantīti** nijjhānapaññaṃ khamanti. Tattha tattha āgate sīlādihamme nijjhāyitvā paññāya rocetvā yāthāvato gahetabbā honti. Tenāha “**idha sīla**”ntiādi. Na kevalaṃ suggahitaṃ pariyattim̐ nissāya maggabhāvanāphalasacchikiriya, paravādaniggahasakavādapatitṭhāpanādīnipi ijjhantīti dassetuṃ “**paravāde**”tiādi vuttaṃ. Tenāha “uppannaṃ parappavādaṃ sahadhammena suniggahaṃ niggahitvā”tiādi (dī. ni. 2.268). **Icchiticchitattānanti** ditṭhiviniveṭhanādivasena icchitaṃ icchitaṃ pālipadesaṃ. **Mocetunti** apanetuṃ. Ahitāya dukkhāya asaṃvattanampi tadabhāve uppajjanakahitasukhassa kāraṇameva tasmim̐ sati bhāvatoti. Suggahitaalagaddassapi hitāya sukhāya saṃvattanatā daṭṭhabbā.

**240.** Uttaranti etenāti uttaro, sinanti bandhantīti setu, uttaro ca so setu cāti **uttarasetu**. Kūlaṃ paratīraṃ vahati pāpetīti **kullaṃ**. **Kalāpaṃ katvā baddhoti** veḷunaḷādīhi kalāpavasena baddho. **Aṇunti** idaṃ aṭṭhasamāpattīārammaṇaṃ saññojanaṃ sandhāya vadati. **Thūlanti** itaraṃ. **Diṭṭhinti** yathābhūtaḍassanaṃ, vipassananti attho. **Evam parisuddhaṃ evaṃ pariyodātanti** tebhūmaḍesu dhammesu ñātaṃ “netam mama, nesohamasmi, na meso attā”ti, evaṃ taṇhādīṭṭhisamkilesābhāvena sabbaso visuddhaṃ, parisuddhattā eva pariyodātaṃ. **Na allīyethāti** nikantivasena na nissayetha. **Na kelāyethāti** na mamāyetha. **Na dhanāyethāti** dhanaṃ drabyaṃ na kayirātha. **Ubhayatthāti** samathe vipassanāya ca.

**Asaddhammeti**ādīsu asataṃ hīnājjhāsayaṇaṃ dhammoti **asaddhammo**. Gāmaḍvāsīnaṃ dhammoti **gāmadhammo**. Kilesānaṃ vassanasabhāvatāya **vasaladhammo**. Kilesehi dūsittatā thūlattā ca **duṭṭhullo**. Udaḍasuddhipariyosānatāya **odakantiko**. “Dhammāpi vo pahātabbā”ti **imināpi ovādena** bhikkhū uddissa kathentopi **arīṭṭhamyeva niggaṇhāti**.

**241. Tividhaggāhavasena**ti taṇhāmānadiṭṭhiggāhavasena. Yadi evaṃ “**ahaṃ mamāti gaṇhāti**”ti gāhadvayameva kasmā vuttanti? Nayidamevaṃ tatthāpi gāhattayasseva vuttattā. “Aha”nti hi iminā mānadiṭṭhiggāhā vuttā “ahamasmi”ti gāhasamāññato. **Diṭṭhipi diṭṭhiṭṭhānaṃ** purimuppānāya diṭṭhiyā uttaradiṭṭhiyā sakkāyadiṭṭhiyā sassatadiṭṭhiyā ca kāraṇabhāvato. **Ārammaṇaṃ** pañca khandhā, rūpārammaṇādīni ca. **Diṭṭhiyā paccayo** avijjā-phassa-saññā-vitakka-ayonisomanasikāra-pāpamittaparatoḍhosādiko diṭṭhiyā upanissayādipaccayo. Vuttañhetam **paṭisambhidāyaṃ** (paṭi. ma. 1.124)“katamāni aṭṭha diṭṭhiṭṭhānāni avijjāpi phassopi saññāpi vitakkopi ayonisomanasikāropi pāpamittopi paratoḍhosopi diṭṭhiṭṭhāna”ntiādi. **Rūpārammaṇāti** ruppanasabhāvadhammārammaṇā. **Rūpaṃ pana attāti na vattabbaṃ** idha “rūpaṃ attato samanupassati”ti (saṃ. ni. 3.81, 345) imassa gāhassa anadhippetattā. So hi “yampi tam diṭṭhiṭṭhāna”ntiādinā parato vuccati. Idha pana “rūpavantaṃ attānaṃ samanupassati, attani rūpaṃ, rūpasmiṃ attāna”nti ime tayo gāhā adhippetāti keci, tadayuttaṃ. Yasmā rūpaṃ attā na hoti, attaggāhassa pana ālambanaṃ hoti, attasabhāveyeva vā rūpādidhamme ārabba attadiṭṭhi uppajjati, na attānaṃ tassa paramatthato anupalabbhanaḍo, tasmā rūpādiārammaṇāva attadiṭṭhīti katvā vuttaṃ, rūpaṃ pana “attā”ti na vattabbanti ayamettha attho. “Yampi tam diṭṭhiṭṭhāna”ntiādinā pana vipassanāpaṭivipassanā viya diṭṭhianupassanā nāma dassitā.

Gandharasaphoṭṭhabbāyatanānaṃ sampattagāhindriyavisayatāya patvā gahetabbatā. Tañhi tassa attano visayaṃ paribhuvā sambandhaṃ hutvā gaṇhāti. **Avasesāni sattāyatanāni viññātaṃ nāma** manasā viññātabbato. Aññathā itaresampi viññātatā siyā. **Pattanti** adhigataṃ. **Pariyesitanti** gavesitaṃ. **Anuvaritanti** cintitaṃ. Tenāha “**manasā**”ti. Ettha ca pattapariyesanānaṃ apaṭikkhepassa, viṣuṃ, ekajjhaṃ paṭikkhepassa ca vasena catukkoṭikaṃ dassetvā pattapariyesitehi anuvaritassa bhedaṃ dassetuṃ “**lokasmīhī**”tiādi vuttaṃ. **Pariyesitvā pattam** paṭhamam cetasā pacchā kāyena pattattā **pattam nāma**. **Pariyesitvā nopattam pariyesitam nāma** kevalam pariyesitabhāvato. **Apariyesitvā pattañca nopattañca** manasā anuvaritabbato **manasānuvaritam nāma**.

Ayañca vikappo ākulo viyāti “**atha vā**”tiādi vuttaṃ. **Pattatṭhenāti** pattabhāvena pattatāsamaññena. **Apariyesitvā nopattam manasānuvaritam nāma** pattiyā pariyesanāya ca abhāvato. **Sabbaṃ vā etanti** “pariyesitvā pattampī”tiādinā vuttaṃ catubbidhampi. **Imināti** “yampi tam diṭṭhiṭṭhānaṃ”tiādivacanena. **Viññāṇārammaṇā taṇhāmānadiṭṭhiyo kathitā** pārisesaññāyena. Evaṃ pārisesaññāpariggahe kiṃ payojananti āha “**desanāvīlāsenā**”tiādi. Yesam vineyyānaṃ desetabbadhammassa sarūpaṃ anāmasitvā ārammaṇakicca-sampayuttadhamma-phalavisesādi-pakārantaravibhāvanena paṭivedho hoti, tesam tappakārabhedehi dhammehi, yesam pana yena ekeneva pakārena sarūpeneva vā vibhāvane kate paṭivedho hoti, tesam tam vatvā dhammissarattā tadaññam niravasesākāravibhāvanañca **desanāvīlāso**. Tenāha “**diṭṭhādiārammaṇavasena viññānaṃ dassita**”nti.

**Diṭṭhiṭṭhānanti** diṭṭhi eva diṭṭhiṭṭhānaṃ, tam heṭṭhā vuttanayameva. Yam rūpaṃ esā diṭṭhi “loko ca

attā cā”ti gaṇhāti. Taṃ rūpaṃ sandhāya “so loko so attā”ti vacanaṃ vuttanti yojanā. **So pecca bhavissāmīti** uddhamāghātanikavādavasenāyaṃ diṭṭhīti āha “**so ahaṃ paralokaṃ gantvā nicco bhavissāmī**”tiādi. **Dhuvoti** thiro. **Sassatoti** sabbadābhāvī. **Avipariṇāmadhammoti** jarāya maraṇena ca avipariṇāmetabbasabhāvo, nibbikāroti attho. **Tampi dassananti** tampi tathāvuttaṃ diṭṭhidassanaṃ attānaṃ viya taṇhādiṭṭhiggāhaviseseṇa gaṇhāti. Tenāha “**etaṃ mamā**”tiādi. **Diṭṭhārammaṇāti** diṭṭhivisaṃyā. Kathaṃ pana diṭṭhi diṭṭhivisaṃyā hotīti āha “**vipassanāyā**”tiādi. **Paṭivipassanākāleti** yamakato sammasanādikālaṃ sandhāyāha. Tattha akkharacintakānaṃ sadde viya, vedajjhāyīnaṃ vedasatthe viya ca diṭṭhiyaṃ diṭṭhigatikānaṃ diṭṭhiggāhappavatti daṭṭhabbā.

**Samanupassatīti** padassa ca tasso samanupassanā atthoti yojanā. Tena samanupassanā nāma catubbidhāti dasseti. Tattha ñānaṃ tāva samavisamaṃ sammā yāthāvato anupassatīti **samanupassanā**. Itarā pana saṃkilesavasena anu anu passantīti **samanupassanā**. Yadi evaṃ hotu tāva diṭṭhisamanupassanā micchādassanabhāvato, kathaṃ taṇhāmānāti? Taṇhāyapī sattānaṃ pāpakaraṇe upāyadassanavasena paññāpatirūpikā pavatti labbhateva, yāya vañcananikatisāciyogā sambhavanti. Mānopī seyyādinā dassanavaseneva tathā attānaṃ ūhatīti taṇhāmānānaṃ samanupassanāpatirūpikā pavatti labbhatīti daṭṭhabbaṃ. **Avijjamāneti** “etaṃ mamā”ti evaṃ gahetabbe taṇhāvattusmiṃ ajjhatakkhandhapañcake anupalabbhamāne vinaṭṭhe. **Na paritassati** bhayaparittāsataṇhāparittāsānaṃ maggena samugghātītattā.

**242. Catūhi kāraṇehīti** “asati na paritassatī”ti vuttampi itarehi tīhi saha gahetvā vuttaṃ. **Catūhi kāraṇehīti** catukkoṭikasūññatākathanassa kāraṇehi. **Bahiddhā asatīti** bāhire vatthusmiṃ avijjamāne. Sā panassa avijjamānatā laddhavināseṇa vā aladdhālābhena vāti pāliyaṃ – “ahu vata me, taṃ vata me natthi, siyā vata me, taṃ vatāhaṃ na labhāmī”ti vuttanti tadubhayaṃ parikkhāravasena vibhajitvā tattha paritassanaṃ dassetuṃ “**bahiddhā parikkhāravīnāse**”tiādi vuttaṃ. Tattha **yānaṃ** “ratho vayha”nti evamādi. **Vāhanaṃ** hatthiassādi.

**Yehi kilesehīti** yehi asantapatthanādīhi kilesehi. **Evaṃ bhaveyyāti** evaṃ “ahu vata me”tiādinā codanādi bhaveyya. **Diṭṭhiṭṭhānādhiṭṭhānapariyutṭhānābhinivesānusayānanti** ettha aparāparaṃ pavattāsu diṭṭhīsu yā parato uppannā diṭṭhiyo, tāsāṃ purimuppannā diṭṭhiyo kāraṇatṭhena **diṭṭhiṭṭhānāni**. Adhikaraṇatṭhena **diṭṭhādhiṭṭhānāni**, pariyutṭhānappattiyā sabbāpi **diṭṭhipariyutṭhānāni**. “Idameva saccaṃ moghamāñña”nti (ma. ni. 2.202, 427; 3.27-29; udā. 55; mahāni. 20; netti. 59) pavattiyā **abhinivesā**. Appahīnabhāvena santāne sayantīti **anusayāti** evaṃ diṭṭhiṭṭhānādīnaṃ padānaṃ vibhāgo veditabbo. Taṇhādīhi kampaniyatāya sabbasaṅkhārāva iñjitānīti **sabbasaṅkhārāiñjitāni**. Sesapadadvayepi eseva nayo. Upadhīyati ettha dukkhanti upadhi, khandhāva upadhi **khandhūpadhi**. Esa nayo sesesupi. Tadeva ca āgamma taṇhā khīyati virajjati nirujjhatīti yojanā. **Ucchijjissāmi nāmassūti**ādīsu nipātamattaṃ, saṃsaye vā. **Tāsoti** attaniyābhāvaṃ paṭicca taṇhāparittāso ceva bhayaparittāso ca. Tenāha “**tāso heso**”tiādi. **No cassam, no ca me siyāti** “aha”nti kira koci no cassam, “me”ti ca kiñci no siyāti. Tāsappatīkārādassanañhetam.

**243. Ettāvātāti** “evaṃ vutte”tiādinā, pucchānusandhivasena pavattāya “chayimāni, bhikkhave, diṭṭhiṭṭhānāni”tiādinā (ma. ni. 1.241) vā. Sāpi hi ajjhatakkhandhavināse paritassanaṃ dassetvā aparitassanaṃ dassentī pavattāti tassanaṃ suññatādassanaṃ akiccasādhakampi suññatādassanamevāti imesaṃ vasena “**catukkoṭikā suññatā kathitā**”ti vuttaṃ. **Bahiddhā parikkhāraṇanti** bāhiraṃ saviññānaṃ aviññānaṃ sattopakaraṇaṃ. Tañhi jīvitavuttiyā parikkhāraṇatṭhena “parikkhāro”ti vuttaṃ. **Pariggahaṃ nāma katvāti** “**mama** ida”nti pariggahetabbatāya pariggahitaṃ nāma katvā. Sabbopi diṭṭhiggāho “attā nicco dhuvo sassato, attā ucchijjati vinassatī”tiādinā attadiṭṭhisannissayoyevāti vuttaṃ “**sakkāyadiṭṭhipamukhā dvāsattādiṭṭhiyo**”ti. Ayāthāvaggāhinā abhinivesanapaññāpanānaṃ upatthambhabhāvato diṭṭhi eva nissayoti **diṭṭhinissayo**. **Pariggaṇheyyāti** niccādivisesayuttaṃ katvā pariggaṇheyya. Kimevaṃ pariggahetuṃ sakkuṇeyya? **Sabbatthāti** “taṃ, bhikkhave, attavādupādānaṃ upādiyetha, taṃ, bhikkhave, diṭṭhinissayaṃ nissayetha”ti etesupi.

**244. Attani vā satīti** yassa attano santakabhāvena kiñci attaniyanti vucceyya, tasmim attani sati, so eva pana attā paramatthato natthīti adhippāyo. Sakkā hi vattum bāhirakaparikkappito attā “paramattho”ti? Siyā khandhapañcakaṃ ñeyyasabhāvattā yathā taṃ ghaṭo, yadī pana tadaññaṃ nāma kiñci abhavissa, na taṃ niyamato viparītaṃ siyāti? Na ca so paramatthato atthi pamāñehi anupalabbhamānattā turaṅgamavisāṇaṃ viyāti. **Attaniye vā parikkhāre satīti** “idaṃ nāma attano santaka”nti tassa kiñcanabhāvena nicchite kismiñci vatthusmim sati. Attano idanti hi attaniyanti. **Ahanti satīti** “ahaṃ nāmāya”nti ahaṃkāravatthubhūte paramatthato niddhāritasarūpe kismiñci sati tassa santakabhāvena mamāti kiñci gahetuṃ yuttaṃ bhaveyya. **Mamāti sati** “aha”nti etthāpi eseva nayo. Iti paramatthato attano anupalabbhamānattā attaniyaṃ kiñci paramatthato natthevāti sabbasañkhārānaṃ anattatāya anattaniyataṃ, anattaniyatāya ca anattakataṃ dasseti. **Bhūtatoti** bhūtatthato. **Tathatotī** tathasabhāvato. **Thiratoti** thitasabhāvato nibbikārato.

**Yasmā hutvā na hotīti** yasmā pubbe asantaṃ paccayasamavāyena hutvā uppajjitvā puna bhaṅgupagamena na hoti, tasmā na niccanti **aniccaṃ**, adhuvanti attho. Tato eva **uppādavayavattitoti** uppajjanavasena nirujjhanavasena ca pavattanato. Sabhāvavigamo idha **vipariṇāmo**, khaṇikatā **tāvakālikatā**, nicasabhāvābhāvo eva **niccapaṭikkhepo**. Aniccadhammā hi teneva attano aniccabhāvena atthato niccataṃ paṭikkhipanti nāma. Tathā hi vuttaṃ “na niccanti anicca”nti. Uppādajarābhāṅgavasena rūpassa niranārabādhatāti paṭipīḷanākārenassa **dukkhatā**. **Santāpo** dukkhadukkhatādivasena santāpanaṃ paridhanaṃ, tato evassa dussahatāya **dukkhamatā**. Tissannaṃ dukkhatānaṃ saṃsāradukkhasa ca adhiṭṭhānatāya **dukkhavatthukatā**. Sukhasabhāvābhāvo eva **sukhapaṭikkhepo**. **Vipariṇāmadhammanti** jarāya maraṇena ca vipariṇāmanasabhāvaṃ. Yasmā idaṃ rūpaṃ paccayasamavāyena uppādaṃ, uppādānantaraṃ jaraṃ patvā avassameva bhijjati, bhinnañca bhinnameva, nāssa kassaci saṅkamoti bhavantarānupagamanaśākhātena saṅkamābhāvena vipariṇāmadhammataṃ pākaṭaṃ kātuṃ “**bhavaśānkanti upagamanasabhāva**”nti vuttaṃ. **Pakatibhāvavijhanaṃ** sabhāvavigamo nirujjhanameva. Nti aniccaṃ dukkhaṃ vipariṇāmadhammaṃ rūpaṃ. **Imināti** “no hetuṃ, bhante”ti rūpassa taṇhādiggāhānaṃ vatthubhāvapaṭikkhepena. Rūpañhi uppannaṃ thitim mā pāpuṇātu, thitippattaṃ mā jīratu, jarappattaṃ mā bhijjatu, udayabbayehi mā kilamiyatūti na ettha kassaci vaśībhāvo atthi, svāyamaśsa avasavattanaṭṭho anattatāśallakkaṇassa kāraṇaṃ hotīti āha “**avasavattanākārena rūpaṃ, bhante, anattāti paṭijānanti**”ti. Nivāsikāravatthadakkhāyavirahena tato suññatā **suññatṭho**, sāmibhūtassa kassaci abhāvo **assāmikaṭṭho**, yathāvuttavasavattibhāvābhāvo **anissaraṭṭho**, paraparikappitaattasabhāvābhāvo eva **attapaṭikkhepaṭṭho**.

Yasmā aniccalakkaṇena viya dukkhalakkaṇaṃ, tadubhayena anattalakkaṇaṃ suviññāpayāṃ, na kevalaṃ, tasmā tadubhayenettha anattalakkaṇavibhāvaṃ katanti dassento “**bhagavā hī**”tiādīmāha. Tattha **aniccavasenāti** aniccatāvasena. **Dukkhasavenāti** dukkhatāvasena. **Na upapajjatīti** na yujjati. Tameva ayujjamānataṃ dassetuṃ “**cakkhussa uppādopi**”tiādi vuttaṃ. Yasmā attavādī attānaṃ niccaṃ paññāpeti, cakkhuṃ pana aniccaṃ, tasmā cakkhu viya attāpi anicca āpanno. Tenāha “**yassa kho panā**”tiādi. Tattha **vetīti** vigacchati nirujjhati. **Iti cakkhu anattāti** cakkhussa udayabbayavantatāya aniccatā, attano ca attavādinā aniccatāya anicchitattā cakkhu anattā.

Kāmaṃ **anattalakkaṇasutte** (saṃ. ni. 3.59; mahāva. 20) – “yasmā ca kho, bhikkhave, rūpaṃ anattā, tasmā rūpaṃ ābādāya saṃvattatī”ti rūpassa anattatāya dukkhatā vibhāvītā viya dissati, tathāpi “yasmā rūpaṃ ābādāya saṃvattati, tasmā anattā”ti pākaṭatāya sabbādhatāya rūpassa attasārābhāvo vibhāvito, tato eva ca “na labbhati rūpe evaṃ me rūpaṃ hotu, evaṃ me rūpaṃ mā ahoṣī”ti rūpe kassaci anissaratā, tassa ca avasavattanākāro dassitoti āha “**dukkhasavena anattataṃ dasseti**”ti. **Yadaniccaṃ taṃ dukkhanti** yaṃ vatthu aniccaṃ, taṃ dukkhaṃ udayabbayapaṭipīḷitattā, yaṃ pana niccaṃ tadabhāvato, taṃ sukhaṃ yathā taṃ nibbānanti adhippāyo. **Yaṃ tanti** kāraṇaniddesovāyaṃ, yasmā rūpaṃ aniccaṃ, taṃ tasmāti attho. **Yaṃ dukkhaṃ tadanattāti** ettha vuttanayeneva attho veditabbo. **Aniccanti** iminā ghaṭādi viya paccayuppannattā rūpaṃ aniccanti imamatthaṃ dasseti. Imināva nayena “anattā”ti vattum labbhamānepi “**anattā**”ti **vattā nāma natthi**. **Evaṃ dukkhanti vadantīti** etthāpi

yathārahaṃ vattabbaṃ “akkhisūlādivikārappattakāle viya paccayuppannattā dukkhaṃ rūpa”ntiādinā. **Duddasaṃ duppaññāpanaṃ**. Tathā hi sarabhaṅgādayopi sathhāro nāddasaṃsu, kuto paññāpanā. **Tayidaṃ** anattalakkhaṇaṃ.

**Tasmātihāti**ādinā tiyaddhagatarūpaṃ lakkhaṇattayaṃ āropetvā vuttanti āha “**etarahi aññadāpi**”ti. Taṃ pana yādisaṃ tādīsampi tathā vuttanti ajjhātādivisesopi vattabbo. **Pi**-saddena vā tassāpi saṅgaho daṭṭhabbo.

**245. Ukkaṇṭhatīti** nābhīramati. Aññattha “nibbidā”ti balavavipassanā vuccati, sānulomā pana saṅkhārupekkhā “vuṭṭhānagāminī”ti, sā idha kathaṃ nibbidā nāma jātāti āha “**vuṭṭhānagāminivipassanāya hī**”tiādi. Iminā sikhāpattanibbedatāya vuṭṭhānagāminī idha nibbidānāmena vuttāti dasseti.

“So anupubbena saññaggaṃ phusati”ti (dī. ni. 1.414, 415) vatvā “saññā kho poṭṭhapāda paṭhamaṃ uppajjati, pacchā ñāṇa”nti (dī. ni. 1.416) vuttattā **saññagganti vuttā** lokiyāsu pahānasaññāsu sikhāpattabhāvato. **Dhammaṭṭhitiñāṇanti vuttā** idappaccayatādassanassa matthakappattīti katvā. Tato parañhi asaṅkhatārammaṇaṃ ñāṇaṃ hoti. Tenāha – “pubbe kho susima dhammaṭṭhitiñāṇaṃ, pacchā nibbāne ñāṇa”nti (saṃ. ni. 2.70). **Pārisuddhipadhāniyaṅganti vuttā** maggādhigamassa paripanthabhūtasabbasaṃkilesavisuddhi padhānikassa yogino, padhānabhāvanāya vā jātaṃ aṅganti katvā. **Paṭipadāññānadassanavisuddhīti vuttā** paramukkaṃsagatapaṭipadāññānadassanavisuddhibhāvato. **Atammayatanti** ettha **tammayatā nāma** taṇhā, kāmataṇhādīsu tāya tāya nibbattattā tammayaṃ nāma tebhūmikappavattaṃ, tassa bhāvoti katvā. Tassā taṇhāya pariyādānato vuṭṭhānagāminivipassanā **atammayatāti** vuccati. **Nissāyāti** taṃ atammayaṃ paccayaṃ katvā. **Āgammāti** tasseva vevacanaṃ. **Nānattāti** nānāsabhāvā bahū anekappakārā. **Nānattasitāti** nānārammaṇanissitā rūpādivisayā. **Ekattāti** ekasabhāvā. **Ekattasitāti** ekaṃyeva ārammaṇaṃ nissitā. **Taṃ nissāyāti** taṃ ekattasitaṃ upekkhaṃ paccayaṃ katvā. **Etissāti** etissā upekkhāya. **Pahānaṃ hotīti** aññānupekkhato pabhūti sabbhaṃ upekkhaṃ pajahitvā thitassa “atammayatā”ti vuttāya vuṭṭhānagāminivipassanāya arūpāvacarasaṃpattiupekkhāya vipassanupekkhāya ca pahānaṃ hotīti **pariyādānanti vuttāti**. Sabbasaṅkhāragatassa muñcitukamyatāpaṭisaṅkhānassa sikhāpattabhāvato vuṭṭhānagāminī muñcitukamyatā paṭisaṅkhānanti ca vuttā. Mudumajjhādivasena pavattīkāramattaṃ, atthato **ekatthā** muñcitukamyatādayo, **byañjana**meva **nānaṃ**. **Dvīhi nāme**hīti gotrabhu, vodānanti imehi dvīhi nāmehi.

**Virāgoti maggo**, accantameva virajjati etenāti **virāgo**, tena. **Maggena** hetubhūtena. **Vimuccatīti** paṭippassaddhivimuttivasena vimuccati. Tenāha “**phalaṃ kathita**”nti.

**Mahākhīṇāsavoti** pasamsāvacaṇaṃ yathā “mahārājā”ti. Tathā hi taṃ pasamsanto sathhā “**ayaṃ vuccati, bhikkhave, bhikkhu ukkhittapaligho itipi**”tiādimāhāti. Tadatthaṃ vivaritaṃ “**idāni tassā**”tiādi vuttaṃ. **Yathābhūtehīti** yāthāvato bhūtehi. **Durukkhipanaṭṭhenāti** pacurajanehi ukkhipitaṃ asakkuṇeyyabhāvena. Nibbānanagarappavese vibandhanena paligho viyāti **palighoti vuccati**. Matthakacchinno tālo pattaphalādīnaṃ anaṅgato tālavatthu asive “sivā”ti samaññā viya. Tenāha “**sīsacchinnatālo viya katā**”ti. Punabbhavassa karaṇasīlo, punabbhavaṃ vā phalaṃ arahatīti **ponobhaviko**. Evambhūto pana punabbhavaṃ deti nāmāti āha “**punabbhavadāyako**”ti. **Punabbhavakhandhānaṃ paccayoti** iminā jātisamsāroti phalūpacārena kāraṇaṃ vuttanti dasseti. **Parikkhāti vuccati** santānassa parikkhipanato. **Samkiṇṇattāti** sabbaso kiṇṇattā vināsitatā. **Gabbhīrānugataṭṭhenāti** gambhīraṃ anupaviṭṭhaṭṭhena. **Luñcitvāti** uddharitvā. **Etānīti** kāmarāgasaññājanādīni. **Aggaḷāti vuccanti** avadhāraṇaṭṭhena. Aggamaggena patito mānaddhajo etassāti **patitamānaddhajo**. Itarabhāroropanassa purimapadehi pakāsitatā “**mānabhārasseva oropitattā pannabhāroti adhippeto**”ti vuttaṃ. **Mānasaṃyogeneva viṣaṃyuttattāti** etthāpi eseva nayo. Pañcapi khandhe avisesato asmīti gahetvā pavattamāno “asmimāno”ti adhippetoti vuttaṃ “**rūpe asmīti māno**”tiādi.



Nagaradvārassa parissayapaṭibāhanatthañceva sobhanatthañca ubhosu passesu esikatthambhe nikhaṇitvā ṭhāpentīti āha “**nagaradvāre ussāpīte esikatthambhe**”ti. Pākāraviddhamsaneneva parikkhāya bhūmisamakaraṇaṃ hotīti āha “**pākāraṃ bhindanto parikkhaṃ saṃkiritvā**”ti. Evantiādi upamāsaṃsandanaṃ. Santo saṃvijjamaṇo kāyo dhammasamūhoti **sakkāyo**, upādānakkhandhapañcakaṃ. **Dvattiṃsa kammakāraṇā** dukkhakkhandhe āgatā. Akkhirogasīsarogādayo **aṭṭhanavuti roga**. Rājabhayādīni **pañcavīsati mahābhayāni**.

**246. Anadhigamanīyaviññāpatanti** “idaṃ nāma nissāya iminā nāma ākārena pavattatī”ti evaṃ duviññeyyacittataṃ. **Anvesanti** paccatte ekavacananti āha “**anvesanto**”ti. **Sattopi tathāgatoti vuccati** “tathāgato paraṃ maraṇā”tiādīsu (dī. ni. 1.65) viya. Satto hi yatheko kammakilesehi itthattaṃ āgato, tathā aparopi āgatoti “tathāgato”ti vuccati. **Uttamapuggaloti** bhagavantam sandhāya vadati. **Khīṇāsavopīti** yo koci khīṇāsavopi “tathāgato”ti adhippeto. Sopi hi yatheko catūsu satipaṭṭhānesu sūpaṭṭhitacitto satta bojjhaṅge yathābhūtaṃ bhāvetvā anuttaraṃ arahattaṃ āgato adhigato, tathā aparopi āgatoti “tathāgato”ti vuccati. **Asaṃvijjamānoti** paramatthato anupalabbhānīyo. **Avindeyyoti** na vinditabbo, duviññeyyoti attho.

**Tathāgato satto puggaloti na paññapemi** paramatthato sattasseva abhāvatoti adhippāyo. **Kiṃ paññapessāmi** paññattiupādānassapi dharamānakassa abhāvato. “Anuppādo khemaṃ, anuppatti khema”ntiādīnā asaṅkhatāya dhātuyā pakkhandhanavasena pavattaṃ aggaḥsalasamāpattiattham vipassanācittam vā.

**Tucchāti** karaṇe nissakkavacananti āha “**tucchakenā**”ti. Vinayatīti vinayo, so eva **venayiko**. **Tathā manti** tathābhūtaṃ maṃ. Paramatthato vijjamānassa hi sattassa abhāvaṃ vadanto sattavināsaḥpaññāpako ca nāma siyā, ahaṃ pana paramatthato avijjamānaṃ taṃ “natthi”ti vadāmi. Yathā ca loko voharati, tatheva taṃ voharāmi, tathābhūtaṃ maṃ ye samaṇabrāhmaṇā “venayiko samaṇo gotamo”ti vadantā asatā tucchā musā abhūtena abbhācikkhantīti yojanā. Appaṭisandhikassa khīṇāsavassa carimacittaṃ nirupādānato anupādāno viya jātavedo parinibbutaṃ idaṃ nāma nissitanti na paññāyatīti vadanto kimettāvata ucchedavādī bhāveyya, nāhaṃ kadācīpi atthi, nāpi koci atthīti vadāmi. Evaṃ sante kiṃ nissāya te moghapurisā sato sattassa nāma ucchedaṃ vināsaṃ vibhavaṃ paññāpetīti vadantā asatā...pe... abbhācikkhantīti ayamettha adhippāyo.

**Mahābodhimaṇḍamhīti bodhimaṇḍa**ggahaṇena sattaṣattāhamāha. Tena dhammacakkapavattanaṃ (saṃ. ni. 5.1081; mahāva. 13; paṭi. ma. 2.30) pubbe vuttaṃ tantidesanaṃ vadati. **Catusaccameva paññāpemi**ti etena saccavimuttā satthudesanā natthīti dasseti. Ettha ca – “pubbe ceva etarahi ca dukkhañceva paññāpemi dukkhassa ca nirodha”nti vadanto bhagavā nāhaṃ kadācīpi “attā ucchijjati, vinassatī”ti vā, “attā nāma koci atthi”ti vā vadāmi. Evaṃ sante kiṃ nissāya te moghapurisā “sato sattassa ucchedaṃ vināsaṃ vibhavaṃ paññāpetī”ti asatā tucchena abbhācikkhantīti dasseti. **Pareti** amāmakā, mama ovādassa abhājanabhūtāti atthoti āha “**saccāni...pe... asamatthapuggalā**”ti. **Adhippāyenāti** iminā tesam adhippāyamattaṃ, rosanavihesanāni pana tathāgatassa ākāsaṃ vilikhaṇaṃ viya na sambhavantiyevāti dasseti. Āhanati cittanti **āghāto**. Appatīti honti etenāti **appaccayo**. Cittaṃ na abhirādhayatīti **anabhiraddhi**. **Atuṭṭhīti** tuṭṭhipaṭipakkho tathāpavatto cittuppādo, kodho eva vā.

**Pareti** aññe ekacce. Ānandanti pamodanti etenāti **ānando**, pītiyā evetaṃ adhivacanaṃ. Sobhanamanatā **somanassaṃ**, cetasikasukhassetaṃ adhivacanaṃ. Uppilati purimāvattāya bhijjati visesaṃ āpajjatiṃ uppiḷaṃ, tadeva uppiḷāvitāṃ, tassa bhāvo **uppiḷāvitattaṃ**. Yāya uppannāya kāyacittaṃ vātapūritabhattā viya uddhumāyanākārapattaṃ hoti, tassā gehassitāya odaggiyapītiyā etaṃ adhivacanaṃ. **Saccāni paṭivijjhituṃ asamatthāti** dukkhameva uppajjati nirujjhati ca, na añño satto nāma atthīti evaṃ jānituṃ asamatthā “attā nāma atthi”ti evaṃdiṭṭhino appahīnavipallāsā. Uttamaṃ pasādanīyatthānaṃ **tathāgatampi akkosanti**, kimaṅgaṃ pana bhikkhūti adhippāyo.

247. Anattaniyepi khandhapañcake micchāgāhavasena attaniyasaññāya pavattassa chandarāgassa pahānaṃ. **Amhākaṃ neva attāti** yasmā rūpavedanādiyeva attaggāhavatthu tabbinimuttassa lobhaneyyassa abhāvato. Etaṃ tiṇakaṭṭhasākhāpalāsaṃ na amhākaṃ rūpaṃ, na viññānaṃ, tasmā amhākaṃ neva attāti yojanā. Ajjhātikassa vatthuno neva attāti paṭikkhittatā bāhiravatthu attaniyabhāvena paṭikkhittaṃ hotīti āha “**amhākaṃ cīvarādīparikkhāropi na hotī**”ti. **Khandhapañcakamyevāti** bāhiravatthum nidassanaṃ katvā khandhapañcakamyeva **na tumhākaṃti pajahāpeti. Na uppāṭetvā** kandaṃ viya. **Na luñcitvā vā** kese viyāti. Iminā rūpādīnaṃ nāmamukhena pahānaṃ icchanti. Ullāngitamattaṃ **chandarāgavinayena pajahāpetīti** sarūpato dasseti.

248. “Taṃ kiṃ maññatha, bhikkhave, rūpaṃ niccaṃ vā”tiādi desanā **tiparivaṭṭaṃ. Yāva imaṃ ṭhānanti** “evaṃ svākkhāto”ti yāvāyaṃ pālīpadeso. Suviññeyyabhāvena akkhātattāpi **svākkhātoti** āha “**sukathitattā eva uttāno vivaṭo pakāsito**”ti. Tiriyaṃ vidāraṇena **chinnam**, dīghaso phālanena **bhinnam**, tato eva tattha tattha sibbitagaṇṭhikatajaṇṇavatthaṃ pilotikā, tadabhāvato **chinnapilotiko**, pilotikarahitoti attho. Iriyāpatha-saṇṭhapanāavijjamānājhāna-vīpassanāni chinnāya avijjamānāya paṭipattiyā sibbanagaṇṭhikaraṇasadisāni, tādisaṃ idha natthīti āha “**na hettha...pe... atthī**”ti. **Paṭiṭṭhātuṃ na labhatīti** pesalehi saddhiṃ saṃvāsavasenaṃ paṭiṭṭhātuṃ na labhati, visesādhiṃgamasena pana vattabbameva natthi.

**Kāraṇḍavaṃ niddhamathāti** vipannasīlatāya kacavarabhūtaṃ puggalaṃ kacavaramiva nirapekkhā apanetha. **Kasambuñcāpakassathāti** kasaṭabhūtañca naṃ khattiyādīnaṃ majjhagataṃ sambhinnaṃ paggharitaṃ caṇḍālaṃ viya apakassatha nikkadḍhatha. Kiṃ kāraṇaṃ? Saṅghārāmo nāma sīlavantānaṃ kato, na dussīlānaṃ, yato etadeva. **Tato palāpe vāhetha, assamaṇe samaṇamānineti** yathā palāpā antosārahitā atañḍulā bahi thusena vīhi viya dissanti, evaṃ pāpabhikkhū antosīlahitāpi bahi kāsāvādīparikkhārena bhikkhū viya dissanti, tasmā “palāpā”ti vuccanti, te palāpe vāhetha odhunātha vidhamatha. Paramatthato assamaṇe vesamattena samaṇamānīne evaṃ **niddhamitvāna...pe... patissatīti**. Tattha **kappayavhoti** kappetha, karoṭhāti vuttaṃ hoti. **Patissatīti** pati pati satā sampajānantā suṭṭhu pajānantā. **Patissatā** vā sappatissā aññamaññaṃ sagāravā. Athevaṃ suddhā suddhehi saṃvāsaṃ kappentā diṭṭhisīlasāmaññaṃ **samaggā**. Anukkamena paripākagatapaññatāya **nīpakā**. Sabbassevimassa dukkhavaṭṭassa **antaṃ karissatha**, parinibbānaṃ pāpuṇissathāti attho.

**Vaṭṭaṃ tesam natthi paññāpanāya** sabbaso samucchinnavaṭṭamūlakattā.

Dhammaṃ anussaranti, dhammassa vā anussaraṇasīlati **dhammānusārino**. Evaṃ **saddhānusārino**pi veditabbā. **Paṭipannassatī** paṭipajjamānassa, sotāpattimaggaṭṭhōpi adhippeto. **Adhimattanti** balavaṃ. **Paññāvāhīti** paññaṃ vāheti, pañña vā imaṃ puggalaṃ vahaṭīti paññāvāhītipi vadanti. **Paññāpubbaṅgamaṃti** paññaṃ purecārikaṃ katvā. **Ayaṃ vuccatīti** ayaṃ evarūpo puggalo paññāsānkhātena dhammena sarati anussaratīti **dhammānusārī**. **Saddhāvāhīti** saddhaṃ vāheti, saddhā vā imaṃ puggalaṃ vahaṭīti saddhāvāhītipi vadanti. **Saddhāpubbaṅgamaṃti** saddhaṃ purecārikaṃ katvā. **Ayaṃ vuccatīti** ayaṃ evarūpo puggalo saddhāya sarati anussaratīti **saddhānusārī**. **Saddhāmattanti** “itipi so bhagavā”tiādīnaṃ buddhasubuddhatāya saddahanamattaṃ. Matta-saddena aveccappasādaṃ nivatteti. **Pemamattanti** yathāvuttasaddhānusārena uppannaṃ tuṭṭhimattaṃ. Sinehoti keci. **Evaṃ vipassanaṃ paṭṭhapetvā nisinnānanti** kalāpasammasanādivasena āradhāvīpassanānaṃ. **Ekā saddhāti** vipassanānusārena svākkhātadhammatā siddhā, tato eva ekā seṭṭhā uḷārā saddhā uppajjati. **Ekam pemanti** etthāpi eseva nayo. **Sagge ṭhapitā viya hontīti** tesam saddhāpemānaṃ saggasaṃvattaniyatāya abyabhicārībhāvamāha. **Cūlasotāpannoti vadanti** ekadesena saccānubodhe ṭhitattā. Sesam suviññeyyameva.

Alagaddūpamasuttavaṇṇanāya līnatthappakāsānā samattā.

### 3. Vammikasuttavaṇṇanā

**249. Piyavacananti** piyasamudācāro. Viññujātikā hi paraṃ piyena samudācarantā “bhava”nti vā, “devānaṃ piyo”ti vā, “āyasmā”ti vā samudācaranti, tasmā sammukhā sambodhanavasena “āvuso”ti, tirokkhaṃ “āyasmā”ti ayampi samudācāro. Mahākassapauruvelakassapādayo aññepi kassapanāmakā atthīti “**katarassa kassapassā**”ti pucchanti. **Raññāti** kosalaraññā. “**Sañjānimsū**”ti saṅkhepato vuttamatthaṃ vivarituṃ “**ayaṃ panā**”tiādi āradhāṃ. **Assāti** kumārakassapassa, “sañjānimsū”ti vuttasañjānanassa vā. **Puññāni karontoti** kappasatasahassaṃ devesu ca manussesu ca nibbattivā dānādīni puññāni bhāvento. **Osakkanteti** parihāyamāne. **Paṭhamanti** kumārikākāle. **Satthā upālittheraṃ paṭicchāpesi** taṃ adhikaraṇaṃ vinayakammenevassā bhikkhuniyā pabbajjāya arogabhāvaṃ.

**Paññattivibhāvanāti** “andhavana”ntveva paññāyamānassa vibhāvanā. **Ohiyatīti** saṅkucati saṅikaṃ vattati. **Bhāṇakoti** sarabhāṇako. **Yaṃ atthi, taṃ gahetvāti** idāni pariyesitabbaṭṭhānaṃ natthi, yathāgataṃ pana yaṃ atthi, taṃ gahetvā. **Balavaguṇeti** adhimattaguṇe. Kassapabhagavato kāle niruḷhasamaññāvasena vacanasantatiyā avicchēdēna ca imasmimpi buddhuppāde taṃ “andhavana”ntveva paññāyittha, uparūparivaḍḍhamānāya pathaviyā upari rukkhagacchādīsu sañjāyantesupīti. **Sekkhapaṭipadanti** sekkhabhāvāvahaṃ visuddhipaṭipattiṃ.

**Aññatara**-saddo apākaṭe viya pākaṭepi vattati eka-saddena samānatthattāti dassetuṃ “**abhijānāti**”tiādi vuttaṃ. Bhayabheravadassitampi abhikkanta-saddassa atthuddhāraṃ idha dassento evaṃ heṭṭhā tattha tattha katā atthasaṃvaṇṇanā parato tasmim tasmim suttapadese yathārahaṃ vattabbāti nayadassanaṃ karoti. Kañcanasannibhattacatā suvaṇṇavaṇṇaggahaṇena gahitāti adhippāyenāha “**chaviya**”nti. Chavigatā pana vaṇṇadhātu eva “suvaṇṇavaṇṇo”ti ettha vaṇṇaggahaṇena gahitāti apare. Vaṇṇiyati kittiyati ugghosananti **vaṇṇo**, thuti. Vaṇṇiyati asaṅkarato vavatthapīyatīti **vaṇṇo**, kulavaggo. Vaṇṇiyati phalaṃ etena yathāsabhāvato vibhāvīyatīti **vaṇṇo**, kāraṇaṃ. Vaṇṇanaṃ dīgharassādivasena saṅthahananti **vaṇṇo**, saṅthānaṃ. Vaṇṇiyati aṇumahantādivasena pamīyatīti **vaṇṇo**, pamānaṃ. Vaṇṇeti vikāramāpajjamānaṃ hadayaṅgatabhāvaṃ pakāsetīti **vaṇṇo**, rūpāyanaṃ. Evaṃ tena tena pavattinimittēna vaṇṇa-saddassa tasmim tasmim atthe pavatti veditabbā.

**Anavasesattaṃ** sakalatā kevalatā. **Kevalakappāti** ettha keci īsaṃ asamattā kevalā kevalakappāti vadanti, evaṃ sati anavasesattho eva kevala-saddo siyā. Anattantarena pana kappa-saddena padavaḍḍhanaṃ katvā kevalā eva kevalakappā. Tathā vā kappanīyattā paññapetabbattā kevalakappā. **Yebhuyyatā** bahulabhāvo. **Abyāmissatā** vijātiyena asaṅkaro suddhatā. **Anatirekatā** taṃmattatā visesābhāvo. **Kevalakappanti** kevalaṃ daḷhaṃ katvāti attho. Kevalaṃ vuccati nibbānaṃ sabbasaṅkhatavivittattā. Tenāha “**visaṃyogādianekattho**”ti. Kevalaṃ etassa adhigataṃ atthīti **kevali**, sacchikatanirodho khīṇāsavo.

**Kappa-saddo** pañāyaṃ saupasaggo anupasaggo cāti adhippāyena okappanīyapade labbhamānaṃ okappasaddamattaṃ nidasseti, aññathā kappa-saddassa atthuddhāre okappanīyapadaṃ anidassanameva siyā. **Samaṇakappēhīti** vinayasiddhehi samaṇavohārehi. **Niccakappanti** niccakālaṃ. **Paññattīti** nāmaṃ. Nāmañhettaṃ tassa āyasmato, yadidaṃ kappoti. **Kappitakesamassūti** kattarikāya cheditakesamassu. **Dvaṅgulakappoti** majjhanhikavelāya vītikkantāya dvaṅgulatāvikkappo. **Lesoti** apadeso. Anavasesaṃ pharituṃ samatthassapi obhāsassa kenaci kāraṇena ekadesapharaṇampi siyā, ayaṃ pana sabbasova pharīti dassetuṃ samantattho kappa-saddo gahitoti āha “**anavasesaṃ samantato**”ti.

**Samaṇasaññāsamudācārenāti** “ahaṃ samaṇo”ti evaṃ uppannasaññāsamuṭṭhitena samudācārena, tannimittēna vā tabbohārena. **Pubbayogeti** pubbayogakathāyaṃ. **Papañco esāti** eso tumhesu āgatesu yathāpavatto paṭisanthāro kathāsamudācāro ca amhākaṃ papañco. Ettakampi akatvā samaṇadhamameva karomāti adhippāyo.

**Ariyabhūmiṃ pattoti** anāgāmiphalaṃ adhigato. Pakkusātikulaputtaṃ sandhāya vadati.

**Vibhajitvāti** vibhāgaṃ katvā. **Turitālanavasena**ti turitaṃ ālanavasena. Tena dullabho ayaṃ samaṇo, tasmā sīghamassa pañho kathetabbo, iminā ca sīghaṃ gantvā sathā pucchitabboti turitaṃ ālapīti dasseti. “**Yathā vā**”tiādinā pana vacanālanāvāsena dvikkhattuṃ ālāpiti. **Evamāhāti** “bhikkhu bhikkhū”ti evaṃ dvikkhattuṃ avoca.

Vammikapariyāyena karajakāyaṃ paccakkhaṃ katvā dassentī devatā “**ayaṃ vammiko**”ti āha. Tāya pana bhāvatthassa abhāsītattā saddatthameva dassento “**purato ʒhitaṃ...pe... ayanti āhā**”ti avoca. Sesesupī eseva nayo. **Maṇḍūkanti** thalamaṇḍūkaṃ. So hi uddhumāyikāti vuccati, na udakamaṇḍūko. Tassa nivāsato vāto mā kho bādhayitthāti “**uparivātato apagammā**”ti vuttaṃ. Kathaṃ panāyaṃ devatā iminā nīhārena ime pañhe therassa ācikkhīti? Keci tāva āhu – yathāsutamattaṃ upamābhāvena gahetvā attano paṭibhānena upameyyattaṃ manasā cintetvā taṃ bhagavāva imassa ācikkhissati. Sā ca desanā atthāya hitāya sukhāya hotīti “ayaṃ vammiko”tiādinā upamāvaseneva pannarasa pañhe therassa ācikkhī. Kassapasammāsambuddhakāle kira bārāṇasiyaṃ eko seṭṭhi aḍḍho mahaddhano mahantaṃ nidhānaṃ nidahitvā palighādiākārāni kānicīpi laṅgāni tattha ʒhapesi. So maraṇakāle attano sahāyassa brāhmaṇassa ārocesi – “imasmiṃ ʒhāne mayā nidhānaṃ nidahitaṃ, taṃ mama puttassa viññutaṃ pattassa dasseti”ti vatvā kālamakāsi. Brāhmaṇo sahāyakaputtassa viññutaṃ pattakāle taṃ ʒhānaṃ dassesi. So nikhanitvā sabbapacchā nāgaṃ passi, nāgo attano puttaṃ disvā “sukheneva dhanāṃ gaṇhatū”ti apagacchi. Svāyamattho tadā loke pākaṇo jāto. Ayaṃ pana devatā tadā bārāṇasiyaṃ gahapatikule nibbattitvā viññutaṃ patto sathhari parinibbute uraṃ datvā sāsane pabbajito pañcahi sahāyakabhikkhūhi saddhiṃ samaṇadhammakāsi. Ye sandhāya vuttaṃ “pañca bhikkhū nisseṇiṃ bandhitvā”tiādi. Tena vuttaṃ “yathāsutamattaṃ upamābhāvena gahetvā”tiādi. Apare pana “devatā attano paṭibhānena ime pañhe evaṃ abhisankharitvā therassa ācikkhī”ti vadanti. **Devaputte nissakkaṃ** devaputtapañhattā tassa atthassa.

**251.** Catūhi mahābhūtehi nibbattoti **cātumahābhūtikō**. Tenāha “**cātumahābhūtamayassā**”ti. **Vamati** uggiranto viya hotīti attho. **Vantakoti** ucchāḍḍako. **Vantussayoti** upacikāhi vantassa mattikāpiṇḍassa ussayabhūto. **Vantasinehasambaddhoti** vantena kheḷasinehena sampiṇḍito. **Asucikalimalaṃ vamatīti** ettha mukhādīhi pāṇakānaṃ niggamanato pāṇake vamatīti ayampi attho labbhateva. **Ariyehi vantakoti** kāyabhāvasāmaññena vuttaṃ. Dukkhasaccapariññāya vā sabbassapi tebhūmakadhammajātassa pariññātattā sabbopi kāyo ariyehi chandarāgappahānena vanto eva. **Taṃ sabbanti** yehi tīhi aṭṭhisatehi ussito, yehi nhārūhi sambaddho, yehi maṃsehi avalitto, yena allacammaṇa pariyoṇaddho, yāya chaviyā rañjito, taṃ aṭṭhiādisabbaṃ accantameva jigucchitvā virattatāyavantameva. “**Yathā cā**”tiādinā vattabbopamatopi vammiko viya vammikoti imamatthaṃ dasseti.

Sambhavati etasmāti sambhavo, mātāpettikō sambhavo etassāti **mātāpettikasambhavo**. Tassa. Upaciyati etenāti upacayo’ odanakummāsaṃ upacayo etassāti **odanakummāsūpacayo**. Tassa. Adhuvasabhāvatāya **aniccadhammassa**, sedagūtha-pitta-semhādi-dhātukkabhāgarubhāvaduggandhānaṃ vinodanāya **ucchādetabbadhammassa**, parito sambāhanena **parimadditabbadhammassa**, khaṇe khaṇe bhijjanasabhāvatāya **bhedanadhammassa**, tato eva vikiraṇasabhāvatāya **viddhaṃsanadhammassāti** dhamma-saddo paccakaṃ yojetabbo. **Tanuvilepanenāti** kāyāvalepanena ucchādanavilepanena. **Aṅgapaccaṅgābhāvinodanattāyāti** tādisasamuṭṭhāna-sarīravikāravigamāya. Yasmā sukkasoṇitaṃ āhāro, ucchādanaṃ parimaddanañca yathārahaṃ uppādassa, vuḍḍhiyā ca paccayo, tasmā āha “**mātāpettika...pe... kathito**”ti. **Uccāvacabhāvoti** yathārahaṃ yojetabbo – odanakummāsūpacaya-ucchādanaparimaddanaggahaṇehi **uccabhāvo, vadḍhī**. Mātāpettikasambhavaggahaṇena **samudayo**. Itarehi **avacabhāvo, parihāni, atthaṅgamo** pakāsito. Aṅgapaccaṅgānaṃ saṅghapanampi hi vaṭṭapaccayattā vaṭṭanti.

**Kodho** dhūmoti ettha dhūmapariyāyena kodhassa vuttattā dhūma-saddo kodhe vattatīti vuttaṃ “**dhūmo viya dhūmo**”ti. **Bhasmanīti bhasmaṃ**. **Mosavajjanti** musāvādo. Dhūmo eva **dhūmāyitaṃ**. Icchā dhūmāyitaṃ etissāti **icchādhūmāyitā**, pajā. Icchādhūmāyitasaddassa taṇhāya vutti vuttanayo eva. **Dhūmāyantoti** vitakkasantāpena saṃtappento, vitakkentoti attho. **Palipoti** dukkaramahākaddamaṃ.

**Timūlanti** tīhi mūlehi patiṭṭhitaṃ viya acalaṃ pavattanti vuttaṃ. **Rajo ca dhūmo ca mayā pakāsītā** rajasabhāvakaraṇaṭṭhena “rajo”ti ca dhūmasabhāvakaraṇaṭṭhena “dhūmo”ti ca mayā pakāsītā. **Pakatidhūmo** viya aggissa kilesaggijālassa paññābhāvato. **Dhammadesanādhūmo** ñānaggisandhīpanassa pubbaṅgamabhāvato. **Ayaṃ rattim dhūmāyanāti** yā divā kattabbakammante uddissa rattiyaṃ anuvitakkānā, ayaṃ rattim dhūmāyanā.

**Sattannaṃ dhammānanti** idaṃ sutte (cūḷani. mettagūmāṇavapucchāniddeśa 28) āgatanayena vuttaṃ. Suttañca tathā ārādhanaveneyyajjhāsayaśasena. Tadekaṭṭhatāya vā tadaññakilesānaṃ. **Sundarapaññoti** ñātāraṇapahānapariññāya paññāya sundarapañño.

**Etanti** “sattha”nti etaṃ **adhivacanaṃ** saṃkilesadhammānaṃ sasanato samucchindanato. Nti vīriyaṃ. **Paññāgatikameva** paññāya hitasseva adhippetattā. Lokiyāya paññāya ārambhakāle lokiyavīriyaṃ gahetabbaṃ, lokuttarāya paññāya pavattikkhaṇe lokuttaravīriyaṃ gahetabbanti yojanā. **Atthadīpanāti** upameyyatthadīpanī upamā.

**Gāmatoti** attano vasaṇagāmato. **Manteti** āthabbanamante. Te hi brāhmaṇā araññe eva vācenti “mā aññe assosu”nti. **Tathā akāsīti** cattāro koṭṭhāse akāsi. Evamettha vammikapañhasseva vasena upamā āgatā, sesānaṃ vasena heṭṭhā vuttanayena veditabbā.

Laṅganaṭṭhena nivāraṇaṭṭhena **laṅgī**, paligho. **Ñāṇamukheti** vipassanāñāṇavīthiyaṃ. **Patatīti** pavattati. **Kammaṭṭhānauggahaparipucchāvasenāti** catusaccakammaṭṭhānassa uggaṇhanena tassa atthaparipucchāvasena ceva vipassanāsaṅkhātā-atthavinicchaya-paripucchāvasena ca. Sabbaso ñātum icchā hi paripucchā. Vipassanā ca aniccādito sabbatebhūmakadhammānaṃ ñātum icchati. Evaṃ vipassanāvasena avijjāpahānamāha, uparikattabbasabbhāvato na tāva maggavasena.

**Valliantare vāti vā**-saddo paṃsuantare vā mattikantare vāti avuttavikappattho. **Cittāvilamattakovāti** cittakkhobhamattakova. **Aniggahitoti** paṭisaṅkhānabalena anivārito. **Mukhavikulanaṃ** mukhasaṅkoco. **Hanusāncopanaṃ pāpeti** antojappanāvattahāyaṃ. **Disā vilokanaṃ pāpeti** yattha bādhetabbo ṭhito, taṃdassanattaṃ nivāraṇaparivāraṇattaṃ. **Daṇḍasatthābhiniṇipātanti** daṇḍasatthānaṃ parassa upari nipātanāvattattaṃ. Yena kodhena aniggahitena mātādikāṃ aghātetabbaṃ ugghātetvā “ayuttaṃ vata mayā kata”nti attānampi hanati, taṃ sandhāyetaṃ vuttaṃ “**paraghātanampi attaghātanampi pāpeti**”ti. Yena vā parassa haññamānassa vasena ghātakopi ghātanāṃ pāpuṇāti, tādissassa vasaṇāmattho veditabbo. Kodhasāmaññena hettaṃ vuttaṃ “**param ghātetvā attānaṃ ghātetī**”ti. **Paramussadagatoti** paramukkamaṃsagato. Daḷhaṃ parissayamāvahatāya **kodhova kodhūpāyāso**. Tenāha “**balavappatto**”tiādi.

**Dvedhāpathasamā hoti** appaṭipattihetubhāvato.

**Kusaladhammo na tiṭṭhati** nīvaraṇehi nīvaritaparamattā. Samathapubbaṅgamaṃ vipassanaṃ bhāvayato paṭhamāṃ samathena nīvaraṇavikkhambhanaṃ hoti, vipassanā pana tadaṅgavaseneva tāni nīharatīti vuttaṃ “**vikkhambhanatadaṅgavasenā**”ti.

“Kummova aṅgāni sake kapāle”tiādīsu (saṃ. ni. 1.17) kummassa aṅgabhāvena visesato pādasīsāni eva vuccantīti āha “**pañceva aṅgāni hontī**”ti. Vipassanācārassa vuccamānattā adhikārato sammasanīyānameva dhammānaṃ idha gahaṇanti “**sabbepi saṅkhatā dhammā**”ti visesaṃ katvāva vuttaṃ. Tenāha bhagavā “pañcannetaṃ upādānakkhandhānaṃ adhivacana”nti.

Sunanti koṭṭanti etthāti **sūnā**, adhikuṭṭananti āha “**sūnāya uparī**”ti. **Asināti** maṃsakantanena. **Ghātiyamānāti** haññamānā vibādhiyamānā. **Vatthukāmānaṃ upari katvāti** vatthukāmesu ṭhapetvā te accādhānaṃ katvā. **Kantitāti** chinditā. **Koṭṭitāti** bilaso vibhajitā. **Chandarāgappahānanti** chandarāgassa vikkhambhanappahānaṃ.

**Sammattā**ti mucchitā sammūlhā. **Nandīrāgaṃ upagamma vaṭṭaṃ vaḍḍhentī**ti sammūlhattā evaādīnavam apassantā nandīrāgassa ārammaṇaṃ upagantvā taṃ paribrūhenti. **Nandīrāgabaddhā**ti nandīrāge laggattā tena baddhā. **Vaṭṭe laggantī**ti tebhūmake vaṭṭe sajjanti. Tattha sajjattā eva **dukkhaṃ patvāpi na ukkaṇṭhanti** na nibbindanti. Idha anavasesappahānaṃ adhippetanti āha “**catutthamaggena nandīrāgappahānaṃ kathita**”nti.

**Anaṅgaṇasutte** (ma. ni. aṭṭha. 1.63) **pakāsito eva** “chandādīhi na gacchantī”tiādīnā. “**Buddho so bhagavā**”tiādī “namo karohī”ti (ma. ni. 1.249, 251) vuttanamakkārassa karaṇākāradassanaṃ. **Bodhāyā**ti catusaccasambodhāya. Tathā damathasamathatarāṇaparinibbānāni ariyamaggavasena veditabbāni. Samathaparinibbānāni pana anupādisesavasena yojetabbāni. **Kammaṭṭhānaṃ aho**sīti vipassanākammaṭṭhānaṃ aho. **Etassa pañhassā**ti etassa pannarasamassa pañhassa attho. Evaṃ itaresupī vattabbaṃ vipassanākammaṭṭhānaṃ khīṇāsavaguṇehi matthakaṃ pāpento yathānusandhināva desanaṃ niṭṭhapesi, na pucchitānusandhināti adhippāyo. Nanu ca pucchāvasenāyaṃ desanā āradhdhāti? Saccam āradhdhā, evaṃ pana “pucchāvasiko nikkhepo”ti vattabbaṃ, na “pucchānusandhivasena niṭṭhapitā”ti. Antarapucchāvasena desanāya aparivattitattā ārambhānurūpameva pana desanā niṭṭhapitā.

Vammikasuttavaṇṇanāya līnatthappakāsanaṃ samattā.

#### 4. Rathavinītasuttavaṇṇanā

252. Mahāgovindena pariggahitatākittanaṃ tadā magadharājena pariggahitūpalakkhaṇaṃ. Tassa hi so purohito. **Mahāgovindoti** purātano eko magadharājāti keci. Gayhatīti gaho, rājūnaṃ gaho **rājagahaṃ**. Nagara-saddāpekkhāya napuṃsakaniddeso. **Aññepettha pakā**reti rājūhi disvā sammā patiṭṭhāpitattā tesam gahaṃ gehabhūtantipi **rājagahaṃ**. Ārakkhasampattiādīnā anathuppattihetutāya upagatānaṃ paṭirājūnaṃ gahaṃ gahabhūtantipi **rājagahaṃ**, āramarāmaṇiyakādīhi rājate, nivāsasukhatādīnā sattehi mamattavasena gayhati, pariggayhatīti vā **rājagahanti** evamādike pakāre. **Buddhakāle ca cakkavattikāle cā**ti idam yebhuyyavasena vuttaṃ. **Veḷūhi parikkhittaṃ aho**si, na pana kevalam kaṭṭhakapavanameva. Rañño uyyānakāle patiṭṭhāpitaatṭālakavasena **atṭālakayuttaṃ**.

Jananaṃ jāti, jātiyā bhūmi jātibhūmaṃ, jāyi vā mahābodhisatto etthābhi jāti, sā eva bhūmīti jātibhūmaṃ, sā imesaṃ nivāsoti **jātibhūmakā**ti āha “**jātibhūmakāti jātibhūmivāsino**”ti. Kassa panāyaṃ jātibhūmīti āha “**taṃ kho panā**”tiādī. Tena anaññasādhāraṇāya jātiyā adhippetattā sadevake loke supākaṭabhāvato visesanena vināpi visiṭṭhavisayova idha jāti-saddo viññāyatīti dasseti. Tenāha “**sabbaññubodhisattassa jātaṭṭhānasākiyajana**pado”ti. Tatthapi kapilavattusannissayo padesoti āha “**kapilavattāhāro**”ti.

#### Garudhamabhāvavaṇṇanā

**Sākiyamaṇḍalassā**ti sākiyarājasamūhassa. Dasannaṃ appicchakathādīnaṃ vatthu dasakathāvatthu, appicchatādi. Tattha suppatiṭṭhitatāya tassa lābhī **dasakathāvatthulābhī**. **Tatthāti** dasakathāvatthusmiṃ.

Garukaraṇīyatāya dhammo garu etassāti dhammagaru, tassa bhāvo **dhammagarutā**, tāya. “**Ajjhāsayena veditabbo**”ti vatvā na kevalam ajjhāsayeneva, atha kho kāyavaṇṇipayogehipi veditabboti dassento “**dhammagarutāyeva hī**”tiādīmāha. **Tiyāmarattim dhammakathaṃ katvā**ti ettha “kumbhakarassa nivesane tiyāmarattim vasanto dhammakathaṃ katvā”ti evaṃ vacanasesavasena attho veditabbo. Aññathā yathālābhavasena atthe gayhamāne tiyāmarattim dhammakathā katāti āpajjati, na ca taṃ atthi. Vakkhati hi “bahudeva rattinti diyaḍḍhayāmamatta”nti. Dasabalādiguṇavisesā viya dhammagāravahetukā parahitapaṭipattipi sabbabuddhānaṃ majjhe bhinnasuvaṇṇaṃ viya sadisā evāti imassa bhagavato dhammagāravakittane “**kassapopi bhagavā**”tiādīnā kassapabhagavato dhammagāravaṃ dasseti.

**Cārikaṃ nikkhamīti** janapadacārikaṃ carituṃ nikkhami. Janapadacārikāya akāle nikkhantattā kosalarājādayo vāretuṃ ārabhimṣu. Pavāretvā hi caraṇaṃ buddhāciṇṇaṃ. Puṇṇāya sammāpaṭipattim paccāsīsanto bhagavā “**kiṃ me karissasī**”ti āha.

**Anahātovāti** dhammasavanussukkena sāyanhe buddhāciṇṇaṃ nhānaṃ akatvāva. Attahitaparahitapaṭipattīsu ekissā dvinnañca atthitāsiddhā catubbidhatā paṭipattikatā eva nāma hotīti vuttam “**paṭipannako ca nāma...pe... catubbidho hotī**”ti. Paṭikkhepapubbakopi hi paṭipanno atthato paṭipannattho evāti. Kāmaṃ attahitāya paṭipanno tāya sammāpaṭipattiyā sāsanaṃ sobhati, na pana sāsanaṃ vadḍheti appossukkabhāvato, na ca kāruṇikassa bhagavato sabbathā manorathaṃ pūreti. Tathā hi bhagavā paṭhamabodhiyaṃ ekasaṭṭhiyā ca arahantesu jātesu – “caratha, bhikkhave, bahujanahitāyā”tiādīnā (dī. ni. 2.86-88; mahāva. 32) bhikkhū parahitapaṭipattiyam niyojesi. Tena vuttam “**evarūpaṃ bhikkhuṃ bhagavā na pucchati, kasmā? Na mayhaṃ sāsanaṃ vadḍhipakkhe ṭhito**”ti.

Samudāyo appakena ūnopi anūno viya hotīti bākulattheraṃ catuttharāsito bahi katvāpi “**asītimahātherā viyā**”ti vuttam. Asītimahātherasamaññā vā avayavepi aṭṭhasamāpattisāmaññā viya daṭṭhabbā. Īdise ṭhāne bahūnaṃ ekato kathanaṃ mahatā kaṇṭhena ca kathanaṃ satthu cittarādhanamevāti tehi bhikkhūhi tathā paṭipannanti dassento “**te bhikkhū meghasaddaṃ sutvā**”tiādīmāha. **Guṇasambhāvanāyāti** vakkhamānaguṇahetukāya sambhāvanāya sambhāvito, na yena kenaci kiccasamatthatādīnā.

Garudhamabhāvavaṇṇanā niṭṭhitā.

### Appicchatādivaṇṇanā

Appa-saddassa parittapariyāyatam manasi katvā āha “**byañjanaṃ sāvasesaṃ viyā**”ti. Tenāha “**na hi tassā**”tiādī. **Appa**-saddo panettha abhāvattthoti sakkā viññātum “appābādhaṭṭhañca sañjānāmī”tiādīsu (ma. ni. 1.225; 2.134) viya.

**Atricchatā nāma** (a. ni. ṭī. 1.1.63) atra atra icchāti katvā. **Asantaḡuṇasambhāvanatāti** attani avijjamānaṃ guṇānaṃ vijjamānānaṃ viya paresaṃ pakāsanā. **Saddhoti maṃ jano jānātūti** vattapaṭipattikāravisesalābhīti jānātu “vattapaṭipattīpāthakajjhāyitā”ti evamādīnā. **Santaḡuṇasambhāvanāti** icchācāre ṭhatvā attani vijjamānasīladhutadhammādiguṇavibhāvanā. Tādisassa hi paṭiggahaṇe amattaññutāpi hoti.

**Gaṇhantoyeva ummuji** aññesaṃ ajānantānaṃyevāti adhippāyo.

Appicchatāpadhānaṃ puggalādhiṭṭhānena catubbidhaṃ icchāpabhedam dassetvā punapi puggalādhiṭṭhānena catubbidhaṃ icchāpabhedam dassento “**aparopi catubbidho appiccho**”tiādīmāha. **Dāyakassa vasanti** dāyakassa cittavasam. **Deyyadhammassa vasanti** deyyadhammassa appabahubhāvaṃ. **Attano thāmanti** attano yāpanamattakathāmaṃ.

**Ekabhikkhupi na aññāsī** sosānikavatte sammadeva vuttittā. **Abbokiṇṇanti** avicchedam. **Dutiyo maṃ na jāneyyāti** dutiyo sahāyabhūtopi yathā maṃ jānitum na sakkuṇeyya, tathā saṭṭhi vassāni nirantaram susāne vasāmi, tasmā **ahaṃ aho sosānikuttamo**.

**Dhammakathāya janataṃ khobhetvāti** lomahaṃsanāsādhukāradānacelukkhepādivasena sannipatitam itarañca “kathaṃ nu kho ayyassa santikeva dhammaṃ sossāmā”ti kolāhalavasena mahājanaṃ khobhetvā. **Gatoti** “ayaṃ so, tena rattiyam dhammakathā katā”ti jānanabhayena pariyattiappicchatāya pariveṇam gato.

**Tayo kulaputtā viyāti** pācīnavamsadāye samaggavāsaṃ vutthā tayo kulaputtā viya. **Pahāyāti** pubbabhāge tadañgādivasena pacchā aggamaggeneva pajahitvā.

Appicchatādivaṇṇanā niṭṭhitā.

### Dvādasavidhasantosavaṇṇanā

Pakatidubbalādīnaṃ garucīvarādīni naphāsubhāvāvahāni sarīrakhedāvahāni ca hontīti payojanavasena naatricchatādivasena tāni parivattetvā lahukacīvaraparibhogo na santosavirodhīti āha “**lahukena yāpentopi santuṭṭhova hoti**”ti. Mahagghacīvaraṃ, bahūni vā cīvarāni labhitvāpi tāni vissajjetvā tadaññassa gahaṇaṃ yathāsāruppanaye ṭhitattā na santosavirodhīti āha “**tesaṃ...pe... dhārentopi santuṭṭhova hoti**”ti. Evaṃ sesapaccayesupi yathābalayathāsāruppasantosaniddesesu apisaddaggaṇe adhippāyo veditabbo. **Yathāsāruppasantosoyeva aggo** alobhajjhāsayaṃ ukkaṃsanato.

Dvādasavidhasantosavaṇṇanā niṭṭhitā.

### Tividhapavivekavaṇṇanā

**Ekoti ekākī. Gacchatīti** cuṇṇikairiyāpathavasena vuttaṃ. **Caratīti** vihārato bahi sañcāravasena, **viharatīti** divāvihārādivasena. **Kāyavivekoti** ca nekkhammādhimuttassa bhāvanānuyogavasena vivekaṭṭhakāyatā, na jhānavivekamattaṃ. Tenāha “**nekkhammābhiratāna**”nti. **Parisuddhacittānanti** nīvaraṇādisaṃkilesato visuddhacittānaṃ. **Paramavodānappattānanti** vitakkāditaṃtaṃjhānapaṭipakkhavigamena paramaṃ uttamaṃ vodānaṃ pattānaṃ. **Nirupadhīnanti** kilesupadhiādīnaṃ vigamena nirupadhīnaṃ.

Tividhapavivekavaṇṇanā niṭṭhitā.

### Pañcavidhasaṃsaggavaṇṇanā

Saṃsīdati etenāti saṃsaggo, rāgo. Savanahetuko, savanavasena vā pavatto saṃsaggo **savanasaṃsaggo**. Esa nayo sesesupi. **Kāyasaṃsaggo** pana kāyaparāmāso. **Itthī vāti** vadhū, yuvatī vā. **Sandhānetunti** pubbenāparaṃ ghaṭetuṃ. **Sotaviññānavīthivasenāti** idaṃ mūlabhūtaṃ savanaṃ sandhāya vuttaṃ, tassa piṭṭhivattakamanodvārīkajavanavīthīsu uppannopi rāgo savanasaṃsaggoyeva. **Dassanasāsaṃsaggepi** eseva nayo. **Anitthigandhabodhisatto** parehi kathiyamānavasena pavattasavanasaṃsaggassa nidassanaṃ. **Tissadaharo** attanā suyamānavasena. Tattha paṭhamaṃ jātake veditabbanti itaraṃ dassento “**daharo kirā**”tiādīmāha. **Kāmarāgena viddhoti** rāgasallena hadaye appito anto anuviddho.

**Soti** dassanasāsaṃsaggo. **Evaṃ veditabboti** vatthuvaseṇa pākaṭaṃ karoti. Tasmīṃ kira gāme yebhuyyena itthiyo abhirūpā dassaniyā pāsādikā, tasmā thero “**sace antogāme na carissasi**”ti āha. Kālasseva pavīṭṭhattā yāguṃ adāsi, tasmā yāgumeva gahetvā gacchantāṃ “**nivattatha, bhante, bhikkhaṃ gaṇhāhi**”ti āhaṃsu. **Yācitvāti** “na mayāṃ, bhante, bhikkhaṃ dātukāmā nivattama, apica idaṃ bhante kāraṇa”nti yācitvā.

Ādito lapanāṃ **ālāpo**, vacanapaṭivacanavasena pavatto lāpo **sallāpo**. **Bhikkhuniyāti** idaṃ nidassanamattaṃ. Yāya kāyacipi itthiyā santakaparibhogavasena uppannarāgopi **sambhogasaṃsaggova**.

Pañcavidhasaṃsaggavaṇṇanā niṭṭhitā.



## Gāhagāhakādivaṇṇanā

**Bhikkhuno bhikkhūhi kāyaparāmāso** kāyasambāhanādivasena. **Kāyasamsagganti** kāyaparāmāsasamsaggaṃ. **Gāhagāhakoti** gaṇhanakānaṃ gaṇhanakoti attho. **Gāhamuttakoti** ayoniso āmisehi saṅgaṇhanakehi sayamaṃ muccanako. **Muttagāhakoti** yathāvuttasaṅgahato muttānaṃ saṅgaṇhanako. **Muttamuttakoti** muccanakehi sayampi muccanako. **Gahaṇavasena** saṅgaṇhanavasena. **Upasaṅkamanti** tato kiñci lokāmisamaṃ paccāsīsaṅgā, na dakkhiṇeyyavasena. Bhikkhupakkhe **gahaṇavasenāti** paccayaalābhāya saṅgaṇhanavasenāti yojetabbaṃ. **Vuttanayenāti** “āmisenā”tiadinā vuttanayena.

**Ṭhānanti** attano ṭhānāvattaṃ. **Pāpuṇituma na deti** uppannameva taṃ paṭisaṅkhānabalena nīharanto vikkhambheti. Tenāha “**mantenā**”tiadi. Yathā jīvitukāmo puriso kaṇhasappena, amittena vā saha na saṃvasati, evaṃ khaṇamattampi kilesehi saha na saṃvasatīti attho.

**Catupārisuddhisīlaṃ** lokiyamaṃ lokuttaraṅca. Tathā **samādhipi**. Vipassanāya pādakā **vipassanāpādakāti** aṭṭhasamāpattiggahaṇena yathā lokiyasamādhi gahito, evaṃ vipassanāpādakā etesanti **vipassanāpādakāti** aṭṭhasamāpattiggahaṇeneva lokuttaro samādhi gahito. Yathā hi cattāri rūpajjhānāni adhiṭṭhānaṃ katvā pavatto maggasamādhi vipassanāpādako, evaṃ cattāri arūpajjhānāni adhiṭṭhānaṃ katvā pavattopi. Samāpattipariyāyo pana pubbavohārena veditabbo. Paṭipakkhasamucchedanena sammā āpajjanato vā yathā “**sotāpattimaggo**”ti. Evamettha sīlasamādhīnampi missakabhāvo veditabbo, na paññāya eva. **Vimuttīti ariyaphalanti** vuttamaṃ “**vimuttisampanno**”ti vuttattā. Tañhi nipphādanaṭṭhena sampādetabbaṃ, na nibbānanti.

Ettha ca appicchatāya laddhapaccayena paritussati, santuṭṭhatāya laddhā te agadhito amucchitoādinavadassī nissaraṇapañño paribhuñjati, evaṃbhūto ca kathaaci alaggamānasatāya pavivekaṃ paribrūhento kenaci asaṃsaṭṭho viharati gahaṭṭhena vā pabbajitena vā. So evaṃ ajjhāsayasampanno vīriyamaṃ ārabhati appattassa pattiya, anadhigamassa adhigamāya. Ārabhanto ca yathāsamādinnaṃ attano sīlaṃ paccavekkhati, tassa sīlassa supārisuddhataṃ nissāya uppajjati avipparisāro, ayamassa **sīlasampadā**. Tassa avipparisāramūlakehi pāmojjapītipassaddhisukhehi sammā brūhitaṃ cittaṃ sammadeva samādhīyati, ayamassa **samādhisampadā**. Tato yathābhūtaṃ jānaṃ passaṃ nibbindati, nibbindamaṃ virajjati, virāgā vimuccati, ayamassa **paññāsampadā**. Vimuttacittatā panassa **vimuttisampadā**, tato vimuttito **ñāṇadassananti** etesamaṃ dasannaṃ kathāvattūnaṃ anupubbī veditabbā. Tassa yo dasahi kathāvattūhi samannāgamo, **ayamaṃ attahitāya paṭipatti**. Yā nesamaṃ paresamaṃ saṃkittanaṃ, ayamaṃ **parahitāya paṭipatti**. Tāsu purimā ñāṇapubbaṅgamā ñāṇasampayuttā ca, itarā karuṇāpubbaṅgamā karuṇāsampayuttā cāti sabbamaṃ ñāṇakarūṇākāṇḍamaṃ vattabbaṃ.

**Dasahi kathāvattūhi** karaṇabhūtehi bhikkhūnaṃ ovādaṃ deti, “bhikkhunā nāma atricchatādike dūrato vajjetvā sammadeva appicchena bhavitabba”ntiadinā taṃ taṃ kathāvattumaṃ bhikkhūnaṃ upadisatīti attho. Upadisanto hi tāni “**tehi bhikkhū ovadatī**”ti vutto. **Ovadatiyeva** sarūpadassanamattena. **Sukhumaṃ atthamaṃ parivattetvāti** evampi appicchatā hoti evampīti appicchatādivasena aparāparaṃ appicchatāvuttimaṃ dassetvā tattha sukhumanipuṇamaṃ appicchatāsāṅkhātaṃ atthamaṃ jānāpetumaṃ na sakkoti. **Viññāpetīti** yathāvuttehi visesehi viññāpeti. **Kāraṇanti** yena kāraṇena appicchatā ijjhati, taṃ pana “mahicchatādīsu ete dosā, appicchatāya ayamānisamaṃso”tiadināvānisamaṃsadassanaṃ daṭṭhabbaṃ. Sammā hetunā appicchatamaṃ dassetīti **sandassako**. **Gāhetunti** yathā gaṇhati, tathā kātuṃ, tattha paṭṭhapetunti attho. **Ussāhajanavasena**ti yathā taṃ samādānaṃ niccalaṃ hoti, evaṃ ussohiyā uppādanavasena sammadeva uttejetīti **samuttejako**. **Ussāhājātetī** appicchatāya jātussāhe. **Vaṇṇamaṃ vatvā** tattha sampattimaṃ āyatīṅca labbhamānaguṇamaṃ kittetvā **sampahamaṃseti** sammadeva pakārehi tosetīti **sampahamaṃsako**. Evamaṃ santuṭṭhiādīsu yathārahaṃ yojanā kātābā.

Gāhagāhakādivaṇṇanā niṭṭhitā.

### Pañcalābhavaṇṇanā

**253. Satthu sammukhā evaṃ vaṇṇo abbhuggatoti.** Iminā tassa vaṇṇassa yathābhūtaguṇasamuṭṭhitataṃ dasseti. **Mandamando viyāti** ati viya achedo viya. **Abalabalo viyāti** ati viya abalo viya. **Bhākuṭīkabhākuṭīko viyāti** ati viya dummukho viya. **Anumassāti** anumāsivā, dasa kathāvattḥūni sarūpato visesato ca anupariggahetvāti attho. Pariggaṇhanam pana nesam anupavisanam viya hotīti vuttaṃ “**anupavisitvā**”ti. Sabrahmacārīhi vaṇṇabhāsanam eko lābhoti yojanā. Evaṃ sesesupī. **Patthayamāno evamāha** dhammagarutāyāti adhippāyo.

Pañcalābhavaṇṇanā niṭṭhitā.

### Cārikādivaṇṇanā

**254.** Abhiramanam abhiratam, tadeva anunāsikalopam akatvā vuttaṃ “**abhiranta**”nti. Bhāvanapumsakañcetam. **Anabhirati nāma natthi, abhiramitvā ciravīhāropi natthi** sammadeva pariññātavattḥukattā. Sabbasahā hi buddhā bhagavanto asayhalābhino.

Pubbe dhammagarutākittanapasāṅgena gahitam aggahitañca mahākassapapaccuggamanādim ekadesena dassetvā vanavāsītissasāmaṇerasa vatthum vitthāretvā janapadacārikam kathetum “**bhagavā hī**”tiādi āradham. Ākāśagāmīhi saddhim gantukāmo “**chaḷabhiññānam ārocehī**”ti āha. Saṅghakammena sijjhamānāpi upasampadā satthu āṇavaseneva sijjhanato “**buddhadāyajjam te dassāmī**”ti vuttanti vadanti. Apare “aparipuṇṇavāsativassasseva tassa upasampadam anujānanto satthā ‘**buddhadāyajjam te dassāmī**’ti avocā”ti vadanti. **Upasampādetvāti** dhammasenāpatinā upajjhāyena upasampādetvā.

**Navayojanasatikam** majjhimadesapariyāpannameva, tato param nādhippetam dandhatāvasena gamanato. **Samantāti** gatagataṭṭhānassa catūsu passesu. **Aññenapi kāraṇenāti** bhikkhūnam samathavipassanātaruṇabhāvato aññenapi majjhimamaṇḍale veneyyānam ñāṇaparipākādikāraṇena nikkhamati, antomaṇḍalam otarati. **Sattahi vātiādi** “**ekam māsam vā**”tiādinā vuttānukkamena yojetabbam.

**Sarīraphāsukatthāyāti** ekasmiṃyeva ṭhāne nibaddhavāsena ussannadhātukassa sarīrassa virecanena phāsubhāvattḥāya. **Aṭṭhuppattikālābhikañkhanatthāyāti** aggikkhandhūpamasutta (a. ni. 7.72) maghadevajātakādidesañānam (jā. 1.1.9) viya dhammadesanāya aṭṭhuppattikālassa ākañkhanena. Surāpānasikkhāpadapaññāpane (pāci. 326) viya **sikkhāpadapaññāpanatthāya. Bodhaneyyasatte** aṅgulimālādike **bodhanatthāya.** Nibaddhavāsāñca puggalam uddissa cārikā **nibaddhacārikā.**

**255.** Apariggahabhāvaṃ katthaci alaggabhāvaṃ dassetum “**yūtham pahāya...pe... mattahatthī viyā**”ti vuttaṃ. **Asahāyakiccoti** sahāyakkicarāhito siho viya. Tenassa ekavīhāritam tejavantatañca dasseti. **Tadā pana kāyaviveko na sakkā laddhanti** idamettha kāraṇam daṭṭhabbam. **Bahūhītiādi** pana sabhāvadassanavasena vuttaṃ. Therassa parisā suvinītā ciṇṇagaruvāsā garuno icchānurūpameva vattati.

Vuttakāraṇayutte addhānagamane cārikānam vohāro sāsane niruḷhoti āha “**kiñcāpī**”tiādi. Kenacideva nimittena kismiñci atthe pavattāya saññāya tannimittarahitepi aññasmiṃ pavatti **ruḷhī** nāma. Vijitamārattā **saṅgānavijayamahāyodho viya. Aññam sevitvāti** “mama āgatabhāvaṃ satthu ārocehī”ti ārocanattham aññam bhikkhum sevitvā.

Bhagavā dhammam desento taṃtaṃpuggalajjhāsayanurūpaṃ tadanucchavikameva dhammim katham karotīti dassento “**cūlagosiṅgasutte**”tiādimāha. Tattha **sāmaggirasānisamsanti** “kacci pana vo, anuruddhā, samaggā sammodamānā”tiādinā (ma. ni. 1.326) sāmaggirasānisamsam kathesi.

**Āvasathānisamsanti** “sītaṃ uṇhaṃ paṭihanatī”tiādinā (cūḷava. 295, 315) āvasathapaṭisaṃyuttaṃ ānisamsaṃ. **Satipaṭilābhikanti** jotipālatthere lāmakam ṭhānaṃ otiṇṇamate mahābodhipallānke pana sabbaññutaṃ paṭivijjhitaṃ patthanaṃ katvā pāramiyo pūrento āgato. Tādisassa nāma pamādavihāro na yuttoti yathā kassapo bhagavā bodhisattassa satim paṭilābhitaṃ dhammiṃ kathaṃ kathesi, tathā ayaṃ bhagavā tameva **pubbenivāsapaṭisaṃyuttakathaṃ** bhikkhūnaṃ ghaṭikārasuttaṃ (ma. ni. 2.282) kathesi. **Cattāro dhammuddeseti** – “upaṇīyati loko addhuvo, atāṇo loko anabhissaro, assako loko sabbaṃ pahāya gamanīyaṃ, ūno loko atitto taṇhādāso cā”ti (ma. ni. 2.305) ime cattāro dhammuddeseti kathesi. Kāmañcete dhammuddesā **raṭṭhapālasutte** (ma. ni. 2.304) āyasmatā raṭṭhapālattherena rañño korabyassa kathitā, te pana bhagavato eva āharitvā therena tattha kathitāti vuttaṃ “**raṭṭhapālasutte**”tiādi. Tathā hi vuttaṃ sutte – “atthi kho, mahārāja, tena bhagavatā jānatā passatā arahatā sammāsambuddhena cattāro dhammuddesā uddiṭṭhā”tiādi (ma. ni. 2.305) **pānakānisamsakathanti** “aggihuttaṃ mukhaṃ yaññā”tiādinā (ma. ni. 2.400; su. ni. 573) anumodanaṃ vatvā puna pakiṇṇakakathāvasena pānakapaṭisaṃyuttaṃ ānisamsakathaṃ kathesi. **Ekībhāve ānisamsaṃ kathesi**, yaṃ sandhāya vuttaṃ “atha kho bhagavā āyasmantaṃ bhaguṃ dhammiyā kathāya sandassesī”tiādi (ma. ni. 3.238). **Anantanayanti** aparimāñadesanānayaṃ appicchatādiapaṭisaṃyuttaṃ dhammiṃ kathaṃ. Tenāha “**puṇṇa, ayampi appicchakathāyevā**”tiādi bahūhi pariyāyehi nānānayaṃ deseti. Kathaṃ tathā desitaṃ thero aññāsīti āha “**paṭisambhidāpattassa...pe... ahoṣī**”ti.

Cārikādivaṇṇanā niṭṭhitā.

### Sattavisuddhipañhavaṇṇanā

**256. Tato paṭṭhāyāti.** Yadā jātibhūmakā bhikkhū satthu sammukhā therassa vaṇṇaṃ bhāsiṃsu, tato paṭṭhāya. Sīsānulokī hutvā piṭṭhito piṭṭhito anubandhanaṃ therena samāgame ādaravasena katanti daṭṭhabbaṃ. Tathā hi vuttaṃ pāṭhe “appeva nāmā”tiādi, “taramānarūpo”ti ca. Yaṃ pana vuttaṃ **aṭṭhakathāyaṃ “ekasmiṃ ṭhāne nilīna”**ntiādi, taṃ akāraṇaṃ. Na hi dhammasenāpati tassa therassa nisinnaṭṭhānaṃ abhiññāñāṇena jānituṃ na sakkoti. “Kacci nu kho maṃ adisvāva gamissatī”ti ayampi cintā ādaravasenevāti vuttaṃ. Na hi satthāraṃ daṭṭhuṃ āgato sāvako api āyasmā aññātakonḍaṇṇo satthukappaṃ dhammasenāpatiṃ tattha vasantaṃ adisvāva gacchanako nāma atthi. **Divāvihāranti** sampadāne upayogavacananti āha “**divāvihāratthāyā**”ti.

**257. Purimakathāyāti** paṭhamālāpe. **Appatiṭṭhitāyāti** nappavattitāya. **Pacchimakathā na jāyatīti** pacchā vattabbakathāya avasaro na hoti. **Satta visuddhiyo pucchi** diṭṭhasaṃsandanasena. **Nānadassanavisuddhi** nāma ariyamaggo. Yasmā tato uttarimpi pattabbaṃ attheva, tasmā “**catupārisuddhisīlādīsu ṭhitassapi brahmacariyavāso matthakaṃ na pāpuṇātī**”ti vuttaṃ. **Tasmāti** brahmacariyavāsassa matthakaṃ appattatā. **Sabbaṃ paṭikkhipīti** sattamampi pañhaṃ paṭikkhipi, itaresu vattabbameva natthi.

**Appaccayapariniḥṅanti** anupādisesanibbānamāha. Idāni pakārantarenapi anupādāpariniḥṅanaṃ dassetaṃ “**dvedhā**”tiādi vuttaṃ. Tattha **gahaṇūpādānanti** daḷhaggahaṇabhūtaṃ upādānaṃ. Tenāha “**kāmupādānādika**”nti. **Paccayūpādānanti** yaṃ kiñci paccayamāha. So hi attano phalaṃ upādiyati upādānavasena gaṇhatīti **upādānanti** vuccati. Tenāha “**paccayūpādānaṃ nāma...pe... paccayā**”ti. “Anupādāya āsavehi cittaṃ vimuccatī”ti vacanato (mahāva. 28, 30) **arahattaphalaṃ anupādāpariniḥṅanti kathenti**. Na ca upādānasampayuttanti upādānehi etaṃ na sahitaṃ nāpi upādānehi saha pavatti hutvā. Na ca kiñci dhammaṃ upādiyati kassaci dhammassa ārammaṇakaraṇavasena na upādiyati. **Pariniḥṅanteti** aggamaḥgena kātābbakilesapariniḥṅanapariyosānante jātatā. **Amatadhātumeva anupādāpariniḥṅanaṃ kathenti**, kathentānañca yathā tassa koci paccayo nāma natthi, evaṃ adhigatopi yathā koci paccayo nāma na hoti, tathā pariniḥṅanaṃ appaccayapariniḥṅanti dassento “**ayaṃ anto**”tiādimāha. **Puna pucchaṃ ārabhi** anupādāpariniḥṅanaṃ sarūpato patiṭṭhāpetukāmo.

**258. Sabbaparivattesūti** sabbesu pañhaparivattanesu, pañhavāresūti attho. **Sagahaṇadhamamevāti** “etaṃ mamā” tiādīnā gaṇhatīti gahaṇaṃ, saha gahaṇenāti sagahaṇaṃ, upādāniyanti attho. Vivaṭṭasannissitassa abhāvato vaṭṭameva anugatoti **vaṭṭānugato**. Tenāha “**catupārisuddhisīlamattassapi abhāvato**” ti. Yo pana catubbidhe vivaṭṭūpanissaye sīle ṭhito, sopi “**aññatra imehi dhammehī**” ti vattabbaṃ arahati.

Sattavisuddhipañhavaṇṇanā niṭṭhitā.

### Sattarathavinītavaṇṇanā

**259. Nissakkavacanametam** “yāva heṭṭhimasopānakāḷevārā” tiādīsu viya. **Atthoti** payojaṇaṃ. Cittavisuddhi hettha sīlavissuddhiṃ payojeti tassa tadatthattā. **Sīlavissuddhikiccaṃ kataṃ nāma hoti** samādhisaṃvattanato. Samādhisaṃvattanikā hi sīlavissuddhi nāma. **Sabbapadesūti** “cittavisuddhi yāvadeva diṭṭhivissuddhatthā” tiādīsu sabbapadesu, diṭṭhivissuddhiyaṃ ṭhitassa cittavisuddhakiccaṃ kataṃ nāma hotītiādīnā yojetabbaṃ.

**Sāvattinagaraṃ viya sakkāyanagaraṃ** atikkamitabbattā. **Sāketanagaraṃ viya nibbānanagaraṃ** pāpuṇitabbattā. **Accāyikassa kiccassa uppādakālo viya** navameneva khaṇena pattabbassa abhisamayakiccassa uppādakālo. Yathā rañño sattamena rathavinītena sākete antepuradvāre oruḷhassa na tāva kiccaṃ niṭṭhitaṃ nāma hoti, saṃvidhātābbasaṃvidhānaṃ ñātimittagaṇaparivutassa surasabhojanaparibhoge niṭṭhitaṃ nāma siyā, evametam ñānadassanavisuddhiyā kilese khepetvā tesameva paṭippassaddhipahānasādhakaariyaphalasamaṅgikāle abhisamayakiccaṃ niṭṭhitaṃ nāma hoti. Tenāha “**yogino...pe... kālo daṭṭhabbo**” ti. Tattha **paropaṇṇāsa kusaladhammā nāma** cittuppādapariyāpanā phassādayo paropaṇṇāsa anavajjadhammā. **Nirodhasayaneti** nibbānasayane.

“Visuddhiyo” ti vā “kathāvatthūni” ti vā atthato ekaṃ, byañjanameva nānanti tesam atthato anaññabhāvaṃ dassetuṃ “**iti**” ti āradhāṃ. **Āyasmā puṇṇo dasa kathāvatthūni vissajjesīti** satta visuddhiyo nāma vissajjantopi dasa kathāvatthūni vissajjesi tesam atthato anaññattā. Eteneva dhammasenāpati sārīputtatthero satta visuddhiyo pucchanto dasa kathāvatthūni pucchīti ayampi attho vuttovāti veditabbo. Nti pañhaṃ. **Kim jānitvā pucchīti** visuddhipariyāyena kathāvatthūni pucchāmīti kim jānitvā pucchi. Dasakathāvatthulābhinaṃ theram visuddhiyo pucchanto pucchitaṭṭhāneyeva pucchanena kim titthakusalo vā pana hutvā visayasmim pucchi, udāhu pānīyatthikamatitthehi chinnataṭṭhehi pātento viya atitthakusalo hutvā apucchitabbatṭhāne avisayasmim pucchīti yojanā. Iminā nayena vissajjanapakkehi atthayojanā veditabbā. Yadatthamassa vicāraṇā āradhā, tam dassentena “**titthakusalo hutvā**” tiādīm vatvā visuddhikathāvatthūnaṃ atthato anaññattepi ayaṃ viseso veditabboti dassetuṃ “**yaṃ hī**” tiādī vuttaṃ. **Tadamināti** yaṃ “saṃkhittaṃ, vitthiṇṇa” nti ca vuttaṃ, **taṃ** iminā idāni vuccamānena nayena vidhinā veditabbaṃ.

**Ekā sīlavissuddhīti** visuddhīsu viṣuṃ ekā sīlavissuddhi. Dasasu kathāvatthūsu **cattāri kathāvatthūni hutvā āgatā** appicchatādīhi vinā sīlavissuddhiyā asambhavato. **Appicchakathā** tiādīsu kathāsīsenā dasakathāvatthu gahitaṃ. Kathetabbattā vā vatthu **kathāvatthūti** vuttaṃ. Evañca upakārato, sabhāvato vā catunnaṃ kathāvatthūnaṃ sīlavissuddhisāṅgaho daṭṭhabbo. Tiṇṇaṃ kathāvatthūnaṃ cittavisuddhisāṅgahepi eseva nayo. **Pañca visuddhiyoti** nāmarūpaparicchedo diṭṭhivissuddhi, sappaccayanāmarūpadassanaṃ kaṅkhāvitaraṇavisuddhi, vipassanupakkilese pahāya uppannaṃ vipassanāñānaṃ maggāmaggañānadassanavisuddhi, udayabbayañānādi navavidhañānaṃ paṭipadāñānadassanavisuddhi, ariyamaggañānaṃ ñānadassanavisuddhīti imā pañca visuddhiyo.

Sattarathavinītavaṇṇanā niṭṭhitā.

**260. Sammoditunti** anantaraṃ vuccamānena sammodituṃ. **Aṭṭhānāparikappenāti** akāraṇassa vatthuno parikappanena tadā asambhavantaṃ atthaṃ parikappetvā vacanena. **Abhiñhadassanassāti**

niccadassanassa, niyatadassanassāti attho.

**Ukkhipīti** guṇato kathitabhāvena ukkaṃseti. **Therassāti** āyasmato puṇṇattherassa. **Imasmim̐ ṭhāne** imasmim̐ kāraṇe ekapadeneva sāvakavisaye anaññasādhāraṇaguṇāvikaraṇanimittam̐. Idāni tamevattham̐ pākaṭataram̐ kātum̐ “**amaccañhī**”tiādi vuttam̐. **Apacāyamānoti** pūjayanto.

“Anumassa anumassa pucchitā”ti vuttattā vicāraṇavasenāha “**kiṃ pana pañhassa pucchanaṃ bhāriyaṃ udāhu vissajjana**”nti. **Sahetukaṃ katvāti** yuttāyuttam̐ katvā. **Sakāraṇanti** tasseva vevacanaṃ. **Pucchanaṃpīti** evaṃ sahadhammena pucchitabbamattham̐ sayam̐ sampādetvā pucchanaṃpī bhāriyaṃ dukkaram̐. **Vissajjanaṃpīti** sahadhammena vissajjanaṃpī dukkaram̐. Evañhi vissajjento viññūnaṃ cittaṃ ārādhetīti. **Yathānusandhināva desanā niṭṭhitā**ādito sapaṇikkhāraṃ sīlam̐, majjhe samādhim̐, ante vasībhāvappattam̐ paññaṃ dassetvā desanāya niṭṭhāpitattāti.

Rathavinītasuttavaṇṇanāya līnatthappakāsanaṃ samattā.

## 5. Nivāpasuttavaṇṇanā

**261.** Nivappatīti nivāpo, nivāpaṃ vatteti, nivāpabhojanaṃ vā etassāti **nevāpiko**, nivāpena mige palobhetvā gaṇhanakamāgaviko. **Tiṇabijānīti** nivāpatiṇabijāni. **Vappanti** sassam̐ viya vapitabbaṭṭhena vappam̐. “Mayam̐ viya aññe ke īdisam̐ labhissanti”ti **mānamadaṃ āpajjissanti**. **Vissaṭṭhasatibhāvanti** anussaṅkitaparisaṅkitabhāvaṃ. Tīracchānā hi vijātiyabalavatīracchānavasanaṭṭhānesu sāsaṅkā ubbiggahadayaṃ appamattā honti visesato māgavikādīmanussūpacāre, rasataṇhāya pana baddhā pamādaṃ āpajjassanti. Nivapati etthāti **nivāpo**, nivāpabhūmi nivāpaṭṭhānaṃ. Tenāha “**nivāpaṭṭhāne**”ti. “Yathākāmakaraṇīyā”ti vuttamattham̐ vivaritum̐ “**ekaṃ kirā**”tiādi vuttam̐. Tatha **nivāraṇam̐ viyāti** nivāraṇassa samūho viya. **Nivāro** nāma araññe sayam̐jātavīhijāti. **Meghamālā viyāti** meghaghaṭā viya. **Ekagghananti** ekajjham̐ viya aviraṭṭham̐. **Pakkamantīti** āsaṅkapaṇisaṅkā hutvā pakkamanti. **Kaṇṇe cālayamānāti** anāsaṅkantānaṃ pahaṭṭhākāradassanaṃ. **Maṇḍalagumbanti** maṇḍalakākārena ṭhitam̐ gumbaṃ.

**262.** **Kappetvāti** upamābhāvena parikappetvā. Mige attano vase vattāpanam̐ **vasībhāvo**. So eva ijjanaṭṭhena **iddhi**, pabhāvaṇaṭṭhena **ānubhāvo**.

**263.** **Bhayena bhogato**ti bhayena saha sabhayaṃ nivāpapaṇibhogato. **Balavīriyanti** kāyabalañca utṭhānavīriyañca. Aṭṭhakathāyaṃ pana balameva vīriyaṃ. **Balanti** ca sarīrabalam̐, tañca atthato manasikāramaggehi aparāparaṃ sañcaraṇakavātoti vuttam̐ “**aparāparaṃ sañcaraṇavāyodhātū**”ti.

**264.** **Sikkhitakerāṭikāti** paricetasātheyyā, vañcakāti attho. **Iddhimanto viya** ānubhāvavanto viya. Pacuraṇanehi parabhūtā jātāti **parajana**, mahābhūtā. Tenāha “**yakkhā**”ti. **Samantā sappadesanti** samantato padesaṇantaṃ vipulokāsaṇnivāsaṭṭhānaṃ. Tassa pana sappadesatā mahāokāsaṭṭayāti vuttam̐ “**mahantaṃ okāsa**”nti.

**265.** **Ghaṭṭessantīti** “sabhayaṇasamutṭhāna”nti saññādānavasena cittaṃ cetessanti, tāsessantīti attho. **Pariccajissantīti** nibbisissanti. **Mahallakoti** jātiyā mahallako jīṇṇo. **Dubbaloti** byādhivasena, pakatiyā vā balaviraṇito.

**267.** Nivāpasadisatāya **nivāpoti vā**. Lokapaṇiyāpanam̐ hutvā kilesehi āmasitabbaṭṭayā **lokāmisānīti vā**. Vaṭṭe āmisabhūtattā **vaṭṭāmisabhūtānaṃ**. **Vasaṃ vattetīti** kāmaguṇehi kāmaguṇe giddhe satte tasseva gedhassa vasena attano vase vattetīti. Tenāha –

“Antalikkhacaro pāso, yvāyaṃ carati mānaso;

Tena taṃ bādhayissāmi, na me samaṇa mokkhasī'ti. (saṃ. ni. 1.151; mahāva. 33);

Ayanti paṭhamamigajātūpamā. Vānapatthassa satova papañcaparadattikādisaputtadāranikkhamaṇaṃ sandhāyāha “**saputtabhariyapabbajjāyā**”ti.

**268.** Kāmato cittaṃ vimutti idha cetovimuttīti adhippetāti āha “**cetovimutti nāma...pe... uppannaajjhāsayo**”ti. Kāme vissajjetvā puna tattha nimuggatāya dutiyasamaṇabrāhmaṇā dutiyamigajātūpamā vuttā.

**269.** Tatiyasamaṇabrāhmaṇā yathāpariccatte kāme pariccajitvā evaṃ ṭhitā, na dutiyā viya tattha nimuggatī adhippāyena “**kiṃ pana te akamsū**”ti pucchati. Itare kāmaṃ ujukaṃ kāmaguṇesu na nimuggā, pariyāyena pana nimuggā diṭṭhijālena ca ajjhotthaṭāti dassento “**gāmanigamajanapadarājadhāniyo**”tiādīmāha. Diṭṭhijālampi taṇhājālānugata mevāti āha “**mārassa pāpimato diṭṭhijālena parikkhipivā**”ti.

**271.** Khandhakilesābhisaṅkhāramārā vā idha **māraggahaṇena** gahitāti daṭṭhabbaṃ. **Akkhīni bhindi** daṭṭhuṃ asamatthabhāvāpādanena. Tenāha “**vipassanāpādakajjhāna**”ntiādi. Kiñcāpi māro yaṃ kiñci jhānaṃ samāpannassapi bhikkhuno cittaṃ imaṃ nāma ārammaṇaṃ nissāya vattatīti na jānāti, idhādhippetassa pana bhikkhuno vasena “**vipassanāpādakajjhāna**”nti vuttaṃ. **Teneva pariyāyenāti** “na mārassa akkhīni bhindi”ti evamādinā yathāvuttapariyāyena. **Adassanaṃ gatoti** etthāpi ese va nayo. Cakkhussa padaṃ patiṭṭhāti ca idha ārammaṇaṃ adhippettaṃ taṃ pariggayha pavattanatoti āha “**appatiṭṭhaṃ nirārammaṇa**”nti. **Soti māro. Disvāti** dassanahetu. Yasmā maggena catusaccadassanahetu āsavā na parikkhīṇā. Phalakkhaṇe hi te khīṇāti vuccantīti.

**Loketi** sattaloke saṅkhāraloke ca. **Sattavisattabhāvenāti** laggabhāvena ceva savisesaṃ āsattabhāvena ca. **Atha vāti**ādīnā **niddesana yavasena** (mahāni. 3, cūḷani. mettagūmaṇavapucchāniddeśa 22, 23; cūḷani. khaggavisāṇasuttaniddeśa 124) visattikāpadaṃ niddisati. **Visatīti** vitthaṭā rūpādīsu tebhūmakadhammesu byāpanavasena **visaṭīti** purimavacanameva takārassa ṭakāraṃ katvā vuttaṃ. **Visālīti** vipulā. **Visakkatīti** parisakkatī sahati. Ratto hi rāgavatthunā pādena tāliyamānopi sahati. Osakkaṇaṃ, vipphandaṇaṃ vā **visakkaṇantīti** vadanti. **Visaṃharatīti** yathā tathā kāmesu ānisaṃsaṃ dassentī vividhehi ākārehi nekkhammābhimukhappavattito cittaṃ saṃharati saṅkhipati, visaṃ vā dukkhaṃ, taṃ harati upanetīti attho. **Visaṃvādikāti** aniccādiṃ niccādito gaṇhāpentī visaṃvādikā hoti. Dukkhanibbattakassa kammaṃsa hetubhāvato **visaṃmūlā**, visaṃ vā dukkhadukkhadibhūtā vedanā mūlaṃ etissatī **visaṃmūlā**. Dukkhasamudayattā visaṃ phalaṃ etissatī **visaṃphalā**. Taṇhāya rūpādikassa dukkhasseva paribhogo hoti, na amatassatī sā “**visaṃparibhogā**”ti vuttā. Sabbatha niruttivasena saddasiddhi veditabbā. Yo panettha padhāno attho, taṃ dassetuṃ puna “**visālā vā panā**”tiādi vuttaṃ. **Nittiṇṇo uttiṇṇoti** upasaggavasena padaṃ vaḍḍhitā. Niravasesato vā tiṇṇo **nittiṇṇo**. Tena tena maggena uddhamuddhaṃ tiṇṇo **uttiṇṇo**. Yaṃ panettha atthato avibhattaṃ, taṃ suviññeyyameva.

Nivāpasuttavaṇṇanāya līnatthappakāsanā samattā.

## 6. Pāsarāsisuttavaṇṇanā

**272.** **Sādhumayanti** ettha **sādhū**-saddo āyācanattho, na “sādhāvuso”tiādīsu (saṃ. ni. 1.246; su. ni. 182) viya abhinandanādiatthoti āha “**āyācantā**”ti. Tenāha pāḷiyaṃ “**labheyyamā**”tiādi vuttaṃ. **Na sakkonti**, kasmā? **Buddhā hi garū honti**, paramagarū uttamaṃ gāra vaṭṭhānaṃ, na yathā tathā upasaṅkamanīyā. Tenāha “**ekacāriko siho**”tiādi.

“**Pākaṭakiriyāyā**”ti saṅkhepena vuttaṃ vivarituṃ “**yaṃ hī**”tiādi vuttaṃ. Bhagavā sabbakālaṃ kimevamakāsīti? Na sabbakālamevamakāsī. Yadā pana akāsī, taṃ dassetuṃ “**bhagavā**

**paṭhamabodhiya**’ntiādi vuttaṃ. **Manussattabhāveti** iminā purisattabhāvaṃ ulliṅgeti. **Dhanapariccāgo kato nāma natthi** bhagavato dharamānakāleti adhippāyo.

**Mālākacavaranti** milātamālākacavaraṃ. **Rajojallaṃ na upalimpati** acchatarachavibhāvato. Vuttañhettaṃ “sukhumattā chaviyā kāye rajojallaṃ na limpanti”ti. Yadi evaṃ kasmā bhagavā nahāyatīti āha “**utuggahaṇattha**”nti.

**Vihāroti** jetavanavihāro. **Vīsatusabhaṃ** gāvutassa catuttho bhāgoti vadanti. **Kadācīti** kasmiñci buddhuppāde. **Acalamevāti** aparivattameva anaññabhāvato, mañcānaṃ pana appamahantatāhi pādānaṃ patiṭṭhitatṭhānassa hānivaḍḍhiyo hontiyeva.

**Yantanālikāhi** paripuṇṇasuvaṇṇarasadhārāhi. **Nhānavattanti** “pabbajitena nāma evaṃ nhāyitabba”nti nahānacārittaṃ dassetvā. Yasmā bhagavato sarīraṃ sudhantacāmīkarasamānavāṇṇaṃ suparisodhitapavālarucirakaracaraṇāvaram suvisuddhanīlaratanāvaḷisadisakesatanuruhaṃ, tasmā taḥaṃ taḥaṃ vinissatajātihiṅgulakarasūpasobhitaṃ upari mahaggharatanāvaḷisañchāditaṃ jaṅgamamiva kanakagirisikharaṃ virocittha. Tasmīṃca samaye dasabalassa sarīrato nikkhamitvā chabbaṇṇarasmiyo samantato asītiḥatthappamaṇe padese ādhāvanti vidhāvanti ratanāvaḷiratanādāma-ratanacuṇṇa-vippakiṇṇaṃ viya, pasāritaratanacittakaṇapaṭṭamiva, āsiñcamānalākhārasadhārā-citamiva, ukkāsataniḷpātasamākulamiva, nirantaraṃ vippakiṇṇa-kaṇikāra-kiṅkiṇika-pupphamiva, vāyuvegasamuddhata-cinapiṭṭhacuṇṇa-rañjitaṃ, indadhanu-vijjulatā-vitānasanthatamiva, gaganatalaṃ taṃ ṭhānaṃ pavanañca sammā pharanti. Tena vuttaṃ “**vaṇṇabhūmi nāmesā**”tiādi. **Atthanti** upameyyatthaṃ. **Upamāyoti** “īdiso ca hoti”ti yathārahaṃ tadanucchavikā upamā. **Kāraṇānīti** upamupameyyasambandhavibhāvanāni kāraṇāni. **Pūretvāti** vaṇṇanaṃ paripuṇṇaṃ katvā. **Thāmo veditabbo** “atitthe pakkhandō”ti avattabbattā.

**273. Kaṇṇikāti** sarīragatabindukatāni maṇḍalāni. **Parikkhārabhaṇḍanti** uttarāsaṅgaṃ saṅghāṭiṃca sandhāya vadati. Kiṃ paṇāyaṃ nayo buddhānampi sarīre hotīti? Na hoti, vattadassanattaṃ panetaṃ katanti dassetuṃ “**buddhānaṃ paṇā**”tiādi vuttaṃ. Gamanavasena kāyassābhiniharaṇaṃ **gamaṇābhihāro**. Yathādhippāyāvattanaṃ **adhippāyakopanaṃ**.

**Aññatarāya pāramiyāti** nekkhammapāramiyā. Vīriyapāramiyāti apare. **Mahābhinnikkhamanassāti** mahantassa carimabhava abhinikkhamanassa. Tañhi mahantaṃ bhogakkhandhaṃ mahantañca ñātiparivaṭṭaṃ mahantañca cakkavattisiriṃ pajahitvā sadevakassa lokassa samāraḥkassa ca acinteyyāparimeyyabhedassa mahato atthāya hitāya sukhāya pavattattā mahanīyatāya ca mahantaṃ abhinikkhamananti vuccati.

**Purimoti** “katamāya nu kathāya sannisinā bhavathā”ti evaṃ vuttaattho. **Kā ca pana voti** ettha ca-saddo byatireke. Tena yathāpucchitāya kathāya vakkhamānaṃ vippakatabhāvaṃ joteti. **Pana**-saddo vacanālaṅkāre. Yāya hi kathāya te bhikkhū sannisinā, sā eva antarākathābhūtā vippakatā visesena puna pucchīyati. **Aññāti** antarā-saddassa atthamāha. Aññattho hi ayaṃ antarā-saddo “bhūmantaraṃ (dha. sa. aṭṭha. nidānakathā) samayantara”ntiādīsu viya, **antarāti** vā vemaḷjheti attho. **Dasakathāvatthunissitāti** “kiṃ silaṃ nāma, kathañca pūretabbaṃ, kāni cassa saṃkilesavodānāni”tiādinā appicchādinissitā sīlādinissitā ca kathā. **Ariyoti** niddoso. Atha vā atthakāmehi araṇīyoti **ariyo**, ariyānaṃ ayanti vā **ariyoti**. Bhāvanāmanasikārasena **tuṇhī** bhavanti, na ekaccabāhirakapabbajitā viya mūgabbatasamādānena. **Dutiyajjhānampi ariyo tuṇhībhāvo** vacīsaṅkhārapahānato. **Mūlakammaṭṭhānanti** pārihāriya kammaṭṭhānampi. **Jhānanti** dutiyajjhānaṃ.

**274.** “Sannipatitānaṃ vo, bhikkhave, dvaya”nti (ma. ni. 1.273; udā. 12, 28, 29) aṭṭhuppattivasena desanā pavattāti tassā uparidesanāya sambandhaṃ dassetuṃ “**dvemā, bhikkhave, pariyesanāti ko anusandhī**”ti anusandhiṃ pucchati. **Ayaṃ tumhākaṃ pariyesanāti** yā mahābhinnikkhamanapaṭibaddhā dhammī kathā, sā tumhākaṃ dhammapariyesanā dhammavicāraṇā ariyapariyesanā nāma.

**Apāyamagganti** anathāvahaṃ maggaṃ. **Uddesānukkamaṃ bhinditvāti** uddesānupubbim lañghitvā. **Dhamma-saddo** “amosadhammaṃ nibbāna”ntiādīsu viya pakatipariyāyo. **Jāyanasabhāvoti** jāyanapakatikoti attho. Sesapadesupi eseva nayo.

**Sabbatthāti** yathā “puttabhariya”nti dvandasamāsavasena ekattaṃ, esa nayo sabbattha “dāsīdāsa”ntiādīsu sabbapadesu. Parato vikāraṃ anāpajjitvā sabbadā jātārūpameva hotīti **jātārūpaṃ**, suvaṇṇaṃ. Dhavalasabhāvatāya rañjīyatīti **rajataṃ**, rūpiyaṃ. Idha pana suvaṇṇaṃ ṭhapetvā yaṃ kiñci upabhogaparibhogārahaṃ rajataṃteva gahitaṃ. Upadhīyati ettha dukkhanti **upadhayo**. **Cutīsāṅkhātaṃ maraṇanti** ekabhavapariyāpannaṃ khandhanirodhasaṅkhātaṃ maraṇamāha. Khaṇikanirodho pana khaṇe khaṇe. Tenāha “**sattānaṃ viyā**”ti. **Samkilissatīti** dūsavisena viya attānaṃ dūsissati. Tenāha bhagavā – “pañcime, bhikkhave, jātārūpassa upakkilesā ayo loha”ntiādi (a. ni. 5.23). **Malaṃ gahetvāti** yehi sahayogato malinaṃ hoti, tesam malinabhāvapaccayānaṃ vasena malaṃ gahetvā. Jīraṇato jarādhammavāre jātārūpaṃ gahitanti yojanā. Ye pana jātidhammavārepi jātārūpaṃ na paṭhanti, tesam itaresaṃ viya jīraṇadhammavāre sarūpato anāgatampi upadhiggahaṇena gahitamevāti daṭṭhabbaṃ. Pariggahe ṭhitānaṃ pana vasena vuccamāne apākaṭānampi jātijarāmarāṇānaṃ vasena yojanā labbhateva. Jātārūpasīsena cettha sabbassapi anindriyabaddhassa gahaṇaṃ daṭṭhabbaṃ, puttabhariyādigghahaṇena viya mittāmaccādigghahaṇaṃ.

275. Ariyehi pariyesanā, ariyānaṃ pariyesanāti vā **ariyapariyesanāti** samāsadvayaṃ dasseti “**ayaṃ, bhikkhave**”tiādīna.

276. **Mūlato paṭṭhāyāti** yaṃ mahābhinnikkhamaṇassa mūlabhāvesuādīnavadassanaṃ, tato paṭṭhāya. Yasmā te bhikkhū tattha mahābhinnikkhamaṇakathāya sannisinnā, sā ca nesaṃ antarākathā vippakatā, tasmā bhagavā tesam mūlato paṭṭhāya mahābhinnikkhamaṇakathaṃ kathetuṃ ārabhi. **Ahampi pubbeti** visesavacanaṃ aparipakkaññaṇena sayam carimabhava tīsu pāsādesu tividhanātakaparivārassa dibbasampattisadisāya mahāsampattiyā anubhavanaṃ, abhinnikkhamitvā padhānapadahanavasena attakilamathānuyogañca sandhāyāha. **Anariyapariyesanaṃ pariyesinti** etthāpi eseva nayo. **Pañcavaggiyāpīti** yathāsakaṃ gihibhogaṃ anuyuttā taṃ pahāya pabbajitvā attakilamathānuyoge ṭhitā satthu dhammacakkapavattanadesanāya (saṃ. ni. 5.1081; mahāva. 13; paṭi. ma. 2.30) tampi pahāya ariyapariyesanaṃ pariyesimsūti.

277. Kāmaṃ **dahara-saddo** “daharaṃ kumāraṃ mandaṃ uttānaseyyaka”nti (ma. ni. 1.496) ettha bālādārake āgato, “bhadrēna yobbanena samannāgato”ti pana vakkhamānattā yuvāvattā idha dahara-saddena vuttāti āha “**taruṇova samāno**”ti. **Paṭhamavayena** ekūnatimsavayattā. Jātiyā hi yāva tettimsavayā paṭhamavayo. **Anādaratthe sāmivacanaṃ** yathā “devadattassa rudantassa pabbajī”ti. Kāmaṃ assumuccanaṃ rodanaṃ, taṃ **assumukhānanti** iminā pakāsitaṃ, taṃ pana vatvā “**rudantāna**”nti vacanaṃ balavasokasamuṭṭhānaṃ ārodanavattamuṃ pakāsetīti āha “**kanditvā rodamānāna**”nti. **Kiṃ kusalanti gavesamānoti** kinti sabbaso avajjarahitaṃ ekanta niyyānikaṃ pariyesamāno. **Varapadanti** vaṭṭadukkhanissaraṇatthikehi ekantena varaṇīyaṭṭhena varam, pajjitabbaṭṭhena padaṃ. Tuṅgasarīratāya dīgho, piṅgalacakkhutāya piṅgaloti **dīghapiṅgalo**. **Dhammoti** vinayo, samayoti attho. **Sutvāva uggaṇhinti** tena vuccamānassa savanamatteneva uggaṇhim vācuggataṃ akāsim.

**Paṭilapanamattakenāti** puna lapanamattakena. Jānātīti ñāṇo, ñāṇoti vādo ñāṇavādo, taṃ **ñāṇavādaṃ**. “Vadāmī”ti āgatattā **aṭṭhakathāyaṃ “jānāmī”**ti uttamapurisavasena attho vutto. **Aññepi bahūti** aññepi bahū mama tathābhāvaṃ jānanta “ayaṃ imaṃ dhammaṃ jānātī”ti, “akampanīyatāya thiro”ti vā evaṃ vadanti. **Lābhīti aññāsīti** dhammassa uddisanena mahāpaññatāya “ayaṃ attanā gatamaggaṃ pavedeti, na anussutiko”ti aññāsī. **Assāti** bodhisattassa. **Etadahosīti** etaṃ “na kho āḷāro kālāmo”tiādi manasi ahoṣi, cintesīti attho.

Heṭṭhimasamāpattīhi vinā uparimasamāpattīnaṃ sampādanassa asambhavato “**satta samāpattiyo**



**maṃ jānāpesī**’ti āha. **Payogaṃ kareyyanti** bhāvanam anuyuñjeyyanti attho. **Evamāhāti** evam ‘‘aham, āvuso’’tiādimāha, sattannaṃ samāpattinaṃ adhigamaṃ paccaññāsīti attho.

**Anusūyakoti** anissukī. Tena mahāpurise pasādam pavedesi. Bodhisattassa tā samāpattiyo nibbattetvā t̥hitassa purimajātīparicayena ñāṇassa ca mahantatāya tāsam gati ca abhisamparāyo ca upat̥thāsi. Tena ‘‘vaṭṭapariyāpannā evetā’’ti nicchayo udapādi. Tenāha ‘‘**nāyaṃ dhammo nibbidāya**’’tiādi. Ekaccānaṃ virāgabhāvanāsamatikkamāvahopi neva tesampi accantāya samatikkamāvaho, sayañca vaṭṭapariyāpannoyeva, tasmā neva vaṭṭe nibbindanattāya, yadaggena na nibbidāya, tadaggena na virajjanattāya, rāgādīnaṃ pāpadhammaṇaṃ na nirujjanattāya, na upasamattāya, tasmā taṃ abhiññeyyadhammaṃ na abhijānanattāya...pe... samvattatīti yojanā.

**Yāvadeva ākiñcaññāyanupapattiyāti** sattu samāpattisu ukkaṭṭhaṃ gahetvā vadati. Uṭṭhāya samuṭṭhāya acutidhammaṃ pariyesituṃ yuttattā tañca anatikkanta jātidhammamevāti mahāsatto pajahatīti āha ‘‘**yañca t̥hānaṃ pāpeti**’’tiādi. **Tato paṭṭhāyāti** yadā samāpattidhammassa gatiñca abhisamparāyañca abbhaññāsīti, tato paṭṭhāya. **Makkhikāvasenāti** bhojanassa makkhikāmissatāvasena. **Manam na uppādeti** bhujjantūti adhippāyo. **Mahantena ussāhenāti** idaṃ katipāhaṃ tattha bhāvanānuyogamattaṃ sandhāya vuttaṃ, na aññesaṃ viya kasiṇaparikkammādikaraṇaṃ. Na hi antimabhavikabodhisattānaṃ samāpattinibbattane bhāriyaṃ nāma. **Analañkaritvāti** anu anu alaṃkatvā punappunaṃ ‘‘iminā na kiñci payojana’’nti katvā.

**278. Vācāya uggahitamattovāti** ettha pubbe vuttanayānusārena attho veditabbo.

**279.** Mahāvelā viya **mahāvelā**, vipulavālikapuñjatāya mahanto velātaṇṇo viyāti attho. Tenāha ‘‘**mahāvālikarāsīti attho**’’ti. Uru maru sikatā vālukā vaṇṇu vālikāti ime saddā samānatthā, byañjanaṃ nānaṃ.

Senā nigacchi nivisi etthāti **senānigamo**, senāya nivit̥ṭṭhānaṃ. **Senānigāmoti** pana ayaṃ samaññā aparakālīkā. Gocaraḡāmanidassanañcetaṃ. **Uparisuttasminti** mahāsaccakasutte. **Idha pana bodhipallaṅko adhippeto** ariyapariyesanāya vuccamānatā.

**280.** ‘‘Ñānadassana’’nti ca ekajjhaṃ gahitapadadvayavisesasassa anāmaṭṭhattā ‘‘me’’ti ca gahitattā anavasesaññeyyāvabodhanasamatthameva ñāṇavisesaṃ bodheti, na ñāṇamattaṃ, na dassanamattanti āha ‘‘**sabbadhammadassanasamatthañca me sabbaññutaññānaṃ udapādi**’’ti. **Akuppattāyāti** vimokkhattāya sabbaso paṭipakkhadhammehi asaṅkhobhanīyatāya. Tenāha ‘‘**rāgādīhi na kuppāti**’’ti. Ārammaṇasantatāyapī tadārammaṇānaṃ atthi viseso yathā taṃ ‘‘āneñjavihāre’’ti āha ‘‘**akuppārammaṇatāya cā**’’ti. **Paccavekkhaññānaṃpīti** na kevalaṃ sabbaññutaññānameva, atha kho yathādhigate paṭivedhasaddhamme ekūnavīsatividhapaccavekkhaññānaṃpīti.

**281. Paṭividdhoti** (dī. ni. tī. 2.64; saṃ. ni. tī. 1.1.172; sāratta. tī. mahāvagga 3.7) sayambhuññāna ‘‘idaṃ dukkha’’ntiādinā paṭimukhaṃ nibbijjanavasena patto, yathābhūtaṃ avabuddhoti attho. **Gambhīroti** mahāsamuddo viya makasatūṇḍasūciyā aññatra samupacitaparipakkaññānasambhārehi aññesaṃ ñāṇena alabbhaneyyapattit̥ṭṭho. Tenāha ‘‘**uttānabhāvapaṭikkhepavacanameta**’’nti. Yo alabbhaneyyapattit̥ṭṭho, so ogāhitumasakkuṇeyyatāya sarūpato ca passituṃ na sakkāti āha ‘‘**gambhīrattāva duddaso**’’ti. **Dukkheṇa dat̥ṭṭhabboti** kicchena kenacideva dat̥ṭṭhabbo. Yaṃ pana dat̥ṭṭhameva na sakkā, tassa ogāhetvā anu anu bujjhane kathā eva nat̥ṭṭhīti āha ‘‘**duddasattāva duranubodho**’’ti. **Dukkheṇa avabujjhitaṃ** avabodhassa dukkarabhāvato. Imasmiṃ t̥hāne – ‘‘taṃ kiṃ maññatha, bhikkhave, katamaṃ nu kho dukkarataraṃ vā durabhisambhavataraṃ vā’’ti **suttapadaṃ** (saṃ. ni. 5.1115) vattabbaṃ. Santārammaṇatāya vā **santo**. Nibbutasabbapariḡāhatāya **nibbuto**. Padhānabhāvaṃ nītoti vā **paṇīto**. Atittikaratt̥ṭṭhena **atappako** sādurasabhojanaṃ viya. Ettha ca nirodhasaccaṃ santaṃ ārammaṇanti **santārammaṇaṃ**, maggasaccaṃ santaṃ santārammaṇañcāti **santārammaṇaṃ**. Anupasantasabhāvānaṃ kilesānaṃ saṅkhārānañca abhāvato

nibbutasabbapariḷāhatāya santapaṇītabhāveneva ca asecanakatāya atappakatā daṭṭhabbā. Tenāha “**idaṃ dvayaṃ lokuttarameva sandhāya vutta**”nti. Uttamañāṇavisayattā **na takkena avacaritabbo**, tato eva nipuṇañāṇagocaratāya ca **saṅho**. Sukhumasabhāvattā ca **nipuṇo**, bālānaṃ avisayattā paṇḍitehi eva veditabboti **paṇḍitavedanīyo**. Ālīyanti abhiramītabbatṭhena sevīyantīti **ālayā**, pañca kāmagaṇā. Ālayanti allīyantī abhiramaṇavasena sevantīti **ālayā**, taṇhāvicarītāni. **Ramantīti** ratim vīdanti kīlanti laḷanti. **Ālayaratāti** ālayaniratā.

**Ṭhānaṃ sandhāyāti** ṭhāna-saddaṃ sandhāya. Atthato pana **ṭhānanti** ca paṭiccasamuppādo eva adhippeto. Tiṭṭhati phalaṃ tadāyattavuttitāyāti **ṭhānaṃ**, saṅkhārādīnaṃ paccayabhūtā avijjādayo. Imesaṃ saṅkhārādīnaṃ paccayāti idappaccayā, avijjādayova. Idappaccayā eva **idappaccayatā** yathā “devo eva devatā”ti, idappaccayānaṃ vā avijjādīnaṃ attano phalaṃ paṭi paccayabhāvo uppādanasamatthātā **idappaccayatā**. Tena samatthapaccayalakkhaṇo paṭiccasamuppādo dassito hoti. Paṭicca samuppajjati phalaṃ etasmāti **paṭiccasamuppādo**. Padadvayenapī dhammānaṃ paccayaṭṭho eva vibhāvito. Tenāha “**saṅkhārādīpaccayānaṃ etaṃ adhvācāna**”nti. Ayamettha saṅkhepo, vitthāro pana **visuddhimaggasaṃvaṇṇanāyaṃ** (visuddhi. mahāṭī. 2.572-573) vuttanayena veditabbo.

**Sabbasaṅkhārasamathotiādi sabbanti** sabbasaṅkhārasamathādisaddābhidheyyaṃ sabbam atthato **nibbānameva**. Idāni tassa nibbānabhāvaṃ dassetuṃ “**yasmā hī**”tiādi vuttaṃ. Nti nibbānaṃ. **Āgammāti** paṭicca ariyamaggassa ārammaṇapaccayabhāvahetu. **Sammantīti** appaṭisandhikūpasamavasena sammanti. Tathā santā savisesaṃ upasantā nāma hontīti āha “**vūpasammantī**”ti. Etena “sabbe saṅkhārā sammanti etthāti **sabbasaṅkhārasamatho**, nibbāna”nti dasseti. Sabbasaṅkhātavisaṃyutte ca nibbāne sabbasaṅkhārāvūpasamapariyāyo heṭṭhā vuttanayeneva veditabbo. Sesapadesupī eseva nayo. **Paṭinissaṭṭhāti** samucchadavasena pariccattā honti. **Sabbā taṇhāti** aṭṭhasatappabhedā sabbāpi taṇhā. **Sabbe kilesarāgāti** kāmarāgarūparāgādibhedā sabbepī kilesabhūtā rāgā, sabbepī vā kilesā idha “kilesarāgā”ti veditabbā, na lobhavesesā eva cittassa vipariṇatābhāvāpādanato. Yathāha “rattampi cittaṃ vipariṇataṃ, duṭṭhampi cittaṃ vipariṇataṃ, mūlhampi cittaṃ vipariṇata”nti (pārā. 271). **Virajantīti** palujjanti.

Ciranisajjācirabhāsanehi piṭṭhiāgilāyanatālugalāsosādivasena **kāyakilamatho** ceva **kāyavihesā** ca veditabbā. Sā ca kho desanāya atthaṃ ajānantānaṃ vasena vuttā, jānantānaṃ pana desanāya kāyaparissamopī satthu aparissamova. Tenāha bhagavā – “na ca maṃ dhammādhikaraṇaṃ vihesesī”ti (udā. 10). Tenevāha “**yā ajānantānaṃ desanā nāma, so mama kilamatho assā**”ti. **Ubhayanti** cittakilamatho ceva cittavihesā cāti ubhayampetaṃ **buddhānaṃ natthi** bodhimūleyeva samucchinnattā.

**Anubrūhanaṃ** sampiṇḍanaṃ. Soti “apissū”ti nipāto. **Manti** paṭi-saddayogena sāmiatthe upayogavacananti āha “**mamā**”ti. Vuddhipattā vā acchariyā **anacchariyā**. Vuddhiatthopī hi a-kāro hoti yathā “asekkhā dhammā”ti (dha. sa. 11.tikamātikā). Kappānaṃ satahassaṃ cattāri ca asaṅkhyeyyāni sadevakassa lokassa dhammasaṃvibhāgakarāṇatthameva pāramiyo pūretvā idāni adhiḡatadhammarajjassa tattha apposukkatāpattidīpanatā, gāthāthassa acchariyatā, tassa vuddhipattī cāti veditabbam. Atthadvārena hī gāthānaṃ anacchariyatā. **Gocarā ahesunti** upaṭṭhahesum. Upaṭṭhānaṃ vitakketabbatāti āha “**parivitakkayitabbataṃ pāpuṇṇisū**”ti.

Yadi sukhāpaṭipadāva, kathaṃ kicchatāti āha “**pāramīpūraṇakāle panā**”tiādi. **Evamādīni** dupparicajāni **dentassa**. **Ha**-iti vā “byatta”nti etasmiṃ atthe nipāto. Ekamaṣattheti keci. Ha byattaṃ, ekamaṣena vā alaṃ nippayojanaṃ evaṃ kicchena adhiḡatassa dhammassa desitanti yojanā. **Halanti** vā “ala”nti iminā samānatthaṃ padaṃ “halanti vadāmi”tiādīsu (dī. ni. ṭī. 2.65; saṃ. ni. ṭī. 1.1.172) viya. **Rāḡadosaparipuṭṭhehīti** puṭṭhavisena viya sappena rāgena dosena ca samphuṭṭhehi abhibhūtehi. **Rāḡadosānugatehīti** rāgena ca dosena ca anubandhehi.

Kāmarāgarattā bhavarāgarattā ca nīvaraṇehi nivutatāya, diṭṭhirāgarattā viparītābhinivesena. **Na dakkhantīti** yāthāvato dhammaṃ na paṭivijjhissanti. **Evam gāhāpetunti** “anicca”ntiādīnā sabhāvena

yāthāvato dhammaṃ jānāpetuṃ. Rāgadosaparetatāpi nesam sammūlhabhāvenevāti āha “**tamokhandhena āvuṭṭā**”ti.

**282.** Dhammadesanāya appossukkatāpattiyā kāraṇaṃ vibhāvetuṃ “**kasmā panā**”tiadinā sayameva codanaṃ samuṭṭhāpeti. Tattha **aññātavesenāti** imassa bhagavato sāvaka bhāvūpagamanena aññātārūpena. Tāpasavesenāti keci. So pana arahattādhigameneva vigaccheyya. Tividhaṃ kāraṇaṃ appossukkatāpattiyā paṭipakkhassa balavabhāvo, dhammassa gambhīratā, tattha ca sātisaṃ gāravanti, ta dassetuṃ “**tassa hī**”tiādi āradhaṃ. (Tattha **paṭipakkhā** nāma rāgādayo kilesā sammāpaṭipattiyā antarāyakarattā. Tesam balavabhāvato ciraparibhāvanāya sattasantānato dubbisodhiyatāya te satte mattahatthino viya dubbalapurisaṃ adhibhavivā ajjhottharivā anayabyasanaṃ āpādentā anekasatayojanāyāmaṃvithhāraṃ sunicitāṃ ghanasannivesaṃ kaṇṭakaduggampi adhisenti. Dūrappabhedaducchejjatāhi dubbisodhiyataṃ pana dassetuṃ “**athassā**”tiādi vuttaṃ. Tattha ca anto amaṭṭhatāya **kaññiyapuṇṇā lābu**. Cirapārivāsikatāya **takkabharitā cāṭi**. Snehatintadubbalabhāvena **vasāpītapilotikā**. Telamissitatāya **añjanamakkhitaṭṭho** dubbisodhanīyā vuttā, hīnūpamā cetā rūpapabandhabhāvato acirakālikattā ca malīnatāya, kilesasaṃkilesa eva pana dubbisodhanīyataro anādikālikattā anusayitattā ca. Tenāha “**atisaṃkiliṭṭhā**”ti. Yathā ca dubbisodhanīyataratāya, evaṃ gambhīraduddasaduranubodhānampi vuttaupamā hīnūpamāva).

Paṭipakkhavigamanena gambhīropi dhammo supākaṭo bhaveyya. Paṭipakkhavigamanaṃ pana sammāpaṭipattipaṭibaddhaṃ, sā saddhammassavanādhīnā. Taṃ satthari dhamme ca pasādāyattaṃ, so garuṭṭhāniyaṃ ajjhesanahetukoti panālikāya sattānaṃ dhammasamāpaṭipattiyā brahmayācanānimitanti taṃ dassento “**apicā**”tiādimāha.

Upakkilesabhūtaṃ appaṃ rāgādirajaṃ etassāti apparaṃ, apparaṃ akkhi paññācakkhu yesaṃ te taṃsabhāvāti katvā **apparajakkhajātikā**ti ayamatto vibhāvito “**paññāmaye**”tiadinā. Appaṃ rāgādirajaṃ yesaṃ taṃsabhāvā **apparajakkhajātikā**ti evampi saddattho sambhavati. Dānādidasapuññakiriyavattūni saraṇagamanaparāhitapariṇāmanehi saddhiṃ (dvādasa hontīti) “**dvādasapuññakiriyavasenā**”ti vuttaṃ.

Rāgādimalena **samalehi** pūraṇādīhi **chahi satthārehi** satthupaṭiññehi kabbaracanāvasena cintākaviādi bhāve ṭhatvā takkapaṇiyāhatāṃ vīmaṃsānucaritaṃ sayamāpaṭibhānaṃ **cintito**. Te kira buddhakolāhalānussavena sañjātakutūhalaṃ lokaṃ vañcetaṃ kohaññe ṭhatvā sabbaññutaṃ paṭijānantā yaṃ kiñci adhammaṃyeva dhammoti dīpesuṃ. Tenāha “**te hi puretaraṃ uppajjivā**”tiādi. **Apāpuretanti** etaṃ kassapassa bhagavato sāsantaradhānato pabhuti pihitaṃ nibbānanagarassa mahādvāraṃ ariyamaggaṃ saddhammadesanāhatthena apāpura vivara.

Selapabbato ucco hoti thiro ca, na paṃsupabbato missakapabbato cāti āha “**sele yathā pabbatamuddhani**”ti. **Dhammamayaṃ pāsādanti** lokuttaradhammāha. So hi sabbaso pasādāvaho, sabbadhamme atikkamma abbhuggataṭṭhena pāsādasadiso ca. Paññāpariyāyo vā idha **dhamma**-saddo. Sā hi abbhuggataṭṭhena “pāsādo”ti **abhidhamme** (dha. sa. aṭṭha. 16) niddiṭṭhā. Tathā cāha –

“Paññāpāsādamāruya, asoko sokiniṃ pajam;  
Pabbataṭṭhova bhūmaṭṭhe, dhīro bale avekkhatī”ti. (dha. pa. 28);

**Uṭṭhehīti** vā dhammadesanāya appossukkatāsāṅkhātasāṅkocāpattito kilāsubhāvato uṭṭhaha.

**283.** Garuṭṭhāniyaṃ payirupāsivā garutaraṃ payojanaṃ uddissa abhipatthanā ajjhesanā, sāpi atthato yācanāva hotīti āha “**ajjhesananti yācana**”nti. Padesavisayaṃ nāṇadassanaṃ ahutvā buddhānaṃyeva āveṇikabhāvato idaṃ nāṇadvayaṃ “buddhacakkhū”ti vuccatīti āha “**imesaṅhi dvinnaṃ nāṇānaṃ buddhacakkhūti nāma**”nti. **Tiṇṇaṃ maggañāṇānanti** heṭṭhimānaṃ tiṇṇaṃ maggañāṇānaṃ “**dhammacakkhū**”ti nāmaṃ catusaccadhammadassanamattabhāvato. Yato tāni nāṇāni

vijjūpamabhāvena vuttāni, aggamaggaññaṃ pana ñāṇakiccassa sikhāppattiyā na dassanamattaṃ hotīti “dhammacakkhū”ti na vuccati, tato taṃ vajirūpamabhāvena vuttaṃ. **Vuttanayenāti** “apparajakkhā”ti ettha vuttanayena. Yasmā mandakilesā “**apparajakkhā**”ti vuttā, tasmā bahalakilesā “**mahārajakkhā**”ti veditabbā. Paṭipakkhavidhamanasamatthatāya **tikkhāni** sūrāni visadāni, vuttavipariyāyena **mudūni**. **Saddhādayo ākārāti** saddahanādippakāre vadati. **Sundarāti** kalyāṇā. **Sammohavinodaniyaṃ** (vibha. aṭṭha. 814) pana “yesaṃ āsayādayo koṭṭhāsā sundarā, te svākārā, viparītā dvākārā”ti vuttaṃ, taṃ imāya atthavaṇṇanāya aññadatthu saṃsandati sametīti daṭṭhabbaṃ. **Kāraṇaṃ** nāma paccayākāro, saccāni vā.

**Ayaṃ panettha pālīti** ettha apparajakkhādīpadānaṃ atthavibhāvane ayaṃ tassatthassa vibhāvanī pālī. Saddhādīnaṃ vimutti-paripācākadhammānaṃ balavabhāvo tappaṭipakkhānaṃ pāpadhammānaṃ dubbalabhāveneva hoti, tesaṅca balavabhāvo saddhādīnaṃ dubbalabhāvenāti vimutti-paripācākadhammānaṃ atthitānatthitāvasena apparajakkhamahārajakkhatādayo pālīyaṃ vibhajitvā dassitā. Khandhādayo eva lujjanapalujjanaṭṭhena **loko**. Sampattibhavabhūto loko **sampattibhavaloko**, sugatisaṅkhāto upapattibhavo. Sampatti sambhavati etenāti **sampattisambhavaloko**. Sugatisaṃvattaniyo kammabhavo. Duggati saṅkhātaupapattibhavaduggati saṃvattaniyakammabhavā **vipattibhavalokavipattisambhavalokā**.

Puna ekakadukādivasena lokaṃ vibhajitvā dassetuṃ “**eko loko**”tiādi vuttaṃ. Āhārādayo viya hi āhāraṭṭhitikā saṅkhārā lujjanapalujjanaṭṭhena lokoti. Ettha **eko loko sabbe sattā āhāraṭṭhitikāti** yāyaṃ puggalādhiṭṭhānāya kathāya sabbasaṅkhārānaṃ paccayāyattavutti, tāya sabbe saṅkhārā ekova loko ekavidho pakārantarassa abhāvato. **Dve lokāti**ādisupī iminā nayena attho veditabbo. Nāmaggaṇena cettha nibbānassa aggaṇaṃ tassa alokasabhāvattā. Nanu ca **āhāraṭṭhitikāti** ettha paccayāyattavuttitāya maggaphalānampi lokatā āpajjati? Nāpajjati pariññeyyānaṃ dukkhasaccadhammānaṃ idha “loko”ti adhippetattā. Atha vā na lujjati na palujjati yo gahito tathā na hoti, so lokoti taṃ-gaṇārahitānaṃ lokuttarānaṃ natthi lokatā. Upādānaṃ ārammaṇabhūtā khandhā **upādānakkhandhā**. **Dasāyatanaṅgīti** dasa rūpāyatanaṅgīti. Sesamettha suviññeyyameva.

Vivattaṅgīhāsayaṃ adhippetattā tassa ca sabbaṃ tebhūmakakammaṃ garahitabbaṃ vajjitabbaṅca hutvā upaṭṭhātīti vuttaṃ “**sabbe abhisāṅkhārā vajjaṃ, sabbe bhavagāmikammā vajja**”nti. Apparajakkhamahārajakkhādīsu pañcasu dukesu ekekasmīṃ dasa dasa katvā “**paññāsāya ākārehi imāni pañcendriyāni jānātīti**”ti vuttaṃ. Atha vā anvayato byatirekato ca saddhādīnaṃ indriyānaṃ paropariyattaṃ jānātīti katvā tathā vuttaṃ. Ettha ca apparajakkhādibhādivasena āvajjantassa bhagavato te sattā puñjapuñjāva hutvā upaṭṭhahanti, na ekekā.

Uppalāni ettha santīti **uppalinī**, gacchopi jalāsāyopi, idha pana jalāsāyo adhippetoti āha “**uppalavane**”ti. Yāni udakassa anto nimuggāneva hutvā pusanti vaḍḍhanti, tāni **antonimuggaposīni**. **Dīpitanīti aṭṭhakathāyaṃ** pakāsītāni, idheva vā “aññānipī”tiādinā bhāsītāni.

**Ugghaṭitaññūti** ugghaṭitaṃ nāma ñāṇugghaṭanaṃ, ñāṇe ugghaṭitamatte eva jānātīti attho. Vipañcitaṃ vitthāritameva atthaṃ jānātīti **vipañcitaññū**. Uddesādīhi netabboti **neyyo**. **Saha udāhaṭavelāyāti** udāhāre udāhaṭamatteyeva. **Dhammābhisamayoti** catusaccadhammassa ñāṇena saddhiṃ abhisamayo. **Ayaṃ vuccatīti** ayaṃ “cattāro satipaṭṭhānā”tiādinā nayena saṃkhittena mātīkāya ṭhapiyamānāya desanānusārena ñāṇaṃ pesetvā arahattaṃ gaṇhituṃ samattho puggalo “**ugghaṭitaññū**”ti vuccati. **Ayaṃ vuccatīti** ayaṃ saṃkhittena mātīkaṃ ṭhapatvā vitthārena atthe vibhajiyamāne arahattaṃ pāpuṇituṃ samattho puggalo “**vipañcitaññū**”ti vuccati. **Uddesatoti** uddesahetu, uddisāntassa, uddisāpentassa vāti attho. **Paripucchatoti** atthaṃ paripucchantassa. **Anupubbena dhammābhisamayo hotīti** anukkamena arahattappatti hoti. **Na tāya jātiyā dhammābhisamayo hotīti** tena atthabhāvena maggaṃ vā phalaṃ vā antamaso jhānaṃ vā vipassanaṃ vā nibbattetuṃ na sakkoti. **Ayaṃ vuccati puggalo padaparamoti** ayaṃ puggalo byañjanapadameva paramaṃ assāti padaparamoti vuccati.

**Kammāvaraṇenāti** (vibha. aṭṭha. 826) pañcavidhena ānantariyakammena. **Vipākāvaraṇenāti** ahetukapaṭisandhiyā. Yasmā pana duhetukānampi ariyamaggapaṭivedho natthi, tasmā duhetukā paṭisandhipi “vipākāvaraṇamevā”ti veditabbā. **Kilesāvaraṇenāti** niyatamicchādiṭṭhiyā. **Assaddhāti** buddhādīsu saddhārahitā. **Acchandikāti** kattukamyatākusalacchandarahitā. Uttarakurukā manussā acchandikatṭhānaṃ paviṭṭhā. **Duppaññāti** bhavaṅgapaññāya parihīnā. Bhavaṅgapaññāya pana paripuñṇāyapi yassa bhavaṅgaṃ lokuttarassa paccayo na hoti, sopi duppañño eva nāma. **Abhabbā niyāmaṃ okkamituṃ kusalesu dhammesu sammattanti** kusalesu dhammesu sammattaniyāmasaṅkhātāṃ maggaṃ okkamituṃ adhigantuṃ abhabbā. **Na kammāvaraṇenāti**ādīni vuttavipariyāyena veditabbāni.

**Nibbānassa dvāraṃ** pavisanamaggo. **Vivaritvā ṭhapito** mahākaruṇūpanissayena sayambhuñṇāyena adhigatattā. **Saddhaṃ pamuñcantūti** attano saddhaṃ pavesentu, saddahanākāraṃ upaṭṭhapentūti attho. Sukhena akicchena pavattaniyātāya **suppavattitaṃ**. **Na bhāsiṃ** na bhāsissāmīti cintesiṃ.

**284.** Dhammaṃ desessāmīti evaṃ pavattitadhammadesanāpaṭisaṃyuttassa vitakkassa sattamasattāhato paraṃ aṭṭhamasattāheyeva uppannattā vuttaṃ “**aṭṭhame sattāhe**”ti. Na itarasattāhāni viya paṭiniyatakiccalakkhitassa aṭṭhamasattāhassa nāma pavattitassa sabbhāvā.

**Vivaṭanti** devatāviggahena vivaṭaṅgapaccaṅganiddāya janānaṃ pākaṭaṃ vippakāranti attho. “Buddhattaṃ anadhigantvā na paccāgamissāmī”ti uppannavitakkātisayahetukena **pathavīparivattanacetiyam nāma dassetvā**. Sākiyakolīyamallaraṅgavasena **tīpi rajjāni**. **Rukkhamūleti** nigrodhamūle. **Vatvā pakkāmi**, pakkamantiyā cassā mahāsatto ākāraṃ dassesi suvaṇṇathālaggahaṇāya, sā “tumahākaṃ taṃ pariccattamevā”ti pakkāmi.

**Divāvihāraṃ katvāti** nānāsamāpattiyo samāpajjanena divāvihāraṃ viharitvā. “Kāmaṃ taco ca nhāru ca, aṭṭhi ca avasissatu, upasussatu sarīre maṃsalohita”ntiādīnā **sutte** (ma. ni. 2.184; saṃ. ni. 2.237; a. ni. 2.5; 8.13; mahāni. 17, 196) āgatanayena **caturaṅgavīriyaṃ adhiṭṭhahitvā**.

**Navayojananti** ubbedhato vuttaṃ, puthulato dvādasayojanā, dīghato yāva cakkavālā āyatāti vadanti. Ajjhottharanto upasaṅkamitvā – “uṭṭhehi so, siddhattha, ahaṃ imassa pallaṅkassa anucchaviko”ti vatvā tattha sakkhiṃ otārento attano parisam niddisi. Ekappahāreneva – “ayameva anucchaviko, ayameva anucchaviko”ti kolāhalamakāsi, taṃ sutvā **mahāsatto...pe... hatthaṃ pasāreti**. Yaṃ sandhāya vuttaṃ –

“Acetanāyaṃ pathavī, aviññāya sukhaṃ dukhaṃ;  
Sāpi dānabalā mayhaṃ, sattakkhattuṃ pakampathā”ti. (cariyā. 1.124);

Pubbenivāsaññaṃ visodhetvāti ānetvā sambandho sīhāvalokanañāyena. **Vaṭṭavivaṭṭaṃ sammasitvāti** catusaccamanasikāraṃ sandhāyāha. **Imassa pallaṅkassa atthāyāti** pallaṅkasīsenā adhigatavisesaṃ dasseti. Tattha hi sikhāpattavimuttisukhaṃ avijahanto antarantarā ca paṭiccasamuppādaṅgaṃ manasikaronto ekapallaṅkena nisīdi. **Ekaccānanti** yā adhigatamaggā sacchikatanirodhā ekadesena ca buddhaguṇe jānanti, tā ṭhapetvā tadaññesaṃ devatānaṃ. **Aññepi buddhattakarāti** visākhāpuñṇamato paṭṭhāya rattindivaṃ evaṃ nīccasamāhitabhāvahetukānaṃ buddhaguṇānaṃ upari aññepi buddhattasādhakā, “ayaṃ buddho”ti buddhabhāvassa paresaṃ vibhāvanā dhammā kiṃ nu kho atthīti yojanā.

**Animisehīti** dhammapītipphāravasena pasādavikasitaniccalatāya nimesarahitehi. **Ratanacaṅkameti** devatāhi māpīte ratanamayacaṅkame. Ratanabhūtānaṃ sattannaṃ pakaraṇānaṃ tattha ca anantanayassa dhammaratanassa sammasanena **taṃ ṭhānaṃ ratanagaracetiyam nāma jātantipi** vadanti. **Evanti** vakkhamānākārena. Chabbaññaṃ rasmīnaṃ dantehi nikkhamanato

**chaddantanāgakulaṃ viyāti** nidassanaṃ vuttaṃ.

**Heṭṭhā lohapāsādappamaṇoti** navabhūmakassa sabbapaṭhamassa lohapāsādassa heṭṭhā lohapāsādappamaṇo. **Khandhakaṭṭhakathāyaṃ** (mahāva. aṭṭha. 5) pana tattha “bhaṇḍāgāragabbhappamaṇa”nti vuttaṃ.

**Paccaggheti** abhinave. Paccekaṃ mahagghatāya **paccaggheti** keci, taṃ na sundaraṃ. Na hi buddhā bhagavanto mahagghaṃ paṭiggaṇhanti paribhuñjanti vā. **Piṇḍapātanti** ettha manthañca madhupiṇḍikañca sandhāya vadati. **Ayaṃ vitakkoti** – “kassa nu kho ahaṃ paṭhamam dhammaṃ deseyya”nti ayaṃ parivitakko.

**Paṇḍiccenāti** samāpattiṭṭhāṇasiddhena adhiṃgamabāhusaccasaṅkhātena paṇḍitabhāvena. **Veyyattiyenāti** samāpattiṭṭhāṇapaccayena pārihāriyapaññāsaṅkhātena byattabhāvena. **Medhāvīti** tihetukapaṭisandhipaññāsaṅkhātena taṃtaṃtikattabbatāpaññāsaṅkhātena ca medhāya samannāgatoti evampettha attho daṭṭhabbo. **Mahājāniyoti** mahāparihāniko. **Āgamanapādāpi natthīti** idaṃ paṭhamam vattabbaṃ, athāhaṃ tattha gaccheyyaṃ, gantvā desiyamānaṃ dhammampissa sotum sotapasādopi natthīti yojanā. Kiṃ pana bhagavatā attano buddhānubhāvena te dhammaṃ ñāpetum na sakkāti? Āma, na sakkā. Na hi parato ghosaṃ antarena sāvakaṇaṃ dhammābhisamayo sambhavati, aññathā itarapaccayarahitassapi dhammābhisamayena bhavitabbaṃ, na ca taṃ atthi. Vuttañhetam – “dveme, bhikkhave, paccayā sammādiṭṭhiyā uppādāya parato ca ghoso ajjhatañca yonisomanasikāro”ti (a. ni. 2.127). Pāliyaṃ rāmasseva samāpattiṭṭhāṇa āgatā, na udakassa, taṃ tassa bodhisattena samāgatakālavasena vuttaṃ. So hi pubbepi tattha yuttappayutto viharanto mahāpurisena khippaññeva samāpattiṇaṃ nibbattitabhāvaṃ sutvā samvegaṇāto mahāsatte tato nibbijja pakkante ghaṭento vāyamanto nacirasseva aṭṭha samāpattiyo nibbattesi. Tena vuttaṃ “**nevasaññānāsaññāyatane nibbattoti addasā**”ti. Ete aṭṭha brāhmaṇāti sambandho. **Chalaṅgavāti** chalaṅgaviduno. **Mantanti** mantapadaṃ. “Nijjhāyivā”ti vacanaseso, mantetvāti attho. **Viyākarimsūti** kathesum.

**Yathāmantapadanti** lakkhaṇamantasaṅkhātavedavacanānurūpaṃ. **Gatāti** paṭipannā. “Dveva gatiyo bhavanti anaññā”ti (dī. ni. 2.33; 3.199-200; ma. ni. 2.384, 398) vuttaniyāmena nicchinitum asakkontā brāhmaṇā vuttameva paṭipajjimsu, na mahāpurisassa buddhabhāvappattiṃ paccāsīsimsu. **Ime pana** koṇḍaññādayo **pañca** “ekaṃsato buddho bhavissati”ti jātanicchayattā **mantapadaṃ atikkantā. Puṇṇapattanti** tuṭṭhidānaṃ. **Nibbitakkāti** nibbikappā, na dvedhā takkā.

**Vappakāleti** vapanakāle. Vapanatthaṃ bījāni nīharaṇantena tattha aggaṃ gahetvā dānaṃ **bījaggadānaṃ** nāma. **Lāyanaggādīsipi** eseva nayo. Dhaññaphalassa nātipariṇatakāle **puthukakāle. Lāyaneti** sassalāyane. Yathā lūnaṃ hatthakaṃ katvā veṇivasena bandhanaṃ **veṇikaraṇaṃ**. Veṇiyo pana purisabhārasena bandhanaṃ **kalāpo**. Khale kalāpānaṃ ṭhapanadivase aggaṃ gahetvā dānaṃ **khalaggaṃ**. Madditvā vīhīnaṃ rāsikaraṇadivase aggaṃ gahetvā dānaṃ **bhaṇḍaggaṃ**. Koṭṭhāgāre dhaññassa pakkhipanadivase dānaṃ **koṭṭhaggaṃ**. **Uddharitvāti** khalato dhaññassa uddharitvā. **Navannaṃ aggadānaṃ dinnattāti** idaṃ tassa rattaññūnaṃ aggabhāvatthāya katābhinihārānurūpaṃ pavattitasāvakaṇāramiyā ciṇṇante pavattitattā vuttaṃ. Tiṇṇampi hi bodhisattānaṃ taṃtampāramiyā sikhāpattakāle pavattitaṃ puññaṃ apuññaṃ vā garutaravipākameva hoti, dhammassa ca sabbapaṭhamam sacchikiriyāya vinā kathaṃ rattaññūnaṃ aggabhāvasiddhīti. **Bahukārā kho ime pañcavaggiyāti** idaṃ pana upakārānussaraṇamattakameva paricayavasena āḷarudakānussaraṇaṃ viya.

**285. Vivareti** majjhe. Tenāha “**tigāvutantare ṭhāne**”ti. **Ayojiyamāne upayogavacanaṃ na pāpuṇāti** sāmivacanassa pasāṅge antarā-saddayogena upayogavacanassa icchitattā. Tenāha “**antarāsaddena pana yuttattā upayogavacanaṃ kata**”nti.

**Sabbaṃ tebhūmakadhammaṃ abhibhavitvā** pariññābhisamayavasena atikkamitvā. **Catubhūmakadhammaṃ** anavasesaṃ ñeyyaṃ sabbaso ñeyyāvaraṇassa pahīnattā sabbaññutaññāṇena

**avedim.** Rajjanadussanamuyhanādinā **kilesena.** Appahātabbampi kusalābyākatam tappaṭibaddhakilesamathanena pahīnattā na hotīti āha “**sabbaṃ tebhūmakadhammaṃ jahitvā ṭhito**”ti. **Ārammaṇatoti** ārammaṇakaraṇavasena.

Kiñcāpi lokiyadhammānampi yādiso lokanāthassa adhigamo, na tādiso adhigamo parūpadeso atthi, lokuttaradhamme panassa lesopi natthīti āha “**lokuttaradhamme mayhaṃ ācariyo nāma natthi**”ti. **Paṭibhāgapuggaloti** sīlādīhi guṇehi paṭinidhibhūto puggalo. **Sahetunāti** sahadhammena sapāṭihīrakatāya. **Nayenāti** abhijānanatādividhinā. **Cattāri saccānīti** idam tabbinimuttassa ñeyyassa abhāvato vuttam. **Sayaṃ buddhoti** sayameva sayambhuññena buddho. Vigataparilāhatāya **sītibhūto.** Tato eva **nibbuto.** **Āhañchanti** āhanissāmi. Veneyyānaṃ amatādhigamāya ugghosanādim katvā satthu dhammadesanā **amatadundubhīti** vuttā.

Anantañāṇo jitakilesoti **anantajino.** **Evampi nāma bhaveyyāti** evaṃvidhe nāma rūparatane īdisena ñāṇena bhavitabbanti adhippāyo. Ayaṃ hissa pabbajjāya paccayo jāto, katādhikāro cesa. Tathā hi bhagavā tena samāgamattham padasāva tam maggaṃ paṭipajji.

**Koṭṭhāsasampannāti** aṅgapaccaṅgasanākhātaavayavasampannā. **Aṭṭiyatīti** aṭṭo hoti, domanassaṃ āpajjatīti attho.

**Avihaṃ upaṇṇāseti** avihesu nibbattā. **Vimuttāti** aggaḥhalavimuttiyā vimuttā. **Te hitvā mānusaṃ dehaṃ, dibbayogaṃ upajjhagunti** te upakā dayo mānusaṃ attabhāvaṃ jahitvā orambhāgiyasamyojanappahānena avihesu nibbattamattāva aggamaggādhigamena dibbayogaṃ uddhambhāgiyasamyojanaṃ samatikkamiṃsu.

**286. Saṅghapesunti** “neva abhivādetabbo”tiādinā (mahāva. 12) saṅgham kiriyākāram akaṃsu. Tenāha “**katikaṃ akaṃsū**”ti. **Padhānatoti** pubbe anuṭṭhitadukkaracaraṇato. **Pabhāvitanti** vācāsamuṭṭhānaṃ, vacīnicchāraṇanti attho. “Ayaṃ na kiñci visesaṃ adhigamissatī”ti **anukkaṇṭhanattham.** “Mayaṃ yattha katthaci gamissāmā”ti **mā vitakkayittha.** **Obhāsoti** vipassanobhāso. **Nimittanti** kammaṭṭhānamittam. **Ekapadenevāti** ekavacaneneva. “Anena pubbepi na kiñci micchā vuttapubba”nti **satim labhitvā.** Yathābhūtavādīti **uppannagāravā.**

**Antovihāreyeva ahosi** daharakumāro viya tehi bhikkhūhi pariharito. **Maleti** saṃkilese. Gāmato bhikkhūhi nīhaṃ upanītam bhattam etassāti nīhaṃbhatta, tena **nīhaṃbhattena** bhagavatā. **Ettakaṃ kathāmaggaṃ** – “dvemā, bhikkhave, pariyesanā”ti ārabhitvā yāva – “natthi dāni punabbhavo”ti padaṃ, ettakaṃ desanāmaggaṃ. Kāmañcetha – “tumhepi mamañceva pañcavaggiyānañca maggaṃ āruḷhā, ariyapariyesanā tumhākaṃ pariyesanā”ti aṭṭhakathāvacanaṃ. Tena pana – “so kho ahaṃ, bhikkhave, attanā jātidhammo samāno...pe... asaṃkiliṭṭhaṃ anuttaram yoggakkhemaṃ nibbānaṃ ajjhagamanti, atha kho, bhikkhave, pañcavaggiyā bhikkhū mayā evaṃ ovadiyamānā...pe... anuttaram yoggakkhemaṃ nibbānaṃ ajjhagamāṃsu...pe... natthi dāni punabbhavo”ti imasseva suttapadassa attho vibhāvitoti katvā vuttam “**bhagavā yaṃ pubbe avaca tumhepi mamañceva pañcavaggiyānañca maggaṃ āruḷhā, ariyapariyesanā tumhākaṃ pariyesanāti. Imaṃ ekameva anusandhiṃ dassento āhari**”ti.

**287. Anagāriyānampīti** pabbajitānampi. **Pañcakāmaguṇavasena anariyapariyesanā hoti** gadhitādibhāvena paribhuñjanato. Micchājīvavasenapi anariyapariyesanā hotīti tato visesanattham “**pañcakāmaguṇavasenā**”ti vuttam sacchandarāgaparibhogassa adhippetattā. Idāni catūsu paccayesu kāmaguṇe niddhāretum “**tatthā**”tiādi vuttam. **Paribhogarasoti** paribhogapaccayapītisomanassaṃ. Ayaṃ pana rasasamānatāvasena gahaṇam upādāya “raso”ti vutto, na sabhāvato. Sabhāvena gahaṇam upādāya pītisomanassaṃ dhammārammaṇam siyā, na rasārammaṇam. **Appaccavekkhaṇaparibhogoti** paccavekkhaṇarahito paribhogo, idamatthitam anissāya gadhitādibhāvena paribhogoti attho. **Gadhitāti** taṇhāya baddhā. **Mucchitāti** mucchaṃ mohaṃ pamādam āpannā. **Ajjhogāḷhāti** adhiogāḷhā, tam tam

ārammaṇaṃ anupavisitvā t̥hitā. **Ādīnavam apassantāti** sacchandarāgaparibhoge dosaṃ ajānantā. Apaccavekkhitaparibhogahetuādīnavam nissarati atikkamati etenāti **nissaraṇam**, paccavekkhaṇañāṇam.

**Pāsarāsinti** pāsasamudāyaṃ. Luddako hi pāsaṃ oḍḍento na ekamīyeva, na ca ekasmīyeva t̥hāne oḍḍeti, atha kho taṃtaṃmigānaṃ āgamanamaggaṃ sallakkhetvā tatha tatha oḍḍento bahūyeva oḍḍeti, tasmā te cittaena ekato gahetvā “**pāsarāsī**”ti vuttaṃ. Vāgurassa vā pāsapadesānaṃ bahubhāvato “**pāsarāsī**”ti vuttaṃ.

Pāsarāsisuttavaṇṇanāya līnatthappakāsanā samattā.

## 7. Cūlahatthipadopamasuttavaṇṇanā

**288. Setaparivāroti** setapaṭicchado, setavaṇṇālanākāroti attho. Pubbe pana “setālanākārā”ti assālanākāro gahito, idha cakkapañjarakubbarādirathāvayavesu kātābbālanākāro. **Evam vuttenti** evaṃ “setāya suda”ntiādīnā pakārena saṃyuttamahāvagge (saṃ. ni. 5.4) vuttena. **Nātimahā** yuddhamaṇḍale sañcārasukhatthaṃ. Yodho sārathīti **dvinnam**, paharaṇadāyakena saddhiṃ **tiṇṇam vā**.

**Nagaraṃ padakkhiṇam karoti** nagarasobhanatthaṃ. Idaṃ kira tassa brāhmaṇassa jāṇussoṇiṭṭhānantaraṃ jātisiddhaṃ paramparāgataṃ cārittaṃ. Tenāha “**ito ettakehi divasehī**”tiādi. Cārittavasena nagaravāsinopi tathā tathā paṭipajjanti. Puññavādimaṅgalakathane niyuttā **māṅgalikā**. Suvatthipattanāya **sovattthikā**. **Ādi**-saddena vandīādīnaṃ saṅgaho. **Yasasirisampattiyāti** yasasampattiyā sirisampattiyā ca, parivārasampattiyā ceva vibhavasobhāsampattiyā cāti attho.

**Nagarābhimukho pāyāsi** attano bhikkhācārelāya. **Paṇḍito maññeti** ettha **maññeti** idaṃ “maññati”ti iminā samānatthaṃ nipātapadaṃ. Tassa iti-saddaṃ ānetvā atthaṃ dassento “**paṇḍitoti maññati**”ti āha. Anumatipucchāvasena cetam vuttaṃ. Tenevāha “**udāhu no**”ti. “Taṃ kiṃ maññati bhavaṃ vacchāyano samaṇassa gotamassa paññāveyyattiyā”nti hi vuttamevatthaṃ puna gaṇhanto “**paṇḍito maññe**”ti āha. Tasmā vuttaṃ “**bhavaṃ vacchāyano, samaṇam gotamaṃ paṇḍitoti maññati, udāhu no**”ti, yathā te khameyya, tathā naṃ kathehīti adhippāyo.

**Aham ko nāma**, mama avisayo esoti dasseti. **Ko cāti** hetunissakke paccattavacananti āha “**kuto cā**”ti. Tathā cāha “**kena kāraṇena jānissāmi**”ti, yena kāraṇena samaṇassa gotamassa paññāveyyattiyam jāneyyam, taṃ kāraṇam mayi natthīti adhippāyo. **Buddhoyeva bhaveyya**, abuddhassa sabbathā buddhañānubhāvaṃ jānitum na sakkāti. Vuttañhetam – “appamattakaṃ kho panetaṃ, bhikkhave, oramattakaṃ sīlamattakaṃ, yena puthujjano tathāgatassa vaṇṇam vadamāno vadeyya (dī. ni. 1.7), atthi, bhikkhave, aññeva dhammā gambhīrā duddasā duranubodhā ...pe... yehi tathāgatassa yathābhuccaṃ vaṇṇam sammā vadamāno vadeyyā”ti (dī. ni. 1.28) ca. **Etthāti** “sopi nūnassa tādiso vā”ti etasmīṃ pade. **Pasattha pasatthoti** pasatthehi attano guṇeheva so pasattho, na tassa kittinā, pasamsāsabhāveneva pāsamsoti attho. Tenāha “**sabbaguṇāna**”ntiādi. **Maṇiratananti** cakkavattino maṇiratanam. Sadevake loke pāsamsānampi pāsamsoti dassetuṃ “**pasatthehi vā**”ti dutiyavikappo gahito.

Araṇīyato attho, so eva vasatīti vasoti **atthavaso**, tassa tassa payogassa ānisaṃsabhūtam phalanti āha “**atthavasanti atthānisamsa**”nti. Attho vā vuttalakkhaṇo vaso etassāti **atthavaso**, kāraṇam. **Nāgavanavāsikoti** hatthināgānaṃ vicaraṇavane tesam gahaṇatthaṃ vasanako. **Anuggahitasipputi** asikkhitahatthisippo āyatavithatassa padamattassa dassanena “mahā vata, bho nāgo”ti niṭṭhāgamanato. **Parato pana** bhagavatā vuttaṭṭhāne. **Uggahitasippo puriso nāgavanikoti āgato** āyatavithatassa padassa uccassa ca nisevitassa byabhicārabhāvaṃ ñatvā tattakena niṭṭham agantvā mahāhatthiṃ disvāva niṭṭhāgamanato. **Ñānaṃ** pajjati etthāti **ñānapadāni**, khattiyapaṇḍitādīnaṃ dhammavinaye vinītattā vinayehi adhigatajjhānādīni. Tāni hi tathāgatagandhahatthino desanāñāṇena akkantaṭṭhānāni. **Cattārīti** pana vineyyānaṃ idha khattiyapaṇḍitādivasena catubbidhānaṃyeva gahitattā.



**289.** Puggalesu paññāya ca nipuṇatā paṇḍitasamaññā nipuṇatthassa dassanasamatthātāvasenevāti āha “**sukhumaatthantarapaṭivijjhanasamatthe**”ti. **Kata**-saddo idha nipphanapariyāyo. Pare pavadanti ettha, etenāti **parappavādo**, parasamayo. Parehi pavadanam **parappavādo**, viggāhikakathāya paravādamaddanam. Tadubhayampi ekato katvā pāliyam vuttanti āha “**viññātaparappavāde ceva parehi saddhim katavādaparicaye cā**”ti, parasamayesu paravādamaddanesu ca nipphaneti attho. **Vālavedhirūpeti** vālavedhipatirūpe. Tenāha “**vālavedhidhanuggahasadise**”ti. **Vālanti** anekadhā bhinnassa vālassa aṃsusankhātā vālam. **Bhindantā viyāti** ghaṭādiṃ saviggahaṃ muggarādīnā bhindantā viya, diṭṭhigatāni ekamsato bhindantāti adhippāyo. “Attham gūyham paṭicchannam katvā pucchissāmā”ti saṅkhatam padapañham pucchantīti dassetum “**dupadampi**”tiādi vuttam. Vadanti etenāti **vādo**, doso. Pucchīyatīti **pañho**, attho. Pucchati etenāti **pañho**, saddo. Tadubhayam ekato gahetvā āha “**evarūpe pañhe**”tiādi. “**Evam puccheyya, evam vissajjeyyā**”ti ca pucchāvissajjananam sikhāvagamanaṃ dasseti. **Seyyoti** uttamo, paramo lābhoti adhippāyo.

Evam attano vādaavidhamanabhayenapi pare bhagavantaṃ pañham pucchitum na visahantīti vatvā idāni vādaavidhamanena vināpi na visahanti evāti dassetum “**apicā**”tiādi āraddham. **Cittam pasīdāti** pare attano attabhāvampi vissattham niyyādetukāmā honti odhisakamettāpharaṇasadisattā tassa mettāyanassa. **Dassanasampannāti** daṭṭhabbatāya sampannā dassanānuttariyabhāvato, ativiya dassanīyāti attho.

**Saraṇagamanavasena sāvakāti** lokiyasaraṇagamanena sāvakā, lokuttarasaraṇagamanena pana sāvakattam parato āgamissati, tañca pabbajitavasena vuccati, idha gahaṭṭhavasena, ubhayatthāpi saraṇagamanena sāvakattam vedītabbam. Te hi paralokavajjabhayadassāvino kulaputtā, ācārikulaputtāpi tādisā bhavanti. **Thokenāti** iminā “manam anassāmā”ti padassattham vadati.

**290.** Udāharīyati ubbegapītivasenāti, tathā vā udāharaṇam **udānam**. Tenāha “**udāhāram udāharī**”ti. **Assa dhammassāti** assa paṭipattisaddhammapubbakassa paṭivedhasaddhammassa. **Soti** hatthipadopamo hatthipadopamabhāvena vuccamāno dhammo. **Ettāvatāti** ettakena paribbājakena vuttakathāmaggamattena. Kāmaṃ tena vuttakathāmaggenapi hatthipadopamabhāvena vuccamāno dhammo paripuṇṇova arahattaṃ pāpetvā paveditattā, so ca kho saṅkhepato, na vitthāratoti āha “**na ettāvatā vitthārena paripūro hotī**”ti. Yadi yathā vitthārena hatthipadopamo paripūro hoti, tathā desanā āraddhā, **atha kasmā kusaloti na vuttoti** codanā.

**291.** **Āyāmatopīti pi**-saddena ubbedhenapi rassāti dasseti. Nīcakāyā hi tā honti. **Uccāti** uccakā. Nisevanaṃ, nisevatī etthāti vā **nisevitam**. Nisevanañcettha kaṇḍuyitavinodanattaṃ ghaṃsanaṃ. Tenāha “**khandhappadese ghaṃsitaṭṭhāna**”nti. **Uccāti** anīcā, ubbedhavantiyoti attho. **Kālārikāti** viraḷadantā, viṣaṅgatadantāti attho. Tenāha “**dantāna**”ntiādi. **Kālāratāyāti** viraḷatāya. **Ārañjītānīti** rañjītāni, vilikhītānīti attho. **Kaṇerutāyāti** kuṭumalasaṅghānatāya. **Ayam vāti** ettha vā-saddo saṃsayitanicchayattho yathā aññatthāpi “ayam vā imesaṃ samaṇabrāhmaṇānaṃ sabbabālo sabbamūḷho”tiādīsu (dī. ni. 1.181).

**Nāgavanam viyāti** mahāhatthino vāmanikādīnañca padadassanaṭṭhānabhūtam nāgavanam viya. **Ādito paṭṭhāya yāva nīvaraṇappahānā dhammadesanā** tathāgatassa bāhiraparibbājakādīnañca padadassanabhāvato. **Ādito paṭṭhāyāti** ca “taṃ suñāhī”ti padato paṭṭhāya. **Kusalo nāgavaniko viya yogāvacarō** pariyesanavasena pamāṇaggahaṇato. **Matthake thatvāti** imassa suttassa pariyoṣāne thatvā. **Imasmimpi thāneti** “evameva kho brāhmaṇā”tiādīnā upameyyassa atthassa upaññāsanatthānepi.

**Svāyanti** (dī. ni. ṭī. 1.190) idha-saddamattaṃ gaṇhāti, na yathāvisesitabbaṃ idha-saddam. Tathā hi vakkhati “katthaci padapūraṇamattamevā”ti. **Lokam upādāya vuccati** loka-saddena samānādhikaraṇabhāvena vuttattā. Sesapadadvaye pana saddantarasaṇnidhānamattena taṃ taṃ upādāya vuttatā daṭṭhabbā. **Okāsanti** kañci padesam indasālaguhāya adhippetattā. **Padapūraṇamattameva** okāsāpadisanassapi asambhavato.

Tathāgata-saddādīnaṃ atthaviseso **mūlapariyāyattakathā**(ma. ni. aṭṭha. 1.12) **visuddhimaggasaṃvaṇṇanāsu** vutto eva. Tathāgatassa sattanikāyantogadhatāya “**idha pana sattaloko adhippeto**”ti vatvā tathāyaṃ yasmiṃ sattanikāye, yasmiṃca okāse uppajjati, taṃ dassetuṃ “**sattaloke uppajjamānopi cā**”tiādi vuttaṃ. Tattha **imasmimyeva cakkavāleti** imissā eva lokadhātuyā. “Aṭṭhānametaṃ, bhikkhave, anavakāso, yaṃ ekissā lokadhātuyā dve arahanto sammāsambuddho apubbaṃ acarimaṃ uppajjeyyu”nti (dī. ni. 3.161; ma. ni. 3.129; a. ni. 1.278; netti. 57; mi. pa. 5.1.1) ettha jātikhettabhūtā dasasahasilokadhātu “ekissā lokadhātuyā”ti vuttā. Idha pana imaṃyeva lokadhātuṃ sandhāya “imasmimyeva cakkavāle”ti vuttaṃ. Tisso hi saṅgītiyo āruḷhe teṭṭhake buddhavacane visayakhettaṃ añākhettaṃ jātikhettanti tividhe khetto tṭhapetvā imaṃ cakkavālaṃ aññasmiṃ cakkavāle buddhā uppajjantīti suttaṃ natthi, na uppajjantīti pana atthi. Kathaṃ? “Na me ācariyo atthi, sadiso me na vijjati (ma. ni. 1.285; 2.341; mahāva. 11; kathā. 405; mi. pa. 4.5.11), ekomhi sammāsambuddho”ti (ma. ni. 1.285; 2.341; kathā. 405; mahāva. 11) evamādīni imissā lokadhātuyā tṭhatvā vadantena bhagavatā – “kiṃ panāvuso, sārīputta, atthetaraḥi añño samaṇo vā brāhmaṇo vā bhagavatā samasamo sambodhiyanti evaṃ puṭṭhāhaṃ, bhante, notī vadeyya”nti vatvā tassa kāraṇaṃ dassetuṃ – “aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā”ti imaṃ suttaṃ dassentena dhammasenāpatinā ca buddhānaṃ uppattiṭṭhānabhūtaṃ imaṃ lokadhātuṃ tṭhapetvā aññattha anuppatti vuttā hotīti.

**Sujātāyāti**adinā vuttetu catūsu vikappesu paṭhamo vikappo buddhabhāvāya āsannataraṇapattidassanavasena vutto. Āsannataraṇāya hi paṭṭipattiyāṃ tṭhito “**uppajjati**”ti vuccati uppādassa ekantikattā, pageva paṭṭipattiyā matthake tṭhito. Duttiyo buddhabhāvāvahapabbajjato paṭṭhāya āsannataraṇapattidassanavasena, tatiyo buddhakaradhammapāripūrito paṭṭhāya buddhabhāvāya paṭṭipattidassanavasena. Na hi mahāsattānaṃ tusitabhavūpapattito paṭṭhāya bodhisambhārasambharaṇaṃ nāma atthi. Catuttho buddhakaradhammasamārambhato paṭṭhāya. Bodhiyā niyatabhāvāpattito pabhuti hi viññūhi “**buddho uppajjati**”ti vattaṃ sakkā uppādassa ekantikattā, yathā pana “tiṭṭhanti pabbatā, sandanti nadiyo”ti tiṭṭhanasandanakiriyānaṃ avicchedamupādāya vattamānapayogo, evaṃ uppādatthāya paṭṭipajjanakiriyāya avicchedamupādāya catūsu vikappesu “**uppajjati nāmā**”ti vuttaṃ. **Sabbapaṭhamāṃ uppānabhāvanti** sabbehi upari vuccamānehi visesehi paṭhamāṃ tathāgatassa uppānātāsāṅkhātāṃ atthitāvisesaṃ.

**So bhagavāti** (a. ni. ṭī. 2.3.64) yo “tathāgato araha”ntīadinā kittitagaṇo, so bhagavā. **Imaṃ lokanti** nayidaṃ mahājanassa sammukhāmatāṃ lokaṃ sandhāya vuttaṃ, atha kho anavasesaṃ pariādāyāti dassetuṃ “**sadevaka**”ntiādi vuttaṃ. Tenāha “**idāni vattabbaṃ nidasseti**”ti. **Pajātattāti** yathāsakaṃ kammakilesehi nibbattattā. **Pañcakāmāvacaradevaggahaṇaṃ** pārisesañāyena itaresaṃ padantarehi saṅgahitattā. **Sadevakanti** ca avayavena viggaho samudāyo samāsatto. **Chaṭṭhakāmāvacaradevaggahaṇaṃ** paccāsattiñāyena. Tattha hi so jāto tannivāsī ca. **Brahmakāyikādibrahmaggaṇanti** etthāpi eseva nayo. **Paccatthikapaccāmittasamaṇabrāhmaṇaggahaṇanti** nidassanamattametāṃ apaccatthikānaṃ asamitābhāhitapāpānañca samaṇabrāhmaṇānaṃ sassamaṇabrāhmaṇivacanena gahitattā. Kāmaṃ “sadevaka”ntiādivisesanānaṃ vasena sattavisayo loka-saddoti viññāyati tulyayogavisayattā tesāṃ, “salomako sapakkhako”tiādīsu pana atulyayogepi ayaṃ samāso labbhatīti byabhicāradassanato pajāgahaṇanti āha “**pajāvacanena sattalokaggahaṇa**”nti.

Arūpino sattā attano āneñjavihārena viharantā “dibbantīti **devā**”ti imaṃ nibbānaṃ labhantīti āha “**sadevakaggahaṇena arūpāvacaradevaloko gahito**”ti. Tenevāha “ākāsānañcāyatanūpagānaṃ devānaṃ saḥabyata”nti (a. ni. 3.117). **Samārakaggahaṇena chakāmāvacaradevaloko gahito** tassa savisesaṃ māraṃ vā vattanato. **Rūpī brahmaloko gahito** arūpībrahmalokassa visuṃ gahitattā. **Catuparisavasena**ti khattiyādicatuparisavasena. Itarā pana catasso parisā samārakādiggahaṇena gahitā evāti. **Avasesasabbasattaloko** nāgagaruḷādibhedo.

Ettāvata bhāgaso lokaṃ gahetvā yojanaṃ dassetvā idāni tena tena visesena abhāgasova lokaṃ

gahetvā yojanaṃ dassetuṃ “**apicetthā**”tiādi vuttaṃ. Tattha **ukkaṭṭhaparicchedatoti** ukkaṃsagabhivijānana. Pañcasu hi gatīsu devalokova seṭṭho. Tattāpi arūpino “dūrasamussāritakilesadukkhātāya, santapaṇītaāneñjavihārasamaṅgītāya, ativiya dīghāyukatāyā”ti evamādīhi visesehi ativiya itarehi ukkaṭṭhā. **Brahmā mahānubhāvoti**ādiṃ dasasahassiyāṃ mahābrahmuno vasena vadati. “Ukkaṭṭhaparicchedato”ti hi vuttaṃ. **Anuttaranti** seṭṭhaṃ navalokuttaraṃ. **Bhāvānukkamo** bhāvavasena paresaṃ ajjhāsaya vasena “sadevaka”ntiādīnaṃ padānaṃ anukkamo. **Tihākārehīti** devamārabrahmasahitatāsankhātehi tīhi pakārehi. **Tīsu padesūti** “sadevaka”ntiādīsu tīsu padesu. **Tena tenākārenāti** sadevakattādīnā tena tena pakārena. Tedhātukameva pariyādinnanti porāṇā panāhūti yojanā.

**Abhiññāti** ya-kāralopenāyaṃ niddeso, abhijānitvāti ayamettha atthoti āha “**abhiññāya, adhikena ñāṇena ñatvā**”ti. **Anumānādipaṭikkhepoti** anumānaupamānaatthāpattīādipaṭikkhepo ekappamañattā. Sabbattha appaṭihatañācāratāya hi sabbapaccakkhā buddhā bhagavanto. **Anuttaraṃ vivekasukhanti** phalasaṃpattisukhaṃ. Tena vītimissāpi kadāci bhagavato dhammadeśanā hotīti āha “**hitvāpi**”ti. Bhagavā hi dhammaṃ desento yasmiṃ khaṇe parisā sādhu-kāraṃ vā deti, yathāsutaṃ vā dhammaṃ paccavekkhati, taṃ khaṇaṃ pubbabhāgena paricchinditvā phalasaṃpattīṃ samāpajjati, yathāparicchedaṇca samāpattīto vuṭṭhāya ṭhitaṭṭhānato paṭṭhāya dhammaṃ deseti.

Desakāyattena āṇādividhinā atisaṃjjanāṃ pabodhanaṃ **desanāti** sā pariyattidhammavasena veditabbāti āha “**desanāya tāva catuppādikāyapi gāthāyā**”tiādi. Sāsītābapuggalagatena yathāparādhādisāsītābhabhāvena anusāsaṇaṃ tadaṅgavinayādivasena vinayaṇaṃ **sāsananti** taṃ paṭipattidhammavasena veditabbanti āha “**sīlasamādhivipassanā**”tiādi. **Kusalānanti** maggakusalānaṃ, **kusalānanti** vā anavajjānaṃ. Tena phaladhammānampi saṅgaho siddho hoti. **Ādībhāvo** sīlādīṭṭhīnaṃ tammūlakattā uttarimaṇussaḍḍhammānaṃ. Tasmīṃ tasmīṃ atthe kathāvadhisaddappabandho gāthāvasena suttavasena ca vavatthito pariyattidhammo, yo idheva “desanā”ti vutto. Tassa pana attho visesena sīlādi evāti āha “**bhagavā hi dhammaṃ desento...pe... nibbānaṃ dasseti**”ti. Tattha **sīlaṃ dassetvāti** sīlaggahaṇena sasambhāraṃ sīlaṃ gahitaṃ. Tathā maggaggahaṇena sasambhāro maggoti tadubhayena anavasesato pariyattiatthaṃ pariyādiyati. **Tenāti** sīlādidassanena. Atthavasena hi idha desanāya ādikalyāṇādībhāvo adhippeto. **Kathikasāṅṭhīti** kathikassa saṅṭhānaṃ kathanavasena samavattānaṃ.

**Na so sātthaṃ deseti** niyyānatthavirahato tassā desanāya. **Ekabyañjanādiyuttā vāti** sīhīlādībhedesu byañjanesu ekappakāreneva, dvippakāreneva vā byañjanena yuttā vā damīlabhāsā viya. Sabbattha niroṭṭhaṃ katvā vattabbatāya **sabbaniroṭṭhabyañjanā vā** kirātabhāsā viya. Sabbattheva vissajjanīyayuttatāya **sabbavissaṭṭhabyañjanā vā** yavanabhāsā viya. Sabbattheva sānusāratāya **sabbaniggahitabyañjanā vā** pārasikādīmilakkhabhāsā viya. Sabbāpesā ekadesabyañjanavaseneva pavattiyā aparipuṇṇabyañjanāti katvā “**abyañjanā**”ti vuttā. **Amakkhetvāti** apalicchitvā avināsetvā, ahāpetvāti vā attho.

Bhagavā yamatthaṃ ñāpetuṃ ekagāthampi ekavākyampi deseti, tamatthaṃ tāya desanāya sabbaso paripuṇṇameva katvā deseti, evaṃ sabbatthāti āha “**ekadesanāpi aparipuṇṇā natthī**”ti. **Ullumpanasabhāvasaṅṭhitenāti** saṃkilesapakkhato vaṭṭadukkhato ca uddharaṇasabhāvāvaṭṭhitena cittaṇa. **Tasmāti** yasmā sikkhāttayasāṅgahaṃ sakalaṃ sāsaṇaṃ idha “brahmacariya”nti adhippetam, tasmā. **Brahmacariyanti** iminā samānādhikaraṇāni sabbapadāni yojetvā atthaṃ dassento “**so dhammaṃ deseti...pe... pakāsetīti evamettha attho daṭṭhabbo**”ti āha.

Dūrasamussāritamānasseva sāsane sammāpaṭipatti sambhavati, na māna jātikassāti āha “**nihatamānattā**”ti. **Ussannattāti** bahulabhāvato. Bhogārogyādivatthukā madā suppaheyyā honti nimittassa anavattānato’ na tathā kulavijjāmadāti khattiyabrāhmaṇakulīnānaṃ pabbajitānampi jātivijjā nissāya mānājappanaṃ duppajahanti āha “**yebhuyena hi...pe... mānaṃ karontī**”ti. **Vijātītāyāti** nihīnajātītāya. **Paṭiṭṭhātum na sakkontīti** suvisuddhiṃ katvā sīlaṃ rakkhituṃ na sakkonti. Sīlavasena

hi sāsane paṭiṭṭhāti. **Paṭiṭṭhātunti** vā saccapaṭivedhena lokuttarāya paṭiṭṭhāya paṭiṭṭhātum. Yebhuyyena hi upanissayasampannā sujātā eva honti, na dujjātā.

**Parisuddhanti** rāgādīnaṃ accantameva pahānadīpanato nirupakkilesatāya sabbaso visuddhaṃ. **Saddhaṃ paṭilabhatīti** pothujjanikasaddhāvasena saddahati. Viññujātikānañhi dhammasampattigahaṇapubbikā saddhāsiddhi dhammapamāṇadhammappasannabhāvato. **Jāyampatikā vasantīti** kāmaṃ “jāyampatikā”ti vutte gharasāmikagharasāminivasena dvinnaṃyeva gahaṇaṃ viññāyati. Yassa pana purisassa anekā pajāpatiyo honti, tattha kiṃ vattabbaṃ? Ekāyapī tāya vāso sambādhoti dassanattamaṃ “**dve**”ti vuttaṃ. Rāgādīnā **sakiñcanaṭṭhena**, khettavatthuādīnā **sapalibodhaṭṭhena**. Rāgarajādīnaṃ āgamanapathatāpi uppajjanaṭṭhānatā evāti dvepi vaṇṇanā ekatthā, byañjanaṃ nānaṃ. **Alagganaṭṭhena**ti asajjanaṭṭhena appaṭibaddhabhāvena. Evaṃ akusalakusalappavattīnaṃ ṭhānabhāvena gharāvāsapabbajjānaṃ sambādhabbhokāsataṃ dassetvā idāni kusallappavattiyā eva aṭṭhānaṭṭhānabhāvena tesamaṃ taṃ dassetum “**apicā**”tiādi vuttaṃ.

**Saṅkhepakathāti** viṣuṃ viṣuṃ paduddhāraṃ akatvā saṅkhepato atthavaṇṇanā. **Ekampi divasanti** ekadivasamattampi. **Akhaṇḍaṃ katvāti** dukkaṭamattassapi anāpajjanena akhaṇḍitaṃ katvā. **Kilesamalena amalīnanti** taṇhāsamaṅkilesādivasena asaṃkiliṭṭhaṃ katvā. **Paridahitvāti** nivāsetvā ceva pārūpitvā ca. Agāravāso agāraṃ uttarapadalopena, tassa vaḍḍhiāvahaṃ **agārassa hitaṃ**. **Bhogakkhandhoti** bhogarāsi bhogasamudāyo. **Ābandhanaṭṭhena**ti “putto nattā”tiādīnā pemavasena sapaṛicchedaṃ sambandhanaṭṭhena. “Amhākamete”ti nīyanti **nāti**. Pitāmahapituputtādivasena parivattanaṭṭhena **parivaṭṭo**.

**292.** Sāmaññāvācīpi **sikkhā**-saddo sājīva-saddasannidhānato upari vuccamānavisesāpekkhāya ca visesaniviṭṭhova hotīti vuttaṃ “**yā bhikkhūnaṃ adhisīlasaṅkhātā sikkhā**”ti. Sikkhitabbaṭṭhena **sikkhā**. Saha ājīvanti etthāti **sājīvo**. **Sikkhanabhāvenāti** sikkhāya sājīve ca sikkhanabhāvena. **Sikkhaṃ paripūrentoti** silasaṃvaram paripūrento. **Sājīvañca avītikkamantoti** – “nāmakāyo padakāyo niruttikāyo byañjanakāyo”ti (pārā. aṭṭha. 39) vuttasikkhāpadaṃ bhagavato vacanaṃ avītikkamanto hutvāti attho. Idameva ca dvayaṃ “sikkhana”nti vuttaṃ. Tattha sājīvanatikkamo sikkhāparipūriyā paccayo. Tato hi yāva maggā sikkhāparipūrī hotīti.

**Pajahitvāti** samādānavasena pariccajivā. **Pahīnakālato paṭṭhāya...pe... viratovāti** etena pahānassa viratiyā ca samānakālatamaṃ dasseti. Yadi evaṃ “pahāyā”ti kathaṃ purimakālaniddesoti? Tathā gahetabbataṃ upādāya. Dhammānañhi paccayapaccayuppannabhāve apekkhite sahaṇānampi paccayapaccayuppannabhāvena gahaṇaṃ purimacchimabhāveneva hotīti gahaṇapavattiākāravasena paccayabhūtesu hīrottappaññādisu pahānakiriyāya purimakālavohāro, paccayuppannāsu ca viratīsu viramaṇakiriyāya aparakālavohāro ca hotīti “pahāya paṭivirato hotī”ti vuttaṃ. **Pahāyāti** vā samādānakālavasena vuttaṃ, pacchā vītikkamitabbavatthusamāyogavasena **paṭiviratoti**. **Pahāyāti** vā –

“Nihantvāna tamokhandhaṃ, uditoyaṃ divākaro;  
Vaṇṇapabhāya bhāseti, obhāsetvā samuggato”ti ca. (visuddhi. mahāṭī. 2.578) –

Evamādisu viya samānakālavasena veditabbo. Atha vā paṇo atipāṭiyati etenāti **pāṇātipāto**, pāṇaghātahetubhūto ahirikānottappadosamohavihiṃ sādiko cetaṇāpadhāno saṃkilesadhammo, taṃ samādānavasena pahāya. **Tato...pe... viratova hotīti** avadhāraṇena tassā viratiyā kālādivasena aparīyantamaṃ dasseti. Yathā hi aññe samādinnaviratikāpi anavaṭṭhitacittatāya lābhajīvikādihetu samādānaṃ bhindanteva, na evamayaṃ. Ayaṃ pana pahīnakālato paṭṭhāya orato viratoti. **Adinnādānaṃ pahāyāti**tiādisupi iminā nayena attho veditabbo.

Daṇḍanaṃ daṇḍanipātaṇaṃ **daṇḍo**. Muggarādīpaharaṇavisesopi idha paharaṇavisesoti adhippeto. Tenāha “**ṭhapetvā daṇḍaṃ sabbampi avasesaṃ upakaraṇa**”nti. Daṇḍanasāṅkhātassa paraviheṭṭhanassa parivajjitabhāvadīpanatthaṃ daṇḍasatthānaṃ nikkhepavacananti āha

“**parūpaghātathāyā**”tiādi. **Vihimsanabhāvato**ti vibādhanabhāvato. **Lajjīti** ettha vuttalajjāya ottappampi vuttanti daṭṭhabbaṃ. Na hi pāpajigucchanapāputtāsarahitaṃ, pāpabhayaṃ vā alajjanaṃ atthi. Yassa vā dhammagarufāya dhammassa ca attādhiṇattā attādhipatibhūtā lajjākiccakārī, tassa lokādhipatibhūtaṃ ottappaṃ kicckakaranti vattabbameva natthīti “lajjī”icceva vuttaṃ. **Dayaṃ mettacittataṃ āpannoti** kasmā vuttaṃ, nanu **dayā**-saddo “adayāpanno”tiādīsu karuṇāya vattatīti? Saccametam, ayaṃ pana dayā-saddo anurakkhaṇattham antonītam katvā pavattamāno mettāya ca karuṇāya ca pavattatīti idha mettāya pavattamāno vutto. Mijjati siniyhatīti mettā, sā etassa atthīti mettam, mettam cittam etassa atthīti mettacitto, tassa bhāvo **mettacittatā**, mettāicceva attho.

**Sabbapāṇabhūtahitānukampīti** etena tassā viratiyā sattavasena apariyantataṃ dasseti. **Pāṇabhūte**ti pāṇajāte. **Anukampakoti** karuṇāyanako. Yasmā pana mettā karuṇāya visesapaccayo hoti, tasmā vuttaṃ “**tāya eva dayāpannatāyā**”ti. Evaṃ yehi dhammehi pāṇātipātā virati sampajjati, tehi lajjāmettākaruṇādhammehi samaṅgibhāvo dassito, saddhim piṭṭhivaṭṭakadhammehīti daṭṭhabbaṃ. Etthāha – kasmā “pāṇātipātaṃ pahāyā”ti ekavacananiddeso kato, nanu niravasesānaṃ pāṇānaṃ atipātato virati idhādhippetā? Tathā hi vuttaṃ “sabbapāṇabhūtahitānukampī viharatī”ti. Teneva hi **aṭṭhakathāyaṃ** “sabbe pāṇabhūte hitena anukampako”ti puthuvacananiddesoti? Saccametam, pāṇabhāvasāmaññavasena panettha pāḷiyaṃ ādito ekavacananiddeso kato, sabbasaddasannidhānena puthuttaṃ viññāyamānamevāti sāmaññaniddesaṃ akatvā bhedavacanicchāvasena dassetuṃ **aṭṭhakathāyaṃ** bahuvacanasena attho vutto. Kiñca bhīyyo – sāmaññato saṃvarasamādānaṃ, tabbisesato saṃvarabhedoti imassa visesassa dassanattham ayaṃ vacanabhedo katoti veditabbaṃ. **Viharatīti** vuttappakāro hutvā ekasmiṃ iriyāpathe uppannaṃ dukkhaṃ aññena iriyāpathena vicchinditvā attabhāvaṃ harati pavattetīti attho. Tenāha “**iriyati pāletī**”ti.

Na kevalaṃ kāyavacīpayogavasena ādānameva, atha kho ākaṅkhapissa pariccattavattuvisayāvātī dassetuṃ “**cittenapī**”tiādi vuttaṃ. Theneti theyyaṃ karotīti **theno**, coro. **Sucibhūtenāti** ettha sucibhāvo adhikāro saddantarasanidhānato ca theyyasamkilesaviramaṇanti āha “**athenattāyeva sucibhūtenā**”ti. Kāmañcetha “lajjī dayāpanno”tiādi na vuttaṃ, adhikārasena pana atthato vā vuttamevāti veditabbaṃ. Yathā hi lajjādayo pāṇātipātapahānassa visesapaccayo, evaṃ adinnādānapahānassapīti, tasmā sāpi pāḷi ānetvā vattabbā. Esa nayo ito paresupī. Atha vā **sucibhūtenāti** etena hirottappādīhi samannāgamo, ahirikādīnañca pahānaṃ vuttamevāti “lajjī”tiādi na vuttanti daṭṭhabbaṃ.

Aseṭṭhacariyanti aseṭṭhānaṃ cariyaṃ, aseṭṭhaṃ vā cariyaṃ. Mithunānaṃ vuttākārena sadisabhūtanāṃ ayanti **mithuno**, yathāvutto durācāro. **Ārācārī methunāti** etena – “idha brāhmaṇa, ekacco...pe... na heva kho mātugāmena saddhim dvayaṃdvayasamāpattiṃ samāpajjati, apica kho mātugāmassa ucchādanaparimaddananhāpanasambāhanaṃ sādiyati, so tadassādeti, taṃ nikāmeti, tena ca vittim āpajjati”tiādinā (a. ni. 7.50) vuttā sattavidhamethunasamyoḡapī paṭivirati dassitāti daṭṭhabbaṃ.

**Saccena saccanti** purimena vacīsaccena pacchimaṃ vacīsaccaṃ **sandahati** asaccena anantarikattā. Tenāha “**yo hī**”tiādi. **Haliddirāgo viya na thirakato hotīti** ettha kathāya anavaṭṭhitabhāvena haliddirāgasadisatā veditabbā, na puggalassa. **Pāsāṇalekhā viyāti** etthāpi eseva nayo. Saddhā ayati pavattati etthāti saddhāyo, saddhāyo eva **saddhāyiko** yathā “venayiko”ti (ma. ni. 1.246; a. ni. 8.11; pārā. 8), saddhāya vā ayitabbo **saddhāyiko**, saddheyyoti attho. **Vattabbataṃ āpajjativisaṃvādanatoti** adhippāyo.

**Anuppadātāti** (dī. ni. 1.9; a. ni. 1.2.4.198) anubalappadātā, anuvattanavasena vā padātā. Kassa pana anuvattanaṃ padānañcāti? “Sahitāna”nti vuttattā sandhānassāti viññāyati. Tenāha “**sandhānānuppadātā**”ti. Yasmā pana anuvattanavasena sandhānassa padānaṃ ādhānaṃ, rakkhaṇaṃ vā dalhīkaraṇaṃ hoti. Tena vuttaṃ “**dve jane samagge disvā**”tiādi. Āramanti etthāti **ārāmo**, ramitabbaṭṭhānaṃ. Yasmā pana ā-kārena vināpi ayamattho labbhati, tasmā vuttaṃ “**samaggarāmotipi pāḷi, ayamevettha attho**”ti.

**Etthāti** –

“Nelaṅgo setapacchādo, ekāro vattatī ratho;  
Anīghaṃ passa āyantaṃ, chinnaṣoṭaṃ abandhana”nti. (saṃ. ni. 4.347; udā. 65; peṭako. 25; dī. ni. 1.9) –

Imissā gāthāya. Sīlañhettha “nelaṅga”nti vuttaṃ. Tenevāha – citto gahapati, “nelaṅganti kho, bhante, sīlanametaṃ adhivacana”nti (saṃ. ni. 4.347; dī. ni. 1.9). **Sukumārāti** apharusatāya mudukā. **Purassa esāti** ettha **pura**-saddo tannivāsīvācako daṭṭhabbo “gāmo āgato”tiādīsu (dī. ni. 1.9) viya. Tenevāha “**nagaravāsīna**”nti. Manaṃ appāyati vaḍḍhetīti **manāpā**. Tena vuttaṃ “**cittavuddhikarā**”ti.

**Kālavādī**tiādi samphappalāpāpaṭiviratassa paṭipattidassanaṃ. Atthasamhitāpi hi vācā ayuttakālapayogena atthāvahā na siyāti anattaviññāpanavācāṃ anulometi, tasmā samphappalāpaṃ pajahantena akālavādītā pariharitabbāti vuttaṃ “**kālavādī**”ti. Kāle vadantenapi ubhayānattasādhanato abhūtaṃ parivajjetabbanti āha “**bhūtavādī**”ti. Bhūtañca vadantena yaṃ idhaloka-paraloka-hitasampādakaṃ, tadeva vattabbanti dassetuṃ “**atthavādī**”ti vuttaṃ. Atthaṃ vadantenapi lokiyadhammasannissitameva avatvā lokuttaradhammasannissitaṃ katvā vattabbanti dassanattaṃ “**dhammavādī**”ti vuttaṃ. Yathā ca attho lokuttaradhammasannissito hoti, taṃdassanattaṃ “**vinayavādī**”ti vuttaṃ. Pañcannañhi saṃvaravinayānaṃ, pañcannañca pahānavinayānaṃ vasena vuccamāno attho nibbānādhigamahetubhāvato lokuttaradhammasannissito hotīti. Evaṃ guṇavisesayuttova attho vuccamāno desanākosalle sati sobhati, kiccakaro ca hoti, na aññathāti dassetuṃ “**nidhānavatiṃ vācāṃ bhāsītā**”ti vuttaṃ. Idāni taṃ desanākosallaṃ vibhāvetuṃ “**kālenā**”tiādimāha. Pucchādivasena hi otiṇṇavācāvattthusmiṃ ekamaṣādibyaḥkaraṇavibhāgaṃ sallakkhetvā ṭhapanāhetuudāharaṇaṃ saṃsandanādiṃ taṃtaṃkālānurūpaṃ vibhāventiyā parimitaparicchinnarūpāya vipulatara-gambhīrodāra-paramattha-vitthārasaṅgāhikāya kathāya ñāṇabalānurūpaṃ pare yāthāvato dhamme paṭiṭṭhāpentō “desanākusalo”ti vuccatīti evamettha atthayojanā veditabbā.

**293.** Evaṃ paṭipāṭiyā satta mūlasikkhāpadāni vibhāvetvā satipi abhiññādhīpahanāndriyasamvarasatisampajaññajāgariyānuyogādike uttaradesanāyaṃ vibhāvetuṃ taṃ pariharitvā ācārasīlasseva vibhajanavasena pāḷi pavattatī tadatthaṃ vivarituṃ “**bījagāmahūtagāmasamārambhā**”tiādi vuttaṃ. Tattha bījanaṃ gāmo samūho **bījagāmo**. Bhūtānaṃ jātānaṃ nibbātānaṃ rukkhagacchalatādīnaṃ samūho **bhūtagāmo**. Nanu ca rukkhādayo cittarahitatāya na jīvā, cittarahitatā ca paripphandābhāvato chinne viruhanato visadisajātikabhāvato catuyoniapariyāpannato ca veditabbā, vuḍḍhi pana pavāḷasilālavānānampi vijjatīti na tesāṃ jīvabhāve kāraṇaṃ, visayaggahaṇaṃ nesaṃ parikkappanāmatthaṃ supanaṃ viya ciñcādenaṃ, tathā dohaḷādayo, tattha kasmā bījagāmahūtagāmasamārambhā paṭivirati icchitāti? Samaṇasārūppato tannivāsīsattānurakkhaṇato ca. Tenevāha – “jīvasaññino hi moghapurisa manussā rukkhāsmi”ntiādi (pāci. 89).

Mūlameva bījaṃ **mūlabījaṃ**, mūlabījaṃ etassātipi **mūlabījaṃ**. Sesesupi eseva nayo. **Phaḷubījanti** pabbabījaṃ. Paccayantarasaṃvāye sadisaphaluppattiyā visesakāraṇabhāvato viruṇaṇasamatthe sārāphale niruḷho bījasaddo tadatthasāmsiddhiyā mūlādīsūpi kesuci pavattatīti mūlādito nivattanattaṃ ekena bīja-saddena visesetvā vuttaṃ “**bījabīja**”nti “rūparūpaṃ (visuddhi. 2.449), dukkhadukkhā”nti (saṃ. ni. 4.327; 5.165; netti. 11) ca yathā. Kasmā panettha bījagāmahūtagāmaṃ uddharitvā bījagāmo eva niddiṭṭhoti? Na kho panetaṃ evaṃ daṭṭhabbaṃ, nanu avocumha – “mūlameva bījaṃ mūlabījaṃ, mūlabījaṃ etassātipi mūlabīja”nti. Tattha purimena bījagāmo niddiṭṭho, dutiyena bhūtagāmo, duvidhopesa mūlabījañca mūlabījañca **mūlabījanti** sāmaññaniddesena, ekasesanayena vā uddiṭṭhoti veditabbo. Tenevāha “**pañcavidhassā**”tiādi. **Nīlatiṇarukkhādīkassāti** allatiṇassa ceva allarukkhādīkassa ca. **Ādi**-saddena osadhigacchalatādīnaṃ saṅgaho.

Ekamaṃ bhattaṃ ekabhattaṃ, taṃ assa atthīti **ekabhattiko**. So pana rattibhojanenapi siyāti

tannivattanattham āha **“rattūparato”**ti. Evampi aparāṇhabhojīpi siyā ekabhattikoti tannivattanattham **“virato vikālabhojanā”**ti vuttam. Aruṇuggamanakālato paṭṭhāya yāva majjhanhikā ayam buddhādīnam ariyānam āciṇṇasamāciṇṇo bhojanassa kālo nāma, tadañño **vikālo. Aṭṭhakathāyam** pana dutiyapadena rattibhojanassa paṭikkhittatā **“atikkante majjhanhike yāva sūriyatthaṅgamanā bhojanam vikālabhojanam nāmā”**ti vuttam.

“Sabbapāpassa akaraṇa”ntiādīnayappavattam (dī. ni. 2.90; dha. pa. 183; netti. 30, 50, 116, 124) bhagavato sāsanaṃ accantarāguppattiyā naccādidassanaṃ na anulometīti āha **“sāsanaṃ ananulomattā”**ti. Attanā payojyamānaṃ, parehi payojāpiyamānañca naccam naccabhāvasāmañña pāliyaṃ ekeneva **nacca**-saddena gahitaṃ, tathā gītavadīta-saddena cāti āha **“naccananaccāpanādivasenā”**ti. **Ādi**-saddena gāyanagāyāpanavādanavādāpanāni saṅgayhanti. Dassana cetha savanampi saṅgahitaṃ virūpekasesanayena. Yathāsakaṃ viśayassa ālocanasabhāvatāya vā pañcanaṃ viññāṇaṃ savanakiriyāyapi dassanaṃkhepasabbhāvato **“dassanā”**icceva vuttam. Tenāha “pañcahi viññāṇehi na kañci dhammaṃ paṭivijānāti aññatra abhinipātamaṭṭā”ti. Avisūkabhūtaṃ gītassa savanaṃ kadāci vaṭṭatīti āha **“visūkabhūtā dassanā”**ti. Tathā hi vuttam paramatthajotikāyaṃ **khuddakaṭṭhakathāyam** (khu. pā. aṭṭha. 2.pacchimapañcasikkhāpadavaṇṇanā) “dhammūpasamhitam gītam vaṭṭati, gītūpasamhito dhammo na vaṭṭatī”ti. **Yaṃ kiñcīti** ganthitaṃ vā aganthitaṃ vā yaṃ kiñci pupphaṃ. **Gandhajātanti** gandhajātikam. Tassapi “yaṃ kiñcī”ti vacanato pīṭassa apīṭassapi yassa kassaci vilepanādi na vaṭṭatīti dasseti.

**Uccāti** ucca-saddena samānattham ekaṃ saddantaram. Seti etthāti **sayanaṃ**. Uccāsayaṇam mahāsayaṇaṃ samaṇasārūparahitaṃ adhippetanti āha **“pamañātikkantaṃ akappiyattharaṇa”**nti. Āsanañcetha sayaneneva saṅgahitanti daṭṭhabbam. Yasmā pana ādhāre paṭikkhitte tadādhārā kiriyā paṭikkhittāva hoti, tasmā “uccāsayaṇamahāsayaṇā”icceva vuttam, atthato pana tadupabhogabhūtanisajjānipajjanehi virati dassitāti daṭṭhabbam. Atha vā uccāsayaṇamahāsayaṇaṃ uccāsayaṇamahāsayaṇaṃ **uccāsayaṇamahāsayaṇanti** etasmim atthe ekasesena ayam niddeso kato yathā “nāmarūpapaccayā saḷāyatana”nti (ma. ni. 3.126; sam. ni. 2.1; udā. 1), āsanakiriyāpubbakattā vā sayanakiriyāya sayanaggahaṇena āsanampi gahitanti vedītabbam.

**Dārumāsakoti ye vohāraṃ gacchantīti iti**-saddena evampakāre dasseti. Aññehi gāhāpane upanikkhittasādiyane ca paṭiggahaṇattho labhatīti āha **“neva naṃ uggaṇhātī, na uggaṇhāpeti, na upanikkhitaṃ sādiyatī”**ti. Atha vā tividham paṭiggahaṇam kāyena vācāya manasāti. Tattha kāyena paṭiggahaṇam **uggaṇhanaṃ**, vācāya paṭiggahaṇam **uggaṇhāpanam**, manasā paṭiggahaṇam **sādiyananti** tividhampi paṭiggahaṇam ekajjham gahetvā “paṭiggahaṇā”ti vuttanti āha **“neva naṃ uggaṇhātī”**tiādi. Esa nayo **āmakaḍḍhaññapaṭiggahaṇāti**ādīsūpi. Nivārādiupadhaññassa sāliādīmūladhaññantogadhātā vuttam **“sattavidhassā”**ti. “Anujānāmi, bhikkhave, pañca vasāni bhesajjāni acchavasam macchavasam susukāvasam sukaravasam gadrabhavasā”nti (mahāva. 262) vuttatā idaṃ odissa anuññātam nāma, tassa pana “kāle paṭiggahita”nti (mahāva. 262) vuttatā paṭiggahaṇam vaṭṭati. Sati paccayeti āha **“aññatra odissa anuññātā”**ti.

Sarūpena vañcanaṃ **rūpakūṭam**, patirūpena vañcanaṃ attho. Aṅgena attano sarīrāvayavena vañcanaṃ **aṅgakūṭam**. Gahaṇavasena vañcanaṃ **gahaṇakūṭam**. Paṭicchannaṃ katvā vañcanaṃ **paṭicchannakūṭam**. **Akkamatīti** nippīleti, pubbhāge akkamattīti sambandho.

**Hadayanti** nāliādīnaṃ mānabhājanānaṃ abhantaram. Tilādīnaṃ nāliādīhi minanakāle ussāpitasikhāyeva sikhā. **Sikhābhedo** tassāhāpanam.

**Kecīti** sārasamāsācariyā, uttaravihāravāsino ca. **Vadhoti** muṭṭhipahārasātālanādīhi vihesanaṃ, vibādhanaṃ attho. Viheṭhanatthopi hi vadha-saddo dissati “attānaṃvadhivā vadhivā rodati”tiādīsū (pāci. 879, 881). Yathā hi apariggahabhāvasāmañña satipi pabbajitehi appaṭiggahitabbavatthuvibhāgasandassanattham itthikumārīdāsīdāsādayo vibhāgena vuttā. Evaṃ parassa

haraṇabhāvato adinnādānabhāvasāmaññe satipi tulākūṭādayo adinnādānavisesabhāvadassanattamaṃ vibhāgena vuttā, na evaṃ pāṇātipātapariyāyassa vadhassa puna gahaṇe payojanam atthi, tatha sayamkāro, idha paramkāroti ca na sakkā vuttam “kāyavacīpayogasamuṭṭhāpikā cetanā chappayogā”ti vacanato. Tasmā yathāvutto evettha attho yutto. **Aṭṭhakathāyam** pana “**vadhōti māraṇa**”nti vuttam, tampi pothanameva sandhāyāti ca sakkā viññātuṃ māraṇa-saddassapī vihiṃsane dissanato.

**294.** Cīvarapiṇḍapātānaṃ yathākkamaṃ kāyakucchipariharaṇamattajotanāyam avisesato aṭṭhannaṃ parikkhārānaṃ antare tappayojanāta sambhavatīti dassento “**te sabbepī**”tiādīmāha. **Etepitī** navaparikkhārikādayopi appicchāva santuṭṭhāva. Na hi tathakena mahicchata, asantuṭṭhitā vā hotīti.

Catūsu disāsu sukhaṃ viharati, tato eva sukhavihāraṭṭhānabhūtā catasso disā assa santīti vā **cātuddiso**. Tatha cāyam satte vā saṅkhāre vā bhayena na paṭihaññatīti **appaṭigho**. Dvādasavidhassa santosassa vasena santussanako **santussamāno**. **Itarītareṇāti** uccāvacena. **Parissayānaṃ** bāhirānaṃ sīhabyagghādīnaṃ, abhantarānaṃ kāmaccchandādīnaṃ kāyacittupaddavānaṃ abhibhavanato parissayānaṃ **sahitā**. Thaddhabhāvakarabhayābhāvena **acchambhī**. **Eko** asahāyo. Tato eva khaggamigasiṅgasadisatāya **khaggavisāṇakappo** careyyāti attho.

Chinnapakkho, asaṅjātapakkho vā sakuṇo gantuṃ na sakkotīti “**pakkhī sakuṇo**”ti pakkhi-saddena visesetvā sakuṇo pāliyaṃ vuttoti āha “**pakkhayutto sakuṇo**”ti. Yassa sannidhikāraparibhogo kiñci ṭhapetabbaṃ sāpekkhāya ṭhapanāna natthi, tādiso ayaṃ bhikkhūti dassento “**ayaṃ panettha saṅkhepattho**”tiādīmāha. Ariyanti apenti tato dosā, tehi vā ārakāti **ariyoti** āha “**ariyēnāti niddosenā**”ti. **Ajjhattanti** attani. **Niddosasukhanti** nirāmisasukhaṃ kilesavajjarahitattā.

**295.** Yathāvutte sīlasamvare paṭiṭṭhitasseva indriyasamvare icchitabbo tadadhiṭṭhānato, tassa ca paripālakabhāvatoti vuttam “**so iminā ariyena sīlakkhandhena samannāgato bhikkhū**”ti. **Sesapadesūti** “na nimittaggāhī hotī”tiādīsu padesu. Yasmā **visuddhimagge** (visuddhi. 1.15) vuttam, tasmā tassa **līnatthappakāsiniyaṃ samvannaṇāyamaṃ** (visuddhi. mahāṭī. 1.15) vuttanayeneva veditabbaṃ. Rūpādīsu nimittādiggāhaparivajjanalakkhaṇattā indriyasamvarassa kilesehi anavasittasukhatā avikiṇṇasukhatā cassa vuttā.

**296. Paccayasampattinti** paccayapāripūriṃ. **Ime cattāro**ti sīlasamvare santoso indriyasamvare satisampajaññanti ime cattāro araṇṇāvāsassa sambhārā. **Tiracchānagatehi vattabbaṃ āpajjati** isisiṅgassa pituādayo viya. **Vanacarakehīti** vanacarakamātugāmehi. **Bheravasaddaṃ sāventi**, tāvatā apalāyantānaṃ **hatthehi sīsam...pe... karonti**. Paṇṇattivītikamasāṅkhātaṃ **kālakamaṃ vā**. Micchāvitakkasāṅkhātaṃ **tilakamaṃ vā**. Tanti pītiṃ vibhūtabhāvena upaṭṭhānato **khayato sammasanto**.

**Vivittanti** janavivittaṃ. Tenāha “**suñña**”nti. Sā ca vivittatā nissaddabhāvena lakkhitabbāti āha “**appasaddaṃ appanigghosa**”nti. Āvasathabhūtaṃ senāsanam viharitabbaṭṭhena **vihārasenāsanam**. Masārakādi mañcapīṭhaṃ tatha attharitabbaṃ bhisiupadhānaṃ mañcapīṭhasambandhito **mañcapīṭhasenāsanam**. Cimilikādi bhūmiyaṃ santharitabbaṭṭhāya **santhatasenāsanam**. Rukkhamūlādi paṭikkamitabbaṭṭhānaṃ caṅkamanādīnaṃ okāsabhāvato **okāsasenāsanam**.

“**Anucchavikamaṃ dassento**”ti vatvā tameva anucchavikabhāvaṃ vibhāvetuṃ “**tattha hī**”tiādi vuttam. **Acchannanti** iṭṭhakachadanādīnā antamaso rukkhasākhāhipi na channaṃ.

**Bhattassa pacchatoti** bhattabhuñjanassa pacchato. **Ūrubaddhāsananti** ūrūnaṃ adhobandhanavasena nisajjaṃ. Heṭṭhimakāyassa anujukāṭṭhapanam nisajjāvacaneneva bodhitanti. **Ujumaṃ kāyanti** ettha kāya-saddo uparimakāyavisayoti āha “**uparimaṃ sarīraṃ ujumaṃ ṭhapetvā**”ti. Tam pana ujukāṭṭhapanam sarūpato payojanato ca dassetuṃ “**aṭṭhārasā**”tiādi vuttam. **Na paṇamaṇṭṭi** na oṇamanti. **Na paripatatīti** na vigacchati, vīthiṃ na vilāṅgheti. Tato eva pubbenāparaṃ visesappattiyā kammaṭṭhānaṃ **vuddhiṃ phātiṃ upagacchati**. **Mukhasamīpeti** mukhassa samīpe nāsikagge vā



uttaroṭṭhe vā. Idha **pari-saddo** abhi-saddena samānatthoti āha “**kammaṭṭhānābhimukha**”nti, bahiddhā puthuttārammaṇato nivāretvā kammaṭṭhānaṃyeva purakkhatvāti attho. **Parīti pariggahaṭṭho** “pariṇāyikā”tiādīsu (dha. sa. 16) viya. **Niyyānaṭṭho** paṭipakkhato niggamanaṭṭho, tasmā **pariggahitaniyyānasatinti** sabbathā gahitāsammosaṃ pariccattasammosaṃ satim katvā, paramaṃ satinepakkamaṃ upaṭṭhapetvāti attho.

**Vikkhambhanavasena**ti ettha vikkhambhanaṃ anuppādanaṃ appavattanaṃ na paṭipakkhena suppahīnatā. **Pahīnattā**ti ca pahīnasadisataṃ sandhāya vuttaṃ jhānassa anadhigatatā. Tathāpi nayidaṃ cakkhuvīññānaṃ viya sabhāvato vigatābhijjhaṃ, atha kho bhāvanāvasena. Tenāha “**na cakkhuvīññānasadisena**”ti. **Eseva nayoti** yathā cakkhuvīññānaṃ sabhāvena vigatābhijjhaṃ abyāpannaṃca, na bhāvanāya vikkhambhitattā, na evamidaṃ. Idamaṃ pana cittaṃ bhāvanāya parisodhitattā abyāpannaṃ vigatathinamiddhaṃ anuddhataṃ nibbikicchaṃcāti attho. **Idamaṃ ubhayanti** satisampajaññaṃmāha.

**297. Ucchindivā pātentī**ti ettha ucchindanaṃ pātanaṃca tāsamaṃ paññānaṃ anuppannānaṃ uppajjituṃ appadānameva. Iti mahaggaṭānuttarapaññānaṃ ekaccāya ca parittapaññāya anuppattihetubhūtā nīvaraṇā dhammā itarāya ca samatthataṃ vihanantiyevāti **paññāya dubbalīkaraṇā** vuttā. Idampi paṭhamajjhānaṃ veneyyasantāne patiṭṭhāpiyamānaṃ ñānaṃ pajjati etthāti **ñānapadaṃ**. Ñānaṃ vaḷaṅgeti etthāti **ñānavalaṅgaṃ**.

**299. Na tāva niṭṭhaṃ gato** bāhirakānaṃ ñānaṃ akkantaṭṭhānānīpi siyunti. Yadi evamaṃ anaññasādhāraṇe maggañānapade kathaṃ na niṭṭhaṅgatoti āha “**maggakkhaṇepī**”tiādi. **Tīsu ratanesu niṭṭhaṃ gato hotīti** buddhasubuddhataṃ dhammasudhammataṃ saṅghasuppaṭipattitaṃca ārabha ñānaṃ niṭṭhaṃ nicchayaṃ upagato hoti. Kāmañcettha paṭhamamaggeneva sabbaso vicikicchāya pahīnattā sabbassapi ariyasāvakaṃsa kaṅkhā vā vimati vā natthi, tattha pana yathā paññāvepullappattassa arahato savisaye ñānaṃ savisesaṃ ogāhati, na tathā anāgāmiādānanti ratanattaye sātisaṃyamaṃ ñānanicchayaḃgamaṃ sandhāya “aggamaggavasena tatthaniṭṭhāgamaṃ vutta”nti vuttaṃ. Yaṃ panettha avibhattaṃ, taṃ suviññeyyamevāti.

Cūḷahatthipadopamasuttavaṇṇanāya līnatthappakāsanā samattā.

## 8. Mahāhatthipadopamasuttavaṇṇanā

**300. Jaṅgalānanti** ettha yo nipicchalena amuduko nirudakatāya thaddhalūkhabhūmippadeso, so “jaṅgalo”ti vuccati. Tabbahulatāya pana idha sabbo bhūmippadeso jaṅgalo, tasmim jaṅgale jātā, bhavāti vā jaṅgalā, tesamaṃ jaṅgalānaṃ. Evañhi nadīcarānampi hatthīnaṃ saṅgaho kato hoti. Samodhātābānaṃ viya hi samodhāyakānampi jaṅgalaggahaṇena gahetabbato. **Pathavītalacārīnanti** iminā jalacārīno na nivatteti adissamānapādattā. **Pāṇānanti** sādharmaṇavacanampi “padajātānī”ti saddantarasaṃnidhānena visesaniviṭṭhameva hotīti āha “**sapādakapāṇāna**”nti. “Muttagata”ntiādīsu (ma. ni. 2.119; a. ni. 9.11) gata-saddo anattantaro viya, **jāta**-saddo anattantaro āha “**padajātānī padānī**”ti. **Samodhānanti** samavarodhaṃ, antogamaṃ vā. **Mahantattenāti** vipulabhāvena.

**Kusalā dhammāti** anavajjasukhavipākā dhammā, na anavajjamattadhammā. Kusalattike āgatanayena hi idha kusalā dhammā gahetabbā, na bāhitikasutte āgatanayena. **Catubbidho saṅgahoti** kasmā vuttaṃ, nanu ekavidhovettha saṅgaho adhippetoti? Na, atthaṃ aggahetvā aniddhāritatthassa saddasseva gahitattā. Saṅgaha-saddo tāva attano atthavasena catubbidhoti ayañhettha attho. Atthopi vā aniddhāritaviseso sāmāññena gahetabbataṃ patto “saṅgahaṃ gacchatī”ti ettha saṅgaha-saddena vacanīyataṃ gatoti na koci doso, niddhārite visese tassa ekavidhatā siyā, na tato pubbeti. **Sajātisaṅgahoti** samānajātiyā, samānajātikānaṃ vā saṅgaho. Dhātukathāvaṇṇanāyaṃ pana “**jātisaṅgaho**”iceva vuttaṃ, taṃ jāti-saddassa sāpekkhasaddattā jātiyā saṅgahoti vutte attano jātiyāti viññāyati sambandhārahassa aññassa avuttattāti katvā vuttaṃ. Idha pana **rūpakaṇḍavaṇṇanāyaṃ** (dha.

sa. aṭṭha. 594) viya pākaṭaṃ katvā dassetuṃ “**sajātisaṅgaho**” icceva vuttaṃ. Sañjāyanti etthāti sañjāti, sañjātiyā saṅgaho **sañjātisaṅgaho**, sañjātidesavasena saṅgahoti attho. “Sabbe rathikā” ti vutte sabbe rathayodhā rathena yujjanakiriyāya ekasaṅgahoti. “Sabbe dhanuggahā” ti vutte sabbe issāsā dhanunā vijjanakiriyāya ekasaṅgahoti āha “**evaṃ kiriyavasena saṅgaho**” ti. **Rūpakkhandhena saṅgahitanti** rūpakkhandhena ekasaṅgahaṃ rūpakkhandhoteva gaṇitaṃ, gahaṇaṃ gatanti attho.

**Diyaddhameva saccam bhajati** maggasaccadukkhaccekadesabhāvato. Saccekadesantogadhampi saccantogadhameva hotīti āha “**saccānaṃ antogadhattā**” ti. Idāni tamatthaṃ sāsanato ca lokato ca upamaṃ āha ritvā dīpetuṃ “**yathā hī**” tiādi vuttaṃ. Tattha **sādhikamidaṃ, bhikkhave, diyaddhasikkhāpadasatanti** idaṃ yasmim kāle taṃ suttaṃ desitaṃ, tadā paññattasikkhāpadavasena vuttaṃ, tato paraṃ pana sādhikāni dvesatāni sikkhāpadānīti. **Sikkhānaṃ antogadhattā** adhisīlasikkhāya. Ettha ca “sīlaṃ sikkhantopi tisso sikkhā sikkhatī” ti visamoyaṃ upaññāso. Tattha hi yo pahātabbaṃ pajahati, saṃvaritabbato saṃvaraṃ āpajjati, ayamassa **adhisīlasikkhā**. Yo tattha cetaso avikkhepo, ayamassa **adhicittasikkhā**. Yā tattha vīmaṃsā, ayamassa **adhipaññāsikkhā**. Iti so kulaputto sarūpato labbhamānā eva tisso sikkhā sikkhatīti dīpito, na sikkhānaṃ antogadhattā mattenā. Tenāha **aṭṭhakathāyaṃ** “yo tathābhūtassa saṃvaro, ayamettha adhisīlasikkhā, yo tathābhūtassa samādhi, ayamettha adhicittasikkhā, yā tathābhūtassa paññā, yaṃ adhipaññāsikkhā. Imā tisso sikkhā tasmim ārammaṇe tīya satiyā tena manasikārena sikkhati āsevati bhāveti bahulīkarotī” ti. Idha pana saccānaṃ antogadhattā sacca-saddābhidheyyatāmattenā catūsu saccesu gaṇanantogadhā hontīti? Na, tatthāpi hi nipariyāyato adhisīlasikkhāva labbhati, itarā pariyāyatoti katvā “**sikkhānaṃ antogadhattā**” ti vuttaṃ.

**Catūsu ariyasaccesu saṅgahaṃ gacchantīti** ca tato amuccitvā tasseva antogadhataṃ sandhāya vuttaṃ. Evañca katvā “yathā ca ekassa hatthipadassā” tiādinā dassitā hatthipadopamā samatthitā daṭṭhabbā. **Ekasmimpi dvīsipi tīsipi saccesu gaṇanaṃ gatā dhammāti** idaṃ na kusalattikavaseneva veditabbaṃ, atha kho tikadukesu yathārahaṃ labbhamānapadavasena veditabbaṃ. Tattha ekasmim sacce gaṇanaṃ gato dhammo asaṅkhatadhammo daṭṭhabbo, dvīsū saccesu gaṇanaṃ gatā kusalā dhammā, tathā akusalā dhammā, abyākatā ca dhammā, tīsū saccesu gaṇanaṃ gatā saṅkhatā dhammā, evaṃ aññesampi tikadukapadānaṃ vasena ayamattho yathārahaṃ vibhajitvā vattabbo. Tenāha “**ekasmimpi...pe... gatāva hontī**” ti. Ekadeso hi samudāyantogadhattā viseso viya sāmāññaena samūhena saṅgahaṃ labhati. Tenāha “**saccānaṃ antogadhattā**” ti. **Desanānukkamoti** ariyasaccāni uddisitvā dukkhasaccaniddesavasena pañcannaṃ upādānakkhandhānaṃ vibhajanaṃ. Tattha ca rūpakkhandhaniddesavasenaādito ajjhantikāya pathavīdhātuyā vibhajananti. Ayaṃ imissā desanāya anukkamo.

**301.** Taṃ panetaṃ upamāhi vibhāvetuṃ “**yathā hī**” tiādi vuttaṃ. Tattha **sujātanti** sundaraṃ, susaṅghitaṃ supariṇatañcāti adhippāyo. **Pesiyoti** vilīve. Mudubhāvato **kucchibhāgaṃ ādāya. Itare ca cattāro koṭṭhāseti** pañcadhā bhinnakoṭṭhāsesu itare ca cattāro koṭṭhāse. **Itare ca tayo koṭṭhāseti**ādito catudhā bhinnakoṭṭhāsesu itare ca tayo koṭṭhāse.

**Rājaputtūpamāyāti** rañño jeṭṭhaputtaupamāya. Nti piḷandhanaṃ. Ure vāyāmajanitaariyājātiyā **oraso. Mukhato jātoti** mukhato niggatadhammadesanāya jāto, buddhānaṃ vā dhammakāyassa mukhabhūtaariyadhammato jāto. Tato eva **dhammajo dhammanimmito**. Satthu dhammadāyādasseva gahitattā **dhammadāyādo**. Tenāha “**no āmisadāyādo**” ti. Nti “bhagavato putto” tiādivacanaṃ. Mahāpaññatādiguṇehi sātisaṃyaṃ anupubbabhāve ṭhitattā **sammā** yathābhūtaṃ **vadamāno** vattuṃ sakkonto **vadeyya**.

**Akutobhayaṃ** nibbānaṃ nibbānagāminiñca. Rāgarajādīnaṃ vigamena vigatarajaṃ dhammaṃ desentaṃ sugataṃ sammāsambuddhaṃ bhikkhūnaṃ parosahassaṃ payirupāsāṭīti yojanā.

“**Sevetha bhajathā**” ti vatvā tattha kāraṇamāha “**paṇḍitā bhikkhū anuggāhakā**” ti. Paṇḍitāpi samānā na appassutā, atha kho ovādānusāsanihi anuggāhakāti purimā upamā therasseva vasena udāhaṭā,

dutiya pana bhagavato bhikkhusaṅghassapi vasena udāhaṭā.

**302. Ajjhattikāti** sattasantānapariyāpannā. **Ajjhattaṃ paccattanti** padadvayenapi taṃtampāṭipuggalikadhammā vuccantīti āha “**ubhayampetaṃ niyakādhivacanamevā**”ti. Sasantatipariyāpannatāya pana attāti gahetabbabhāvūpagamanavasena attānaṃ adhikicca uddissa pavattaṃ **ajjhattaṃ**, taṃtamsattasantānapariyāpannatāya **paccattaṃ**. Tenāha **aṭṭhakathāyaṃ** (visuddhi. 1.307) “attani pavattattā ajjhattaṃ, attānaṃ paṭicca paṭicca pavattattā paccatta”nti. **Kakkhaḷanti** kathinaṃ. Yasmā taṃ thaddhabhāvena sahaḷātānaṃ patiṭṭhā hoti, tasmā “**thaddha**”nti vuttaṃ. **Kharigatanti** kharasabhāvesu gataṃ tappariyāpannaṃ, kharasabhāvamevāti attho. Yasmā pana kharasabhāvaṃ pharusākārena upaṭṭhānato pharusākāraṃ hoti, tasmā vuttaṃ “**pharusa**”nti. **Upādinnaṃ** nāma sarīraṭṭhakaṃ. Tattha yaṃ kammaṣamuttānaṃ, taṃ nipariyāyato “**upādinna**”nti vuccati, itaraṃ **anupādinnaṃ**. Tadubhayampi idha taṇhādīhi ādinnagahitaparāmaṭṭhavasena upādinnaṃmevāti dassetuṃ “**sarīraṭṭhakañhī**”tiādi vuttaṃ. Tattha **ādinnanti** abhinivīṭṭhaṃ. Mamanti **gahitaṃ**. Ahanti **parāmaṭṭhaṃ**. **Dhātukammaṭṭhānikassāti** catudhātuvavattānaṃ paramatthānaṃ pariharantassa. **Etthāti** etasmiṃ dhātukammaṭṭhāne. **Tisu koṭṭhāsesūti** tippakāresu koṭṭhāsesu. Na hi te tayo cattāro koṭṭhāsā.

**Vuttappakārāti** “kesā lomā”tiādinā vuttappakārā. **Nānāsabhāvatoti** satipi kakkhaḷabhāvasāmaññe sasambhāravibhattito pana kesādisaṅghātagatanānāsabhāvato. **Ālayoti** apekkhā. **Nikantīti** nikāmanā. **Patthanāti** taṇhāpatthanā. **Pariyuttānanti** taṇhāpariyuttānaṃ. **Gahaṇanti** kāmupādānaṃ. **Parāmāsoti** parato āmasanā micchābhiniveso. **Na balavā** ālayādi. Yadi evaṃ kasmā vibhaṅge bāhirāpi pathavīdhātu vitthāreṇeva vibhattāti? Yathādharmadesanattā tattha vitthāreṇeva desanā pavattā, yathānulomadesanattā panettha vuttanayena desanā saṃkhittā.

**Yojetvā dasseti** ekajjhaṃ katvā dasseti. **Sāti** ajjhattikā pathavīdhātu. **Sukhapariggaho hoti** “na me so attā”ti. Siddhe hi anattalakkhaṇe dukkhalakkhaṇaṃ aniccalakkhaṇaṃca siddhameva hoti saṅkhatadhammesu tadavinābhāvatoti. **Visūkāyatīti** visūkaṃ virūpakiriyaṃ pavatteti. Sā pana atthato vipphananamevāti āha “**vipphanatī**”ti. **Assāti** ajjhattikāya pathavīdhātuyā. **Acetanābhāvo pākaṇo hoti** dhātumattatāya dassanato. **Taṃ ubhayampīti** taṃ pathavīdhātudvayampi.

**Tato visesatarenāti** tato bāhiramahāpathavito visesavantatarena, lahutarenāti attho. **Kuppatīti** luppati. **Vilīyamānāti** pakatiudake loṇaṃ viya vilayaṃ gacchantī. **Udakānugatāti** udakaṃ anugataṃ udakagatikā. Tenāha “**udakameva hotī**”ti. Abhāvo **eva abhāvatā**, na bhavatīti vā abhāvo, tathāsabhāvo dhammo. Tassa bhāvo **abhāvatā**. Vayo vināso dhammo sabhāvo etassāti vayadhammo, tassa bhāvo **vayadhammatā**, atthato khayō eva. Sesapadesupi eseva nayo. Tenāha “**sabbehipi imehi padehi aniccalakkhaṇameva vutta**”nti. Viddhamāsanabhāvassa pana paveditabbattā kāmāṃ aniccalakkhaṇameva vuttaṃ sarūpato, itarānīpi atthato vuttānevāti dassento āha “**yaṃ panā**”tiādi.

Mattaṃ khaṇamattaṃ tiṭṭhatīti mattaṭṭho, appamattaṭṭho **mattaṭṭhako**, atīttarakhaṇīkoti attho. Tenāha “**parittaṭṭhitikassā**”ti. **Ṭhitiparittatāyāti** ekacittapavattimattatāṭṭhānalakkhaṇassa itarabhāvena. Ekassa cittassa pavattikkhaṇamatteneva hi sattānaṃ paramatthato jīvanakkhaṇo paricchinno. Tenāha “**ayaṃ hī**”tiādi.

**Jīvanti** jīvitindriyaṃ. **Sukhadukkhāti** sukhadukkhā vedanā. Upekkhāpi hi sukhadukkhāsveva antogadhā iṭṭhāniṭṭhabhāvato. **Attabhāvoti** jīvitavedanāvīññānāni ṭhapetvā avasiṭṭhadhammā vuttā. **Kevalāti** attaniccabhāvena avomissā. **Ekacittasamāyuttāti** ekena cittena sahitā ekacittakkhaṇīkā. **Lahuso vattate khaṇoti** tāya eva ekakkhaṇikatāya lahuko atīttaro jīvitādīnaṃ khaṇo vattati vītivattatīti attho. **Idanti** gāthāvacanaṃ.

Yasmā sattānaṃ jīviṃ assāsapassāsānaṃ aparāparaṣaṅcaraṇaṃ labhamānameva pavattati, na alabhamānaṃ, tasmā **assāsapassāsūpanibaddhaṃ**. Tathā mahābhūtānaṃ samavuttitaṃ

labhamānameva pavattati. Pathavīdhātuyā hi āpodhātuādīnaṃ vā aññatarapakopena balasampannopi puriso patthaddhakāyo vā, atisārādivasena kilinnapūtikāyo vā, mahādhāpareto vā, sañchijjāmānasandhibandhano vā hutvā jīvītakkhayaṃ pāpuṇāti. Kabaḷīkārāhārānaṃ yuttakāle labhantasseva jīvītaṃ pavattati, alabhantassa parikkhayaṃ gacchati, viññāṇe pavattamāneyeva ca jīvītaṃ pavattati, na tasmīṃ appavattamāne. **Jīvītaṃ** ettha **īti**-saddena iriyāpathūpanibaddhatāsītuṅhūpanibaddhatādīnaṃ saṅgaho. Catunnañhi iriyāpathānaṃ samavuttitaṃ labhamānameva jīvītaṃ pavattati, aññatarassa pana adhimattatāya āyusāṅkhārā upacchijjanti, sītuṅhānampi samavuttitaṃ labhamānameva pavattati, atisītena pana atīuṅhena vā abhibhūtassa vipajjati.

**Taṅhupādinnassāti** iminā hi paccayuppannatākittanena sarasapabhaṅgutāmyeva vibhāveti. Dukkhanupassanāya taṅhāggāhassa aniccānupassanāya mānaggāhassa anattānupassanāya diṭṭhiggāhassa ujuvipaccanīkabhāvato ekaṃseneva tīhi anupassanāhi gāhāpi vigacchantīti āha “**noteva hotī**”ti. **Ekāmyeva āgataṃ** bāhirāya pathavīdhātuyā antaradhānadassanapavattajotānāya.

**Pariggahanti** dhātupariggahaṇaṃ. **Paṭṭhapentoti** ārabhanto desento. Sotadvāre balaṃ dassetiyojanā. Kammatṭhānikassa baladassanāpadesena kammatṭhānassa ānubhāvaṃ dasseti. **Vācāya ghaṭṭanāmeva vuttaṃ** sotadvāre baladassanabhāvato. **Balanti** ca bāhirāya viya ajjhakkāyapi pathavīdhātuyā acetanābhāvadassanena rukkhassa viya akkosantepi paharantepi nibbikārātā. **Sampativattamānuppānabhāvenāti** tadā paccuppanabhāvena. **Samudācārūppānabhāvenāti** āpāthagate tasmīṃ anīṭṭhe saddārammaṇe ārammaṇakaraṇasaṅkhātāuppattivasena sotadvāre javanavedanā dukkhāti vacanato. Tathā hi “**upanissayavasenā**”ti vuttaṃ. **Vedanādayopīti** “vedanā aniccā”ti ettha vuttavedanā ceva saññādayo ca. Te hi phassena samānabhūmikā na pubbe vuttavedanā. **Dhātusaṅkhātameva ārammaṇanti** yathāpariggahitaṃ pathavīdhātusaṅkhātameva visayaṃ. **Pakkhandatīti** vipassanācittaṃ aniccantīpi dukkhantīpi anattatīpi sammāsanavasena anupavisati. Etena bahiddhāvikkhepābhāvamāha, **pasīdatīti** pana iminā kammatṭhānassa vīthipaṭipannaṃ. **Santiṭṭhatīti** iminā uparūpari vīsesāvahabhāvena avatthānaṃ paṭipakkhābhābhavena niccalabhāvato. **Vimuccatīti** iminā taṅhāmānadiṭṭhiggāhato vīsesena muccaṇaṃ. **Aṭṭhakathāyaṃ** pana samuṭṭhānavasena attho vutto “**adhimokkhaṃ labhati**”ti. **Sotadvāramhi ārammaṇe āpāthagateti** idaṃ mūlapariññāya mūladassanaṃ. Sotadvārehi āvajjanavoṭṭhabbanānaṃ ayoniso āvajjayato voṭṭhabbanavasena itṭhe ārammaṇe lobho, anīṭṭhe ca paṭigho uppajjati, manodvāre pana “itthī, puriso”ti rajjanādi hoti, tassa pañcadvārajavanaṃ **mūlaṃ**, sabbāṃ vā bhavaṅgādi. Evaṃ manodvārajavanassa mūlavasena **pariññā**. **Āgantukatāvakālikapariññā** pana pañcadvārajavanasseva apubbabhāvavasena itarabhāvavasena ca veditabbā. Ayamettha saṅkhepo, vitthāro pana satipaṭṭhānasamvaṇṇanāyaṃ vutto eva.

Yāthāvato dhātūnaṃ pariggaṇhanavasena katapariggahassapi anādīkālabhāvanāvasena **ayoniso āvajjanaṃ sacepi uppajjati. Voṭṭhabbanāṃ patvāti** voṭṭhabbanakiccataṃ patvā. **Ekāṃ dve vāre āsevanāṃ labhitvā, na** āsevanapaccayaṃ. Na hi upekkhāsahagatāhetukacittaṃ āsevanapaccayabhūtaṃ atthi. Yadi siyā, paṭṭhāne kusallatike paṭiccavārādīsū “na maggapaccayā āsevane dve, āsevanapaccayā na magge dve”ti ca vattabbaṃ siyā, “na maggapaccayā āsevane ekāṃ (paṭṭhā. 1.1.221), āsevanapaccayā na magge eka”nti (paṭṭhā. 1.1.152) ca pana vuttaṃ. **Ekāṃ dve vāreti** ettha ca ekaggahaṇaṃ vacanasīlīṭṭhatāya vasena vuttaṃ. Na hi dutiye moghavāre ekavārameva voṭṭhabbanāṃ pavattati. Dvikkhattuṃ vā tassa pavattitaṃ sandhāya ekavāraggahaṇaṃ, tikkhattuṃ pavattitaṃ sandhāya dvevāraggahaṇaṃ. Tattha dutiyaṃ tatiyaṅca pavattamānaṃ laddhāsevanaṃ viya hoti. Yasmā pana “voṭṭhabbanāṃ patvā ekāṃ dve vāreāsevanāṃ labhitvā cittaṃ bhavaṅgameva otarati”ti idaṃ dutiyamoghavārasena vuttaṃ bhaveyya. So ca ārammaṇadubbalatāya eva hotīti **abhidhammatṭhakathāyaṃ** niyamito. Idha pana tikkhānupassanānubhāvena akusaluppattiyā asambhavavasena ayoniso vāvajjato ayoniso vavattānaṃ siyā, na yoniso, tasmīṅca pavatte mahati atimahati vā ārammaṇe javanaṃ na uppajjeyyāti ayamattho vicāretvā gahetabbo.

Etasseva vā satīpi duvidhatāparikkappaṇe so ca yadi anulome vedanāttike paṭiccavārādīsū

“āsevanapaccayā na magge dve, na maggapaccayā āsevane dve”ti ca vuttam siyā, (labbheyya), na ca vuttam. Yadi pana voṭṭhabbanampi āsevanapaccayo siyā, kusalākusalānampi siyā. Na hi āsevanapaccayam laddhum yuttassa āsevanapaccayatāpi dhammo āsevanapaccayo hotīti avutto atthi, voṭṭhabbanassa pana kusalākusalānam āsevanapaccayabhāvo avutto – “kusalam dhammam paṭicca kusalo dhammo uppajjati nāsevanapaccayā. Akusalam...pe... nāsevanapaccayā”ti (paṭṭhā. 1.1.93-94) vacanato paṭikkhitto ca. Athāpi siyā asamāvedanānam vaseneva vuttanti ca, evamapi yathā – “āvajjanā kusalānam khandhānam akusalānam khandhānam anantarapaccayena paccayo”ti (paṭṭhā. 1.1.417) vuttam, evam “āsevanapaccayena paccayo”tipi vattabbam siyā. Tam jātibhedā na vuttanti ce? Bhūmibhinnassa kāmāvacarassa rūpāvacarādīnam āsevanapaccayabhāvo viya jātibhinnassapi bhavēyyāti vattabbo eva siyā, abhinnajātikassa ca vasena yathā – “āvajjanā sahetukānam khandhānam anantarapaccayena paccayo”ti vuttam, evam “āsevanapaccayena paccayo”tipi vattabbam siyā, na ca vuttam. Tasmā vedanāttikepi “āsevanapaccayā na magge ekam, na maggapaccayā āsevane eka”nti evam gaṇanāya niddhāriyamānāya voṭṭhabbanassa āsevanapaccayattassa abhāvā ayam moghavāro upaparikkhitvā gahetabbo.

Voṭṭhabbanam pana vīthivipākasantatiyā āvaṭṭanato āvajjanā, tato visadisassa javanassa karanato manasikāroti ca vattabbatam labheyya, evaṅca katvā **paṭṭhāne** “voṭṭhabbanam kusalānam khandhānam anantarapaccayena paccayo”tiādi na vuttam, “āvajjanā”icceva (paṭṭhā. 1.1.417) vuttam, tampi voṭṭhabbanato param catunnam paṭcannam vā javanānam ārammaṇapurejātam bhavitum asakkontam rūpādīm ārabha pavattamānam voṭṭhabbanam javanattāne thatvā bhavaṅgam otarati. **Javanattāne thatvāti** ca javanassa uppajjanattāne dvikkhattum pavattitvāti attho, na javanabhāvenāti. **Āsevanam labhitvāti** cettha āsevanam viya āsevananti vuttovāyamatto. Vipphārikattā cassa dvikkhattum vā tikkhattum vā pavattiyeva cettha āsevanasadisatā. Vipphārikatāya hi viññattisamuṭṭhāpakatā cassa vuccati. Vipphārikampi javanam viya anekakkhattum appavattiyā asuppatiṭṭhitatāya ca na nippariyāyato āsevanabhāvena vattatīti na imassa āsevanattham vuttam. **Aṭṭhakathāyam** pana phalacittesu maggapariyāyo viya pariyāyavasena vuttam.

**Ayanti** “sacepī”tiādinā vutto ekavārampi rāgādīnam anuppādanavasena vipassanāya kammaṃ karonto yogāvacaro. **Koṭippattoti** matthakam patto. Paṭipakkhehi anabhibhūtattā visadavipassanāñānatāya **tikkhavipassako**. **Ārammaṇam pariggahitameva hoti** “evam me javanam javita”nti sarammaṇassa javanassa hutvā abhāvavavattāpanassa kammaṭṭhānabhāvato, tathā āvajjanavasena vā tam ārammaṇam vissajjetvā tāvadeva mūlakammaṭṭhānabhūtam ārammaṇam pariggahitameva hoti. **Dutiyassa pana vasesāti** “aparassa rāgādivasena ekavāram javanam javati”tiādinā vuttassa nātittikkhavipassakassa vasena “tassa dhātārammaṇameva cittaṃ pakkhandatī”tiādinā imasmim sutte āgatattā. “Tamenam upadhipahānāya paṭipannam upadhipaṭinissaggāya kadāci karahaci satisammosā upadhipaṭisamuyuttā sarasaṅkappā samudācaranti. Dandho udāyi satuppādo, atha kho nam khippameva pajahati vinodeti byantikaroti anabhāvam gametī”ti **laṭukikopame**. Tassa hi **aṭṭhakathāyam** “sotāpannādayo tāva pajahantu, puthujjano katham pajahatī”ti codanam paṭṭhapetvā “āraddhavipassako hi satisammosena sahasā kilese uppanne ‘mādisassa nāma bhikkhuno kileso uppanno’ti samvegam katvā vīriyam paggayha vipassanam vaḍḍhetvā maggena kilese samugghātetī, iti so pajahati nāmā”ti attho vutto. Tena vuttam – “tassa dhātārammaṇameva cittaṃ pakkhandatītiādinā imasmim sutte āgatattā”tiādi. **Indriyabhāvane ca** majjhimassa vasena **ayamattho veditabbo**.

**Pariggahavasenāti** dhātupariggahavasena. Mammacchedanādivasena pavattaakkosanādīm anīṭṭham ārammaṇam patvā **sotadvāre kilamati** puggalo, tathā pothanapaharaṇādikam anīṭṭham ārammaṇam patvā **kāyadvāre kilamati**.

**Samudācarantīti** sabbaso uddham ācaranti. Tayidam amanāpehi samudācaraṇam nāma pothanapaharaṇādivasena upakkamanamevāti āha “**upakkamantī**”ti, bādhanāti attho. **Tathāsabhāvoti** yathā paṇipahārādīhi ghaṭṭitamatto vikāram āpajjati, tathāsabhāvo. “Ubhatodaṇḍakena cepi,

bhikkhave, kakacenā”tiādinā (ma. ni. 1.232) ovādadānaṃ nāma anaññasādhāraṇaṃ buddhānaṃyeva āveṇikanti āha “**vuttaṃ kho panetaṃ bhagavatāti anussarantopi...pe... kakacūpamovādaṃ anussarantopi**”ti vuttaṃ. Tassapi pariyattidhammabhāvatoti keci. Yaṃ pana kakacokantakesupi manussesu appadussanaṃ nibbikāraṃ, taṃ satthusāsaṇaṃ anussarantopi sammāpaṭipattilakkhaṇaṃ dhammaṃ anussaratiyevāti evaṃ vā ettha attho veditabbo. **Bhikkhuno guṇanti** ariyadhammādhigamanasiddhaṃ guṇamāha. So ca sabbesampi ariyānaṃ guṇoti taṃ anussarantopi saṅghaṃ anussarati evāti vuttaṃ.

**Vipassanupekkhā adhippetā**, tasmā upekkhā kusalanissitā na saṅghātīti vipassanāvasena sabbasmimpi saṅkhāragate ajjupekkhanaṃ na labhatīti attho. **Chalaṅgupekkhāti** chalaṅgupekkhā viya chalaṅgupekkhā itthāniṭṭhesu nibbikāratāsāmañña. Tenāha “**sā panesā**”tiādi. **Chalaṅgupekkhāṭhāne ṭhapeti** “lābhā vata me, suladdhaṃ vata me”tiādinā attamanataṃ āpajjanto.

**303. Āpogatanti** ābandhanavasena āpo, tadeva āposabhāvaṃ gatattā āpogataṃ, sabhāveneva āpobhāvaṃ vā pattanti attho. Yasmā pana so āpobhāvasaṅkhāto allayūsabhāvo sasambhārapathavīsasambhāraudakādigate sabbasmimpi āpasmiṃ vijjati, tasmā vuttaṃ “**sabbaāpesu gataṃ allayūsabhāvalakkhaṇa**”nti, dravabhāvalakkhaṇanti attho. “Pakuppatī”ti pākatikapakopaṃ sandhāyāha “**oghavasena vaḍḍhatī**”ti. Tenāha “**ayamassa pākatiko pakopo**”ti. Itaraṃ pana dassetuṃ “**āposamvattakāle panā**”tiādi vuttaṃ. **Ogacchantīti** ettha ogamananti pariyādānaṃ adhippettaṃ, na adhogamaṇamattanti āha “**uddhane...pe... pāpuṇanti**”ti.

**304. Sabbatejesu gatanti** indhanādivasena anekabhedesu sabbesu tejokoṭṭhāsesu gataṃ pavattaṃ. Yathā pīti eva pītigataṃ, evaṃ **tejo eva tejogataṃ**, tejanavasena pavattimattanti attho. Evaṃ āpogataṃ, vāyogatañca veditabbanti āha “**purime**”tiādi. **Ekāhikajarādibhāvenāti** ekāhikādi jarābhedenā. **Usumajātoti** usmābhībhūto. **Jīratīti** jinno hoti. Tejodhātuvasena labbhamānā imasmiṃ kāye jarāpavatti pākaṭajarāvasena veditabbāti dassetuṃ “**indriyavekallatta**”ntiādi vuttaṃ. **Valipalitādibhāvanti** valitapalītibhāvaṃ, aṅgapaccaṅgānaṃ sithilabhāvañca. **Kuppitenāti** khubhitena. Satakkhattuṃ tāpetvā tāpetvā sītūduke pakkhipitvā uddhaṭasappi **satadhotasappīti** vadanti. Sarīre pakatiusumaṃ atikkamitvā uṇhabhāvo **santāpo**, sarīrassa dahanavasena pavatto mahādāho **paridāhoti** ayameva tesam viseso. **Asitanti** suttaṃ. **Khāyitanti** khāditaṃ. **Sāyitanti** assāditaṃ. **Sammā paripākaṃ gacchatīti** samavepākiniyā gahaṇiyā vasena vuttaṃ. Asammāparipākopi visamaṇapākiniyā gahaṇiyā vasena veditabbo. **Rasādibhāvenāti** rasarudhiramaṃsamedanāruatṭhiatṭhimiñjasukkabhāvena. **Vivekanti** puthubhāvaṃ aññaṃaññaṃ visadisabhāvaṃ. Asitādibhedassa āhārassa pariṇāme raso hoti, taṃ paṭicca rasadhātu uppajjati attho. Evaṃ rasassa pariṇāme “rudhira”ntiādinā sabbam netabbaṃ.

**Haritantanti haritameva**, anta-saddena padavaḍḍhanaṃ kataṃ yathā “vanantaṃ suttanta”nti. **Cammanillekhanam** cammaṃ likhitvā chaḍḍitakasaṭaṃ.

**305. Uggārahikkārādīti** ettha **ādi**-saddena uddekakhīpanādīpavattakavātānaṃ saṅgaho daṭṭhabbo. **Uccārapassāvādīti** **ādi**-saddena pītasemhalasikādinīharaṇavātassa ceva usumavātassa ca saṅgaho veditabbo. Yadi **kucchi**-saddo udarapariyāyo, koṭṭha-saddena pana abbhantarassa vuccamānattā tadavasīṭṭho udarapadeso idha kucchi-saddena vuccatīti āha “**kucchisayā vātāti antānaṃ bahivātā**”ti. **Samiñjanapasāraṇādīnīti** **ādi**-saddena ālokanavilokanauddharaṇādīkā sabbā kāyikakiriyā saṅgahitā. Avāsavati udakaṃ etasmāti **ossavanaṃ**, chadananto. **Idhāti** imasmiṃ ṭhāne.

**306. Nissattabhāvanti** anattakataṃ. Yathādassitā hi catasso dhātuyo anattaniyaṃ kevalaṃ dhātumattā nissattanijjīvāti imamatthaṃ dasseti. **Parivāritoti** parivāritabhāvena ṭhito parivuto. Tenāha “**etānī**”tiādi, kaṭṭhādīni sannivesavisesavasena ṭhapitānīti adhippāyo. Aññathā agārasamaññāya bhāvato. Tenāha “**kaṭṭhādīsu panā**”tiādi. Yadatthaṃ pāliyaṃ “seyyathāpi, āvuso”tiādi āradhaṃ, tamatthaṃ pākaṭaṃ katvā dassetuṃ “**yathā kaṭṭhādīnī**”tiādi vuttaṃ.

Kāmaṃ heṭṭhā “mattaṭṭhakassa kāyassā” tiādinā (ma. ni. 1.302) avibhāgena ekadesena ca upādārūpampi kathitaṃ, tathā vedanādayo khandhabhāvena pariggahetvā na kathitā, tathā taṇhāpi samudayasaccabhāvena. Itarāni pana saccāni sabbena sabbaṃ na kathitāni. Tenevāha “**heṭṭhā...pe... na kathitāni**”ti. **Cakkhupasāde niruddheti** cakkhupasāde vinaṭṭhe. **Upahateti** pubbakimiādīhi upaddute. **Palibuddheti** pubbādiuppattiyā vinā paṭicchādite. **Tajjoti** tassānurūpo, cakkhuviññānuppattiyā anurūpoti attho. Cakkhussa rūpārammaṇe āpāthagate uppajjanamanasikāro hadayasannissayopi cakkhumhi sati hoti, asati na hotīti katvā “**cakkhum paṭicca uppajjanamanasikāro**”ti vutto. Bhavaṅgāvaṭṭanaṃ tassa yathā ārammaṇapaccaye, evaṃ pasādapaccayepi hotīti vuttaṃ “**cakkhuṅca rūpe ca paṭiccā**”ti. Nti cakkhudvāre kiriyamanodhātucittaṃ. **Aññavīhitassāti** aññārammaṇapasutassa. **Tadanurūpassāti** tesam cakkhurūpatadābhogaṇaṃ anurūpassa.

**Cattāri saccāni dasseti** sarūpato atthāpattito cāti adhippāyo. Tappakāro bhūto, tappakāraṃ vā patto **tathābhūto**, tassa, yathā cakkhuviññānaṃ uppajjati, tādisassa paccayākārasamavetassāti attho. **Tisamuṭṭhānarūpanti** utukammāhārasamuṭṭhānarūpaṃ. Idañca satipi tadā bhavaṅgāvaṭṭanacittasamuṭṭhānarūpe kevalaṃ cakkhuviññānasamuṭṭhitarūpassa abhāvamattaṃ gahetvā vuttaṃ. **Saṅgahaṃ gacchatīti** nagaraṃ viya rajje rūpakkhandaṃ saṅghetabbataṃ gahetabbataṃ gacchati. “Tathābhūtassā”ti vuttattā **vedanādayo cakkhuviññānasampayuttāva, viññānampi cakkhuviññānameva. Saṅkhārāti cetanāva vuttā** cetanāpadhānattā saṅkhārakkhandhassāti adhippāyo. Tattha pana phassaṅgavīritindriyamanasikāracittatṭhitiyopi saṅkhārakkhandhadhammāva. **Ekato saṅgaho** “pañcakkhandhā”ti ekato gaṇaṇā. **Samāgamoti** yathāsakaṃ paccayavasena samodhānaṃ. **Samavāyoti** aññamaññassa paccayabhāvena samavetatāya samuditabhāvo.

Paccayuppannadhammo paṭicca samuppajjati etasmāti **paṭiccasamuppādo**, paccayākāro. Paccayadhamme passantopi paccayuppannadhamme passati, te passantopi paccayadhamme passatīti vuttaṃ “**yo paṭiccasamuppādo**”ntiādi. **Chandakaraṇavasenāti** taṇhāyanavasena. **Ālayakaraṇavasenāti** apekkhākaraṇavasena. **Anunayakaraṇavasenāti** anurajjanavasena. **Ajjhogāhitvāti** ārammaṇaṃ anupavisitvā viya gilitvā viya niṭṭhapetvā viya daḷhaggahaṇavasena. Chandarāgo vinayati pahiyati etthāti **chandarāgavinayo chandarāgapahānañcāti** vuccati nibbānaṃ. **Āharitvāti** pāliyaṃ sarūpato anāgatampi atthato ānetvā saṅgaṇhanavasena gahetabbam. Āharaṇavidhiṃ pana dassento “**yā imesū**”tiādimāha. **Imesu tisu ṭhānesūti** yathāvuttessu sukhadukkhādīsu tisu abhisamayatṭhānesu. **Diṭṭhīti** pariññābhisamayādivasena pavattā sammādiṭṭhī yāthāvadassanaṃ. Evaṃ saṅkappādayopi yathārahaṃ veditabbā. **Bhāvanāpaṭivedhoti** bhāvanāvasena paṭivedho, na ārammaṇakaraṇamattena. **Ayaṃ maggoti** ayaṃ catunnaṃ ariyasaccānaṃ paṭivijjanavasena pavatto atṭhaṅgiko maggo. **Ettāvātāpīti** evaṃ ekasmiṃ cakkhudvāre vatthu pariggahamukhenapi catusaccakammaṭṭhānassa matthakaṃ pāpanena **bahuṃ** vipulaṃ paripuṇṇameva **bhagavato sāsanaṃ kataṃ** anuṭṭhitaṃ hoti.

Uppajjitvā niruddhameva bhavaṅgacittaṃ āvajjanacittassa paccayo bhavatīti vuttaṃ “**taṃ niruddhampī**”ti. **Mandathāmagatamevāti** mahatīyā niddāya abhibhūtassa vasena vuttaṃ, kapimiddhaparetassa pana bhavaṅgacittaṃ kadāci āvajjanassa paccayo bhavēyyāti. **Bhavaṅgasamayenevāti** bhavaṅgasseva pavattanasamayena paguṇajjhānapaguṇakammaṭṭhānapaguṇaganthesu tesam paguṇabhāveneva ābhogena vināpi manasikāro pavattati. Tathā hi paguṇaṃ ganthaṃ paguṇabhāveneva nirantaraṃ viya ajjhayamāne aññavīhitatāya “**ettako gantho gato, ettako avasiṭṭho**”ti sallakkhaṇā na hoti. **Catusamuṭṭhānampīti** sabbaṃ catusamuṭṭhānarūpaṃ, na pubbe viya tisamuṭṭhānamevāti adhippāyo. Pubbaṅgamattā oḷārikattā ca phassacetanāva saṅkhārakkhandhoti gahitā, na aññesaṃ abhāvā. **Ekadesameva sammasantoti** yathāuddiṭṭhaṃ atthaṃ heṭṭhā anavasesato aniddisitvā ekadesameva niddisanavasena desanāya āmasanto. **Imasmiṃ ṭhāneti** yathāuddiṭṭhassa atthassa “**ajjhatickañceva, āvuso, cakkhu**”ntiādinā (ma. ni. 1.306) chadvārasena niddisanaṭṭhāne. **Heṭṭhā parihīnadesananti** – “**yaṃ upādārūpaṃ cattāro arūpino khandhā upari tīpi ariyasaccāni**”ti niddesavasena parihīnaṃ atthajātaṃ sabbaṃ. **Taṃtaṃdvārasenāti** cakkhudvārādikam taṃtaṃdvārasena. Catusaccavasena āradhā desanā

catusacceneva pariyosāpitāti āha “**yathānusandhināva suttantaṃ niṭṭhapesī**”ti.

Mahāhatthipadopamasuttavaṇṇanāya līnatthappakāsanā samattā.

### 9. Mahāsāropamasuttavaṇṇanā

**307. Nacirapakkanteti** na ciraṃ pakkante, pakkantassa sato na cirasseva. **Saliṅgenevāti** muṇḍiyakāsāyaggahaṇādīnā attano purimaliṅgeneva. **Pāṭiyekke jāteti** vipannācāradiṭṭhitāya pakāsānīyakammakaraṇato paraṃ aññatitthiyasadise visuṃ bhūte. **Kulaputtoti** jātimattena kulaputto. **Asambhinnāyāti** sambhedarahitāya, jātisāṅkaravirahitāyāti atto. Jātisīsenā idha jātivatthukaṃ dukkhaṃ vuttanti āha “**otiṇṇoti yassa jāti anto anupaviṭṭhā**”ti. Jāto hi satto jātakā lato paṭṭhāya jātinimittena dukkhena anto anupaviṭṭho viya vibādhiyati. **Jarāyāti**ādīsupi ese va nayo. Cattāro paccayā labbhantīti lābhā, catunnaṃ paccayānaṃ labbhamānānaṃ sukatabhāvo suṭṭhu abhisāṅkhatabhāvo. **Vaṇṇabhaṇananti** guṇakittanaṃ. **Apaññātāti** sambhāvanāvasena na paññātā. Lābhādīnibbattiyābhāvadassanañhetā. Tenāha “**ghāsacchādanamattampi na labhantī**”ti. **Appesakkhāti** appānubhāvā. Sā pana appesakkhatā adhipateyyasampattiyā ca parivārasampattiyā ca abhāvena pākāṭā hoti. Tattha parivārasampattiyā abhāvaṃ dassento “**appaparivārā**”ti āha.

Sārenapi keci ajānanena aññālābhena vā asārabhūtampi kattabbaṃ karontīti tato visesanatthaṃ “sārena sarakaraṇīya”nti vuttanti taṃ dassento “**akkhacakkayuganaṅgalādika**”nti āha. **Brahmacariyassāti** sikkhāttaya saṅgahassa sāsana brahmacariyassa. Mahārukkhassa maggaphalasārassa ñānadassanapheggukassa samādhītacassa sīlapapaṭīkassa cañcalasabhāvā saṃsappacārīti ca **cattāro paccayā sākhāpalāsaṃ nāma. Tenevāti** lābhasakkārasilokanibbattaneneva. **Sāro me pattoti** imasmiṃ sāsane adhi gantabbasāro nāma iminā lābhādīnibbattanena anuppattoti vosānaṃ niṭṭhitakiccaṃ āpanno.

**310. Nānadassananti** ñānabhūtaṃ dassanaṃ visayassa sacchikaraṇavasena pavattaṃ abhiññāñānaṃ. **Sukhumaṃ rūpanti** devādīnaṃ, aññampi vā sukhumasabhāvaṃ rūpaṃ. Tenāha “**antamaso...pe... viharantī**”ti, dibbacakkhu hi idha ukkaṭṭhaniddesena “ñānadassana”nti gahitaṃ.

**311. Asamayavimokkhaṃ ārādhētīti** ettha adhippettaṃ asamayavimokkhaṃ pāḷiyā eva dassetaṃ “**katamo asamayavimokkho**”tiādi vuttaṃ. Aṭṭhannañhi samāpajjanasamayopi atthi asamayopi, maggavimokkhena pana vimuccanassa samayo vā asamayo vā natthi. Yassa saddhā balavatī, vipassanā ca āraddhā, tassa gacchantassa tiṭṭhantassa nisīdantassa bhūñjantassa ca maggaphalapaṭivedho nāma na hotīti na vattabbaṃ, iti maggavimokkhena vimuccantassa samayo vā asamayo vā natthīti so **asamayavimokkho**. Tenāha “**lokiyasamāpattiyo hī**”tiādi.

Na kuppati, na nassatīti **akuppā**, kadācīpi aparihānasabhāvā. Sabbasaṃkilesehi paṭippassaddhivasena cetaso vimuttīti **cetovimutti**. Tenāha “**arahattaphalavimutti**”ti. Ayamatto payojanaṃ etassāti **etadatthaṃ**, sāsana brahmacariyaṃ, tassa **esā** paramakoṭī. Yathāraddhassa sāropamena phalena desanā niṭṭhāpitāti āha “**yathānusandhināva desanaṃ niṭṭhapesī**”ti. Yaṃ panettha atthato avibhattaṃ, taṃ suviññeyyameva.

Mahāsāropamasuttavaṇṇanāya līnatthappakāsanā samattā.

### 10. Cūlasāropamasuttavaṇṇanā

**312. Piṅgaladhātukoti** piṅgalasabhāvo piṅgalacchaviko, piṅgalakkhoti vā attho. **Pabbajitasamūhasaṅkhāto saṅgho**, na sīlādiguṇehi saṅgahitabbabhāvena. Saṅgho etesaṃ atthi parivārabhūtoti **saṅghino. Sjevāti** so eva pabbajitasamūhasaṅkhāto. **Ācārasikkhāpanavasena**ti attanā parikappitaacelavatādiācārasikkhāpanavasena. **Paññātāti** yathāsakaṃ samādinnavatavasena ceva



viññātaladdhivasena ca paññātā. **Laddhikarāti** tassā micchādiṭṭhiyā uppādakā. **Bahujanassāti** puthujanassa. Tassa pana āgamasampadāpi nāma natthi, kuto adhigamoti ekamsato andhaputhujjano evāti āha “**assutavato andhabālaputhujjanassa**”ti. Na hi viññū appasādanīye pasīdanti. Mañgalesu kātābbadāsakiccakaro dāso **mañgaladāso**.

**Tantāvutānanti** tante pasāretvā vītānaṃ. **Gaṇṭhanakilesoti** saṃsāre bandhanakilesō. **Evam vāditāyāti** evaṃ paṭiññātāya, evaṃ diṭṭhitāya vā. **Niyyānikāti** niyyānagatisappāṭihīrakā anupārambhābhūtattāti adhippāyo. No ce niyyānikāti ānetvā yojanā. Tesam sabbaññupaṭiññāya abhūtattā tassā abhūtabhāvakathanena tassa brāhmaṇassa na kāci atthasiddhīti āha “**nesam aniyyānikabhāvakathanena atthābhāvato**”ti.

**318.** Nihīnalokāmise līno ajjhāsayo etassa, na pana nibbāneti. **Līnajjhāsayo. Sāsanaṃ sithilaṃ katvā gaṇhāti** sikkhāya na tibbagāravattā.

**323. Heṭṭhāti** anantarātītasutte mahāsāropame. **Paṭhamajjhānādidhammā vipassanāpādakāti** vipassanāya padaṭṭhānabhūtā. **Idhāti** imasmiṃ cūlasāropame āgatā. **Nirodhapādakāti** anāgāmino, arahanto vā nirodhasamāpattiṃ samāpajjituṃ samatthā. **Tasmāti** nirodhapādakattā. Paṭhamajjhānādidhammā ñāṇadassanato **uttaritarāti** veditabbā.

Cūlasāropamasuttavaṇṇanāya līnatthappakāsanā samattā.

Niṭṭhitā ca opammavaggavaṇṇanā.

## 4. Mahāyamakavaggo

### 1. Cūlagosiṅgasuttavaṇṇanā

**325.** Nātīnaṃ (a. ni. ṭi. 3.6.19) nivāsattānabhūto gāmo ñātiko, so eva **nātiko**. So kira gāmo yesaṃ santako, tesam pubbapurisena attano ñātīnaṃ sādharāṇabhāvena nivesito, tena “nātiko”ti paññāyittha. Atha pacchā tattha dvīhi dāyādehi dvidhā vibhajitvā paribhutto. Tenāha “**dvinnaṃ cūlapitimahāpitiputtānaṃ dve gāmā**”ti. Giñjakā vuccanti iṭṭhakā, giñjakāhiyeva kato āvasatho **giñjakāvasatho**. Tasmim kira padese mattikā sakkharamarumbavālikādīhi asammissā akaṭṭhinā saṇhā sukhumā, tāya katāni kulālabhājanānīpi silāmayāni viya daḷhāni, tasmā te upāsakā tāya mattikāya dīghaputhulaitṭhakā kāretvā tāhi ṭhapetvā dvārabāhavātapānakavāṭatūlayo sesam sabbam dabbasambhārena vinā iṭṭhakāhi eva pāsādaṃ kāresuṃ. Tenāha “**iṭṭhakāhevā**”tiādi.

**Gosiṅgasālavanadāyanti** gosiṅgasālavananti laddhanāmaṃ rakkhitaṃ araññaṃ. **Jeṭṭhakarukkhassāti** vanappatibhūtassa sālarukkhassa. **Sāmaggirasanti** samaggabhāvādiguṇaṃ vivekasukhaṃ. **Uparipaṇṇāsake** upakkilesasutte (ma. ni. 3.237-238) puthujjanakālo kathito, **idha** cūlagosiṅgasutte **khīṇāsavakālo kathito**. Katakiccāpi hi te mahātherā attano diṭṭhadhammasukhavihāraṃ paresam diṭṭhānugatiṃ āpajjanañca sampassantā paramaṇca vivekaṃ anubrūhantā sāmaggirasam anubhavamānā tattha viharanti. **Tadāti** tasmim upakkilesasuttadesanākāle. **Teti** anuruddhappamukhā kulaputtā. **Laddhassādāti** vipassanāya vīthipaṭipattiya adhigatassādā. Vipassanā hi pubbenāparaṃ vīsesam āvahantī pavattamānā sātīsayam pīṭisomanassam āvahati. Tenāha bhagavā –

“Yato yato sammasati, khandhānaṃ udayabbayaṃ;  
Labhati pīṭipāmojjaṃ, amataṃ taṃ vijānata”nti. (dha. pa. 374);

**Laddhapatiṭṭhā** maggaphalādhigamanena. Sati hi maggaphalādhigame sāsane patiṭṭhā laddhā

nāma hoti, no aññathā.

Kāmaṃ sārīputtamoggallānāpi mahāsāvaka-pariyāpannāva, aggasāvaka-bhāvena pana nesaṃ visesadassanattamaṃ “**dhammasenāpatimahaṃoggallānattheresu vā**”ti visuṃ gahaṇaṃ. Satipi hi sāmāññayoge visesavanto visuṃ gayhanti yathā “brāhmaṇā āgata, vāsīṭṭhōpi āgato”ti. Tesu pana visuṃ gahitesupi “**asītimahāsāvakesū**”ti **asītiggaṇaṃ** appakaṃ ūnamadhikaṃ vā gaṇanupagaṃ na hotīti. **Antamasoti** idaṃ dhamma-bhaṇḍāgārikassa upaṭṭhāka-bhāvena āsanna-cāritāya vuttaṃ. **Anīkāti** hatthānīkā, hatthānīkato hatthisamūhatoti attho. Kālasīho yebhuyyena yūthacaroti katvā vuttaṃ “**yūthā nissaṭṭo kālasīho viyā**”ti. Kesarī pana ekacarova. **Vātacchinno valāhako viyāti** vātacchinno pabbatakūṭappamāṇo valāhacchedo viya. **Tesaṃ paggaṇhanatoti** yathā nāma jighacchitassa bhojane, pipāsītassa pānīye, sītena phuṭṭhassa unhe, unhena phuṭṭhassa sīte, dukkhitassa sukhe abhiruci uppajjati, evamevaṃ bhagavato kosambake bhikkhū aññamaññaṃ vivādāpanne disvā apare samaggāvāsaṃ vasante āvajjitassa ime tayo kulaputtā āpāthaṃ āgamiṃsu, atha ne paggaṇhitukāmo upasaṅkami, evāyaṃ paṭipattianukkamena kosambakānaṃ bhikkhūnaṃ vinayanupāyo hotīti. Tenāha “tesaṃ paggaṇhanato”ti. Eteneva **pacchimajanataṃ anukampanatoti** idampi kāraṇaṃ ekadesena saṃvaṇṇitanti daṭṭhabbaṃ. **Ukkaṃsitvāti** yathābhūtehi guṇehi sampahaṃsanena visesetvā visiṭṭhe katvā pasamsāvasena cetamaṃ āmedītavacanaṃ.

**Taṃ araññaṃ rakkhati** vanasāminā ānatto. Rakkhitagopitaṃ vanasaṇḍaṃ, na mahāvanādi viya apariggahitaṃ. Sīlādippabhedāya attatthāya paṭipannā **attakāmā**, na apariccattasinehāti āha “**attano hitaṃ kāmayamānā**”ti. Tenāha “**yo hī**”tiādi. **Bhindeyyāti** vināseyya.

**Dubbalamanussāti** paññāya dubbalā aviddasuno manussā. **Tānīti** abhijātiādīsu uppannapāṭihāriyāni. **Cīvaragabbhena paṭicchādetvāti** cīvarasaṅkhāte ovarake nigūhitvā viya. Na hi cīvarapārūpanamattena buddhānubhāvo paṭicchanno hoti. “Mā sudha kocimaṃ buddhānubhāvaṃ aññāsī”ti pana tathārūpena iddhābhisaṅkhārena taṃ chādetvā gato bhagavā tathā vutto. Tenāha “**aññātakavesena agamāsī**”ti.

**Abhikkamathāti** padaṃ abhimukhabhāvena vidhimukhena vadaṭṭī āha “**ito āgacchathā**”ti. Buddhānaṃ kāyo nāma suvisuddhajātimaṇi viya sobhano, kiñci malaṃ apañetabbaṃ natthi, kimatthaṃ bhagavā pāde pakkhālesīti āha “**buddhāna**”ntiādi.

**326. Anuruddhāti** vā ekasesanayena vuttaṃ virūpekasesassapi icchitabbatā, evaṇca katvā bahuvacananiddesopi samatthito hoti. **Iriyāpatho khamatīti** sarīrassa lahuṭṭhānatāya catubbidhōpi iriyāpatho sukhappavattiko. **Jīvitaṃ yāpetīti** yāpanālakkhaṇaṃ jīvitaṃ imaṃ sarīrayantaṃ yāpeti sukkena pavatteti. **Uḷūṅkayāgum vā kaṭacchubhikkhaṃ vāti** idaṃ makaravuttīyā missakabhāttena yāpanaṃ vattanti katvā vuttaṃ. Tenāha “**bhikkhācāravattaṃ pucchati**”ti.

**Aññamaññaṃ saṃsandatīti** satipi ubhayesaṃ kalāpānaṃ paramatthato bhede pacurajanehi duviññeyyanānattaṃ khīrodakasammoditaṃ accantameva saṃsaṭṭhaṃ viya hutvā tiṭṭhati. Tenāha “**visuṃ na hoti, ekattaṃ viya upeti**”ti. Piyabhāvadīpanāni cakkhūni **piyacakkhūni**. Piyāyati, piyāyitabboti vā **piyoti**. Samaggāvāsassa yaṃ ekantakāraṇaṃ, taṃ pucchanto bhagavā “**yathā kathaṃ panā**”tiādimāhāti “**kathanti kāraṇapucchā**”ti vuttaṃ. Yo nesaṃ mettāsahitānaṃyeva kammādīnaṃ aññamaññaṃ paccupaṭṭhānākāro, taṃ sandhāya “**katha**”nti pucchā. Tathā hi parato “evaṃ kho mayamaṃ, bhante”tiādinā therehi vissajjanaṃ kathitaṃ.

Mittaṃ etassa atthīti **mettaṃ**, kāyakammaṃ. **Āvīti** pakāsaṃ. **Rahoti** appakāsaṃ. Yañhi uddissa mettaṃ kāyakammaṃ paccupaṭṭhapeti, taṃ tassa sammukhā ce, pakāsaṃ hoti, parammukhā ce, appakāsaṃ. Tenāha “**āvi ceva raho cāti sammukhā ceva parammukhā cā**”ti. **Itarānīti** parammukhā kāyavacīkammāni. “**Tatthā**”tiādinā saṅkhepato vuttamatthaṃ vivarituṃ “**yaṃ hī**”tiādi vuttaṃ. Sammajjanādivasena **paṭijaggitabbayuttaṃ ṭhānaṃ vā**. **Tathevāti** yathā sammukhā kate

mettākāyakamme vuttaṃ, tatheva. “Kacci khamanīya”nti evamādikā kathā **sammodanīyakathā**. Yathā parehi saddhiṃ attano chiddaṃ na hoti, tathā paṭisanthāravasena pavattā kathā **paṭisanthārakathā**. “Aho tadā therena mayhaṃ dinno ovādo, dinnā anusāsani”ti evaṃ kālantare saritabbayuttā, chasāraṇīyapaṭisaṃyuttā vā kathā **sāraṇīyakathā**. Suttapadaṃ nikkhipitvā tassa atthaniddeśavasena silādidhammapaṭisaṃyuttā kathā **dhammīkathā**. Sarena suttassa uccāraṇaṃ **sarabhaññaṃ**. Pañhassa ñātum icchitassa atthassa pucchanaṃ **pañhapucchanaṃ**. Tassa yathāpucchitassaādīsaṇaṃ **pañhavissajjanaṃ**. **Evaṃ samannāharatoti** evaṃ manasikaroto, evaṃ mettaṃ upasaṃharatoti attho.

Ekato kātum na sakkā, tasmā **nānā**. **Hitatṭhenāti** attano viya aññamaññaṃ hitabhāvena. **Nirantarattṭhenāti** antarābhāvena bhedābhāvena. **Aviggahattṭhenāti** avirodhabhāvena. **Samaggaṭṭhenāti** sahitabhāvena. **Paribhaṇḍaṃ katvāti** bahalatanumattikālepehi limpetvā. **Cīvaraṃ vā dhovantī** attano cīvaraṃ vā dhovanti. **Paribhaṇḍaṃ vāti** attano paṇṇasālāya paribhaṇḍaṃ vā karonti.

**327. Paṭiviruddhā evāti** etthāpi “yebhuyenā”ti padaṃ ānetvā sambandhitabbaṃ. **Tesaṃ appamādalakkhaṇanti** tesaṃ appamajjanasabhāvaṃ. **Kacci pana vo anuruddhā samaggāti** etthāpi voti nipātamattaṃ, paccattavacanaṃ vā, kacci tumheti evamattho veditabbo. **Samuggapātinti** samuggapuṭasadiṣaṃ pātiṃ.

Paṇṇasālāyaṃ anto bahi ca sammajjanaṃ sodhitaṅgaṇatā **vattapaṭipatti**. **Paṭivisaṃmattamevāti** attano yāpanapaṭivisaṃmattameva. **Osāpetvāti** pakkhipitvā. **Pamāṇamevāti** attano yāpanapamāṇameva. **Vuttanayena jahitvāti** pāḷiyaṃ vuttanayena jahitvā.

**Hatthena hatthaṃ saṃsibbantāti** attano hatthena itarassa hatthaṃ daḥhaggahaṇavasena bandhantā. Vilaṅgheti desantaraṃ pāpeti etenāti vilaṅghako, hattho. Hattho eva vilaṅghako hatthavilaṅghako, tena **hatthavilaṅghakena**.

**Taṃ akhaṇḍaṃ katvāti** taṃ tīsupi divasesu dhammassavanaṃ pavattanavasena akhaṇḍikaṃ katvā. **Etanti** “pañcāhikaṃ kho panā”tiādivacanaṃ. Pañcame pañcame ahani bhavātīti **pañcāhikaṃ**. **Bhagavatā pucchitena** anuruddhattherena. **Pamādaṭṭhānesuyevāti** aññesaṃ pamādaṭṭhānesuyeva. “**Pamādaṭṭhānesuyevā**”ti vuttamevatthaṃ pākāṭataraṃ kātum “**aññesañhi**”tiādi vuttaṃ. **Papañcakaraṇaṭṭhānānīti** kathāpapañcassa karaṇaṭṭhānāni viṣaṭṭhakathāpavattanena kammatṭhāne pamajjanaṭṭhānāni. Tatthāpi “mayāṃ, bhante, kammatṭhānaviruddhaṃ na paṭipajjāmā”ti sikhāpattaṃ attano appamādalakkhaṇaṃ thero dasseti. **Ettakaṃ ṭhānaṃ muñcivāti** pana idaṃ tadā vihārasamāpattīnaṃ vaḷañjābhāvena vuttaṃ.

**328.** Jhānassa adhippetatā “**alamariyaññadassanaviseso**”iceva vuttaṃ. Attano sammāpaṭipannatāya satthu cittārādhanaṭṭhaṃ tassa ca viṣeṣādhigamassa satthu paccakkhabhāvato thero “**kiñhi no siyā, bhante**”ti āha. **Yāvadevāti** yattakaṃ kālaṃ ekaṃ divasabhāgaṃ vā sakalarattim vā yāva satta vā divase.

**329. Samatikkamāyāti** sammadeva atikkamanāya. Sati hi upari viṣeṣādhigame heṭṭhimajjhānaṃ samatikkantaṃ nāma hoti paṭippassaddhi ca. Tenāha “**paṭippassaddhiyā**”ti. **Ñānadassanavisesoti** kāraṇūpacārena vuttoti veditabbo. **Vedayitasukhatoti** vedanāsahitajjhānasukhato vā phalasukhato vā. **Avedayitasukhanti** nibbānasukhaṃ viya vedanārahitaṃ sukhaṃ. **Avedayitasukhanti** ca nidassanamattametāṃ, taṃ pana aphaṣsaṃ asaññaṃ acetananti sabbacittacetasi karahitameva. Tato ca satipi rūpadhammapavattiyāṃ tassa acetanattā sabbaso saṅkhāradukkhavirahitatāya santatarā paṇītatarā ca nirodhasamāpattīti vuccate. Tenāha “**avedayitasukhaṃ santataraṃ paṇītatarā hoti**”ti. Tena vuttaṃ “imamhā cā”tiādi.

**330. Sāmaggirasānisamsameva nesam bhagavā kathesi** ajjhāsayaṇukūlattā tassa. **Anusāvetvāti**

anupagamanavasena sammadeva ārocetvā. “Anusamsāvetvā”ti vā pāṭho, so evattho. **Tato paṭṇivattitvā**ti etarahi bhagavato ekavīhāre ajjhāsāyoti satthu maṇaṃ gaṇhantā “idheva tiṭṭhathā”ti vissajjitaṭṭhānato nivattitvā. **Pabbajjādīnīti ādi**-saddena upasampadā-visuddhi-dhutakammaṭṭhānānuyoga-jhānavimokkha-samāpatti-ñāṇadassana-maggabhāvanā-phalāsacchikiriyādike saṅgaṇhāti. **Adhigantvāpī pi**-saddena yathādhigatānampi. **Attano guṇakathāya aṭṭiyamānāti** bhagavantaṃ nissāya adhigantvāpī dhammādhikaraṇaṃ satthuvihesābhāvādīpane bhagavato pākātaguṇānaṃ kathāya aṭṭiyamānāpīti yojanā. **Devatāti** taṃtaṃsamāpattilābhiniyo devatā. **Mukhaṃ me sajjanti** mukhaṃ me kathane samatthaṃ, kathane yogyanti attho.

**331. Evaṃ āgatoti** evaṃ āṭānāṭiyasutte āgato. **Paliveṭṭenteti** codente. **Maccharāyantīti** attano guṇānaṃ bhagavatopi ārocanaṃ asahamānā maccharāyantīti so cintetīti katvā vuttaṃ.

**01 Tesam lābhāti** tesam vajjirājūnaṃ vajjiraṭṭhavāsīnaṅca manussattaṃ, patirūpadesavāsādiko, bhagavato tiṇṇaṅca kulaputtānaṃ dassanavandanadānadhammassavanādayo lābhā. Suladdhā lābhāti yojanā. **Pasannacittaṃ anussareyyāti** taṃ kulaṅhettaṃ silādiguṇe cittaṃ pasādetvā anussareyya. Vuttaṃ tesam “anussaraṇampāhaṃ, bhikkhave, tesam bhikkhūnaṃ bahūpakāraṃ vadāmi”ti (itivu. 104; saṃ. ni. 5.184).

Cūlagosiṅgasuttavaṇṇanāya līnatthappakāsānā samattā.

## 2. Mahāgosiṅgasuttavaṇṇanā

**332. Kocidevāti** gosiṅgasālavanāsāmantato niviṭṭhesu yo koci gāmo gocaraḡāmo bhavissati, tasmā anibaddhabhāvato gocaraḡāmo na gahito, vasanaṭṭhānameva paridīpitaṃ, tato eva araṇṇānidānaḡaṃ nāmetaṃ. **Sabbatthāti** devaloke manussaloke ca. **Thirakārakehīti** sāsane thirabhāvakārakehi. **Savanante jātattāti** catusaccagabbhassa dhammassavanassa pariyoṣāne ariyāya jātiyā jātattā. Yathā paṭivedhabāhusaccaṃ ijjhāti, tathā dhammassa savanato sāvakā. **Sūriyo viya** bhāsuraḡuṇaraṃsitāya mohandhakāravidhamanato. **Cando viya** ramaṇīyamanoharasītalagaṇatāya kilesapariḡāhavūpasamato. **Sāgaro viya** gambhīrathiravipulānekagaṇatāya ṭhitadhammasabhāvato. Guṇamahantaṭāya therassa abhiññātātā, guṇamahantaṭā ca suttesu āgatanayeneva ñātābbāti taṃ vitthārato dassetuṃ “**na kevala**”ntiādi vuttaṃ. **Sīhanādasuttanti** majjhimanikāye āgataṃ mahāsīhanādasuttaṃ (ma. ni. 1.146). **Therapaṇhasuttanti** suttanipāte aṭṭhakavagge āgataṃ **sāriputtasuttaṃ** (su. ni. 961-981). **Therasīhanādasuttanti** imassa ca therassa janapadacārikāya satthu sammukhā **sīhanādasuttaṃ**. **Abhinikkhamananti** therasseva mahatā ñātiparivaṭṭena mahatā ca bhogaḡarivaṭṭena saha gharāvāsapaḡiccāgo abhinikkhamanaṃ. Esa nayo ito paresupī. **Yadidanti** nipāto, yo ayanti attho.

**Mahāpaṇṇe bhikkhū gahetvāti** āyasmato kira sāriputtattherassa parivārabhikkhūpi mahāpaṇṇā eva ahesuṃ. Dhātuso hi sattā saṃsandanti. **Sayaṃ iddhimāti**ādīsūpi eseḡa nayo. Ayaṃ panattho **dhātusamḡuttena** (saṃ. ni. 2.99) dīpetabbo – giḡjhakūṭapabbate giḡlānaseyyāya nisinna bhagavā ārakkhatthāya parivāretvā vasantesu sāriputtamoggallānādīsū ekamekaṃ attano paḡisāya saddhiṃ caṅkamantaṃ voloketvā bhikkhū āmantesi – “passatha no tumhe, bhikkhave, sāriputtaṃ sambahulehi bhikkhūhi saddhiṃ caṅkamantanti. Evaṃ, bhante. Sabbe kho ete, bhikkhave, bhikkhū mahāpaṇṇā”ti sabbaṃ vitthāretabbaṃ.

**Vananteti** upavanante. **Meghavaṇṇāyāti** nīlābhāya. Samuddakucchito uggacchantassa viya upaṭṭhānaṃ sandhāya vuttaṃ. Cakkavāḡapabbatamatthakasamīpe ābhāpharaṇavasena pavattiyā “**pācīnacakkavāḡapabbatamatthake**”ti vuttaṃ, na cakkavāḡapabbatamatthake candamaṇḡalassa vicaraṇato. Tathā sati lokantarikanirayesūpi candimasūriyānaṃ ābhā phareyya. Ubbedhavasena hi cakkavāḡapabbatassa vemajjhato candimasūriyā vicaranti. Sālakusumapabhānaṃ atirattatāya vuttaṃ “**lākhārasena siṅcamānaṃ viyā**”ti. **Upagāyamānā viyāti** payirupāsanaḡasena upecca gāyamānā viya. **Kāya nu kho ajja ratiyāti** ajja jhānasamāḡattiratiyā eva nu kho, udāhu dhammasākacchāratiyā

dhammadesanāratiyāti cintesi.

**Dve candamaṇḍalāni viya** paramasobhaggappattāya kantiyā. **Dve sūriyamaṇḍalāni viya** ativiya suvisuddhasamujjalāya guṇavibhūtiyā. **Dve chaddantanāgarājāno viya** mahānubhāvātāya. **Dve sihā viya** tejjussadatāya. **Dve byagghā viya** anolīnavuttitāya. **Sabbapāliphullamevāti** sabbameva samantato vikasitaṃ.

**333.** Kathā upacarati pavattati etthāti kathāupacāro, savanūpacāro padeso, taṃ **kathāupacāraṃ**. Ramaṇīyameva **rāmaṇeyyakam**. **Ujjaṅgaleti** lūkhapadese kaṭhinapadese. Dosehi itā apagatāti **dosinā** ta-kārassa na-kāraṃ katvā. **Dibbā maññe gandhāti** devaloke gandhā viya. Divi bhavāti **dibbā**. **Dve therāti** sārīputtattherānandattherā. Ānandatthero tāva mamāyatu akhīṇāsavabhāvato, sārīputtatthero kathanti? Na idaṃ mamāyanaṃ gehassitapemavasena, atha kho guṇabhattivasenāti nāyaṃ doso.

Anumatiyā pucchā **anumatipucchā**, anumatiḅgahaṇatthaṃ pucchanaṃ. Tattha yasmā adhammikampi vuddhassa anumatiṃ itaro paṭikkhipitum na labhati, tena sā anujānitabbāva hoti, tasmā saṅghakhuddakato paṭṭhāya anumati pucchitabbā. Tenāha “**anumatipucchā nāmesā**”tiādi. **Khuddakato paṭṭhāyāti** kaṇiṭṭhato paṭṭhāya. Paṭiḅhāti upaṭṭhātīti paṭiḅhānaṃ, yathādhīppetato attho, **taṃ paṭiḅhānaṃ**. **Sikhāppattā vepullappattā na bhavissati** padesaññe ṭhitehi bhāsittā. **Sikhāppattā vepullappattā bhavissati** sabbaññutaññāṇena saṃsanditattā. Vuttamevatthaṃ upamāya vibhāvetum “**yathā hī**”tiādi vuttaṃ. Tattha paccatthikā aṭṭiyanti dukkhāyanti etenāti **aṭṭo**, vinicchitabbavohāro. **Gāmabhojakanti** yasmīṃ gāme so uppanno, taṃ gāmabhojakam. **Janapadabhojakanti** yasmīṃ janapade so uppanno, taṃ janapadabhojakam. **Mahāvinicchayaamaccanti** yasmīṃ rajje so janapado, tassa rājadhāniyaṃ mahāvinicchayaamaccam. **Senāpatinti** yassa rañño so amacco, tassa senāpatiṃ. Tathā **uparājanti**. Idaṃ panettha pakaticārittavasena vuttaṃ upameyyatthānurūpatoti daṭṭhabbaṃ. **Aparāparaṃ na sañcarati** vinicchayanārahena vinicchitabhāvato.

Pakaṭṭhānaṃ (a. ni. ṭī. 2.4.22) ukkaṭṭhānaṃ sīlādiatthānaṃ bodhanato, sabhāvaniruttivasena buddhādīhi bhāsittā ca pakaṭṭhānaṃ vacanappabandhānaṃ ālīti **pāli**, pariyattidhammo. Purimassa atthassa pacchimena atthena anusandhānaṃ **anusandhi**. Atthamukhena pana pālīpadesānampi anusandhi hotiyeva, so ca pubbāparānusandhi-pucchānusandhi-ajjhāsayaṇusandhi-yathānusandhivasena catubbidho. Taṃtaṃdesanānaṃ pana pubbāparasamsandanam **pubbāparaṃ**. Pālīvasena anusandhivasena pubbāparavasenāti paccekam yojetabbaṃ. **Uggahitanti** byañjanaso atthaso ca uddham uddham gahitaṃ, pariyāpuṇanavasena ceva paripucchāvasena ca hadayena gahitanti attho. Vaṭṭadukkhānissaraṇatthikehi sotabbato sutam, pariyattidhammo, taṃ dhāretīti **sutadharo**. Yo hi sutadharo, sutam tasmīṃ paṭiṭṭhitaṃ hoti suppaṭiṭṭhitaṃ, tasmā vuttaṃ “**sutassa ādhārabhūto**”ti. Tenāha “**yassa hī**”tiādi. Ekapadaṃ ekakkharampi avinaṭṭhaṃ hutvā sannicīyatīti sannicayo, sutam sannicayo etasminti **sutasannicayo**. **Ajjhosāyāti** anupavisitvā. **Tiṭṭhatīti** na mussati.

**Ṭhitā paguṇāti** paguṇā vācuggatā. **Niccālitanti** aparivattitaṃ. **Samsanditvāti** aññehi saṃsanditvā. **Samanuggāhitvāti** paripucchāvasena atthaṃ ogāhetvā. Pabandhassa vibandhābhāvato **gaṅgāsotasadisam**, “bhavaṅgasotasadisā”nti vā pāṭho, akittimaṃ sukhappavattīti attho. Suttekaadesassa suttassa ca vacasā paricayo idha nādhīppetato, vaggādivasena pana adhippetoti āha “**suttadasaka...pe... sajjhāyitā**”ti, “dasa suttāni gatāni, dasa vaggāgatā”tiādinā sallakkhetvā vācāya sajjhāyitāti attho. Manasā anu anu pekkhitā bhāgaso nijjhāyitā cintitā **manasānupekkhitā**. **Rūpagataṃ viya paññāyatīti** rūpagataṃ viya cakkhussa vibhūtaṃ hutvā paññāyati. **Suppaṭividdhāti** nijjaṭam nigumbaṃ katvā sutṭhu yāthāvato paṭividdhā.

Pajjati attho ñāyati etenāti **padam**, tadeva atthaṃ byañjetīti **byañjananti** āha “**padameva atthassa byañjanato padabyañjana**”nti. Akkharapāripūriyā padabyañjanassa parimaṇḍalatā, sā pana pāripūrī evaṃ veditabbāti āha “**dasavidhabyañjanabuddhiyo aparihāpetvā**”ti. **Aññaṃ upārambhakaranti** yathānikkhattasuttato aññaṃ tassa ananulomakam suttaṃ āharati. **Tadatthaṃ otāretīti** tassa

āhaṭasuttasseva atthaṃ vicāreti. **Tassa kathā aparimaṇḍalā nāma hoti** atthassa aparipuṇṇabhāvato. Yathānikkhattassa suttassa atthasaṃvaṇṇanāvāseneva suttantarampi ānento **bahi ekapadampi na gacchati nāma. Amakkhentoti** avināsento. Taṃ taṃ atthaṃ suṭṭhu vavatthitaṃ katvā dassento **tulikāya paricchindanto viya**. Gambhīrataramatthaṃ gamento **gambhīramātikāya udakaṃ pesento viya**. Uttānamātikāya hi mariyādaṃ ottharivā udakaṃ aññathā gaccheyya. Ekamyeva padaṃ anekehi pariyāyehi punappunaṃ saṃvaṇṇento padaṃ **koṭṭento sindhavājānīyo viya**. So hi vaggitāya gatiyā pade padaṃ koṭṭento gacchati. Kathāmaggena **tassa kathā parimaṇḍalā nāma hoti** dhammato atthato anusandhito pubbāparato ācariyuggahatoti sabbaso paripuṇṇabhāvato.

**Anuppabandhehī**ti vissatṭhehi āsajjamānehi. Nātisīghaṃ nātisaṇikaṃ nirantaraṃ ekarasaṇca katvā parisāya ajjhāsayanurūpaṃ dhammaṃ kathento vissatṭhāya kathāya katheti nāma, na aññathāti dassento “**yo bhikkhū**”tiādīmāha. **Araṇiṃ manthento viya, uṇhakhādanīyaṃ khādanto viyāti** sīghaṃ sīghaṃ kathanassa udāharaṇaṃ, **gahitaṃ gahitamevāti**tiādi laṅghetvā kathanassa. Purāṇapaṇṇantaresu hi paripātiyamānagodhā kadāci dissati, evamekaccassa atthavaṇṇanā katthaci na dissati. **Ohāyāti** ṭhapetvā. **Yopīti**tiādīnā ekarūpena kathāya akathanam dasseti. **Petaggi** nijjhāmataṇhikapetassa mukhato niccharaṇakaaggi. **Vitthāyatīti** appaṭitānatamāpajjati. Kenaci rogena dukkhaṃ patto viya **nitthunanto. Kandanto viyāti** ukkuṭṭhiṃ karonto viya. **Appabandhā nāma hoti** sukhena appavattabhāvato. **Ācariyehi dinnanaye ṭhitoti** ācariyuggahaṃ amuñcanto, yathā ca ācariyā taṃ taṃ suttaṃ saṃvaṇṇesum, teneva nayena saṃvaṇṇentoti attho. **Acchinnadhāraṃ katvāti** “nātisīghaṃ nātisaṇika”ntiādīnā heṭṭhā vuttanayena avicchinnaṃ kathāpabandhaṃ katvā. **Anusayasamugghātāyāti** iminā tassā kathāya arahattapariyosānataṃ dasseti. **Evarūpenāti** nayidaṃ ekavacanaṃ tattakavasena gahetabbaṃ, atha kho lakkhaṇe pavattanti dassento “**tathārūpeneva bhikkhusatena bhikkhusahassena vā**”ti vuttaṃ. **Pallaṅkenāti** pallaṅkapadesena, pallaṅkāsanantenāti attho. **Iminā nayanāti** vārantarasādhāraṇaṃ atthaṃ atidisati, asādhāraṇaṃ pana vakkhatevāti.

334. Āramati etenāti **ārāmo**.

335. **Dhuvasevananti** niyatasevitaṃ. **Pāsādapariveṇeti** pāsādaṅgaṇe. **Nābhiyā patiṭṭhitānanti** nābhiyā bhūmiyaṃ patiṭṭhitānaṃ. **Arantarānīti** aravivarāni taṃtaṃaraṇaṃ vemajjhātṭhānāni.

336. **Samādinnaaraññadhutaṅgo āraññiko**, na araññāvāsamattena.

337. **Na osādentīti** na avasādentī, na avasādanāpekkhā aññamaññaṃ pañhaṃ pucchantīti attho. **Pavattinīti** paguṇā.

338. **Lokuttarā vihārasamāpatti** nāma therassa arahattaphalasaṃpattiyo, pariyāyato pana nirodhasamāpattiyo veditabbā.

339. **Sādhukāro ānandattherassa dinno**. Tenāha bhagavā “yathā taṃ ānandova sammā byākaramāno byākareyyā”tiādi. **Sammāti** suṭṭhu, yathāajjhāsayanti adhippāyo. Yena hi yaṃ yathācittaṃ kathitaṃ, taṃ sammā kathitaṃ nāma hoti. Sampattavasena hi yathākārī tathāvādī sobhati. Tenāha “**attano anucchavikamevā**”tiādi. Bahussuto bhikkhu tattha tattha sutte silādīnaṃ āgataṭṭhāne tesam suviditattā yathānusiṭṭhaṃ paṭipajjamāno tāni paripūretūti āha “**silassa āgataṭṭhāne**”tiādi. Maggādi pasavanāya **vipassanāgabbhaṃ gaṇhāpetvā** paripākaṃ gametvāti attho.

340. “Eseva nayo”ti atidesavasena saṅkhepato vuttamatthaṃ vivaranto “**āyasmā hi revato**”tiādīmāha.

342. **Aparepi nānappakāre kileseti** aparepi nānappakāre dosamohādikilese. **Dhunitvāti** vidhametvā.

**343.** Āyasmā mahāmoggallāno evaṃ byākāsīti sambandho. Sakalampi cakkhuviññāṇavīthigataṃ cittaṃ cakkhuviññāṇanti aggahetvā cakkhusannissitameva pana viññāṇaṃ cakkhuviññāṇaṃ, tadanantaraṃ sampatičchanāṃ, tadanantaraṃ santīraṇantiādinā saṅhaṃ sukhumaṃ atīttarakhaṇavantaṃ **cittantaraṃ** cittaṇānattaṃ. Khandhādīnañca nānattasaṅkhātāṃ **khandhantarādi**. Pathavīkaṣiṇe paṭhamajjhānaṃ samāpajjitvā tatheva tatiyaṃ jhānantiādinā ārammaṇaṃ anukkamitvā jhānasseva ekantarikabhāvena ukkamaṇaṃ **jhānokkantikaṃ** nāma. Pathavīkaṣiṇe paṭhamaṃ jhānaṃ samāpajjitvā puna tadeva tejakasiṇetiādinā jhānaṃ anukkamitvā ārammaṇasseva ekantarikabhāvena ukkamaṇaṃ **ārammaṇokkantikaṃ** nāma. “Paṭhamajjhānaṃ pañcaṅgika”ntiādinā yāva nevasaññānāsaññāyatanaṃ duvaṅgikanti jhānaṅgamattasseva vavatthāpanaṃ **aṅgavavatthānaṃ**. “Idaṃ pathavīkaṣiṇaṃ...pe... idaṃ odātakasiṇa”nti ārammaṇamattasseva vavatthāpanaṃ **ārammaṇavavatthānaṃ**. Pathavīkaṣiṇe paṭhamaṃ jhānaṃ samāpajjitvā tattheva itaresampi samāpajjanaṃ **aṅgasaṅkanti**. Pathavīkaṣiṇe paṭhamaṃ jhānaṃ samāpajjitvā tadeva āpokasiṇeti evaṃ sabbakaṣiṇesu ekasseva jhānassa samāpajjanaṃ **ārammaṇasaṅkanti**. **Ekatovaḍḍhanaṃ ubhatovaḍḍhananti** idaṃ khandhādidesanāyaṃ labbhati. Abhidhammabhājanīye hi vedanākkhandhaṃ bhājento bhagavā tike gahetvā dukesu pakkhipi, duke gahetvā tikesu pakkhipi, idaṃ **ekatovaḍḍhanaṃ**. Tike ca duke ca ubhatovaḍḍhananīhārena kathesi, idaṃ **ubhatovaḍḍhanaṃ**. Evaṃ sesakhandhesu dhātāyatanaḍḍisu ca yathārahaṃ **vibhaṅgappakaraṇe** (vibha. 32-33; 155-156, 183-184) abhidhammabhājanīye āgatanayena veditabbaṃ. Tenāha “**ābhidhammikadhammakathikasessa pākaṭa**”nti. Khandhādīsu sabhāvadhammesu tīsu lakkhaṇesu paññattiyaṃ samayantaresu ca kosallābhāvato **ayaṃ sakavādo ayaṃ paravādoti na jānāti**. Tato eva **sakavādaṃ...pe... dhammantaraṃ viṣaṃvādeti**. Khandhādīsu pana kusalatāya **ābhidhammiko sakavādaṃ...pe... na viṣaṃvādeti**.

**344. Cittaṃ attano vase vattetuṃ sakkoti** paṭisaṅkhānabhāvanābalehi pariggaṇhanasamatthattā. Idāni tamatthaṃ byatirekato anvayato ca vibhāvetuṃ “**duppañño hī**”tiādimāha. Tattha **sabbānassāti** sabbāni assa. **Visevitavipphanditānīti** kilesavisūkāyikāni ceva duccharitavipphanditāni ca. **Bhañjitvāti** madditvā. **Bahīti** kammaṭṭhānato bahi puthuttārammaṇe.

**345. Pariyāyenāti** ettha **pariyāya**-saddo “atthi khvesa, brāhmaṇa, pariyāyo”tiāḍisu (a. ni. 8.11; pārā. 3-9) viya kāraṇatthoti āha “**sobhanakāraṇaṃ atthi**”ti. Yadi bhagavā – “idha, sārīputta, bhikkhu pacchābhattaṃ piṇḍapātaṇṭhikānto”tiādinā attano mahābodhipallaṅkaṃ sandhāyāha, evaṃ sante sammāsambuddheheva saṅghārāmo sobhetabbo, na aññehīti āpannanti āha “**apica pacchimaṃ janata**”ntiādi. Nibbānatthāya paṭipattisāraṃ etassāti paṭipattisāro, taṃ **paṭipattisāraṃ**. **Nippariyāyenevāti** kenaci pariyāyena lesena vinā mukhyena nayeneva. Yo “arahattaṃ appatvā na vuṭṭhahissāmī”ti dalhasamādānaṃ katvā nisinna taṃ adhigantvāya uṭṭhahati. Evarūpena idaṃ gosiṅgasālavanaṃ sobhati, sāsane sabbārambhānaṃ tadatthattāti attho. Āsavakkhayāvahaṃ paṭipattiṃ ārabhitvā āsavakkhayeneva desanāya pariyoṣāpitattā **yathānusandhināva desanaṃ niṭṭhapesīti**.

Mahāgosīṅgasuttavaṇṇanāya līnatthappakāsanā samattā.

### 3. Mahāgopālakasuttavaṇṇanā

**346. Tatthāti** gopālakasutte. **Tisso kathāti** (a. ni. ṭī. 3.11.17) tisso aṭṭhakathā, tividhā suttassa atthavaṇṇanāti attho. Ekekaṃ padaṃ nālaṃ mūlaṃ etissāti evaṃsaññitā **ekanālikā**, ekekaṃ vā padaṃ nālaṃ atthaniggamanamaggo etissāti **ekanālikā**. Tenāha “**ekekapadassa atthakathana**”nti. Cattāro aṃsā bhāgā atthasallakkhaṇūpāyā etissāti **caturassā**. Tenāha “**catukkaṃ bandhitvā kathana**”nti. Niyamato nisinnassa āraddhassa vatto saṃvatto etissā atthīti **nisinnavattikā**, yathāāraddhassa atthassa viṣuṃ viṣuṃ pariyoṣāpikāti attho. Tenāha “**paṇḍitaṃ gopālakam dassetvā**”tiādi. **Ekekapadassāti** piṇḍatthadassanavasena bahunnaṃ padānaṃ ekajjhaṃ atthaṃ akathetvā ekamekassa padassa atthavaṇṇanā. Ayaṃ sabbattheva labbhati. **Catukkaṃ bandhitvāti** kaṇhapakkhe upamūpameyyadvayaṃ, tathā sukkapakkheti idaṃ catukkaṃ yojetvā. Ayaṃ īdisesu eva suttasu labbhati. **Pariyoṣānagamananti** keci tāva āhu – “kaṇhapakkhe upamaṃ dassetvā upamā ca nāma yāvadeva





utucittāhāarakammavasena **catusamuṭṭhānaṃ**. Upacayo santati jaratā rūpassa aniccatāti **ettakaṃ** rūpaṃ **na kutoci samuṭṭhātīti na jānāti**. **Samuṭṭhānato rūpaṃ ajānantoti**tiādīsu vattabbaṃ “gaṇanato rūpaṃ ajānanto”tiādesu vuttanayeneva veditabbaṃ.

**Kammalakkhaṇoti** attanā kataṃ duccharitakammaṃ lakkhaṇaṃ etassāti kammalakkhaṇo, bālo. Vuttañhettaṃ – “tīṇimāni, bhikkhave, bālassa bālalakkhaṇāni. Katamāni tīṇi? Duccintitacintī hoti, dubbhāsītabhāsī, dukkaṭṭakammakārī. Imāni kho...pe... lakkhaṇāni”ti (a. ni. 3.2; netti. 116). Attanā kataṃ sucaritakammaṃ lakkhaṇaṃ etassāti **kammalakkhaṇo**, paṇḍito. Vuttampi cetaṃ – “tīṇimāni, bhikkhave, paṇḍitassa paṇḍitalakkhaṇāni. Katamāni tīṇi? Sucintitacintī hoti, subhāsītabhāsī, sukatakammakārī. Imāni kho...pe... paṇḍitalakkhaṇāni”ti (ma. ni. 3.253; a. ni. 3.3; netti. 116). Tenāha **“kusalākusalaṃ kammaṃ paṇḍitamālakkhaṇa”**nti. **Bāle vajjetvā paṇḍite na sevātīti** yaṃ bālapuggale vajjetvā paṇḍitasevanaṃ atthakāmena kātābbaṃ, taṃ na karoti. Tathābhūtaṃ ayamādīnavoti dassetuṃ puna **“bāle vajjetvā”**tiādi vuttaṃ. Tattha yaṃ bhagavatā “idaṃ vo kappatī”ti anuññātaṃ, tadanulomañce, taṃ **kappiyaṃ**. Yaṃ “idaṃ vo na kappatī”ti paṭikkhittaṃ, tadanulomañce, taṃ **akappiyaṃ**. Yaṃ kosallasambhūtaṃ, taṃ **kusalaṃ**, tappaṭipakkaṃ **akusalaṃ**. Tadeva **sāvajjaṃ**, kusalaṃ **anavajjaṃ**. Āpattito ādito dve āpattikkhandhā **garukaṃ**, tadaññaṃ **lahukaṃ**. Dhammato mahāsāvajjaṃ **garukaṃ**, appasāvajjaṃ **lahukaṃ**. Sappaṭikāraṃ **satekiccaṃ**, appaṭikāraṃ **atekiccaṃ**. Dhammatānugataṃ **kāraṇaṃ**, itaraṃ **akāraṇaṃ**. **Taṃ ajānantoti** kappiyākappiyaṃ garukalahukaṃ satekicchātekkiccaṃ ajānanto suvisuddhaṃ katvā sīlaṃ rakkhitaṃ na sakkoti, kusalākusalaṃ sāvajjanavajjaṃ kāraṇākāraṇaṃ ajānanto khandhādīsu akusalatāya rūpārūpapariggahampi kātuṃ na sakkoti, kuto tassa kammaṭṭhānaṃ gahetvā vaḍḍhanā. Tenāha **“kammaṭṭhānaṃ gahetvā vaḍḍhetuṃ na sakkoti”**ti.

Govaṇasadise attabhāve uppajjitvā tattha dukkhuppattihetuto micchāvitakkā āsāṭikā viyāti **āsāṭikāti** āha **“akusalavitakkaṃ āsāṭikaṃ ahāretvā”**ti.

“Gaṇḍoti kho, bhikkhave, pañcannetaṃ upādānakkhandhānaṃ adhivacana”nti vacanato (a. ni. 8.56) chahi vaṇamukhehi vissandamānayūso gaṇḍo viya pilotikakhaṇḍena chahi dvārehi vissandamānakilesāsuci attabhāvavaṇo satisaṃvarena pidahitabbo, ayaṃ pana evaṃ na karotīti āha **“yathā so gopālako vaṇaṃ na paṭicchādeti, evaṃ saṃvaramaṃ na sampādetī”**ti.

Yathā dhūmo indhanaṃ nissāya uppajjamāno saṅho sukhumo taṃ taṃ vivaraṃ anupavissa byāpento sattānaṃ ḍaṃsamakāsādi-parissayaṃ vinodeti, aggijālasamuṭṭhānaṃ pubbaṅgamo hoti, evaṃ dhammadesanāññaṃ indhanabhūtaṃ rūpārūpadhammajātaṃ nissāya uppajjamānā saṅhā sukhumā taṃ taṃ khandhantaraṃ āyatanantarañca anupavissa byāpeti, sattānaṃ micchāvitakkādi-parissayaṃ vinodeti, ñāṇaggijālasamuṭṭhānaṃ pubbaṅgamoti dhūmo viyāti **dhūmoti** āha **“gopālako dhūmaṃ viya dhammadesanādhūmaṃ na karotī”**ti. Attano santikaṃ upagantvā nisinnassa kātābbā tadanucchavikā dhammakathā **upanisinnakathā**. Katassa dānādi-puññaṃ anumodanakathā **anumodanā**. **Tatoti** dhammakathādīnaṃ akaraṇato. **“Bahussuto guṇavā”**ti na jānantīti kasmā vuttaṃ, nanu attano jānāpanatthaṃ dhammakathādi na kātābbamevāti? Saccaṃ, na kātābbameva, suddhāsāyena pana dhamme kathite tassa guṇajānanataṃ sandhāyetaṃ vuttaṃ. Tenāha bhagavā –

“Nābhāsamānaṃ jānanti, missaṃ bālehi paṇḍitaṃ;  
Bhāsāye jotaye dhammaṃ, paggaṇhe isinaṃ dhaja”nti. (saṃ. ni. 2.241);

Taranti etthāti **titthaṃ**, nadītaḷākādīnaṃ nahānādiatthaṃ otaraṇaṭṭhānaṃ. Yathā pana taṃ udakena otiṇṇasattānaṃ sarīramalaṃ pavāheti, parissamaṃ vinodeti, visuddhiṃ uppādeti, evaṃ bahussutā attano samīpaṃ otiṇṇasattānaṃ dhammūdakena cittamalaṃ pavāhenti, parissamaṃ vinodenti, visuddhiṃ uppādeti, tasmā te titthaṃ viyāti **titthaṃ**. Tenāha **“titthabhūte bahussutabhikkhū”**ti. **Byañjanaṃ kathaṃ ropetabbanti**, bhante, idaṃ byañjanaṃ ayaṃ saddo kathaṃ imasmiṃ atthe ropetabbo, kena pakārena imassa atthassa vācako jāto. “Nirūpetabba”nti vā pāṭho, nirūpetabbaṃ ayaṃ sabhāvanirutti

kathamettha niruḥhāti adhippāyo. **Imassa bhāsītassa ko atthoti saddatthaṃ pucchati. Imasmim̐ ṭhāneti imasmim̐ pālipadese. Pāḷi kiṃ vadetīti bhāvatthaṃ pucchati. Attho kiṃ dīpetīti bhāvatthaṃ vā saṅketatthaṃ vā. Na paripucchatīti vimaticchedanapucchāvasena sabbaso pucchaṃ na karoti. Na paripaṇhatīti pari pari attano ñātuṃ icchaṃ na ācikkhati na vibhāveti. Tenāha “na jānāpetī”ti. Teti bahussutabhikkhū. Vivaraṇaṃ nāma atthassa vibhajitvā kathananti āha “bhājetvā na dassentī”ti. Anuttānikatanti ñānena apākaṭīkatam̐ guyhaṃ paṭicchannaṃ. Na uttānikarontīti sinerumūlakam̐ vālikam̐ uddharanto viya pathavīsandhārodakam̐ vivaritvā dassento viya ca uttānaṃ na karonti. Evaṃ yassa dhammassa vasena bahussutā “tittha”nti vuttā pariyāyato, idāni tameva dhammaṃ nippariyāyato titthanti dassetuṃ “yathā cā”tiādi vuttaṃ. Dhammo hi taranti etena nibbānaṃ nāma taḷākanti “tittha”nti vuccati. Tenāha bhagavā sumedhabhūto –**

“Evaṃ kilesamaladhovaṃ, vijjante amatantaḷe;  
Na gavesati taṃ taḷākam̐, na doso amatantaḷe”ti. (bu. vaṃ. 2.14);

Dhammasseva nibbānassotaraṇatitthabhūtassa otaraṇapakāraṃ ajānanto “**dhammatitthaṃ na jānāti**”ti vutto.

**Pītāpītanti** gogaṇe pītaṃ apītañca gorūpaṃ na jānāti na vindati. Avindanto hi na labhatīti vutto. “**Ānisaṃsaṃ na vindatī**”ti vatvā tassa avindanākāraṃ dassento “**dhammassavanaggam̐ gantvā**”tiādimāha.

**Ayaṃ lokuttaroti** padaṃ sandhāyāha “**ariya**”nti. Paccāsattiñāyena anantaravidhippaṭisedho vā, ariya-saddo vā niddosapariyāyo daṭṭhabbo. **Aṭṭhaṅgikanti** ca visuṃ ekajjhañca aṭṭhaṅgikam̐ upādāya gahetabbam̐, aṭṭhaṅgatā bāhullato ca. Evañca katvā sattaṅgassapi ariyamaggassa saṅgaho siddho hoti.

**Cattāro satipaṭṭhāneti**ādīsu avisesena satipaṭṭhānā vuttā. Tattha kāyavedanācittadhammārammaṇā satipaṭṭhānā lokiyā, tattha sammohaviddham̐sanavasena pavattā nibbānārammaṇā lokuttarāti evaṃ **ime lokiyā, ime lokuttarāti yathābhūtaṃ na pajānāti.**

**Anavasesam̐ duhatīti** paṭiggahaṇe mattam̐ ajānanto kismiñci dāyake saddhāhāniyā kismiñci paccayahāniyā anavasesam̐ duhati. Vācāya abhihāro **vācābhihāro**. Paccayānaṃ abhihāro **paccayābhihāro**.

**Ime amhesu garucittikāraṃ na karontīti** iminā navakānaṃ bhikkhūnaṃ dhammasamapaṭipattiyā abhāvaṃ dasseti ācariyupajjhāyesu pitupemassa anupaṭṭhāpanato. Tena ca sikkhāgāravatābhāvadīpanena saṅgahassa abhājanabhāvaṃ, tena therānaṃ tesu anuggahābhāvaṃ. Na hi sīlādiguṇehi sāsane thirabhāvappattā ananuggahetabbe sabrahmacārī anuggaṇhanti, niratthakam̐ vā anuggahaṃ karonti. Tenāha “**navake bhikkhū**”ti. **Dhammakathābandhanti** paveṇiāgataṃ pakiṇṇakadhammakathāmaggaṃ. Saccasattapaṭisandhipaccayākārapaṭisamyuttaṃ suññatādīpanam̐ **guyhagantham̐. Vuttavipallāsavasenāti** “na rūpaññū”tiādisu vuttassa paṭisedhassa paṭikkhepavasena aggahaṇavasena. **Yojetvāti** “rūpaññū hotīti gaṇanāto vā vaṇṇato vā rūpaṃ jānāti”tiādinā, “tassa gogaṇopi na parihāyati, pañcagorasaparibhogatopi na paribāhiro hotī”tiādinā ca atthaṃ yojetvā. **Veditabboti** tasmim̐ tasmim̐ padese yathārahaṃ attho veditabbo.

Mahāgopālakasuttavaṇṇanāya līnatthappakāsanā samattā.

#### 4. Cūḷagopālakasuttavaṇṇanā

**350. Celukkāhīti** celamayāhi ukkāhi. Ukkabhūtāni celāni etthāti **ukkacelā**, nagaram̐. **Sabbā gaṅgā pākaṭā hutvā paññāyatīti** pakaticakkhussa pākaṭā hutvā upaṭṭhāti, dibbacakkhussa pana

samantacakkhussa vā yattha katthaci nisinnassapi bhagavato pākaṭā hutvā paññāyateva. **Sotthīti** anupaddavo. **Vaḍḍhīti** aparihāni. **Ārogyanti** arogatā ābādhābhāvo.

Magadho janapado nivāso etassāti māgadho, māgadhova **māgadhiko**. Paññāya nāma duṭṭhubhāvo natthi ekantānavajjatāya, tasmā **du**-saddo abhāvavācī “dussīlo”tiādīsu viya, **jāti**-saddo ca sabhāvatthoti āha “**nippaññasabhāvo**”ti. -Saddo ārambhatthoti āha “**patāresīti tāretuṃ ārabhi**”ti paratīraṃ gāvīnaṃ appattattā. **Suvidēhānanti** sundaravidēhānaṃ. Videharatṭhaṃ kira bhūmibhāgadassanasampattiyā ca vanarāmaṇeyyakādīnā ca sundaraṃ. **Āmaṇḍalikaṃ karitvāti** āvatte patitā temaṇḍalākārena paribbhamitvā. Katipayāpi gāvīyo asētvā nadīsotena vūḷhattā vuttaṃ “**avaḍḍhiṃ vināsaṃ pāpuṇṇisū**”ti. Katipayāsūpi hi avasitṭhāsu gāvīsu anukkamenapi siyā gogaṇassa vaḍḍhīti. **Vissamatṭhānanti** parissamavinodanattṭhānaṃ. **Titthā bhattṭhāti** gahetuṃ asamattatāya titthāṃ appattā. **Arogo nāma nāhosīti** lomamattampi asētvā sabbā gāvīyo nadīsote vinaṭṭhāti attho.

Yesu khandhāyatanadhātūsu idha lokasamaññā, te ajānantā “akusalā imassa lokassā”ti vuttāti āha “**idhaloke khandhadhātāyatanesu akusalā achekā**”ti. Ayameva nayo “akusalā parassa lokassā”ti etthāpīti āha “**paralokepi eseva nayo**”ti. Māro ettha dhīyatīti **māradheyyaṃ**. **Māroti** cettha kilesamāro vedītabbo. Khandhābhisaṅkhārā hi tassa pavattanabhāvena gahitā, maccumāro viṣuṃ gahito eva, kilesamāravaseneva ca devaputtamārassa kāmabhāve ādhipaccanti. **Tesanti** ye idhalokādīsu achekā, tesam. Te pana ukkaṭṭhaniddesena dassento āha “**iminā cha satthāro dassitā**”ti.

**351. Balavagāvoti** balavante gorūpe. Te pana dammataṃ upagatagoṇā ceva dhenuyo cāti āha “**dantagoṇe ceva dhenuyo cā**”ti. **Avijātagāvoti na** vijātagāvīyo. **Vacchaketi** khuddakavacche. Appattho hi ayaṃ ka-saddo. Tenāha “**taruṇavacchake**”ti. **Kisābalaketi** dubbale.

**352. Mārassa taṇhāsotaṃ chetvāti** khandhamārasambandhītaṇhāsāṅkhātāṃ sotaṃ samucchinditvā. **Tayo koṭṭhāse khepetvā ṭhitāti** anāgāmino sandhāyāha. **Sabbavāresūti** sakadāgāmisotāpannaatṭhamakavāresu. Tattha pana yathākkamaṃ catumaggavajjhānaṃ kilesānaṃ dve koṭṭhāse khepetvā ṭhitā, ekakoṭṭhāsaṃ khepetvā ṭhitā, paṭhamaṃ koṭṭhāsaṃ khepentoti vattabbaṃ. Dhammaṃ anussaranti, dhammassa vā anussaraṇasīlāti **dhammānusārino**. **Dhammoti** cettha paññā adhippetā. Saddhaṃ anussaranti, saddhāya vā anussaraṇasīlāti **saddhānusārino**.

**Jānatāti** ettha jānanakiriyāvisayassa avisesitattā adhiḅāravasena anavasesaṇeyyavisesā adhippetāti āha “**sabbadhamme jānantenā**”ti. Antosāravirahato abbhuggataṭṭhena ca naḷo viyāti **naḷo**, mānoti āha “**vigatamānanaḷaṃ kata**”nti. **Khemaṃ patthethāti** ettha catūhi yogehi anupaddavattā “khema”nti arahattaṃ adhippetāṃ. **Patthanā** ca chandapatthanā, na taṇhāpatthanāti āha “**kattukamyatāchandena arahattaṃ patthethā**”ti. **Pattāyeva nāma** tassa pattiyā na koci antarāyo. Sotthinā pāragamaṇaṃ uddissa desanaṃ ārabhitvā khemappattiyā desanāya pariyoṣāpitattā **yathānusandhināva desanaṃ niṭṭhāpesīti**.

Cūḷagopālakasuttavaṇṇanāya līnatthappakāsanā samattā.

## 5. Cūḷasaccakasuttavaṇṇanā

**353. Haṃsavaṭṭakacchannenāti** haṃsavaṭṭakapaṭicchannena, haṃsamaṇḍalākārenāti attho.

Vadanti etenāti vādo, maggo. Kiṃ vadanti? Uttaraṃ. Vādānaṃ satāni **vādasatāni**. “Nigaṇṭho pañcavādasatāni, nigaṇṭhī pañcavādasatāni”ti evaṃ **nigaṇṭho ca nigaṇṭhī ca pañca pañca vādasatāni uggahetvā vicarantā**. Kiriyato te **pucchimsu**, līngato pana nigaṇṭhabhāvo ñāto. Tenāha “**ahaṃ vādaṃ āropessāmi**”ti.

**Jagganto** sammajjanādivasena. **Divātaranti** atidivam. “Kassa pucchā, kassa vissajjanam hotū”ti paribbājikāhi vutte thero āha “**pucchā nāma amhākaṃ pattā**”ti. Pucchā vādānam pubbapakkho, yasmā tumhe vādapasutā vādābhiratā dhajam paggayha vicaratha, tasmā vādānam pubbapakkho amhākaṃ patto, evam santepe tumhākaṃ mātugāmabhāvato pubbapakkhā demāti āha “**tumhe pana mātugāmā nāma paṭhamam pucchathā**”ti. **Tā** paribbājikā ekekā aḍḍhateyyasatavādamaggaṃ pucchantiyo **vādasahassam pucchimsu**. Yathā nisitassa khaggassa kumudanālacchedane kimatthi bhāriyam, evam paṭisambhidāppattassa sāvakesu paññavantānam aggabhāve ṭhitassa dhammasenāpatino puthujjanaparikkappitapañhavissajjane kimatthi bhāriyam. Tenāha “**thero khaggenā**”tiādi. Tattha **nijaṭam niggaṇṭhim katvāti** yathā tā puna tattha jaṭam gaṇṭhim kātuṃ na visahanti, tathā vijaṭetvā kathesi. Ayam thero caturaṅgasamannāgate andhakāre sahasavattikaṃ dīpento viya aññesaṃ avisaye andhakārabhūte pañhe pucchitamatteyeva vissajjesīti therassa paññaveyyattiyam disvā sayañca antimabhavikatāya kohaññe ṭhātuṃ asakkontiyo “**ettakameva, bhante, mayam jānāmā**”ti āhaṃsu. **Therassa visayanti** therassa paññavisayam.

**Neva antam na koṭim addasaṃsūti** ekanti vattabbassa bahubhāvato tassā pucchāya attho evamanto evamavasānakoṭīti na passimsu na jānimsu. Thero tāsam ajjhāsayaṃ olokeno pabbajjārucim disvā āha “**idāni kiṃ karissathā**”ti? **Uttaritarapaññoti** vādamaggaparicayena medhāvītaya ca yādisā tāsam paññā, tato uttaritarapañño.

**Kathāmaggoti** vādamaggo. Tasmā tehi tehi parappavādādīhi bhassam vādamaggaṃ pakārehi vadetīti **bhassappavādako**. **Paṇḍitavādoti** aham paṇḍito nipuṇo bahussutoti evaṃvādī. **Yaṃ yaṃ nakkhattācārena ādisatīti** nakkhattagatiyā kālaññena “asukadivase candaggāho bhavissati, sūriyaggāho bhavissati”tiādinā yaṃ yaṃ ādesam bhaṇati. **Sādhuladdhiko** ñāṇasampattiyā sundaro. **Āropitoti** paṭiññāhetunidassanādidosam upari āropito vādo svāropito. Dosapadam āropentena vādinā paravādimhi abhibhuyya tassa dhātukkabhohopi siyā, cittavikkhepena yena doso tena saṅkappito sampavedhitoti. **Thūṇanti** sarīram khobhitanti katvā. **Thūṇanti** hi lohitaṭṭasemhānam adhivacanam sabbaṅgasarīradhāraṇato. Apica thūṇapado nāma atthi kathāmaggo vādamaggaṃ gaṇhantānam. Saccako pana kohaññe ṭhatvā attano vādappabhedavasena pare vimhāpento “**thūṇam cepāha**”ntiādimāha. Sāvakanam vinayam nāma sikkhāpadam, tañca dhammadesanā hotīti esā eva cassa anusāsanti vinayanādimukhena sammāsambuddhassa matam sāsanaṃ pucchanto saccako “**katham pana, bho, assajī**”tiādimāha. Athassa thero “lakkhaṇattayakathā nāma anaññāsādhāraṇā buddhāvenikā dhammadesanā, tatra ca mayā aniccakathāya samuṭṭhāpitāya tam asahanto saccako tucchamānena paṭapaṭāyanto kurumāno licchavī gahetvā bhagavato santikaṃ āgamissati, athassa bhagavā vādam madditvā aniccanti paṭiṭṭhapento dhammam kathessati, tadā bhavissati vijahitavādo sammāpaṭipattiyā paṭiṭṭhito”ti cintetvā aniccāntalakkhaṇapaṭisaṃyuttam bhagavato anusāsanaṃ dassento “**evam, bho, aggivessanā**”tiādimāha.

Kasmā panettha dukkhalakkhaṇam aggahitanti āha “**thero panā**”tiādi. “**Upārambhassa okāso hoti**”ti saṅkhepato vuttam vivaritam “**maggaphalāni**”tiādi vuttam. Tattha **pariyāyenāti** saṅkhāradukkhatāpariyāyena. **Ayanti** saccako. **Nayidam tumhākaṃ sāsanaṃ nāmāti** yattha tumhe avatṭhitā, idaṃ tumhākaṃ sabbaññusāsanaṃ nāma na hoti dukkhato anissaraṇatā, atha kho **mahāāghātanam nāmetam**, mahādukkhaniddiṭṭhattā pana **nirayussado nāma** ussadanirayo nāma, tasmā **natti** nāma **tumhākaṃ sukhāsā**. **Uṭṭhāyutṭhāyāti** ussukkaṃ katvā, **dukkhameva jīrāpentā** sabbaso dukkhameva anubhavatā, **āhiṇḍatha** vicarathāti. Sabbamidam tassa micchāparikkappameva. Kasmā? Dukkhasaccūpasāñhitāyeva hettha nipariyāyakathā nāma. Tassa hi pariññattham bhagavati brahmacariyam vussati. Maggaphalāni saṅkhārabhāvena “yadaniccaṃ, tam dukkha”nti pariyāyato dukkham, na nipariyāyato. Tenāha “**tasmā**”tiādi. **Sotum ayuttam** micchāvādattāti adhippāyo.

**354.** Saha atthānusāsanaṃ agāranti sandhāgāram, rājakulānam santhāpanaagārantipi sandhāgāram, tasmim **santhāgāreti** attho. Ekasmim kāle tādise kāle rājakiccānam santhānamettha vicārentīti sandhāgāram, tasmim **santhāgāreti**pi attho. **Paṭiṭṭhanti** “aniccam anattā”ti ca paṭiññātam. **Idāneva**

**piṭṭhiṃ parivattenti** bhagavato nalāṭaṃ anoloketvā vimukhabhāvaṃ āpajjanto. **Surāghareti** surāsampādakagehe. **Piṭṭhakilañjanti** piṭṭhaṭhapanakiḷaṅgaṃ. **Vālanṭi** caṅgavāraṃ.

**Sāṇasāṭakakaraṇatthanti** sāṇasāṭakamaṃ karonti etenāti **sāṇasāṭakakaraṇaṃ**, suttaṃ, tadatthamaṃ. Sāṇavākā etesu santīti **sāṇavākā**, sāṇadaṇḍā. Te gahetvā sāṇānaṃ dhovanasadisamaṃ kīḷitajātaṃ yathā “uddālapupphabhañjikā, sāṇabhañjikā”ti ca. **Kim so bhavamānoti** kīdiso hutvā so bhavamāno, kim honto loka aggapuggalassa sammāsambuddhassa vādāropanaṃ nāma tato uttaritarasūraguṇo eva yakkhādibhāvena so bhavamāno abhisambhuṇeyya. Ayaṃ pana appānubhāvātāya piśācarūpo kim ettakaṃ kālaṃ niddāyanto ajja pabujjhivā evaṃ vadatīti adhippāyo. Tenāha “**kim yakkho**”tiādi.

**355. Mahāmajjhnikasamayeti** mahati majjhnikakāle, gaganamajjhe sūriyagatavelāya. **Divāpadhānikā** padhānanuyūñjakā. **Vattaṃ dassetvāti** pacchābhataṃ divāvihārūpagamanato pubbe kātābhavattaṃ dassetvā paṭipajjitvā. **Bhagavantaṃ dassenti** bhagavati gāravabahuṃānaṃ vibhāvento ubho hatthe kamalamakulākāre katvā ukkhippa bhagavantaṃ dassento.

**Taṃ sandhāyāti** taṃ aparicchinnagaṇanaṃ sandhāya evaṃ “mahatiyā licchaviparisāyā”ti vuttaṃ. Kim sīsenā bhūmiṃ paharanteneva vandanā katā hoti? **Kerāṭikāti** saṭṭhā. **Mocentāti** bhikkhādānato mocentā. **Avakkhittamattikāpiṇḍo viyāti** heṭṭhākhittamattikāpiṇḍo viya. **Yattha katthacīti** attano anurūpaṃ vacanaṃ asallapento yattha katthaci.

**356.** Dissati “idaṃ imassa phala”nti apadissati etenāti **deso**, kāraṇaṃ, tadeva tassa pavattiṭṭhānatāya okāsoti āha “**kañcideva desanti kañci okāsaṃ kiñci kāraṇa**”nti. Okāso ṭhānanti ca kāraṇaṃ vuccati “atṭhānametaṃ anavakāso”tiādīsu (dī. ni. 3.161; ma. ni. 3.128-131; a. ni. 1.268-295; vibha. 809). **Yadākañkhasīti na vadanti** anavasesadhammavisayattā paṭiññāya. **Tumhanti** tumhākaṃ. **Yakkha...pe... paribbājakānanti** ettha “pucchāvuso, yadākañkhasī”tiādīni (saṃ. ni. 1.246; su. ni. āḷavakasutta) pucchāvacaṇāni yathākkamaṃ yojetabbāni.

**Ñatvā sayamaṃ lokamimaṃ parañcāti** idaṃ mahāsatto nirayaṃ saggañca tesamaṃ paccakkhato dassetvā āha.

**Taggha te ahamakkhissaṃ, yathāpi kusalo tathāti** yathā pakārena sukusalo sabbaññū jānāti katheti, tathā ahaṃ kathessāmi. Tassa pana kāraṇaṃ akāraṇaṅca avijānanto rājānaṃ karotu vā mā vā, ahaṃ pana te akkhissāmīti āha “**rājā ca kho...pe... na vā**”ti.

**Kathitaniyāmeneva kathenti** te parivaṭṭakathāya dukkhalakkhaṇampesa kathessati, idha pana aññathā sāvakena assajinā kathitaṃ, aññathā samaṇena gotamenāti vacanokāsapariharaṇatthamaṃ dukkhalakkhaṇaṃ anāmasitvā therena kathitaniyāmeneva aniccānattalakkhaṇameva kathentena bhagavatā – “rūpaṃ anattā yāva viññānaṃ anattā”ti vutte saccako taṃ asampaṭicchanto upamāya atthañāpane upamāpamaṇaṃ yathā “go viya gavayo”ti attānaṃ upameyyamaṃ katvā upamāpamaṇena paṭiṭṭhāpetukāmo āha “**upamā maṃ, bho gotama, paṭibhātī**”ti, upamaṃ te karissāmi, upamāyapidhekacce viññū purisā bhāsitaṃ atthaṃ ājānantīti adhippāyo. Bhagavā upamāsateṇa, aññena vāpi pamāṇena tava attā paṭiṭṭhāpetuṃ na labbhā attano viya pamāṇassapi anupalabbhanatoti āha “**paṭibhātu taṃ aggivessanā**”ti. Yathā hi attā nāma koci paramatthato na upalabbhati ekamsena anupaladdhito, evassa ñāpakapuggalaṃ pamāṇampi na upalabbhati. Tenāha “**āhara taṃ upamaṃ vissattho**”ti, na tena tava attavādo paṭiṭṭhaṃ labhatīti adhippāyo.

Yaṃ diṭṭhaṃ kāyikaṃ vā puññāpuññaṃ purisapuggale upalabbhati, tena viññāyati **rūpattāyaṃ purisapuggalo**, tathā yaṃ diṭṭhaṃ sukhadukkhaṭṭisaṃvedanaṃ purisapuggale upalabbhati, yaṃ diṭṭhaṃ nīlādisañjānaṃ, yaṃ diṭṭhaṃ rajjanadussanādi, yaṃ diṭṭhaṃ ārammaṇapaṭivijānaṃ purisapuggale upalabbhati, tena viññāyati **viññāṇattāyaṃ purisapuggaloti**. Evaṃ rūpādilakkhaṇo attā tattha tattha kāye kalyāṇapāpakānaṃ kammānaṃ vipākaṃ sukhadukkhaṃ paṭisaṃvedeti, evañcetaṃ sampaṭicchitabbaṃ, aññathā kammaphalasambandho na yujjeyyāti imamatthaṃ dassento “**iminā kim**

**dīpeti**”tiādimāha. Tattha **teti** sattā. **Patit̥ṭhāyāti** nissāya. “Rūpattāyaṃ purisapuggalo”tiādinā rūpādidhamme “attā”ti vatvā puna “rūpe patit̥ṭhāyā”tiādiṃ vadanto ayam nigaṇṭho attano vādaṃ bhindati patit̥ṭhānassa, patit̥ṭhāyakassa ca abhedadīpanato. Rūpādayo vedanādisabhāvā attā tannissayena puññādikiriyāsamupaladdhito idha yaṃ nissāya puññādikiriyā samupalabbhati, te rūpādayo sattaṣaṇṇitā attasabhāvā diṭṭhā yathā taṃ devatādīsu, ye pana sattaṣaṇṇitā tato aññe asattasabhāvā diṭṭhā yathā taṃ kaṭṭhakalīṅgarādīsūti evaṃ sādhetabbaṃ atthaṃ sahetuṃ katvā dassento nigaṇṭho nidassanaṃ ānesīti āha “**ativiya sakāraṇaṃ katvā upamaṃ āharī**”ti. Tassa pana “balakaraṇīyā”ti vuttapurisappayogā viya bījagāmahūtagāmāpi sajīvā evāti laddhīti te sadisūdāharaṇabhāvena vuttāti daṭṭhabbaṃ. Sace pana ye jīvassa ādhāraṇabhāvena sahitena pavattetabbabhāvena sallakkhetabbā, te sajīvāti icchitā, na kevalena pavattetabbabhāvena. Evaṃ sati “balakaraṇīyā kammantā”ti vadantena visadisūdāharaṇabhāvena upanītanti daṭṭhabbaṃ.

**Samattho nāma natthi** attavādabhañjanassa anattatāpatit̥ṭhāpanassa ca sugatāveṇikattā. Yaṃ panetarahi sāsanikā yathāsatti tadubhayaṃ karontī, taṃ buddhehi dinnanaye ṭhatvā tesam desanānūsārato. **Nivattetvāti** nīharitvā, viṣuṃ katvāti attho. **Sakalaṃ vesālīnti** sabbavesālīvāsinaṃ janaṃ nissayūpacārena nissitaṃ vadati yathā “gāmo āgato”ti. **Samvattitvāti** sampiṇḍitvā, ekajjhaṃ gahetvāti attho.

**357. Patit̥ṭhapetvāti** yathā taṃ vādaṃ na avajānāti, evaṃ paṭiññaṃ kāretvāti attho. **Ghāti**-saddo hiṃsanattho, tato ca saddavidū arahatthaṃ tāya-saddaṃ uppādetvā ghātetāyanti rūpasiddhiṃ icchantīti āha “**ghātāraha**”nti. **Jāpetāyanti**tiādisūpi eseva nayo. **Vattituṅca maraḥatīti** ma-kāro padasandhikaro. **Visesetvā dīpetīti** “vattati”iceva avatvā “vattituṅca maraḥatī”ti dutiyena padena bhagavatā vuttaṃ visesetvā dīpeti.

**Pāsādikaṃ abhirūpanti** abhimatarūpasampannaṃ sabbāvayavaṃ. Tato eva susajjitaṃ sabbakālaṃ suṭṭhu sajjitākārameva. **Evaṃvidhanti** yādisaṃ sandhāya vuttaṃ, taṃ dasseti “**dubbaṇṇa**”ntiādinā. **Imasmiṃ ṭhāneti** “vattati te tasmim rūpe vaso”ti etasmim kāraṇaggahaṇe. Kāraṇañhetam bhagavatā gahitaṃ “vattati...pe... mā ahoṣī”ti. Tenetaṃ dasseti rūpaṃ anattā avasavattanato, yañhi vase na vattati, taṃ anattakameva diṭṭhaṃ yathā taṃ sampatti. **Vādanti** dosaṃ niggahaṃ āropessati. **Sattadhā muddhā phalatīti** sahadhammikasākacchāhi tathāgate, pucchante abyākaraṇena vihesāya kayiramānattā tatiye vāre dhammatāvasena vihesakassa sattadhā muddhā phalati yathā taṃ sabbaññupaṭiññāya bhagavato sammukhabhāvūpagamane. Vajirapāṇi pana kasmā ṭhito hotīti? Bhagavā viya anukampamāno mahantaṃ bhayānakaṃ rūpaṃ māpetvā tāsetvā imaṃ diṭṭhiṃ vissajjāpemīti tassa purato ākāse vajiraṃ āharanto tiṭṭhati, na muddhaṃ phāletukāmo. Na hi bhagavato purato kassaci anatto nāma hoti. Yasmā pana bhagavā ekaṃsato sahadhammikameva pañhaṃ pucchati, tasmā **aṭṭhakathāyaṃ** “**pucchite**”iceva vuttaṃ.

**Ādittanti** dippamānaṃ. **Akkhināsādīnīti ādi**-saddena eḷakasīsasadisakesamassuādīnaṃ saṅgaṇhāti. “**Diṭṭhivissajjāpanattha**”nti vatvā nayidaṃ yadicchāvasena āgamaṇaṃ, atha kho ādito mahābrahmānaṃ purato katvā attanā katapaṭiññāvasenāti dassento “**apicā**”tiādimāha. Nti vajirapāṇiṃ. **Taṃ** saccakassa paṭiññāya parivattanakāraṇaṃ. **Aññepi nu khotiādi** saccakassa vīmaṃsakabhāvadassanaṃ. Avīmaṃsakena hi taṃ disvā mahāyakkhoti vadeyya, tenassa asārappaṃ siyā, ayam pana aññesaṃ abhītabhāvaṃ upadhāretvā “addhāme yakkhaṃ na passanti, tasmā mayhameva bhayaṃ uppanna”nti tīretvā yuttappattavasena paṭipajji.

**358. Upadhāretvāti** byākātabbamattaṃ sallakkhetvā. **Eseva nayoti** saṅkhāravīññānesūpi saññāya viya nayoti attho. **Vuttavipariyāyenāti** “akusalā dukkhā vedanā mā ahoṣi, akusalā domanassasampayuttā saññā mā ahoṣi”tiādinā nayena attho veditabbo. **Sappadaṭṭhavisanti** sabbasattānaṃ sappadaṭṭhaṭṭhāne sarīrapadese patitaṃ viṣaṃ. **Allīnoti** saṃsiliṭṭho. **Upagatoti** na apagato. **Ajjhositoti** gilitvā pariniṭṭhapetvā ṭhito. **Parito jāneyyāti** samantato sabbaso kiṅcīpi asasetvā jāneyya. **Parikkhepetvāti** āyatim anuppattidhammatāpādanavasena sabbaso khepetvā. Tathābhūto cassa

khayavayaṃ upaneti nāmāti āha “**khayaṃ vayaṃ anuppādaṃ upanetvā**”ti.

**359.** Attano vādassa asārabhāvato, yathāparikkappitassa vā sārassa abhāvato antosāravirahito **ritto**. **Vippakāraṇti** diṭṭhiyā silācārassa ca vasena virūpaṭaṃ sāparādhaṭaṃ sāvajjataṃ tesam upari āropetvā. **Sinnapattoti** tanukapatto. **Viphāritanti** viphāḷitaṃ.

**Asāra**karukkhaparicitoti palāsādiasārarukkhakoṭṭane kataparicayo. **Thaddhabhāvanti** vipakkabhāvaṃ, tikkhabhāvanti attho. **Natthīti** sadā natthīti na vattabbaṃ. **Parisatīti** catuparisamajjhe. Tathā hi “**gaṇṭhikaṃ paṭimuñcitvā paṭicchannasarīrā**”ti vuttaṃ. **Yantāruḷhassa viyāti** byākaraṇatthaṃ vāyamaṃtaṃ āruḷhassa viya.

**360.** **Diṭṭhivisūkānīti** diṭṭhikiñcakāni. **Diṭṭhisañcaritānīti** diṭṭhitāḷanāni. **Diṭṭhivipphanditānīti** diṭṭhiinjitāni. **Tesaṃ adhippāyaṃ nātvāti** tesam licchavikumārānaṃ iñjiteneva ajjhāsayaṃ jānitvā. Tenāha “**ime**”tiādi.

**361.** Yasmiṃ adhigate puggalo satthusāsane visārado hoti parehi asaṃhāriyo, taṃ nāṇaṃ visāradassa bhāvoti katvā **vesārajanti** āha “**vesārajappattoti nāṇappatto**”ti. Tato evamassa na paro paccetabbo etassa atthīti **aparappaccayo**. Na paro pattiyo saddahātabbo etassa atthīti **aparappattiyo**. Kāmaṃ saccako sekkhabhūmi asekkhabhūmīti idaṃ sāsanaṃvohāraṃ na jānāti. Passatīti pana dassanakiriyaṃ vippakatabhāvassa vuttattā “na ettāvataṃ bhikkhukiccaṃ pariyosita”nti aññāsi, tasmā puna “kittāvataṃ panā”ti pucchaṃ ārabhi. Tena vuttaṃ “**passatīti vuttattā**”tiādi.

Yathābhūtaṃ passatīti dassanaṃ, visiṭṭhaṭṭhena anuttariyaṃ, dassanameva anuttariyanti **dassanānuttariyaṃ**, dassanesu vā anuttariyaṃ **dassanānuttariyaṃ**. **Lokiyapaññāti** cettha vipassanāpaññā veditabbā. Sā hi sabbalokiyapaññāhi visiṭṭhaṭṭhena “anuttarā”ti vuttā. Lokiyapaṭipadānuttariyesupi eseṃ nayo. Idāni nippariyāyatova tividhampi anuttariyaṃ dassetaṃ “**suddhalokuttaramevā**”tiādi vuttaṃ. Satipi sabbesampi lokuttaradhammānaṃ anuttarabhāve ukkaṭṭhaniddesena aggamaṃgapaññā tato uttaritarassa abhāvato **dassanānuttariyaṃ**. Tenāha “**arahattamaggasammādiṭṭhī**”ti. **Sesāni maggaṅgānīti** sesāni arahattamaggaṅgāni. Tāni hi matthakappattāni nibbānagāminī paṭipadāti. **Aggaphalavimuttīti** aggamaṃgassa phalavimuttīti arahattaphalaṃ. **Khīṇāsavassāti** sabbaso khīyamānāsavassa. **Nibbānadassananti** aggamaṃgassammādiṭṭhiyā sacchikiriyaṃbhisamayamāha. Tattha **maggaṅgānīti** aṭṭha maggaṅgāni. Catusaccantogadhattā sabbassa ñeyyadhammassa “**cattāri saccāni buddho**”ti vuttaṃ. Saccānugatasammohavidhamaṃsaneneva hi bhagavato sabbaso ñeyyāvaraṇappahānaṃ. **Nibbisevanoti** niruddhakilesavisevano.

**362.** **Dhamsīti** anuddhamaṃsanasilā. **Anupahatanti** avikkhittaṃ. **Sakalanti** anūnaṃ. **Kāyaṅganti** kāyameva aṅganti vadanti, kāyasaṅkhātaṃ aṅgaṃ sīsādiavayavanti attho. Tathā “hotu, sādhu”ti evamidaṃ vācāya avayavo **vācaṅganti**.

**363.** **Āharantīti** abhiharanti. **Puññanti** puññaphalasaṅkhāto ānubhāvo. Puññaphalampi hi uttarapadalopena “puñña”nti vuccati – “kusalānaṃ, bhikkhave, dhammānaṃ samādānāhetu evamidaṃ puññaṃ pavaḍḍhati”tiādīsu (dī. ni. 3.80). Tenāha “**āyatim vipākakkhandhā**”ti. **Puññamahīti** mahatī puññaphalavibhūti setacchattamaṃkaṭṭacāmarādi. Tena vuttaṃ “**vipākakkhandhānaṃyeva parivāro**”ti. Licchavīhi pesitena khādanīyabhojanīyena samaṇo gotamo sasāvakaṃsaṅgho mayā parivisito, tasmā licchavīnameva taṃ puññaṃ hotīti. Tenāha “**taṃ dāyakaṇaṃ sukhāya hotū**”ti. Yasmā pana bhagavato bhikkhusaṅghassa ca saccakena dānaṃ dannaṃ, na licchavīhi, tasmā bhagavā saccakassa satim parivattento “**yaṃ kho**”tiādimāha. Tena vuttaṃ “**iti bhagavā**”tiādi. **Nigaṇṭhassa matena vināyevāti** saccakassa cittaṃ vinā eva tassa dakkhiṇaṃ khettagataṃ katvā dasseti. Tenāha “**attano dannaṃ dakkhiṇaṃ...pe... niyyātesī**”ti.

Cūlasaccakasuttavaṇṇanāya līnatthappakāsanā samattā.

## 6. Mahāsaccakasuttavaṇṇanā

**364. Ekaṃ samayaṃ bhagavā vesāliyaṃ viharatīti** iminā tadā bhagavato vesāliyaṃ nivāsapariicchinnō pubbaṅhādibhedo sabbo samayo sādharmaṇato gahito, tathā **tena kho pana samayenāti** ca iminā. **Pubbaṅhasamayanti** pana iminā tabbiseso, yo bhikkhācārathāya paccavekkhaṇakālo. **Aṭṭhakathāyaṃ** pana “**tīhi padehi ekova samayo vutto**”ti vuttaṃ visesassa sāmāññantogadhattā. Mukhadhovanassa pubbakālakiriyābhāvasāmāññato vuttaṃ “**mukhaṃ dhovivā**”ti. Mukhaṃ dhovivā eva hi vāsadhuro ce, vellaṃ sallakkhetvā yathāciṇṇaṃ bhāvanānuyogaṃ, ganthadhuro ce, ganthaparicaye katipaye nisajjavāre anuyūñjitvā pattacīvaraṃ ādāya vitakkamaḷaṃ upagacchati.

**Kāraṇaṃ** yuttaṃ, anucchavikanti attho. Pubbe yathācintitaṃ pañhaṃ apucchivā aññaṃ pucchanto maggaṃ ṭhapetvā ummaggaṃ parivattento viya hotīti āha “**passena tāva pariharanto**”ti.

**365. Ūrukkhambhōpi nāma bhavissatīti** ettha **nāma**-saddo vimhayatthoti katvā vuttaṃ “**vimhayatthavasena**”tiādi. “Andho nāma pabbataṃ abhiruhissatī”tiādīsu viya vimhayavācīsaddayogena hi “bhavissatī”ti anāgatavacanaṃ. **Kāyanvayanti** kāyanugataṃ. “Ayampi kho kāyo evaṃdhammo evaṃbhāvī evaṃanātīto”tiādinā (dī. ni. 2.379; ma. ni. 1.112; ma. ni. 3.154) kāyassa asubhāniccāditāya anupassanā kāyabhāvanāti āha “**kāyabhāvanāti pana vipassanā vuccatī**”ti. **Anāgatarūpanti** abhīte atthe anāgatasaddāropanaṃ anāgatappayogo na sameti. **Atthopīti** “ūrukkhambhōpi nāma bhavissatī”ti vuttaatthopi na sameti. **Ayanti** attakilamathānuyogo. **Tesanti** nigaṇṭhānaṃ.

**366.** Attano adhippetakāyabhāvanaṃ vitthārento vitthārato dassento ye taṃ anuyuttā, te nāmagottato vibhāvento “**nando vaccho**”tiādimāha. **Kiliṭṭhatapānanti** kāyassa kilesanatapānaṃ puggalānaṃ. **Jāta medanti** medabhāvāpattivasena uppannamedaṃ. **Purimaṃ pahāyāti** kālapariicchena anāhāraappāhāratādivasena kāyassa apacinaṃ khedaṃ pariccajivā. **Kāyabhāvanā pana na paññāyatīti** niyamaṃ paramatthato kāyabhāvanāpi tava ñāṇena na ñāyati, sesatopi na dissati.

**367. Imasmiṃ pana ṭhāneti** “kāyabhāvanampi kho tvam, aggivessana, na aññāsī, kuto pana tvam cittabhāvanaṃ jānissasī”ti imasmiṃ ṭhāne. Tathā “yo tvam evaṃ oḷārikaṃ dubbalaṃ kāyabhāvanaṃ na jānāsī, so tvam kuto santasukhamaṃ cittabhāvanaṃ jānissasī”ti etasmiṃ atthavaṇṇanāṭhāne. **Abuddhavacanaṃ nāmetaṃ padanti** kāyabhāvanāsaññitavipassanāto cittabhāvanā santā, vipassanā pana pādakajjhānato oḷārikā ceva dubbalā cāti ayañca etassa padassa attho. “Abuddhavacanaṃ nāmetaṃ vacanaṃ siyā”ti vatvā thero pakkamituṃ ārabhati. Atha naṃ mahāsīvathero “vipassanā nāmesā na ādito subrūhitā balavatī tikkhā visadā hoti, tasmā taruṇavasenaṃyamatto veditabbo”ti dassento “**dissati, bhikkhave**”ti suttapadaṃ (saṃ. ni. 2.62) āhari. Tattha **ādānanti** paṭisandhi. **Nikkhepananti** cuti. **Oḷārikanti** arūpadhammehi duṭṭhullabhāvattā oḷārikaṃ. **Kāyanti** catusantirūpasamūhābhūtaṃ kāyaṃ. **Oḷārikanti** bhāvanapūṃsakaniddeso, oḷārikākārenāti attho. Teneva vuttaṃ “**ādānampi nikkhepanampi**”ti.

**368. Sukhasārāgena samannāgatoti** sukhavedanāya balavatararāgena samañgībhūto. **Paṭṭhāne paṭisiddhā** avacaneneva. **Tasmāti** sukhe ṭhite eva dukkhassānuppajjanato. **Evaṃ vuttanti** “sukhāya vedanāya nirodhā uppajjati dukkhā vedanā”ti evaṃ vuttaṃ, na anantarāva uppajjanato. **Khepetvāti** kusalāni khepetvā. **Gaṇhitvā** attano eva okāsaṃ gahetvā. **Ubhatopakkhaṃ hutvāti** “kadāci sukhavedanā, kadāci dukkhavedanā”ti pakkhadvayavasenaṃpi vedanā cittassa pariyādāya hoti yathākkamaṃ abhāvitakāyassa abhāvitacittassa.



**369. Vipassanā ca sukhassa paccanīkāti** sukkhavipassakassaādikammikassa mahābhūtapariggahādīkāle bahi cittacāraṃ nisedhetvā kammaṭṭhāne eva satīṃ saṃharantassa aladdhassādaṃ kāyasukhaṃ na vindati, sambādhe vaje sanniruddho gogaṇo viya vihaññati vipphandati, accāsannahetukañca sarīre dukkhaṃ uppajjateva. Tena vuttaṃ “**dukkhassa āsannā**”ti. Tenāha “**vipassanaṃ paṭṭhapetvā**”tiādi. **Addhāne gacchante gacchanteti** mahābhūtapariggahādivasena kāle gacchante. **Tattha tatthāti** tasmīṃ tasmīṃ sarīrapadesē. **Dukkhaṃ dūrāpagataṃ hoti** samāpattibalena vikkhambhitattā appanābhāvato. **Anappakaṃ** vipulaṃ. **Sukhanti** jhānasukhaṃ. **Okkamatīti** jhānasamuṭṭhānapañtarūpavasena rūpakāyaṃ anupavisati, nāmakāyokkamane vattabbameva natthi. Kāyapassaddhikammikassapī sammasanabhāvanā paṭṭhapetvā nisinnassa kassaci āditova kāyakilamathaccittupaghātāpī sambhavanti, samādhissa pana apaccanīkattā siniddhabhāvato ca na sukkhavipassanā viya sukhassa vipaccanīko, anukkamena ca dukkhaṃ vikkhambhetīti āha “**yathā samādhi**”ti. Yathā samādhi, vipassanāya panetaṃ natthīti āha “**na ca tathā vipassanā**”ti. **Tena vuttanti** yasmā vipassanā sukhassa paccanīkā, sā ca kāyabhāvanā, tena vuttaṃ “**uppannāpi sukhā vedanā cittaṃ na pariyādāya tiṭṭhati, bhāvitattā kāyassā**”ti. Tathā yasmā samādhi dukkhassa paccanīko, so ca cittabhāvanā, tena vuttaṃ “**uppannāpi dukkhā vedanā cittaṃ na pariyādāya tiṭṭhati, bhāvitattā cittassā**”ti yojanā.

**370. Guṇe ghaṭṭetvāti** apadesena vinā samīpameva netvā. Taṃ vata mama cittaṃ uppannā sukhā vedanā pariyādāya ṭhassatīti netāṃ ṭhānaṃ vijjatīti yojanā.

**371. Kiṃ na bhavissati**, sukhāpi dukkhāpi vedanā yathāpaccayaṃ uppajjatevāti attho. **Tamatthanti** sukhadukkhavedanānaṃ uppattiyā attano cittassa anabhibhavanīyatāsāṅkhātāṃ atthaṃ. **Tattha** tāva pāsārāsīsutte **bodhipallaṅke nisajjā** “tattheva nisīdi”nti vuttā. **Idha** mahāsaccakasutte **dukkarakārikāya** dukkaracaraṇe **nisajjā** “tattheva nisīdi”nti vuttā.

**374. Chandakaraṇavasenāti** taṇhāyanavasenāti attho. **Sinehakarāṇavasenāti** sinehanavasena. **Mucchākarāṇavasenāti** mohanavasena pamādāpādanena. **Vipāsākarāṇavasenāti** pātukamyatāvasena. **Anudahanavasenāti** rāgagginā anudahanavasena. **Lokuttaramaggavevacanameva** vaṭṭanissaraṇassa adhippetattā.

Allaggahaṇena kilesānaṃ asamucchinnabhāvaṃ dasseti, sasnehaggahaṇena avikkhambhitabhāvaṃ, uduke pakkhittabhāvaggaṇaṇena samudācārāvattaṃ, udumbarakaṭṭhaggahaṇena attabhāvassa asārakattaṃ. **Imināva nayanāti** “allaṃ udumbarakaṭṭha”ntiādinā vuttanayena. **Saputtabhariyapabbajjāyāti** puttabhariyehi saddhiṃ kataparibbājakapabbajjāvasena veditabbā. Kuṭṭicakabahūdakahaṃsa-paramahaṃsādībheda **brāhmaṇapabbajjā**.

**376.** Kutopi imassa āposineho natthīti **koḷāpaṃ**. Tenāha “**chinnasinehaṃ nirāpa**”nti. **Koḷanti** vā sukkhakalīṅgaram vuccati, koḷaṃ koḷabhāvaṃ āpannanti **koḷāpaṃ**. Paṭipannassa upakkamamahattanissitatā pakatiyā kilesehi anabhibhūtatāya. **Atintatā** paṭipakkhabhāvanāya. Tathā hi sukkhakoḷāpabhāvo, ārakā udakā thale nikkhittabhāvo ca nidassito. **Opakkamikāhīti** kilesaatiniggaṇhanupakkamappabhavāhi. **Vedanāhīti** paṭipattivedanāhi. Dukkhaṃ paṭipadā hi idhādhippetā.

**377. Kiṃ pana na samattho**, yato evaṃ parehi cintitumpi asakkuṇeyyaṃ dukkaracariyaṃ chabbassāni akāsīti adhippāyo. **Katvāpi akatvāpi samatthova** kāraṇassa nipphannattā. “Yathāpi sabbesampi kho bodhisattānaṃ carimabhava antamaso sattāhamattampi dhammatāvasena dukkaracariyā hotiyeva, evaṃ bhagavā samattho dukkaracariyaṃ kātuṃ, evañca naṃ akāsi, na pana tāya buddho jāto, atha kho majjhimāya eva paṭipattiyā”ti tassā byatirekamukhena sadevakassa lokassa bodhāya amaggabhāvadīpanatthaṃ, imassa pana bhagavato kammavipākavasena chabbassāni dukkaracariyā ahoṣi. Vuttañhetā –

“Avacāhaṃ jotipālo, kassapaṃ sugataṃ tadā;  
Kuto nu bodhi muṇḍassa, bodhi paramadullabhā.

Tena kammavipākena, acarīṃ dukkaraṃ baḥuṃ;  
Chabbassānuruvelāyaṃ, tato bodhimapāpuṇiṃ.

Nāhaṃ etena maggena, pāpuṇiṃ bodhimuttamaṃ;  
Kumaggena gavesissaṃ, pubbakamma vārito”ti.

Dukkaracariyāya bodhāya amaggabhāvadassanattamaṃ dukkaracariyaṃ akāsīti keci. Atha vā lokanāthassa attano parakkamasampattidassanattāya dukkaracariyā. Paṇīdadhimuttiyā hi paramukkaṃsagatabhāvato abhinīhārānurūpaṃ sambodhiyaṃ tibbachandatāya sikhāppattiyā tadatthaṃ īdisampi nāma dukkaracariyaṃ akāsīti loke attano vīriyānubhāvaṃ vibhāvetuṃ – “so ca me pacchā pītisomanassāvaho bhavissatī”ti lokanātho dukkaracariyaṃ akāsi. Tenāha “**sadevakassa lokassā**”tiādi. Tattha **vīriyanimmathanaguṇoti** vīriyassa saṃvaḍḍhanasampādanaguṇo. Yathāvuttamatthaṃ upamāya vibhāvetuṃ “**pāsāde**”tiādi vuttaṃ. **Saṅgāme dve tayo sampahāreti** dvikkhattuṃ tikkhattuṃ vā parasenāya pahārapayoge. **Padhānavīriyanti** sammappadhānehi āsevanavīriyaṃ, sabbaṃ vā pubbhāgavīriyaṃ.

**Abhidantanti** abhibhavanadantaṃ, uparidantanti attho. Tenāha “**uparidanta**”nti. So hi itaraṃ musalaṃ viya udukkhalaṃ visesato kassaci khādanakāle abhibhuyya vattati. **Kusalacittenti** balavasammāsaṅkappayuttana kusalacittena. **Akusalacittanti** kāmavitakkādisahitaṃ akusalacittaṃ. Akusalacittassa pavattituṃ appadānaṃ **niggaho**. Taṃtaṃpaṭikkhepavasena vinodanaṃ **abhinipīlanaṃ**. Vīriyatāpena vikkhambhanaṃ **abhisantāpanaṃ**. **Sadarathoti** saparīlāho. **Padhānenāti** padahanena, kāyassa kilamathuppādakena vīriyenāti attho. **Viddhassāti** tudassa. **Satoti** samānassa.

**378. Sīsaveṭhananti** sīsaṃ rajjuyā bandhitvā daṇḍakena parivattakaveṭhanaṃ. **Arahanto nāma evarūpā hontīti** iminā yathāyaṃ, evaṃ visaññībhūtāpi hutvā viharantīti dasseti. Tenāha “**matakasadisā**”ti, vedanāppattā viya hontīti attho. **Supinappaṭiggahaṇato paṭṭhāyāti** paṭisandhiggahaṇe setavāraṇasupinaṃ passitvā brāhmaṇehi byākatakālato paṭṭhāya.

**379.** Dhammasarīrassa arogabhāvena sādhuṭi marisanīyoti **māriso**, piyāyanavacanamaṃ. Tenāha “**sampiyāyamānā**”tiādi. **Ajajjitanti** evaṃ abhuñjitaṃ bhakārassa jakārādesaṃ katvā. Tenāha “**abhojana**”nti. **Evaṃ mā karitthāti** “lomakūpehi ajjhohāressāma anuppavesessāmā”ti yathā tumhehi vuttaṃ, evaṃ mā karittha. Kasmā? **Yāpessāmahanti** ahañca yāvadatthaṃ āhāramattaṃ bhuñjanto yathā yāpessāmi, evaṃ āhāraṃ paṭisevissāmi.

**380-81. Etāva paramanti** ettakaṃ paramaṃ, na ito paraṃ opakkamikadukkhavedanāvediyanaṃ atthīti attho. Rañño gahetabbanāṅgalato aññāni sandhāya “**ekena ūna**”nti vuttaṃ. Taṃ suvaṇṇaparikkhataṃ, itarāni rajataparikkhatāni. Tenāha “**amaccā ekenūnaaṭṭhasatarajatanāṅgalāni**”ti. Ālārudakasamāgame laddhajjhānāni vaṭṭapādakāni, ānāpānasamādhi pana kāyagatāsati pariyāpannattā sabbesañca bodhisattānaṃ vipassanāpādakattā “bodhāya maggo”ti vutto. **Bujjhanatthāyāti** catunnaṃ ariyasaccānaṃ, sabbasseva vā ñeyyadhammassa abhisambujjhanāya. Satiyā anussaraṇakaviññānaṃ **satānusāriviññānaṃ**. Kassā pana satiyaṭi taṃ dassetuṃ “**nayida**”ntiādi vuttaṃ.

**382. Paccupaṭṭhitāti** taṃtaṃvattakaraṇavasena patiupaṭṭhitā upaṭṭhāyakā. Tenāha “**paṇṇasālā**”tiādi. **Paccayabāhullikoti** paccayānaṃ bāhullāya paṭipanno. **Āvattoti** pubbe paccayagedhappahānāya paṭipanno, idāni tato paṭinivatto. Tenāha “**rasagiddho...pe... āvatto**”ti. **Dhammaniyāmenāti** dhammatāya. Tameva dhammataṃ dassetuṃ “**bodhisattassā**”tiādimāha.

**Bārāṇasimeva** tatthāpi ca sabbabuddhānaṃ avijahitadhammacakkapavattanaṭṭhānameva **agamamsu**. Pañcavaggiyā kira visākhamaṣṣa addhamāsiyaṃ gatā. Tenāha “**tesu gatesu adḍhamāsaṃ kāyavivekaṃ labhitvā**”ti.

**387.** “Addhābhoto gotamassa sāvakaṃcittabhāvanānuyogamanuyuttā viharanti, no kāyabhāvana”nti imaṃ sandhāyāha “**ekaṃ pañhaṃ pucchi**”nti. **Imaṃ dhammadesananti** “abhijānāmi kho pañha”ntiādikaṃ dhammadesanaṃ. **Asallīno** tañhādīṭṭhikilesānaṃ samucchinnatā tehi sabbaso na litto. **Anupalitto**ti tasseva vevacanaṃ tañhānandiyā abhāvena. **Gocarajjhattamevāti** gocarajjhattasaññite phalasaṃpattiyā āramaṇe, nibbāneti attho. Yaṃ sandhāya pāliyaṃ “purimasmim samādhinimmitte”ti vuttaṃ **sannisīdāpemi**ti phalasaṃpattisamādhinā accantasamādānavasena cittaṃ sammadeva nisīdāpemi. **Pubbābhogenāti** samāpajjanato pubbe pavattaābhogena. **Paricchinditvāti** samāpajjanakkhaṇaṃ paricchinditvā. Tenāha “**sādhukāra...pe... avicchinneyevā**”ti. Evamassa paricchinnakālasamāpajjanaṃ yathāparicchinnakālaṃ vuṭṭhānañca buddhānaṃ na bhāriyaṃ vasibhāvassa tathāsuppagaṇabhāvatoti dassento āha “**buddhānaṃ hī**”tiādi. Dhammasampañiggāhakānaṃ **assāsavāre** vā. Tadā hi desiyamānaṃ dhammaṃ upadhāretuṃ na sakkonti, tasmā tasmim khāṇe desitadesanā niratthakā siyā. Na hi buddhānaṃ niratthakā kiriyā atthi.

**Okappanīyametanti** “tassā eva kathāyā”tiādinā vuttaṃ ativiya acchariyagataṃ aṭṭhuppattiṃ sutvā īdisī paṭipatti sammāsambuddhasseva hotīti upavādavasena vadati, na sabhāvena. Tenāha “**sattari pasādamattampi na uppanna**”nti. **Kāyadarathoti** paccayavisesavasena rūpakāyassa parissamākāro. **Upādinnaketi** indriyabaddhe. **Anupādinnaketi** anindriyabaddhe. **Vikasanti** sūriyarasmissamphassena. Tadabhāvena **makulāni honti**. **Kesañci** tintinikādirukkhānaṃ. **Patilīyanti** nissayarūpadhammaavipphārikatāya. Arūpadhammatāya pañcaviññāṇānañceva kiriyāmayaviññāṇānañca appavattisaññitā avipphārikatā hoti, yattha niddāsamaññā. Tenāha “**darathavasena bhavaṅgasotañca idha niddāti adhippeta**”nti. Tattha **darathavasena**ti darathavaseneva, na thinamiddhavasenaṃti avadhāraṇaṃ avadhāraṇaphalañca niddhāretabbaṃ. **Taṃ sandhāyāti** kāyassa darathasañkhātasaṃragilānaṃhetukaṃ niddaṃ sandhāya. Saṃragilānañca bhagavato natthīti na sakkā vuttaṃ “**piṭṭhi me āgilāyatī**”ti (dī. ni. 3.300; ma. ni. 2.22; cūlava. 345) vacanato. **Sammohavīhārasminti** paccatte etaṃ bhummavacananti āha “**sammohavīhāroti vadanti**”ti, **sammohavīhārasmiṃ** vā pariyāpannaṃ etaṃ vadanti, yadidaṃ divā niddokkamananti yojanā.

**389.** **Upanītehīti** dosamaggaṃ nindāpathaṃ upanītehi. **Abhinanditvāti** sampiyāyitvā. Tenāha “**cittena sampañicchanto**”ti. **Anumoditvāti** “sādhū sādhu”ti desanāya thomanavasena anumoditvā. Tenāha “**vācāyapi pasamsanto**”ti. **Sampatte kāleti** pabbajjāyogge kāle anuppatte.

**Gaṇaṃ vinodetvāti** gaṇaṃ apanetvā gaṇapalibodhaṃ chinditvā. **Papañcanti** avasesakilesaṃ. “**Puññavā rājapūjito**”ti vuttamatthaṃ vivarituṃ “**tasmiñhi kāle**”tiādi vuttaṃ. Chandavāsaharaṇena **uposathakammaṃ karonto**.

Sakalaṃ rattim buddhagaṇānaṃyeva kathitattā therassa ñāṇaṃ desanāvibhavañca vibhāvento āha “**ettakāva, bhante, buddhagaṇā**”ti. Imāya, bhante, tumhākaṃ dhammakathāya anavasesato buddhagaṇā kathitā viya jāyanti, evaṃ santepi anantāparimeyyāva te, kiṃ ito parepi vijjantevāti theram tattha sihanādaṃ nadāpetukāmo āha “**udāhu aññepi atthī**”tiādi. Rajjassa padesikattā, yathāvuttasubhāsītassa ca anagghattā vuttaṃ “**ayaṃ me duggatapaṇṇākāro**”ti. **Tiyojanasatikanti** idaṃ parikkhepavasena vuttaṃ, tañca kho manussānaṃ paribhogavasenaṃti daṭṭhabbaṃ.

Mahāsaccakasuttavaṇṇanāya līnatthappakāsanā samattā.

## 7. Cūlatañhāsañkhayasuttavaṇṇanā

**390.** **Tatrāti** tasmim pubbārāmaṃmīgāramātipāsādānaṃ atthavibhāvane **ayaṃ** idāni vuccamānā

**anupubbī kathā.** Mañīnanti ettha padumarāgamañīnaṃ adhippetattā āha “**aññehi cā**”ti. Tena indanīlādimañīnaṃ saṅgaho daṭṭhabbo. Nīlapītalohitodātamañijīṭṭhapabhassarakabaravaṇṇavasena **sattavaṇṇehi.**

Tañhā sabbaso khīyanti etthāti **tañhāsaṅkhayo** (a. ni. tī. 3.7.61), tasmim. **Tañhāsaṅkhayeti** ca visaye idaṃ bhummanti āha “**taṃ āramaṇaṃ katvā**”ti. **Vimuttacittatāyā**ti sabbasaṃkilesahi vimuttacittatāya. Aparabhāgapaṭipadā nāma ariyasaccābhisamayo, sā sāsanacārigocārā paccattaṃ veditabbatoti āha “**pubbabhāgapaṭipadaṃ saṃkhittena desethāti pucchati**”ti. Akuppadhammatāya khayavayaṃsaṅkhātaṃ antaṃ atītāti accantā, so eva aparihānasabhāvattā accantā niṭṭhā etassāti **accantaniṭṭho.** Tenāha “**ekantaniṭṭho satataniṭṭhoti attho**”ti. Na hi paṭividdhassa lokuttaradhammassa dassanaṃ kuppanaṃ nāma atthi. Accantameva catūhi yogehi khemo etassa atthīti **accantayogakkhemī.** Maggabrahmacariyassa vusitattā, tassa ca aparihānasabhāvattā accantaṃ brahmacārīti **accantabrahmacārī.** Tenāha “**niccabrahmacārīti attho**”ti. **Pariyosānanti** brahmacariyassa pariyosānaṃ.

**Vegāyatīti** turitāyati. **Sallakkhesīti** cintesi, attanā yathā sutāya satthu desanāya anussaraṇavasena upadhāresi. **Anuggaṇhitvāvāti** atthavinicchayavasena anuggahetvā eva. Chasu dvāresu niyuttāti **chadvārikā,** tehi.

**Pañcakkhandhāti** pañcupādānakkhandhā. Sakkāyasabbañhi sandhāya idha “**sabbe dhammā**”ti vuttaṃ vipassanāvisayassa adhippetattā, tasmā āyatanadhātuyopi taggatikā eva daṭṭhabbā. Tenāha bhagavā “**nālaṃ abhinivesāyā**”ti. **Na yuttā abhinivesāya** “**etaṃ mama, eso me attā**”ti ajjhosānāya. “**Alameva nibbindituṃ alaṃ virajjitu**”ntiādīsu (dī. ni. 2.272; saṃ. ni. 2.124-125, 128, 134, 143) viya **alaṃ**-saddo yuttatthopi hotīti āha “**na yuttā**”ti. **Sampajjantīti** bhavanti. Yadiipi “**tatiyā, catutthī**”ti idaṃ visuddhidvayaṃ abhiññāpaññā, tassā pana sappaccayanāmarūpadassanabhāvato, sati ca paccayapariggāhe sappaccayattā (nāmarūpassa aniccatā, aniccaṃ dukkhaṃ, dukkhañca anattāti atthato) lakkhaṇattayaṃ supākaṭameva hotīti āha “**aniccaṃ dukkhaṃ anattāti nātapariññāya abhijānāti**”ti. **Tatheva tīraṇapariññāyāti** iminā aniccādibhāvena nālaṃ abhinivesāyāti nāmarūpassa upasaṃharati, na abhiññāpaññānaṃ sambhāradhammānaṃ. Purimāya hi atthato āpannalakkhaṇattayaṃ gaṇhāti salakkhaṇasallakkhaṇaparattā tassā, dutiyāya sarūpato tassā lakkhaṇattayāropanavasena sammasanabhāvato. Ekacittakkhaṇikatāya abhinipātamatattāya ca **appamattakampi.** Rūparariggahassa oḷārikabhāvato **arūparariggahaṃ dasseti.** Dassento ca vedanāya āsannabhāvato, visesato sukhasārāgitāya, bhavassādagadhitamānasatāya ca **sakkassa vedanāvasena nibbattetvā dasseti.**

**Uppādavayaṭṭhenāti** udayabbayasabhāvena uppajjitvā nirujjhanena. **Aniccāti** addhu vā. Aniccalakkhaṇaṃ aniccatā udayavayatā. **Tasmāti** yasmā pañcannaṃ khandhānaṃ khayato vayato dassanaññaṃ aniccānupassanā, taṃsamaṅgī ca puggalo aniccānupassī, tasmā. **Khayavirāgoti** khayasaṅkhāto virāgo saṅkhārānaṃ palujjanā. Yaṃ āgamma sabbaso saṅkhārehi virajjanā hoti, taṃ nibbānaṃ **accantavirāgo.** **Nirodhānupassimhipīti** nirodhānupassipadepi. “**Eseva nayo**”ti abhidisitvā taṃ ekadesena vivaranto “**nirodhopi hi...pe... duvidhoyevā**”ti āha. Sabbāsavasamvare vuttavossaggova idha “**paṭinissaggo**”ti vuttoti dassento “**paṭinissaggo vuccati vossaggo**”tiādīmāha. **Pariccāgavossaggo** vipassanā. Pakkhandanavasena appanato **pakkhandanavossaggo** maggo aññassa tadabhāvato. **Soti** maggo. **Āramaṇatoti** kiccāsādhānavasena āramaṇakaraṇato. Evañhi maggato aññesaṃ nibbānāramaṇānaṃ pakkhandanavossaggābhāvo siddho hoti. Pariccājanena pakkhandanena cāti **dvīhipi vā kāraṇehi.** Sabbesaṃ khandhānaṃ vossajjanaṃ tappaṭibaddhasaṃkilesappahānena daṭṭhabbaṃ. **Cittaṃ pakkhandatīti** maggasampayuttaṃ cittaṃ sandhāyāha. **Ubhayampetaṃ** vossajjanaṃ. **Tadubhayasamaṅgīti** vipassanāsamaṅgī maggasamaṅgī ca. “**Aniccānupassanāya niccasaññaṃ pajahati**”tiādīvacanato (paṭi. ma. 1.52) yathā vipassanāya kilesānaṃ pariccāgapaṭinissaggo labbhati, evaṃ āyatim tehi kilesahi uppādetabbakkhandhānampi pariccāgapaṭinissaggo vattabbo, pakkhandanapaṭinissaggo pana magge labbhamānāya ekantakāraṇabhūtāya vuṭṭhānagāminivipassanāya vasena veditabbo, magge pana tadubhayampi nīyāgatameva nippariyāyatova labbhamānattā. Tenāha

“**tadubhayasamaṅgī puggalo**”tiādi.

Pucchantassa ajjhāsavāsena “na kiñci loke upādiyati”ti ettha kāmupādānavasena upādiyaṇaṃ paṭikkhipiyatīti āha “**taṇhāvasena na upādiyati**”ti. Taṇhāvasena vā asati upādiyane diṭṭhivasena upādiyaṇaṃ anavakāsamevāti “**taṇhāvasena**”icceva vuttaṃ. **Na parāmasatīti** nādiyati, diṭṭhiparāmāsavāsena vā “nicca”ntiādinā **na parāmasati**. **Samkhitteneva khippaṃ kathesīti** tassa ajjhāsavāsena papañcaṃ akatvā kathesi.

**391. Abhisamāgantvāti** abhimukhaññaṇena ñeyyaṃ samāgantvā yāthāvato veditvā. Tenāha “**jānitvā**”ti. **Yathāparisaviññāpakattāti** yathāparisaṃ dhammasampañiggāhikāya mahatiyā, appakāya vā parisāya anurūpameva viññāpanato. **Pariyantam na niccharatīti** na pavattati. **Mā niratthakā agamāsīti** idaṃ dhammatāvāsena vuttaṃ, na satthu ajjhāsavāsena. Ekañhetam satthu vacīghosassa aṭṭhasu aṅgesu, yadidaṃ parisapariyantatā. **Chiddavivarokāsoti** chiddabhūto, vivarabhūto vā okāsopi natthi, bhagavato saddāsavanakāraṇaṃ vuttameva. **Tasmāti** yathāvuttakāraṇato.

Pañca aṅgāni etassāti pañcaṅgaṃ, pañcaṅgaṃ eva **pañcaṅgikaṃ**. Mahatīdi viñāvīsesopi ātatamevāti “**cammapariyonaddhesū**”ti visesitaṃ. **Ekatalaṃ** kumbhathūṇadaddarādi. Cammapariyonaddham hutvā tantibaddham **ātatavitataṃ**. Tenāha “**tantibaddhapaṇavādī**”ti. Gomukhīādīnampi ettheva saṅgaho daṭṭhabbo. **Vamsādīti ādi-**saddena saṅkhasiṅgādīnaṃ saṅgaho. **Sammādīti** sammataḷakamsatāḷasilāsalaḷakataḷādi. Tattha **sammataḷaṃ** nāma daṇḍamayataḷaṃ. **Kamsatāḷaṃ** lohamayaṃ. Silāya ayopattena ca vādanatāḷaṃ **silāsalaḷakataḷaṃ**. **Samappitoti** sammā appito upeto. Tenāha “**upagato**”ti. Upaṭṭhānavasena pañcahi tūriyasatehi upeto. Evambhūto ca yasmā tehi upaṭṭhito samannāgato nāma hoti, tasmā vuttaṃ “**samaṅgībhūtoti tasseva vevacana**”nti. **Paricāretīti** parito cāreti. Kāni pana cāreti, katham vā cāretīti āha “**sampattiṃ...pe... cāreti**”ti. Tattha **tato tatoti** tasmim tasmim vādite tattha tattha ca vādakajane. **Apanetvāti** vādakajane nisedhetvā. Tenāha “**nissaddāni kārapetvā**”ti. **Devacārikaṃ gacchatiyeva** devatānaṃ manussānañca anukampāya. Svāyamattho **vimānavatthūhi** (vi. va. 1) dīpetabbo.

**392. Appeva sakena karaṇīyena**ti mārisa, moggallāna, mayaṃ sakena karaṇīyena appeva bahukiccāpi na homa. **Apica devānaṃyevāti** apica kho pana devānaṃyeva tāvatimsānaṃ karaṇīyena visesato bahukiccāti atthayojanā. Bhummaṭṭhakadevatānampi keci aṭṭa sakkena vinicchitabbā hontīti āha “**pathavito paṭṭhāyā**”ti. **Niyamentoti** avadhārento. Tam pana karaṇīyaṃ sarūpato dassetuṃ “**devānaṃ hī**”tiādi vuttaṃ. **Tāsanti** devadhītudevaputtapādaparicārikānaṃ. **Maṇḍanapasādhanakārikāti** maṇḍanapasādhanasaṃvidhāyikā. **Aṭṭakaraṇaṃ natthi** saṃsayasseva abhāvato.

**Yanti** savanuggahaṇādivasena suparicitampi yaṃ atthajātaṃ. **Na dissati**, paññācakkhuno sabbaso na paṭibhātīti attho. **Kecīti** sārasamāsācariyā. **Somanassasaṃveganti** somanassasamuṭṭhānaṃ saṃvegamaṃ, na cittasantāsaṃ.

**Samupabyūḷhoti** yujjhanavasena sahapatito samogāḷho. Evambhūto ca yasmā samūhavasena sampiṇḍito hoti, tasmā vuttaṃ “**sannipatito rāsibhūto**”ti. **Anantare attabhāveti** idaṃ dutiyaṃ sakkattabhāvaṃ tato anantarātītena sakkattabhāvena sakkattabhāvasāmaññaṇato ekamiva katvā gahaṇavasena vuttaṃ, aññathā “tatiye attabhāve”ti vattabbaṃ siyā. Maghattabhāvo hi ito tatiyoti. Atha vā yasmim attabhāve so devāsurasāṅgāmo ahoṣi, tassa anantarattā maghattabhāvassa vuttaṃ “**anantare attabhāve**”ti. Sattānaṃ hitesitāya mātāpituupaṭṭhānādīnā cariyāhi **bodhisattacariyā viyassa cariyā ahoṣi**. **Satta vatapadānīti** satta vatakoṭṭhāse.

**Mahāpānanti** mahantaṃ surāpānaṃ. **Gaṇḍapānanti** gaṇḍasurāpānaṃ, adhimattapānanti attho. **Pariharamānāti** parivārentā. **Vedikāpādāti** sinerussa priyante vedikāparikkhepā. **Pañcasu ṭhānesūti** pañcasu paribhaṇḍaṭṭhānesu nāgasenādīhi **ārakkhaṃ ṭhapesi**.

**393. Rāmaṇeyyakanti** ramaṇīyabhāvaṃ. **Masāragallatthambheti** kabaramaṇimaye thambhe. **Suvaṇṇādīmāye ghaṭaketi** “rajatatthambhesu suvaṇṇamāye, suvaṇṇatthambhesu rajatamāye” tiādinā suvaṇṇādīmāye ghaṭake vālarūpakāni ca. Pabāḷhaṃ mattoti **pamatto**. Tenāha “**ativiya matto**” ti. **Nāṭakaparivārenāti** accharāparivārena.

**Acchariyabbhutanti** padadvāyēnāpi vimhayanākārova vutto, tasmā sañjātaṃ acchariyabbhutaṃ vimhayanākāro etesanti **sañjātaacchariyaabbhuta**, tathā pavattacittuppādā. Acchariyabbhutaṃhetukā sañjātā tuṭṭhi etesanti **sañjātatuṭṭhino**. **Samvigganti** sañjātasamvegaṃ. Svāyaṃ samvego yasmā purimāvattāya cittassa calanaṃ hoti, tasmā vuttaṃ “**calita**” nti.

**394. Tamāṃ vinoditanti** pāṭihāriyadassanena “aho therassa iddhānubhāvo” ti sammāpaṭipattiyā sañjātabahumāno, Īdisaṃ nāma sāsanaṃ labhitvāpi mayāṃ niraṭṭhakena bhogamadena sammattā bhavāmāti yoniso manasikāruppādanena sammohatamaṃ vinoditaṃ vidhamitaṃ. **Eteti** mahāthero sakko cāti te dvepi samānabrahmacariyatāya **sabrahmacārino**.

**395. Paññātānanti** pākāṭānaṃ cātumahārāja-suyāma-santusita-paranimmitavasavattimābhrahmānaṃ aññataro, na yesaṃ kesañcīti adhippāyo. **Āraddhadhamavaseneva** pariyoṣāpitattā **yathānusandhināva niṭṭhapesi**.

Cūḷataṇhāsāṅkhayasuttavaṇṇanāya līnatthappakāsānā samattā.

## 8. Mahātaṇhāsāṅkhayasuttavaṇṇanā

**396. Laddhimattanti** micchāgāhamattaṃ, na diṭṭhābhiniveso. **Sassatadiṭṭhīti** niccābhiniveso. **Soti** ariṭṭho bhikkhu. Kathetvā samodhānentanti yojanā. **Samodhānentanti** ca nigamentanti attho. **Tattha tatthevāti** tesu tesu eva bhavesu **nirujjhanti**, na bhavantaraṃ saṅkamanti. **Viññāṇaṃ pana** abhinnaśābhāvaṃ anaññanti adhippāyo. **Idhalokatoti** imasmā attabhāvā. **Paralokanti** parabhavaśāññitaṃ attabhāvaṃ. **Sandhāvātīti** niccatāya kenaci asambaddhaṃ viya gacchati. Tena idhalokato paralokagamanamāha. **Samśaratīti** iminā paralokato idhāgamaṇaṃ. **Sandhāvātīti** vā bhavantarasaṅkamaṇamāha. **Samśaratīti** tattha tattha aparāparasañcaraṇaṃ.

“Paccāye sati bhavati” tiādinā viññāṇassa anvayato byatirekato ca paṭiccasamuppannabhāvaṃ dassento sassatabhāvaṃ paṭikkhipati. **Buddhena akathitaṃ kathesīti** iminā “yaṃ abhāsitaṃ alapitaṃ tathāgatena, taṃ bhāsitaṃ lapitaṃ tathāgatenāti dīpetī” ti (cūḷava. 352, 353) imasmiṃ bhedakaravattusmiṃ sandissatīti dasseti. **Jinacakke pahāraṃ detīti** “tadevitaṃ viññāṇaṃ...pe... anañña” nti niccataṃ paṭijānanto – “sabbe saṅkhārā aniccā (dha. pa. 277), rūpaṃ, bhikkhave, anicca” nti (saṃ. ni. 3.93-94) ca ādinayappavatte satthu dhammacakke khīlaṃ uppādentō pahāraṃ deti. Sabbaññutaññāṇena aniccanti diṭṭhaṃ pvedaṭṭāna viññāṇaṃ niccanti paṭijānanto **vesārajjāñāṇaṃ paṭibāhati**. **Sotukāmaṃ jananti** ariyadhammādhigamaṃ ekantaupāyabhūtaṃ vipassanāmaggaṃ sotukāmaṃ jaṇaṃ niccaggāhapaggaṇhanaṃ **visaṃvādeti**. Tato eva **ariyapathe** ariyadhammavīthiyaṃ tassā paṭikkhipanaṃ **tiriyaṃ nipatitvā**.

**398.** Viññāṇasīsena attanā gahitaṃ attānaṃ vibhāvento “**yvāyaṃ, bhante**” tiādimāha. Tattha **vado vedeyyoti**ādayo sassatadiṭṭhiyā eva abhinivesākārā. Vadatīti **vado**, vacīkammaṃ kārakoti attho. Iminā hi kārakabhāvupāyikasattānaṃ hitasukhāvabodhanasamatthataṃ attano dasseti. Vediyova **vedeyyo**, jānāti anubhavati cāti attho. Īdisānañhi padānaṃ bahulā kattusādhanataṃ saddavidū maññanti. **Vedayatīti** taṃ taṃ anubhavitabbaṃ anubhavati. **Tahiṃ tahinti** tesu tesu bhavayonigatiṭṭhisattāvāsasattānikāyesu.

**399.** Taṃ vādaṃ paggayha ṭhitattā sātissa chinnapaccayatā avirūhadhammatā ca veditabbā. **Heṭṭhāti** alagaddasuttasamvaṇṇanaṃ (ma. ni. atṭha. 2.236-237) sandhāyāha. Parato **heṭṭhāti**

vuttatthānepi eseva nayo. **Pāṭiyekko anusandhīti** tīhipi anusandhīhi avomisso visumyeveko anusandhi. Nanu cāyampi sātissa ajjhāsavayasena pavattitattā ajjhāsavānusandhiyevāti? Na, niyyānamukhena appavattattā. Niyyānañhi purakkhatvā pucchādivasena pavattā itarā desanāpucchānusandhiādayo. Idha tadabhāvato vuttaṃ “**pāṭiyekko anusandhī**”ti. **Parisāya laddhiṃ sodhentoti** yādisī sātissa laddhi, tadabhāvadassanavasena parisāya laddhiṃ sodhento, parisāya laddhisodhaneneva sāti gaṇato nissārito nāma jāto.

**400. Yaṃ yadevāti** idaṃ yadipi avisesato paccayadhammaggaṇaṃ, “viññānantveva saṅkhyāṃ gacchati”ti pana vuttattā taṃtaṃviññāṇassa samaññānimittapaccayajātaṃ gahitanti daṭṭhabbaṃ. Tena vuttaṃ pāḷiyāṃ – “cakkhuvīññānantveva saṅkhyāṃ gacchati”tiādi. Atha vā taṃtaṃdvārāniyataṃ itarampi sabbaṃ tassa tassa viññāṇassa paccayajātaṃ idha “yaṃ yadevā”ti gahitaṃ, tattha pana yaṃ asādhāraṇaṃ, tena samaññāti “cakkhuvīññānantvevā”tiādi vuttaṃ. **Dvārasaṅkantiyā abhāvanti** viññāṇassa dvārantarasaṅkamanassa abhāvaṃ. Svāyaṃ oḷārikanayena mandabuddhīnaṃ sukhāvabodhanatthaṃ nayadassanavasena vutto. Na hi kadāci paccuppannaṃ viññāṇaṃ vigacchantaṃ anantaraviññāṇaṃ saṅkamati anantarādipaccayālābhe tassa anuppajjanato.

**Evamevāti** yathā aggi upādānaṃ paṭicca jalanto anupādāno tattheva nibbāyati, na katthaci saṅkamati, evameva. “**Paccayavekallena tattheva nirujjhati**”ti kasmā vuttaṃ, na hettha anuppādanirodho icchito tādisassa nirodhassa idha anadhippetattā, atha kho khaṇanirodho, so ca sābhāvikattā na paccayavekallahetuko? Saccametāṃ, taṃtaṃdvārikassa pana viññāṇassa dvārantaṃ asaṅkamitvā tattha tattheva nirujjhaṇaṃ idhādhippetāṃ. Yesaṅca paccayānaṃ vasena dvārantarikaviññāṇena bhavitabbaṃ, tesāṃ tadabhāvato paccayavekallaggahaṇaṃ, tasmā paccayavekallena na sotādīni saṅkamitvā sotaviññāṇantiādi saṅkhyāṃ gacchatīti yojanā. Etena yaṃ viññāṇaṃ cakkhurūpādipaccayasāmaggiyā vasena cakkhuvīññāṇasaṅkhyāṃ gacchati, tattha tattheva nirujjhati tāvakālikabhāvato, tassa pana sotasaddādipaccayābhāvato kuto sotaviññāṇādisamaññā, evamappavattito tassa kuto saṅkamoti dassitaṃ hoti. **Viññāṇappavatteti** viññāṇappavattiyāṃ. **Dvārasaṅkantimattanti** dvārantarasaṅkamanamattampi na vadāmi tattha tattheva bhijjanato paccayassa upādavantato sāti ca uppāde avassaṃbhāvī nirodhoti hutvā abhāvattāna aniccatā dīpitā hotīti.

**401.** “Paṭiccasamuppannaṃ viññāṇaṃ vuttaṃ mayā, aññatra paccayā natthi viññāṇassa sambhavo”ti pāḷiyā anvayato ca byatirekato ca viññāṇassa saṅkhatatāva dassitāti āha “**sappaccayabhāvaṃ dassetvā**”ti. Hetupaccayehi jātaṃ nibbattaṃ “bhūta”nti idhādhippetāṃ, taṃ atthato pañcakkhandhā tabbinimuttassa sappaccayassa abhāvato, yaṅca khandhapañcakaṃ attano tesaṅca bhikkhūnaṃ, taṃ “bhūtamida”nti bhagavā avocāti āha “**idaṃ khandhapañcaka**”nti. Attano phalaṃ āharatīti āhāro, paccayo. Sambhavati etasmāti sambhavo, āhāro sambhavo etassāti **āhārasambhavaṃ**. Tenāha “**paccayasambhava**”nti. **Tassa paccayassa nirodhāti** yena avijjādīnā paccayena khandhapañcakaṃ sambhavati, tassa paccayassa anuppādanirodhā. Khaṇanirodho pana kāraṇanirapekkho.

**Nossūti** saṃsayajotano nipātoti āha “**bhūtaṃ nu kho idaṃ, na nu kho bhūta**”nti. **Bhūtamidaṃ nossūti** ca iminā khandhapañcakameva nu kho idaṃ, udāhu attattaniyanti evaṃjātiko saṃsayanākāro gahito. **Tadāhārasambhavaṃ nossūti** pana iminā sahetukaṃ nu kho idaṃ bhūtaṃ, udāhu ahetukanti yathā ahetukabhāvāpanno saṃsayanākāro gahito, evaṃ visamahetukabhāvāpannopi saṃsayanākāro gahitoti daṭṭhabbaṃ. Visamahetunopi paramatthato bhūtassa ahetukabhāvato. Visamahetuvādopi parehi parikkappitamattatāya sabhāvaniyatīyadicchādivādehi samānayogakkhamoti. **Nirodhadhammaṃ nossūti** iminā yathā aniccaṃ nu kho idaṃ bhūtaṃ, udāhu niccanti aniccatāṃ paṭicca saṃsayanākāro gahito, evaṃ dukkhaṃ nu kho, udāhu na dukkhaṃ, anattā nu kho, udāhu na anattatīpi saṃsayanākāro gahitoyevāti daṭṭhabbaṃ aniccassa dukkhabhāvādivassāṃbhāvato, nicce ca tadubhayābhāvato. **Yāthāvasarasalakkhaṇatoti** aviparītasarasato salakkhaṇato ca, kiccatō ceva sabhāvato cāti attho. Vipassanāya adhiṭṭhānabhūtāpi paññā vipassanā evāti vuttaṃ “**vipassanāpaññāyā**”ti. **Sarasatoti** ca sabhāvato. **Salakkhaṇatoti** sāmāññalakkhaṇato. Tenāha “**vipassanāpaññāyā sammā passantassā**”ti.

**Vuttanayenevāti** “yāthāvasarasalakkhaṇato”ti vuttanayeneva. **Ye yeti** tassaṃ parisāyaṃ ye ye bhikkhū. **Sallakkhesunti** sammadeva upadhāresuṃ.

**Tehīti** tehi bhikkhūhi. **Tatthāti** tissaṃ vipassanāpaññāyaṃ. **Nittañhabhāvanti** tañhābhāvaṃ “etaṃ mama”nti tañhāggāhassa pahīnataṃ. Etenapi bhagavā “ahaṃ, bhikkhave, dhammesupi tañhāpahānameva vaṇṇemi, sāti pana moghapuriso attabhāvepi tañhāsaṃvaddhanim viparītadiṭṭhim paggayha tiṭṭhatī”ti sātim niggaṇhāti. **Sabhāvadassanenāti** dhammānaṃ aviparītasabhāvadassanena. **Paccayadassanenāti** kāraṇadassanena anavasesato hetuno paccayassa ca dassanena. **Alliyethāti** tañhādiṭṭhivasena nissayetha. Tenāha “**tañhādiṭṭhīhī**”ti. **Kelāyethāti** pariharaṇakeliyā parihareyyātha. Tenāha “**kīlamānā vihareyyāthā**”ti. **Dhanaṃ viya icchantāti** dhanaṃ viya drabyaṃ viya icchaṃ taṇhaṃ janentā. Tenāha “**gedhaṃ āpajjeyyāthā**”ti. **Mamattaṃ uppādeyyāthāti** “mamamida”nti tañhādiṭṭhivasena abhinivesaṃ janeyyātha. Nikantivasenapi gahaṇatthāya no desito, tassa vā saṅhasukhumassa vipassanādhammassa gahaṇaṃ nāma nikantiyā eva siyā, na oḷārikataṇhāyāti vuttaṃ “**nikantivasenā**”ti.

**402.** Paṭicca etasmā phalaṃ eṭīti **paccayo**, sabbo kāraṇavisesoti āha “**khandhānaṃ paccayaṃ dassento**”ti. Yāva avijjā hi sabbo nesaṃ kāraṇaviseso idha dassito. Puna ādīto paṭṭhāya yāva pariyoṣānā, antato paṭṭhāya yāva ādīti anulomato paṭilomato ca vaṭṭavivaṭṭadassanavasena nānāyehi paṭiccasamuppādo dassito, niccaggāhassa nimittabhūto kilesopi idha natthīti dīpeti. **Tampi vuttatthamevāti** tampi “ime ca, bhikkhave, cattāro āhārā”tiādi yāva “tañhāpabhavā”ti pālīpadaṃ, tāva vuttatthameva **sammādiṭṭhisuttavaṇṇanāyaṃ** (ma. ni. aṭṭha. 1.89). Sesāṃ paṭiccasamuppādakathābhāvato **visuddhimagge** (visuddhi. 2.570) **vitthāritāvāti** imināva saṅgahitaṃ.

**404. Imasmiṃ sati idaṃ hotīti**ādīsu yaṃ vattabbaṃ, taṃ paramatthadīpaniyaṃ **udānaṭṭhakathāyaṃ** (udā. aṭṭha. 1) vuttanayeneva veditabbaṃ.

**407. Paṭidhāvanāti** paṭisaraṇaṃ, pubbe attano āgataṃ atītaṃ addhānaṃ uddissa tañhādiṭṭhivasena paṭigamananti attho. Nanu vicikicchāvasena pālīyaṃ paṭidhāvanā āgatāti? Saccāṃ āgatā, sā pana tañhādiṭṭhihetukāti “tañhādiṭṭhivasenā”ti vuttaṃ. **Tatthāti** tasmim yathādhighate nāṇadassane.

**Niccālabhāvanti** suppatiṭṭhitabhāvaṃ, titthiyavādavātehi akampiyabhāvañca. **Garūti** garuṇayutto. **Bhāriko** pāsānacchattasādiso. **Akāmā anuvattitabboti** saddhāmattakeneva anuvattanamāha, na aveccappasādena. **Kiccanti** satthukiccaṃ. **Brāhmaṇānanti** jātimantabrāhmaṇānaṃ. **Vatasamādānānīti** magavatādivatasamādānāni. **Diṭṭhikutūhalānīti** taṃtaṃdiṭṭhiggāhavasena “idaṃ saccāṃ, idaṃ sacca”ntiādinā gahetabbakutūhalāni. **Evaṃ nissaṭṭhānīti** yathā mayā tumhākaṃ ovādo dinno, evaṃ nissaṭṭhāni vatādīni taṃ atikkamitvā kiṃ gaṇheyyātha. **Sayaṃ nāṇena nātanti** paraneyyataṃ muñcitvā attano eva nāṇena yāthāvato nātāṃ. Evaṃbhūtañca sayāṃ paccakkhato diṭṭhaṃ nāma hotīti āha “**sayāṃ paññācakkhunā diṭṭha**”nti. **Sayaṃ vibhāvitanti** tehi bhikkhūhi tassa atthassa paccattaṃ vibhūtabhāvaṃ āpāditaṃ. **Upanītāti** upakkamena dhammadesanānusārena nītā. **Mayāti** kattari karaṇavacanaṃ. **Dhammenāti** kāraṇena. **Etaṃ vacananti** etaṃ “sandiṭṭhiko”tiādivacanaṃ.

**408. Taṃ sammohaṭṭhānaṃ assa** lokassa. **Samodhānenāti** samāgamena. Gabbhati attabhāvabhāvena vattaṭīti **gabbho**, kalalādiavatto dhammapabandho, tannissitattā pana sattasantāno “gabbho”ti vutto yathā “mañcā ukkuṭṭhim karontī”ti. Tannissayabhāvato mātukucchi “gabbho”ti veditabbo, gabbho viyāti vā. Yathā hi nivāsaṭṭhānatāya sattānaṃ ovarako “gabbho”ti vuccati, evaṃ gabbhaseyyakānaṃ yāva abhijāti nivāsaṭṭhānatāya mātukucchi “gabbho”ti vuttoti.

**Yamekarattinti** yassaṃ ekarattiyaṃ. Bhummatthe hi idaṃ upayogavacanaṃ, accantasamyoge vā. **Paṭhamanti** sabbapaṭhamāṃ paṭisandhikkhaṇe. **Gabbheti** mātukucchiyaṃ. **Mānavoti** satto. Yebhuyyena sattā rattiyaṃ paṭisandhim gaṇhantīti rattiggahaṇaṃ. **Abbhūṭṭhitovāti** uṭṭhitaabbho viya, abhimukhabhāvena vā uṭṭhito eva maraṇassāti adhippāyo. **So yātīti** so māṇavo yāti paṭhamakkhaṇato



paṭṭhāya gacchateva. **Sa gacchaṃ na nivattatīti** so evaṃ gacchanto khaṇamattampi na nivattati, aññadattu maraṇameva upagacchatīti gāthāya attho.

**Utusamayaṃ sandhāya vuttaṃ**, na lokasamaññātarajassa lagganadivasamattaṃ. Idāni vuttamevatthaṃ pākaṭataraṃ kātuṃ “**mātugāmassa kira yasmi**”ntiādi vuttaṃ. **Tatthāti** tasmim gabbhāsaye. **Sanṭhahitvāti** nibbattitvā. **Bhijjivāti** aggahitagabbhā eva bhinnā hutvā. Ayañhi tassā sabhāvo. **Vatthu suddhaṃ hotīti** paggharitalohitattā anāmayattā ca gabbhāsayo suddho hoti. Suddhavatthuttā tato paraṃ katipayadivasāni **khattameva hoti** gabbhasaṅghahanassa parittassa lohitalessa vijjānāntā. Sambhavassa pana kathaṃ sabbhāvoti āha “**tasmim samaye**”tiādi. Itthisantānēpi sukkadhātu labbhateva. Tenāha “**aṅgaparāmasanenapi dārako nibbattatiyevā**”ti. Yathā pārīkāya nābhiparāmasanena sāmassa bodhisattassa, diṭṭhamaṅgalikāya nābhiparāmasanena maṇḍabyassa nibbatti. **Gandhabboti** gandhanato uppajjanagatiyā nimittupaṭṭhāpanena sūcanato gandhoti laddhanāmena bhavagāmikammunā abbatī pavattatīti **gandhabbo**, tattha uppajjanakasatto. Tenāha “**tatrūpagasatto**”ti. **Kammayantayantitoti** tatrūpapattiāvahena kammaṣaṅkhātena pellanakayantena tathattāya pellito upanīto. **Mahantena jīvitasamsayenāti** vijāyanaparikkilesena “jīvissāmi kho, na nu kho jīvissāmi ahaṃ vā, putto vā me”ti evaṃ pavattena jīvitasamsayena vipulena garutarena samsayena. **Taṃ ṭhānanti** thanappadesamāha. Kīḷanti tenāti kīḷanaṃ, kīḷanameva **kīḷanakaṃ**.

**409. Sārājatīti** sārattacitto hoti. **Byāpajjatīti** byāpannacitto hoti. **Kāye** kesādīdvattiṃsāsucisamudāye taṃsabhāvārammaṇā **sati kāyasati**. **Anupaṭṭhapetvāti** anuppādetvā, yathāsabhāvato kāyaṃ anupadhāretvāti attho. **Parittacetasoti** kilesehi parito khaṇḍitacitto. Tenāha “**akusalacitto**”ti. **Ete** akusaladhammā. **Nirujjhantīti** nirodhaṃ pattā honti. **Taṇhāvasena abhinandatīti** sappītikataṇhāvasena abhimukhaṃ hutvā nandati. **Abhivadatīti** taṇhāvasena taṃ taṃ ārammaṇaṃ abhinivissa vadati. **Ajjhosāyāti** anaññāsādhāraṇaṃ viya ārammaṇaṃ taṇhāvasena anupavisitvā. Tenāha “**gilitvā pariniṭṭhapetvā**”ti. **Dukkhaṃ kathaṃ abhinandatīti** ettha dukkhaḥetukaṃ abhinandanto dukkhaṃ abhinandati nāmāti daṭṭhabbaṃ. **Aṭṭhakathāyaṃ** pana yāvataṃ yassa dukkhe diṭṭhitaṇhā abhinandanā appahīnā, tāvatāyaṃ dukkhaṃ abhinandati nāmāti dassetuṃ “**ahaṃ dukkhito mama dukkhanti gaṇhanto abhinandati nāmā**”ti vuttaṃ. Tena gāhadvayahetukā tattha abhinandanāti dasseti. **Puna ekavāranti** punapi ekavāraṃ. Phalahetusandhihetuphalasandhivasena **dvisandhī**. “Gabbhassāvakkanti hotī”tiādinā atthato sarūpato ca etarahi phalaṣaṅkhepassa. **Sarūpeneva** ca itaradvayassa desitattā āha “**tisaṅkhepa**”nti.

**410-414.** Samathayānikassa bhikkhuno vedanāmukhena saṅkhepeneva yāva arahattā kammaṭṭhānaṃ idha kathitanti āha “**saṃkhittena taṇhāsaṅkhayavimuttiṃ dhārethā**”ti. “Imaṃ taṇhāsaṅkhayavimutti”nti ca bhagavā yathādesitaṃ desanaṃ avocāti vuttaṃ “**imaṃ...pe... vimuttidesana**”nti. Yadi evaṃ kathaṃ desanā vimuttīti āha “**desanā hi...pe... vimuttīti vuttā**”ti. Yassā taṇhāya vasena sāti bhikkhu sassataggāhamahāsaṅghāṭapaṭimukko, sā sabbabuddhānaṃ desanā hatthāvalambanēpi durugghāṭiyā jātāti āha “**mahātaṇhājāletaṇhāsaṅghāṭapaṭimukka**”nti. **Mahātaṇhājāleti** mahante taṇhāṭe. **Taṇhāsaṅghāṭeti** taṇhāya saṅghāṭe. Tathābhūto ca tassa abbhantare kato nāma hotīti āha “**anupaviṭṭho antogadho**”ti. Sesam suviññeyyameva.

Mahātaṇhāsaṅkhayasuttavaṇṇanāya līnatthappakāsanā samattā.

## 9. Mahāassapurāsuttavaṇṇanā

**415. Jānapadinoti** janapadavanto, janapadassa vā issarā rājakumārā gottavasena **aṅgā nāma**. Tesam nivāso yadi eko janapado, kathaṃ bahuvacananti āha “**ruḷhīsaddenā**”ti. Akkharacintakā hi īdisesu ṭhānesu yutte viya salīngavacanāni (pāṇini 1.2.51) icchanti. Ayamettha ruḷhī yathā “kurūsu viharati, mallesu viharati”ti ca. Tabbisesane pana janapadasadde jātisadde ekavacanameva. Tenāha “**aṅgesu janapade**”ti. Assā vuccanti pāsāṇāni, tāni suandarāni tattha santīti “**assapura**”nti so nigamo

vuttoti kecī. Apare pana ājānīyo asso rañño tattha gahaṇaṃ upagatoti “**assapura**”nti vuttoti vadanti. Kiṃ tehi, nāmametaṃ tassa nigamassa. Yasmā pana tattha bhagavato nibaddhavasanaṭṭhānaṃ kiñci nāhosi, tasmā “**taṃ gocaragāmaṃ katvā viharati**”ceva vuttaṃ. Tathā hi pāḷiyaṃ “**assapuraṃ nāma aṅgaṇaṃ nigamo**”ti gocaragāmakittanameva kataṃ.

**Evarūpena silenāti**ādīsu sīlaggahaṇena vārittasīlamāha. Tena sammāvācākamantājīve dasseti. Ācāraggahaṇena cārittasīlaṃ. Tena parisuddhaṃ kāyavacīsamācāraṃ. Paṭipattiggahaṇena samathavipassanāmaggaphalasaṅghaṃ sammāpaṭipattiṃ. **Lajjinoti** iminā yathāvuttasīlācāramūlakāraṇaṃ. **Pesalāti** iminā pārisuddhiṃ. **Uḷāraguṇāti** iminā paṭipattiyā pāripūriṃ. **Bhikkhusaṅghasseva vaṇṇaṃ kathenti** idamaṃ tesamaṃ upāsakānaṃ yebhuyyena bhikkhūnaṃ guṇakittanapasutatāya vuttaṃ. Te pana saddhammepi sammāsambuddhepi abhippasannā eva. Tenāha “**buddhamāmakā dhammāmāmakā**”ti. Vatthuttaye hi ekasmiṃ abhippasannā itaradvaye abhippasannā eva tadavinābhāvato. **Piṇḍapātāpacāyaneti** lakkhaṇavacanamaṃ yathā “**kākehi sappi rakkhitabba**”nti, tasmā paccayaṭṭhānaṃ vuttaṃ hoti. Paccayaḍāyakānañhi kāraṇaṃ attano sammāpaṭipattiyā mahapphalabhāvassa karaṇaṃ idha “**piṇḍapātāpacāyana**”nti adhippetamaṃ.

**Samaṇakaraṇāti** samaṇabhāvakarā, samaṇabhāvassa kārakāti attho. Te pana ekantato attano santāne uppādītā vaḍḍhitā ca hontīti āha “**samādāya paripūrītā**”ti. **Samaṇaggahaṇa**ñcetta samaṇavasena, na sāmāñnamattenāti āha “**samitapāpasamaṇa**”nti. **Brāhmaṇakaraṇāti** etthāpi vuttanayenevattho veditabbo. Byañjanato eva cāyaṃ bhedo, yadidaṃ samaṇabrāhmaṇāti, na atthato. **Samaṇena kattabbadhammāti** samaṇadhamme ṭhitena sampādetabbadhammā. Yo hi heṭṭhimasikkhāsāṅkhātasamaṇabhāve suppatiṭṭhito, tena ye uparisikkhāsāṅkhātasamaṇabhāvā sampādetabbā, tesamaṃ vaseneva vuttasamaṇena kattabbadhammā vuttāti. Tathā hi tesamaṃ samaṇabhāvāvahataṃ sandhāyāha “**tepi ca samaṇakaraṇā hontiyevā**”ti. **Idha panāti** mahāassapure. **Hirottappādivasena desanā vitthāritāti** hirottappa-parisuddhakāyavacīmanosamācārājīvāindriyaṃvara-bhojanemattaññuta-jāgariyānuyogasatisampajāñña-jhānavijjāvasena samaṇakaraṇadhammadesanā vitthārato desitā, na tikanipāte viya saṅkhepato. **Phalaggahaṇeneva** vipākaphalaṃ gahitaṃ, taṃ pana ukkaṭṭhaniddesena catubbidhaṃ sāmāñnaphalaṃ daṭṭhabbaṃ. **Ānisaṃsaggahaṇena** piyamaṇāpatādiudrayo. **Tasseva atthoti** tasseva avañcāpadasseva atthaniddeso. “**Yassā hi**”tiādīnā byatirekavasena atthaṃ vadati. **Ettakena ṭhānenāti** ettakena pāḷipadesena. **Hirottappādīnaṃ** upari pāḷiyaṃ vuccamānānaṃ samaṇakaraṇadhammānaṃ. **Vaṇṇaṃ kathesīti** guṇaṃ ānisaṃsaṃ abhāsī. **Satipaṭṭhāne vuttanayenāti** “**apica vaṇṇabhaṇanameta**”ntiādīnā **satipaṭṭhānavāṇṇanāyaṃ** (dī. ni. aṭṭha. 2.373; ma. ni. aṭṭha. 1.106) vuttanayena.

**416. Yaṃ hiriyatīti** yena dhammena hetubhūtena vā jigucchati. Karaṇe hetamaṃ paccattavacanamaṃ. **Yanti** vā liṅgavipallāsena vutto, dhammoti attho. **Hiriyitabbenāti** upayogathe karaṇavacanamaṃ, hiriyitabbayuttakaṃ kāyaduccaritādinti attho. **Ottappitabbenāti** etthāpi eseva nayo. Ajjhataṃ niyakajjhataṃ jātiādi samuṭṭhānaṃ etissāti **ajjhattasamuṭṭhānā hirī**, bahiddhā attato bahibhūto parasatto samuṭṭhānaṃ etissāti **bahiddhāsamuṭṭhānaṃ ottappaṃ**. Attādhīpatito āgatā **attādhīpateyyā**, attānaṃ adhipatiṃ katvā pavattā. **Lajjāsabhāvasaṅghitāti** pāpajigucchanaśabhāvavāṭṭhāyini. Sappatissavalakkhaṇattā garuṇā kismiñci vutte gāravavasena patissavanaṃ patissavo, saha patissavenāti **sappatissavaṃ**, patissavabhūtaṃ taṃsabhāvañca yaṃ kiñci gāraṃ. Jātiādimahattatāpaccavekkhaṇena uppajjamānā ca hirī tattha gāravavasena pavattatīti sappatissavalakkhaṇāti vuccati. **Bhayasabhāvasaṅghitanti** pāpato bhāyanasabhāvavāṭṭhāyī, vajjabhīrukabhayaḍassāvilakkhaṇattā vajjama bhāyati taṃ bhayato passatīti **vajjabhīrukabhayaḍassāvī**, evamaśabhāvaṃ ottappaṃ. Ajjhattasamuṭṭhānādītā ca hirottappānaṃ tattha tattha pākāṭṭhābhāveneva vuccati, na paresamaṃ kadāci aññamaññaviṇṇavipāyogā. Na hi lajjanaṃ nibbhayaṃ, pāpabhayaṃ vā alajjanaṃ hotīti. Ayametta saṅkhepo, vitthāro pana **aṭṭhasālīniyaṃ** (dha. sa. aṭṭha. 1. balarāsivaṇṇanā) vuttanayeneva veditabbo. Lokamariyādassa pālanato **lokapālādhammā nāma**. **Sukkāti** odātā pabhassarabhāvakāraṇā, sukkābhijātihetutāya **vā sukkā**. **Sambhedanti** ācāramariyādāsaṅkaraṃ. Devabhāvāvahā dhammāti

**devadhammā.**

**Sukkadhammasamāhitā**ti yathāvuttasukkadhammasamaṅgino. **Santoti** vūpasantadosā. **Sappurisā**ti santajanā. Saparahitasādhakā hi sādhavo.

Avayavavinimuttassa samudāyassa abhāvato, avayavena ca samudāyassa apadisitabbato ovādūpasampadāvahaovādekadeso **ovādūpasampadā**ti. **Idhā**ti imasmim assapure. **Ete** hirottappadhammā. **Samaṇadhammā nāmā**ti **dassitā** mūlabhūtasamaṇabhāvakarā dhammāti katvā. Tathā hi tesam ādito gahaṇam.

Yassa adhigamena nippariyāyato samaṇā nāma honti, so ariyamaggo “samaṇassa kammaṃ paṭipadā”ti katvā sāmāññaṃ, tassa pana phalabhāvato, ārammaṇakaraṇavasena araṇīyato phalanibbānāni **sāmāññattho**. Rāgaṃ khepetūti **rāgakkhayo**, ariyamaggo. Rāgo khīyati etthāti **rāgakkhayo**, nibbānaṃ. Phalaṃ pana kāraṇūpacārena **rāgakkhayo** daṭṭhabbo. **Dosakkhayo mohakkhayoti** etthāpi eseva nayo. Sāmāññabhūto attho **sāmāññattho**, maggo, sāmāññassa atthoti **sāmāññattho**, phalanti āha “**maggampi phalampi ekato katvā sāmāññattho kathito**”ti. Tayidaṃ ukkaṭṭhaniddesena vuttaṃ. Sīlādipubbabhāgapaṭipadāpi hi idha “sāmāññattho”ti gahitā. Tenevāha “sati uttarikaraṇīye”ti. **Paṭivedayāmī**ti punappunaṃ ñāpemi.

**417. Kammapathavasenevā**ti akusalakammapathabhāvene va, tato tādisampi akusalakammaṃ bhikkhussa kātuṃ na yuttanti duṭṭhullabhāvene va tato oramatīti adhippāyo. **Sikkhāpadabaddhenā**ti sikkhāpadapaññāpanena. **Pānīyaghaṭe vā patte vā kākānaṃ hattham vā daṇḍam vā leḍḍum vā**ti sabbamidaṃ nidassanamattaṃ daṭṭhabbaṃ. Yattha katthaci hi ṭhitānaṃ aññesampi pāṇīnaṃ uṭṭhāpanādi sabbam anīṭṭhakarānaṃ idha aparissuddhakāyasamācārabhāvene va saṅgahitanti. **Uttānoti** uddhamuddhaṃ tanotīti uttāno. Evaṃbhūto ca kenaci anuppādabhūmiyaṃ sañjātasālakalyāṇikkhandho viya uparūpari uggaṭuggato pākaṭo ca hotīti āha “**uggato pākaṭo**”ti. **Anāvaṭoti** anivuto. Tenāha “**asañchanno**”ti, nacchādetabboti attho. **Ekasadi**so visuddhabhāvena. **Antarantare chiddarahito** pubbenāparaṃ sammāpaṭipattiyā sandhānena. **Samvuto** kāyikassa samvvarassa anupakkilesato. Tenāha “**kilesānaṃ dvāraṃ pidahanenā**”ti.

**418.** Ettha yathā lahukataraṃ kākuṭṭhāpanādikāyakammaṃ kāyasamācārassa aparissuddhabhāvāvahaṃ sallekhevīkōpanato, micchāvitakkaṇamattañca manosamācārassa, evaṃ yaṃ kiñci aniyānakathākathanamattaṃ vacīsamācārassa aparissuddhabhāvāvahaṃ sallekhevīkōpanato, na hasādhippāyena musākathananti daṭṭhabbaṃ. Hasādhippāyena hi musākathanam sikkhāpadabaddhene va paṭikkhittanti.

**420.** Ājīvopi ekacco kammapathavasena vārito labbhati. So pana atioḷāriko kāyavacīsamācārāvāresu vuttanayo evāti na gahitoti daṭṭhabbaṃ. Ye pana “tādiso bhikkhūnaṃ ayogyato na gahito”ti vadanti, taṃ micchā tathā sati kāyavacīsamācārāvārepi tassa aggahetabbabhāvāpattito. “Khādatha pivathā”ti pucchā attano khāditukāmatādīpanena, pariyaṅkathābhāvato panesā sallekhevīkōpanā jātā.

**422.** Anesanaṃ pahāya dhammena samena paccaye pariyesanto **pariyesanamattaññū** nāma. Dāyakassa deyyadhammassa attano ca pamāṇaññūtapaṭiggaṇhanto **paṭiggahaṇamattaññū** nāma. Yoniso paccavekkhitvā paribhuñjanto **paribhogamattaññū** nāma.

**423.** **Ekasmim koṭṭhāseti** majjhimayāmasaññite ekasmim koṭṭhāse. “**Vāmena passena sentī**”ti evaṃ vuttā. **Dakkhiṇapassena sayāno nāma natthi** dakkhiṇahatthassa sarīraggaṇādīpayogakkhamato. Purisavasena cetam vuttaṃ.

**Tejussadattā**ti iminā sīhassa abhīrukabhāvaṃ dasseti. Bhīrukā hi sesamigā attano āsayam

pavisitvā santāsapubbakam yathā tathā sayanti, sīho pana abhīrukabhāvato satokārī bhikkhu viya satim upatthapetvāva sayati. Tenāha “**dve purimāpāde**”tiādi. Seti abyāvaṭabhāvena pavattati etthāti **seyyā**, catutthajjhānameva seyyā. Kiṃ pana taṃ catutthajjhānanti? Ānāpānacatutthajjhānam. Tattha hi ṭhatvā vipassanam vaḍḍhetvā bhagavā anukkamena aggamaggaṃ adhigato tathāgato jātoti keci, tayidaṃ padaṭṭhānam nāma na seyyā. Apare pana “catutthajjhānasamanantarā bhagavā parinibbāyī”ti vuttapadam gahetvā “lokiyacatutthajjhānasamāpatti tathāgataseyyā”ti vadanti, tathā sati parinibbānakālikā tathāgataseyyāti āpajjati, na ca bhagavā catutthajjhānam samāpajjanabahulo vihāsi, aggaphalajjhānam panettha “catutthajjhāna”nti adhippetam. Tattha yathā sattānam niddupagamanalakkhaṇā seyyā bhavaṅgacittavārasena hoti, tañca tesam paṭhamajātisamanvayaṃ yebhuyyavuttikam, evaṃ bhagavato ariyajātisamanvayaṃ yebhuyyavuttikam aggaphalabhūtam catutthajjhānam “tathāgataseyyā”ti veditabbam. **Sihaseyyāti** seṭṭhaseyyāti āha “**uttamaseyyā**”ti.

**426. Vigatantānīti** iṇamūlāni. **Tesanti** iṇamūlānam. **Pariyantoti** avaseso.

Pavattinivāraṇena **catuiriyāpatham chindanto**. **Ābādhatīti** pīleti. **Dukkhīti** sañjātadukkho. Appam balaṃ **balamattā**. Appattho hi ayam **mattā**-saddo “mattāsukhapariccāgā”tiādīsu (dha. pa. 290) viya, balavattho pana **mattā**-saddo anathantaro. **Sesanti** “tassa hi bandhanā muttomhīti āvajjayato tadubhayaṃ hoti”tiādīnā vattabbam sandhāyāha. **Sabbapadesūti** vuttāvasiṭṭhesu sabbapadesu. Yenakāmaṃ yathārucci gacchatīti **yenakāmaṃgamoti** anunāsikalopam akatvā niddeso. Bhujō attano yathāsukhaviniyogo isso icchitabbo etthāti **bhujisso**, sāmiko. So pana aparasantakatāya “**attano santako**”ti vutto. Dullabhaāpatāya kam tārenti etthāti **kantāroti** āha “**nirudakam dīghamagga**”nti.

**Vināsetīti** khādanadubbiniyojanādīhi yathā iṇamūlam kiñci na hoti, tathā karoti. **Yamhi** rāgavatthumhi. **So** puggalo. **Tena** rāgavatthunā, puriso ce itthiyā, itthī ce purisena. **Iṇam viya kāmaccando daṭṭhabbo** pīlāsamānato.

**Na vindatīti** na jānāti. **Upaddavethāti** sukhavihārassa upaddavaṃ karotha, vibādhetthāti attho. **Rogo viya byāpādo daṭṭhabbo** sukhabhāñjanasamānato.

Nānāvidhahetūpāyālānkatatāya khandhāyatanadhātupaṭṭicasamuppādādidhammanītivicittatāya ca **vicittanaye**. **Dhammassavaneti** dhammakathāyam. Kathā hi sotabbaṭṭhena “savana”nti vuttā. Evamettha silam vibhattam, evam jhānābhīññā, evam vipassanāmaggaphalānīti **neva tassa** dhammassavanassa **ādimajjhapariyosānam jānāti**. **Uṭṭhiteti** niṭṭhite. **Aho kāraṇanti** tattha tattha paṭiññānurūpena nikkhittasādhanavasena gahitakāraṇam. **Aho upamāti** tasseva kāraṇassa paṭiṭṭhāpanavasena anvayato byatirekato ca paṭiṭṭham udāharaṇādi. **Bandhanāgāram viya thinamiddham daṭṭhabbam** dukkhato niyyānassa vibandhanato.

Yasmā kukkucanīvaraṇam uddhaccarahitam natthi, yasmā vā uddhaccakukkucam samānakiccāhārapaṭipakkham, tasmā kukkucassa visayam dassento “**vinaye apakataññunā**”tiādīmāha. Yathā hi uddhaccam sattassa avūpasamakaram, tathā kukkucampi. Yathāpi uddhaccassa nīativitakkādi āhāro, tathā kukkucassapi. Yathā ca uddhaccassa samatho paṭipakkho, tathā kukkucassapīti. **Dāsabyam viya uddhaccakukkucam daṭṭhabbam** aseribhāvāpādanato.

Soḷasavatthukā vicikicchā aṭṭhavatthukam vicikiccham anupaviṭṭhāti āha “**aṭṭhasu ṭhānesu vicikicchā**”ti. **Vicikicchantoti** samsayanto. **Adhimuccitvāti** pattiyāyevā. **Gaṇhitunti** saddheyyavatthum pariggahetum. Abhimukham sappanam **āsappanam**, parito sappanam **parisappanam**. Padadvayenapi cittassa anicchanākārameva vadati. Khemantagāmimaggaṃ na pariyoḡāhati etenāti **apariyoḡāhanam**, ussaṅkitapariyoḡāhanāyeva chambhitam hoti cittam yassa dhammassa vasena, so dhammo **chambhitattanti** vicikicchānākāramāha. Tenāha “**cittassa uppādayamānā**”ti. **Kantāraddhānamaggo viyāti** sāsāṅkakantāraddhānamaggo viya **daṭṭhabbā** appaṭipattihetubhāvato.

Natthi ettha iṇanti aṇaṇo, tassa bhāvo **āṇaṇyaṃ**, kassaci iṇassa adhāraṇaṃ. **Samiddhakammantoti** nipphannajīvikappayogo. Paribundhati uparodhetīti ra-kārassa la-kāraṃ katvā palibodho, aserivihāro, tassa mūlaṃ kāraṇanti **palibodhamūlaṃ**. **Cha dhamme bhāvetvāti** asubhanimittaggāhādi ke cha dhamme uppādetvā vaḍḍhetvā. **Cha dhamme bhāvetvāti** ca mettānimittaggāhādayo ca tattha tattha cha dhammāti vuttāti veditabbo. **Pajahatīti** vikkhambhanavasena pajahati. Tenāha “**ācārapaṇṇattiādīni sikkhāpiyamāno**”tiādi. **Paravatthumhīti** visabhāgavatthumim, paravisaye vā. Paravisayā hete bhikkhuno, yadidaṃ pañca kāmagaṇā. **Āṇaṇyamiva kāmaccchandappahānaṃ āha** piyavatthuabhāvāvahato.

Ācāravipattiṭṭhābhakāni sikkhāpadāni **ācārapaṇṇattiādīni**. **Ārogyamiva byāpādappahānaṃ āha** kāyacittānaṃ phāsabhāvāvahato.

**Bandhanā mokkhamiva thinamiddhappahānaṃ āha** cittassa niggahitabhāvāvahato.

**Bhujissaṃ viya uddhaccakukkuccappahānaṃ āha** cittassa seribhāvāvahato.

**Tiṇaṃ viyāti tiṇamiva katvā**. **Agāṇetvāti** acintetvā. **Khemantabhūmiṃ viya vicikicchāpahānaṃ āha** anussāṅkitāparisaṅkitabhāvena sammāpaṭipattihetubhāvato.

427. Kiriyati (a. ni. ṭī. 3.5.28-29) gabbhāsaya khipiyatīti karo, sambhavo, karato jātoti **karajo**, mātāpettikasambhavoti attho. Mātuyā hi sarīrasaṅṭhāpanavasena karato jātoti **karajoti** apare. Ubhayathāpi **karajakāyanti** catusantatirūpamāha. **Temetīti** tintaṃ karoti. Ko panettha tintabhāvoti āha “**sneheti**”ti, pītisnehena piṇanaṃ karotīti attho. Tenāha “**sabbattha pavattapītisukhaṃ karotī**”ti. Pītisamuṭṭhānapanāṇitarūpehi sakalassa karajakāyassa pariphuṭatāya cettha taṃsamuṭṭhāpakapītisukhānaṃ sabbattha pavatti jotitā. **Parisandetīti**ādisupi ese va nayo. Tatthāpi hi “samantato sandeti temeti sneheti, sabbattha pavattapītisukhaṃ karotī”tiādinā yathārahaṃ attho veditabbo. **Paripūretīti** vāyunā bhastaṃ viya imaṃ karajakāyaṃ pītisukhena pūreti. **Samantato phusati** imaṃ karajakāyaṃ pītisukhena phusati. **Sabbāvatoti** a-kārassa ā-kāro kato, sabbāvayavavatoti atthoti āha “**sabbakoṭṭhāsavato**”ti, maṃsādisabbābhāgavatoti attho. **Aphuṭaṃ nāma na hoti** pītisukhasamuṭṭhānehi rūpehi sabbatthakameva byāpitattā. Kātuñceva yojetuñca cheko sannetuṃ paṭibaloti yojanā. Nhānīyacuṇṇānaṃ parimaddanavasena piṇḍaṃ karontena hatthena bhājanaṃ nippīletabbaṃ hotīti āha “**sannentassa bhijjati**”ti. **Anugatāti** anupavittā. **Parigatāti** parito samantato tintā. Tintabhāveneva samaṃ antaraṃ bhāraṇa etissāti **santarabāhirā**. **Sabbatthakamevāti** sabbattheva. **Na ca pagghariṇī** pamāṇayuttasseva udakassa sittattā. Ettha ca nhānīyapiṇḍaṃ viya karajakāyo, taṃ temetvā sampiṇḍitapamāṇayuttaudakaṃ viya paṭhamajjhānasukhaṃ daṭṭhabbaṃ.

428. **Heṭṭhā ubbhijjivā uggacchanaudakoti** rahadassa adhothūladhārāvasena ubbhijja utṭhahanaudako. **Antoyeva ubbhijjanaudakoti** rahadassa abhantareyeva thūladhārā ahutvā utṭhitaudakasirāmukhehi ubbhijjanako. **Āgamanamaggoti** nadītaḷākakandarāsaraādito āgamanamaggo.

429. Uppalagacchāni ettha santīti **uppalinī** (a. ni. ṭī. 3.5.28-29), vāri. **Ayamettha vinicchayo**, tathā hi loke rattakkhiko “puṇḍarīkakkho”ti vuccati. Keci pana “rattaṃ padumaṃ, setaṃ puṇḍarīka”nti vadanti. Uppalādīni viya karajakāyo, udakaṃ viya tatiyajjhānasukhanti ayampi attho “**purimanayenā**”ti atideseneva vibhāvitoti daṭṭhabbaṃ.

430. **Nirupakkilesatṭhenāti** rajojallādīnā anupakkiliṭṭhatāya amalīnabhāvena. Amalīnampi kiñci vatthu pabhassarasabhāvaṃ hotīti vuttaṃ “**pabhassaratṭhenā**”ti. **Utupharaṇanti** uṇhautupharaṇaṃ. Sabbatthakameva jhānasukhena phuṭṭho karajakāyo yathā utunā phuṭṭhavatthasadisoti āha “**vatthaṃ viya karajakāyo**”ti. **Tasmāti** “vatthaṃ viyā”tiādinā vuttamevatthaṃ hetubhāvena paccāmasati, karajakāyassa vatthasadisattā catutthajjhānasukhassa ca utupharaṇasadisattāti attho. Santasabhāvattā ṇāṇuttarattā cettha upekkhāpi sukhe saṅgahitāti catutthajjhānēpi sukhaḡgahaṇaṃ kataṃ. “Parisuddhena

pariyodātena pharivā nisinno hotī”ti vacanato catutthajjhānacittassa vatthasadisatā vuttā. Catutthajjhānasamutthānarūpehi bhikkhuno kāyassa phuṭabhāvaṃ sandhāya **“taṃsamutthānarūpaṃ utupharaṇaṃ viyā”**ti vuttaṃ. Purisassa kāyo viya bhikkhuno karajakāyoti ayaṃ panattho pākaṭoti na gahito, gahito eva vā “yathā hi katthaci...pe... kāyo phuṭo hotī”ti vuttattā.

**431. Pubbenivāsañānaupamāyanti** pubbenivāsañānaṃ dassitaupamāyaṃ. **Taṃdivasaṃkatakiriyaṅgahaṇaṃ** pākatisattassapi yebhuyyena pākaṭā hotīti dassanattamaṃ. **Taṃdivasagatagāmatayaggahaṇe**va mahābhinihārehi aññesampi pubbenivāsañānalābhīnaṃ tīsu bhavesu katā kiriyā yebhuyyena pākaṭā hotīti dipitanti daṭṭhabbaṃ.

**432. Sammukhadvārā**ti aññamaññaṃ abhimukhadvārā. **Aparāparaṃ sañcaranteti** taṃtaṃkiccavasena ito cito ca sañcarante. **Ita pana gehā...pe... pavisanavasena**pīti idaṃ cutūpapātañānaṃ visayadassanavasena vuttaṃ. **Dvinnaṃ gehānaṃ antare** ṭhatvāti dvinnaṃ gehadvārānaṃ sammukhaṭṭhānabhūte antaravīthiyaṃ vemajjhe ṭhatvā. Tesu hi ekassa ce pācīnamukhadvāraṃ itarassa pacchimamukhaṃ, tassa sammukhaṃ ubhinnaṃ antaravīthiyaṃ ṭhitassa dakkhiṇāmukhassa, uttarāmukhassa vā cakkhumato purisassa tattha pavisanakanikkhamanakaapurisā yathā sukheneva pākaṭā honti, evaṃ dibbacakkhuññaṃsamaṅgino cavanakaupapajjanakaapurisā. Yathā pana tassa purisassa aññeneva khaṇena pavisantassa dassanaṃ, aññena nikkhamantassa dassanaṃ, evaṃ imassapi aññeneva khaṇena cavamānassa dassanaṃ, aññena upapajjamānassa dassananti daṭṭhabbaṃ. Ñānaṃ pākaṭāti ānetvā sambandho. **Tassāti** ñānaṃ.

**433. Pabbatasikharaṃ** yebhuyyena saṃkhittaṃ saṅkucitaṃ hotīti idha pabbatamatthakaṃ **“pabbatasāṅkhepo”**ti vuttaṃ, pabbatapariyāpanno vā padeso **pabbatasāṅkhepo. Anāviloti** akālusso. Sā cassa anāvilatā kaddamābhāvena hotīti āha **“nikkaddamo”**ti. **Ṭhitāsūpi nisinnāsūpi** gāvīsu. **Vijjamānāsūti** labbhamānāsu. **Itarā** ṭhitāpi nisinnāpi **carantīti vuccanti** sahacaraṇañāyena. **Ṭiṭṭhantameva**, na kadācīpi carantaṃ. **Dvayanti** sippisammukaṃ macchagumbanti imaṃ ubhayaṃ **ṭiṭṭhantanti vuttaṃ**, carantampīti adhippāyo. Kiṃ vā imāya sahacariyāya, yathālābhaggahaṇaṃ panettha daṭṭhabbaṃ. Sakkarakathalassa hi vasena “ṭiṭṭhanta”nti, sippisambukassa macchagumbassa ca vasena “ṭiṭṭhantampi, carantampī”ti yojanā kātabbā.

**434. Bhikkhūti** bhinnakilesoti bhikkhu. So hi paramatthato samaṇotināmaṃ. Tattha ariyamaggena sabbaso pāpānaṃ samitāvīti **samaṇo**. Tenāha **“samitapāpattā”**ti. Seṭṭhaṭṭhena brahmā vuccati sammāsambuddho, tato āgatoti brahmā, ariyamaggo, taṃ asammoḥapaṭivedhavasena aññāsīti **brāhmaṇo**. Taṃsamaṅgitāya hissa pāpānaṃ bāhitabhāvo. Tenāha **“bāhitapāpattā brāhmaṇo”**ti. Aṭṭhaṅgikena ariyamaggajalena nhātavā niddhotakilesoti **nhātako. Gatattāti** pahānābhisamayavasena paṭividdhattā. Tenāha **“viditattā”**ti. **Nissutattāti** samucchadappahānavasena santānato sabbaso nihattattā. Tenāha **“apahattattā”**ti, mariyādavasena kilesānaṃ hiṃsitattā ariyamaggehi odhiso sabbaso kilesānaṃ samucchinnattāti attho. Tenāha **“hattattā”**ti. **Ārakattāti** suppahīnatāya vippakaṭṭhabhāvato. Tenāha **“dūrībhūtattā”**ti. Ubhayampi ubhayattha yojetabbaṃ – kilesānaṃ ārakattā hatattā dūrībhūtattā ca **ariyo**, tathā **arahanti**. Yaṃ panettha atthato na vibhattaṃ, taṃ uttānatthattā suviññeyyameva.

Mahāassapuravuttavaṇṇanāya līnatthappakāsanā samattā.

## 10. Cūlaassapuravuttavaṇṇanā

**435. Purimasadisamevā**ti “assapuravāsīnaṃ bhikkhusaṅghe gāravabahuṃānaṃ nipaccakāraṇa ca disvā bhikkhū piṇḍapāṭapacāyane niyojento idaṃ suttaṃ abhāsī”ti purimasutte mahāassapure (ma. ni. aṭṭha. 2.415) vuttasadisameva. **Samaṇānaṃ anucchavikā**ti samaṇānaṃ samaṇabhāvassa anucchavikā patirūpā. **Samaṇānaṃ anulomappaṭipadā**ti samaṇānaṃ sāmāññaṃsaṅkhatassa ariyamaggassa anukūlappaṭipadā.

**436. Ete dhammāti** ete pāḷiyam āgatā abhiijhābyāpādādayo pāpadhammā. **Uppajjamānāti** uppajjamānā eva, pageva santāne bhāvītā. **Malineti** malavante kilitthe. **Malaggahiteti** gahitamale sañjātamale. **Samaṇamalāti** samaṇānam samaṇabhāvassa malā. **Dussantīti** vipajjanti vinassanti. **Samaṇadosāti** samaṇānam samaṇabhāvadūsanā. **Kasaṭeti** asāre. **Nirojeti** nitteje. Ayato sukhatō apētāti apāyā, nirayādayo, tam phalam arahanti, tam payojanam vā etesanti **apāyikā**. **Ṭhānāni** abhiijhādayo. Tenāha “**apāye**”tiādi. Kāraṇabhāvena duggatipariyāpannāya vedanāya hitānīti **duggativedaniyāni**. Tena vuttam “**duggatiyam vipākavedanāya paccayāna**”nti. **Tikhiṇam** ayanti vekantakasadisam saraayam. **Ayenāti** ayoghaṃsakena. Koṇcasakuṇānam kira kucchiyam nivuttham yam kiñci kharam tikhiṇaṇca hoti. Tathā hi tesam vaccam aṭṭhimpī pāsānampī vilīyāpeti. Tena vuttam “**koṇcasakuṇe khādāpentī**”ti. Tam kira ayacunnam aggināpi kicchena dayhati, bhesajjabalena pana sukkena dayheyya. Tena vuttam “**susikkhitā ca nam ayakārā bahuhattakammamūlam labhitvā karontī**”tiādi. **Atitikhiṇam hoti**, aññataram ayobandhanam pheggudaṇḍam viya sukheva chindanti. Sasabhiṭṭhacammehi saṅghāṭitattṭhena **saṅghāṭīti** vuccati āvudhaparicchadoti āha “**saṅghāṭiyāti kosiya**”ti. **Pariyonaddhanti** parito onaddham chādītam. **Samantato veṭṭhanti** sabbaso pihitam.

**437. Rajoti** āgantukarajo. **Jallanti** sarīre utṭhānakaloṇādimalam. Rajojallaṇca vatasamādānavasena anapanītam etassa atthīti **rajojalliko**, tassa. Tenāha “**rajojalladhārino**”ti. **Udakam orohantassāti**ādīnamattho mahāsīhanādasuttavaṇṇanāyam vuttōyeva. **Sabbametanti**ādīsu sabbasopi vatasamādānavasenāti adhippāyo. Yasmā sabbametam bāhīrasamayavaseneva kathitam, tasmā **saṅghāṭikassāti** pilotikakhaṇḍehi saṅghāṭitattā “saṅghāṭī”ti laddhanāmavattadhārīnoti attho. Tathā hi pāḷiyam “saṅghāṭikassa”icceva vuttam, na “bhikkhuno”ti. Tenāha “**imasmim hi**”tiādi. Kasmā panettha bhagavatā saṅghāṭikattādīniyeva vatasamādānāni paṭikkhittānīti? Nayadassanametam aññesampi pañcātapamūgavatādīnam tappatikkhepeneva pasiddhito. Apare pana bhaṇanti – “nāham, bhikkhave, saṅghāṭikassa saṅghāṭidhāraṇamattena sāmaññam vadāmi”ti vutte tatha nisīno koci tittāntaraladdhiko acelakattam nu kho kathanti cintesi, apare rajojallakattam nu kho kathanti, evam tam tam cintētānam ajjhāsāyavasena bhagavā imāneva vatasamādānāni idha paṭikkhipīti. **Saṅghāṭikanti** nivāsanapārupanavasena saṅghāṭivantam. Tenāha “**saṅghāṭikam vattha**”ntiādi. Attano ruciya mittādayo **saṅghāṭikam kareyyum**, pacchā viññutam pattakāle saṅghāṭikatte samādapeyyum.

**438. Attānam visujjhantam passati** abhiijhādīnam samudācārābhāvato. Maggena asamucchinnattā **visuddhoti pana na vattabbo**. **Pāmojjanti** taruṇapītimāha. Tassa hi attano sammāpaṭipattiyā kilesānam vikkhambhitattā cittassa visuddhatam passantassa pāmojjam jāyati, tam tuṭṭhākāram. Tenāha “**tuṭṭhākāro**”ti. **Pīṭīti** passaddhiāvahā balavapīti. **Nāmakāyo passambhatīti** iminā ubhayampi passaddhim vadati. **Vediyatīti** anubhavati vindati. Idāni tena nīvaraṇehi cittassa visodhanattam laddhanti āha “**appanāppattam viya hotī**”ti. Aññattha utṭhītā aññam ṭhānam upagatāti ettakena upamābhāvena uccanīcatāsāmaññena heṭṭhā asaddhammānam paṭipakkhavasena desanāya pariyoṣāpitattā vuttam “**yathānusandhinā**”ti. **Mahāsīhanādasutte maggo pokkharāṇiyā upamito** “seyyathāpi, sārīputta, pokkharāṇī”tiādim (ma. ni. 1.154) ārabhitvā upamāsaṃsandane “tathāyam puggalo paṭipanno, tathā ca iriyati, taṇca maggam samāruḷho, yathā āsavānam khayā”ti (ma. ni. 1.154) vuttattā. Yathā hi puratthimādīdisāhi āgatā purisā tam pokkharāṇim āgamma visuddharūpakāyā vigatapariḷāhā ca hontī, evam khattiyādikulato āgatā tathāgatappaveditam dhammavinayam sāsānam āgamma visuddhanāmākāyā vigatakilesapariḷāhā ca hontī. Tasmā **sabbakilesānam samitattā paramatthasamaṇo hotīti**. Sesam suviññeyyameva.

Cūlaassapurāsuttavaṇṇanāya līnatthappakāsanā samattā.

Niṭṭhitā ca mahāyamakavaggaṇṇanā.

## 5. Cūlayamakavaggo

## 1. Sāleyyakasuttavaṇṇanā

**439. Mahājanakāye sannipatitē** keci “pahaṃsanavidhiṃ dassetvā rājakumāraṃ hāsessāmā”ti, keci “taṃ kīḷanaṃ passissāmā”ti evaṃ mahājanasamūhe sannipatite. **Devanaṅanti** dibbagandhabbaṃ. **Kusalaṃ kusalaṃti vacanaṃ upādāyāti** “kacci kusalaṃ? Āma kusala”nti vacanaṃ paṭivacanasena pavattakusalavāditāya te manussā ādito kusalāti samaññaṃ labhiṃsu. Tesāṃ kusalānaṃ issarāti rājakumārā **kosalā**. Kosale jātā. Tesāṃ nivāsoti sabbāṃ pubbe vuttanayameva. Tenāha “**so padeso kosalāti vuccati**”ti.

**Cārikaṃ caramānoti** sāmāññaṃ vacanaṃ pi “mahatā...pe... tadavasari”ti vacanato visesaṃ nivāṭṭhamevāti āha “**aturitacārikaṃ caramāno**”ti. **Mahatāti** guṇamahattenapi saṅkhyāmahattenapi mahatā. Tasmīñhi bhikkhusamūhe keci adhisīlasikkhāvasena sīlasampannā, tathā keci sīlasamādhisampannā, keci sīlasamādhipaññāsampannāti guṇamahattenapi so bhikkhusamūho mahāti. Taṃ anāmasitvā saṅkhyāmahattameva dassento “**sataṃ vā**”tiādimāha. Aññagāmapaṭibaddhajīvikāvasena samosaranti etthāti **samosaraṇaṃ, gāmo** nivāsagāmo. Nti sālāṃ brāhmaṇagāmaṃ. **Vihāroti** bhagavato viharāṇaṭṭhānaṃ. **Etthāti** etasmiṃ **sāleyyakasutte**. **Aniyamitoti** asukasmīṃ ārāme pabbate rukkhamūle vāti na niyamito, sarūpaggaṇavasena na niyamitvā vutto. **Tasmāti** aniyamittā. Atthāpattisiddhamatthaṃ parikkappanasena dassento “**vanasaṅgo bhavissati**”ti āha, addhā bhaveyyāti attho.

**Upalabhiṃsūti** (sārattha. ṭī. 1.1.verañjakaṇḍavaṇṇanā; dī. ni. ṭī. 1.255; a. ni. ṭī. 2.3.64) savanasena upalabhiṃsūti imamattaṃ dassento “**sotadvāra...pe... jāniṃsū**”ti āha. Avadhāraṇaphalattā sabbāṃpi vākyaṃ antogadhāvadhāraṇanti āha “**padapūraṇamatte vā nipāto**”ti. **Avadhāraṇattheti** pana iminā iṭṭhatthāvadhāraṇatthaṃ kho-saddaggaṇanti dasseti. “Assosu”nti padaṃ kho-sadde gahite tena phullitamaṇḍitavibhūsitāṃ viya hontaṃ pūritāṃ nāma hoti, tena ca purimacchimapaḍāni saṃsiliṭṭhāni honti, na tasmīṃ aggahitēti āha “**padapūraṇena byañjanasiliṭṭhatāmattamevā**”ti. **Matta-saddo** visesanivattiattho. Tenassa anattantaratāpanatāṃ dasseti, **eva-saddena** pana byañjanasiliṭṭhatāya ekantikataṃ. Sālāyaṃ jātā saṃvaḍḍhakā **sāleyyakā** yathā “katteyyakā ubbheyyakā”ti.

**Samitapāpattāti** accantaṃ anavasesato savāsanāṃ samitapāpattā. Evañhi bāhirakavītarāgasekkhāsekkhapāpasamanato bhagavato pāpasamaṇaṃ visesitaṃ hoti. Anekattatthā nipātānaṃ idha anussavatto adhippetoti āha “**khalūti anussavanatthe nipāto**”ti. **Ālapanamattanti** piyālāpavacanaṃ. Piyasamudāhārā hete “bho”ti vā “āvuso”ti vā “devānaṃpiyā”ti vā. **Gottavasenāti** ettha taṃ tāyatīti **gottaṃ**. Gotamoti hi pavattamānaṃ abhidhānaṃ buddhiṅca ekaṃsīkavisayatāya tāyati rakkhatīti **gotamagottaṃ**. Yathā hi buddhi ārammaṇabhūtena atthēna vinā na vattati, evaṃ abhidhānaṃ abhidheyyabhūtena, tasmā so tāni tāyati rakkhatīti vuccati. So pana atthato aññakulaparamparāsādhāraṇaṃ tassa kulassa ādipurisasamudāgataṃ taṃkulapariyāpannasādhāraṇaṃ sāmāññarūpanti daṭṭhabbaṃ. **Uccākulaparidīpanaṃ** uditoditavipulakhattiyakulavibhāvanato. Sabbakhattiyānañhi ādibhūtamahāsammata mahārājato paṭṭhāya asambhinnaṃ ulāratamaṃ sakyarājakulaṃ. **Kenaci pārijuññenāti** ñātipārijuññabhogapārijuññādinā kenacipi pārijuññena parihāniyā **anabhibhūto** anajjhotthaṇo. Tathā hi kadācipi tassa kulassa tādisapārijuññābhāvo, abhinikkhamaṇakāle ca tato samiddhatamabhāvo loke pākāṇo paññātoti. **Sakyakulā pabbajitoti** idaṃ vacanaṃ bhagavato **saddhāpabbajitabhāvadīpanaṃ** vuttaṃ mahantaṃ ñātiparivaṭṭaṃ mahantaṅca bhogakkhandhaṃ pahāya pabbajitabhāvadīpanato. Ettha ca **samaṇoti** iminā parikkhakajanehi bhagavato bahumatabhāvo dassito samitapāpatādīpanato, **gotamoti** iminā lokiyajanehi ulāratamakulīnatādīpanato.

**Abhuggatoti** ettha **abhi-saddo** itthambhūtākhyāne, taṃyogato pana “bhavantaṃ gotama”nti upayogavacanaṃ sāmīatthēpi samānaṃ itthambhūtaṃyogadīpanato “**itthambhūtākhyānatthe**”ti vuttaṃ. Tenāha “**tassa kho pana bho gotamassāti attho**”ti. **Kalyāṇoti** bhaddako. Sā cassa kalyāṇatā ulāravīsayatāyāti āha “**kalyāṇagūṇasamannāgato**”ti. Taṃvīsayatā hettha samannāgamo. **Setṭhoti**



etthāpi eseva nayo yathā “bhagavāti vacanaṃ seṭṭha”nti (pārā. aṭṭha. 1.veraṅjakaṇḍavaṇṇanā; visuddhi. 1.142; udā. aṭṭha. 1; itivu. aṭṭha. nidānavāṇṇanā; mahāni. aṭṭha. 50). “Bhagavā araha”ntiādīnā guṇānaṃ saṃkittanato saṃsaddanato ca kittisaddo vaṇṇoti āha “**kittiyevā**”ti. Kittipariyāyopi hi sadda-saddo yathā taṃ “uḷārasaddā isayo guṇavanto tapassino”ti. **Thutighosoti** abhithhavudāhāro. **Ajjhottharivāti** paṭipakkhābhāvena anaññasādhāraṇatāya ca abhibhavitvā.

**So bhagavāti** yo so samatiṃsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho devānaṃ atidevo sakkānaṃ atisakko brahmānaṃ atibrahmā lokanātho bhāgyavantatādīhi kāraṇehi bhagavāti laddhanāmo, so bhagavā. “Bhagavā”ti hi idaṃ satthu nāmakittanaṃ. Tathā hi vuttaṃ “bhagavāti netam nāmaṃ mātarā kata”ntiādi (mahāni. 149, 198, 210; cūḷani. ajitamānavapucchāniddeśa 2). Parato pana “bhagavā”ti guṇakittanameva. Evaṃ “araha”ntiādīhi padehi ye sadevake loke ativiya paññatā buddhaguṇā, te nānappakārato vibhāvītāti dassetuṃ paccekaṃ itipi-saddo yojetabboti āha “**itipi arahaṃ, itipi sammāsambuddho...pe... itipi bhagavā**”ti. “Itipetaṃ bhūtaṃ, itipetaṃ taccha”ntiādīsu (dī. ni. 1.6) viya hi idha **iti**-saddo āsannapaccakkhākāraṇattho, **pi**-saddo sampiṇḍanattho tena tesam guṇānaṃ bahubhāvādīpanato. Tāni guṇasallakkhaṇākāraṇāni saddhāsampannānaṃ viññujātikānaṃ paccakkhāni evāti dassento “**iminā ca iminā ca kāraṇenāti vuttaṃ hoti**”tiādi. **Tato visuddhimaggato. Tesanti** “araha”ntiādīnaṃ. **Vitthāro** atthaniddeśo **gahetabbo**. Tato eva taṃsaṃvaṇṇanāyaṃ (visuddhi. mahāṭī. 1.130) vutto “ārakāti arahaṃ suvidūrabhāvato, ārakāti arahaṃ āsannabhāvato, rahitabbassa abhāvato, sayāñca arahitabbato, natthi etassa rahogamaṇaṃ gatīsu paccājāti, pāsamsabhāvato vā araha”ntiādīnā “araha”ntiādīnaṃ padānaṃ attho vitthārato veditabbo.

Bhavanti cettha (visuddhi. mahāṭī. 1.130; sāratttha. ṭī. 1.veraṅjakaṇḍavaṇṇanā) –

“Sammā nappaṭipajjanti, ye nihīnāsayā narā;  
Ārakā tehi bhagavā, dūre tenārahaṃ mato.

Ye sammā paṭipajjanti, suppaṇītādhimuttikā;  
Bhagavā tehi āsanno, tenāpi arahaṃ jino.

Pāpadhammā rahā nāma, sādhuhi rahitabbato;  
Tesaṃ suṭṭhu pahīnattā, bhagavā arahaṃ mato.

Ye sacchikatasaddhammā, ariyā suddhagocarā;  
Na tehi rahito hoti, nātho tenārahaṃ mato.

Raho vā gamaṇaṃ yassa, saṃsāre natthi sabbaso;  
Pahīnajātīmaraṇo, arahaṃ sugato mato.

Guṇehi sadiso natthi, yasmā loke sadevake;  
Tasmā pāsamsiyattāpi, arahaṃ dvipaduttamo.

Ārakā mandabuddhīnaṃ, āsannā ca vijānataṃ;  
Rahānaṃ suppahīnattā, vidūnamaraheyyato;  
Bhavesu ca rahābhāvā, pāsamsā arahaṃ jino”ti.

**Sundaranti** bhaddakaṃ. Tañca passantassa hitasukhāvahabhāvena veditabbanti āha “**atthāvahaṃ sukhāvaha**”nti. Tattha **atthāvahanti** diṭṭhadhammikasamparāyīkaparamatthasañhitahitāvahaṃ. **Sukhāvahanti** tappariyāpannatividhasukhāvahaṃ. **Tathārūpānanti** tādisānaṃ. Yādisehi pana guṇehi bhagavā samannāgato, tehi catuppamāṇikassa lokassa sabbathāpi accantāya pasādanīyoti dassetuṃ “**anekehipi**”tiādi vuttaṃ. Tattha **yathābhūta...pe... arahatanti** iminā dhammappamāṇānaṃ

lūkhappamāṇānaṃ sattānaṃ bhagavato pasādāvahatamāha, itarena itaresaṃ. **Dassanamattampi sādhu hotīti** ettha kosiyaṣakuṇassa vatthu kathetabbaṃ. **Ekam padampi sotum labhissāma, sādhutaraṃyeva bhavissatīti** ettha maṇḍūkadevapurattavattu kathetabbaṃ.

**Iminā nayena agārikapucchā āgatāti** idaṃ yebhuyyavasena vuttaṃ. Yebhuyyena hi agārikā evaṃ pucchanti. **Anagārikapucchāyapi** eseva nayo. **Yathā na sakkonti...pe... vissajjentoti** iminā satthu tesam brāhmaṇagahapatikānaṃ niggaṇhanavidhiṃ dasseti. Tesañhi saṃkhittarucitāya saṅkhepadesanā, tāya atthaṃ ajānantā vitthāradesaṇaṃ āyācanti, sā ca nesaṃ saṃkhittarucitā paṇḍitamānitāya, so ca māno yathādesitassa atthassa ajānante appatīṭṭho hoti, iti bhagavā tesam mānāniggahavidhiṃ cintetvā saṅkhepeneva pañhaṃ vissajjesi, na sabbaso desanāya asallakkaṇatthaṃ. Tenāha **“paṇḍitamānikā hī”**tiādi. **Yasmā maṃ tumhe yācatha**, saṃkhittena vuttamatthaṃ na jānitthāti adhippāyo.

**440.** “Ekavidhena nāṇavatthu”ntiādiṣu (vibha. 751) viya koṭṭhāsatto **vidha**-saddo, so ca vibhattivacanavipallāsaṃ katvā paccatte karaṇavacanavasena **“tividha”**nti vutto. Attho pana karaṇaputhuvacanavasena daṭṭhabboti āha **“tividhanti tīhi koṭṭhāsehi”**ti. Pakārattho vā **vidha**-saddo, pakāratthattāyeva labbhamānaṃ adhammacariyāvisamacariyābhāvasāmaññaṃ, kāyadvārikabhāvasāmaññaṃ vā upādāya ekattaṃ netvā **“tividha”**nti vuttaṃ. Pakārabhede pana apekkhite **“tividhā”**icceva vuttaṃ hoti. **Kāyenāti** ettha **kāyoti** copanakāyo adhippeto, so ca adhammacariyāya dvārabhūto tena vinā tassā appavattanato. **Kāyenāti** ca hetumhi karaṇavacanāṃ. Kiñcāpi hi adhammacariyāsaṅkhātacetanāsamuttānā sā viññatti, na ca sā paṭṭhāne āgatesu catuvīsatiyā paccayesu ekenāpi paccayena cetanāya paccayo hoti, tassā pana tathāpavattamānāya kāyakammasaññitāya cetanāya pavatti hotīti tena dvārena lakkhitabbabhāvato tassā kāraṇaṃ viya ca sabbohāramattaṃ hoti. **Kāyadvārenāti** vā kāyena dvārabhūtena kāyadvārabhūtenāti taṃ itthambhūtalakkhaṇe karaṇavacanāṃ. Adhammaṃ carati etāyāti **adhammacariyā**, tathāpavattā cetanā. **Adhammoti** pana taṃsamuttānāno payogo daṭṭhabbo. Dhammato anapetāti dhammā, na dhammāti adhammā, adhammā ca sā cariyā cāti **adhammacariyā**. Paccanīkasamanaṭṭhena samaṃ, samānaṃ sadisaṃ yuttanti vā samaṃ, sucariṭaṃ. Samato vigataṃ, viruddhaṃ vā tassāti visamaṃ, ducariṭaṃ. Sā eva visamā cariyāti **visamacariyā**. **Sabbesu kaṇhasukkapadesūti** “catubbidhaṃ vācāya adhammacariyāvisamacariyā hoti”tiādinā uddesaniddesavasena āgatesu sabbesu kaṇhapadesu – “tividhaṃ kho gahapatayo kāyena dhammacariyāsamacariyā hoti”tiādinā uddesaniddesavasena āgatesu sabbesu sukkapadesu ca.

Rodeti kurūrakamantatāya parapaṭibaddhe satte assūni mocetīti ruddo, so eva **luddo** ra-kārassa la-kāraṃ katvā. **Kakkhaḷoti** luddo. **Dāruṇoti** pharuso. **Sāhasikoti** sāhassakārī. **Sacepi na lippanti**. **Tathāvidho** paresaṃ ghātanasīlo **lohitapāṇītveva vuccati** yathā dānasīlo paresaṃ dānatthaṃ adhotahatthopi “payatapāṇī”tveva vuccati. Paharaṇaṃ pahāradānamattaṃ **hatam**, pavuddhaṃ paharaṇaṃ parassa mārānaṃ **pahatanti** dassento **“hate”**tiādimāha. Tattha **niviṭṭhoti** abhiniviṭṭho pasuto.

Yassa vasena “parassā”ti sāminiddeso, taṃ sāpateyyaṃ. Yañhi sāmāññato gahitaṃ, taṃ teneva sāminiddesena pakāsītanti āha **“parassa santaka”**nti. Parassaparavittūpakaraṇanti vā ekamevetam samāsapadaṃ, yaṃ kiñci parasantakaṃ visesato parassa vittūpakaraṇaṃ vāti attho. **Tehi parehīti** yesaṃ santakaṃ, tehi. Yassa vasena puriso “theno”ti vuccati, taṃ theyyanti āha **“avaharaṇacittassetam adhivacana”**nti. **Theyyasaṅkhātena**, na vissāsātāvākālikādivasenāti attho.

**Mate vāti vā**-saddo avuttavikappattho. Tena pabbajitādibhāvaṃ saṅgaṇhāti. **Etenupāyenāti** yaṃ mātari matāya, naṭṭhāya vā pitā rakkhati, sā **piturakkhitā**. Yaṃ ubhosu asantesu bhātā rakkhati, sā **bhāturakkhitāti** evamādiṃ sandhāyāha. **Sabhāgakulānīti** āvāhakiriyāya sabhāgāni kulāni. Dassukavidhiṃ vā uddissa **ṭhapitadaṇḍārājādīhi**. **Sammādiṭṭhisutte** (ma. ni. aṭṭha. 1.89) “asaddhammādhippāyena kāyadvārapavattā agamanīyaṭṭhānavītikamacetanā”ti evaṃ **vuttamicchācāralakkhaṇavasena**.

**Hatthapādādihetūti** hatthapādādibhedanahetu. **Dhanahetūti** dhanassa lābhahetu jānīhetu ca. **Lābhoti** ghāsacchādanāni labbhatīti lābho. **Kiñcikkhanti** kiñcimattakam āmisajātam. Tenāha “**yaṃ vā**”tiādi. **Jānantoyevāti** musābhāvaṃ tassa vatthuno atthi, taṃ jānanto eva.

**Aṇḍakāti** vuccati rukkhe aṇḍasadisā gaṇṭhiyo. Yathā thaddhā visamā dubbīnītā ca honti, evamevaṃ khumsanavambhanavasena pavattavācāpi hi “**aṇḍakā**”ti vuttā. Tenāha “**yathā sadosē rukkhe**”tiādi. **Kakkasāti** pharusā eva, so panassā kakkasabhāvo byāpādanimittatāya tato pūtikāti. Tenāha “**yathā nāmā**”tiādi. **Kaṭukāti** aniṭṭhā. **Amanāpāti** na manavaḍḍhanī, tato eva **dosajanāni**, cittasandosuppattikārikā. **Mammesūti** ghaṭṭanena dukkhuppattito mammasadesesu jātiādīsu. **Lagganakārīti** evaṃ vadantassa evaṃ vadāmīti atthādhippāyena lagganakārī, na byañjanavasena. **Kodhassa āsannā** tassa kāraṇabhāvato. **Sadosavācāyāti** attano samuṭṭhāpakadosassa vasena sadosavācāya **vevacanāni**.

**Akālenāti** ayuttakālena. **Akāraṇanissitanti** nipphalaṃ. Phalañhi kāraṇanissitaṃ nāma tadavinābhāvato. Akāraṇanissitaṃ nipphalaṃ, samphanti attho. **Asabhāvavattāti** ayāthāvavādī. **Asaṃvaravinayapaṭisaṃyuttassāti** saṃvaravinayarahitassa, attano suṇantassa ca na saṃvaravinayāvahassa **vattā**. **Hadayamañjūsāyaṃ nidhetunti** ahitasamhitattā cittaṃ anuppavīsetvā nidhetuṃ. **Ayuttakāleti** dhammaṃ kathentena yo attho yasmiṃ kāle vattabbo, tato pubbe pacchā tassa akālo, tasmīṃ ayuttakāle **vattā hoti**. **Anapadesanti** bhagavatā asukasutte evaṃ vuttanti suttāpadesavirahitaṃ. **Aparicchedanti** paricchedarahaṃ. Yathā pana vācā paricchedarahitā hoti, taṃ dassetuṃ “**suttaṃ vā**”tiādi vuttaṃ. **Upalabbhanti** anuyogaṃ. **Bāhirakathaṃyevāti** yaṃ suttaṃ, jātakam vā nikkhittaṃ, tassa sarīrabhūtaṃ kathaṃ anāmasitvā tato bahibhūtaṃyeva kathaṃ. **Sampajjitvāti** viruḥam āpajjitvā. **Paveṇijātakāvāti** anujātapārohamūlāniyeva tiṭṭhanti. **Āharitvāti** nikkhittasuttato aññampi anuyogaupamāvathuvaseṇa tadanupayoginaṃ āharitvā. **Jānāpetunti** etadatthamidaṃ vuttanti jānāpetuṃ yo sakkoti. **Tassa kathetunti** tassa tathārūpassa dhammakathikassa bahumpi kathetuṃ vaṭṭati. **Na atthanissitanti** attano paresaṅca na hitāvahaṃ.

Abhijjhāyaṇaṃ yebhuyyena parasantakassa dassanavasena hotīti “**abhijjhāya oloketā hotī**”ti vuttaṃ. Abhijjhāyanto vā abhijjhāyitaṃ vatthuṃ yattha katthaci ṭhitampi paccakkhato passanto viya abhijjhāyatīti vuttaṃ “**abhijjhāya oloketā hotī**”ti. **Kammaṭṭhabhedo na hoti**, kevalaṃ lobhamattova hoti pariṇāmanavasena appavattattā. Yathā pana kammaṭṭhabhedo hoti, taṃ dassetuṃ “**yadā panā**”tiādi vuttaṃ. **Pariṇāmetīti** attano santakabhāvena pariggayha nāmeti.

**Vipannacittoti** byāpādena vipattiṃ āpāditacitto. Tenāha “**pūtibhūtacitto**”ti. Byāpādo hi viṣaṃ viya lohitassa cittaṃ pūtibhāvaṃ janeti. **Dosena duṭṭhacittasaṅkappoti** visena viya sappiādikopena dūsitacittasaṅkappo. **Ghātīyantūti** hanīyantu. **Vadhaṃ pāpuṇantūti** maraṇaṃ pāpuṇantu. **Mā vā ahesunti** sabbena sabbaṃ na hontu. Tenāha “**kiñcīpi mā ahesu**”nti, anavasesavināsaṃ pāpuṇantūti attho. **Haññantūti ādicintanenevāti** ekantato vināśacintāya eva.

**Micchādiṭṭhikoti** ayoniso uppannadiṭṭhiko. So ca ekantato kusalapaṭipakkhadiṭṭhikoti āha “**akusaladassano**”ti. **Vipallatthadassanoti** dhammatāya vipariyāsaggāhī. **Natthi dinnanti** deyyadhammasīseṇa dānaṃ vuttanti āha “**dinnassa phalābhāvaṃ sandhāya vadatī**”ti. Dinnaṃ pana annādivatthuṃ kathaṃ paṭikkhipati. Esa nayo “**yiṭṭhaṃ huta**”nti ethāpi. **Mahāyāgoti** sabbasādhāraṇaṃ mahādānaṃ. **Paheṇakasakkāroti** pāhunakānaṃ kattabbasakkāro. **Phalanti** ānisamsaphalaṅca nissandaphalaṅca. **Vipākoti** sadisaṃ phalaṃ. **Paraloke ṭhitassa ayaṃ loko natthīti** paraloke ṭhitassa kammaṇā laddhabbo ayaṃ loko na hoti. **Idhaloke ṭhitassapi paraloko natthīti** idhaloke ṭhitassa kammaṇā laddhabbo paraloko na hoti. Tattha kāraṇamāha “**sabbe tattha tattheva ucchijjanti**”ti. Ime sattā yattha yattha bhavayonigatiādīsu ṭhitā tattha tattheva ucchijjanti nirudayavināśavasena vinassanti. **Phalābhāvavaseṇāti** mātāpitūsu sammāpaṭipattimicchāpaṭipattīnaṃ phalassa abhāvavaseṇa “**natthi mātā, natthi pitā**”ti vadati, na mātāpitūnaṃ, nāpi tesu sammāpaṭipattimicchāpaṭipattīnaṃ abhāvavaseṇa tesam lokapaccakkhattā. Bubbūlakassa viya imesaṃ

sattānaṃ uppādo nāma kevalova, na cavitvā āgamanapubbakoti dassanattamaṃ “natthi sattā opapātikā”ti vuttanti āha “**cavitvā upapajjanakasattā nāma natthīti vadati**”ti. Samaṇena nāma yāthāvato jānantena kassaci kiñci akathetvā saññatena bhavitabbaṃ, aññathā ahopurisikā nāma siyā, kiṃ paro parassa karissati, tathā attano sampādanassa kassaci avasaro eva natthi tattha tattheva ucchijjanatoti āha “**ye imaṅca...pe... pavedenti**”ti. **Ettāvātāti** “natthi dinna”ntiādinā byapadesena. **Dasavatthukāti** paṭikkhipitabbāni dasa vatthūni etissāti dasavatthukā.

**441. Anabhijjhādayo** heṭṭhā atthato pakāsittā **uttānatthāyeva**.

**442.** Saha byayati gacchatīti sahaḃyo, sahaḃvattanako, tassa bhāvo **sahabyatā**, sahaḃpavattīti āha “**sahabhāvaṃ upagaccheyya**”nti. Brahmānaṃ kāyo samūhoti brahmakāyo, tappariyāpannatāya tattha gatāti **brahmakāyikā**. Kāmaṃ cetāya sabbassapi brahmanikāyassa samaññāya bhavitabbaṃ, “ābhāna”ntiādinā pana dutiyajjhānabhūmikādīnaṃ upari gahittā gobaḃbaddaṅāyena tadavasesānaṃ ayaṃ samaññāti āha “**brahmakāyikānaṃ devānanti paṭhamajjhānabhūmidevāna**”nti. **Ābhā nāma viṣuṃ** devā **natthi**, parittābhādīnaṃyeva pana ābhāvantaṭāsamaññena ekajjhaṃ gahetvā pavattaṃ etaṃ adhivacanaṃ, yadidaṃ “ābhā”ti yathā “brahmapārisajjabrahmapurohitamahābrahmānaṃ brahmakāyikā”ti. **Parittābhānantiādi panāti ādi**-saddena appamaññābhānaṃ devānaṃ ābhassarānaṃ devānanti imaṃ pāḃiṃ saṅgaṇhāti. **Ekato aggahetvāti** ābhāti vā, ekattakāyanānattasaññāti vā ekato aggahetvā. **Tesaṃyevāti** ābhāti vuttadevānaṃyeva. **Bhedato gahaṇanti** kāraṇassa hīnādhedabhinnatādassanavasena parittābhādiggahaṇaṃ. **Iti bhagavā āsavakkhayaṃ dassetvāti** evaṃ bhagavā dhammacariyaṃ, samacariyaṃ, vaṭṭanissitaṃ sugatigāmiḃpaṭipadaṃ, vivaṭṭanissitaṃ āsavakkhayaḃgāmiḃpaṭipadaṃ katvā tibhavaḃhaṅjanato āsavakkhayaṃ dassetvā **arahattanikūṭena desanaṃ niṭṭhapesi**.

**Idha ṭhatvāti** imasmiṃ dhammacariyāsamacariyāya niddese ṭhatvā. **Devalokā samānetabbāti** chabbisatipi devalokā samodhānetabbā. **Vīsati brahmalokāti** taṃtaṃbhavaḃpariyāpannanikāyavasena vīsati brahmalokā, vīsati brahmanikāyāti attho. **Dasakusalakammapathehīti** yathārahaṃ dasakusalakammapathehi kammūpanissayaḃpaccayaḃhūtehi kevalaṃ upanissayaḃhūtehi ca **nibbatti dassitā**.

**Tiṇṇaṃ sucaritānanti** tiṇṇaṃ kāmaḃvacarasucaritānaṃ. Kāmaḃvacaraḃgahaṇaṅcettaḃha manosucaritāpekkhāya. **Vipākenevāti** iminā vipākuppādeneva nibbatti hoti, na upanissayaṭāmattenāti dasseti. “**Upanissayaḃvasenā**”ti vuttamatthaṃ vivarituṃ “**dasa kusalakammapathā hī**”tiādi vuttaṃ. **Dutiyādīni bhāvetvāti**ādisupi “sīle paṭiṭṭhāyā”ti padaṃ ānetvā sambandhitabbaṃ. Kasmā panettha “upanissayaḃvasenā”ti vuttaṃ, nanu **paṭisambhidāmagge** (paṭi. ma. 1.41) – “paṭhamena jhānena nīvaraṇānaṃ pahānaṃ sīlaṃ, veramaṇi sīlaṃ, cetanā sīlaṃ, saṃvaro sīlaṃ, avītikkamo sīla”ntiādinā sabbesupi jhānesu sīlaṃ uddhaṅanti tassa vasena uparidevalokānampi vipākena nibbatti vattabbāti? Na, tassa pariññāya desanattā, pariññāya desanattā cassa “yattha ca pahāna”ntiādinā **visuddhimaggasaṃvaṇṇanāyaṅca** (visuddhi. mahāṭi. 2.837, 839) pakāsitā eva. Tathā hi idhāpi “dasa kusalakammapathā hī sīla”ntiādinā sīlassa rūpārūpabhavānaṃ upanissayaṭā vibhāvitā, na nibbattakatāya. Kasmā panettha bhāvanālakkaṅāya dhammacariyāya bhavavisesse vibhājiyamāne asaṅñābhavo na gahitoti āha “**asaṅñābhavo pana...pe... na niddiṭṭho**”ti. Bāhirakā hi ayathābhūtaḃdassitāya asaṅñābhavaṃ bhavavippamokkhaṃ maññamānā tadupaḃgajjhānaṃ bhāvetvā asaṅñesu nibbattanti. Ayamettha saṅkhepo, yaṃ panettha vattabbaṃ, taṃ **brahmajālaṭṭhakathāyaṃ taṃsaṃvaṇṇanāyaṅca** (dī. ni. aṭṭha. 1.68-73; dī. ni. ṭi. 1.68-73) vuttanayeneva veditabbaṃ.

Sāleyyakasuttavaṇṇanāya līnatthappaḃkāsanā samattā.

## 2. Verañjakasuttavaṇṇanā

**444. Verañjavāsīnoti** verañjagāmaḃvāsīno. Keci pana “vividharatṭhavāsīno verañjakā”ti

etamattham vadanti, tesam matena “verajjakā”ti pāḷiyā bhavitabbanti. **Aniyamitakiccenāti** “iminā nāmā”ti evaṃ na niyamitena kiccena. **Ayaṃ visesoti** ayaṃ puggalādhiṭṭhānadhammādhiṭṭhānakato imesu dvīsu suttesu desanāya viseso, attho pana desanāyayo ca majjhe bhinnasuvaṇṇaṃ viya avisiṭṭhoti dasseti. Kasmā pana bhagavā katthaci puggalādhiṭṭhānadesanaṃ deseti, katthaci dhammādhiṭṭhānanti? Desanāvīlāsato veneyyajjhāsayaṭo ca. Desanāvīlāsappattā hi buddhā bhagavanto, te yathārucci katthaci puggalādhiṭṭhānaṃ katvā, katthaci dhammādhiṭṭhānaṃ katvā dhammaṃ desenti. Ye pana veneyyā sāsanakkamaṃ anotiṇṇā, tesam puggalādhiṭṭhānadesanaṃ desenti. Ye otiṇṇā, tesam dhammādhiṭṭhānaṃ. Sammutisaccavisayā puggalādhiṭṭhānā, itarā paramatthasaccavisayā. Purimā karuṇānukūlā, itarā paññānukūlā. Saddhānusārigottānaṃ vā purimā. Te hi puggalappamaṇā, pacchimā dhammānusārīnaṃ. Saddhācaritatāya vā lokādhipatīnaṃ vasena puggalādhiṭṭhānā, paññācaritatāya dhammādhipatīnaṃ vasena dhammādhiṭṭhānā. Purimā ca neyyatthā, pacchimā nītatthā. Iti bhagavā taṃ taṃ visesaṃ avekkhitvā tattha tattha duvidhaṃ desanaṃ deseti veditabbaṃ.

Verañjakasuttavaṇṇanāya līnatthappakāsanā samattā.

### 3. Mahāvedallasuttavaṇṇanā

449. Garubhāvo gāraṃ, pāsānacchattaṃ viya garukaraṇīyatā. Saha gāravenāti sagāro, garunā kismiṅci vutte gāravasena patissavanaṃ patissavo, saha patissavena sappatissavo, patissavabhūtaṃ taṃsabhāgaṅca yaṃ kiṅci garukaraṇaṃ. Sagārove sappatissavacanaṃ **sagāravasappatissavacanaṃ**. Garukaraṇaṃ vā gāro, sagāravassa sappatissavacanaṃ **sagāravasappatissavacanaṃ**. Etena sabhāveneva sagāravassa tathāpavattaṃ vacananti dasseti. Aññattha **du**-saddo garahatthopi hoti “dukkhaṃ dupputto”tiādīsu viya, idha pana so na sambhavati kucchitāya paññāya abhāvatoti āha “**paññāya duṭṭhaṃ nāma natthi**”ti. “Dussīlo”tiādīsu viya abhāvattho **du**-saddoti vuttaṃ “**appañño nippañnoti attho**”ti. **Kittakenāti** kena parimāṇena. Taṃ pana parimāṇaṃ yasmā parimeyyassa atthassa paricchindanaṃ hoti, **nu**-saddo ca pucchāya jotako, tasmā “**kittāvatā nu khoti kāraṇaparicchedapucchā**”ti vatvā “**kittakena nu kho evaṃ vuccatīti attho**”ti āha. “Kāraṇaparicchedapucchā”ti iminā “kittāvatā”ti sāmaññato pucchābhāvo dassito, na visesato, tassa pucchāvisesabhāvañāpanattham mahāniddese āgatā sabbāva pucchā atthuddhāranayena dasseti “**pucchā ca nāmā**”tiādīnā. Adiṭṭhaṃ jotiyati etāyati **adiṭṭhajotanaṃ**, pucchā. **Diṭṭhasamsandanā** sākacchāvasena vinicchayakaraṇaṃ. Vimati chijjati etāyati **vimaticchedanā**. Anumatīyā pucchā **anumatipucchā**. “Taṃ kiṃ maññatha, bhikkhave”tiādīpucchāya hi “kiṃ tumhākaṃ anumati”ti anumati pucchitā hoti. Kathetuṃ kamyatāya pucchā **kathetukamyatāpucchā**.

**Lakkhaṇanti** ñātuṃ icchito yo koci sabhāvo. **Aññātanti** yena kenaci ñāṇena aññātabhāvaṃ āha. **Adiṭṭhanti** dassanabhūtena paccakkaṃ viya adiṭṭhataṃ. **Atulīnti** “ettaṃ ida”nti tulanabhūtena atulīntaṃ. **Atīrīnti** tīraṇabhūtena akataññakiriyāsamaṇāpanataṃ. **Avibhūnti** ñāṇassa apākaṭabhāvaṃ. **Avibhāvīnti** ñāṇena apākaṭīkatabhāvaṃ. **Idha diṭṭhasamsandanāpucchā adhippetā**, na adiṭṭhajotanaṃ vimaticchedanā cāti.

Kathamayaṃ attho viññāyatīti āha “**thero hī**”tiādī. **Sayaṃ vinicchinantoti** sayameva tesam pañhānaṃ attham visesena nicchinanto. **Idam suttanti** idam pañcavīsati pañhapaṭimaṇḍitasuttaṃ, na yaṃ kiṅci anavaseseneva matthakaṃ pāpesīti. “Sayameva pañhaṃ samuṭṭhāpetvā sayaṃ vinicchinanto”ti ettha catukkoṭīkaṃ bhavatīti dassento “**ekacco hī**”tiādīmāha. **Pañhaṃ samuṭṭhāpetumyeva sakkotīti** pucchana vidhiṃyeva jānāti. **Na nicchetunti** nicchetuṃ na sakkoti, vissajjanavidhiṃ na jānātīti attho. **Visesatṭhānanti** aññehi asadisatṭhānaṃ. **Therena sadisoti** therena sadiso sāvako natthi.

**Samsanditvāti** saṃyojetvā samānaṃ katvā, yathā tattha sabbaññutaññānaṃ pavattaṃ, tathā taṃ avilometvāti attho. **Līlāyantoti** līlaṃ karonto. Dhammakathikatāya aggabhāvappattiyā tattha appaṭihataññānatāya buddhalīlāya viya catunnaṃ parisānaṃ gamaṇaṃ gaṇhanto dhammakathaṃ katheti.

**Ito vā etto vā anukkamitvā**ti uggahitakathāmaggaṭṭo yattha katthaci īsakampi anukkamitvā uggahitaniyāmenevāti attho. Tenāha “**yaṭṭhikoṭi**”ntiādi. **Ekapadikanti** ekapadanikkhepamattaṃ. **Daṇḍakasetunti** ekadaṇḍakamayaṃ setuṃ. Heṭṭhā ca upari ca suttapadānaṃ āharaṇena **tepiṭakam buddhavacanaṃ heṭṭhupariyaṃ karonto**. Jātassarasadisaṇca gāthaṃ, suttapadaṃ vā nikkhipitvā tattha nānūpamākāraṇāni āharanto tāni ca tehi suttapadehi bodhento samuṭṭhāpento “**jātassare pañcavaṇṇāni kusumāni phullāpento viya sinerumatthake vaṭṭisahassaṃ jālento viyā**”ti vutto.

**Ekapaduddhāreti** ekasmiṃ paduddhāraṇakkhaṇe. Padavasena **saṭṭhi padasatasahassāni** gāthāvasena **pannarasa gāthāsahassāni. Ākaḍḍhitvā gaṇhanto viyāti** paccekam pupphāni anocinitvā vallimeva ākaḍḍhitvā ekajjham pupphāni katvā gaṇhanto viya. Tenāha “**ekappahārenevā**”ti. **Gatimantānanti** atisayāya ñāṇagatiyā yuttānaṃ. **Dhitimantānanti** dhāraṇabalena yuttānaṃ.

**Anantanayussadanti** paccayuppannabhāsitatthanibbānavipākakiriyādivasena anantapabhede visaye pavattiyā anantanayehi ussannaṃ upacitaṃ. Caturroghanittharaṇatthikānaṃ titthe ṭhapitanāvā viyāti yojanā. **Sahassayuttaajāññarathoti** vejyantarathaṃ sandhāya vadati.

Yasmā pucchāyaṃ byāpanicchāyena “duppañño duppañño”ti āmeditavasena vuttaṃ, tasmā dhammasenāpati pucchitamattaṃ vissajjento pucchāsabhāgena “nappajānāti nappajānāti”ti āmeditavasenevāha. Tattha iti-saddo kāraṇatthoti dassento “**yasmā nappajānāti, tasmā duppaññoti vuccati**”ti āha. **Idaṃ dukkhanti** idaṃ upādānakkhandhapañcakaṃ dukkhaṃ ariyasaccaṃ. Tañca kho ruppanaṃ vediyanaṃ sañjānanaṃ abhisaṅkharanaṃ vijānanaṃ saṅkhepato **ettakaṃ. Ito uddham** kiñci dhammajātaṃ dukkhaṃ ariyasaccaṃ nāma **natthīti yāthāvasarasalakkhaṇato** pavattikkamato ceva pīlanasaṅkhatasantāpavipariṇāmālakkhāṇato ca yathābhūtaṃ ariyamaggapaññāya **nappajānāti**. Avasesapaccayasamāgame udayati uppajjati, svāyaṃ samudayo saṃsārapavattibhāvenāti āha “**pavattidukkhapabhāvikā**”ti, dukkhasaccassa uppādikāti attho. **Yāthāvasarasalakkhaṇatoti** yathābhūtaṃ anupacchedakaraṇarasato ceva sampiṇḍananidānasamyogapalibodhalakkhaṇato ca.

**Idaṃ nāma ṭhānaṃ patvāti** idaṃ nāma appavattikāraṇaṃ āgamma. **Nirujjhatīti** anuppādanirodhavasena nirujjhati, tenāha “**ubhinnaṃ appavattī**”ti. **Yāthāvasarasalakkhaṇatoti** yathābhūtaṃ accutirasato ceva nissaraṇavivekāsaṅkhatāmatalakkhaṇato ca. **Ayaṃ paṭipadāti** ayaṃ sammādiṭṭhiādikā samodhānalakkhaṇā paṭipajjati etāyāti paṭipadā. **Dukkhanirodham gacchatīti** dukkhanirodham nibbānaṃ sacchikiriyābhisaṃmayavasena gacchati ārabba pavattati. **Yāthāvasarasalakkhaṇatoti** yathābhūtaṃ kilesappahānakaraṇasarasato ceva niyyānahetudassanādhipateyyalakkhaṇato ca nappajānāti. **Anantaravāreti** dutiyavāre. **Imināva nāyēnāti** “idaṃ dukkhaṃ, ettakaṃ dukkha”ntiādinā paṭhamavāre vuttanayena. Tattha hi duppaññaniddesattā pajānanapaṭikkhepavasena desanā āgatā, idha paññavantāniddesattā pajānanavasēnāti ayameva viseso. **Etthāti** dutiyavāre.

**Savanatoti** kammaṭṭhānassa savanato uggaṇhāti. Ganthasavanamukhena hi tadatthassa uggaṇaṃ. **Ṭhapetvā taṇhantiādi** tassa uggaṇāṅkāranidassanaṃ. **Abhinivisatīti** vipassanābhinivesavasena abhinivisati vipassanākkammaṭṭhānaṃ paṭṭhapeti. **No vivatṭeti** vivatṭe abhiniveso na hoti avisayattā. **Ayanti** catusaccakammaṭṭhāniko.

**Pañcakkhandhāti** pañcupādānakkhandhā. Khandhavasena vipassanābhinivesassa cakkhādivasena vedanādivasena ca satipi anekavidhatte sukaraṃ suviññeyyanti catudhātumukhena taṃ dassetuṃ “**dhātukammaṭṭhānavasena otarivā**”ti āha. **Rūpanti vavatthapetīti** ruppanaṭṭhena rūpanti asaṅkarato paricchindati. **Tadārammaṇāti** taṃ rūpaṃ ārammaṇaṃ katvā pavattanakā. **Nāmanti** vedanādicatukkaṃ namanāṭṭhena nāmanti vavatthāpeti. **Yamakatālakkhandaṃ bhindanto viya** yamakaṃ bhinditvā “arūpaṃ, rūpañcā”ti **dveva ime dhammā**, na ettha koci attā vā attaniyaṃ vāti **nāmarūpaṃ vavatthapeti** paricchindati pariggaṇhāti. Ettāvataṃ diṭṭhivissuddhi dassitā. **Taṃ panetaṃ** nāmarūpaṃ **na ahetaṃ**. Yasmā sabbaṃ sabbattha sabbadā ca natthi, tasmā **sahetukaṃ**. Kīdisena

hetunā? Na issarādivisamahetunā. Yaṃ panettha vattabbaṃ, taṃ **visuddhimaggasaṃvaṇṇanāyaṃ** (visuddhi. mahāṭī. 2.447) vuttanayena gahetabbaṃ. Sahetukattā eva **sapaccayaṃ. Avijjādayoti** avijjātaṇhupādānakammāhārādayo. **Evanti** “taṃ paneta”ntiādinā vuttappakārena avijjādiḷe **paccaye ceva** rūpavedanādiḷe **paccayuppannadhamme ca vavatthapetvā** paricchinditvā pariggahetvā. Vuttañhettaṃ “avijjāsamudayā rūpasamudayo, taṇhāsamudayā rūpasamudayo”ti (paṭi. ma. 1.50). Ettāvataṃ kaṅkhāvitaraṇavisuddhiṃ dasseti.

**Hutvāti** hetupaccayasamavāye uppajjitvā. **Abhāvattthenāti** tadanantarameva vinassanattthena. **Aniccāti** aniccā addhuvā. **Aniccalakkhaṇaṃ āropetīti** tesu pañcasu khandhesu aniccatāsāṅkhātāṃ sāmāññalakkhaṇaṃ niropeti. **Tatoti** aniccalakkhaṇāropanato paraṃ, **tato** vā aniccabhāvato. **Udayabbayaṇṇapaṭipīḷanākārenāti** uppādanirodhehi pati pati abhikkhaṇaṃ pīḷanākārena hetunā **dukkhā** aniṭṭhā, dukkhamā vā. **Avasavattanākārenāti** kassaci vasena avasavattanākārena. **Anattāti** na sayāṃ attā, nāpi nesāṃ koci attā atthīti anattāti. **Tilakkhaṇaṃ āropetvāti** evaṃ aniccassa dukkhabhāvato, dukkhassa ca anattabhāvato khandhapañcake tiividhampi sāmāññalakkhaṇaṃ āropetvā. **Sammasantoti** udayabbayaññāṇuppattiyā uppanne vipassanupakkilese pahāya maggāmaggaṃ vavatthapetvā udayabbayaññādivipassanāpaṭipāṭiyā saṅkhāre sammasanto gotrabhuññānantaraṃ **lokuttaramaggaṃ pāpuṇāti**.

**Ekapaṭivedhenāti** ekeneva ñāṇena paṭivijjhanena. **Paṭivedho** paṭighātābhāvena visaye nissāṅgacārasāṅkhātāṃ nibbijjhanāṃ. **Abhisamayo** avirajjhivā adhigamanasāṅkhāto avabodho. “Idaṃ dukkhaṃ, ettaṃ dukkhaṃ, na ito bhiyyo”ti paricchinditvā yāthāvato jānānameva vuttanayena paṭivedhoti **pariññāpaṭivedho**, idañca yathā ñāṇe pavatte pacchā dukkhassa sarūpādiparicchede sammoho na hoti, tathā pavattim gahetvā vuttaṃ, na pana maggaññassa “idaṃ dukkha”ntiādinā pavattanato. Tenāha “**tasmīncassa khaṇe**”tiādi. Pahīnassa puna apahātabbatāya pakaṭṭhaṃ hānaṃ cajanāṃ samucchindanaṃ pahānaṃ, pahānameva vuttanayena paṭivedhoti **pahānapaṭivedho**. Ayampi yena kilesena appahīyamānena maggabhāvanāya na bhavitabbaṃ, asati ca maggabhāvanāya yo uppajjeyya, tassa padaghātāṃ karontassa anuppattidhammataṃ āpādentassa ñāṇassa tathāpavattiyā paṭighātābhāvena nissāṅgacāraṃ upādāya evaṃ vutto. Sacchikiriyā paccakkhakarāṇaṃ anussavākāraparivitakkādiḷe muñcivāva sarūpato ārammaṇakarāṇaṃ “idaṃ ta”nti yāthāvasabhāvato gahaṇaṃ, sā eva vuttanayena paṭivedhoti **sacchikiriyāpaṭivedho**. Ayampi yassa āvaraṇassa asamucchindanato ñāṇaṃ nirodhaṃ ālambitūṃ na sakkoti, tassa samucchindanato taṃ sarūpato vibhāviteva pavattatīti evaṃ vutto.

**Bhāvanā** uppādanā vaḍḍhanā ca. Tattha paṭhamamagge uppādanattthena bhāvanā, dutiyādīsū vaḍḍhanattthena, ubhayatthāpi vā ubhayaṃ veditabbaṃ. Paṭhamamaggopi hi yathārahaṃ vuṭṭhānagāminiyāṃ pavattaṃ pari jānānādiṃ vaḍḍhento pavattoti tatthāpi vaḍḍhanattthena bhāvanāti sakkā viññātuṃ. Dutiyādīsūpi appahīnakilesappahānato puggalantarāsādhānato ca uppādanattthena bhāvanā, sā eva vuttanayena paṭivedhoti **bhāvanāpaṭivedho**. Ayampi yathā ñāṇe pavatte pacchā maggadhammānaṃ sarūpaparicchede sammoho na hoti, tathā pavattim gahetvā vutto. Tiṭṭhantu tāva yathādhigatā maggadhammā, yathāpavattesu phalesūpi ayaṃ yathādhigatasaccadhammesu viya vigatasammohova hoti sekkhopi samāno. Tena vuttaṃ – “diṭṭhadhammo pattadhammo viditadhammo pariyoḷāḷhadhammo”ti (mahāva. 27). Yathā cassa dhammā tāsāṃ jotitā yathādhigatasaccadhammāvalambiniyo maggavīthito parato maggaphalapaḷhīnāvasiṭṭhakilesanibbānānaṃ paccavekkhāṇā pavattanti. Dukkhasaccadhammā hi sakkāyaditṭhiādayo. Ayañca atthavaṇṇanā **pariññābhisamayenāti**ādīsūpi vibhāvetabbā. **Kiccototi** asammoḷato. **Nirodhaṃ ārammaṇatoti** ettha “ārammaṇatopi”ti pi-saddo luttanidditṭho daṭṭhabbo nirodhepi asammoḷapaṭivedhassa labbhanato. **Etassāti** catusaccakammaṭṭhānikassa puggalassa.

**Paññavāti nidditṭho** nippariyāyato paññavantatāya idha adhippetattā. **Pāḷitoti** dhammato. **Atthatotīti** atṭhakathāto. **Anusandhitoti** tasmim tasmim sutte taṃtaṃanusandhito. **Pubbāparatoti** pubbenāparaṃ saṃsandanato. Saṅgītikkena cettha pubbāparatā veditabbā. Taṃtaṃdesanāyameva vā

pubbabhāgena aparabhāgassa saṃsandanato. **Viññāṇacaritoti** vijānanacarito vīmaṃsanacarito teṭṭhake buddhavacane vicāraṇācāravepullato. **Paññavāti na vattabbo** maggenāgatāya paññāya abhāvato. **Ajja ajjeva arahattanti** ittaṃ atikhippamevāti adhippāyo. **Paññavāpakkaṃ bhajati** sekkhapariyāyasabbhāvato. **Sutte pana paṭivedhova kathito** saccābhisamayavasena āgatattā.

**Esāti** anantare vutto ariyapuggalo. **Kammakārakacittanti** bhāvanākammassa pavattanacittam. **Sukhavedanampi vijānātīti** ko vediyati, kassa vedanā, kiṃkāraṇā vedanā, sopi kassaci abhāvaggahaṇamukhena sukhaṃ vedanaṃ sabhāvato samudayato atthaṅgamato assādato ādīnavato ca yathābhūtaṃ paricchindanto pariggaṇhanto sukhaṃ vedanaṃ vijānāti nāma. Sesapadadvayepi eseva nayo. Yasmā “**satipaṭṭhāne**”ti iminā satipaṭṭhānakathaṃ upalakkheti. Tāya hi tadattho veditabbo, tasmā taṃsaṃvaṇṇanāyampi (dī. ni. 1. 2.380) vuttanayena tassattho veditabbo. Kāmañcetam viññāṇam vedanāto aññampi ārammaṇam vijānāti, anantaravāre pana rūpamukhena vipassanābhinivesassa dassitattā idha arūpamukhena dassetuṃ “sukhantipi vijānāti”tiādīnā niddiṭṭham, pucchantassa vā ajjhāsayavasena.

**Saṃsaṭṭhāti** sampayuttā. Tenāha “**ekuppādādilakkaṇena saṃyogaṭṭhenā**”ti. **Visaṃsaṭṭhāti** vippayuttā. **Bhinditvāti** aññabhūmikassa aññabhūmidassaneneva vināsetvā, saṃbhinditvā vā. **Saṃsaṭṭhabhāvaṃ pucchati** taṃcittuppādapariyāpannānaṃ pañcaviññāṇaṃ saṃsaṭṭhabhāvaṃ pucchati. Yadi evaṃ kathaṃ pucchāya avasaro visaṃsaṭṭhabhāvāsankāya eva abhāvato? Na, cittuppādantaragātānaṃ maggapaññāmaggaviññāṇaṃ vipassanāpaññāvīpissanāvīññāṇaṃ vomissakasāsaṃsaṭṭhabhāvassa labbhamānattā. **Vinivaṭṭetvāti** aññamaññato vivecetvā. **Nānākaraṇaṃ dassetuṃ na sakkāti** idaṃ kevalaṃ saṃsaṭṭhabhāvameva sandhāya vuttaṃ, na sabhāvabhedam, sabhāvabhedato pana nānākaraṇaṃ nesam pākaṭameva. Tenāha “**ārammaṇato vā vatthuto vā uppādato vā nirodhato vā**”ti. Idāni tameva sabhāvabhedam visayabhedena suṭṭhu pākaṭam katvā dassetuṃ “**tesam tesam panā**”tiādi vuttaṃ. **Visayoti** pavattiṭṭhānaṃ issariyabhūmi, yena cittapaññānaṃ tattha tattha pubbaṅgamatā vuccati.

Kāmañca vipassanāpi paññāvaseneva kiccakārī, maggopi viññāṇasahitova, na kevalo, yathā pana lokiyadhammesu cittaṃ padhānaṃ tatthassa dhorayabhāvena pavattisabbhāvato. Tathā hi taṃ “chadvārādhīpati rājā”ti (dha. pa. aṭṭha. 2.181) vuccati, evaṃ lokuttaradhammesu paññā padhānā paṭipakkhavidhamanassa viśesato tadadhīnattā. Tathā hi maggadhamme sammādiṭṭhi eva paṭhamam gahitā. Ayañca nesam visayavasena pavattibhedo, tathā ca paññāpanavidhi na kevalaṃ thereheva dassito, apica kho bhagavatāpi dassitoti vibhāvento “**sammāsambuddhopī**”tiādīmāha. Yattha paññā na labbhati, tattha cittavasena pucchane vattabbameva natthi yathā “kiṃcitto tvaṃ bhikkhū”tiādīsu (pārā. 132-135). Yattha pana paññā labbhati, tatthāpi cittavasena jotanaṃ hoti yathā – “ajjhāttameva cittaṃ saṅghapeti sannisādeti ekodiṃ karoti samādahati (saṃ. ni. 4.332), yasmim samaye kāmāvacaraṃ kusalaṃ cittaṃ uppannaṃ hoti”tiādīsu (dha. sa. 1). **Aṭṭhakathāyaṃ** pana lokiyadhammesu cittavasena, lokuttaradhammesu paññāvasena codanaṃ byatirekamukhena dassetuṃ “**katamā te bhikkhu paññā adhigatā**”tiādi vuttaṃ. Yebhuyyavasena cetam vuttanti daṭṭhabbam. Tathā hi katthaci lokiyadhammā paññāsīsenapi niddisīyanti – “paṭhamassa jhānassa lābhino kāmāsaṃsaṭṭhā saññāmanasikārā samudācaranti hānabhāginī paññā”tiādīsu (paṭi. ma. 1.1). Saññāsīsenapi – “uddhumātakasaññāti vā sesarūpārūpasaññāti vā ime dhammā ekatthā, udāhu nānatthā”tiādīsu (pārā. aṭṭha. 45.padabhājanīyavaṇṇanā). Tathā lokuttaradhammāpi katthaci cittaśīsenā niddisīyanti – “yasmim samaye lokuttaraṃ cittaṃ bhāveti”ti (dha. sa. 277), tathā phassādisīsenapi – “yasmim samaye lokuttaraṃ phassaṃ bhāveti, vedanaṃ saññaṃ cetanaṃ bhāveti”tiādīsu (dha. sa. 277).

**Catūsu sotāpattiyaṅgesūti** sappurisasevanā, saddhammassavanaṃ, yonisomanasikāro, dhammānudhammapaṭipattīti imesu catūsu sotāpattimaggassa kāraṇesu. Kāmaṃ cetesu satīādayopi dhammā icchitabbāva tehi vinā tesam asambhavato, tatthāpi cettha saddhā viśesato kiccakārīti veditabbā. Saddo eva hi sappurise payirupāsati, saddhammaṃ suṇāti, yoniso ca manasi karoti, ariyamaggassa ca anudhammaṃ paṭipajjati, tasmā vuttaṃ “**ettha saddhindriyaṃ daṭṭhabba**”nti. Iminā nayena



sesindriyesupi attho daṭṭhabbo. **Catūsu sammappadhānesūti** catubbidhasammappadhānabhāvanāya. **Catūsu satipaṭṭhānesūti**ādisupi eseva nayo. Ettha ca sotāpattiyaṅgesu saddhā viya sammappadhānabhāvanāya vīriyaṃ viya ca satipaṭṭhānabhāvanāya – “satimā vineyya loke abhijjhādomanassa”nti (dī. ni. 2.373; ma. ni. 1.106; saṃ. ni. 5.384, 407) vacanato pubbabhāge kiccato sati adhikā icchitabbā. Evaṃ samādhikammikassa samādhī, “ariyasaccabhāvanā paññābhāvanā”ti katvā tattha paññā pubbabhāge adhikā icchitabbāti pākaṭoyamattho, adhigamakkhaṇe pana samādhīpaññānaṃ viya sabbesampi indriyānaṃ saddhādīnaṃ samarasatāva icchitabbā. Tathā hi “**ettha saddhindriya**”ntiādinā tattha tattha etthaggaṇaṃ kataṃ. **Evanti** yaṃ ṭhānaṃ, taṃ indriyasamattādiṃ paccāmasati. **Savisayasmiṃyevāti** attano attano visaye eva. **Lokiyalokuttarā dhammā kathitāti** lokiyadhammā lokuttaradhammā ca tena tena pavattivisesena kathitā. Idaṃ vuttaṃ hoti – saddhāpaññānesu indriyesu saha pavattamānesu tattha tattha visaye saddhādīnaṃ kiccādhikatāya tassa tasseva daṭṭhabbatā vuttā, na sabbesaṃ. Evaṃ aññepi lokiyalokuttarā dhammā yathāsakaṃ visaye pavattivisesavasena bodhitāti.

Idāni saddhādīnaṃ indriyānaṃ tattha tattha atirekakiccatāṃ upamāya vibhāvetuṃ “**yathā hī**”tiādi vuttaṃ. Tatridaṃ upamāsaṃsandanaṃ rājapañcamā sahāyā viya vimuttiṃparipācākāni pañcindriyāni. Nesāṃ kīḷanattāṃ ekajjhaṃ vīthiotaraṇaṃ viya indriyānaṃ ekajjhaṃ vipassanāvīthiotaraṇaṃ. Sahāyesu paṭhamādīnaṃ yathāsakageheva vicāraṇā viya saddhādīnaṃ sotāpattiyaṅgādīni patvā pubbaṅgamatā. Sahāyesu itaresaṃ tattha tattha tuṅhībhāvo viya sesindriyānaṃ tattha tattha tadanvayatā. Tassa pubbaṅgamabhūtassa indriyassa kiccānugatatā. Na hi tadā tesāṃ sasambhārapathavīdīsū āpādīnaṃ viya kiccaṃ pākaṭaṃ hoti, saddhādīnaṃyeva pana kiccaṃ vibhūtaṃ hutvā tiṭṭhati puretaraṃ tathāpaccayehi cittasantānassa abhisankhatatā. Ettha ca vipassanākamikassa bhāvanā visesato paññuttarāti dassanattāṃ rājānaṃ nidassanaṃ katvā paññindriyaṃ vuttaṃ. **Iti**tiādi yathādhigatassa atthassa nigamaṃ.

**Maggaviññāṇampīti** ariyamaggasahagataṃ apacayaḡāmiṃviññāṇampi. **Tatheva taṃ vijānātīti** saccadhammaṃ “idaṃ dukkha”ntiādinā nayeneva vijānāti ekacittuppādapariyāpannattā maggānukūlattā ca. **Yaṃ vijānātīti** ettha vijānanapajānanāni vipassanācittuppādapariyāpannāni adhippetāni, na “yaṃ pajānāti”ti ettha viya maggacittuppādapariyāpannāti āha “**yaṃ saṅkhāragata**”ntiādi. **Tathevāti** “anicca”ntiādinā nayena. Ekacittuppādapariyāpannattā vipassanābhāvato ca samānapaccayehi saha pavattikatā **ekuppādātā**, tato eva ekajjhaṃ saheva nirujjhaṇaṃ **ekanirodhatā**, ekaṃyeva vatthuṃ nissāya pavatti **ekavatthukatā**, ekaṃyeva ārammaṇaṃ ārabba pavatti **ekārammaṇatā**. Hetumhi cetāṃ karaṇavacanaṃ. Tena ekuppādātīya saṃsaṭṭhabhāvaṃ sādheti. Anavasesapariyādānañcetaṃ, ito tīhipi sampayuttalakkaṇaṃ hotiyeva.

**Maggapaññaṃ sandhāya vuttaṃ**, sā hi ekantato bhāvetabbā, na pariññeyyā, paññāya pana bhāvetabbatāya taṃsampayuttadhammāpi taggatikāva hontīti āha “**taṃsampayuttaṃ panā**”tiādi. Kiñcāpi vipassanāpaññāya bhāvanāvasena pavattanato taṃsampayuttaviññāṇampi theveva pavattati, tassa pana pariññeyyabhāvānavattanato pariññeyyatā vuttā. Tenevāha – “yampi taṃ dhammaṭṭhitiññaṃ, tampi khayadhammaṃ vayadhammaṃ virāgadhammaṃ nirodhadhamma”nti.

**450. Evaṃ santepīti** vedanāti evaṃ sāmāññaggahaṇe satipi.

**Tebhūmikasammasanacāavedanāvāti** bhūmittayapariyāpannā, tato eva sammasanaññaṇassa gocarabhūtā vedanā eva adhippetā sabrahmacārīnaṃ upakārāvahabhāvena desanāya āradhattā. Tathā hi vuttaṃ “caturghanittharaṇattikāna”ntiādi. Esa nayo paññāyapi. Idha sukhādisaddā tadārammaṇavisayāti imamattāṃ suttana sādhetuṃ “**rūpañca hī**”tiādi vuttaṃ. **Ekantadukkhanti** ekanteneva aniṭṭhaṃ, tato eva dukkhamatāya dukkhaṃ. Ārammaṇakaraṇavasena dukkhavedanāya anupatitaṃ, otiññañcāti **dukkhānupatitaṃ, dukkhāvakkantaṃ**. Sukhena anavakkantaṃ abhavissāti yojanā. **Nayidanti** ettha **idanti** nipātamattaṃ. **Sārajjeyyunti** sārāgaṃ uppādeyyuṃ. **Sukhanti** sabhāvato ca iṭṭhaṃ. **Sārāgā saṃyujjanti** bahalarāgahetu yathārahaṃ dasahipi saṃyojanehi saṃyujjanti. **Saṃyogā saṃkilissanti** tathā saṃyuttatāya taṃhāsaṃkilesādivasena saṃkilissanti, vibādhīyanti

upatāpīyanti cāti attho. **Ārammaṇanti** iṭṭhaṃ, aniṭṭhaṃ, majjhattañca ārammaṇaṃ yathākkamaṃ sukhaṃ, dukkhaṃ, adukkhamasukhanti kathitaṃ. Evaṃ avisesena pañcapi khandhe sukhādiārammaṇabhāvena dassetvā idāni vedanā eva sukhādiārammaṇabhāvena dassetuṃ “**apicā**”tiādi vuttaṃ. Pākatikapacurajanavaseṇāyaṃ kathitāti katvā “**purimaṃ sukhaṃ vedanaṃ ārammaṇaṃ katvā**”ti vuttaṃ. Visesaḷābhī pana anāgatampi sukhaṃ vedanaṃ ārammaṇaṃ karoteva. **Vuttametam** satipaṭṭhānaṇāyamaṃ (dī. ni. aṭṭha. 2.380; ma. ni. aṭṭha. 1.79). Vedanāya hi ārammaṇaṃ vediyantiyā taṃsamaṅgīpuggalo vedetīti vohāramattaṃ hoti.

**Sabbasaññāyāti** sabbāyapi catubhūmikasaññāya. **Sabbatthakasaññāyāti** sabbasmiṃ cittuppāde pavattanakasaññāya. **Vatthe vāti vā**-saddena vaṇṇadhātuṃ saṅgaṇhāti. **Pāpentoti** bhāvanaṃ upacāraṃ vā appanaṃ vā upanento. **Uppajjanakasaññāpīti** “nīlaṃ rūpaṃ, rūpārammaṇaṃ nīla”nti uppajjanakasaññāpīti.

**Asabbasaṅgāhikattāti** sabbesaṃ vedanāsaññāviññāṇānaṃ asaṅgahitattā. **Takkagatanti** suttakantanakatakkamhi, suttavattanakatakkamhi vā veṭhanavasena ṭhitaṃ. **Parivaṭṭakādīgatanti** suttaveṭhanaparivaṭṭakādīgataṃ. **Vissaṭṭhattāva na gahitā**, yadaggena paññā viññāṇena saddhiṃ sampayogaṃ labhāpitā, tadaggena vedanāsaññāhipi sampayogaṃ labhāpitā evāti. **Tadeva sañjānāti** saṃsaṭṭhabhāvato.

**Sañjānāti vijānātīti** ettha “pajānātī”ti padaṃ ānetvā vattabbaṃ pajānanavasenaṃpi visesassa vakkhamānattā. **Jānātīti** ayaṃ saddo ca laddatoyevettha aviseso, atthato pana visesato icchitabbo. Anekathattā hi dhātūnaṃ tena ākhyātapadena nāmapadena ca vuttamatthaṃ upasaggapadaṃ jotakabhāvena viseseti, na vācakabhāvena. Tenāha “**tassapi jānanatthe viseso veditabbo**”ti. Etena saññāviññāṇapaññāpadāni antogadhajānanatthe yathāsakaṃ visiṭṭhavisaye ca niṭṭhānīti dasseti. Tenevāha “**saññā hī**”tiādi. **Sañjānanamattamevāti** ettha **matta**-saddena visesanivattiatthena vijānanapajānanākāre nivatteti, **eva**-saddena kadācīpi imissā te visesā natthevāti avadhāreti. Tenevāha “**aniccaṃ dukkha**”ntiādi. Tattha viññāṇakiccampi kātuṃ asakkontī saññā kuto paññāciccaṃ kareyyāti “**lakkhaṇapaṭivedhaṃ pāpetuṃ na sakkoti**”cceva vuttaṃ, na vuttaṃ “maggapātubhāva”nti.

Ārammaṇe pavattamānaṃ viññāṇaṃ na saññā viya nīlapītādīmattasañjānanavasena pavattati, atha kho tattha aññampi tādisaṃ visesaṃ jānantameva pavattatīti āha “**viññāṇa**”ntiādi. Kathaṃ pana viññāṇaṃ lakkhaṇapaṭivedhaṃ pāpetīti? Paññāya dassitamaggena. Lakkhaṇārammaṇikavipassanāya hi anekavāraṃ lakkhaṇāni paṭivijjhivā pavattamānāya paṇḍabhāvato paricayavasena ñāṇavippayuttacittenapi vipassanā sambhavati, yathā taṃ paṇḍassa ganthassa ajjhayane tattha tattha gatāpi vārā na upadhārīyanti. “Lakkhaṇapaṭivedha”nti ca lakkhaṇānaṃ ārammaṇakaraṇamattaṃ sandhāya vuttaṃ, na paṭivijjhaṇaṃ. **Ussakkivāti** udayabbayaññādiññāpaṭipāṭiyā ārabhitvā. **Maggapātubhāvaṃ pāpetuṃ na sakkoti** asamboḍhasabhāvattā. **Ārammaṇampi sañjānāti** avabujjhanavaseneva, na sañjānanamattena. Tathā **lakkhaṇapaṭivedhampi pāpeti**, na vijānanamattena, attano pana aññāsādhāraṇena ānubhāvena ussakkivā maggapātubhāvampi pāpeti.

Idāni yathāvuttamatthaṃ upamāya vibhāvetuṃ “**yathā hī**”tiādi vuttaṃ. Tattha **ajātabuddhīti** asañjātabyavahārabuddhi. **Upabhogaparibhoganti** upabhogaparibhogārahaṃ, upabhogaparibhogavatthūnaṃ paṭilābhayogganti attho. **Kūṭoti** kahāpaṇapatirūpako tambakaṃsādimayo. **Chekoti** mahāsāro. **Karatoti** aḍḍhasāro. **Saṇhoti** mudujātiko samasāro. **Iti**-saddo ādiattho. Tena pādasāraparopādasāraaḍḍhasārādīnaṃ saṅgaho. **Jānanto ca pana naṃ rūpaṃ disvāpi...pe... asukācariyena katotipi jānāti** tathā heraññīkaganthassa suggahitattā. **Evamevantiādi** upamāsaṃsandanaṃ. Saññāvibhāgaṃ akatvā piṇḍavaseneva ārammaṇassa gahaṇato dāraḷakassa kahāpaṇadassanasadisā vuttā. Tathā hi sā yathāupaṭṭhitavisayapadaṭṭhānā vuccati. Viññāṇaṃ ārammaṇe ekaccavisesaggahaṇasamatthabhāvato gāmikapurisakahāpaṇadassanasadisāṃ vuttaṃ. Paññā pana ārammaṇe anavasesāvabodhato heraññīkakahāpaṇadassanasadisā vuttā. **Nesanti** saññāviññāṇapaññānaṃ. **Visesoti** sabhāvaviseso. **Duppaṭivijjho** pakatipaññāya. Imināva nesam

accantasukhumatam dasseti.

**Ekārammaṇe pavattamānānanti** ekasmiṃyeva ārammaṇe pavattamānānaṃ. Tena abhinnavisayābhinnakālatādassanena avinibbhogavuttitaṃ vibhāvento duppaṭivijjhataṃyeva ulliṅgeti. **Vavatthānanti** asaṅkarato ṭhapanam. **Ayam phasso...pe... idam cittanti** nidassanamattametam. **Iti-**saddo vā ādiattho. Tena sesadhammānampi saṅgaho daṭṭhabbo. **Idanti** arūpīnaṃ dhammānaṃ vavatthānakaraṇam. **Tatoti** yaṃ vuttaṃ tilatelādiuddharaṇam, tato. Yadi dukkarataram, katham tanti āha “**bhagavā panā**”tiādi.

**451. Nissaṭṭenāti** nikkhantena atamsambandhena. **Pariccattenāti** pariccattasadisena paccayabhāvānupagamanena paccayuppannasambandhābhāvato. **Nissakkavacanam** apādānadīpanato. **Karaṇavacanam** kattuatthadīpanato. Kāmāvacaramanoviññāṇam na niyamato “idam nāma pañcadvārikāsambandhā”ti sakkā vattum, rūpāvacaraviññāṇam pana na tathāti, tasseva pañcahi indriyehi nissaṭṭatā vuttāti āha “**rūpāvacaracattutthajjhānacittena**”ti. Cattutthajjhānaggahaṇam tasseva arūpāvacarassa padaṭṭhānabhāvato. **Parisuddhenāti** visesato asaṃkilesikattāva. Tañhi vigatūpakkilesatāya visesato parisuddham. Tenāha “**nirupakkilesenā**”ti. **Jānitabbaṃ neyyam**, aparasantānesu idam atisayam jānitabbato bujjhitabbaṃ bodhetabbaṃ vāti attho. **Neyyanti** vā attano santāne netabbaṃ pavattetabbanti attho. Tenāha “**nibbattetum sakkā hoti. Ettha ṭhitassa hi sā ijjhati**”ti. **Pāṭiyekanti** visum visum, anupadadhammavasenāti attho. **Abhinivesābhāvatoti** vipassanābhinivesassa asambhavato. **Kalāpato nayatoti** kalāpasammasanasāṅkhātato nayavipassanato. **Bhikkhunoti** sāvakassa. Sāvakasseva hi tatra anupadadhammavipassanā na sambhavati, na satthu. Tenāha “**tasmā**”tiādi. **Vissajjesīti** tappaṭibaddhachandarāgappahānena pajahati.

**Hatthagatattāti** hatthagatasadisattā, āsannattāti attho. Yadā hi lokanātho bodhimūle aparājītapallaṅke nisinnō – “kiccham vatāyam loko āpanno”tiādinā (dī. ni. 2.57; saṃ. ni. 2.4, 10) paṭiccasamuppādamukhena vipassanābhinivesam katvā adhigantabbasabbaññūtaññānānurūpaṃ chattimsakoṭṭisahasamukhena mahāvajiraññāṇam nāma mahābodhisattasammasanaṃ pavattento anekākārasamāpattidhammasammasane anupadameva nevasaññānāsāññāyatanadhammepi aparāparam sammasi. Tenāha “**bhagavā panā**”tiādi. **Paropaññāsāti** dvepaññāsam. Kāmañcetta keci dhammā vedanādayo phassapañcamakādīsū vuttāpi jhānakoṭṭhāsādīsūpi saṅgahitā, taṃtampaccayabhāvavisiṭṭhena pana atthavisesena dhammantarāni viya hontīti evaṃ vuttaṃ. Tathā hi lokuttaracittuppādesu navindriyatā vuccati. **Aṅguddhārenāti** tattha labbhamānājhānaṅgabojjhaṅgamaggāṅgānaṃ uddharaṇena. **Aṅga-**saddo vā koṭṭhāsapariyāyo, tasmā **aṅguddhārenāti** phassapañcamakādikoṭṭhāsānaṃ samuddharaṇena. **Yāvatā saññāsamāpattiyoti** yattakā saññāsahagatā jhānasamāpattiyō, tāhi vuṭṭhāya adhigandhabbattā tāvatikā veneyyānaṃ **aññāpaṭivedho** arahattasamadhigamo.

**Dassanapariṇāyakatṭhenāti** andhassa yaṭṭhikoṭṭim gahetvā maggadesako viya dhammānaṃ yathāsabhāvadassanasāṅkhātena pariṇāyakabhāvena. Yathā vā so tassa cakkhubhūto, evaṃ sattānaṃ paññā. Tenāha “**cakkhubhūtāya paññāyā**”ti. Samādhisampayuttā paññā **samādhipaññā**. Samādhi cetta āruppasamādhīti vadanti, sammasanapayogo pana koci jhānasamādhīti yuttaṃ. Vipassanābhūtā paññā **vipassanāpaññā**. Samādhipaññāya antosamāpattiyam **kiccato pajānāti**, “samāhito yathābhūtam pajānāti”ti pana vacanato (saṃ. ni. 3.5; 4.99-100; 3.5.1071-1072; netti. 40; mi. pa. 2.1.14) **asammohato pajānāti**. Tattha **kiccato**ti gocarajjhatte ārammaṇakaraṇakiccato. **Asammohato**ti sampayuttadhammesu sammohavidhamanato yathā pītipaṭisaṃvedanādīsū. **Kimatthiyāti** kiṃpayojanāti āha “**ko etissā attho**”ti. **Abhiññeyye dhammeti** yāthāvasarasalakkhaṇāvabodhavasena abhimukham ñeyye jānitabbe khandhāyatanādiddhamme. **Abhijānātīti** salakkhaṇato sāmāññalakkhaṇato ca abhimukham avirajjhanavasena jānāti. Etena nātapaniññābyāpāramāha. **Pariññeyyeti** aniccātipi dukkhātipi anattātipi paricchijja jānitabbe. **Parijānātīti** “yaṃ kiñci rūpaṃ...pe... aniccaṃ khayatṭhena”tiādinā (paṭi. ma. 1.48) paricchinditvā jānāti. Iminā tīraṇapariññābyāpāramāha. **Pahātabbe dhammeti** niccasaññādikeyā arahattamaggavajjhā sabbe pāpadhamme. **Pajahati** pakaṭṭhato jahati, vikkhambheti ceva

samucchindati cāti attho. Iminā pahānapariññābyāpāramāha. Sā panesā paññā lokiyāpi tippakārā lokuttarāpi, tāsam viśesam sayamevāha. **Kiccato**ti abhiñānavasena ārammaṇakiccato. **Asammohato**ti yathābalaṃ abhiññeyyādīsu sammohavidhamanato. Nibbānamārammaṇaṃ katvā pavattanato abhiññeyyādīsu vigatasammohato evāti āha “**lokuttarā asammohato**”ti.

**452.** Kammassakatā sammādiṭṭhi ca vaṭṭanissitattā idha nādhīpetā, vivatṭakathā hesāti vuttaṃ “**vipassanāsammādiṭṭhiyā ca maggasammādiṭṭhiyā cā**”ti. **Parato ghosoti** parato satthuto, sāvakato vā labbhamāno dhammaghoso. Tenāha “**sappāyadhammassavana**”nti. Tañhi sammādiṭṭhiyā paccayo bhavituṃ sakkoti, na yo koci paratoghoso. **Upāyamanasikāro**ti yena nāmarūpariggaḥādi sijjhati, tādiso pathamanasikāro. Ayañca sammādiṭṭhiyā paccayoti niyamapakkhiko, na sabbasaṃgāhakoti dassento “**paccekabuddhānaṃ panā**”tiādīmāha. **Yonisomanasikārasmiṃyevāti** avadhāraṇena paratoghosameva nivatteti, na padaṭṭhānavisesaṃ paṭiyogīnivattanattattā eva-saddassa.

**Laddhupakārāti** (a. ni. ṭi. 3.5.25) yathārahaṃ nissayādivasena laddhapaccayā. Vipassanāsammādiṭṭhiyā anuggahitabhāvena gahitattā maggasammādiṭṭhīsu ca **arahattamaggasammādiṭṭhi**, anantarassa hi vidhi, paṭisedho vā. Aggaphalasaṃmādhimhi tapparikkhāradhammesuyeva ca kevalo cetopariyāyo niruḥhoti **sammādiṭṭhīti arahattamaggasammādiṭṭhi**. **Phalakkhaṇeti** anantare kālantare cāti duvidhe phalakkhaṇe. Paṭippassaddhivasena sabbasaṃkilesehi ceto vimuccati etāyāti **cetovimutti**, aggaphalapaññaṃ ṭhapetvā avasesā phaladhammā. Tenāha “**cetovimutti phalaṃ assāti**. **Cetovimuttisaṅkhātaṃ phalaṃ ānisaṃso**”ti, sabbasaṃkilesehi cetaso vimuccanaṅkhātaṃ paṭippassambhanasaññitaṃ pahānaṃ phalaṃ ānisaṃso cāti yojanā. Idha ca cetovimutti-saddena pahānamattaṃ gahitaṃ, pubbe pahāyakkhadhammā, aññathā phaladhammā eva ānisaṃsoti gayhamāne punavacanaṃ niratthakaṃ siyā.

**Paññāvimuttiphalaṅnisaṃsāti** etthāpi evameva attho veditabbo. Sammāvācākamantājīvā sīlasabhāvattā viśesato samādhissa upakārā, tathā sammāsaṅkappo jhānasabhāvattā. Tathā hi so “**appanā**”ti niddiṭṭho. Sammāsatisammāvāyāmā pana samādhipakkhiyā evāti āha “**avasesā dhammā cetovimuttīti veditabbā**”ti. **Catupārisuddhisīlanti** ariyamaggādhigamassa padaṭṭhānabhūtaṃ catupārisuddhisīlaṃ. **Sutādīsipi** eseva nayo. Attano cittappavattīrocanavasena saha kathaṃ saṃkathā, saṃkathāva **sākacchā**. Idha pana kammaṭṭhānapaṭibaddhāti āha “**kammaṭṭhāne...pe... kathā**”ti. Tattha kammaṭṭhānassa ekavāraṃ vīthiyā appaṭipajjanaṃ khalanaṃ, anekavāraṃ pakkhalanaṃ, tadubhayassa vicchedanīkathā **khalanapakkkhalanachedanakathā**. **Pūrentassāti** vivaṭṭanissitaṃ katvā pālentassa brūhentassa ca. **Suṇantassāti** “yathāuggahitakammaṭṭhānaṃ phātiṃ gamissati”ti evaṃ suṇantassa. Teneva hi “**sappāyadhammassavana**”nti vuttaṃ. **Kammaṃ karontassāti** bhāvanānuyogakammaṃ karontassa.

Pañcasupi ṭhānesu **anta**-saddo hetuatthajotano daṭṭhabbo. Evañhi “**yathā hī**”tiādinā vuccamānā ambupamā ca yujjeyya. **Udakakoṭṭhakanti** ālavālaṃ. **Thiraṃ katvā bandhatīti** asithilaṃ daḷhaṃ nātimahantaṃ nātikhuddakaṃ katvā yojeti. **Thiraṃ karotīti** udakasiñcanakāle tato tato viśaritvā udakassa anikkhamanattaṃ ālavālaṃ thirataṃ karoti. **Sukkhadaṇḍakoti** tasseva ambagacchakassa sukko sākchāsīsako. **Kipillikapuṭoti** tambakipillikakuṭajaṃ. **Khaṇittinti** kudālaṃ. **Koṭṭhakabandhanaṃ viya sīlaṃ** sammādiṭṭhiyā vaḍḍhanupāyassa mūlabhāvato. **Udakasiñcanaṃ viya dhammassavanaṃ** bhāvanāya paribrūhanaṃ. **Mariyādāya thirabhāvakaraṇaṃ viya samatho** yathāvuttabhāvanādhīṭṭhānāya sīlamariyādāya daḷhabhāvāpādanato. Samāhitassa hi sīlaṃ thirataṃ hoti. **Samīpe valliādīnaṃ haraṇaṃ viya kammaṭṭhāne khalanapakkkhalanachedanaṃ** ijjhitaḥabhāvanāya vibandhāpanayanato. **Mūlakhaṇaṃ viya sattannaṃ anupassanānaṃ bhāvanā** tassā vibandhassa mūlakānaṃ taṇhāmānadiṭṭhīnaṃ palikhaṇanaṃ. Ettha ca yasmā suparisuddhasīlassa kammaṭṭhānaṃ anuyūñjantassa sappāyadhammassavanaṃ icchitabbaṃ, tato yathāsute atthe sākchāsāpajjanaṃ, tato kammaṭṭhānaviśodhanena samathanipphatti, tato samāhitassa āradhaviśassakassa vipassanāpāripūri. Paripuṇṇavipassano maggasammādiṭṭhiṃ paribrūhetīti evametesam āngānaṃ paramparāya sammukhā ca anuggaṇhanaṃ ayamānupubbī kathitāti veditabbaṃ.

**453. Idha kiṃ pucchatīti** idha evaṃ arahattaphalaṃ pāpitāya desanāya “kati panāvuso, bhavā”ti bhavaṃ pucchanto kīdisaṃ anusandhiṃ upādāya pucchatīti attho. Teneva hi “**mūlameva gato anusandhī**”ti vatvā adhippāyaṃ pakāsento “**duppañño**”tiādīmāha. **Duppaññoti** hi idha appaṭividdhasacco adhippeto, na jaḷo eva. **Kāmabhavoti**ādīsu kammopapattibhedato duvidhopi bhavo adhippetoti dassento “**kāmabhavūpagam kamma**”ntiādīmāha. Tattha yaṃ vattabbaṃ, taṃ **visuddhimagge tamsaṃvaṇṇanāyaṃ** (visuddhi. 2.647; visuddhi. mahāṭī. 2.646-647) vuttanayena veditabbaṃ. **Punabbhavassāti** punappunaṃ aparāparaṃ bhavanato jāyanato punabbhavoti laddhanāmassa vaṭṭapabandhassa. Tenāha “**idha vaṭṭaṃ pucchissāmī**”ti. **Abhinibbattīti** bhavayonigatiādivasena nibbatti. **Tahiṃ tahiṃ** tasmīṃ tasmīṃ bhavādike. **Abhinandanāti** taṇhābhinandanahetu. **Gamanāgamaṇaṃ hotīti**ādīnā bhavādīsu sattānaṃ aparāparaṃ cutipaṭisandhiyo dasseti. **Khayanirodhenāti** accantakhayasankhātena anuppādanirodhena. **Ubhayametam na vattabbaṃ** pahānābhisamayabhāvanābhisamayānaṃ accāsannakālattā. Vattabbaṃ taṃ hetuphaladhammūpacārasena. Yathā hi paḍipujalanahetuko andhakāravigamo, evaṃ vijjupādahetuko avijjānirodho, hetuphaladhammā ca samānakālāpi pubbāparakālā viya voharīyanti yathā – “cakkhuñca paṭicca rūpe ca uppajjati cakkhuviññāṇa”nti (ma. ni. 1.204, 400; ma. ni. 3.420, 425, 426; saṃ. ni. 2.43-45; 2.4.60; kathā. 465, 467) paccayapaccayuppannakiriyā. **Gamaṇaṃ upacchijjati** idha kāmabhavā parinibbānena. **Āgamaṇaṃ upacchijjati** tattha rūpārūpesu parinibbānena. **Gamaṇāgamaṇaṃ upacchijjati** sabbaso aparāparupattiyā abhāvato.

**454.** Vivatṭakathāya parato jotitaṃ paṭhamaṃ jhānaṃ vivatṭaṃ patvā tṭhassa ukkaṭṭhaniddesena ubhatobhāgavimuttassa nirodhasādhakaṃ vibhāvituṃ yuttanti āha “**katamaṃ panāvusoti idha kiṃ pucchati**”tiādi. Tathā hi anantaraṃ nirodhasamāpajjanakena bhikkhunā jānitabbāni paṭhamassa jhānassa sampayogapahānaṅgāni pucchitāni. **Aṅgavavatthānanti** jhānaṅgavavatthānaṃ. **Koṭṭhāsaparicchedoti** tattha labbhamānaphassapañcamakādidhammakotṭhāsaparicchedo jānitabbo. Imasmīṃ jhāne ettakā dhammā saṃvijjanti, ettakā nirodhitāti jānitabbaṃ. **Upakārānupakārāni aṅgānīti** nirodhasamāpattiyā upakārāni ca anupakārāni ca aṅgāni. Nirodhasamāpattiyā hi soḷasahi ṇāṇacariyāhi navahi samādhicariyāhi ca pattaṭṭhātaṃ taṃtaṃṇāṇassa samādhicariyāhi samatikkamitabbā dhammā anupakārakaṅgāni, samatikkamakā upakārakaṅgāni. Tesaṃhi vasena yathānupubbaṃ upasantupasantaolaṅkabhāvāya bhavaggaṃsamāpattiyā saṅkhārāvasesasukhumataṃ pattā cittacetāsikā yathāparicchinnaṃ kālaṃ nirujjhanti, appavattiṃ gacchanti. **Tassāti** nirodhassa. **Anantarapaccayanti** anantarapaccayasadisāṃ. Na hi nirodhassa koci dhammo anantarapaccayo nāma atthi. Yaṃhi tadā cittacetāsikānaṃ tathā nirujjhaṇaṃ, taṃ yathāvuttapubbābhisaṅkhārahētukāya nevasaṅgānāsaṅgānāyatanaṃsamāpattiyā ahoṣīti sā tassa anantarapaccayo viya hotīti taṃ vuttaṃ. **Chasamāpattiyoti** suttantanayena vuttasuttantapaṭṭakasaṃvaṇṇanāti katvā. “Satta samāpattiyoti”ti pana vattabbaṃ, aññathā idaṃ “caturaṅgika”nti na vattabbaṃ siyā. **Nayaṃ vā dassetvāti** ādiantadassanavasena nayadassanaṃ katvā.

**455.** Evaṃ nirodhassa pādakaṃ vibhāvetvā idāni antonirodhe anupabandhabhāvato pañcannaṃ pasādānaṃ paccayapucchane paṭhamaṃ tāva te sarūpato āveṇikato āveṇikavisayato paṭissaraṇato ca pucchānavasena pāḷi pavattāti dassento “**viññāṇanissaye pañca pasāde pucchanto**”ti āha. **Gocaravisayanti** ettha kāmaṃ tabbahulacāritāpekkhaṃ gocaraggahaṇaṃ, anaññatthabhāvāpekkhaṃ visayaggahaṇanti attheva gocaravisayabhāvānaṃ viśeso, vivariyamānaṃ pana ubhayampi ārammaṇasabhāvamevāti āha “**gocarabhūtaṃ visaya**”nti. **Ekekassāti** eko ekassa, añño aññassāti attho. Aññattho hi ayaṃ **eka**-saddo “ittheke abhivadanti”tiādīsu (ma. ni. 3.27) viya. **Sace hīti**ādi abhūtaparikappanavacanametam. Tattha **samodhānetvāti** ekajjhaṃ katvā. **Vināpi mukhenāti**ādīnā atthasallāpikanidassanaṃ nāma dasseti. Yathā viññāṇādhiṭṭhitameva cakkhu rūpaṃ passati, na kevalaṃ, evaṃ cakkhunissayameva viññāṇaṃ taṃ passati, na itaranti āha “**cakkhupasāde upanehī**”ti. Tena tesam tattha saṃhaccakāritaṃ dasseti. **Yadi vā nīlaṃ yadi vā pītakanti** idaṃ nīlapītādisabhāvajānanamattaṃ sandhāyāha. **Nīlaṃ pītakanti** pajānanaṃ cakkhuviññāṇassa nattheva avikappakabhāvato. **Etesam** cakkhuviññāṇādīnaṃ. Nissayasīsena nissitapucchā hesā, evaṃhi visayānubhavanacodanā samatthitā hoti. Tenāha “**cakkhuviññāṇaṃ hī**”tiādi. Yathāsakaṃ visayaṃ

rajjanādivasena anubhavitum asamatthāni cakkhuviññānādīni, tattha samatthatāyeva ca natthi, na kiñci atthato paṭisarantāni viya hontīti vuttaṃ “**kiṃ etāni paṭisaranti**”ti. **Javanamano paṭisaraṇanti** pañcadvārikam itarañca sādharmaṇato vatvā puna yāya’ssa rajjanādipavattiyā paṭisaraṇatā, sā savisesā yattha labbhati, taṃ dassento “**manodvārikajavanamano vā**”ti āha. **Etasmim pana dvāreti** cakkhudvāre javanam rajjati vā dussati vā muyhati vā, yato tattha aññānādiasamvaro pavattati.

**Tatrāti** tasmim javanamanasseva paṭisaraṇabhāve. **Dubbalabhojakāti** hīnasāmatthiyā rājabhoggā. Sevakānaṃ gaṇanāya yojitadivase labbhamānakahāpaṇo **yuttikahāpaṇo**. Andubandhanena baddhassa vissajjanena labbhamānakahāpaṇo **bandhakahāpaṇo**. Kiñci paharante mā paharantūti paṭikkhipato dātābadaṇḍo **māpahārahāpaṇo**. So sabbopi parittakesu gāmikamanussesu tathā labbhamāno ettako hotīti āha “**aṭṭhakahāpaṇo vā**”tiādi. **Satavatthukanti** satakarīsavatthukam. Esa nayo sesapadadvayepi. **Tatthātiādi** upamāsaṃsandhanaṃ, taṃ suviññeyyameva.

**456. Antonirodhasmim pañca pasādeti** nirodhasamāpannassa pavattamāne pañca pasāde. **Kiriyaṃmayapavattasminti** javanādikiriyānibbattakadhammapavattiyam. **Balavapaccayā hontīti** pacchājātavippayuttaatthiavigatapaccayehi paccayā honti, upatthambhakabhāvena balavapaccayā honti. **Jīvitindriyam paṭiccāti** indriyaatthiavigatapaccayavasena paccayabhūtam jīvitindriyam paṭicca pañcavidhopi pasādo tiṭṭhati. **Jīvitindriyena vinā na tiṭṭhati** jīvitindriyarahitassa kammasamuṭṭhānarūpakalāpassa abhāvato. **Tasmāti** yasmā anupālanalakkhaṇena jīvitena anupālītā eva usmā pavattati, na tena ananupālītā, tasmā usmā āyupam paṭicca tiṭṭhati. **Jālasikhā paṭicca ābhā paññāyatīti** jālasikhāsāṅkhātabhūtasāṅghātam saheva pavattamānaṃ nissāya “ābhā”ti laddhanāmā vaṇṇadhātu “ujjalati, andhakāram vidhamati, rūpagatāni ca vidamsetī”tiādīhi pakārehi ñāyati. **Tam ālokaṃ paṭiccāti** tam vuttappakāram ālokaṃ paccayam labhitvā. **Jālasikhā paññāyatīti** “appikā, mahatī, uju, kuṭilā”tiādinā pākātā hoti.

**Jālasikhā viya kammajatejo** nissayabhāvato. **Āloko viya jīvitindriyam** tannissitabhāvato. Idāni upamopamitabbānaṃ sambandham dassetuṃ “**jālasikhā hī**”tiādi vuttaṃ. **Ālokaṃ gahetvāva uppajjati** iminā yathā jālasikhāya saheva āloko uppajjati, evam kammajusmanā saheva jīvitindriyam uppajjati dasseti. Jālasikhāsannissayo tassā satiyeva honto āloko tāya uppādito viya hotīti āha “**attanā janitālokenevā**”ti. Usmā nāmettha kammasamuṭṭhānā tejodhātu tannissitañca jīvitindriyam tadanupālakañcāti āha “**kammajamahābhūtasambhavena jīvitindriyena usmāya anupālana**”nti. Na kevalam khaṇaṭṭhitiyā eva, atha kho pabandhānupacchedassapi jīvitindriyam kāraṇanti āha “**vassasatampi kammajatejapavattam pāletī**”ti. Usmā āyuno paccayo honto sesabhūtasahito eva hotīti āha “**mahābhūtāni**”ti. Tathā āyupī sahajātarūpaṃ pālentameva usmāya paccayo hotīti vuttaṃ “**mahābhūtāni pāletī**”ti.

**457.** Āyu eva indriyapaccayādivasena sahajātadhammānaṃ anupālanavasena saṅkharāṇato **āyusaṅkhāro**. Bahuvacananiddeso pana anekasatasahassabhedesu rūpakalāpesu pavattiyā anekabhedanti katvā. Ārammaṇarasam anubhavantīti **vedaniyā** yathā “niyyānikā”ti. Tenāha “**vedanā dhammāva**”ti. Sukhādibhedabhinnattā bahuvacananiddeso. Imesaṃ āyusaṅkhāravedanānaṃ ekantanirodham samāpannassa maraṇena bhavitabbaṃ vedanāya niruddhattā. Āyusaṅkhāraṇaṃ tathā aniruddhattā nirodhasa samāpajjanameva na siyā, kuto vuṭṭhānaṃ. Tena vuttaṃ pāliyam “te ca hāvuso”tiādi. **Vuṭṭhānaṃ paññāyati** saññāvedanādīnaṃ uppattiyā. Idāni tamattham vitthārato upamāya vibhāvetum “**yo hī**”tiādi vuttaṃ. **Ukkaṇṭhitvāti** nānārammaṇāpātato nibbinditvā. **Yathāparicchinakālavasenāti** yathāparicchinne kāle sampatte. **Rūpajīvitindriyapaccayāti** indriyapaccayabhūtā. **Jālāpavattam viya arūpadhammā** tejussadabhāvato visayobhāsanato ca. Udakappahāro viya nirodhasamāpattiyā pubbābhisaṅkhāro. **Pihitaṅgārā viya rūpajīvitindriyam** usmāmatatāya anobhāsanato. **Yathāparicchinakālagamananti** yathāparicchinakālassa upagamaṇaṃ. Anurūpapattivaseneva **rūpapavattiggahaṇaṃ**. **Imam rūpakāyam jahantīti** imasmā rūpakāyā kaḷevārā vigacchanti nappavattanti.

Kāyena saṅkharīyantīti **kāyasaṅkhārā** tappaṭibaddhavuttitāya. Vācaṃ saṅkharontīti **vacīsaṅkhārā**. Vitakketvā vicāretvā hi vācaṃ bhindati katheti. Cittena saṅkharīyantīti **cittasaṅkhārā** tappaṭibaddhavuttito. Cittasaṅkhāranirodhacodanāya rūpanirodho viya cittanirodho acodito tesam tato aññattāti na cittasampayuttanirodho ekantiko vitakkādinirodhe tadabhāvato. Yaṃ pana vuttaṃ “vācā aniruddhā hotī”ti, tampi na. Vācaṃ saṅkharontīti hi vacīsaṅkhārā, tesu niruddhesu kathaṃ vācāya anirodho. Cittaṃ pana niruddhesupi cittasaṅkhāresu tehi anabhisankhatattā vitakkādinirodho viya pavattatiyevāti ayamettha parassa adhippāyo. Ānantariyakammaṃ kataṃ bhavēyya, cittassa aniruddhattā taṃ nissāya ca rūpadhammānaṃ anapagatattā te jīvanti eva nāmāti. **Byañjane abhinivesaṃ akatvāti** “cittasaṅkhārā niruddhā”ti vacanato teva niruddhā, na cittaṃ evaṃ neyyatthaṃ suttaṃ “nītattha”nti abhinivesaṃ akatvā. **Ācariyānaṃ naye thatvāti** paramparāgatānaṃ ācariyānaṃ adhippāye thatvāti attho. **Upparikkhitabboti** suttantarāgamato suttantarapadassa aviparīto attho vīmaṃsitabbo. Yathā hi “asaññabhavo”ti vacanato “saññāva tattha natthi, itare pana cittaacetāsikā santi”ti ayamettha attho na gayhati. Yathā ca “nevasaññānāsaññāyatana”nti vacanato “saññāva tattha tādisī, na phassādayo”ti ayamettha attho na gayhati saññāsīsena desanāti katvā, evamidhāpi “cittasaṅkhārā niruddhā”ti, “saññāvedayitanirodho”ti ca desanāsīsimeva. Sabbepi pana cittaacetāsikā tattha nirujjhantevāti ayamettha aviparīto attho vedītabbo, tathāpubbābhisankhārena sabbesaṃyeva cittaacetāsikānaṃ tattha nirujjhanato. Etena yaṃ pubbe “aññattā, tadabhāvato”ti ca yuttivacanāṃ, tadayuttaṃ adhippāyānavabodhatoti dassitaṃ hoti. Tenāha “**attho hi paṭisaraṇaṃ, na byañjana**”nti.

**Upahatānīti** bādhitāni. **Makkhitānīti** dhamṣitāni. Ārammaṇaḥḥaṭṭanāya indriyānaṃ kilamatho cakkhunā bhāsurarūpasukhumarajādassanena vibhāvetabbo. Tathā hi uṇhakāle purato aggimhi jalante kharassare ca paṇave ākoṭīte akkhīni bhedāni viya na saḥanti sotāni “sikharena viya abhihaññanti”ti vattāro hontī.

**458.** Rūpāvacaracatutthajjhānameva rūpavirāgabhāvanāvasena pavattaṃ arūpajjhānanti nevasaññānāsāññāyatanaṃ vissajjento dhammasenāpati “sukhassa ca pahānā”tiadinā vissajjesi. Apagamanena vigamena paccayā **apagamanapaccayā** sukhādippahānāni. **Adhigamapaccayā** pana kaṣiṇesu rūpāvacaracatutthajjhānaṃ heṭṭhimā tayo ca āruppā. Na hi sakkā tāni anadhigantvā nevasaññānāsāññāyatanaṃadhigantaṃ. **Nirodhato vuṭṭhānakaphalasaṃpattinti** nirodhato vuṭṭhānabhūtaṃ aniccānupassanāsamudāgataphalasaṃpattiṃ. Sā hi “animittā cetovimuttī”ti vuccati. Yathā samathanissando abhiññā, mettākaraṇāṃmuditābrahmavihāranissando upekkhābrahmavihāro, kaṣiṇanissando āruppā, samathavipassanānissando nirodhasamāpatti, evaṃ vipassanāya nissandaphalabhūtaṃ sāmāññaphalanti āha “**vipassanānissandāya phalasaṃpattiyā**”ti. Ārammaṇā nāma sārammaṇadhammānaṃ visesato uppattinimittanti āha “**sabbanimittānanti rūpādīnaṃ sabbārammaṇāna**”nti. Natthi ettha kiñci saṅkhāranimittanti **animittā**, asaṅkhatā dhātūti āha “**sabbanimittāpagatāya nibbānadhātuyā**”ti. **Phalasaṃpattisahajātaṃ manasikāraṃ sandhāyāha**, na āvajjanamanasikāraṃ. Na hettha tassa sambhavo anulomānantaraṃ uppajjanato.

**Imasmiṃ thāneti** idha vuttanirodhassa ādimajjhāpariyosānānaṃ gahitānaṃ imasmiṃ pariyosānassa gahitaṭṭhāne. **Dvīhi balehīti** samathavipassanābalehi. **Tayo ca saṅkhārānanti** kāyasaṅkhārādīnaṃ tiṇṇaṃ saṅkhārānaṃ. **Soḷasahi ñāṇacariyāhīti** aniccānupassanā, dukkhā, anattā, nibbidā, virāgā, nirodhā, paṭinissaggā, vivaṭṭānupassanā, sotāpattimaggo...pe... arahattaphalasaṃpattīti imāhi soḷasahi ñāṇacariyāhi. **Navahi samādhicariyāhīti** paṭhamajjhānasamādhīdīhi navahi samādhicariyāhi. Yo yathāvuttāsu cariyāsu puggalassa vasībhāvo, sā **vasībhāvatāpaññā**. Assā sā kathitāti yojanā. **Vinicchayakathāti** vinicchayavasena pavattā **aṭṭhakathā** kathitā. Tasmā **visuddhimagge** (visuddhi. 2.868-869) **taṃsaṃvaṇṇanāyañca** (visuddhi. mahāṭī. 2.868) vuttanayena vedītabbā.

**Valañjanasaṃpattīti** ariyavihāravasena viharāṇasaṃpattīti. **Ṭhitiyāti** ettha pabandhaṭṭhiti adhippetā, na khaṇaṭṭhiti. Kasmā? Saṃpajjanattā. Tenāha “**ṭhitiyāti ciraṭṭhitattha**”nti. **Addhānaparicchedoti** ettakaṃ kālaṃ saṃpattiyā vītināmessāmīti pageva kālāparicchedo.

**Rūpādinimittavasenā**ti kammakammanimittagatinimittesu yathārahaṃ labbhamānarūpādinimittavasena. Tattha yasmā kammanimitte chabbidhampi ārammaṇaṃ labbhati, tasmā “**sabbanimittāna**”nti vuttaṃ, na sabbesaṃ ārammaṇānaṃ ekajjhaṃ, ekantato vā manasikātabbato. Lakkhaṇavacanañhettaṃ yathā “dātabbameṭtaṃ bhesajjaṃ, yaḍi me byādhitā siyu”nti.

**459. Nīlampi sañjānātī**tiadinā nīlādiggahaṇamukhena taṃvaṇṇānaṃ sattānaṃ sañjānaṃ averādibhāvamanasikaraṇaṃ jotitanti āha “**etasmiñhi thāne appamāṇā cetovimutti kathitā**”ti. Ettha ākiñcaññaṃ kathitanti sambandho. “**Ettha suññatā**”ti, “**ettha animittā**”ti etthāpi eseṇa nayo. Nti “idha aññaṃ abhinavaṃ nāma natthī”tiadinā vuttaṃ atthavacanaṃ. **Etā**ti appamāṇacetovimuttiādayo. **Ekanāmakā**ti ekekanāmakā, ye nānābyañjanāti adhippetā. **Eko dhammoti** arahattaphalasaṃpatti. **Catunāmakoti** appamāṇacetovimuttiādināmakoti. **Etanti** etamatthaṃ. **Appamāṇā**ti anodhiso, odhisopi vā “**ettakā**”ti aparimitā. **Asetevā**ti asubhasaṃpatti viya ekasseva aggahaṇato.

Kiñcāpi asubhanimittārammaṇampi kiñcanaṃ hoti, ārammaṇasaṅghaṭṭanassa kiñcanassa asubhasaṃpattīnampi paṭibhāganimittasaṅkhātāṃ ārammaṇaṃ sabimbaṃ viya viggahaṃ kiñcanaṃ hutvā upaṭṭhāti, na tathā imassāti. Nanu brahmavihārapaṭṭhamāruppānampi paṭibhāganimittabhūtaṃ kiñci ārammaṇaṃ natthīti? Saccamaṃ natthī, ayaṃ pana paṭṭhamāruppaviññānaṃ viya na paṭibhāganimittabhūtaārammaṇatāya evaṃ vuttā. **Attenā**ti attanā. Bhavati etena attāti abhidhānaṃ buddhi cāti **bhāvo**, attā. **Bhāva**-saddopi attapariyāyoti āha “**bhāvaposapuggalādisaṅkhātenā**”ti. **Nesamaṃ** appamāṇasaṃpattiādinā catunnaṃ. “**Nānatā pākāṭavā**”ti vuttaṃ nānatā bhūmito ārammaṇato ca dassetaṃ “**attho panā**”tiadinā vuttaṃ. Parittādibhāvena atīṭādibhāvena ajjhātādibhāvena ca na vattabbaṃ ārammaṇaṃ etissāti **navattabbārammaṇā** nibbānārammaṇaphalasaṃpattibhāvato.

**Ettakoti** rāgādīhi saṃkiliṭṭhatāya ettakappamāṇo, uttāno parittacetosoti attho. Nibbānampi appamāṇameva pamāṇakaraṇānaṃ abhāvenāti ānetvā sambandho. **Akuppāti** arahattaphalacetovimutti paṭipakkhehi akopaniyatāya. **Kiñcatī**ti kattari paṭhito dhātu maddanatto āha “**kiñcati maddatī**”ti. Tassa payogaṃ dassetaṃ “**manussā kirā**”tiadinā vuttaṃ.

Samūhādighanaṇavasena sakiccaparicchedatāya ca saviggahā viya upaṭṭhitā saṅkhārā niccādiggāhassa vatthutāya “**niccanimittamaṃ sukhādinimittā**”nti ca vuccati. Vipassanā pana tattha ghanavinibbhogaṃ karontī niccādiggāhaṃ vidhantī “nimittamaṃ samuggahāte”ti vuttā ghananimittassa ārammaṇabhūtaṃ abhāvā. **Na gahitā**ti ekatthapadaniddese pāliyaṃ kasmā na gahitā? **Sāti** suññatā cetovimutti. **Sabbatthā**ti appamāṇacetovimuttiādiniddese. **Ārammaṇavasenā**ti ārammaṇavasenaṃ ekatthā, na kevalaṃ sabhāvasarato. **Iminā pariyaṇenā**ti appamāṇatotiadinā ārammaṇato laddhapariyāyena. **Aññasmimā pana thāneti** ākiñcaññādisaddapavattihetuto aññena hetunā appamāṇādisaddappavattiyā etassa cetovimuttiyā honti. Esa nayo sesesupi. **Iminā pariyaṇenā**ti iminā tāya tāya samaññāya voharitabbatāpariyāyena. Saccānaṃ dassanaṃ mukhena vaṭṭavasena uttāhadesanaṃ arahattena kūṭaṃ gaṇhanto **yathānusandhināva desanaṃ niṭṭhapesi**. Yaṃ panettha atthato avibhattaṃ, taṃ suviññeyyameva.

Mahāvedallasuttavaṇṇanāya līnatthappakāsanā samattā.

#### 4. Cūḷavedallasuttavaṇṇanā

**460.** Ayaṃ desanā yasmā pucchāvissajjanavasena pavattā, tasmā pucchakavissajjake pucchānimittānaṃ samudāyato vibhāvetuṃ “**ko panāya**”ntiadinā vuttaṃ. **Upāsakattanti** amaggāgataṃ upāsakattaṃ. **Tesanti** ekādasanahutānaṃ. Maggāgatena upasameṇa **santindriyo santamānaso**.

“Kiṃ nu kho ajja bhavissati ayyaputto”ti **vīthim olokayamānā**. **Olambanattanti** tassa hatthāvalambanattaṃ pubbāciṇṇavasena attano hatthaṃ pasāresi. **Bahiddhāti** attanā aññaṃ visabhāgavatthum sandhāya vadati. **Paribhedakenā**ti pesuññavādinā.



Adhigamappicchatāya “na pakāsetabbo”ti **cintesi**. Puna taṃ anukampanto “**sace kho panāha**”ntiādiṃ cintesi. **Eso dhammoti** eso lokuttaradhammo. Vivaṭṭaṃ uddissa upacitaṃ nibbedhabhāgiyaṃ kusalaṃ **upanissayo**. “Yadi me upanissayo atthi, sakkā etaṃ paṭiladdhuṃ. Sacepi natthi, āyatiṃ upanissayo bhavissatī”ti cirakālaparibhāvitāya ghaṭe padīpajālā viya abbhantare dippamānāya hetusampattiyaṃ codiyamānā āha “**evaṃ sante mayhaṃ pabbajjaṃ anujānāthā**”ti.

**Lābhasakkāro uppajji** sucirakālaṃ katūpacitapuññatāya. **Abhinīhārasampannattāti** sujātattherassa padumuttarassa bhagavato aggasāvakassa nipaccakāraṃ katvā – “tumhehi diṭṭhadhammassa bhāgī assa”nti nibbedhabhāgiyaṃ dānaṃ datvā katapatthanāsankhātasampannābhinīhārattā. **Nāticiraṃ kilamittāti** kammaṭṭhānaṃ bhāventī vipassanāya paripākavasena ciraṃ na kilamittā. Vuttamevatthaṃ vivaritaṃ “**ito paṭṭhāyā**”tiādi vuttaṃ. **Dutiyaḡamanenāti** pabbājanatthaṃ gamanato dutiyaḡamanaena.

**Upanetvāti** pañhassa atthabhāvena upanetvā. **Sakkāyanti** sakāyaṃ. **Upanikkhittaṃ** kiñci vatthuṃ **sampaṭicchamānā**, **viya** sampaṭicchantī viya. Eko eva pāso etissāti **ekapāsakā**, gaṇṭhi. Sā hi sumociyā, anekapāsā pana dummociyā, ekapāsaggahaṇaṃ vissajjanassa sukarabhāvadassanatthaṃ. **Paṭisambhidāvisaye ṭhatvāti** etena theriyā pabhinnapaṭisambhidataṃ dasseti. **Paccayabhūtāti** ārammaṇādivasena paccayabhūtā.

Theriyā visesādhigamassa attano avisayatāya visākho “**na sakkā**”tiādinā cintesīti daṭṭhabbaṃ. **Saccavinibbhogapañhabyākaraṇenāti** saccapariyāpannassa dhammassa dassanato aññānaññatthaniddhāraṇabhedanāsankhātassa vinibbhogapañhassa vissajjanena. **Dve saccānīti** dukkhasamudayasaccāni. **Paṭinivattetvāti** parivattetvā. **Gaṇṭhipañhanti** dubbinibbedhatāya gaṇṭhibhūtaṃ pañhaṃ.

**Na taṃyeva upādānaṃ te pañcupādānakkhandhā** ekadesassa samudāyatābhāvato, samudāyassa ca ekadesatābhāvato. **Nāpi aññatra pañcahi upādānakkhandhehi upādānaṃ** tassa tadekadesabhāvato. Na hi ekadeso samudāyavinimutto hoti. **Yadi hi taññevāti**ādinā ubhayapakkhepi dosaṃ dasseti. **Rūpādisabhāvampīti** rūpavedanāsāññāviññāṇasabhāvampi, phassacetanādisabhāvampi **upādānaṃ siyā**. **Aññatra siyāti** pañcahi upādānakkhandhehi viṣuṃyeva upādānaṃ yadi siyā. **Parasamayeti** nikāyavāde. **Cittavippayutto anusayoti** nidassanamattametaṃ nikāyavāde cittasabhāvābhāvaviññāṇādīnampi cittavippayuttabhāvapaṭijānanato. **Evaṃ byākāsīti** “na kho, āvuso”tiādinā khandhagatachandarāgabhāvena byākāsī. Atthadhammanicchayasambhavato **asambandhena**. Tesu katthacipi asammyuhanato **avitthāyantena**. Pucchāvisaye mohandhakāravīgamanena **padīpasahassaṃ jālentena viya**. Saupādānupādānaṭṭhānaṃ anuttānatāya pacurajanassa **gūlho**. Aggahitasāṅketānaṃ kesañci paṭicchādītasadisattā **paṭicchanno**. Tilakkhaṇabbhāhatadhammavisayatāya **tilakkhaṇāhato**. Gambhīraññāgocarātāya **gambhīro**. **Laddhapatiṭṭhā** ariyasaccasampaṭivedhanato. Evaṃ diṭṭhadhammādhāvato **vesārajappattā**. Sabbaso nivutthabrahmacariyatāya tiṇṇaṃ bhavānampi aparabhāge nibbāne nivutthavatīti **bhavamatthake ṭhitā**.

**461. “Rūpaṃ attato samanupassatī”**ti paduddhāraṃ katvā “**idhekacco**”tiādinā (paṭi. ma. 1.130) paṭisambhidāpāṭhena tadatthaṃ vivarati. Tattha **attato samanupassatīti** attāti samanupassati, atthabhāvena samanupassati. **Ahanti** attānaṃ niddisati. Ahaṃbuddhinibandhanañhi attānaṃ attavādī paññāpeti, tasmā **yaṃ rūpaṃ so ahanti** yadetaṃ mama rūpaṃ nāma, so ahanti vuccamāno mama attā taṃ mama rūpanti **rūpañca attānaṃ advayaṃ** anaññaṃ **samanupassati**. Tathā passato ca attā viya rūpaṃ, rūpaṃ viya vā attā aniccoti āpannameva. **Accēti** jālasikhā. Sā ce vaṇṇo, cakkhuvīññeyyāva siyā, na kāyaviññeyyā, vaṇṇopi vā kāyādiviññeyyo acciyā anaññattāti upameyyaṃ viya upamāpi diṭṭhigatikassa ayuttāva. **Diṭṭhipassanāyāti** micchādiṭṭhisāṅkhātāya passanāya passati, na taṇhāmānapaññānupassanāya. Arūpaṃ vedanādiṃ attāti gahetvā chāyāya rukkhādhīnatāya **chāyāvantaṃ rukkhāṃ viya**, rūpassa santakabhāvena attādhīnatāya **rūpavantaṃ attānaṃ samanupassati**. Pupphādhīnatāya **pupphasmiṃ gandhaṃ viya** ādheyyabhāvena attādhīnatāya rūpassa

**attani rūpaṃ samanupassati.** Yathā karaṇḍo maṇino ādhāro, evaṃ rūpampi attano ādhāroti katvā **attānaṃ rūpasmiṃ samanupassati.** **Eseva nayoti** iminā attano vedanādīhi anaññattaṃ tesañcādhāraṇataṃ nissitatañca yathāvuttaṃ atidisati.

**Arūpaṃ attāti kathitaṃ** “vedanāvanta”ntiādīsu viya rūpena vomissakatāya abhāvato. **Rūpārūpamissako attā kathito** rūpena saddhiṃ sesārūpadhammānaṃ attāti gahitattā. **Ucchedadiṭṭhi kathitā** rūpādīnaṃ vināsadassanaṃ. Tenevāha “rūpaṃ attāti yo vadeyya, taṃ na upapajjati, attā me upapajjati ca veti cāti iccassa evamāgataṃ hoti”tiādi. **Avasesesūti** pannarasasu ṭhānesu. **Sassatadiṭṭhi kathitā** rūpavantādibhāvena gahitassa aniddhāritarūpattā.

Diṭṭhigatiko yaṃ vatthum attāti samanupassati, yebhuyyena taṃ niccaṃ sukhaṃ ca samanupassateva. Sāvako pana tappaṭikkhepena sabbe dhammā anattāti sudiṭṭhattā rūpaṃ attāti na samanupassati, tathābhūto ca aniccaṃ dukkhaṃ anattāti samanupassati, tathā vedanādayoti dassento “**na rūpaṃ attato**”tiādimāha. Evaṃ bhavadiṭṭhipi avijjābhavataṇhā viya vaṭṭassa samudayoyevāti diṭṭhikathāyaṃ “**ettakena gamaṇaṃ hoti**”tiādi. Diṭṭhippahānakathāyañca “**ettakena gamaṇaṃ na hoti**”tiādi vuttaṃ.

**462.** Heṭṭhā vuttamatthameva pucchitattā “**theriyā paṭipucchivā vissajjetabbo**”ti vatvā paṭipucchanavidhiṃ dassetuṃ “**upāsakā**”tiādi vuttaṃ. **Paṭipattivasenāti** sakkāyanirodhagāminipaṭipadābhāvena. Saṅkhatāsaṅkhatavasena lokiyalokuttaravasena saṅgahitasaṅgahitavasenāti “vasenā”ti padaṃ paccekkaṃ yojetabbaṃ. Tatha kāmaṃ asaṅkhatō nāma maggo natthi, kiṃ saṅkhatō, udāhu asaṅkhatoti pana pucchāvasena tathā vuttaṃ? “**Ariyo**”ti vacaneneva maggassa lokuttarato siddhā, saṅgāhakakhandhāpariyāpannānaṃ pana maggadhammānaṃ pi siyā lokiyatāti idha lokiyaggahaṇaṃ. Kiñcāpi saṅgahitapadameva pāḷiyaṃ āgataṃ, na asaṅgahitapadaṃ, ye pana saṅgāhakabhāvena vuttā, te saṅgahitā na honṭīti **aṭṭhakathāyaṃ** asaṅgahitaggahaṇaṃ katanti daṭṭhabbaṃ. **Saṅkhatoti**ādīsu samecca sambhuyya paccayehi katoti **saṅkhatō**. Tathābhūto ca taṃsamaṅgino puggalassa pubbabhāgacetanāti mayhaṃ maggo aṭṭhaṅgiko hotu sattaṅgiko vāti cetitabhāvena **cetito**. Sahajātacetanāyapi cetitova tassā saḥakārikāraṇabhāvato, tato eva **pakappito āyūhito**. Paccayehi nipphāditattā **kato nibbattito** ca. **Samāpajjantena** attano santāne sammadeva āpajjantena uppādentena. Iti sattaḥipi padehi paccayanibbattitaṃyeva ariyamaggassa dasseti.

Asaṅgahito khandhānaṃ padeso etassa atthīti **maggo sappadeso**. Natthi etesaṃ padesāti **khandhā nippadesā**. Padissati etena samudāyoti hi **padeso**, avayavo. **Ayanti** maggo. **Sappadesattā** ekadesattā. **Nippadesehi** samudāyabhāvato niravasesapadesehi. Yathā nagaraṃ rajjekadesabhūtaṃ tadantogadhattā rajjena saṅgahitaṃ, evaṃ ariyamaggo khandhattayekadesabhūto tadantogadhattā tīhi khandhehi saṅgahitoti dasseti “**nagaraṃ viya rajjena**”ti iminā. **Sajātitoti** samānājatitāya, samānasabhāvattā evāti attho. Ettha ca sīlakkhandho “**nava koṭisahasānī**”tiādinā (visuddhi. 1.20; apa. aṭṭha. 2.55.55; paṭi. ma. aṭṭha. 1.1.37) vuttapabhedavasena ceva sampattasamādānaviratiādivasena ca gayhamāno nippadeso, maggasīlaṃ pana ājivaṭṭhamakameva samucchadaviratimattamevāti sappadesaṃ. Samādhikkhandho parittamahaggatādivasena ceva upacārappanāsamādhivasena ca anekabhedaṭṭāya nippadeso, maggasamādhī pana lokuttarova, appanāsamādhī evāti sappadeso. Tathā paññākkhandho parittamahaggatādivasena ceva sutamayaññādivasena ca anekabhedaṭṭāya nippadeso, maggapaññā pana lokuttarāva, bhāvanāmayā evāti sappadesā. **Attano dhammatāyāti** saḥakārikāraṇaṃ anapekkhitvā attano sabhāvena attano balena **appetuṃ na sakkoti** vīriyena anupatthambhitaṃ, satiyā ca anupatṭhitaṃ. **Paggahakiccanti** yathā kosajjapakke na patitā cittaṭṭhiti, tathā paggaṇhanakiccaṃ. **Apilāpanakiccanti** yathā ārammaṇe na pilavati, evaṃ apilāpanakiccaṃ.

**Ekato jātāti** saḥajātā. **Piṭṭhiṃ datvā onatasahāyo viya vāyāmo** samādhissa ārammaṇe appanāya visesapaccayabhāvato. **Aṃsakūṭaṃ datvā ṭhitasahāyo viya sati** samādhissa ārammaṇe daḷhapavattiyā paccayabhāvato. **Kiriyatoti** upakārakiriyato.

**Ākoṭetvāti** ārammaṇaṃ āhanitvā. Tathā hi vitakko “āhananaraso”ti, yogāvacarō ca “kammatthānaṃ takkāhataṃ vitakkapariyāhataṃ karotī”ti vuccati. **Idhāpīti** sammādiṭṭhisāṅkappesu. **Kiriyaṭoti** vuttappakāraupakārakiriyaṭo.

Subhasukhādinimittaggāhavidhamanaṃ **catukiccasādhanam**. **Paccayattenāti** sahaṅgātipaccayabhāvena. **Catukiccasādhanavasenevāti** idaṃ maggavīriyasēva gahitabhāvadassanaṃ. Tañhi ekaṃyeva hutvā catukiccaṃ yathāvuttaupakāraṅkabhāvena ca parivāraṭṭhena parikkhāro hoti. **Maggasampayuttadhammānanti** iminā maggadhammānampī gahaṇaṃ, na taṃsāmpayuttaphassādīnaṃyeva. **Ekacittakkhaṇikāti** maggacittuppādasena ekacittakkhaṇikā.

**Sattahi nāṇehīti** paramukkaṃsagātehi sattahi javanehi sampayuttañāṇehi, sattahi vā anupassanāñāṇehi. Ādīto sevanā **āsevanā**, tato paraṃ vaḍḍhanā **bhāvanā**, punappunaṃ karaṇaṃ **bahulīkammanti** adhippāyenaṃha “**aññena cittenā**”tiādi. Adhippāyavasena niddhāretvā gahetabbatthaṃ **suttaṃ neyyatthaṃ**. Yathārutavasena gahetabbatthaṃ **nītatthaṃ**. **Evaṃ santeti** yadi idaṃ suttaṃ nītatthaṃ, āsevanādi ca viṣuṃ viṣuṃ cittehi hoti, evaṃ sante. Āsevanādi nāma cittassa anekavāraṃ uppattiyā hoti, na ekavāramevāti āha “**ekaṃ citta**”ntiādi. Tatrāyaṃ saṅkhepattho – āsevanāvasena pavattamānaṃ cittaṃ sucīrampi kālaṃ āsevanāvaseneva pavatteyya, tathā bhāvanābahulīkammavasena pavattamānānīpi, na cettha ettakāneva cittāni āsevanāvasena pavattanti, ettakāni bhāvanāvasena, bahulīkammavasenevāti niyamo labbhati. Iti anekacittakkhaṇikaariyamaggaṃ vadantassa dunnivāriyovāyaṃ doṣo. Yathā pana pubbabhāgepi nānācittesu pavattapariññādikiccānaṃ sammādiṭṭhiādīnaṃ paṭivedhakāle yathārahaṃ catukiccasādhanam, ekacittakkhaṇikā ca pavatti, evaṃ vipassanāya pavattābhisaṅkhārasena āsevanābhāvanābahulīkammāni paṭivedhakāle ekacittakkhaṇikāneva hotīti vadantānaṃ ācariyānaṃ na koci doṣo āsevanādīhi kātabbakiccasa tadā ekacittakkhaṇeyeva sijaṇato. Tenāha “**ekacittakkhaṇikāvā**”tiādi. **Sace sañjānātīti** sace saññattim gacchati. **Yāguṃ pivāhīti uyyojetabbo** dhammasācchāya abhabbhāvatoti adhippāyo.

**463. Puññābhisaṅkhārādīsūti ādi-**saddena kāyasañcetanādi lakkhaṇe kāyasaṅkhārādikepi saṅgaṇhāti, na apuññāneñjābhisaṅkhāre eva. **Kāyapaṭibaddhattā kāyena saṅkharīyati**, na kāyasamuṭṭhānattā. Cittasamuṭṭhānā hi te dhammāti. **Nibbattīyātīti** ca idaṃ kāye sati sabbhāvaṃ, asati ca abhāvaṃ sandhāya vuttaṃ. **Vācanti** vacīghosaṃ. **Saṅkharotīti** janeti. Tenāha “**nibbatteti**”ti. Na hi taṃ vitakkavicārarahitacittaṃ vacīghosaṃ nibbattetuṃ sakkoti. **Cittapaṭibaddhattāti** etena cittassa nissayātipaccayabhāvo cittasaṅkhārasaṅkharāṇanti dasseti. **Aññamaññamissāti** atthato bhinnāpi kāyasaṅkhārādivacanavacanīyabhāvena aññamaññamissitā abhinnā viya, tato eva **ālulitā** samkiṇṇā **avibhūtā** apākaṭā **duddīpanā** duviññāpayā. **Ādānaggahaṇamuñcanacopanāntīti** yassa kassaci kāyena ādātābassa ādānasaṅkhātaṃ gahaṇaṃ, vissajjanasaṅkhātaṃ muñcanaṃ, yathātathācalanasaṅkhātaṃ copananti imāni **pāpetvā** sādhetvā **uppannā**. Kāyato pavattā saṅkhārā, kāyena saṅkharīyantīti ca **kāyasaṅkhārātveva vuccanti**. **Hanusamcōpananti** hanusañcalanaṃ. **Vacībhedanti** vācānicchāraṇaṃ. Vācaṃ saṅkharontīti katvā idha **vacīsaṅkhārātveva vuccanti**.

**464. Samāpajjissanti** padaṃ nirodhassa āsannānāgatabhāvavisaṃyamaṃ āsannaṃ vajjetvā dūrassa gahaṇe payoṇābhāvato. Nirodhapādakassa nevasaññānāsaññāyatanacittassa ca gahaṇato paṭṭhāya nirodhaṃ samāpajjati nāmāti adhippāyena “**padadvayena nevasaññānāsaññāyatanasamāpattikālo kathito**”ti vuttaṃ. **Tathā cittaṃ bhāvitam hotīti** ettha addhānaparicchedacittaggahaṇaṃ itaresaṃ nānantariyabhāvato. Na hi baladvayañāsaṃmādhicariyānaṃ vasībhāvāpādanacittehi vinā addhānaparicchedacittaṃ acittakabhāvāya hoti.

**Sesasaṅkhārehīti** kāyasaṅkhārācittasaṅkhārehi. **Dutiyajjhāneyeva nirujjhati** anuppattinirodhena. Itaresupi eseva nayo. **Vuṭṭhahissanti** padaṃ vuṭṭhahanassa āsannānāgatabhāvavisaṃyamaṃ āsannaṃ vajjetvā dūrassa gahaṇe payoṇābhāvato. Nirodhato vuṭṭhānassa ca cittuppādena paricchinattā tato oramevāti āha “**padadvayena antonirodhakālo kathito**”ti. Tathā **cittaṃ bhāvitam hotīti** yathā yathāparicchinakālema eva acittakabhāvo, tato paraṃ sacittakabhāvo hoti, tathā nirodhassa

parikammacittam uppāditaṃ hoti.

**Paṭisaṅkhāti** paṭisaṅkhāya idameva kātabbam jānitvā appavattimattam. **Samāpajjantī** acittakabhāvaṃ sampadeva āpajjanti. Atha kasmā sattāhameva samāpajjantī? Yathākālaparicchedakaraṇato, tañca yebhuyyena āhārūpajīvīnaṃ sattānaṃ upādinnakapavattassa ekadivasaṃ bhuttāhārassa sattāhameva yāpanato.

Sabbā phalasaṃpatti assāsapassāse na samuṭṭhāpetīti idaṃ natthīti āha “**samuṭṭhāpetī**”ti. Yā pana na samuṭṭhāpeti, taṃ dassento “**imassa pana...pe... na samuṭṭhāpetī**”ti āha. Tattha **imassāti** idha pāliyaṃ vuttanīrodhasaṃpajjanabhikkhuno. Tassa pana phalasaṃpatti catutthajjhānikāvāti niyamo natthīti āha “**kiṃ vā etenā**”tiādi. **Abbohārikāti** sukhumattabhāvappattiyā “atthī”ti voharituṃ asakkuṇeyyāti keci. Nirodhassa pana pādakabhūtāya catutthajjhānādisamādhicariyāya vasena acatutthajjhānikāpi nirodhānantaraphalasaṃpatti assāsapassāse na samuṭṭhāpetīti abhāvato eva te abbohārikā vuttā. Evañca katvā sañjīvattheravatthumhi ānītasamāpatti phalanidassanampi suṭṭhu upapajjati. Tenāha “**bhavaṅgasamayenevetam kathita**”nti. **Kiriyamayapavattavaḷaṅjanakāleti** ettha kiriyamayapavattam kāyavacīviññattivipphāro, tassa vaḷaṅjanakāle pavattanasamaye. **Vācam abhisaṅkhātum na sakkonti** aviññattijanakattā tesam vitakkavicāraṇam.

**Saguṇenāti** sarasena, sabhāvenāti attho. **Suññatā nāma phalasaṃpatti** rāgādīhi suññatā. Tathā rāganimittādīnaṃ abhāvā **animittā**, rāgapaṇidhiādīnaṃ abhāvā **appaṇihitāti** āha “**animittaappaṇihitesupi eseva nayo**”ti. Animittam appaṇihitañca nibbānaṃ ārammaṇam katvā uppanaphalasaṃpattiyam phasso animitto phasso appaṇihito phasso nāmāti imamattham “**eseva nayo**”ti iminā atidisati.

Attasuññatādassanato anattānupassanā suññatā, niccanimittugghāṇato aniccānupassanā animittā, sukhappaṇidhipaṭikkhepatto dukkhānupassanā appaṇihitāti āha – “**suññatā...pe... vipassanāpi vuccatī**”ti. **Aniccato vuṭṭhātīti** saṅkhārānaṃ aniccākāraggāhīniyā vuṭṭhānagāminiyā parato ekatovuṭṭhānaubhatovuṭṭhānehi nimittapavattato vuṭṭhātī. **Aniccato pariggahetvāti** ca idaṃ “na ekantikaṃ evampi hotī”ti katvā vuttam. Esa nayo sesesupi. Appaṇihitavipassanāya maggotiādīnā, suññatavipassanāya maggotiādīnā ca yojanaṃ sandhāyāha “**eseva nayo**”ti. **Vikappo āpajjeyya** āgamanassa vavatthānassa abhāvena avavatthānakarattā. **Evañhi tayo phassā phusantīti** evaṃ saguṇato ārammaṇato ca nāmalābhe suññatādīnāmakā tayo phassā phusantīti aniyamavacanaṃ. **Sameti** yujjati ekasseva phassassa nāmattayayogato.

Sabbasaṅkhatavivittatāya **nibbānaṃ viveko nāma** upadhivivekoti katvā. **Ninnatā** tappaṭipakkhavamukhassa tadabhimukhatā. **Poṇatā** onamaṇam, **pabbhāratā** tato vissanṭṭhabhāvo.

**465.** Cakkhādito rūpādīsu pavattarūpakāyato uppajjanato **pañcadvārikaṃ sukhaṃ kāyikaṃ nāma, manodvārikaṃ** cetopassajātāya **cetasikaṃ nāma. Sabhāvaniddeso** sukhayatīti katvā. **Madhurabhāvadīpakanti** iṭṭhabhāvajotanaṃ. **Vedayitabhāvadīpakanti** vedakabhāvavibhāvakaṃ. Vedanā eva hi paramatthato ārammaṇam vedeti, ārammaṇam pana veditabbanti. Dukkanti sabhāvaniddesotievamādiatthavacanaṃ sandhāyāha “**eseva nayo**”ti. **Ṭhitisukhāti** ṭhitiyā dharamānatāya sukhā, na ṭhitikkhaṇamattena. Tenāha “**atthibhāvo sukha**”nti. **Vipariṇāmadukkhāti** vipariṇāmanena vigāmanena dukkhā, na nirodhakkhaṇena. Tenāha “**natthibhāvo dukkha**”nti. Apariññātavatthukānañhi sukhavedanuparamo dukkhato upaṭṭhāti. Svāyamattho piyavippayogena dīpetabbo. **Ṭhitidukkhā vipariṇāmasukhāti** etthāpi eseva nayo. Tenāha “**atthibhāvo dukkham, natthibhāvo sukha**”nti. Dukkavedanuparamo hi sattānaṃ sukhato upaṭṭhāti. Evañhi vadanti – “tassa rogassa vūpasamena aho sukhaṃ jāta”nti. **Jānanabhāvoti** yāthāvasabhāvato avabujjanaṃ. Adukkhamasukhañhi vedanaṃ jānantassa sukhaṃ hoti tassa sukhumabhāvato, yathā tadāññe dhamme salakkhaṇato sāmāññalakkhaṇato ca sammadeva avabodho paramaṃ sukhaṃ. Tenevāha –

“Yato yato sammasati, khandhānaṃ udayabbayaṃ;  
Labhati pītipāmojjaṃ, amataṃ taṃ vijānata”nti. (dha. pa. 374);

**Ajānanabhāvoti** ettha vuttavipariyāyena attho veditabbo. Dukkhañhi sammohavīhāroti. Aparo nayo **jānanabhāvoti** jānanassa ñāṇassa sabbhāvo. Ñāṇasampayuttā hi ñāṇopanissayā ca adukkhamasukhā vedanā sukhā iṭṭhākārā. Yathāha “iṭṭhā ceva iṭṭhaphalā cā”ti. **Ajānanabhāvo dukkhanti** ettha vuttavipariyāyena attho veditabbo.

**Katamo anusayo anusetīti** kāmarāgānusayādīsū sattasu anusayesu katamo anusayo anusayavasena pavattati? Appahīnabhāvena hi santāne anusayantīti **anusayā**, anurūpaṃ kāraṇaṃ labhitvā uppajjantīti attho. Etena kāraṇalābhe sati uppajjanārahataṃ nesam dassitā. Appahīnā hi kilesā kāraṇalābhe sati uppajjanti. Tenāha “**appahīnaṭṭhena sayito viya hotī**”ti. Te ca nipariyāyato anāgatā kilesā daṭṭhabbā, atītā paccuppanā ca taṃsabhāvattā tathā vuccanti. Na hi dhammānaṃ kālabhedena sabbhāvabhedo atthi. Yadi appahīnaṭṭho anusayaṭṭho, nanu sabbepi kilesā appahīnā anusayā bhaveyyunti? Na mayaṃ appahīnatāmattena anusayaṭṭhaṃ vadāma, atha kho pana appahīnaṭṭhena thāmagatā kilesā anusayā. Idam thāmagamaṇaṇa rāgādīnameva āveṇiko sabbhāvo daṭṭhabbo, yato abhidhamme – “thāmagataṃ anusayaṃ pajahatī”ti vuttaṃ. **Soti** rāgānusayo. **Appahīnoti** appahīnabhāvamukhena anusayanaṭṭhamāha. So ca apariññātakhandhavatthuto, pariññātesu patiṭṭhaṃ na labhati. Tenāha “**na sabbāya sukhāya vedanāya so appahīno**”ti. Ārammaṇavasena cāyaṃ anusayaṭṭho adhippeto. Tenāha “**na sabbam sukham vedanaṃ ārabba uppajjatīti attho**”ti.

Vatthuvasenapi pana anusayaṭṭho veditabbo, yo “bhūmiladdha”nti vuccati. Tena hi **aṭṭhakathāyaṃ** (visuddhi. 2.834) vuttaṃ –

“Bhūmīti vipassanāya ārammaṇabhūtā tebhūmakā pañcakkhandhā. Bhūmiladdhaṃ nāma tesu khandhesu uppattirahaṃ kilesajātaṃ. Tena hi sā bhūmiladdhā nāma hoti, tasmā bhūmiladdhanti vuccati, sā ca kho na ārammaṇavasena. Ārammaṇavasena hi sabbepi atītānāgate pariññātepi ca khīṇāsavānaṃ khandhe ārabba kilesā uppajjanti mahākaccānauppalavaṇṇādīnaṃ khandhe ārabba soreyyasetṭhinandamaṇavakādīnaṃ viya. Yadi ca taṃ bhūmiladdhaṃ nāma siyā, tassa appaheyyato na koci bhavamūlaṃ pajaheyya, vatthuvaseṇa pana bhūmiladdhaṃ veditabbaṃ. Yattha yattha hi vipassanāya apariññātā khandhā uppajjanti, tattha tattha uppādato pabhutī tesu vaṭṭamūlaṃ kilesajātaṃ anuseti. Taṃ appahīnaṭṭhena bhūmiladdhanti veditabba”ntiādi.

**Esa nayo sabbatthāti** iminā “na sabbāya dukkhāya vedanāya so appahīno, na sabbam dukkhaṃ vedanaṃ ārabba uppajjatī”tiādiṃ atidisati. Tattha yaṃ vattabbaṃ, taṃ vuttanayeneva veditabbaṃ. “Yo anusayo yattha anuseti, so pahīyamāno tattha pahīno nāma hotī”ti tattha tattha pahānapucchā, taṃ sandhāyāha “**kiṃ pahātabbanti ayaṃ pahānapucchā nāmā**”ti.

**Ekeneva byākaraṇenāti** “idhāvuso, visākha, bhikkhu viviceva kāmehi”tiādinā (ma. ni. 1.374) ekeneva vissajjanena. **Dve pucchāti** anusayapucchā pahānapucchāti dvepi pucchā vissajjesi. “Rāgaṃ tena pajahatī”ti idamekaṃ vissajjanaṃ, “na tattha rāgānusayo anusetī”ti idamekaṃ vissajjanaṃ, pucchānukkamañcettha anādiyitvā pahānakkamena vissajjanā pavattā. “**Dve pucchā vissajjesī**”ti saṅkhepato vuttamatthaṃ vivarituṃ “**idhā**”tiādi vuttaṃ. Tattha **tathāvikkhambhitameva katvāti** iminā yo rāgaṃ vikkhambhetvā puna uppajjituṃ appadānato tathāvikkhambhitameva katvā maggena samugghātetī, tassa vasena “rāgaṃ tena pajahatī, na tattha rāgānusayo anusetī”ti vattabbanti dasseti. Kāmoghādīhi catūhi ogehi saṃsārabhavogheneva vā vegasā vuyhamānesu sattesu taṃ uttaritvā pattabbaṃ, tassa pana gādhabhāvato **patiṭṭhānabhūtaṃ**. Tenāha bhagavā – “tiṇṇo pāraṅgato thale tiṭṭhati brāhmaṇo”ti (saṃ. ni. 4.238; itivu. 69; pu. pa. 187).

Suññatādibhedena anekabhedattā pāḷiyaṃ “anuttarēsū”ti bahuvacananiddesoti “**anuttarā vimokkhā**”ti vatvā puna tesam sabbesampi arahattabhāvasāmaññena “**arahatte**”ti vuttaṃ. Visaye

cetaṃ bhumbaṃ. **Patthanam paṭṭhapentassāti** “aho vatāhaṃ arahattaṃ labheyya”nti patthanam upaṭṭhapentassa, patthentassāti attho. **Paṭṭhapentassāti** cettha hetumhi **antasaddo**. Kathaṃ pana arahattavisayā patthanā uppajjati? Na kāci arahattaṃ ārammaṇaṃ katvā patthanā uppajjati anadhigatattā avisayabhāvato. Parikkappitarūpaṃ pana taṃ uddissa patthanā uppajjati. “**Uppajjati pihāpaccayā**”ti **vuttaṃ** paramparapaccayatam sandhāya, ujukaṃ pana paccayabhāvo natthīti vuttaṃ “**na patthanāya paṭṭhapanamūlakaṃ uppajjati**”ti. **Idaṃ pana sevitabbaṃ domanassaṃ** akusalappahānassa kusalābhivuḍḍhiyā ca nimittabhāvato. Tenāha bhagavā – “domanassampāhaṃ, devānaminda, duvidhena vadāmi sevitabbampi asevitabbampī”ti (dī. ni. 2.359-362). Tīhi māsehi sampajjanakā **temāsikā**. Sesapadadvayepi eseva nayo. **Imasmiṃ vāreti** imasmiṃ pavāraṇavāre. **Visuddhipavāraṇanti** “parisuddho aha”nti evaṃ pavattaṃ visuddhipavāraṇaṃ. Arahantānameva hesa pavāraṇā.

Na kadāci pahātabbassa pahāyakatā atthīti dassento “**na domanassena vā**”tiādim vātvā pariyāyenetam vuttaṃ, taṃ vibhāvento “**ayam panā**”tiādimāha. Yaṃ panettha vattabbaṃ, taṃ parato vitthārena āgamissati. **Paṭipadam gahetvā** patthanam katvā patthanam ṭhapetvā. **Paṭisañcikkhatī** ovādasena attānaṃ samuttejento katheti. **Silena hīnaṭṭhānanti** aññehi arahattāya paṭipajjantehi silena hīnaṭṭhānaṃ kiṃ tuyhaṃ atthīti adhippāyo. **Suparisuddhanti** akhaṇḍādibhāvato sudhotajātimaṇi viya suṭṭhu parisuddhaṃ. **Supaggahitanti** kadācipi saṅkocābhāvato vīriyaṃ suṭṭhu paggahitaṃ. **Paññāti** vipassanāpaññā paṭipakkhehi anadhibhūtatāya akuṇṭhā tikkhavisadā saṅkhārānaṃ sammasane **sūrā hutvā vahati** pavattati. **Pariyāyēnāti** tassa domanassassa arahattapanissayatāpariyāyena. Ārammaṇavasena anusayanaṃ idhādhippetanti āha “**na taṃ ārabba uppajjati**”ti. Anuppajjanamettha pahānaṃ nāmāti vuttaṃ “**pahīnova tattha paṭighānusayoti attho**”ti. Tatiyājñānena vikkhambhetabbā avijjā, sā eva ariyamaggena samucchindīyatīti “**avijjānusayam vikkhambhetvā**”tiādi vuttaṃ, anusayasadisatāya vā. “Rāgānusayam vikkhambhetvā”ti etthāpi eseva nayo. **Catutthajjhāne nānuseti nāma** tattha kātabbakiccākaraṇato.

**466. Tasmāti** paccanīkattā sabhāvato kiccato paccayato cāti adhippāyo. **Visabhāgapaṭibhāgo kathito** “kaṇhasukkasappaṭibhāgā dhammā”tiādīsu viya. **Andhakārāti** andhakārasadisā appakā sabhāvato. **Avibhūtā** apākaṭā aṇḍārikabhāvato. Tato eva **duddīpanā** duviññāpanā. **Tādisāvāti** upekkhāsadisāva. Yathā upekkhā sukhadukkhāni viya na oḷārikā, evaṃ avijjā rāgadosā viya na oḷārikā. Atha kho andhakārā avibhūtā duddīpanā duviññāpanāti attho. **Sabhāgapaṭibhāgo kathito** “paṇidhi paṭighoso”tiādīsu viya. **Yattakesu ṭhānesūti** dukkhādīsu yattakesu ṭhānesu, yattha vā ñeyyaṭṭhānesu. **Visabhāgapaṭibhāgoti** andhakārassa viya āloko vighātakapaṭibhāgo. **Vijjāti** maggañānaṃ adhippetam, **vimuttīti** phalanti āha “**ubhopete dhammā anāsava**”ti. **Anāsavaṭṭhenāti**tiādīsu paṇītaṭṭhenātiipi vattabbaṃ. Sopi hi vimuttinibbānaṃ sādharmaṇo, vimuttiyā asaṅkhatatṭhena nibbānassa visabhāgatāpi labbhateva. **Pañhaṃ atikkamivā gatosi**, apucchitabbaṃ pucchantoti adhippāyo. **Pañhānaṃ paricchedapamaṇaṃ gahetuṃ** yuttaṭṭhāne aṭṭhatvā tato paraṃ pucchanto **nāsakki** pañhānaṃ pariyantaṃ gahetuṃ. **Appaṭibhāgadhammassāti** nippariyāyato sabhāgapaṭibhāgena appaṭibhāgadhammassa. Anāgatādīpariyāyena nibbānassa sabhāgapaṭibhāgo vutto, visabhāge ca attheva saṅkhatadhammā, tasmā nippariyāyato kiñci sabhāgapaṭibhāgaṃ sandhāya pucchati katvā “**accayāsi**”tiādi vuttaṃ. Asaṅkhatassa hi appaṭiṭṭhassa ekantaniccassa sato nibbānassa kuto nippariyāyena sabhāgassa sambhavo. Tenāha “**nibbānaṃ nāmēta**”ntiādi.

**Viraddhoti** ettha sabhāgapaṭibhāgaṃ pucchissāmīti nicchayābhāvato pucchitamattaṃ virajjhivāva pucchi, na ajānitvāti attho. Etena heṭṭhā sabbapucchā diṭṭhasaṃsandananayena jānitvāva pavattāti dīpitaṃ hoti. Therī pana taṃ taṃ pucchitamattaṃ sabhāvato vibhāventī satthu desanāññaṃ anugantvāva vissajjesi. **Nibbānogadhanti** nibbānaṃ ogāhitvā ṭhitaṃ nibbānantogadhaṃ. Tenāha “**nibbānabbhantaram nibbānaṃ anupaviṭṭha**”nti. **Assāti** brahmacariyassa.

**467. Paṇḍiccena samannāgatāti** ettha vuttapaṇḍiccaṃ dassetuṃ “**dhātukusalā**”tiādi vuttaṃ. Tenevāha – “kittāvatā nu kho, bhante, paṇḍito hoti? Yato kho, ānanda, bhikkhu dhātukusalo ca hoti,

āyatanakusalo ca paṭiccasamuppādakusalo ca ṭhānāṭṭhānakusalo ca. Ettāvātā nu kho, ānanda, bhikkhu paṇḍito hotī”ti (ma. ni. 3.124). **Paññāmahattaṃ** nāma theriyā asekkhappaṭisambhidappattāya paṭisambhidāyo pūretvā ṭhitatāti taṃ dassetaṃ “**mahante atthe**”tiādi vuttaṃ. **Rājayuttehīti** rañño kamme niyuttapurisehi. **Āhaccavacanenāti** satthārā karaṇādīni āhanitvā pavattitavacanena. Yadettha atthato na vibhattaṃ, taṃ heṭṭhā vuttanayattā suviññeyyameva.

Cūḷavedallasuttavaṇṇanāya līnatthappakāsānā samattā.

### 5. Cūḷadhammasamādānasuttavaṇṇanā

**468. Dhammoti gahitagahaṇānīti** dhammo vā hotu itaro vā, dhammoti paggahitaggāhappavattā cariyāva. **Āyūhanakkhaṇeti** tassa dhammoti gahitassa pavattanakkhaṇe. **Sukhanti** akicchaṃ. Tenāha “**sukara**”nti. **Dukkhavipākanti** aniṭṭhaphalavipaccanaṃ.

**469.** Yathā cakkhādīnaṃ pañcannaṃ indriyānaṃ yathāsakaṃ visayaggahaṇaṃ sabhāvasiddhaṃ, evaṃ manasopi. Te ca visayā iṭṭhākārato gahaṇe na koci doso, purisattabhāve na ca te dosaṃ pavattentīti ayaṃ tesam samaṇabrāhmaṇānaṃ laddhīti āha “**vatthukāmesupi kilesakāmesupi doso natthī**”ti, assādetvā visayaparibhoge natthi ādīnavo, tappaccayā na koci antarāyoti adhippāyo. **Pātabyataṃ āpajjantīti** paribhuñjanakataṃ upagacchanti. Paribhogattho hi ayaṃ **pā**-saddo kattusādhano ca **tabya**-saddo, yathārucci paribhuñjantīti attho. Kilesakāmopi assādiyamāno vatthukāmantogadhoyeva, kilesakāmasena pana nesaṃ assādetabbatāti āha “**vatthukāmesu kilesakāmena pātabyata**”nti. **Kilesakāmenāti** karaṇatthe karaṇavacananaṃ. **Pātabyataṃ paribhuñjitabbatanti** etthāpi kattuvasevā attho veditabbo. **Moḷiṃ katvāti** veṇibandhavasena moḷiṃ katvā. **Tāpasaparibbājikāhīti** tāpasapabbajjūpagatāhi. **Pariññaṃ paññapentīti** idaṃ “pahānamāhamsū”ti padasseva vevacananti “**pahānaṃ samatikkamaṃ paññapentī**”ti vuttaṃ. Tena kāmā nāmete aniccā dukkhā vipariñāmadhammāti yāthāvato pariñānaṃ idha “pahāna”nti adhippettaṃ, na vinābhāvamattanti dasseti. **Māluvāsipāṭikāti** māluvāvidalaṃ māluvāphale poṭṭalikā. **Santāsaṃ āpajjeyyāti** sāle adhivatthadevatāya pavattiṃ gahetvā vuttaṃ. Tadā hi tassā evaṃ hoti. **Koviḷārapattasādisehīti** mahākoviḷārapattasaṅṭhānehi. Saṅṭhānavasena hettaṃ vuttaṃ, māluvāpattā pana koviḷārapattehi mahantatarāni ceva ghanatarāni ca hontī. Vipulabahughanagarupattatāya **mahantaṃ bhāraṃ janetvā. Sāti** māluvālatā. **Oghananti** heṭṭhato olambanahetubhūtaṃ ghanabhāvaṃ.

**Andhavanasubhagavanaggahaṇaṃ** tesam abhilakkhitabhāvato. **Nāḷikerādīsu** tiṇajātīsu. Khādanupalakkhaṇaṃ upacikānaṃ utṭhahanaggahaṇanti āha “**utṭhaheyyu**”nti. **Keḷiṃ karontī viyāti** vilambananadī viya keḷiṃ karontī. Idāni ahaṃ taṃ ajjhottharinti pamodamānā viya ito cito ca vipphandamānā **vilambantī. Samphassopi sukho** mudutaluṇakomalabhāvato. **Dassanampi sukhaṃ** ghanabahalapattasamhatatāya. **Somanassajātāti** pubbe anussavavasena bhavanavināsabhayā santāsaṃ āpajji, idāni tassā sampattidassanena palobhitā somanassajātā ahoṣi.

**Viṭabhiṃ kareyyāti** ātānavitānavasena jaṭentī jālaṃ kareyya. Tathābhūtā ca ghanapattasaṅghannatāya chattasadiṣī hotīti āha “**chattākārena tiṭṭheyyā**”ti. **Sakalaṃ rukkhanti** upari sabbasākhāpasākhāṃ sabbarukkhāṃ. **Bhassamānāti** paliveṭhanavaseneva otaramānā. **Yāva mūlā otiṇṇasākhāhīti** māluvā bhārena onamitvā rukkhassa yāva mūlā otiṇṇasākhāhi puna abhiruhamānā. **Sabbasākhāhīti** heṭṭhā majjhe upari cāti sabbāpi sākāyo paliveṭhentī. **Samsibbitvā** jālasantānakaniyāmena jaṭetvā. Evaṃ aparāparaṃ samsibbanena **ajjhottharantī. Sabbasākhā heṭṭhā katvā sayam upari ṭhatvā** mahābhārabhāvena **vāte vā vāyante deve vā vassante padāleyya. Sākhaṭṭhakavimānanti** sākhaṭṭhābaddhaṃ vimānaṃ. Yasmā idha satthārā “seyyathāpi, bhikkhave”tiādinā bhūtapubbameva vatthu upamābhāvena āhaṭaṃ, tasmā “**idaṃ pana vimāna**”ntiādi vuttaṃ.

**471. Bahalarāgasabhāvoti** paccavekkhaṇāhi nīharitūṃ asakkuṇeyyatāya balavā hutvā

abhibhavanarāgadhātuko. **Rāgajanti** rāganimittajātaṃ. **Diṭṭhe diṭṭhe ārammaṇeti** diṭṭhe diṭṭhe visabhāgārammaṇe. **Nimittam gaṇhātīti** kilesuppattiyā kāraṇabhūtaṃ anubyañjanaso nimittam gaṇhāti, sikkhāgāravena pana kilesehi nissitaṃ maggaṃ na paṭipajjati, tato eva ācariyupajjhāyehi ānattaṃ daṇḍakammaṃ karoteva. Tenāha “**na tveva vītikkamaṃ karotī**”ti. **Hatthaparāmāsādīnīti** – “ehi tāva tayā vuttaṃ mayā vuttaṇca amutra gantvā vīmaṃsissamā”tiādīnā hatthaggaṇhādīni karonto, na karuṇāmettānidānavasena. **Mohajātikoti** bahalamohasabhāvo.

**472. Kammaniyāmenāti** purimajātisiddhena lobhussadatādiniyamitena kammaniyāmena. Idāni taṃ lobhussadatādiṃ vibhāgena dassetaṃ “**yassa hi**”tiādī āraddhaṃ. Tattha **kammāyūhanakkhaṇeti** kammakaraṇavelāya. **Lobho balavāti** tajjāya sāmaggīyā sāmattiyato lobho adhiko hoti. **Alobho mandoti** tappaṭipakkho alobho dubbalo hoti. Kathaṃ panete lobhālobhā aññamaññaṃ ujuvipaccanīkabhūtā ekakkhaṇe pavattanti? Na kho panetaṃ evaṃ daṭṭhabbaṃ “ekakkhaṇe pavattanti”ti, nikantikkhaṇaṃ pana āyūhanakkhaṇameva katvā evaṃ vuttaṃ. Esa nayo sesesu. **Pariyādātunti** abhibhavītuṃ na sakkoti. Yo hi “evaṃsundaraṃ evaṃvipulaṃ evaṃmahaggaṇhaṇca na sakkā parassa dātu”ntiādīnā amuttacāgatādivasena pavattāya cetanāya sampayutto alobho sammadeva lobhaṃ pariyādātuṃ na sakkoti. Dosamohānaṃ anuppattiyam tādīsapaccayalābheneva **adosāmohā balavanto**. **Tasmāti** lobhādosāmohānaṃ balavabhāvato alobhadosāmohānaṇca dubbalabhāvatoti vuttameva kāraṇaṃ paccāmasati. **Soti** taṃsamaṅgī. **Tena kammenāti** tena lobhādiupanissayavatā kusalakammunā. **Sukhasīloti** sakhilo. Tamevatthaṃ **akkodhanoti** pariyāyena vadati.

**Mandā alobhādosā** lobhadose pariyādātuṃ na sakkonti, **amoho pana balavā** mohaṃ pariyādātuṃ sakkotīti evaṃ yathārahaṃ paṭhamavāre vuttanayeneva atidesattho vedītabbo. **Purimanayenevāti** pubbe vuttanayānusārena. **Duṭṭhoti** kodhano. **Dandhoti** mandamañña. **Sukhasīlakoti** sukhasīlo.

Ettha ca lobhasena, dosamoha-lobhadosa-lobhamoha-dosamoha-lobhadosamohavasenāti tayo ekakā, tayo dukā, eko tikoti lobhādiussadavasena akusalapakkhe eva satta vārā, tathā kusalapakkhe alobhādiussadavasenāti cuddasa vārā labbhanti. Tattha alobhadosamohā, alobhādosamohā, alobhadosāmohā balavantoti āgatehi kusalapakkhe tatiyadutiyaṭṭhamavārehi dosussadamohussadadosamohussadavārā gahitā eva honti. Tathā akusalapakkhe lobhādosāmohā, lobhadosāmohā, lobhādosamohā balavantoti āgatehi tatiyadutiyaṭṭhamavārehi adosussadaamohussadaadosāmohussadavārā gahitā evāti akusalakusalapakkhesu tayo tayo vāre antogadhe katvā aṭṭheva vārā dassitā. Ye pana ubhayasammissatāvasena lobhālobhussadavārādayo apare ekūnapañña vārā kāmam dassetabbā, tesam asambhavato eva na dassitā. Na hi “ekasmiṃ santāne antarena avatthantaram lobho ca balavā alobho cā”tiādī yujjati. Paṭipakkhavasena vāpi etesaṃ balavadubbalabhāvo saḥajātadhamavasena vā. Tattha lobhassa tāva paṭipakkhavasena anabhibhūtātāya balavabhāvo, tathā dosamohānaṃ adosāmohehi. Alobhādīnaṃ pana lobhādianabhibhavanato. Sabbesaṇca samānājātiyasamadhībhuyya pavattivasena saḥajātadhammato balavabhāvo. Tena vuttaṃ **aṭṭhakathāyaṃ** (ma. ni. aṭṭha. 2.472) – “lobho balavā, alobho mando. Adosāmohā balavanto, dosamohā mandā”tiādī, so ca nesaṃ mandabalavabhāvo purimūpanissayato tathā āsayassa paribhāvitātāya vedītabbo. Tenevāha “**kammaniyāmenā**”ti. Sesam vuttanayattā suviññeyyamevāti.

Cūladhammasamādānasuttavaṇṇanāya līnatthappakāsanā samattā.

## 6. Mahādhammasamādānasuttavaṇṇanā

**473.** Evaṃ idāni vuccamānākāro kāmo kāmanaṃ icchā etesanti **evaṃkāmā**. Evaṃ chando chandanaṃ rocanaṃ ajjhāsayo etesanti **evaṃchandā**. Abhimukhaṃ, abhinivissa vā pakārehi eti upagacchatīti adhippāyo, laddhi. Sā hi laddhabbattham abhimukhaṃ “evameta”nti abhinivisanti tena tena pakārena upagacchatī, hatthagataṃ katvā tiṭṭhati na vissajjeti. Evaṃ vuccamānākāro adhippāyo etesanti **evaṃadhippāyā**. Bhagavā mūlaṃ kāraṇaṃ etesaṃ yāthāvato adhigamāyāti **bhagavaṃmūlakā**. Tenāha “**bhagavantañhi nissāya mayaṃ ime dhamme ājānāma paṭivijjhāmā**”ti. **Amhākaṃ**



**dhammā**ti tehi attanā adhigantabbatāya vuttaṃ. Sevitabbānañhi yāthāvato adhigamaññāni adhigacchanakasambandhīni, tāni ca sammāsambuddhamūlakāni anaññavisayattā. Tenāha “**pubbe kassapasambuddhenā**”tiādi. Bhagavā netā tesanti **bhagavaṃnettikā**. **Netā**ti sevitabbadhamme vineyyasantānaṃ pāpetā. **Vinetā**ti asevitabbadhamme vineyyasantānato apanetā. Tadaṅgavinayādivasena vā **vinetā**. **Anunetā**ti ime dhammā sevitabbā, ime na sevitabbāti ubhayaśampāpanāpanayanatthaṃ paññāpetā. Tenāha “**yathāsabhāvato**”tiādi.

Paṭisaranti etthāti paṭisaraṇaṃ, bhagavā paṭisaraṇaṃ etesanti **bhagavaṃpaṭisaraṇā**. Paṭisarati sabhāvasampāṭivedhavasena paccekamupagacchatīti vā paṭisaraṇaṃ, bhagavā paṭisaraṇaṃ etesanti **bhagavaṃpaṭisaraṇā**. **Paṭivedhavasenā**ti paṭivijjhitaṭṭabbatāvasena. Asatipi mukhe atthato evaṃ vadanto viya hotīti āha “**phasso āgacchati, ahaṃ bhagavā kiṃ nāmo**”ti. **Paṭibhātūti** ettha paṭi-saddāpekkhāya “bhagavanta”nti upayogavacanaṃ, attho pana sāmivacanaseneva veditabboti dassento āha “**bhagavato**”ti **paṭibhātūti** ca bhagavato bhāgo hotu. Bhagavato hi esa bhāgo, yadidaṃ dhammassa desanā, amhākaṃ pana bhāgo savananti adhippāyo. Keci pana **paṭibhātūti** padissatūti atthaṃ vadanti, ñāṇena dissatu, desīyatūti vā attho. **Upaṭṭhātūti** ca ñāṇassa paccupaṭṭhātu.

**474. Nissayitabbeti** attano santāne uppādanavasena apassayitabbe.

Tatīyacatutthadhammasamādānāni hi apassāya sattānaṃ etarahi āyatiñca sampattiyo abhivaḍḍhanti. **Bhajitabbeti** tasseva vevacanaṃ. **Sevitabbeti** vā sappurisupassayasaddhammassavanayonisomanasikāre sandhāyāha. **Bhajitabbeti** tappaccaye dānādīpuññadhamme.

**475. Upaṭṭipāṭīkārenāti** paṭhamāṃ saṃkilesadhamme dassetvā pacchā vodānadhammadassanaṃ satthu desanāpaṭipāṭi, yathā – “vāmaṃ muñca, dakkhiṇaṃ gaṇhā”ti (dha. sa. aṭṭha. 498; visuddhi. mahāṭī. 1.14), tathā upaṭṭipāṭīpakārena, sā ca kho purimesu dvīsu dhammasamādānesu, pacchimesu pana paṭipāṭiyāva mātīkā paṭṭhapitā. **Yathādhammarasenevāti** pahātabbapahāyakadhammānaṃ yathāsabhāveneva. Sabhāvo hi yāthāvato rasitabbato jānitabbato “raso”ti vuccati. Paṭhamāṃ pahātabbadhamme dassetvā tadanantaraṃ “ime dhammā etehi pahīyantī”ti pahāyakadhammadassanaṃ desanānupubbī. **Gahaṇaṃ** ādiyaṇaṃ attano santāne uppādanaṃ.

**478.** Vadhadanḍādīhi bhīṭassa upasaṅkamane, micchā caritvā tathā apagamane ca pubbāparacetanānaṃ vasena micchācāro dukkhavedano hoti, tathā issānindādīhi upaddutassa aparacetanāvasena, evaṃ abhijjhāmicchādīṭṭhīsupi yathārahaṃ veditabbaṃ. **Tissannampi cetanānanti** pubbāparasanniṭṭhāpakacetanānaṃ. Adinnādānaṃ musāvādo piṣuṇavācā samphappalāpoti imesaṃ catunnaṃ sannīṭṭhāpakacetanānaṃ sukhasampayuttā vā upekkhāsampayuttā vāti ayaṃ nayo idha adhikatattā na uddhaṭo. **Domanassameva cettha dukkhanti** idaṃ pubbabhāgāparabhāgacetanāpi cettha āsannā domanassasahagatā eva hontīti katvā vuttaṃ. Anāsannā pana sandhāya “**pariyetṭhiṃ vā āpajjantassā**”tiādi vuttaṃ. Teneva micchācārābhijjhāmicchādīṭṭhīnaṃ pubbabhāgāparabhāgacetanā āsannā sannīṭṭhāpakacetanāgatikāvāti dassitaṃ hotīti daṭṭhabbaṃ. **Pariyetṭhinti** micchācārādīsu vīṭikkamītabbavatthumālāgandhādīpariyesaṇaṃ. Pāṇātipātādīsu māretabbavatthuāvudhādīpariyesaṇaṃ **āpajjantassa**. Akicchenapi tesāṃ pariyesaṇaṃ sambhavatīti “**vaṭṭatiyevā**”ti sāsāṅkaṃ vadati.

**479. Sukhavedanā hontīti** sukhavedanāpi hontīti adhippāyo. Tāsaṃ cetanānaṃ asukhavedanatāpi labbhatīti “**sukhavedanāpi hontiyevā**”ti sāsāṅkavacanaṃ. **Somanassameva cettha sukkhanti** idaṃ pubbabhāgāparabhāgacetanāpi somanassasahagatā eva hontīti katvā vuttaṃ. Tañca kho micchācāravajjānaṃ channaṃ vasena. Micchācārassa pana pubbāparabhāgassa vasena “**kāyikaṃ sukhampi vaṭṭatiyevāti** sāsāṅkavacanaṃ.

**480.** Dosajaparīḷāhavasenasā siyā kāyikampi dukkhanti adhippāyena “**so gaṇhantopi dukkhito**”ti vuttaṃ. Cetodukkhameva vā sandhāya tassa aparāparuppattidassanatthaṃ “**dukkhito domanassito**”ti vuttaṃ.

**481. Dasasupi padesūti** dasasupi koṭṭhāsesu, vākyesu vā. Upekkhāsampayuttatāpi sambhavatīti “**sukhasampayuttā hontiyevā**”ti idha sāsāṅkavacanam. Pāṇātipātā paṭiviratassa kāyopi siyā vigatadarathaparilāhoti pāṇātipātāveramaṇiādipaccayā kāyikapaṭisaṃvedanāpi sambhavatīti **sahāpi sukhenāti** ettha kāyiyasukhampi vaṭṭatiyeva.

**482. Tittakālābūti** upabhuttassa ummādādipāpanena kucchitatittakaraso alābu. **Na ruccissati** aniṭṭharasatāya aniṭṭhaphalatāya ca.

**483. Rasam detīti** rasam dasseti vibhāveti.

**484. Pūtimuttanti** pūtisabhāvamuttam. **Taruṇanti** dhārāvasena nipatantam hutvā uṇham. Tenassa uparimuttatamāha. Muttañhi passāvamaggato muccamānam kāyusmāvasena uṇham hoti.

**485. Yam bhagandarasaṃsaṭṭham lohitaṃ pakkhandatīti** bhagandarabyādhisahitāya lohitaṃpakkhandatāya vasena yam lohitaṃ vissavati. Pittasaṃsaṭṭham lohitaṃ pakkhandatīti ānetvā sambandho.

**486. Ubbiddheti** dūre. Abbhamaḥikādiupakkilesavigamena hi ākāsam uttuṅgam viya dūram viya ca khāyati. Tenāha “**dūrībhūte**”ti. Tamamyeva **tamagataṃ** “gūthagataṃ muttagata”nti (ma. ni. 2.119; a. ni. 9.11) yathā. **Bhāsate ca tapate ca virocate** ca idam catuttham dhammasamādānam vibhajantena kusalakammamāpathassa vibhajitvā dassitattā.

Saṅgararukkho kandaṃmādasapova. **Sarabhaññavasenāti** attham avibhajitvā padaso sarabhaññavasena. **Osārentassāti** uccārentassa. **Saddeti** osāraṇasaddo. Adhigatavisesam anārocutukāmā **devatā tattheva antaradhāyi**. **Tam divasanti** sathārā desitadivase. Iti attano visesādhigamanimittatāya ayam devatā imam suttaṃ piyāyati. Sesam uttānameva.

Mahādhammasamādānasuttavaṇṇanāya līnatthappakāsanā samattā.

## 7. Vīmaṃsakasuttavaṇṇanā

**487. Atthavīmaṃsakoti** attatthaparathādiatthavijānanako. **Saṅkhāravīmaṃsakoti** saṅkhatadhamme salakkhaṇato sāmāññalakkhaṇato vā āyatanādivibhāgato ca vīmaṃsako. **Satthuvīmaṃsakoti** “sathā nāma guṇato ediso ediso cā”ti satthu upaparikkhako. **Vīmaṃsakoti** vicāraḥko. Yam cetaso sarāgādivibhāgato paricchindanam, tam **cetopariyāyo**. Tenāha “**cittaparicheda**”nti. Yasmā cetopariyāyaññalābhī – “idam cittaṃ ito param pavattam idamito para”nti parassa cittupattim pajānāti, tasmā vuttam “**cetopariyāyanti cittavāra**”nti. Vāratthepi hi **pariyāya**-saddo hoti – “kassa nu kho, ānanda, pariyāyo ajja bhikkhuniyo ovaditu”ntiādīsu (ma. ni. 3.398). Cittacārantipi pāṭho, cittapavattinti attho. **Evam vijānanatthāyāti** idāni vuccamānākārena vīmaṃsanatthāya.

**488. Kalyāṇamittūpanissayanti** kalyāṇamittasaṅkhātam brahmacariyavāsassa balavasannissayam. **Upaḍḍham attano ānubhāvenāti** iminā puggalena sampādiyamānassa brahmacariyassa upaḍḍhabhāgamattam attano vimuttiṃparipācakadhammānubhāvena sijjhati. **Upaḍḍham kalyāṇamittānubhāvenāti** itaro pana upaḍḍhabhāgo yam nissāya brahmacariyam vussati, tassa kalyāṇamittassa upadesānubhāvena **hoti**, sijjhatīti attho. Lokasiddho eva ayamattho. Lokiyā hi –

“Pādo siddho ācariyā, pādo hissānubhāvato;  
Tamvijjāsevakā pādo, pādo kālena paccatī”ti. –

Vadanti. **Attano dhammatāyāti** attano sabhāvena, nāṇenāti attho. **Kalyāṇamittatāti** kalyāṇo bhadro sundaro mitto etassāti kalyāṇamitto, tassa bhāvo **kalyāṇamittatā**, kalyāṇamittavantatā. Sīlādiguṇasampannehi kalyāṇapuggaleheva ayaṇaṃ pavatti **kalyāṇasahāyatā**. Tesu eva cittena ceva kāyena ca ninnapoṇapabbhārahāvena pavatti **kalyāṇasampavaṅkatā**. **Māhevanti** evaṃ mā āha, “upaḍḍhaṃ brahmacariyassā”ti mā kathehīti attho. **Tadamināti** ettha nti nipātamattaṃ da-kāro padasandhikaro i-kārassa a-kāraṃ katvā niddeso. **Imināpīti** idāni vuccamānenapīti attho. **Pariyāyenāti** kāraṇena. Idāni taṃ kāraṇaṃ dassetuṃ “**mamaṃ hī**”tiādi vuttaṃ.

Yathā cettha, aññesupi suttesu kalyāṇamittupanissayameva visesoti dassento “**bhikkhūnaṃ bāhiraṅgasampattiṃ kathentopī**”tiādimāha. Tattha **vimutti**paripācāniyadhammeti vimuttiyā arahattassa paripācakadhamme. **Paccayeti** gilānapaccayabhesajje. **Mahājaccoti** mahākulīno.

**Kāyiko samācāro**ti abhikkamapaṭikkamādiko satisampajaññaparikkhato pākatiko ca. **Vīmaṃsakassa** upaparikkhakassa. **Cakkhuvīññeyyo nāma** cakkhudvārānusārena viññātabbattā. **Sotaviññeyyoti** etthāpi eseva nayo. **Samkiliṭṭhāti** rāgādisamkilesadhammehi vibādhitā, upatāpitā vidūsitā malīnā cāti attho. Te pana tehi samannāgatā hontīti āha “**kilesasampayuttā**”ti. Yadi na cakkhusotaviññeyyā, pāliyaṃ kathaṃ tathā vuttāti āha “**yathā panā**”tiādi. **Kāyavacīsamācārāpi samkiliṭṭhāyeva nāma** samkiliṭṭhacittasamuṭṭhānato. Bhavati hi taṃhetukepi tadupacāro yathā “semho guḷo”ti. “Mā me idaṃ asāruppaṃ paro aññāsī”ti pana **paṭicchannatāya na na upalabbhanti**. “**Na kho mayaṃ, bhante, bhagavato kiñci garahāmā**”ti vatvā garahitabbābhāvaṃ dassento “**bhagavā hī**”tiādimāha. Abhāvitamaggassa hi garahitabbatā nāma siyā, na bhāvitamaggassa. **Esa** uttaro māṇavo “buddhampi garahitvā pakkamissāmī”ti katvā anubandhi. **Evaṃ cintesi** mahābhinnikkhamanādivase attano vacane aṭṭhitattā. **Kiñci vajjaṃ apassanto** māro evamāha –

“Satta vassāni bhagavantaṃ, anubandhiṃ padāpadaṃ;  
Otāraṃ nādhigacchissaṃ, sambuddhassa satīmato”ti. (su. ni. 448);

**Kāle kaṇhā, kāle sukkāti** yathāsamādinnaṃ sammāpaṭipattiṃ parisuddhaṃ katvā pavattetuṃ asakkontassa kadāci kaṇhā aparisuddhā kāyasamācārādayo, kadāci sukkā parisuddhāti evaṃ antarantarā byāmissavasena **vomissakā**. **Nikkilesāti** nirupakkilesā anupakkiliṭṭhā.

**Anavajjaṃ** vajjarahitattā. **Dīgharattanti** accantasamyoge upayogavacanaṃ. **Samāpannoti** sammā āpanno samaṅgībhūto. Tenāha “**samannāgato**”ti. Attanā katassa asāruppassa paṭicchādanatthaṃ **āraññako viya hutvā**. **Tassa parihāranti** uḷārehi pūjāsakkārehi manussehi tassa parihariyamānataṃ. **Atidappitoti** evaṃ manussānaṃ sambhāvanāya ativiya datto gabbito.

**Na ittarasamāpannoti jānāti**. Kasmā? Sīlaṃ nāma dīghena addhunā jānitabbaṃ, na ittarena. Idāni anekajātisamudācāravasena tathāgato imaṃ kusalaṃ dhammaṃ dīgharattaṃ samāpanno, tañcassa ativiya acchariyanti dassetuṃ “**anacchariyaṃ ceta**”ntiādi vuttaṃ.

**Araññagāmake**ti araññapadesa ekasmiṃ khuddakagāme. Tattha nesam divasa divasa piṇḍāya caraṇassa avicchinnataṃ dassetuṃ “**piṇḍāya carantī**”ti vuttaṃ. **Pivantīti** etthāpi eseva nayo. **Dullabhaloṇo hoti** samuddassa dūrātāya.

Tadā kira videharaṭṭhe soḷasa gāmasahassāni mahantāneva. Tenāha – “**hitvā gāmasahassāni, paripuṇṇāni soḷasā**”ti. Idāni kasmā “**sannidhiṃ dāni kubbasī**”ti maṃ ghaṭṭethāti vatthukāmo taṃ anāvikatvā “**loṇa...pe... na karothā**”ti āha. Gandhāro tassādhippāyaṃ vibhāvetukāmo “**kiṃ mayā kataṃ vedehīsī**”ti āha.

Itaro attano adhippāyaṃ vibhāvento “**hitvā**”ti gāthamāha. Itaro “**dhammaṃ bhaṇāmī**”ti gāthanti

evaṃ sabbāpi nesam vacanapaṭivacanagāthā. Tattha **pasāsasīti** ghaṭṭento viya anusāsasi. **Na pāpamupalimpati** cittappakopābhāvato. **Mahatthiyanti** mahāatthasamhitam. **No ce assa sakā buddhīti**ādi vedehaisino – “ācariyo mama hitesitāya ṭhatvā dhammaṃ eva bhaṇatī”ti yoniso ummujjanākāradassanaṃ. Tenāha “**evañca pana vatvā**”tiādi.

“Ñattā”ti loke ñāyati vissutoti ñāto, ñātassa bhāvo **ñattam**. **Ajjhāpannoti** upagato. Ñatta-ggahaṇena patthaṭayasatā vibhāvitāti āha “**yasañca parivārasampatti**”nti. **Kinti** kimpayojanaṃ, ko ettha dosoti adhippāyo.

**Tattha tattha vijjhantoti** yasamadena parivāramadena ca matto hutvā gāmepe vihārepi janavivittepe saṅghamajjhepe aññe bhikkhū ghaṭṭento “mayham nāma pādā itaresam pādaphusanaṭṭhānaṃ phusantī”ti aphisutukāmatāya aggapādena bhūmiṃ phusanto viya carati. **Onamatīti** nivātavuttitāya avanamati anuddhato atthaddho hoti. **Akiñcanabhāvanti** “pabbajitena nāma akiñcanaññena samapariggahena bhavitabba”nti akiñcanajjhāsayaṃ paṭiavekkhitvā. **Lābhepi tādi, alābhepi tādi**ti yathā alābhakāle lābhassa laddhakālepi tathēvāti tādi ekasadiṣo. **Yase** satipi mahāparivārakālepi.

**Abhayo hutvā uparatoti** nibbhayo hutvā bhayassa abhāveneva oramitabbato uparato bhayahetūnaṃ pahīnatā. Tañca kho na katipayakālaṃ, atha kho accantameva uparatoti **accantūparato**. Atha kho bhāyitabbavatthum avekkhitvā tato **bhayena uparato**. Kilesā eva bhāyitabbato **kilesabhayaṃ**. Esa nayo sesesupi. **Satta sekkhāti** satta sekkhāpi bhayūparatā, pageva puthujjanoti adhippāyo.

**Thaṇḍilapīṭhakanti** thaṇḍilamañcasadiṣam pīṭhakanti attho. **Nissāyāti** apassāya taṃ apassāyaṃ katvā. Dvinnam majjhe thaṇḍilapīṭhakaṃ dvāre ṭhatvā oloketassa nevāsikabhikkhussa na paññāyī. **Asaññatanīhārenāti** na saññatākārena. “Maṃ bhāyanto heṭṭhāmañcaṃ pavīṭṭho bhavissatī”ti heṭṭhāmañcaṃ **oloketvā**. **Ukkāsi** “bahi gacchanto akkositvā mā apuññaṃ pasavī”ti. **Adhivāsetunti** tādisam iddhānabhāvaṃ disvāpi paṭapaṭayanto attano kodham adhivāsetum asakkonto.

**Khayenevāti** rāgassa accantakkhayeneva vītarāgattā. **Na paṭisañkhāya vāretvāti** na paṭisañkhānabalena rāgapariyuṭṭhānaṃ nivāretvā vītarāgattā. **Evam** vuttappakārena. Kāyasamācārādīnaṃ saṃkiliṭṭhānaṃ vītikkamiyānañca abhāvaṃ ācārassa vodānaṃ cirakālasamāciñṇatāya ñātassa sahitabhāvepi anupakkiliṭṭhatāya abhayūparatabhāvasamannesanāya ākarīyati ñāpetum icchito attho pakārato ñāpīyati etehīti **ākārā**, upapattisāadhanakāraṇāni. Tāni pana yasmā attano yathānumatassa atthassa ñāpakabhāvena vavattihīyanti, tasmā tāni tesam mūlakāraṇabhūtāni anumānaññāni ca dassento bhagavā – “ke pañāyasmato ākārā ke anvayā”ti avocāti imamattham vibhāvento “**ākārāti kāraṇāni, anvayāti anubuddhiyo**”ti āha. Yathā hi loke diṭṭhena dhūmena adiṭṭham aggiṃ anveti anumānato jānāti, evaṃ vīmaṃsako bhikkhu – “bhagavā ekekavīhāresu suppaṭipannesu duppaṭipannesu ca yathā ekasadiṣatādassanena abhayūparatataṃ anveti anumānato jānāti, suppaṭipannaduppaṭipannapuggalesu anussādanānapasādanappattāya satthu aviparītadhammadesanatāya sammāsambuddhatam saṅghasuppaṭipattiñca anveti anumānato jānāti, evaṃ jānanto ca abhayūparato tathāgato sabbadhi vītarāgattā, yo yattha vītarāgo, na so tannimittam kiñci bhayaṃ passati seyyathāpi brahmā kāmabhavanimittam, tathā sammāsambuddho bhagavā aviparītadhammadesanattā, svākhāto dhammo ekantaniyyānikattā, suppaṭipanno saṅgho aveccappasannattā”ti vatthuttayaṃ guṇato yāthāvato jānāti.

**Gaṇabandhanenāti** “mama saddhivīhārikā mama antevāsikā”ti evaṃ gaṇe apekkhāsāñkhātena bandhanena baddhā payuttā. **Tāya tāya paṭipattiyāti** “sugatā duggatā”ti vuttāya suppaṭipattiyā duppaṭipattiyā ca. **Ussādanāti** guṇavasena ukkaṃsanā. **Apasādanāti** hīlanā. Ubhayattha **gehassitavasenāti** iminā sammāpaṭipattiyā paresam uyyojanattham – “paṇḍito, bhikkhave, mahākaccāno”tiādinā (ma. ni. 1.205; 3.285, 322) guṇato ukkaṃsanampi āyatim saṃvarāya yathāparādham garahaṇampi na nivāreti.

**489.** Vīmaṃsakassapi adhippāyo vīmaṃsanavasena pavatto. **Mūlavīmaṃsako** hetuvāditāya. Gaṇṭhivīmaṃsakassa anussutibhāvato vuttaṃ “**parasseva kathāya niṭṭhaṅgato**”ti. Tenāha bhagavā – “parassa cetopariyāyaṃ ajānantenā”ti. **Tathāgatova paṭipucchitabboti** iminā pubbe sādharmaṇato vuttaṃ anumānaṃ ukkaṃsaṃ pāpetvā vadati. Ukkāsaṃgatañhetuṃ anumānaṃ, yadidaṃ sabbaññuvacanaṃ avisaṃvādaṃ sāmāññato aputhujjanagocarassa atthassa anumānato. Tividho hi attho, koci paccakkhasiddho, yo rūpādidhammānaṃ paccattavedaniyo aniddisitabbākāro. Koci anumānasiddho, yo ghaṭṭādisu pasiddhena paccayāyattabhāvena sādhiyamāno saddādīnaṃ aniccatādiākāro. Koci okappanasiddho, yo pacurajanassa accantamadiṭṭho saddhāvisayo paralokanibbānādi. Tattha yassa satthuno vacanaṃ paccakkhasiddhe anumānasiddhe ca atthe na visaṃvādeti aviparīttappavattiyā, tassa vacanena saddheyyatthasiddhi, saddheyyarūpā eva ca yebhuyyena satthugūṇā accantasambhavato.

**Esa mayhaṃ pathoti** yvāyaṃ ājīvaṭṭhamakasiḷasaṅkhāto mayhaṃ oramattako guṇo, esa aparacittaviduno vīmaṃsakassa bhikkhuno mama jānanapatho jānanamaggo. **Esa gocaroti** eso ettako eva tassa mayi gocaro, na ito paraṃ. Tathā hi **brahmajālepi** (dī. ni. 1.7) bhagavatā ājīvaṭṭhamakasiḷameva niddiṭṭhaṃ. **Etāpāthoti** ettakāpātho. Yo sīle patiṭṭhito “etaṃ mamā”ti, “imināhaṃ sīlena devo vā bhavissāmi devaññataro vā”ti taṇhāya parāmasanto, tassa visesabhāgiyatāya, nibbedhabhāgiyatāya vā akāraṇena taṇhaṃ anativattanato so tammayo nāma. Tenāha “**na tammayo na sataṇho**”tiādi.

Sutassa uparūpari visesāvahabhāvena **uttaruttarañceva** tassa ca visesassa anukkamena paṇītatarabhāvato **paṇītatarāñca katvā deseti**. **Savipakkhanti** pahātabbapahāyakabhāvena sappaṭipakkhaṃ. **Kaṇhaṃ paṭibāhitvā sukkanti** idaṃ dhammajātaṃ kaṇhaṃ nāma, imassa pahāyakaṃ idaṃ sukkāṃ nāmāti evaṃ kaṇhaṃ paṭibāhitvā sukkāṃ. **Sukkaṃ paṭibāhitvā kaṇhanti** etthāpi eseva nayo. Idha pana “iminā pahātabba”nti vattabbaṃ. **Saussāhanti** sabyāpāraṃ. Kiriyaamayacittānañhi anupacchinnāvijjātaṇhāmānādike santāne sabyāpāratā saussāhatā, savipākadhammatāti attho. **Tasmiṃ desite dhammeti** tasmiṃ satthārā desite lokiyalokuttaradhamme. **Ekaccaṃ** ekadesabhūtaṃ maggaphalanibbānasāṅkhātaṃ **paṭivedhadhammaṃ abhiññāya** abhivisiṭṭhāya maggapaññāya jānitvā. **Paṭivedhadhammena maggena**. **Desanādhhammeti** desanārulhe pubbabhāgiye bodhipakkhiyadhamme **niṭṭhaṃ gacchati** – “addhā imāya paṭipadāya jarāmaṇato muccissāmī”ti. Pubbe pothujjanikasaddhāyapi pasanno, tato **bhiyyosomattāya** aviparīttadhammadesano **sammāsambuddho so bhagavāti satthari pasīdati**. **Niyyānikattāti** vaṭṭadukkhatto eva tato niyyānāvahattā. **Vaṅkādīti ādi-**saddena aññaṃ asāmicipariyāyaṃ sabbaṃ dosaṃ saṅgaṇhāti.

**490. Imehi satthuvīmaṃsanakāraṇehīti** “parisuddhakāyasamācārādīhi ceva uttaruttaripaṇītaṇṭhaaviparīttadhammadesanāhi cā”ti imehi yathāvuttehi satthuupaparikkhanakāraṇehi. **Akkharasampiṇḍanapadehīti** tesameva kāraṇānaṃ sambodhanehi akkharasamudāyalakkhaṇehi padehi. **Idha vuttehi akkharehīti** imasmiṃ sutte vuttehi yathāvuttassa atthassa abhiyaññanato byañjanasaññitehi akkharehi. **Okappanāti** saddheyyavatthuṃ okkantivā pasīdanato okappanalakkhaṇā. **Saddhāya mūlaṃ nāmāti** aveccappasādabhūtaṃ saddhāya mūlaṃ nāma kāraṇanti saddahanassa kāraṇaṃ parisuddhakāyasamācārādikaṃ. **Thirā** paṭipakkhasamucchena suppatiṭṭhitattā. **Harituṃ na sakkāti** apanetuṃ asakkuṇeyyā. Itaresu samaṇabrāhmaṇadevesu vattabbameva natthīti āha “**samitapāpasamaṇena vā**”tiādi.

“Buddhānaṃ kesañci sāvakānañca vibādhanatthaṃ māro upagacchati”ti sutapubbattā “**ayaṃ māro āgato**”ti cintesi. Ānubhāvasampannaena ariyasāvakena pucchitattā **musāvādaṃ kātuṃ nāsakkhi**. **Eteti** yathāvutte samitapāpasamaṇādayo ṭhapetvā. **Sabhāvasamannesanāti** yāthāvasamannesanā aviparīttavīmaṃsā. **Sabhāvenevāti** sabbhāveneva yathābhūtaguṇato eva. **Suṭṭhu** sammadeva. **Samannesitoti** upaparikkhito. Sesāṃ suviññeyyamevāti.

Vīmaṃsakasuttavaṇṇanāya līnatthappakāsanā samattā.

## 8. Kosambiyasuttavaṇṇanā

**491. Tasmāti** yasmā kosambarukkhavatī, tasmā nagaraṃ kosambītisaṅkhamagamāsī. Kusambassa vā isino nivāsabhūmi kosambī, tassāvidūre bhavattā nagaraṃ **kosambī**.

**Ghositaseṭṭhinā kārīte ārāmeti** ettha ko ghositaseṭṭhi, kathañcānena ārāmo kārītōti antolīnāya codanāya vissajjane samudāgamato paṭṭhāya ghositaseṭṭhiṃ dassetuṃ “**addilaraṭṭhaṃ nāma ahoṣī**”tiādi āradḍhaṃ. **Kedāraparicchinanti** tattha tattha kedārabhūmiyā paricchinnaṃ. **Gacchantoti** kedārapāḷiyā gacchanto. **Pahūtapāyasanti** pahūtataṃ pāyaṃ, taṃ pana garu siniddhaṃ antarāmagge appāhāratāya mandagahaṇiko samāno jīrāpetuṃ nāsakkhi. Tenāha “**jīrāpetuṃ asakko**”tiādi. Yasavati rūpavati **kulaghare nibbatti**. **Ghositaseṭṭhi nāma jātoti** evamettha saṅkhepeneva ghositaseṭṭhivatthuṃ katheti, vitthāro pana **dhammapadavatthumhi** (dha. pa. aṭṭha. 1.sāmāvāṭivatthu) vuttanayeneva veditabbo.

**Upasaṃkappanavasenāti** upasaṅkappananiyāmena. **Āhāraparikkhīṇakāyassāti** āhāranimittaparikkhīṇakāyassa, āhārakkhayena parikkhīṇakāyassāti attho. **Suññāgāreti** janavivitte phāsukaṭṭhāne.

**Kalahassa pubbhāgo bhaṇḍanaṃ nāmāti** kalahassa hetubhūtā paribhāsā taṃsadisī ca anīṭṭhakiriyā bhaṇḍanaṃ nāma. **Hatthaparāmāsādivasenāti** kujjhivā aññamaññassa hatthe gahetvā parāmasanaaccantabandhanādivasena. “Ayaṃ dhammo”tiādinā viruddhavādabhūtaṃ āpannāti **vivādāpannā**. Tenāha “**viruddhabhūta**”ntiādi. Mukhasannissitatāya vācā idha “**mukha**”nti adhippetāti āha “**mukhasattihīti vācāsattihī**”ti. **Saññattinti** saññāpanaṃ “ayaṃ dhammo, ayaṃ vinayo”ti saññāpetabbaṃ. **Nijjhattinti** yāthāvato tassa nijjhānaṃ. **Aṭṭhakathāyaṃ** pana “**saññattivevacanameveta**”nti vuttaṃ.

**Sace hoti desessāmīti** subbacatāya sikkhākāmatāya ca āpattiṃ passi. **Natthi te āpattīti** anāpattipakkhopi ettha sambhavatīti adhippāyenāha. Sā panāpatti eva. Tenāha – “**tassā āpattiyā anāpattidiṭṭhi ahoṣī**”ti.

**492. Kalahabhaṇḍanavasenāti** kalahabhaṇḍanassa nimittavasena. **Yathānusandhināva gatanti** kalahabhaṇḍanānaṃ saraṇīyadhammapaṭipakkhattā tadupasaṃvāhā heṭṭhādesanāya anurūpāva uparidesanāti yathānusandhināva uparisuttadesanā pavattā. **Saritabbayuttāti** anussaraṇārahā. **Sabrahmacārīnanti** sahadhammikānaṃ. Piyāṃ piyāyitabbaṃ karontīti **piyakaraṇā**. Garuṃ garuṭṭhāniyaṃ karontīti **garukaraṇā**. **Saṅgahaṇatthāyāti** saṅgahavatthuvisesabhāvato sabrahmacārīnaṃ saṅgaṇānāya saṃvattantīti sambandho. **Avivādanatthāyāti** saṅgahavatthubhāvato eva na vivādanāya. Sati ca avivādanahetubhūtasāṅgahaṇatte tesāṃ vasena sabrahmacārīnaṃ samaggabhāvo bhedābhāvo siddhoyevāti āha “**sāmaggiyā**”tiādi. Mijjati siniyhati etāyāti mettā, mittabhāvo, mettā etassa atthīti **mettaṃ**, kāyakammaṃ. Taṃ pana yasmā mettāsahagatacittasamuṭṭhānaṃ, tasmā vuttaṃ “**mettacittena kattabbaṃ kāyakamma**”nti. **Imāni** mettakāyakammādīni **bhikkhūnaṃ vasena āgatāni** pāṭhe bhikkhūhi paccupaṭṭhapetabbaṭāvacanato. **Bhikkhugahaṇeneva** cettha sesasahadhammikānampi gahaṇaṃ daṭṭhabbaṃ. Bhikkhuno sabbampi anavajjakāyakammaṃ ābhisamācārikakammantogadhamevāti āha – “**mettacittena...pe... kāyakammaṃ nāmā**”ti. Vattavasena pavattiyamānā cetiyabodhīnaṃ vandanā mettāsadisīti katvā tadatthāya gamanaṃ mettaṃ kāyakammanti vuttaṃ. **Ādi-saddena** cetiyabodhibhikkhūsu vuttāvasesaapacāyanādiṃ mettāvaseṇa pavattaṃ kāyikaṃ kiriyāṃ saṅgaṇhāti.

**Tepiṭakampi buddhavacanaṃ** kathiyamānanti adhippāyo. **Tīṇi sucaritāni** kāyavaḥmanosucaritāni. **Cintananti** iminā evaṃ cintanamattampi mettaṃ manokammaṃ, pageva vidhipaṭipannā bhāvanāti dasseti.

**Sahāyabhāvūpagamaṇaṃ** tesam purato. Tesu karontesuyeva hi sahāyabhāvūpagamaṇaṃ **sammukhā kāyakammaṇaṃ nāma** hoti. Kevalaṃ “devo”ti avatvā guṇehi thirabhāvajotanaṃ **devattheroti** vacanaṃ **paggayha vacanaṃ**. Mamattabodhanaṃ vacanaṃ **mamāyanavacanaṃ**. Ekantatirokkhakassa manokammassa sammukhatā nāma viññattisamuṭṭhāpanavaseneva hoti, tañca kho loke kāyakammanti pākaṭaṃ paññātaṃ hatthavikārādiṃ anāmasitvā eva dassento “**nayanāni ummiletvā**”ti āha. Tathā hi vacībhedavasena pavatti na gahitā.

Laddhapaccayā labbhantīti **lābhā**, parisuddhāgamaṇā paccayā. Na sammā gayhamānāpi na dhammaladdhā nāma na hontīti tappatīsedhanatthaṃ pāliyaṃ “**dhammaladdhā**”ti vuttaṃ. Deyyaṃ dakkhiṇeyyañca appaṭivibhattaṃ katvā bhuñjatīti **appaṭivibhattabhogī**. Tenāha “**dve paṭivibhattāni nāmā**”tiādi. **Cittena vibhajananti** etena – “cittuppādamattenapi vibhajanaṃ paṭivibhattaṃ nāma, pageva payogato”ti dasseti.

**Paṭiggaṇhantova...pe... passatīti** iminā āgamanato paṭṭhāya sādharmaṇabuddhiṃ upaṭṭhāpeti. Evaṃ hissa sādharmaṇabhogitā sukarā, sāraṇiyadhammo cassa supūro hoti. **Vattanti** sāraṇiyadhammapūraṇavattaṃ.

**Dātabbanti** avassaṃ dātabbaṃ. Attano palibodhavasena sapaṭibodhasseva pūretuṃ asakkuṇeyyattā odissakadānampissa na sabbattha vāritanti dassetuṃ “**tena paṇā**”tiādi vuttaṃ. **Adātumpīti pi**-saddena dussīlassapi atthikassa satī sambhave dātabbanti dasseti. Dānañhi nāma kassaci na nivāritā.

**Mahāgirigāmo nāma** nāgadīpapasse eko gāmo. **Sāraṇiyadhammo me, bhante, pūrito...pe... pattagataṃ na khīyatīti** āha tesam kukkucavinodanattaṃ. Taṃ sutvā tepi therā “sāraṇiyadhammapūraṇako aya”nti abbhāññāmsu. Daharakāle eva kiresa sāraṇiyadhammapūraṇako ahosi, tassā ca paṭipattiyā avañjhabhāvavibhāvanattaṃ “**ete mayhaṃ pāpuṇissantī**”ti āha.

Ahaṃ sāraṇiyadhammapūrikā, mama pattapariyāpannenapi sabbāpimā bhikkhuniyo yāpessantīti āha “**mā tumhe tesam gatabhāvaṃ cintayitthā**”ti.

**Sattasu āpattikkhandhesu ādimhi vā ante vā, vemajjheti** ca idaṃ uddesāgatapālīvasena vuttaṃ. Na hi añño koci āpattikkhandhānaṃ anukkamo atthi. **Pariyante chinnaśāṭako viyāti** vatthante, dasante vā chinnavattaṃ viya. **Khaṇḍanti** khaṇḍavantaṃ, khaṇḍitaṃ vā. **Chiddanti** etthāpi ese va nayo. Visabhāgavaṇṇena upaḍḍhaṃ, tatiyabhāgaṃ vā sambhinnavaṇṇaṃ **sabalaṃ**, visabhāgavaṇṇeheva pana bindūhi antarantārā vimissaṃ **kammāsaṃ**, ayaṃ imesaṃ viseso. **Taṇhādāsabyato mocanavacaneneva** tesam sīlānaṃ vivaṭṭupanissayatamāha. **Bhujissabhāvakarāṇatoti** iminā bhujissakarāni bhujissānīti uttarapadalopenāyaṃ niddesoti dasseti. Aviññūnaṃ appamaṇatāya “**viññuppasatthāni**”ti vuttaṃ. **Taṇhādīṭṭhīhi aparāmaṭṭhattāti** – “imināhaṃ sīlena devo vā bhavissāmi devaññataro vā”ti taṇhāparāmāseṇa – “imināhaṃ sīlena devo hutvā tattha nicco dhuvo sassato bhavissāmi”ti diṭṭhiparāmāseṇa ca aparāmaṭṭhattā. **Parāmaṭṭhanti** codetuṃ. Sīlaṃ nāma avippaṭisārādīpārampariyena yāvadeva samādhisampādanatthanti āha “**samādhisamvattakāni**”ti. Samānabhāvo sāmāññaṃ, paripuṇṇacatupārisuddhibhāvena majjhe bhinnasuvaṇṇassa viya bhedaḥbhāvato sīlena sāmāññaṃ sīlasāmāññaṃ, taṃ gato upagatoti **sīlasāmāññagato**. Tenāha “**samānabhāvūpagatasīlo**”ti.

**Yāyaṃ diṭṭhīti** yā ayaṃ diṭṭhi mayhañceva tumhākañca paccakkhabhūtā. Catusaccadassanaṭṭhena diṭṭhi, “sabbe saṅkhārā aniccā, sabbe saṅkhārā dukkhā, sabbe dhammā anattā”ti, “sammāsambuddho bhagavā, svākhāto bhagavatā dhammo, suppaṭipanno saṅgho”ti ca diṭṭhiyā sāmāññaṃ **samānadiṭṭhibhāvaṃ**. **Aggaṃ** itaresaṃ sāraṇiyadhammānaṃ padhānabhāvato. Etasmiṃ sati sukhasiddhito tesam saṅgāhikaṃ, tato eva tesam saṅghāṭanikaṃ gopānasiyo aparipatante katvā saṅgaṇhāti dhāretīti **saṅgāhikaṃ**. **Saṅghāṭanti** aggabhāvena saṅghāṭabhāvaṃ. Saṅghāṭanaṃ etesaṃ atthīti **saṅghāṭanikaṃ**, saṅghāṭaniyanti vā pāṭho, saṅghāṭane niyuttanti vā saṅghāṭanikaṃ, ka-kārassa ya-kāraṃ katvā **saṅghāṭaniyaṃ**. Sāmāññato eva gahitattā napuṃsakaniddeso.

**493.** Paṭhamamaggasammādiṭṭhiṇi evaṃsabhāvā, aññamaggasammādiṭṭhīsu vattabbameva natthīti āha “**yāyaṃ sotāpattimaggadiṭṭhī**”ti. **Ettāvataṭṭhī**ti ettakenapi rāgādīsu ekekena pariyuṭṭhitacittatāyapi **pariyuṭṭhitacittoyeva nāma hoti**, pageva dvīhi, bahūhi vā pariyuṭṭhitacittatāya. **Sabbatthā**ti sabbesu aṭṭhasupi vāresu. **Suṭṭhu ṭhapitaṃ**ti yathā maggabhāvanā upari saccābhisambodho hoti, evaṃ sammā ṭhapitaṃ. Tenāha “**saccānaṃ bodhāyā**”ti. **Taṃ nāṇanti** “natthi kho me taṃ pariyuṭṭhāna”ntiadinā pavattaṃ paccavekkhaṇañāṇaṃ. **Ariyānaṃ hoti**ti ariyānameva hoti. Tesañhi ekadesatopi pahīnaṃ vattabbataṃ arahati. Tenāha “**na puthujjanāna**”nti. **Ariyanti vuttaṃ** “ariyesu jāta”nti katvā. Lokuttarahetukatāya **lokuttaranti vuttaṃ**. Tenevāha “**yesaṃ panā**”tiādi. Tathā hissa puthujjanehi asādhāraṇatā. Tenāha “**puthujjanānaṃ pana abhāvato**”ti. **Sabbavāresū**ti sabbesu itaresu chasu vāresu.

**494.** **Paccattanti** pāṭiyekkaṃ attani mama citteyeva. Tenāha “**attano citte**”ti. “Paccattaṃ attano citte nibbutiṃ kilesavūpasamaṃ labhāmī”ti imamattaṃ “**eseva nayo**”ti iminā atidisati.

**495.** **Tathārūpāya diṭṭhiyā**ti idaṃ “yathārūpāya diṭṭhiyā samannāgato”ti imassa atthassa paccāmasananti āha “**tathārūpāya diṭṭhiyā evarūpāya sotāpattimaggadiṭṭhiyā**”ti.

**496.** **Sabhāvenā**ti niyatapañcasikkhāpadatādisabhāvena. **Saṅghakammavasena**ti mānattacariyādisaṅghakammavasena. **Daharoti** bālo. **Kumāro**ti dārako. Yasmā daharo “kumāro”ti ca “yuvā”ti ca vuccati, tasmā **mandoti** vuttaṃ. Mandindriyatāya hi **mando**. Tenāha “**cakkhusotādīnaṃ mandatāyā**”ti. Evampi yuvāvattāpi keci mandindriyā hontīti tannivattanattaṃ “**uttānaseyyako**”ti vuttaṃ. Yadi uttānaseyyako, kathamassa aṅgārakkamananti? Yathā tathā aṅgārassa phusaṃ idha “akkamana”nti adhippetanti āha “**ito cito cā**”tiādi. **Manussānanti** mahallakamanussānaṃ. **Na sīghaṃ hattho jhāyati** kathinahatthatāya. **Khippaṃ paṭisaṃharati** mudutaluṇasarīratāya. **Adhivāseti** kiñci payojanaṃ apekkhitvā.

**497.** **Uccāvacānī**ti mahantāni ceva khuddakāni ca. **Tatthevā**ti sudhākammādimhiyeva. **Kasāvapacanaṃ** sudhādisaṅghakaraṇattaṃ, **udakānayaṇaṃ** dhovanādiattaṃ, haliddivaṇṇadhātulepanattaṃ **kucchakaraṇaṃ**. **Bahalapattānaṃ**ti daḷhachando. **Vacchakanti** nibbattadhenupagavacchaṃ. **Apacinā**ti apavindati, āloketīti attho. Tenāha “**apaloketi**”ti. **Tanninno hoti**ti adhisīlasikkhādininnova hoti uccāvacānampi kiṃkaraṇīyānaṃ cārittasiḷassa pūraṇavaseneva karaṇato, yonisomanasikāravaseneva ca tesaṃ paṭipajjanato. **Therassa santike aṭṭhāsi** yonisomanasikārabhāvato “taṃ taṃ samullapissāmī”ti.

**498.** Balaṃ eva **balatā**ti āha “**balena samannāgato**”ti. **Atthikabhāvaṃ katvā**ti tena dhammena savisesaṃ atthikabhāvaṃ uppādetvā. **Sakalacittenti**ti desanāyādimhi majjhe pariyosāneti sabbattheva pavattatāya sakalena anavasesena cittena.

**500.** **Sabhāvoti** ariyasāvakaṃ puthujjanehi asādhāraṇatāya āveṇiko sabhāvo. **Suṭṭhu samannesitoti** sammadeva upaparikkhito. **Sotāpattiphalasacchikiriyāyā**ti sotāpattiphalassa sacchikaraṇena, sacchikatabhāvenāti attho. Tenāha “**sotāpattiphalasacchikatañāṇenā**”ti. Paṭhamamaggaphalassa paccavekkhaṇañāṇavisesā hete pavattīkārahinnā. Tenevāha “**sattahi mahāpaccavekkhaṇañāṇehi**”ti. **Ayaṃ tāva ācariyānaṃ samānakathā**ti “idamassa paṭhamāṃ ñāṇa”ntiadinā vuttāni paccavekkhaṇañāṇāni, na maggañāṇānīti evaṃ pavattā paramparāgatā pubbācariyānaṃ samānā sādharmaṇā imissā pāḷiyā **aṭṭhakathā** atthavaṇṇanā. Tattha kāraṇamāha “**lokuttaramaggo hi bahucittakkhaṇiko nāma natthī**”ti. Yadi so bahucittakkhaṇiko siyā nānābhisamayo, tathā sati saṃyojanattayādīnaṃ ekadesappahānaṃ pāpuṇāti ariyamaggassa anantaraphalattā ekadesasotāpānattādībhāvo āpajjati, phalānaṃ vā anekabhāvo, sabbametaṃ ayuttanti tasmā ekacittakkhaṇikova ariyamaggo.

Yaṃ pana suttapadaṃ nissāya vitaṇḍavādī ariyamaggassa ekacittakkhaṇikataṃ paṭikkhipati, taṃ



dassento “**satta vassānīti hi vacanato**”ti āha. **Kilesā pana lahu...pe... chijjantīti** vadantena hi khippaṃ tāva kilesappahānaṃ, dandhapavattikā maggabhāvanāti paṭiññātaṃ hoti. Tattha sace maggassa bhāvanāya āraddhamattāya kilesā pahīyanti, sesā maggabhāvanā niratthakā siyā, atha pacchā kilesappahānaṃ, kilesā pana lahu chijjantīti idaṃ micchā, “**sotāpattiphalasacchikiriyāyā**”ti vakkhatīti. **Tato** suttapaṭijānanaṃ. **Maggam abhāvetvāti** ariyamaggaṃ paripuṇṇaṃ katvā abhāvetvā. **Attharasam viditvāti** suttassa aviparīto attho eva attharaso, taṃ yāthāvato ñatvā. Evaṃ vitaṇḍavādivādaṃ bhinditvā vuttamevatthaṃ nigametuṃ “**imāni satta ñāṇāni**”tiādi vuttaṃ. Sesam suviññeyyameva.

Kosambiyasuttavaṇṇanāya līnatthappakāsanā samattā.

## 9. Brahmanimantanikasuttavaṇṇanā

**501.** “Sassato attā ca loko cā”ti (dī. ni. 1.30) evaṃ pavattā diṭṭhi **sassatadiṭṭhi** (sam. ni. tī. 1.1.175). **Saha kāyenāti** saha tena brahmattabhāvena. **Brahmatṭhānanti** attano brahmavattthum. “**Aniccaṃ nicca**”nti vadati aniccatāya attano apaññāyamānattā. **Thiranti** daḷhaṃ, vināsābhāvato sārabhūtaṃ attho. Uppādavipariṇāmābhāvato **sadā vijjamānaṃ**. **Kevalanti** paripuṇṇaṃ. Tenāha “**akhaṇḍa**”nti. **Kevalanti** vā jātiādihi amissaṃ, virahitanti adhippāyo. Uppādādīnaṃ abhāvato eva **acavanadhammaṃ**. **Koci jāyanako vā...pe... upapajjanako vā natthi** niccabhāvato. Ṭhānena saddhiṃ tannivāsīnaṃ niccabhāvāhi so paṭijānāti. **Tisso jhānabhūmiyoti** dutiyatatiyacatutthajjhānabhūmiyo. Catutthajjhānabhūmivisesā hi asaññāsuddhāvāsārubbhavā. **Paṭibhāṭīti** santamyeva samānaṃ ajānantova natthīti paṭikkhipati. **Avijjāya gatoti** avijjāya saha gato pavatto. Sahayoge hi idaṃ karaṇavacanaṃ. Tenāha “**samannāgato**”ti. **Aññāṇīti** avidvā. Paññācakkhuvirahato andho bhūto, andhabhāvaṃ vā pattoti **andhībūto**.

**502.** Tadā bhagavato subhagavane viharāṇassa avicchinnataṃ sandhāya vuttaṃ “**subhagavane viharatīti ñatvā**”ti. Tattha pana tadāssa bhagavato adassanaṃ sandhāyāha “**kattha nu kho gatoti olokeno**”ti. **Brahmalokaṃ gacchantaṃ disvāti** iminā katipayacittavārasena tadā bhagavato brahmalokagamaṃ jātaṃ, na ekacittakkaṇṇenāti dasseti. Na cettha kāyagatiyā cittapariṇāmanam adhippetam – “seyyathāpi nāma balavā puriso samīñjitaṃ vā bāhaṃ pasāreyyā”tiādivacanaṃ (ma. ni. 1.501). Yaṃ panettha vattabbaṃ, taṃ heṭṭhā vuttameva. **Vichandanti** chandavigamaṃ. **Apasāditoti** diṭṭhiyā gāhassa viparivattanena santajjito. “Metamāsado”ti vacanena **upatthambho hutvā**.

**Anvāvisitvāti** āvisanavasena tassa attabhāvaṃ adhibhavivā. Tathā abhibhavato hi tassa sarīraṃ pavitṭho viya hotīti vuttaṃ “**sarīraṃ pavisitvā**”ti. Yañhi sattaṃ devayakkhanāgādayo āvisanti, tassa pākaticakiriyamayaṃ cittappavattiṃ nivāretvā attano iddhānubhāvena yaṃ icchitaṃ hasitalapitādi, taṃ tena kārāpentī, kārentā ca āviṭṭhapuggalassa cittavasena kārentī. “Attanovā”ti na vattabbametam acinteyyattā kammajassa iddhānubhāvassāti keci. Apare pana yathā tadā cakkhuvīññāḍipavatti āviṭṭhapuggalasseva, evaṃ kiriyamayacittapavattipi tasseva, āvesakānubhāvena pana sāmāññatā parivattati. Tathā hi mahānubhāvaṃ puggalaṃ te āvisitum na sakkonti, tikicchāvutṭhāpane pana chavasarīraṃ anupavisitvā satantaṃ karoti vijjānubhāvena. Korakhattiyādīnaṃ pana chavasarīrassa utṭhānaṃ vacīnicchāraṇaṃ kevalam buddhānubhāvena. Acinteyyā hi buddhānaṃ buddhānubhāvāti. **Abhibhavivā ṭhitoti** sakalalokaṃ attano ānubhāvena abhibhavivā ṭhito. **Jeṭṭhakoti** padhāno, tādisam vā ānubhāvasampannattā uttamo. Passatīti **daso**. Visavacanicchāya abhāvato anavasesavisayo daso-saddoti āha “**sabbaṃ passatī**”ti. **Sabbajananti** laddhanāmaṃ sabbasattakāyaṃ. **Vase vatteti**, seṭṭhattā nimmāpakattā ca attano vase vatteti. Lokassa īsanasilatāya **issaro**. Sattānaṃ kammassa kārakabhāvena **kattā**. Thāvarajaṅgamavibhāgaṃ sakalaṃ lokaṃ nimmānetīti **nimmātā**.

Guṇavisesena loke pāsamsattā **seṭṭho**. Tādiso ca ukkaṭṭhatamo hotīti āha “**uttamo**”ti. Sattānaṃ nimmānaṃ tathā tathā sajanaṃ visajanaṃ viya hotīti āha “**tvam khattiyo**”tiādi. Jhānādisu attano citte ca ciṇṇavasittā **vasī**. **Bhūtānanti** nibbattānaṃ. Bhavaṃ abhijātaṃ arahantīti bhabyā, sambhavesino, tesam **bhabyānaṃ**. Tenāha “**aṇḍajajalābujā satta**”tiādi.

Pathavīdayo niccā dhuvā sassatā. Ye tesam “aniccā”tiādinā garahakā jigucchā sattā, te ayathābhūtavādītāya matakāle apāyanitthā ahesum. Ye pana pathavīdīnaṃ “niccā dhuvā”tiādinā pasamsakā, te yathābhūtavādītāya brahmakāyūpagā ahesuntī māro pāpimā anvayato byatirekato ca pathavīdīmukhena saṅkhārānaṃ pariññāpaññāpane ādīnavam vibhāveti tato vivecetukāmo. Tenāha “**pathavīgarahakā**”tiādi. Ettha ca māro pathavīdīdhātumahābhūtaggahaṇena manussalokaṃ, bhūtaggahaṇena cātumahārājike, devaggahaṇena avasesakāmadevalokaṃ, pajāpatiggahaṇena attano thānaṃ, brahmaggahaṇena brahmakāyike gaṇhi. Ābhassarādayo pana avisayatāya eva anena aggahitāti daṭṭhabbam. **Tañhādīṭṭhivāsenāti** tañhābhīnandanāya dīṭṭhābhīnandanāya ca vasena. “Etaṃ mama, eso me attā”ti **abhinandino** abhinandakā, abhinandanasīlā vā. **Brahmuno ovāde thitānaṃ iddhānubhāvaṃ dassētī** tesam tattha sannipatitabrahmānaṃ iddhānubhāvaṃ tassa mahābrahmuno ovāde thitattā nibbattaṃ katvā dasseti. **Yasenāti** ānubhāvena. **Siriyāti** sobhāya. **Maṃ brahmaparisam upanesīti** yādisā brahmaparisā issariyādisampattiyā, tattha maṃ uyyojesi. **Mahājanassa mārāṇatoti** mahājanassa vivaṭṭūpanissayaguṇavināsanena ānubhāvena mārāṇato. **Ayasanti** yasapaṭipakkhaṃ akittikammānubhāvañcāti attho.

**503. Kasiṇaṃ āyunti** vassasataṃ sandhāya vadati. Upanissāya setīti upasayo, upasayova **opasāyiko** yathā “venayiko”ti (ma. ni. 1.246; a. ni. 8.11; pārā. 8) āha “**samīpasayo**”ti. **Sayaggahaṇaṇicettha** nidassanamattanti dassetuṃ “**maṃ gacchanta**”ntiādi vuttaṃ. Anekatthattā dhātūnaṃ vattanattho daṭṭhabbo. **Mama vatthusmiṃ sayanakoti** mayhaṃ thāne visaye vattanako. **Bāhivāti** nīcaṃ katvā, abhibhavitvā vā. **Jajjharikāgumbatoti** ettha **jajjharikā** nāma pathaviṃ pattharivā jātā ekā gacchajāti.

**Imināti** “sace kho tvaṃ bhikkhū”tiādivacanena. **Esa** brahmā. **Upalāpetīti** saṅgaṇhāti. **Apasādetīti** niggaṇhāti. **Sesapadehīti** vatthusāyiko yathākāmakaraṇīyo bāhiteyyoti imehi padehi. **Mayhaṃ ārakkhaṃ gaṇhissasīti** mama ārakkhako bhavissasi. **Lakuṇḍakataranti** nīcataraṃ nihīnavuttisarīraṃ.

**Phusitumpi samatthaṃ kiñci na passati**, pageva ñāṇavibhavanti adhippāyo. **Nipphattinti** nippahjanaṃ, phalanti attho. Tañhi kāraṇavasena gantabbato adhigantabbato **gatīti** vuccati. **Ānubhāvanti** pabhāvaṃ. So hi jotanaṭṭhena virocanaṭṭhena **jutīti** vuccati. Mahatā ānubhāvena paresaṃ abhibhavanato mahesoti akkhāyatīti **mahesakkho**. Tayidaṃ abhibhavanaṃ kittisampattiyā parivārasampattiyā cāti āha “**mahāyaso mahāparivāro**”ti.

**Pariharantīti** sineruṃ dakkhiṇato katvā parivattanti. **Disāti** bhummattthe etaṃ paccattavacananti āha “**disāsu virocāmānā**”ti. Attano jutiyā dibbamānāya vā. **Tehīti** candimasūriyehi. **Tattakena pamāṇenāti** yattake candimasūriyehi obhāsiyamāno lokadhātusaṅkhāto eko loko, tattakena pamāṇena. Idaṃ cakkavāḷaṃ buddhānaṃ uppattiṭṭhānabhūtaṃ seṭṭhaṃ uttamaṃ padhānaṃ, tasmā yebhuyyena etthupapannā devatā aññesu cakkavāḷesu devatā abhibhuyya vattanti. Tathā hi brahmā sahampati dasasahassabrahmaparivāro bhagavato santikaṃ upagañchi. Tenāha “**ettha cakkavāḷasahassee tuyhaṃ vaso vattati**”ti. Idāni “**ettha te vattate vaso**”ti vuttaṃ vase vattanaṃ sarūpato dassetuṃ “**paroparañca jānāsī**”tiādi vuttaṃ. Tattha paṭhamagāthāyaṃ vuttaṃ **ettha**-saddaṃ ānetvā attho veditabboti dassento “**ettha cakkavāḷasahassee**”ti āha. **Uccanīceti** jātikularūpabhogaparivārādivasena ulāre ca anulāre ca. **Ayaṃ iddho ayaṃ pakatimanussoti** iminā “sarūpato evassa sattānaṃ paroparajānaṃ, na samudāgamato”ti dasseti. Yaṃ pana vakkhati “**sattānaṃ āgatiṃ gatinti**, taṃ kāmaloke sattānaṃ ādānanikkhepajānaṃamattaṃ sandhāya vuttaṃ, na kammavipākajānaṃ. Yadi hi samudāgamato jāneyya, attanopi jāneyya, na cassa taṃ atthīti, tathā āha “**itthambhāvoti idaṃ cakkavāḷa**”ntiādi. Rāgayogato rāgo etassa atthīti vā rāgo, virajjanasīlo virāgī, **taṃ rāgavirāgīnaṃ. Sahassibrahmā nāma tvaṃ** cūḷaniyā eva lokadhātuyā jānato. **Tayāti** nissakke karaṇavacanāṃ. **Catuhatthāyāti** anekahatthena sāṇipākārena kātabbapaṭappamāṇaṃ dīghato catuhatthāya, vitthārato dvihatthāya pilotikāya kātuṃ vāyamanto viya gopphake uduke nimujjitukāmo viya ca pamāṇaṃ ajānanto vihaññatīti niggaṇhāti.

**504. Tam kāyanti** tadeva nikāyaṃ. **Jānitabbaṭṭhānaṃ patvāpīti** anaññasādhāraṇā mayhaṃ silādayo guṇavisesā tāva tiṭṭhantu, īdisaṃ lokiyaṃ parittakaṃ jānitabbaṭṭhānampi patvā. Ayaṃ imesaṃ atisayena nicoti nīceyyo, tassa bhāvo **nīceyyanti** āha “**tayā nīcatarabhāvo pana mayhaṃ kuto**”ti.

**Heṭṭhūpapattikoti** uparūparito cavitvā heṭṭhā laddhūpapattiko. Evaṃ saṅkhepato vuttamatthaṃ vitthārato dassetuṃ “**anuppanne buddhuppāde**”ti āha. **Heṭṭhūpapattikaṃ katvāti** heṭṭhūpapattikaṃ patthanaṃ katvā. Yathā kenaci bahūsu ānantariyesu katesu yaṃ tattha garutaraṃ balavaṃ, tadeva paṭisandhiṃ deti, itarāni pana tassa anubalappadāyakāni honti, na paṭisandhidāyakāni, evaṃ catūsu rūpajjhānesu bhāvitesu yaṃ tattha garutaraṃ chandapaṇidhiadhimokkhādivasena sābhisaṅkhāraṇca, tadeva ca paṭisandhiṃ deti, itarāni pana aladdhokāsātāya tassa anubalappadāyakāni honti, na paṭisandhidāyakāni, tannibbattitajjhānēna āyatim punabbhavābhiniḅbatti hotīti āha “**tatiyajjhānaṃ paṇītaṃ bhāvetvā**”ti. **Tatthāti** subhakiṇhabrahmaloke. Puna **tatthāti** ābhassarabrahmaloke. **Paṭhamakāleti** tasmim bhava paṭhamasmim kāle. **Ubhayanti** atītaṃ attano nibbattaṭṭhānaṃ, tattha nibbattiyā hetubhūtaṃ attano katakammanti ubhayaṃ. **Pamussitvā** kālassa ciratarabhāvato. **Vītināmeti paṭipajjantīti** ca tadā tassā kiriyāya pavattikkhaṇaṃ upādāya pavattamānapayogo.

**Apāyesīti** pāyesi. **Pipāsīti** tasīte. **Ghammanīti** ghammakāle. **Sampareteti** ghammapariḷāhena pipāsāya abhibhūte. Nti pānīyadānaṃ. **Vatasīlavattanti** samādānavasena vatabhūtaṃ cārittasīlabhāvena samāciṇṇattā sīlavattaṃ. **Suttappabuddhova anussarāmīti** supitvā pabuddhamatto viya supinaṃ tava pubbanivutthaṃ mama pubbenivāsānussatīñāṇena anussarāmi, sabbaññutaññāṇena viya paccakkhato passāmīti attho.

**Karamareti** vilumpitvā ānīte. **Kammasajjanti** yuddhasajjaṃ, āvudhādāyininti attho.

**Enīkūlasminti** enīmigabāhullena “enīkūla”nti saṅkhaṃ gate gaṅgāya tīrappadese. **Gayhaka nīyamānanti** gayhavasena karamarabhāvena corehi attano ṭhānaṃ nīyamānaṃ.

Āvāhavivāhavasena **mittasanthavaṃ katvā**. “Evaṃ amhesu kīlantesu gaṅgeyyako nāgo kupito”ti **mayi saññampi na karontīti**. **Susukāranti** susūti pavattaṃ bheravanāganissāsaṃ.

**Gahītanāvanti** viheṭhetukāmatāya gatinivāraṇavasena gahitaṃ niggahitaṃ nāvaṃ. **Luddenāti** kurūrena. **Manussakappāti** nāvāgatānaṃ manussānaṃ viheṭhetukāmatāya.

**Baddhacaroti** paṭibaddhacariyo. Tenāha “**antevāsiko**”ti. **Taṃ nissāyevāti** raññā upaṭṭhiyamānopi rājānaṃ pahāya taṃ kappam antevāsīm nissāyeva.

**Sambuddhimantaṃ vatiṇaṃ amaññīti** ayaṃ sammadeva buddhimā vatasampannoti amaññī sambhāvesi ca.

**Nānattabhāvesūti** nānā visuṃ visuṃ attabhāvesu.

**Addhāti** ekaṃsena. **Mametamāyunti** mayhaṃ etaṃ yathāvuttaṃ tattha tattha bhava pavattaṃ āyuṃ. Na kevalaṃ mama āyumeva, atha kho **aññampi** sabbaññeyyaṃ **jānāsi**, na tuyhaṃ aviditaṃ nāma atthi. **Tathā hi buddho** sammāsambuddho tuvaṃ. No ce kathamayamattho ñāto? **Tathā hi** sammāsambuddhattā **eva te ayaṃ jalito** jotamāno **ānubhāvo obhāsayaṃ** sabbampi **brahmalokaṃ** obhāsento dibbamāno **tiṭṭhatīti** satthu asamasamataṃ pavedesi.

**Pathavattenāti** pathavīattena. Tenāha “**pathavīsabhāvenā**”ti. Ettha ca yasmā – “sabbasaṅkhārasamathoti”ādīnā (mahāva. 7; dī. ni. 2.64, 67; ma. ni. 1.281; saṃ. ni. 1.172) sādharmaṇato, “yattha neva pathavī”ti asādharmaṇato ca pathaviyā asabhāvena nibbānassa gahetabbatā atthi, taṃ

nivattetvā pathaviyā anaññasādhāraṇaṃ sabhāvaṃ gahetuṃ “**pathaviyā pathavattenā**”ti vuttaṃ. **Nāpahosinti** na pāpuṇiṃ. Idha pathaviyā pāpuṇanaṃ nāma “etaṃ mamā”tiādinaṃ gahaṇanti āha “**taṇhādīṭṭhimānaggāhehi na gaṇhi**”nti.

**Vāditāyāti** vādasīlatāya. **Sabbanti akkharaṃ niddisitvāti** “sabbaṃ kho ahaṃ brahme”tiādinaṃ bhagavatā vuttaṃ sabba-saddaṃ – “sace kho te mārīsa sabbassa sabbattena ananubhūta”nti paccanubhāsanavasena niddisitvā. **Akkhara dosaṃ gaṇhantoti** bhagavatā sakkāyasabbaṃ sandhāya sabba-sadde gahite sabbasabbavasena tadatthaparivattanena sabba-saddavacaniyatāsāmaññaena ca dosaṃ gaṇhanto. Tenāha “**sattā panā**”tiādi. Tattha yadi sabbaṃ ananubhūtaṃ “natthi sabba”nti loke anavasesaṃ pucchati. Sace sabbassa sabbattena anavasesasabhāvena ananubhūtaṃ appattaṃ, taṃ gaganakusumaṃ viya kiñci na siyā. **Athassa ananubhūtaṃ atthīti** assa sabbattena ananubhūtaṃ yadi atthi, “sabba”nti idaṃ vacanaṃ micchā, sabbaṃ nāma taṃ na hotīti adhippāyo. Tenāha “**mā heva te rittakamevā**”tiādi.

**Ahaṃ sabbañca vakkhāmi, ananubhūtañca vakkhāmi**ti ahaṃ “sabba”nti ca vakkhāmi, “ananubhūta”nti ca vakkhāmi, ettha ko dosoti adhippāyo. **Kāraṇaṃ āharantoti** sabbassa sabbattena ananubhūtaṃ atthibhāve kāraṇaṃ niddisanto. **Vijānitabbanti** maggaphalapaccavekkhaṇaññaṃhi visesato sabbasaṅkhatavisiṭṭhatāya jānitabbaṃ. **Anidassananti** idaṃ nibbānassa sanidassanaduke dutiyapadasahitatādasananti adhippāyena “**cakkhuvīññāssa āpāthaṃ anupagamanato anidassanaṃ nāmā**”ti vuttaṃ. Sabbasaṅkhatavidhuratāya vā natthi etassa nidassananti **anidassanaṃ**. Natthi etassa antoti **anantaṃ**. Tena vuttaṃ “**tayida**”ntiādi.

**Bhūtānīti** paccayasambhūtāni. **Asambhūtanti** paccayehi asambhūtaṃ, nibbānanti attho. Apabhassarabhāvaheṭṭhānaṃ sabbaso abhāvā sabbato pabhāti **sabbatopabhaṃ**. Tenāha “**nibbānato hi**”tiādi. Tathā hi vuttaṃ – “tamo tattha na vijjati”ti. (Netti. 104) **pabhūtamevāti** pakaṭṭhabhāvena ukkaṭṭhabhāvena vijjamānameva. Arūpībhāvena adesikattā sabbato pabhavati vijjati **sabbatopabhaṃ**. Tenāha “**puratthimadisāsīsū**”tiādi. Pavisanti etthāti pavisaṃ, tadeva sa-kārassa bha-kāraṃ, vi-kārassa ca lopam katvā vuttaṃ “**pabha**”nti. Tenāha “**titthassa nāma**”nti. **Vādaṃ patiṭṭhapesīti** evaṃ mayā sabbañca vuttaṃ, ananubhūtañca vuttaṃ, tattha yaṃ tayā adhippāyaṃ ajānantena sahasā appaṭisaṅkhāya dosaggahaṇaṃ, taṃ micchāti brahmānaṃ niggaṇhanto bhagavā attano vādaṃ patiṭṭhapesi.

**Gahitagahitanti** “idaṃ nicca”ntiādinaṃ gahitagahitaṃ gāhaṃ. Tattha tattha dosadassanamukhena niggaṇhantena **sattāhāraṃ vissajjāpito kiñci gahetabbaṃ** attano paṭisaraṇaṃ **adivā** parājayaṃ paṭicchādetuṃ **laṭitakaṃ kātukāmo** vādaṃ pahāya iddhiyā pāṭihāriyalīlaṃ dassetukāmo. **Yadi sakkosi mayhaṃ antaradhāyituṃ**, na pana sakkhissasīti adhippāyo. **Mūlapaṭisaṅkhatā gantukāmoti** attano pākātikena attabhāvena ṭhātukāmo. So hi paṭisaṅkhatāle nibbattasādisatāya mūlapaṭisaṅkhatāti vutto. **Aññesanti** heṭṭhā aññakāyikānaṃ brahmūnaṃ. **Na adāsī** abhisāṅkhatāyenevāyaṃ tiṭṭhatu, na pākātikarūpenāti cittaṃ uppādesi. Tena so abhisāṅkhatāyaṃ apanetuṃ avisahanto attabhāvapaṭicchādaṃ andhakāraṃ nimminituṃ ārabhi. Sattā taṃ tamaṃ viddhamseti. Tena vuttaṃ “**mūlapaṭisaṅkhatā vā**”tiādi.

**Bhavevāhanti** bhava eva ahaṃ. Ayañca eva-saddo aṭṭhānapayuttoti dassento āha “**ahaṃ bhava bhayaṃ disvāyevā**”ti, sabbasmim bhava jātiādibhayaṃ ñānacakkhunā yāthāvato disvā. **Sattabhavanti** sattasaṅkhātā bhavaṃ. Kammabhavapaccaye hi upapattibhava sattasamañña. **Vibhavanti** vimuttiṃ. Pariyesamānampi upāyassa anadhigatattā **bhaveveva disvā**. **Bhavañca vibhavesinaṃ** vibhavaṃ nibbutiṃ esaṃānaṃ sattānaṃ bhavaṃ, bhavesu uppattiñca disvāti evaṃ vā ettha attho daṭṭhabbo. **Na abhivadinti** “aho vata sukha”nti evaṃ abhivadāpanākārābhāvato na abhinivisiṃ, lakkhaṇavacanamaṃ. Gāhattho eva vā abhivāda-saddoti āha “**nābhivadi**”nti, “**na gavesi**”nti. **Bhava**ggahaṇenettha dukkhasaccaṃ, **nandi**gahaṇena samudayasaccaṃ, **vibhava**ggahaṇena nirodhasaccaṃ, **nandiñca na upādiyinti** iminā maggasaccaṃ pakāsanti āha “**iti cattāri saccāni pakāsento**”ti. Tadidaṃ catunnaṃ ariyasaccānaṃ gāthāya vibhāvanadassanaṃ. Sattā pana tesam

brahmūnaṃ ajjhāsayānurūpaṃ saccāni vitthārato pakāsentō vipassanaṃ pāpetvā arahattena desanāya kūṭaṃ gaṇhi. Te ca brahmāno keci sotāpattiphale, keci sakadāgāmiṃphale, keci anāgāmiṃphale, keci arahatte ca paṭiṭṭhahiṃsu. Tena vuttaṃ “**saccāni pakāsentō satthā dhammaṃ desesī**”tiādi. **Acchariyajātāti** sañjātacchariyā. **Samūlaṃ bhavanti** taṇhāvijjāhi samūlaṃ bhavaṃ.

**505. Mama vasaṃ ativattitānī**ti sabbaso kāmadhātusamatikkamanapaṭipadāya mayhaṃ visayaṃ atikkamitāni. Kathaṃ paṇāyaṃ tesāṃ ariyabhūmisamokkamaṃ jānātīti? Nayaggāhato – “samaṇo gotamo dhammaṃ desento saṃsāre ādīnavaṃ, nibbāne ca ānisaṃsaṃ pakāsentō veneyyajānaṃ nibbānaṃ diṭṭhameva karoti, tassa desanā avañjhā amoghā indena vissaṭṭhavajirasadisā, tassa ca āṇāya ṭhitā saṃsāre na dissantevā”ti nayaggāhena anumānena jānāti. **Sace tvaṃ evaṃ anubuddhoti** yathā tvaṃ paresaṃ saccābhisambodhaṃ vadati, evaṃ tvaṃ attano anurūpato sayambhuññaṇena buddho dhammaṃ paṭivijjhivā ṭhito. **Taṃ dhammaṃ mā upanayasīti** tayā paṭividdhadhammaṃ mā sāvakaṭṭhāpavedhaṃ pāpesi. **Idanti** idaṃ anantaraṃ vuttaṃ brahmaloke paṭiṭṭhānaṃyeva sandhāya māro vadati, te dassento “**anuppanne hi**”tiādimāha. Apāyapaṭiṭṭhānaṃ pana ājīvakanigaṇṭhādipabbajjaṃ upagate titthakare, ye keci vā pabbajitvā micchāpaṭipanne jane sandhāya vadati. **Anuppanneti** asañjāte, appatteti attho. **Anullapanatāyāti** yathā māro upari kiñci uttaraṃ lapituṃ na sakkoti, evaṃ tathā uttarabhāsanena. **Nimantanavacanenāti** viññāpanavacanena. Brahmaṃ seṭṭhaṃ nimantaṃ, brahmuno vā nimantaṃ ettha atthīti **brahmanimantanikaṃ**, suttaṃ. Yaṃ panettha atthato avibhattaṃ, taṃ suviññeyyameva.

Brahmanimantanikasuttavaṇṇanāya līnatthappakāsanā samattā.

## 10. Māratajjanīyasuttavaṇṇanā

**506. Koṭṭhamaṇupaviṭṭhoti** āsayo vaccaguttaṭṭhānatāya koṭṭhaṃ, tassa abbhantarañhettha koṭṭhaṃ. Anurūpo hutvā pavivṭṭho anupaviṭṭho. Sukhumañhi tadanucchavikaṃ attabhāvaṃ māpetvā ayaṃ tattha pavivṭṭho. **Garugaro viyāti** garukagaruko viya. U-kārassa hi o-kāraṃ katvā ayaṃ niddeso, ativiya garuko maññeti attho. Garugaru viya icceva vā pāṭho. Māsabhattaṃ māso uttarapadalopena, māsabhāttena ācītaṃ pūritaṃ **māsācītaṃ maññe**. Tenāha “**māsabhattaṃ bhuttassa kucchi viyā**”ti. Uttrapadalopena vinā atthaṃ dassetuṃ “**māsapūritapasibbako viyā**”ti vuttaṃ. **Tintamāso viyāti** tintamāso pasibbako viya. Kiṃ nu kho etaṃ mama kucchiyaṃ pubbaṃ bhārikattaṃ, kiṃ nu kho kathaṃ nu kho jātanti adhippāyo? **Upāyenāti** pathena ñāyena. Byatirekato panassa anupāyaṃ dassetuṃ “**sace panā**”tiādi vuttaṃ. Attānameva vā sandhāya “**mā tathāgataṃ vihasesī**”ti āha. Yathā hi ariyasaṅgho “tathāgataṃ devamanussapūjitaṃ, saṅghaṃ namassāma suvatthi hotū”tiādisu (khu. pā. 6.18; su. ni. 241) **tathāgototi** vuccati, evaṃ tappariyāpanā ariyapuggalā, yathā ca purimakā dutiyaaggasāvakā kappānaṃ satasahassādhikaṃ ekaṃ asaṅkhyeyaṃ pāramiyo pūretvā āgatā, ayampi mahāthero tathā āgototi **tathāgototi**. **Patiaggaḷeva aṭṭhāsīti** aggaḷassa bahibhāge aṭṭhāsi.

**507.** Rukkhadevatā nāma cātumahārājikesu nihīno kāyo, tasmā nesaṃ manussagandho paricitattā nātijegucchoti āha “**ākāsaṭṭhadevatāna**”nti. **Ābādhaṃ karotīti** dukkhaṃ janeti. **Nāgarikoti** sukumāro. **Paricokkhoti** sabbaso sucirūpo. **Ñātikoṭinti** ñātibhāgaṃ. Anādimati hi saṃsāre ñātibhāgarahito nāma satto kassacipi natthīti adhippāyo. **Idanti** “so me tvaṃ bhāgineyyo hosī”ti idaṃ vacanaṃ. **Paveṇivasenāti** tadā mayhaṃ bhāgineyyo hutvā idāni māraṭṭhāne ṭhitoti imissā paveṇiyā vasena vuttaṃ. Aññassa vā vesamaṃ dhuro **vidhuro**. Tenāha “**aññehi saddhiṃ asadiso**”ti. **Appadukkhenāti** sukheneva. Panthānaṃ avanti gacchantīti **pathāvino**. **Ettakenāti** ettāvata citakasannisaṃyena. **Udakaleṇanti** udakanissandanaleṇaṃ. **Samāpattitoti** nirodhasamāpattito. **Samāpattiphalanti** nirodhasamāpattiphalam.

**508. Dasahi akkosavatthūhīti** dasahipi akkosavatthūhi, tato kiñci ahāpentā. **Paribhāsathāti** garahatha. **Ghaṭṭethāti** anūnāhi kathāhi imesu ovijjhatha. **Dukkāpethāti** citte dukkhaṃ janetha. **Etesanti** tesāṃ bhikkhūnaṃ tumhākaṃ akkosanādīhi bhikkhūnaṃ kilesupattiyā. Tenettha **dūsī māro**

otāraṃ labhati nāmāti adhippāyo. Upaṭṭhātabbaṃ ibhaṃ arahantīti ibbhā, hatthibhaṇḍakā, hīnajīvikatāya hete ibbhā viyāti **ibbhā**, te pana sadutiyakavasena “**gahapatikā**”ti vuttā. **Kaṇhāti** kaṇhābhijātikā. Pādato jātattā **pādānaṃ apaccā**. **Ālasiyajātāti** kasivaṇijjādikammaṃ akaraṇena sañjātālasiyā. **Gūthaniddhamanapanālīti** vaccakūpato gūthassa nikkhamapadeso.

**Manussānaṃ akusalaṃ na bhaveyya** tesam tādīsāya abhisandhiyā abhāvato. Āvesakassa ānubhāvena āviṭṭhassa cittasantati viparivattatīti vuttovāyamattho. **Visabhāgavatthunti** bhikkhūnaṃ santike itthirūpaṃ, bhikkhunīnaṃ santike purisarūpanti īdisaṃ, aññaṃ vā pabbajitānaṃ asārūpaṃ visabhāgavatthum. **Vippaṭṭisārāmaṇanti** passantānaṃ vippaṭṭisārassa paccayaṃ. **Lepayaṭṭhinti** lepalittaṃ vākuraṃyaṭṭhim.

**510. Somanassavasenāti** gehassitasomanassavasena. **Aññathattanti** uppilāvitattaṃ. **Purimanayenevāti** “sace māro manussānaṃ sarīre adhimuccitvā”tiādīnā pubbe vuttanayena. Yadi mārova tathā kareyya, manussānaṃ kusalaṃ na bhaveyya, mārasseva bhaveyya, sarīre pana anadhimuccitvā tādīsaṃ pasādanīyaṃ pasādavatthum dassesi. Tenāha “**yathā hī**”tiādi.

**511. Asubhasaññāparicitenāti** sakalaṃ kāyaṃ asubhanti pavattāya saññāya sahaḡatajjhānaṃ asubhasaññā, tena paricitenā paribhāvitena. **Cetasā** cittena. **Bahulanti** abhiṇṇaṃ. **Viharatoti** viharantassa, asubhasamāpattibahulassāti attho. **Patilīyatīti** saṅkucati tattha paṭikūlatāya saṅghitattā. **Patikuṭatīti** apasakkati. **Pativattatīti** nivattati. Tato eva **na sampasāriyati**. **Rasataṇḥāyāti** madhurādirasavisayā taṇḥāya.

**Sabbaloke anabhiratisaññāti** tīsupi bhavesu aruccanavasena pavattā vipassanābhāvanā. Nibbidānupassanā hesā. **Lokacitresūti** hatthiassarathapāsādakūṭāgārādibhedesu ceva āramāraṇeyyakādibhedesu ca loka cittavicittesu. **Rāgasantāni** vūpasantarāgāni. **Dosamohasantānīti** etthāpi eseva nayo. Imesaṃ evaṃ kammaṭṭhānaggahaṇaṃ sabbesaṃ sappāyabhāvato.

**512. Sakkharaṃ gahetvāti** sakkharāsīsenā tattakaṃ bhinnapāsāṇamuṭṭhinti āha “**antomuṭṭhiyaṃ tiṭṭhanapamaṇaṃ pāsāṇa**”nti. Muṭṭhipariyāpananti attho. Ayañhi pāsāṇassa heṭṭhimakoṭi. **Hatthināgoti** mahāhatthī. Mahantapariyāyo **nāga**-saddoti keci. Ahināgādito vā visesanattham hatthināgoti vuttaṃ. Sakalasarīreneva nivattitvā apalokesīti vuttamattham vivaritum “**yathā hī**”tiādi vuttaṃ. **Na vāyanti** ettha vā-saddo avadhāraṇatthoti āha “**neva pamāṇaṃ aññāsī**”ti. **Sahāpalokanāyāti ca vacanatoti** iminā vacanena imaṃ vacanamattaṃ gahetvāti adhippāyo. **Uḷāreti** uḷāraguṇe. Bhagavantañhi ṭhapetvā natthi tadā sadevake loka tādīso guṇavisesayuttoti.

Viṣuṃ viṣuṃ paccattavedaniyo ayasūlena saddhiṃ bhūtāni cha phassāyatanāni etassāti cha phassāyatanam, dukkham. Taṃ ettha atthīti **cha phassāyataniko**, nirayo. Tenāha “**chasu phassā...pe... paccayo**”ti. Samāhanatīti samāhato, anekasatabhedo saṅkusamāhato ettha atthīti **saṅkusamāhato**, nirayo. Visapaccayatāya vedanāya ṭhitoti vedaniyo, kāraṇākāraṇena vinā paccattaṃ sayameva vedaniyoti **paccattavedaniyo**. **Ayasūlena saddhiṃ ayasūlanti** pādapadesato paṭṭhāya nirantaram abhihananavasena āgatena paṇṇāsāya janehi gahitena ayasūlena saha sīsapadesato paṭṭhāya āgataṃ. Ayasūlabhāvasāmaññaṇa cetam ekavacanaṃ, satamattāni patitāni sūlāni. **Iminā te ṭhānena cintetvāti** nissītavohārena nissayaṃ vadati. **Evaṃ vuttanti** “tadā jāneyyāsi vassasahaṣṣaṃ me niraye paccamānassā”ti evaṃ vuttaṃ. **Vuṭṭhānimanti** vuṭṭhāne bhavaṃ, antimanti attho. Tenāha “**vipākavutṭhānavedana**”nti, vipākassa pariyoṣānaṃ vedananti attho. **Dukkhatarā hoti** padīpassa vijjhāyanakkhaṇe mahantabhāvo viya.

**513. Ghattayitvā** pothetvā. **Pāṭiyekavedanājanakāti** paccekaṃ mahādukkhasamuppādakā. Ayato apagato **nirayo**, so **devadūtasuttena** (ma. ni. 3.261) dīpetabbo. Atthavaṇṇanā panassa parato sayameva āgamissati. Imaṃ pana atītavatthum āharitvā attano ñāṇānubhāvadīpanamukhena māraṃ santajjento mahāthero “**yo etamabhijānātī**”ti gāthamāha. Tassattho – **yo** mahābhīṇṇo **etam** kammaṃ

kammaphalañca hatthatale ṭhapitaṃ āmalakaṃ viya abhimukhaṃ katvā paccakkhato jānāti. Sabbaso bhinnakilesatāya **bhikkhu** sammāsambuddhassa aggasāvako, **tādisaṃ** uḷāraguṇaṃ **āsajja** ghaṭṭayitvā ekantakālakehi pāpadhammehi samannāgatattā **kaṇha** māra āyatim mahādukkhaṃ vindissasi.

**Udakaṃ vatthum katvāti** tattha nibbattanakasattānaṃ sādharmaṇakammaphalena mahāsamuddaudakameva adhiṭṭhānaṃ katvā. Tathā hi tāni kappatṭhitikāni honti. Tenāha “**kappatṭhāyino**”ti. **Tesanti** vimānānaṃ. **Etam** yathāvuttavimānavatthum tāsāṃ accharānaṃ sampattim, tassa ca kāraṇaṃ attapaccakkhaṃ katvā **jānāti**. **Pādaṅguṭṭhena kampayīti** pubbārāme visākhāya mahāupāsikāya kāritaṃ sahasagabbhapaṭimaṇḍitamahāpāsādaṃ attano pādaṅguṭṭhena kampesi. Tenāha “**idaṃ pāsādakampanasuttena dīpetabba**”nti. Idanti “yo vejayanta”nti imissā gāthāya atthajātaṃ **cūlataṇhāsankhayavimuttisutteneva** (ma. ni. 1.393) **dīpetabbaṃ**.

Tassa brahmagaṇassa tathācintanasamanantameva tasmim brahmaloke sudhammaṃ brahmasabhaṃ gantvā. **Teṇā** mahāmoggallānādayo. **Paccekaṃ disāsūti** mahāmoggallānatthero puratthimadisāyaṃ, mahākassapatthero dakkhiṇadisāyaṃ, mahākappinatthero pacchimadisāyaṃ, anuruddhatthero uttaradisāyanti evaṃ cattāro therā brahmaparisamatthake majjhe nisinnassa bhagavato samantato catuddisā nisīdimṣu. **Gāthā vuttāti** “yo brahmaṃ paripucchatī”ti gāthā vuttā. **Aññatarabrahmasuttenāti** – “tena kho pana samayena aññatarassa brahmuno evarūpaṃ pāpakaṃ diṭṭhigataṃ uppannaṃ hotī”tiādīnā (saṃ. ni. 1.176) mahāvagge āgatenā aññatarabrahmasuttena.

**Jhānavimokkhena phusīti** jhānavimokkhasannissayena abhiññāññānaṃ phassayī. Vananti jambudīpaṃ aphassayīti sambandho. Jambudīpo hi vanabahulatāya idha “vana”nti vutto. Tenāha “jambusaṇḍassa issaro”ti. **Pubbavidehānaṃ dīpanti** pubbavidehavāsīnaṃ dīpaṃ, pubbavidehadīpanti attho. **Bhūmisayā narā** nāma aparagoyānakā uttarakurukā ca. Yasmā te gehapariggahābhāvato bhūmiyaṃveva sayanti, na pāsādādīsu. **Paṭilabhīti** uppādesi. **Etam āsaṃ mā akāsīti** esā yathā pubbe dūsīmārassa, evaṃ tuyhaṃ āsā dīgharattaṃ anathāvahā, tasmā edisaṃ āsaṃ mā akāsīti mārassa ovādaṃ adāsi. Sesāṃ sabbattha suviññeyyameva.

Papañcasūdaniyā majjhimanikāyaṭṭhakathāya

Māratajjanīyasuttavaṇṇanāya līnatthappakāsanā samattā.

Niṭṭhitā ca cūlayamakavaggavaṇṇanā.

Mūlapaṇṇāsaṭṭikā samattā.

Dutiyo bhāgo niṭṭhito.